

閩書

第一冊

福建人民出版社

【明】何喬遠 編撰



〔明〕何喬遠 編撰

廈門大學 古籍整理研究所
歷史系古籍整理研究室

《閩書》校點組 校點

閩書

第一冊

福建人民出版社

(閩)新登字 01 號

MIN SHU

閩 書

(第一冊)

〔明〕何喬遠 編撰

*

福建人民出版社出版發行

(福州得貴巷 59 號)

上海傑申電腦排版有限公司排版

福州七二二八分廠印刷

開本 850×1168 毫米 1/32 32.125 印張 4 插頁 751 千字

1994 年 6 月第 1 版

1994 年 6 月第 1 次印刷

印數:1—2000

ISBN 7—211—02318—X

K·172 定價:54 元

書中如有印裝質量問題,可直接向承印廠調換

序

鄭學稼

《閩書》校點工作，歷經多年曲折、等待，終於取得了突破，完成第一冊並付梓了，其他各冊也將隨後陸續收筆問世。在此，我們衷心感謝參與其事的廈門大學古籍整理研究所和歷史系古籍整理研究室諸同志的辛勞，同時也要感謝福建人民出版社的果斷支持。

這個校點本以福建省圖書館收藏的四十冊本等原刻初印本為主校本，以其他版本為參校本校點出版，是國內外最新的《閩書》版本，也是最可靠的一個版本。

《閩書》的價值早已為學術界所公認。作為一部福建現存的最早最完整的省志，其珍貴之處自不待言，它在當前進一步改革開放之時出版，必將倍受中外學者和有識之士的重視。

謝國楨先生說過，何喬遠「是個受資本主義萌芽影響、思想比較進步的人士」，這是真知灼見。明中葉以後，隨着商品經濟的發展，資本主義生產關係萌芽的出現，確實使一批知識分子受到衝擊和影響。他們不唯理，不唯經，把目光轉向社會，去發現商品經濟發展中的社會與自我，出現了許多令腐儒和守舊官僚大夫們驚駭的觀念。他們是當時的先進知識分子，是可敬的覺醒者。研究出版他們的著作，對於保護和搶救我們的地方文獻，發掘進步的思想與科學知識，具有十分重要的意義。

一九九一年十一月國家教委召開的第三次全國高校古籍整理研究工作會議後，廈門大學的古籍整

理研究工作正在一步一步扎實地加強，支持和指導《閩書》的出版，就是其頭一件實事，我希望《閩書》校點出版工作能按期完成，其他重要鄉邦文獻的整理研究工作也能逐步上馬，福建省的學術界應對鄉邦文獻的整理研究作出更大的貢獻。謹此爲序。

一九九二年十月十二日

校點前言

《閩書》是一部著名的明代福建省志。它是福建現存最早的完整省志，《四庫總目》曰：「閩自唐林誥有《閩中記》，宋慶曆中林世程重修之，歷南宋及元，皆無總志。明成化間，莆人黃仲昭始爲《八閩通志》，王應山復爲《閩大記》、《閩都記》、《全閩記略》，皆草創未備。喬遠乃薈萃郡邑各志，參考前代載記，以成是書」，這是《閩書》具有較高參考價值的原因之一。由於它保存了許多有關福建地方史以及中國古代政治、經濟、軍事、文化、中外關係等諸多方面的珍罕記載，向來爲學術界所重視，其內容爲許多學術著作所徵引。

何喬遠（一五五七——一六三一），字稚孝，號匪莪，人稱鏡山先生，室名自誓齋、天聽閣，福建晉江人。萬曆十四年（一五八八）進士，歷官刑部主事、禮部郎中、光祿寺少卿、太僕寺少卿、左通政、太僕卿、南京工部右侍郎。立朝正直敢言，所以三度貶謫、去官。他畢生勤於著述，編寫了三部大書——《閩書》一百五十四卷、《名山藏》一百零九卷、《皇明文徵》七十四卷。《名山藏》是著名的明代私人纂修的明史。《皇明文徵》是明人詩文的彙集。此外，還有《鏡山全集》、《日本考》等多種。主要事蹟附見《明史·洪文衡傳》，以及福建地方志本傳。《閩書·我私志》記有何喬遠家族簡史。明林如源《何司徒佳話》記喬遠事蹟。

謝國禎序王重民《中國善本書提要》時，稱何喬遠「是個受資本主義萌芽影響、思想比較進步的人

士」，并舉所著《名山藏》為例，說「《名山藏》記載了歷代多所忽略的科學家和對外貿易商人的事蹟」。其實，《閩書》又何嘗不是如此？《閩書·方伎志》，就是專門為巫醫樂師百工之人和書畫家等立傳的，而且他在《閩書·我私志》中公開宣稱：「予志方伎焉，藝之精者，未始不聖也」，把那些傑出的醫生、藝術家、工匠的地位提高到與聖賢等量齊觀的地步。這類人物在方志中人傳并非絕無僅有，但是何喬遠自萬曆二十三年（一五九五）稍後，至萬曆四十七年間，長期賦閑於海外交通歷史名城的泉州，這種認識，恐怕不免帶有外來文化影響的特色。泉州港在宋元時期，曾是世界第一流海港，是「海上絲綢之路的起點」，中外經濟文化交流相當發達，留下了豐富的歷史遺蹟，何喬遠作為泉州人，在所修《閩書》中詳記當地史事，所以，《閩書》尤為近代以來陳垣、伯希和、桑原鷺藏等中外交流史學家所重視。例如其《方域志》第七卷中，關於伊斯蘭教傳入我國的時間與途徑，摩尼教創始人摩尼的生卒年及該教東漸中國的時間等，都是獨家記載的。儘管其可信性，至今學界仍在爭論，但它總算是一說，具有參考價值。再如關於宋元泉州海關——市舶使司及其主官阿拉伯裔蒲壽庚家族的歷史，《閩書》的記載也是眾所矚目的。又如《島夷志》所記東番（即台灣）文，完整保留了其友陳第所寫《東番記》的重要內容，備述早期台灣之風土民情、地理環境及與大陸交往概況，在陳第《東番記》未發現之前，該記載成為研究台灣開發史的重要資料（按陳第《東番記》全文收入明沈有容編《閩海贈言》，現藏日本東京大學東洋史研究室，台灣有方豪先生影印本，後收入《台灣文獻叢刊》第五十六種）。此外，《閩書》中還包含了中國古代史各研究領域的豐富資料。

在方志編纂史上，《閩書》的體例頗具特色。從總體說，它採用的是常見的門目體，但標題和分類卻

是別出心裁的。《四庫總目》批評它「標目詭異，多乖志例」，「分併均失當」，其實這正體現了何喬遠勇於突破傳統成見的探索精神。他把全書分爲二十二志，並標有獨特的標題。現將各志的內容簡介如下：

一、《分野志》，記福建方位。

二、《方域志》，記山川、政區、名勝、古蹟等歷史地理和人文景觀。

三、《建置志》，記城市考古資料。

四、《風俗志》，記風俗資料。

五、《版籍志》，記戶口、賦役、土田、稅糧、屯田、寺田、鹽課、雜課以及其他經濟財政資料。

六、《扞圍志》，記都司衛所等軍隊建制。

七、《前帝志》，記南宋端宗和帝昀事蹟。

八、《君長志》，記福建歷代割據勢力首領和地方軍政領袖如閩越王、陳元光、陳巖、王潮、錢佐、留從效、陳洪進、陳友定行事。

九、《文蒞志》，記福建歷代各級文官設置及名宦事蹟。

十、《武軍志》，記福建歷代各級武官設置及其業績。

十一、《英舊志》，記閩籍及外省僑閩名人行事。內分七類：（一）《縉紳》，記閩籍文官名錄及其名人行事。（二）《弁輪》，記閩籍武官名錄及其名人行事。（三）《關柝》，記閩籍抗倭、平「盜」功臣行事。（四）《韋布》，記閩籍隱士、學者、文學家行事。（五）《閭巷》，記閩籍平民名人行事。（六）《僑寓》，記外省旅閩名人行事。（七）《裔派》，記僑居外省的閩籍名人行事。

十二、《方伎志》，記醫學、藝術、工藝名人行事。

十三、《方外志》，記釋、道、仙人物。

十四、《宦寺志》，記閩籍三太監——五代林延遇、明代張敏、明代蕭敬行事。

十五、《閩閩志》，記賢女、烈婦行事。

十六、《島夷志》，記台灣、琉球、浣泥、麻刺、呂宋等國家和地區事。

十七、《靈祀志》，記各地廟宇。

十八、《祥異志》，記歷年自然變異和災害及其相應的人事。

十九、《萑葦志》，記歷代外寇、「盜賊」始末。

二十、《南產志》，記各地物產。

二十一、《舊德志》，記軼聞、叢談、詩話、文評。

二十二、《我私志》，仿《史記·太史公自序》，述全書編修經過、體例宗旨及何喬遠家族簡況。

《閩書》史料價值較高，但取材不免有失嚴謹，誤記頻出，《四庫總目》批評它「援據多舛」，「其文辭亦好刊削，字句往往不可句讀」，還是比較中肯的。

《閩書》的編修者，雖然僅署何喬遠一人，但是實際上它的前期資料工作，已經由各府縣完成。他只 是被當時福建地方當局延請，就各府新修志書，彙總編纂成省志而已，帶有半官修性質。他在《我私志》中，談到《閩書》的纂修緣起和部分經過：「萬曆庚戌（三十八年，一六一〇），巡按御史山陰陸公夢祖，久候代不得，與都御史句章丁公繼嗣、都御史武進前方伯袁公一驥，慨然欲續成之，下諸郡縣悉先修其本

郡之志，上籍御史臺，而延諸公縉紳總之。則閩縣尚書林公烜主其事，予喬遠，與前都給事中林公材，今大理寺丞、前吏部郎董公應舉，及諸公主之。陸公尋得代去，不果爲。提學副使慈谿馮公烜，則以郡縣所修書盡送予所，曰：「子其成之。」予起壬子（萬曆四十年，一六一二）之冬，以及丙辰（四十四年）之春，首尾五年，論次成書。而擷掇刪潤，予徒黃鳴晉、王有棟有力焉。」萬曆四十年纂修的《泉州府志》上，當時泉州知府陽思謙序言可證其說：「按臺會稽陸公閱閩志，而思有以續文獻之傳。方延鄉縉大夫輯理其事。八郡守吏推公之意，以告撫臺鄞縣丁公、藩臺江陰袁公、臬臺高安陳公。慈谿馮公、金谿張公，請各先修其郡之志，以備採擇。」葉向高序和鄭之玄序也都可以爲證。此外，何喬遠本人先參加《泉州府志》的修纂，陽思謙序云：「既得命謙泉守，宜修泉志，於是與別駕徐君、司理伍君，造鄉先生大宗伯黃公（按指黃鳳翔）、吏部林公、孝廉李公、儀部何公，學使蘇公之廬，請黃公主其事，而四公哀而成之，五閱月殺青。」《泉州府志》修畢之同年，何喬遠開始編修《閩書》。

上引何喬遠《閩書·我私志》所說《閩書》修於萬曆四十年至四十四年，只是指其初稿。崇禎元年（一六二八）至二年，他又作了訂補。由於初稿寫成之日，原當局諸公相繼離閩，刊印之事遂被擱置，新當局張某，僅出資贍寫。而何喬遠本人也於泰昌元年（萬曆四十八年，一六一〇）起官光祿少卿，歷太僕少卿、左通政、光祿卿，至天啟五年（一六二五）假歸。崇禎元年三月，熊文燦任福建巡撫，籌資刊印《閩書》，於是何喬遠增補了萬曆四十四年至四十八年的資料，「以成神廟一朝終始」。（《閩書·凡例》語。又見《閩書·鄭之玄序》）不過，所補資料有些史事晚於萬曆年間，例如第八卷中增補「皇朝天啟五年守沈翹楚浚」泉州東湖事，這是因爲何喬遠本人參與此役，順便補入的緣故。（事見乾隆《晉江新志》所收何喬遠《浚東

湖記》第一百二十一卷《周起元傳》記：「闕誅，天子復起元官，加贈尚書，予諡。」這已是崇禎元年的事了。這次增補《閩書》的工作，迄於崇禎二年，因為這一年，他第三次（最後一次）起官，任南京工部右侍郎，至崇禎四年秋告歸，同年逝世。另外，在《閩書》刊印期間，何喬遠還對雕成的某些書板，作了修訂。

（例見下文）

《閩書》的刊印時間，上限在熊文燦調任福建巡撫的崇禎元年三月，下限在熊文燦序言刊就的崇禎四年五月稍後。

《閩書》刊印地點不詳，但板心多有刻工姓名，姓名前往往往冠以「建寧」、「建陽」、「建」、「福」（州）、「泉州」、「泉」、「興」（化）、「漳」（州）等籍貫，而且各卷均由籍貫相同的刻工雕板，所刻卷次交錯頻繁，可見當時是徵集福建五府刻工，在同一地點（福州或建陽）刊印的。刻工的生產組織是按籍貫劃分的。

刊印期間，何喬遠對已雕成的書板作了某些修訂，例如：《方域志》第一卷，福建省圖書館藏（以下簡稱閩圖）四十冊本，比閩圖六十五冊本多了一頁，即增加「又廿八」頁關於福州市郊的象山、雙髻山、百洞山、孟崎跳、羅星山、永北山等六座山崗的記述。而且，第二十七頁B面至第二十九頁B面所述山脈及其次序，也有不同。（詳見第一卷校勘記）根據板心刻工姓名和所述山脈的合理性看，閩圖四十冊本的三頁半（第二十七B、二十八、又二十八、二十九頁）經過修訂，而六十五冊本相應的二頁半（第二十七B、二十八、二十九頁）則是先雕成後決定廢棄的。因為第一、四十冊本和六十五冊本相應書頁上的刻工姓名，都同見於其他原刊書頁（四十冊本是原刊本，而六十五冊本另有一百六十二頁是後來補刊的），例如刻工「仲」、「成」、「張立」，又各見於原刊書頁的第一百三十七、一百三十九、一百五十二卷，第十九、二十一、三

十二、二十三等卷，第一、十九、二十、二十二、三十二等卷，表明他們都是原刊《閩書》時的同一批刻工，從而可證這些修訂書頁也是原刊時期所刻。第二，四十冊本和六十五冊本相應書頁，雖然內容互異，但是第二十七頁四面首行都是「言並不見小琉球也」八字，第二十九頁四面末行都是「鳳丘山」三字，清楚表明，四十冊本的三頁半是在全卷雕成後修訂的，何喬遠爲了使重雕的書板數量減少到最低限度，刻意控制修訂書頁的行款，使之與前後書頁恰好銜接。第三，四十冊本這三頁半所述山崗，比六十五冊本那二頁半，增加了六座，又把毗連於鼓山的卧牛山，歸入鼓山支脈，而且各山崗的描述，也顯然更合理。至於六十五冊本仍沿用廢棄的那二頁半書板，則很可能是重印失誤所致。

閩圖六十五冊本和大連圖書館藏本（以下簡稱大連本），都是後來的補刊本。因爲第一，它們的某些書頁上，刻工姓名與閩圖四十冊本等原刊本相應書頁不同，而且姓名前後大多綴有「補」字。以足本閩圖六十五冊本爲例（大連本是殘本），補刊書頁凡一百六十二頁，其中最典型的，如第八卷第六、七頁上的「謝補」，第七十九卷第三十三頁的「補孔」，等等。第二，閩圖四十冊本等原刊本上，所有的書頁都刷印清晰，六十五冊本的許多書頁都漫漶不清，顯然是後印的，而所有的原刊書頁却十分清晰。補刊的時間不詳，其下限在清道光二十年（一八四〇）福州藏書家劉永松收藏閩圖六十五冊本之前。

除了閩圖六十五冊本和大連本以外，國內現存刊本，都是原刊本。

今海內外所存《閩書》已不多。在海外，美國國會圖書館有前北平圖書館藏原刊本的殘卷（今藏台北中央圖書館）的縮微膠卷。據日本國立國會圖書館參考書志部亞非課編《日本主要圖書館研究所藏中國地方志總合目錄》（一九六九年版）著錄，日本共有八部，分藏在國立國會圖書館、內閣大庫、宮內廳圖

書寮、尊經閣文庫、蓬左文庫、東洋文庫。另有《閩書·南產志》寬延四年（一七五二）日本抽印本七部（另有一部後印本），分藏在國立國會圖書館、東洋文庫、靜嘉堂文庫、內閣大庫、京都大學人文科學研究所。

國內現存六部足本（包括抄本、配本、復印本），五部殘本，一部《閩書·南產志》日本寬延四年抽印本，一部《閩書名宦傳抄》寫本，分藏在十二個單位。其中足本爲：閩圖四十冊本（原刊本）；閩圖六十五冊本（補刊本）；福建師範大學圖書館藏本（抄配本，刊頁爲原刊，所缺前六至五十一卷刊頁，即閩圖二十八冊本）；廈門大學古籍整理研究所歷史系古籍整理研究室復印本（配本，由閩圖二十八冊本、六十五冊本和廈門大學南洋研究所藏本組成）；福建省博物館藏本（抄本，據閩圖六十五冊本抄）；北京圖書館藏本（第一至三、一百五十二至一百五十四卷爲原刊本，第四至一百五十一卷爲美國國會圖書館所製縮微膠卷）。殘本爲：廈門大學南洋研究所藏本（原刊本，殘存一百零八卷）；吉林大學圖書館藏本（原刊本，殘存九十四卷）；大連圖書館藏本（補刊本，殘存四十五卷）；台灣中央圖書館藏本（原刊本，殘存第四至一百五十一卷。抗戰期間寄存美國國會圖書館，被據以製成縮微膠卷。所缺第一至三、一百五十二至一百五十四卷，今存北京圖書館）；南京圖書館藏本（美國國會圖書館製縮微膠卷，底本是今台北中央圖書館藏本）。北京大學圖書館藏《閩書·南產志》日本寬延四年浪華揚芳堂抽印本一部。中國科學院圖書館藏《閩書名宦傳抄》寫本一部，蓋乾嘉以後人抄撮《閩書·文菴志》中宦游福建的一百零八位浙江人，如趙參魯、丁繼嗣、胡守仁、劉玠等行事而成。至於閩圖二十八冊本，因其與福建師大本原屬同一部刊本，故不計入國內現存殘本中。同樣地，北圖殘本存的六卷刊頁，因已與所藏縮微膠卷破鏡重圓，故也不視爲殘本。上海圖書館原藏美國國會圖書館製縮微膠卷一部，但一九八八年八月三十日該館工作人員稱，

業已報廢。本書以閩圖四十冊本等原刊初印本爲主校本，補刊後印本（閩圖六十五冊本）爲參校本。

本書校點工作，由原廈門大學古籍整理研究委員會主任傅衣凌教授發起，由廈門大學古籍整理研究所和歷史系古籍整理研究室的教師組成校點小組，以婁曾泉教授、侯真平副所長爲正副組長，小組成員有王益強副教授、顏章炮副教授、楊際平教授、陳明光副教授、顏亞玉副教授、王日根博士研究生等八位教師。校點工作在籌備、組織和實施過程中，得到廈門大學莊爲璣教授、陳孔立教授、鄭學稼教授的關心、支持和指導，莊爲璣教授並參加了部份標點工作，同時還得到上述《閩書》國內各收藏單位和福建人民出版社的大力支持，我們謹此敬表謝忱！

正如《四庫總目》所說，《閩書》「字句往往不可句讀」，所以校點難度較大，加上我們水平有限，致使校點不免訛誤，敬請方家指正！

校點者

一九九二年十月

校點凡例

一、本書校勘，取原刊初印本（福建省圖書館收藏的四十冊本、二十八冊本，和廈門大學南洋研究所藏本、福建師範大學圖書館藏本（其中的原刊初印卷頁））為主校本，補刊後印本（福建省圖書館收藏的六十五冊本等）為參校本。

二、本書校勘，除了對校、本校、理校外，還根據某些正史、政書、別集、福建古代方志等相關篇目，作了部份他校。

三、本書校勘，依據校點通例，凡原刊初印本上文字的衍脫訛誤，和補刊後印本第一卷上的長篇異文（已考證為原刊修訂書頁），均予出校；凡底本上的形訛字如己巳、項頂、束束之類，異體字如恠怪、逃逃、咲笑之類，避諱字如明朝的簡檢、較校、維洛之類，清朝的玄元、弘宏、曆歷之類（見於書中清代抄補書頁中），以及其他明顯的訛字，如「寧化縣」訛為「宣化縣」、「王審知」訛為「至審知」、「《程史》」訛為「《程史》」、「析置」訛為「折置」等，一律逕改，不予出校；凡原作者見解錯誤，一律不出校糾駁。

四、原書為例不純之處，如原《凡例》闕標題，《方域志》、《文蒞志》等跨卷帙的某些府、縣標題或衍或脫，均作相應的刪補，並出校。

上述某些縣名下所標序碼，或作「一」、「二」，或作「上」、「下」，一律統一為「一」、「二」，不予出校。

又如原書中「侯官縣」，有時寫作「候官縣」，又有「候官都尉」、「候官侯」之類，一律改為「侯官縣」、「侯

官都尉」、「侯官侯」等。

又如《建置志》所述各郡城縣邑中的祠、壇、廟、學、倉、庫、司、局、院之類建置時，行文編排順序往往顛錯，今一仍其舊。

五、凡出校處，均以（一）、（二）、（三）等作為標識，就近置於標點符號之後。校注統一置於卷末。

六、本書一律採用新式標點。

七、凡遇本書引用書名、篇名時使用約定俗成的簡稱（如《語》、《孟》、《寰宇志》之類）、別稱（如《周官》之類），一律標以書名號或篇名號。

凡遇本書行文中注明某山轉見本書某條目、某人傳記轉見本書某條目的，如「見侯官雪峰山」、「見宗室」、「見浦城文蒞」等，一律不標篇名號。

八、原書所引各書文字，改削、訛誤甚多，今一仍其舊，不予出校。

九、本書分五冊出版，各冊份量相當，並大體自成段落。第一冊斷至《扞圉志》，第二冊斷至《文蒞志》，第三冊斷至《英舊志·縉紳·建寧府·建陽縣》，第四冊斷至《英舊志·縉紳·福寧州·寧德縣》。

總目錄

序(鄭學據)

校點前言

校點凡例

原序

原凡例

分野志(卷一)

方域志(卷一至三一)

建置志(卷三二至三七)

風俗志(卷三八)

版籍志(卷三九)

扞圉志(卷四〇)

前帝志(卷四一)

君長志(卷四二)

文菴志(卷四二至六六)

武軍志(卷六七至七一)

英舊志(卷七二至一三四)

縉紳(卷七二至一二三)

弁輅(卷一二四)

關柝(卷一二五)

韋布(卷一二六至一三〇)

間巷(卷一三一至一三二)

僑寓(卷一三三)

裔派(卷一三四)

方伎志(卷一三五)

方外志(卷一三六至一三八)

宦寺志(卷一三九)

閩閩志(卷一四〇至一四五)

島夷志(卷一四六)

靈祀志(卷一四七)

祥異志(卷一四八)

崔葦志(卷一四九)

南產志(卷一五〇至一五一)

畜德志(卷一五二至一五三)

我私志(卷一五四)

第一冊目錄

閩書序	明・熊文燦	一
閩書序	明・鄭之玄	三
閩書序	明・葉向高	五
凡例		七
卷之一 分野志		九
方域志		一〇
福州府閩縣一		一〇
卷之二 方域志		一〇
福州府閩縣二 侯官縣一		三六
卷之三 方域志		三六
福州府侯官縣二 古田縣		六一
卷之四 方域志		六一
福州府閩清縣 長樂縣 連江縣		八七
卷之五 方域志		八七
福州府羅源縣 永福縣		一二二
卷之六 方域志		一二二
福州府福清縣		一三四
卷之七 方域志		一三四
泉州府晉江縣一		一五二
卷之八 方域志		一五二
泉州府晉江縣二 南安縣一		一八一
卷之九 方域志		一八一
泉州府南安縣二		二〇二
卷之十 方域志		二〇二
泉州府惠安縣 德化縣		二二〇
卷之十一 方域志		二二〇
泉州府安溪縣 同安縣一		二四四
卷之十二 方域志		二四四
泉州府同安縣二 永春縣		二七〇
卷之十三 方域志		二七〇

建寧府建安縣 甌寧縣	二八九
卷之十四 方域志	
建寧府建陽縣	三二四
卷之十五 方域志	
建寧府崇安縣	三三六
卷之十六 方域志	
建寧府崇安縣 浦城縣	二五八
卷之十七 方域志	
建寧府浦城縣 政和縣 松溪縣 壽寧縣	三八三
卷之十八 方域志	
延平府南平縣 將樂縣	四〇四
卷之十九 方域志	
延平府大田縣 沙縣	四二四
卷之二十 方域志	
延平府尤溪縣 順昌縣 永安縣	四六一
卷之二十一 方域志	
汀州府長汀縣 寧化縣 上杭縣 武平縣	四八九

卷之二十二 方域志	
汀州府清流縣 連城縣 歸化縣 永定縣	五一六
卷之二十三 方域志	
興化府莆田縣	五四四
卷之二十四 方域志	
興化府莆田縣 仙游縣	五七〇
卷之二十五 方域志	
興化府仙游縣	五九八
卷之二十六 方域志	
邵武府邵武縣	六一四
卷之二十七 方域志	
邵武府邵武縣 光澤縣 泰寧縣 建寧縣	六三一
卷之二十八 方域志	
漳州府龍溪縣 漳浦縣 龍巖縣	六六六
卷之二十九 方域志	
漳州府南靖縣 長泰縣 漳平縣 平和縣 詔安縣	六九五

卷之三十 方域志

漳州府海澄縣 寧洋縣鎮海衛、陸繁所、銅山所、

玄鐘所附……………七七八

福寧州……………七二六

卷之三十一 方域志

福寧州福安縣 寧德縣……………七四五

卷之三十二 建置志

福州府閩縣 侯官縣 懷安故縣 古田縣

閩清縣 長樂縣 連江縣 羅源縣 永福縣

福清縣……………七七六

卷之三十三 建置志

泉州府晉江縣 南安縣 惠安縣 德化縣

安溪縣 同安縣 永春縣……………八一五

卷之三十四 建置志

建寧府建安縣 甌寧縣 建陽縣 崇安縣

浦城縣 政和縣 松溪縣 壽寧縣……………八四七

卷之三十五 建置志

第 冊目錄

延平府南平縣 將樂縣 大田縣 沙縣

尤溪縣 順昌縣 永安縣……………八六七

卷之三十六 建置志

汀州府長汀縣 寧化縣 上杭縣 武平縣

清流縣 連城縣 歸化縣 永定縣……………八八三

興化府莆田縣 仙游縣 興化故縣……………八九四

邵武府邵武縣 光澤縣 泰寧縣 建寧縣……………九〇〇

卷之三十七 建置志

漳州府龍溪縣 漳浦縣 龍巖縣 南靖縣

長泰縣 漳平縣 平和縣 詔安縣 海澄縣

寧洋縣 鎮海衛指揮使司衛、陸繁千戶所、

玄鐘千戶所……………九一三

銅山守禦千戶所附

福寧州福安縣 寧德縣 東洋行縣……………九二四

卷之三十八 風俗志……………九四一

卷之三十九 版籍志……………九五七

卷之四十 扞圉志……………九八二

閩書序

唐虞三代，帝王記事之史，名爲書。兩漢以下，國史或曰史，或曰記，或曰書。皆書也。皆書，則何以異名？書之者，異之也。《周禮》有史官，掌邦國四方之事，達四方之志。諸侯亦各有國史，其大者，赴告風謠，彙於王朝，待褒誅焉；小者，別爲私史。閩，侯服也，何以稱書？進閩也。孰進之？書之者進之也。其進閩，何也？龜山、延平、考亭之學，得聖統焉，此其所以進閩也。孔子，魯人也，作魯史系王焉，猶不稱書，「閩」何以稱書？孔子以列國之大夫，記王朝之事；匪我何公以王朝之大夫，記一國之事，猶之乎掌邦國，達四方，生同文之代，不敢別爲私史，其身進焉，其言進焉，其道進焉，其所記之人、之地、之事，並進焉。魯有《頌》，秦賁有《誓》，閩有《書》，此何公之志也。異之也，異乎後之爲私史，而不異乎聖人也。夫公之志，既不異乎聖人矣，至其所列之編目，仍曰志，若僅以備史家之一體。所發之義例，褒善也；雖微必錄，懲貪也，僅削其名，若退居於鄉黨恂恂之旨。所據之見聞，一本郡邑新舊志。稗乘方言，咸有搜採。其詳婉瑰麗，若裴松之註三國史，酈道元註《水經》，使讀者忘倦，開博物洽聞，斟酌裒益之用。凡此，皆公謙厚汲引，而非史家炫己距人，刻削掎斷者比也。蓋昔之君子，其識力，足以持衡千古，然後可定一時之是非；其精神，足以包舉宇宙，然後可周一方之利病。今日疆場，固不專事西北，而兼在東南。閩馮山阻海，上郡接壤東粵，萑苻所聚，潢池盜弄，往往見告，三山以南列郡，星羅於滄波浩淼之側，昔患苦倭奴，近患苦紅夷，而又土狹人稠，穀食不贍，今且不憂卉服，而憂赤子。番錢內斂，粟貨外流，洋船聊可資

生，中左遂成扼要。又，譚中丞、戚少保所增設之寨游，戰具歲久弊叢，幾不可問。不佞謬膺簡畀，人疆受事，山海劇賊，並肆披猖，賴聖天子鐘鼓之靈，諸大夫帷謀之力，或焚巢悉就誅夷，或稽首歸我戎索，或逆我顏行而棄街竿首，或剪彼兇狡而沉溺蛟宮。山海情形，亦稍稍有次第矣！乃伏莽之戎，走險之獸，無在無時不可竊發，則根本之圖，善後之慮，惟二三良有司與師武臣是賴，計所以安阜之，使不必盜；教誨之，使不肯盜。無盜，則豫防禦之，使不敢盜；有盜，則急起剪滅之，使不及盜。是《閩書》固今日之治譜也。若夫安內攘外，慮事防患，繕治戰艦，講求銃器，力汰庸流，急召慣海，度地設險，破格用才，以海治海，得則銖鎰收尋丈之功，失則毫釐有千里之謬，貳而執之，服而舍之，或因剿而爲撫，或借撫以用剿，是皆有精微運於一心，情形變於呼吸，陰用其道，而不可以告人者，固《閩書》之所不必盡，亦《閩書》之所已盡。而必盡我心，以妙合於《閩書》之心，以此治天下可矣。卽公所以大造閩而進閩之意也。若曰按圖索而刻舟求，則是書之於閩也，僅備掌故，而何公所以進閩之意，猶晦而未旦也夫。

崇禎四年仲夏月吉旦欽差提督軍務兼巡撫福建地方都察院右僉都御史熊文燦謹序。

閩書序

《閩書》者，予師何司空先生所爲徵閩之書也。爲志二十有一，不年表，不世家，不列傳。先生曰：「遷、司、天也。予，志也。」故皆爲志焉。八閩舊有通志，前輩黃公仲昭所作，去之已遠。終萬曆之世，閩事無足徵者，又燬於藩司之火，嗣是文獻缺焉。得非生是土者之責與？直指山陰陸公，來按是邦，蓋嘗檄八郡一州之乘於會城。是時同事者，爲大中丞毗陵袁公，相與請先生修爲之。自萬曆壬子迄丙辰，凡五年，而先生之書成。當事者欲刻行之，會皆以他徙去，不果。及是之時，直指太原張公，觀風問俗。吏治民安，按部之餘，首詢先生書，讀而嘆曰：「楚白珩不如也。」既已，出贖金供繕寫。大中丞西蜀熊公，詰戎籌海，緯武經文，相與爲期會督梓人，而先生又補爲之，自丙辰迄庚申，以終神廟之一代，蓋而後先生之書行也。之玄授簡，謹爲叙曰：夫禹跡未及，王會未開，閩之爲閩，不可得而論已。郢之人漢也，自武帝始也。無諸創霸，君長蠻越，其精靈猶能鬼食斯土，代以不替。王氏父子割據於唐，雖亡不旋踵，然越千百年，比歲乃有盜發其塚，而圖像如生，寶物、玉帶，出於人間，亦奇矣。本朝混一版籍，故元孽將負要險，以扼我師而弗克也。傳檄既定，周江夏德興創爲沿海保障，武備甚設。承平日久，士大夫沐浴於休息教養之澤者，文明暢遂，有於中原。百姓業勤，水耨燒耕，潮田兩熟，爲仕宦之所樂。名公鉅卿，往往而至。其在《文蒞》、《武軍》科目，《英舊》諸傳，可考鏡也。若今日之閩，則景象有不同者。以余所睹見，汀上郡邑，旁帶粵、贛，萑苻所聚；海氛時惡，叛撫不常，紅毛闖入爲市，雖或就撲滅，或蹙驅逐，官斯地者，其於綢繆

拮据亦費矣。故文明洩而武備衰，世風侈而物力耗，闕闕貧而奸宄滋，讀是書者，其本末可以見焉。先生躬行道德，奮然斯文，於凡本朝掌故，旁搜窮討，林居日多，環堵著書。其於桑梓，用意尤篤，莫不櫛比瑣掇，俾無缺失，誠爲一方之書也。又若意取忠厚，學宗筆削，尊紫陽而不標道學之門，黜胡元而不混中華之俊，尤是書之大者，不可泯滅。余故備論先生著書之指，又以知是書之行有數，而當事者能相與以有成。夫考覽山川，表章文獻，真巡方事，微張公，則陸公創始之功不顯，而此書之出，爲全閩之足徵者，未知何時也。閩人無忘兩直指、兩大中丞哉！

崇禎二年己巳鵬月史官門人鄭之玄頓首謹書。

閩書序

《閩書》者何？以志閩也。閩故無志，黃公仲昭始創爲之，久而莫續，故弗傳也。侍御山陰陸公夢祖來按是邦，謂閩名藩也，而文獻之弗徵，何以示後？檄下郡邑，各修厥事，而請匪我何公與一二鄉紳之有文者，董其成載筆焉。何公辭不就。迨列郡志成，以上學使者慈谿馮公燧。馮公復褒而致之何公，請竟斯役。公於是盡取八郡、一州、五十七邑之乘，而徧閱之。撮其精華，去其繁冗，文其朴野，折其混淆，而又旁搜博採，凡遺蹤逸事散見於他書者，悉行摭拾，以直其罅漏。爲志二十有二，爲卷若干，其義例皆公所創定。更五載，始成編。携以示余爲之序。余窮數旬之力，讀之乃竟。嘆曰：美哉，皇皇乎！非但一方之信史，亦千古之鴻裁也。其足昭既往而鏡來茲，奚疑哉？抑余因是有感於閩事焉。閩在上世，不列於職方，至無諸佐漢，肇啟王封，爰登圖版，是閩之一初也。然而草昧新開，經綸未具，龍臺、歐冶若有若無。未幾而復徙其民於江淮，遂墟其地，此一厄也。裔及六朝，差同賓服。唐常觀察建學興文，衣冠始奮，又閩之一初也。載更王氏，竊據稱雄，初猶小康，終則大亂，龍帳宣淫，寶官崇慝，縱橫巫鬼，荼毒干戈，又一厄也。此如重陰濁霧之境，乍露微光忽復蔽塞。蓋掊荒陋而文明若斯之難矣。至宋，而龜山先生得統河洛，諸大儒接踵繼起，煥乎揭日月於中天，幽遐奧濶，悉耀光明，鄒魯之名，繇此而著。明興，益緒其業，山陬海澨絃誦相聞，碩士魁人後先繼起。吾讀《英舊志》，而咨嗟慨慕，不勝高山景行之思焉！要以淵源所自，實本宋儒。故宋儒之功，於閩不啻闢鴻濛而開天。閩士守宋儒之訓，宜不啻若功令。乃今

拾瀋時流，操戈前哲，等傳註於弁髦，以穿鑿爲捷徑，此如故家子弟豢養膏粱，而忘其先世之遺籍，家有千金，棄若敝帚，良足嘆已！天地淳龐之氣，積久而發，則其發必昌。及其發之過，而無爲之醞釀，則又將衰颯而不振。故論閩於今日，亦盛衰升降之會也。兼之干揆失職，桑土踈防，滄海綠林，莽爲盜藪，其民亦習於淫侈，物產日耗，吏治滋偷。吾讀《扞圉》、《島夷》、《萑苻》、《文蒞》、《風俗》、《南產》諸志，而穆然深思，不勝杞人、婺婦之念焉！往事之不忘，後事之師。何公之孜孜矻矻，竭數載之力，從事於此，其用意深，而其爲閩慮遠矣。至於抽揚小善，遐邇不遺，闡發幽光，鴻纖畢舉，則在閩言閩，寧恕毋刻。惟是非之不謬，斯懲勸之有裨，固不必搜瑕掩瑜，過爲吹索，此實公厚待桑梓之盛心，而非輕於持論者所能窺測也。公家世源流，具載志末。生平篤學真修，無媿宋儒。里居二十餘年，日惟談道著書，誨引後進。於古今成敗，國家典故，無不考究，談之歷歷如指掌。以名儒而兼良史，惟公其人，於志閩何有？昔春秋時，列國分爭，孟氏所舉有史者，僅魯與晉、楚耳。魯有夫子、丘明，晉有董狐、史墨，楚有左史倚相，是以有史。吾閩有何公，故有茲書。夫何公，聖人之徒也，何論董狐、左史輩哉！於是乃益見閩之爲鄒魯矣！

萬曆四十七年光祿大夫柱國少師兼太子太師吏部尚書建極殿大學士福清葉向高序。

凡例

一是書所編府、州、縣次第，悉依《大明會典》，不敢妄分先後。

一是書起於萬曆壬子，成於萬曆丙辰，今增至庚申歲，以成神廟一朝終始。然惟科目表試錄可稽。餘文蒞、武軍及英舊諸傳，間或得梗概，亦無從質其詳也。

一古時省鎮，皆使相及大臣出兼，要不離鈐轄州事，所以真前列。若皇朝，則設布政司爲專首，而巡撫諸衙門皆後來建置。是書首布政使司，按察繼之，尊朝廷張官置吏之序也。

一閩學惟朱文公最重，當如《史記》立爲世家，乃見尊朱之意。但如此，則當分道學、文章、政事諸門，體裁方得歸一。且何德行之無文章？何文章之無政事？老子、韓非同傳，古人有之。而嘉靖中，《浙江通志》一概叙列善惡邪正，取備褒誅，初無分別，今稍倣之，然而惡與邪不列矣。

一志文蒞，必先論其平生。誠其人也，雖於地方無蹟可紀，要爲當世賢士君子不可不藉重也。胡澹庵在泉、漳，初未蒞任，王梅溪在泉，四月耳，泉、漳之籍敢遺之乎？若其發奸摘伏，綜覈名實，雖有益地方，儼離官之日，裝載輜重纍纍也，問其家，則質以溫。夫非吾師帥哉！吾愛吾筆矣。至其物論不諧，載在舊史，與累朝實錄者，分註名下，無俾參厠臚列，不敢謬爲託口「直在其中也」。

一閩中諸縣，有山川僻寂，縉紳稀少之處，其來爲官者，多非進士高第，一方任所爲。今按本縣志書，有注其貪穢者，悉行削去，使將來他人讀者，未必知也，而其子孫或見之曰：「吾父祖官此也，何以不錄」

名？「耳鳴腹痛，惟心知之矣。」

一首領及教官職名猥多，若盡錄之，此郡縣志書體，今惟擇其賢，附見府州縣之後。

一志中所列文蒞，有見某官者，一以最後還轉為主；若本閩中人，則見於本貫。

一元有天下，夷人也，何可與中國齒？官於斯者，其姓名非贅牙不辨，則重疊難舉，如九牛毛，何足有亡？況夷人故輕中國士，並不使居顯官要職，胡爲愛惜之？若其人有志於後世之名，則吾能徵之矣。

一英舊人物但有分見於海內府州縣諸志者，無分崇卑大小，一概都錄。譬如人家女子，嫁爲人家婦，婦家咸宜之矣，頌爲賢母，則豈待外家別爲稽核耶？陶淵明云「操行之難，姓名翳然」，千古同念也。

一特立小傳者，唯縉紳爲然。其餘若高士名僧，以及靈神仙釋，大概多在巖居川觀之中，卽山川亦藉生色。今有山川可人者，悉人之。其餘無可附麗者，方列韋布、閭巷、靈祀、方外等志。

一志末我私，蓋倣古人自叙之意。司馬遷、班固、沈約並有之，非敢謬妄以私門溷廁公書也。

右凡例，十二則。

閩書卷之一

分野志

《禹貢》揚州之域，《周官·保章氏》辯九州之分野，吳越屬星紀。《前漢志》屬牽牛、婺女之分。《後漢志》、《晉志》、《隋志》皆屬斗、牛、須女之分。《後漢·郡國志》云：「自斗十一度至婺女七度，一名須女，曰星紀之次，於辰在丑，謂之赤奮若，於律爲黃鍾，斗建在子，今吳、越分野。」《晉·天文志》云：「自南斗十二度，至須女七度，爲星紀，吳越分野，屬揚州。」註云：「費直，起斗十度。蔡邕，起斗六度。」又云：「陳卓、范蠡、鬼谷、張良、諸葛亮、譙周、京房、張衡並云：斗、牽牛、須女，吳、越，揚州。」內會稽入牛一度。《唐書·天文志》云：「僧一行以爲，天下山河之象存乎兩戒。北戒，自三危至朝鮮，是謂北紀，所以限戎狄也。南戒，自岷嶓至東甌、閩中，是謂南紀，所以限蠻夷也。故《星傳》謂北戒爲胡門，南戒爲越門。」又云：「東南，負海，爲星紀。負海者，以其雲漢之陰也。」又云：「南斗、牽牛，星紀也。初，南斗九度，餘千四十二，秒十二太。中，南斗二十四度。終，女四度，爲星紀之分。古吳、越及東南百越之國。南斗在雲漢下流，當淮、海間，爲吳分。牽牛去南河復遠，自豫章迄會稽，逾嶺徼，爲越分。」《宋史·天文志》：「天市垣二十二星，東西蕃各列十一星。其東垣南第六星，曰吳越。」《元史·曆志》：「斗四度三十六分六十秒外吳越，分星紀之次。」皇朝天文分野，以福建郡縣並屬斗、牛之分，《大明一統志》則以爲牛、女之

分。

論曰：我太祖有私習天文之禁，吾閩中楊文敏與諸公不能對仁宗之問也，余小子何以知之？大概次在星紀，野在揚州，不離於古文矣。

贊曰：維閩有疆，大海之陬，次屬星紀，野入揚州，或婺或須，麗斗與牛，越門限戒，雲漢下流，東垣南六，天市上浮，文明之域，是爲治甌。

方域志

福州府 閩縣一（二）

禹平水上，別九州，任土作貢，而益著《山海經》，紀海內東南陬之山曰：「甌居海中。閩在海中，其西北有山。」一曰閩中山在海中。」郭璞曰：「今臨海水寧縣即東甌，在岐海中也。」閩越即西甌，今建安郡是也，亦在岐海中。」今按：謂之海中者，今閩中地，有穿井闢地，多得螺蚌殼，敗槎，知洪荒之世，山盡在海中，後人乃先後填築之也。厥後，禹東巡狩，崩於會稽，因葬其處。夏后帝少康思禹之勳，封其庶子無餘於會稽，以守禹塚。而周成王之時，舉文、武勤勞之後，封熊繹於楚蠻，予以子男之田，姓芊氏，居丹陽。其五世孫熊渠甚得江漢民和，廼興兵伐庸、揚粵，至於鄂。熊渠曰：「我蠻夷也，不與中國之號謚。」乃立其長子康爲句亶王，中子紅爲郢王，少子執疵爲越章王，皆在江上楚蠻之地。而史伯對鄭桓公曰：「熊嚴生子四人，其叔曰熊，逃難於濮，而從蠻俗。」史伯曰：「蠻，芊蠻也，與諸姬代相干矣。」《周禮》所載，職方氏辯其邦國、都鄙、四夷、八蠻、七閩、九貉、五

戎、六狄之人民」，鄭玄註曰：「閩，蠻之別也。」引《國語》史伯「芊，蠻」爲證。賈公彥釋曰：「不作閩者，後人轉寫之誤。」鄭玄以閩爲正。叔熊居濮如蠻，後子孫分爲七種，故謂之七閩也。按經，閩雖與蠻七、八別數，本其是一，俱屬南方也。太史公《南越王傳》：「秦并天下，略定揚越。」班固以越爲粵，然則閩與蠻，粵與越，皆通義也。無餘既封會稽，二十傳而爲越王句踐。句踐之後，又六世至無彊，爲楚所滅，子孫播越海上，七世至無諸。無諸姓騶，爲閩越王。秦并天下，興師踰江，平取百越，閩越王廢，置閩中郡。漢高帝五年，復立之，都王東冶。孝惠三年，分東甌以封閩越君搖，爲東海王。建元三年，東甌舉國徙江淮，其地復屬閩越。六年，封無諸孫丑爲繇王，分東越封餘善爲東越王。元鼎五年，漢擊餘善。元封元年，繇王居股殺餘善以降。武帝封居股東城侯。遷閩越民江淮間，虛其地。其逃亡者，自立爲冶縣，亦曰治縣，又更名東城，又更名東冶，然考之兩漢書地理志，並名冶也。按《吳越春秋》曰：越王允常聘歐冶子作名劍五枚：一曰純鉤，二曰湛盧，三曰豪曹或曰盤郢，四曰魚腸，五曰巨闕。秦客薛燭善相劍，王取純鉤示之，薛燭矍然望之曰：「沈沈如芙蓉始生於湖。觀其文，如列星之行。觀其光，如水之溢塘。觀其文色，渾渾如冰將釋，見日之光。」王曰：「客有買此劍者，有市之鄉，一，駿馬千疋，千戶之都，二，其可與乎？」薛燭曰：「不可。」臣聞王之造此劍，赤堇之山破而出錫，若耶之溪澗而出銅，吉日良時，雨師灑道，雷公發鼓，蛟龍捧鑪，天帝壯炭，太乙下觀，於是歐冶子因天地之精，造爲此劍。」取湛盧視之，薛燭曰：「善哉！銜金鐵之英，行氣託靈此劍者，可以折衝伐敵，人君有逆謀則去之。」允常以魚腸、湛盧、豪曹獻吳王僚。後閩同爲一女，殺生以送死。湛盧之劍，惡其無道乃去，如楚昭王。王寐而得之，召風胡子問之：「此劍值幾何？」對曰：「赤堇之山已合，若耶之溪深而不測，群神一天，歐冶子已死，雖有傾城量金珠玉，猶不可與，況駿馬、萬戶之都乎！」又《漢書》嚴助諭告淮南曰：「閩王以八月舉兵於治南。」《宋書》治縣屬會稽。司馬彪云：「章安，是故治。然則臨海，亦治地也。」張勃《吳錄》云：「閩越王治鑄地，故曰安。閩王治此，不應偏以受名。蓋句踐治鑄之所，故謂之治乎？閩中有山名湛，疑

湛山之鍾，鑄劍爲湛劍也。後分治地爲會稽東南二部都尉，東部，臨海是也；南部，建安是也。」予按閩中產鐵，今松溪縣有湛盧山，云歐冶鑄劍於此，鑄跡尚存。張勃說是也。謂之東冶者，疑福州在建寧東南，故曰東冶；又云冶，南也。今福州有山曰冶山，山麓有歐冶池也。後漢置爲侯官都尉，屬會稽郡。建安初，始有侯官，即今福、興、泉、漳四府。建安，即今建寧府。南平，即今延平府。漢興即今浦城縣等五縣。其一，史闕書。漢末，孫策以江東倣擾，自詣袁術，欲助其舅吳景平定之。術表策爲殄寇將軍。策引兵渡浙江，攻會稽。時王朗爲會稽太守，與戰，敗，浮海至東冶。策追擊，大敗之。侯官長商升，爲朗起兵。策遣永寧長韓晏領南部都尉，將兵討升，以賀齊爲永寧長。晏敗，齊代領都尉事。侯官與建安、漢興、南平復亂。齊進兵建安，立都尉府。孫權稱帝，以屬南部。孫休永安三年，黜其兄會稽王亮爲侯官侯，道自殺。休分會稽南部爲建安郡。晉滅吳，分建安，立晉安。其屬建安者：曰建安，曰吳興，曰東平，曰建陽，曰將樂，曰邵武，曰延平，凡縣七。其屬晉安者：曰原豐，曰新羅，曰宛平，曰同安，曰侯官，曰羅江，曰晉安，曰溫麻，凡縣八，俱隸於揚州。元康元年，隸江州。劉宋建縣六：曰吳興，曰將樂，曰邵武，曰建陽，曰綏城，曰沙村。晉安領縣五：曰侯官，曰原豐，曰晉安，曰羅江，曰溫麻。泰始四年，改晉安爲晉平，省新羅、宛平、同安三縣。尋復晉安。梁天監中，析晉安地，置南安郡，即今興化、泉州、漳州等府地。普通六年，晉安、建安、南安三郡，俱屬東揚州。陳永定初，升爲閩州，領三郡。天嘉六年，仍舊。光大元年，復升爲豐州。隋高祖開皇九年，改爲泉州，廢建安、南安二郡屬焉。大業初，復爲閩州。三年，改爲建安郡，領閩、建安、南安、龍溪四縣，治閩縣。唐高祖既有天下，武德五年，使王義童下泉、睦、建三州。八年，置都督府，治泉州，遂以義童領之。貞觀初，隸嶺南道。嗣聖十六年，置武榮州。景雲二年，改泉州爲閩州都督府，武榮州爲泉州，并建、漳、潮五州屬焉。潮，今廣東潮州府也。開元十三

年，改爲福州都督府如故。十九年，置泉山府兵。二十一年，置經略使。二十二年，以漳、潮歸嶺南道，使領福、泉、建、汀四州。天寶元年，改隸江南東道，其治在蘇州。尋改爲長樂郡，復領漳、潮二州。十載，復以漳、潮歸嶺南。至德二載，置經略軍、寧海軍。乾元元年，改爲都防禦使兼寧海軍使，復爲福州都督府。上元元年，升節度使，領建、汀、劍、漳、泉、福六州。寶應元年，温州來屬；未幾，遂歸越州。大曆六年，罷節度使，置都團練觀察處置使，於是始名福州曰福建。元和間，廢經略寧海軍。乾寧三年，升爲威武軍，以王潮爲節度使。五代梁開平三年，封潮弟審知爲閩王。貞明六年，升爲大都府。天成元年，審知子延翰，僞建大閩國。唐長興四年，僭號改元，升爲長樂府。晉天福八年，王延政僭號於建州，國號殷。開運二年，復稱閩王，以福州爲東都，領福、泉、建、汀、漳、鏞，即今將樂縣。鏞即今延平府。七州。未幾，爲南唐所滅。而泉州散員指揮使留從效，據泉、漳二州。南唐遂升泉州爲清源軍，以從效爲節度使。漢乾祐元年，閩東都留守李仁達，舉國歸吳越錢氏。南唐改鐔州爲劍州。周廣順元年，改福州爲彰武軍。宋建隆三年，從效卒，泉、漳二州尋爲其將陳洪進所奪。乾德二年，改清源軍爲平海軍，以洪進爲節度使。太平興國三年，洪進及錢氏俱納土，復爲威武軍，領福、泉、建、汀、漳、劍六州，省鏞州，析建州邵武縣置邵武軍，屬兩浙西南路。四年，析泉州游洋鎮置興化軍。雍熙二年，始爲福建路。景德三年，置安撫使，以福州守臣兼領。嘉祐四年，帶鈐轄。大觀元年，升爲帥府。四年，罷。建炎三年，復升爲帥府。端宗卽位於福州，升爲福安府。元至元十四年，置福建廣東道提刑按察司。十五年，置福建行中書省。十六年，罷省，改置宣慰使司，俱治福州。二十年，罷宣慰，復置行中書省。二十二年，改置宣慰使司，併入江西行省。二十三年，復罷宣慰司，置行中書省如故。二十四年，改爲行尚書省。二十八年，改置宣慰使司，併

入江西行省，改福建廣東道提刑按察司爲福建閩海道肅政廉訪司。二十九年，復置行中書省。大德元年，平章高興言：「泉州與琉球相近，或招或取，易得其情。」立福建平海行中書省，徙治泉州。三年，改置宣慰使司，都元帥府仍徙治福州。至正十六年，復改置行中書省。二十六年，置福建行樞密院。既而天下大亂，福建諸路及廣東潮州俱爲陳有定所據。皇朝李文忠、湯和，先後平其地。洪武元年，置提刑按察司。二年，置福建行中書省，以福、汀、漳、泉、建寧、邵武、興化、延平八府隸之，改福清州曰福清縣，福寧州曰福寧縣。九年，以中外並稱中書失尊，朝廷意改行中書省，置承宣布政使司。十四年，定按察分司：曰福興，曰漳泉，曰延汀，曰建邵。二十五年，鑄各按察分司印，分福建爲三道：曰寧武道，曰延汀道，曰漳泉道。二十九年，省，改道二：曰建寧道，治建寧、延平、汀州、邵武；曰福寧道，治福州、興化、泉州、漳州。成化六年，以龍巖山賊肆竊，增置漳南道，析漳、汀二府屬焉。九年，升福寧縣爲州，領寧德、福安二縣，直隸布政司。十三年，析汀州道，專置分巡。弘治二年，處賊盜礦，析延、汀、邵三府別屬，而以建寧道專統建寧及福寧州，以彈壓盜賊，提督坑塲。嘉靖三年，特勅福寧道兼整兵備，徙鎮泉州，備山寇。二十八年，設按察司僉事一員，分巡興、泉二郡，與福寧道參衡，駐鎮泉州。三十四年，令布政司左參議駐劄備兵於福寧州，爲分守建寧道。三十八年，分福寧道備兵福州，駐省城。改泉州分巡爲興泉道，分布政司左參政一員，駐興化，稱分守福寧道。萬曆五年，改建寧道曰建南，又改延平之分巡武平道爲分守建南道，以布政司參議分鎮之。其地東抵海，西抵江西界，南抵廣東界，北抵浙江界，廣九百二十五里，袤千七百一十三里。

福州府 在布政司治所，東抵海，西抵南平縣，南抵莆田縣，北抵福寧州。隋以前，皆見上。唐初建州，後爲泉州，領閩、侯官、長樂、連江、長溪卽今福寧州。五縣。嗣聖十六年，增置萬安，領縣六。後屢改爲閩州、福州。開元二十七年，增置古田，領縣七。二十九年，增置尤溪，領縣八。天寶元年，爲長樂郡，改福安爲福唐。永泰中，析侯官、尤溪地，增置永泰縣，領縣九。貞觀六年，析侯官，置梅溪，領縣十。五代後梁乾化元年，增置閩清縣，領縣十一。後唐時，偽閩爲長樂府，厭唐號，改福唐爲福清。復增置永貞、寧德、德化，領縣十三。後晉時，偽閩爲東都。後漢乾祐元年，歸吳越，析尤溪歸劍州，析德化歸泉州，領縣十一。宋初，爲福州，置懷安縣，領縣十二。天禧五年，改永貞曰永昌。乾興中，改永昌曰羅源。崇寧元年，改永泰曰永福。淳祐中，置福安縣，領縣十三。元改福州路，領司一，曰錄事司，州二：升福清爲福清州，長樂爲福寧州，以寧德、福安二縣隸福寧，凡領縣十一。皇朝洪武元年，改爲福州府：領州縣如舊。二年，改福清、福寧二州爲縣，領縣十三。成化九年，升福寧爲州，隸以福安、寧德，如元舊領縣十。萬曆八年，省懷安，併入侯官，領縣九。

江山奇秀，土風深厚。建、汀二疆束其右，溟海巨流衛其左。其形勝也。

閩縣 東抵連江，西抵侯官，南抵福清，北抵侯官。隋以前曰原豐。開皇十二年，改曰閩。五代唐長興四年，偽閩改爲長樂。清泰二年，仍舊。晉天福六年，偽閩又改爲長樂縣。宋、元皆爲閩縣。皇朝因之，坊四，(一)里三十六，統圖一百二十六。(二)

在坊

左一坊，圖三。

左二坊，圖五。

左三坊，圖三。

南津坊，圖三。

在鄉

崇賢里，圖二。宋鳳池西鄉。山曰菩提。泉曰湯泉。

歸善里，圖二。宋鳳池東鄉。嶼曰前嶼、後嶼。

鼓山里，圖四。宋鳳池東鄉。山曰鼓山、鼓岐、蓬陂、劍山、卧牛。石曰磕下。嶺曰叫佛、蕭灣、魁崎、古嶺。潭曰鐵鼎、車函、觀

音。

桑溪里，圖一。宋鳳池東鄉。嶺曰婆嶺、獵嶺。石曰動。溪曰善溪。

易俗里，圖二。宋晉安西鄉。山口長樂、茶園、寶月、三昧。池曰三角。

遂勝里，圖三。宋晉安西鄉。初名瑞聖。皇朝成祖閱閩版，訝其太佳，易今名。山曰鳳丘、東山。嶼曰竹嶼、橫嶼。井曰天

台。

孝義里，圖一。宋晉安西鄉。山曰金鷄、龍窟、奇山、東湖、峭谷。嶺曰鵝鼻。溪曰桑溪。

江右里，圖一。宋晉安東鄉。山曰衡山、東山、鳳洋、嬰臺、銅斗、鷲峰、盤石、石門、重雲。峰曰天馬。嶺曰象嶺。嶼曰鵝鼻。

江曰閩江、下洞。

江左里，圖二。宋晉安東鄉。山曰雲門、芹巖、蒲峰、後灣、石龍。嶼曰洋嶼、猴嶼、琴嶼、雙嶼。

潭。

合北里，圖九。宋晉安東鄉。山曰象、雙髻、香爐、百洞。溪曰洪、田。孟源出大坑。嶼曰殷嶼、梅嶼。石曰動石。潭曰龍井

嘉登里，圖七。宋晉安東鄉。山曰玉崙、白雲、琅崎、壺江、五虎。嶼曰董、官母、雙龜。石曰海甯。

嘉崇里，圖九。宋高蓋北鄉。山曰釣龍臺、橫山、惠澤。江曰南臺。

高惠里，圖一。宋高蓋北鄉。

時昇里，圖七。宋高蓋南鄉。山曰藤山、鰲頭。嶺曰栢嶺。塢曰梅花。

仁豐里，圖一。宋高蓋南鄉。山曰高蓋。嶼曰鹽嶼。溪曰桃花。

光德里，圖五。宋高蓋南鄉。山曰壺嶼、石室。

官賢里，圖三。宋安仁鄉。

仁惠里，圖五。宋安仁鄉。山曰飲井、新安。嶺曰大步。洲曰螺洲。

開化里，圖三。宋安仁鄉。山曰平山、甘泉。嶺曰瑞跡。

永南里，圖五。宋安仁鄉。山曰石鰲。井曰龍泉。

永北里，圖四。宋安仁鄉。山曰玉頂、君山、厝山、石山。院跡、磻下、疊石。嶺曰石湖。嶼曰龜嶼。石曰石船、石籠。江曰大

定。潭曰馬面。井曰更門。

歸仁里，圖一。宋開化西鄉。山曰清涼。石曰石步。江曰峽江。

永福里，圖三。宋開化西鄉。山曰城門、石几、大翁、傳坑。巖曰魁星。江曰西峽。井曰龍觀。

高詳里，圖一。宋開化西鄉。山曰大象、西峽、文殊、珠山、黃石。

光俗里，圖四。宋開化東鄉。山曰浮峰、壽岐、玉壺、文筆。

至德里，圖四。宋開化東鄉。山曰九龍、唐嶼、洞山。嶺曰狂牛。江曰上洞。潭曰昆濟。

紹惠里，圖一。宋贊賢鄉。峰曰琅峰。嶼曰蓮花。江曰琅崎。(四)井口龍井。

欽仁里，圖一。宋贊賢鄉。山曰白田。嶺曰蕉嶺。溪曰蕉溪。坑曰蕉坑。

歸義里，圖三。宋贊賢鄉。山曰圓頭、馬山、玉枕、柘枝。嶼曰枕嶼。

積善里，圖三。宋贊賢鄉。山曰白鹿、青洋、梁山。峰曰文筆、三郎、玉水、富山、貪狼、蓮花、方巖、白鹿、古城、飛蓬、紫苔、太

平、金仙、天柱、朝陽、金欄、起雲、寶臺、大座、玉蕊、雙童。嶺曰青布。嶼曰芝嶼。溪曰榕溪、苦竹、白鹿。

還珠里，圖三。宋崇善東鄉。山曰葫蘆。嶼曰庖嶼。

西集里，圖一。宋崇善東鄉。山曰石鼓、石壁、岱頂。峰曰文筆、三郎。溪曰義溪。

方岳里，圖一。宋崇善東鄉。山曰東峰。巖曰紫微、五仙。

永慶里，圖三。宋崇善西鄉。山曰塔峰、木嶼。

清廉里，圖一。宋崇善西鄉。山曰方山。巖曰靈源、黃巖。

靈岫里，圖二。宋崇善西鄉。嶼曰劉嶼。

右附郭。

山

九仙山 在城東南隅。城中有九山，諺曰：「三山藏，三山現，三山不可見。」是山與侯官之烏石、粵王，其現者也。羅山，與侯官之冶山、閩山，其藏者也。又有隱隱磅礴於閩閩間者，曰靈，曰芝，曰鐘，故曰

不可見也。山，舊名于山，高百十五步，周迴三百十步，古時有碑，蓋識語也，其文曰：「我有一莊園，寄在于山邊。于山九道士，呼名爲九仙。輒然來相賀，磊老自相傳。李公來戰日，此無二一物。只有一積金，寄在于山莊。不在中山中，只是隴西郡。我住東西城，莊在于山下。有人有不信，但呼碑中話。只看于山松，于山金出現。不在路傍，只在中隴西。拾得無分張，時人莫笑金泥師，拾得金泥也有富。太和二年，于山二斷。吾年乙丑，金圍一片。寄在山前，在前左臂。不歸庚申，須歸乙未。留傳子孫，衣錦次第。時人見碑，吾今在世。」後以漢何仙兄弟九人得名，故名九仙。按九仙，不載傳記。相傳本臨川人，九人皆瞽，惟長者一目上豎獨明。後相率鍊丹，以飼湖中鯉，鯉盡化龍，九人各乘一去，今仙游縣之九鯉湖是也。九人始人閩時，蓋居此山。又云：「漢武帝時，齊少翁以巫鬼事得幸。九仙之父詣闕直諫，九子力止之，其父不聽。少翁事敗被誅。武帝召官其父閩中，而九子因得至閩中鍊氣成道。」又云：「九仙父任俠好氣，從淮南王安游。淮南王善之，談議寢廣。九人懼其及也，數諫父謝絕王。父不聽，去而人閩，鍊丹仙游縣之湖上，丹成仙去。及王敗，父南行求子不得，而死於巖山，今仙游之何巖是也。」然皆莫可考矣。此山又名九日。《閩中記》云：「越王無諸九日之所游也。」唐御史黃滔爲王審知作《丈六金身碑記》又曰：「古仙徐登上昇之地。」《後漢書》：「徐登，閩人，本女子，化爲丈夫，善巫術。又趙昞，字公阿，東陽人，能爲越方。時遭兵亂，疾疫大起，二人遇於烏傷溪之上，遂結言約，共以其術療病。各相謂曰：「今既同志，各試所能。登廼禁溪，溪爲不流。昞禁枯樹，樹即生葉。二人相視而笑。登年長，昞師事之。貴尚清儉，禮神惟酌東流水，脯削桑皮爲之。但行禁架，所療皆除。」顧《漢書》言登物故，不言仙也。唐天祐元年，審知卽山西南建萬歲寺。梁開平元年，請以其寺爲梁太祖祝釐，表額壽山。三年，審知建定光多寶

塔，爲其父母薦福，亦在是山。黃滔記云：「塔之科也，恐山之偏，憂地之人，將塹平壤，五十尺之深，百有餘尺之濶，杵土積石而上，逮二十八尺，忽得寶珠之現，倖於自地之湧。遂號之曰定光。」皇朝《閩中考》：相傳宦閩中者，上官之日，必從城西門入。人南門，必火。嘉靖十三年，四明屠僑來爲左伯，不之信，人南門。居一月，雷震，萬歲寺塔火。僑詣寺拜火，天方雨。僑急以雨衣藉地，拜至三，塔鼎墜地，鼎有歎識曰：「諸天及人，無繇見鼎。地搖三日，天雨四花。土田三變，今古同時。屠人握閩，雨衣三拜。梁天監四年書。」蓋是塔也。當審知建塔之年，復卽塔右鑄佛像一，高丈六，菩薩二，高丈三，銅爲內肌，金爲外膚。像未鑄時，審知夢天西綵雲燿裂，大佛中坐而啟言曰：「斷予一臂，衛之一方。」及其鑄也，工別鑄一會而一之。審知喜如所夢，奉之壽山之塔院。亦黃滔作記云：「爾也，山之峰，曰鼇頂，山巔直石壁立，可表裏望閩城。」宋陳誠之讀書於山之嘉福院，後狀元及第，閩人又呼曰狀元峰。旁有玉蟬峰，南有小華峰，勢皆卑於鼇峰也。山有三十奇：曰集仙巖；曰磊老巖，「磊老」，識文中語也；曰躍馬巖；曰獅子巖；曰梅嶺；曰仙人座；曰祈雨僧真身，祈雨僧，名義收，後梁時人，貞明三年，春不雨，至五月，義收以膏藥指，不雨，積薪通衢，期七日自焚，炬舉而雨。後游洪州將歸，人共遮留，乃截左臂付之曰：「吾去後，不雨，出禱必應。」曰杏壇；曰石門；曰青牛洞；曰棋盤石；曰醉鄉石；曰仙羊石；曰平遠臺，有巨石，刻「平遠峰」三字。皇朝記：嘉靖末，倭寇倣擾，副使宗臣有《登平遠臺記》曰：「嗟夫，客乎！客聞其說，恐予之投觴於地，莫予飲也。夫閩者，豈非記所稱東南巨麗哉！家纓弁，人詩禮，農嬉於疇，而商歌於塗也。當是時，而登厥臺焉，高山大川，游雲芳草，罔弗觸吾目也，則罔弗快吾心也。今何時也，吾見茲臺，三駐軍矣。客亦東眺於大海乎？樓船組練，隱隱起也。南睇於江，故里婦日濯錦漂絮其中者，今且健兒飲馬

矣。西瞻烏石，蓋有鍛甲礪刃，鼓箛鐃吹之聲焉。北闕閉井，則父老子弟被戎執戈者，怨讎盈道也。且千里之內，亡者未葬，瘡者未起，流者未歸，繫者未釋，吾念之。吾不知汗之淫淫至踵也，昔何以驩，今何以悲；昔何以靖，今何以擾。斯其故難言哉！難言哉，夫君子之謀人國也，上憂主憂，而下憂民憂者也。今帝心常在萬里，而民瘼充充之在吾前也。方請纓枕戈，不暇餐沐矣。客廼欲吾睹高山大川，游雲芳草而嬉乎此，吾所爲嘆也。昔元臣據閩之險，以抗我旅，皇祖廼命樓船將軍從大海徑搗其穴，空之。帝謨輝赫，日月同炳，乃今策事之臣，顧不能設一奇制敵，而使醜夷往往截海闖我，此視皇祖諸臣何如哉？吾歎之，實愧之也。」曰野意亭，有孟庾、韓世忠像。孟朝衣，韓戎服，建炎中塑；曰金粟臺，臺，宋郡守程師孟取王氏塔中所塑金粟像名，後守元絳，篆「金粟臺」三字於石，最後，絳侄積中爲守，繪金粟像臺側，曰喜雨臺，曰九日臺，曰琴臺，曰廓然臺，曰三山閣，曰攬鰲亭，曰一華亭，朱敏功、陳瑩中有詩，曰四微亭，慶曆中令沈邈所名，蔡襄有詩，曰龍舌泉，曰鍊丹井，曰浴鵝池，古記云：「雷震穴成，丈餘，不知泉脉所出，夕時鵝群來浴」，曰石龜池，曰雙石祠，石有二：青色，偽閩以爲雙龜，名爲龜七郎，靈而封之，其始封光威振遠將軍，會同十年，以閩府承平，復封爲安境侯，廟祝陳興可至，加銀青光祿大夫檢校太子賓客兼監察御史上柱國，可謂僭誕也，曰《政和萬壽道藏》，宋政和四年間，尚書黃裳奏請建《飛天法藏》，藏天下道書，總五百四十函。

羅山 九仙之支也。在萬歲寺南，閩縣學之北。中有法海寺，梁孟司空捨地爲之。偽閩徙之城西。晉開運二年復舊。宋始寺曰法海。皇朝嘉靖中，監御史濟卿有之。御史諸孫鸞其旁地於戶部郎陳長勉。萬曆中，濟卿孫圻復捨爲寺，長勉歸所嚮地，爲全寺如故。舊有羅山堂、金積園、萬綠堂、友石齋諸

勝。金積園，蓋取于山之識。

丁戊山 九仙之支也。以在郡城中，又曰中山。舊爲嵩嶽觀，稱中山高嶽崇福行宮，蓋閩王望祀之所。唐有釋宣一者居之。宣一，仙游人，檢身以律，中食不踰，一室晏如，惟清水楊枝，時皆曰希有人也。

靈山 在城東北隅，侯官縣越王山之支也。亦名大雲。中有開元寺，寺有唐明皇像。會昌中，汰天下僧寺，州獨存一，此寺也。天祐中，王審知既作城，塑北方毗沙門天王以鎮之，其謂之天王者。唐天寶元年，西蕃寇安西，明皇詔不空三藏誦經，不空因言北方毗沙天王神通，可以禦之。會安西亦奏：「將戰，有神火餘，金甲而來。」因勅諸道、州、府城西北及營寨，並設其像。黃滔作碑：「毗沙門，梵音，唐言『多聞』也，始自於闐利之英奇，膺世尊帝釋之錫號，居須彌山北，住水晶宮殿，領藥叉衆，爲帝釋外臣，以護南贍部洲。其道人大乘，得無生法，忍住聲聞證不還果。我公之築城也，恢守地養民之本，隆暫勞永逸之策。

謂勝莫勝於開元寺，尚莫尚於寺之靈山。阜寺之艮，控城之乙，祖僧六葉，厲其下，珉石一拳，星其上。劍池徹瀉，飛山奔揖，足以象水精而瑩官殿，掀廟貌以衛城池。擇工之精，搜塑之妙，製乎聖質，俄然化出，身被金甲，手擎鴈塔，地祇下捧，天將前擁。光灼灼而如將動搖，神雄雄而若欲叱咤。觀之者皆謂：須彌拔宅於是矣，於闐分身於是矣，而復翼僧堂而右，遼膊鍾樓而左。突轟錫百，萃其夏午。蒲鯨六吼，其宵加信。塵閭之北方，連瑩之靈域也。寺後山口芝山。芝山，東吳時有都尉營，置典船都尉，造舟此山之麓。復有太平寺，後唐同光元年，王審知於城西南，張爐冶十三所，備銅蠟三萬斤，鑄釋迦彌勒像，莊宗題爲金身報恩之寺。又泥金銀萬餘兩，作金銀字四。藏經各五千四十八卷，旃檀爲軸，玉飭諸末，寶髹朱架，內龍腦其中，以滅蠹蟬。唐翁承贊碑而銘之云。宋淳熙《三山志》：閩中寺，始晉太康之紀，因終晉世，益二

寺而已。越二百載，齊之寺一，梁之寺十七，陳之寺十三，隋之寺三。唐，自高祖至文宗，二百一十二年，寺三十九；至宣宗，四十一；懿宗一百二；僖宗，五十六；昭宗，十八，殫窮土木，絢寫宮省，極天下之侈矣。王氏有閩，更加營繕，增寺二百六十七，費耗過之。自屬吳越，首尾三十七年，建寺亦二百二十一。入宋，頽風弊習，侵入骨髓，富民翁媼，傾施貲產，以立院宇者，亡限。蓋慶曆中，通至千六百二十五所云。宋末，安撫徐經孫《福州卽景詩》：「潮田種稻重收穀，道路逢人半是僧。城裏三山千簇寺，夜間七塔百枚燈。」閩中舊寺之多，可以想見。

菩提山

鼓山 鎮山也。屹立海濱，距城東三十里，絕地可十五里，延袤數十里，而遙巔有石如鼓。或云：每風雨大作，巖洞中逢逢若鼓聲。其峰，則大頂、小頂。大頂峰，一名劣則，狀若覆釜，西望郡城若雲板，近邨落若聚沙，若布棋。東視大海，一氣茫然，螺髻數點，隱見煙波中，相傳大小琉球云。小頂峰，在涌泉寺後，下視殿閣，若騎其尾；西望郡城，列雉數千，市廛闐闐，麗譙浮圖，臺門府寺，釋老之宮，輝霍崇麗，闐出其間。又有香爐、鉢盂、白雲、雙髻、獅子諸峰。其崗，則牛眠、半月眠、狗龍脊。支山，則鼓岐、劍山。鼓岐，下臨大江，石圓如鼓，蓬岐，山多巨石。劍山，臨江，有石如劍痕。嶺，則叫佛灣、魁崎。魁崎上，有巖曰劍石，石約五十餘丈，上刻籀文。相傳唐黃巢兵經此，以劍藏石下。洞，則靈源、海音、白雲、蛇洞，而靈源尤奇，在涌泉寺左，下數十級以入，西澗貫其中，覆以石橋。澗左右，皆石壁削立，其左，怪石無數，小徑逶迤至水雲亭，南向豁然，方山當其前，左則永福，右則長樂，皆在几席間。當唐會昌時，除佛汰僧，有村民鑿井三丈餘，得一古磚，上刻「僧晏興法」四大字，以獻於州，州承朝禁，取磚毀之。至王審知，請僧

神晏住持大興法教，而磚文始驗。其磚，蓋得於此洞之旁。朱梁中，莆人徐寅有《十二咏》，有記，今俱不存。宋蔡襄詩：「靈泉出石竇，清吹生篁竹。飛毫劃削壁，勢力忽驚觸。」李觀詩：「誰把石崖齊劃削？直教雲氣到簾帷。」佳句也。白雲洞，洞有三天門，石磴七百二十級而始至洞，皇朝萬曆中，僧悟所開。蛇洞，在蓬崎山中，山石重疊成洞，洞口僅容一人，入其內，豁然，屈曲而進，莫知所止。巖，則喝水、國師、祖師、石門、華嚴、應真、忘歸、懸鍾、雲屏、佛頭、虎窟。喝水巖，僧神晏所居巖也。傍有石龕，水穿石壁。神晏厭其嘈聒，喝轉之，水逆東流，而西澗遂涸。國師巖，在西澗底東，壁深廣各十餘丈。晏師既以神力喝涸澗水，遂移居於此。嘗掇石乳而食，指痕猶存。後閩主加晏號「興聖國師」，因以名也。《五燈會元》：「師，大梁李氏子。幼惡葷羶，樂聞鐘梵，年十五，出依衛州白鹿山規。禪師披削，嵩嶽受具。於是杖錫徧扣禪關，而但記語言，存乎知解。及造雲嶺，朗然符契。一日，參雪峰，峰審其懸解，撫而印之。」石則石龜、將軍、仙跡、合珙、金剛、鵝頭、貓紐、劍石。水，則白猿峽、浴鳳池、羅漢泉、龍頭、乘雲、神泉、寶泉、吼雷湫、印月潭、放生池、化龍池。浴鳳池者，池中五色雀來浴。園林，則西畬茶園、董坑荔枝、硯池。寺，則湧泉、普度、衡山。湧泉寺，在鼓山半，唐建中四年，龍見於靈源洞，從事裴胄曰：「神物所蟠，宜鎮以寺。」請僧靈嶠，誅茅爲屋，誦《華嚴經》，龍不爲害，因號華嚴臺，亦以名其寺。會昌寺廢，審知以居神晏。乾化二年，改名鼓山白雲峰湧泉院。宋爲華嚴寺。咸平六年，賜寺中御書百二十五卷：《御製心輪偈頌》十四卷，《逍遙咏》十一卷，《秘藏詳》二十卷，《緣識》五卷，《青龍疏》六卷，《秘閣贊》，《九絃琴阮歌》，《喻言雙鉤書聖教序》，《心輪圖無名說》，《華法日行誠有益無法帖》十二卷，《大字詩》三卷，《益銘四體五體書》二卷，草書《孝經》、《千字文》、《孤城詩》，《大顛草書急就章筆法歌》，雜字九軸，故實九軸，八分書《千字文》，《故

實真定王碑，飛白帝，「佛」二字，《雜言無註》，《雜言有註》，《不假詩》，《遠看詩》。皇祐三年，又賜御書二軸：飛白「明堂之門」，篆書「明堂」。至和元年，又賜《皇祐新樂圖記》三卷。院，則白雲禪、南院、浴院、南山塔院、方丈庫院。庵，則圓通、老禪、靜觀、靈源、一多、癡坐、平楚、耆義、崇石、白雲、雲翠、南庵、泉石、東際、興善、積翠、元真、東庵、西庵、三塔、雲際、蟄仙、南院塔庵、雙潤塔庵。堂，則選佛、恢張觀、楔照堂、客省、地藏、老宿、東峰、獨照、負春、海月。殿，則國師、祖師、觀音、報慈。閣，則羅漢、華嚴、九層、毗盧、千佛、飛錫、超凡。樓，則華嚴、妙峰。齋寮之屬，則頻伸齋、首座寮、維那寮、前資寮、旦過寮、湧泉寮、白雲寮、五老寮、老宿寮、憨睡室、遁室、痴坐軒、無寄軒、不動軒、自牧軒。亭，則臨滄、石門、望州、天風海濤、水雲、湧泉、松關、觀花、後樂、普賢境界、乘雲、半山、梯雲、海會、圓通、東際、通霄、白雲、元公、鳳尾。天風海濤亭，宋趙汝愚有詩：「江月不隨流水去，天風直送海濤來。」朱文公愛之，遂書四字於石，因名亭也。水雲亭，石柱上書「蔗境」二字，詩皆不題名氏，淳熙中，四明趙蔗境與滂見之，惘然有感，題石上云：「詩題蔗境不題名，墨跡懸崖碧蘚平。游宦來看心忽悟，前身應是趙先生。」元公亭，嘉祐中，爲郡守元絳立，絳詩：「誰書吾姓揭亭顏？棟宇飛甍氣象寬。谷口秋風吹鬢髮，海東朝日上欄干。」臺，則應真、涅槃、說法。橋，則東際、蹴鰲、羅漢、圮橋、化龍。蹴鰲橋，仙人黃太和，侯官人，黃璞五世祖也。少好導引，年三十餘，即棄家人鼓山，妻子求之不得，大順初，跌坐其處。璞游山，偶見之，問其家世，乃知其五世祖，悲泣請還。不聽。明日，率家人往謁，不復見矣。塔，則南院東西二塔。井，則羅漢、水滴。祠廟，則閩王祠、黃石祠。閩王祠，在湧泉禪院，祀王審知，當審知尊尚神晏之時，四方雲侶，聞風雲集。審知傾貲給施，寵賚紛紜。僧人德而祀之。黃石祠，在眠牛岡，宋熙寧間，岡下民鋤地，空中忽轟然聲，仰視樹杪，墜

止香爐，遂取以下。翼日，有一道人至，曰：「此黃公爐，自穀城飛至，宜爲廟。」言訖，忽失。鋤民驚異。先是，龍江畔，有商人積木數千，一客至，問值，遂遍題木數百爲識，皆作「黃石」二字。去，涉旬無耗，商誕之，以斧削題，題皆人木數寸，相與駭懼。翼日，鋤民至，具言之，商遂以半價歸鄉人爲祠焉。蓋鼓山之勝如此矣。宋陳烈《游鼓山銘》曰：「鼓劣削，峰頂特。窮島夷，類封域。屏閩東，拱辰北。歲辛亥，帝司赤。竦神烈，從階陟。拏若華，揖瑤極。呵蜚霆，蹙鰲脊。披雲根，殫目力。高者仰，深必惕。謹其至，惟古則。」蓋烈以熙寧四年辛亥，與守丁竦、提刑沈紳，同游是山而作銘也。陳傅良《鼓山詩》：「鼓山聞天下，一見名不空。自從周職方，閩在王會中。登山亦幾人？興寄隨所逢。騎君常惴日，遷客多悲風。劍川發甌西，萬阻嶼海通。忽焉得平壤，北山轟其東。我行未及巔，已見國勢雄。三韓到吳會，不可道里窮。俯瞰南來帆，沄沄自朝宗。」按閩人相沿謂登鼓山之巔，遠見琉球，故烈銘、傅良詩皆及之。然予讀給事陳侃《使琉球錄》，云：「閩中士大夫類云鼓山霽日，可望琉球，蓋小琉球爾。若大琉球，借目離婁，何從望之？」後又讀郡人謝杰《出使錄》，謂：「發舟梅花，森無所見，僅東沙濛濛，眉睫間，疾颺斯須，旋復失之。踰辰求小琉球，針弗得，迷而東，八晝夜乃遇葉壁。葉壁者，夷北門也。逆而南，又五晝夜，始至嗟平。踰東沙，不睹大琉球，何有石鼓哉？」然則味杰斯言，并不見小琉球也。（五）山之裔，爲卧牛山，爲孟崎跳，爲羅星山。迤北，爲永北諸山，巖巒峯畢，崩缺造天。東與雲門山相夾，束流徑閩安鎮，以達於海。

雲門山 在洋嶼，去城七十里。山中有寺，多松竹泉石之美。有觀音巖、彌陀巖、泗洲巖、獅子石、坐禪石、五里泉、望拜石、仙掌石、楞迦室、吸江亭、妙善庵。石窠妙善庵，有宋孝宗書額「石窠」。僧安永作頌，有「路繞懸崖萬仞頭，擔泉帶月幾時休」之句。南連芹巖、蒲峰、後灣、石龍諸山。長江前繞，江中琴旗

雙魚嶼峙焉。下有龍脚石，可七八丈，踣於江南。出，爲猴嶼、鷄籠山。

石門山 南接湖林，比連濂山。山兩旁壁立。上有二石，峭拔夾峙。其傍山，曰重雲，有巖，平坦十餘丈。中有龍井。

鷺峰山 上有馬面潭，歲旱禱此。

鳳洋山 兩峰相應，勢如搏鳳。山頂有仙亭遺址、石床、棋盤、几案。舊傳仙人王進才飛昇於此。峭壁刻「登龍」二字，地名龍門。

嬰臺山 傍有銅斗山、天馬峰。下有傳野橋，龍溪之水出焉。

盤石山 山頂三石，高十餘丈，上疊一石，方如棋盤。天欲雨，雲出焉。迴港繞其下，水出衡山之龍溪，爲灣三十六，合流注閩江。港口有石橋，風恬瀨靜，綸網集焉。

衡山 《元和圖志》：閩郡有衡山。潮從閩江曲入三十六灣，與溪水會。山形如鐘甬，路接鼓山。

象山 形如象，霓溪貫其中。山裔爲郭，人家環焉。是爲膏壤，其地可隱。皇朝鄭善夫有詩。

雙髻山 從香爐峰逼天而下，重巒疊嶂。上有龍潭，削巖夾立，飛流七十丈。潭前有石屏，高丈許，祈雨者束縑繫鐵於屏上，縑盡鐵落，龍怒，碎其屏而去，久之歸，則鼇大如拳。有祈雨者，見一物，色如枯藤，張口向瀑，群魚環之，時或露爪以示。下有鯉潭，天陰時出，樵者以爲石也，迫視之，雙眸炯然，乃走。此溪與龍逕溪會流，其名曰浩龍逕，宋鐵冶場也。朱文公以偽學禁，遁跡至此，爲鄭庸齋、梁汝昌書以「燕堂躍龍津」，至今寶之。雙髻東，爲錦屏、兜鑒，有笏石、動石。

百洞山 在覆釜山陽，五峰疊下。中峰、蓮花峰最奇。有石鯨、仙桃、石室、星窩、猿公洞、獅子巖、石

蝮、蝙蝠洞，蝙蝠色皆黃翠，一白者小，盛夏始出。翠與黃交繞之，見人不飛。又有虎鎗、仙掌、日輪、石鼎、一線天、閩風臺、蓮花藏，明暗穿受，凡十七曲，見蓮花頂如髻，下視則海色江色野色溪色相繁，浮盪於几席之下，豁然天地之際焉。中有青芝寺，以生青芝得名。

王岫山 渡江塞海，發作九龍，南峙白雲山，西爲琅嶠山，〔六〕下有龍臺。宋學士林存之所居也。白雲山，可觀日。裔爲張岐，有兩石隱萬石中。潮至，相擊聲如雷，故名海雷。跳而東，則壺江山，元海曲里也。有樟樹林。天曆二年中秋，日淪海，而山獨留。前有雙龜嶼，後有五虎山、青羊山、福斗山。皇朝林良箴詩：「載酒入江色，還從福斗游。委蛇山翠晚，洶湧海濤秋。嶼合雙龜近，門深五虎浮。風恬鯨鯨靜，月出蚌珠流。」

金鷄山 或傳秦時望氣者云：「此山有金鷄之祥。」遂斷其脊。斷處，人行爲巷。山北漸高，曰青鵝，桑溪之水出焉。

龍窟山 閩王曲水流觴處也。古有穴蟠，額帶「王」字，人以其爲龍，祀之，故名龍窟。溪東荔枝林，唐宋時荔枝最盛。傍有三友墓，皇朝弘治間，有徐、吳、林者，三人莫逆，死而同穴。在金鷄山後，有嶺曰獵嶺，有崗曰鷄心巒。西連奇山，多怪石。其諸小山，曰峭谷山，曰東湖山，宋林觀過、林夙之居在焉。

鳳丘山 去城五里。有朱文公大書「鳳丘」二字。又有「鶴林」二字，宋彭耜修真地也。耜師白玉蟾，作《問道》二編，得太乙刀圭火符之術。玉蟾自謂於耜：仙家父子云：其隱此山，與妻潘藻珠烹鍊後，俱尸解。詔封鶴林真人。白玉蟾爲耜作《龍雷閣記》，曰：「福之爲州，有寓公若隱君子者彭季益，盛年吏銓得選迄，不調闕，揚袂而歸。『耜』其名，『鶴林』其號。從赤松游，蔑屑人間事，道出於深造，法本乎自然。」

年四十三，益自尚不屈，嘯命風霆，廣求民瘼，雖吏而循良，不是過也。

東山 去城十里。有大同、大乘二寺。大同寺，梁大同六年置；大乘寺，十二年置，皆律寺，異居而食同，合而名曰愛同寺。唐神龍中，律師懷道、懷一相繼居之。會昌中廢。大中十一年復之，合爲一，尚星居。宋天聖元年，主僧戒華，改爲禪刹。元祐中，門下侍郎許將，請爲功德院。有《西院大律師碑》，劉太真撰，於頤書。有《羅漢堂記》。有虞公庵，虞寄隱居地也。南朝《陳書》：「（七）寄，字次安，餘姚人，虞荔弟也，聰敏好學，冲靜有栖遁志，弱冠舉秀才，對策高第起家。梁宣城王國左常侍岳陽王譽爲會稽太守，寄爲中記室，領郡五官掾，簡略持體，曹局寂然。侯景之亂，隨荔入臺，及城陷，遁還鄉里。張彪往臨川，强寄俱行。彪將鄭瑋，嘗忤彪，寄與同舟，劫奔晉安。時陳寶應據有閩中，得寄甚喜。陳武帝平侯景，寄勸令自結，寶應從之，乃遣使歸誠。承聖元年，除中書侍郎。寶應愛其才，托以道阻不遣，每欲引爲僚屬，寄固辭獲免。及寶應結婚，留異潛有逆謀。寄每諷陳逆順，既知不可諫止，迺爲居上服拒絕之。常居東山寺，稱疾不復起。寶應遣人燒寺中屋，寄安卧不動，親近將扶寄出，寄亦不避所。縱火者旋自救之。及留異稱兵，寶應資其部曲，寄因書極諫，勸與異絕，遣子入質。寶應大怒，以寄人望，且容之。及寶應敗走，夜至莆田，顧謂其子扞秦曰：「早從虞公計，不至今日。」寶應既擒，寄以先識免禍。文帝尋敕都督章昭達發遣。寄還朝後，除東中郎、建安王諮議，加戎昭將軍，寄辭以疾。王於是令長停公事，其有疑議，就以決之。太建八年，加太中大夫。後卒。寄少篤行，造次必於仁厚。至臨危執節，則辭氣凜然，白刃不憚。自流寓南土，與兄荔隔絕，因感氣病，每得荔書，氣輒奔劇，危殆者數。前後所居官裁，期月便求解退。及謝病私庭，每諸王爲州將，下車必造門致禮，釋鞭板以几杖侍。嘗出游，近時間里傳相告語，老幼

羅列，望拜道左。或言誓爲約者，但指寄便不欺，其至行所感如此。有聖泉寺，在愛同寺，唐西僧懷一居此。時苦乏水，一日，一禽鬪噪於地，持杖觀之，杖所卓處，泉縷縷出，俄而綾紋波湧。懷一環石分之，南注者以爲池，東注以供汲澣。蔡襄有《聖泉詩注》，云：「俗傳泉湧則民安，是泉涸十餘年矣，今始湧也。」有文殊般若寺，唐景龍四年建，寺後有山，故產金。山有多寶塔，唐永泰中，代宗書額。有《懷道塔碑》，唐李邕作。《懷一塔碑》，唐皇甫政作。塔中有天降舍利，松不棲禽，樑不巢燕，池不產蛙，庭無凡草之異。有榴花洞，唐永泰中，樵者藍超，遇白鹿，逐之，度水，入石門，始極逼窄，忽豁然，有鷄犬人家，主翁謂曰：「吾避秦人也，留卿可乎？」超云：「請歸訣親舊迺來。」主翁與榴花一枝而出，撫而尋之，恍若夢中。黃裳詩：「一枝樵客夢，兩腋石門風。」有神移泉寺，居高汲遠。唐開元中，僧守正，方心念之，一夕，泉迸寺側，往視遠井，則已涸矣。有龍首澗，宋許將肄業之所。又有清音、碧巖二亭，將詩：「黃葉人秋山出地，白雲臨晚海垂天。」佳句也。有文殊巖，巖有古像，歲久塵敗，夜忽現光，林越、閩帥，飾之。有獅子峰，象形也，熙寧二年，守程師孟建亭峰西澗。建炎三年，嗣濮王仲湜書。有涵虛沼，僧惟嶽詩：「碧虛涵沼涵涵虛，虛沼圓同絕欠餘。月夜麗虛知是影，更謀臨沼照蟾蜍。」有松塢，一曰松垵，有松高大，宋初物也。松身有錢昱留題：「景致逼神仙，心幽道亦玄。僧閒來出世，松老不知年。」有天台井。有靈芝塢。有夜光臺。有蟄龍淵。有神僧室。有鑑淨軒。有山輝堂。有御書堂，藏宋太宗所賜書。有羅漢堂。有放生池。又，江右里亦有東山，西連盤石，東接象嶺，山傍有石洞，豁然明朗，曲折深邃，內有二石如床，名仙石床。

長樂山 閩越王時，山間居民夢神人乘白馬至此，因名白馬山。偽閩改閩縣爲長樂，易今名。有淨土寺，梁時州人鄭昭勇捐宅爲之。唐會昌中，廢爲白馬廟。咸通中，郡人迎僧惠筏居之，及夜，有戎服若

拜而辭者，或見乘白馬去，觀察使李景溫因撤爲寺，號東禪淨土。惠復化後，禧宗詔謚爲「辨才大師」。宋紹興中，爲光大藏。皇朝成化，改曰東禪寶峰寺。寺有米芾書額，有《大藏經》版，有畫像，有宋徽宗賜僧達泉御書。有東野亭，蔡襄書額。有比部郎劉照以下詩十一首。有清陰亭，有太守劉瑾以下詩十首。有芙蓉閣，有鄧正言肅詩。有放生池。有小蘭亭，宋郡守楔飲處。山陰有溫泉焉。東禪寺傍，有海印庵，元至正中，僧雲溪建，號梅邊小隱，又曰水竹幽居，與客彈琴賦詩其間，貢師泰、陳高俱有記。山南爲三昧山，惠復塔在焉。

茶園山 發脉金鷄山。山南爲寶月山。偽閩王延稟爲王仁達所敗，奔此。

釣龍臺山 出寧越門二里，曰橫山。迤西南，爲惠澤山，一名獨山，爲南臺山，崇阜屹立，俯瞰巨潭，臺上可坐百餘人。舊記：越王餘善釣得白龍於此，遂築臺表瑞。臺高四丈，周迴三十六步，名釣龍臺山。今市塵矣。有宋米芾書「全閩第一江山」，趙汝愚隸「古南臺」，皆刻石上。又有達觀亭、碧光亭，宋時諸公皆有詩。亭西，閩王無諸廟在焉。漢遣使封無諸孫丑爲繇王，授冊於此，因卽此立廟祀無諸。其後，繇王居股降漢，祀廢。至唐大中十年建祠。宋因之，號顯聖武勇王。廟有左右二王，意王將也。熙寧中，閩兵戍熙河，二王現雲端，大戰獲捷。政和間，戍桂府，徵蠻之際，二王復現，降大雹，飛黃蜂以退蠻兵。宣和二年，浙寇竊發，連陷數郡，將及境，提刑俞向自建安領兵南下，黃蜂數萬隨舟蔽江。居民咸謂神助，大新祠宇。建楹之時，有青赤二小蛇，蜿蜒香几間累日。塹上樑，俄兩見跂首北向移時。旣奉二王像入廟，二蛇又現。及廟成，俞向臨奠前夕，夢有神人，青色，以遷祠謝。禮畢，青蛇忽現左王神前，色如夢中。禱右王現神，赤蛇亦出。邦人信敬益篤。州以聞朝，敕賜廟號「武濟」。六年，進封閩粵王爲鎮閩王，

左王靈應侯，右王顯應侯。建炎四年，再加封號。紹興三十一年，膠西之役，舟師禱戰，獲捷，王加封「英護」，并封王夫人「贊靈」，左侯加「協威」，右侯加「翊忠」。廟循漢制，王西坐，夫人東坐。元時封「真君」，每歲六月望前後，鄉人舉瓜蓮會爲報祭。皇朝洪武十年，布政使葉茂禱雨有應，以聞。中書下禮官議，從神故封，稱「漢閩越王之神」。右參政瞿莊爲文，刻石，系之詩，曰：「炎荒之隅，閩海濱，赫燦照耀光郁分。維王奕葉神禹孫，首驅虎豹鋤荆榛。殿此荒服保黎民，斡旋機軸轉化鈞。謳歌來歸赤帝尊，鐵騎汗血趨崑崙。手扶烈日開冥昏，彤弓旅矢昭殊勳。草木衣被生陽春，漸摩風教俗以淳。秀民挺拔宣人文，甘棠蔽芾森若雲。翼翼遺廟今尚存，歲時報祀羅酒罇。手薦蕙馥香苾芬，翕張造化參乾坤。神靈赫若搏桑墩」。臺西有靈溝廟，其地故名洪溝。元至正間，潮水漲溪，忽一浮槎，泛溝累日，鄉人異之，奉之巨石之上。是夜，鄉父老咸夢一緋衣神人謂曰：「素習岐黃，濟利功多，今當廟食茲土。」父老卽其處立廟。服神香燭，百疾皆愈，因號「靈溝醫官大王」。又有堤，名「新豐市堤」，唐翁承贊冊封閩王審知還朝，於此餞別。承贊詩有「登雲樓上方停樂，新市堤邊又舉杯」之句。

藤山 自天寧山而東，爲此山。地脉起伏如瓜藤。其地多梅，有梅花塢。又，東一峰曰鰲頭，繇藤山發脉，聳而反顧。又東，爲壺嶼山、石室山。山東有井泉，亢旱不竭。

高蓋山 上有仙壇。壇有池曰青龍，俗曰天池。有峰曰徐女，相傳水仙之女也，採苦參服食於此，又名苦參。其後參皆甘矣。山有洞曰蘆灣，洞口有棋盤石，有井曰仙人。相傳有牛墜其中，牧童疾歸，告父兄出之，至則牛已出井上。有溪曰桃花，元陳億翁種桃數百本，每春時，眠食其中，花謝乃去，因以爲名。山之南，齊姓居之，曰齊坑。山北，王姓居之，曰北園。

葫蘆山，一名梁山。上有紫臺，邦人勝游，爲扈嶼，爲橫嶼，爲劉嶼，爲紫微巖。唐有紫微公，於此得道輕舉。宋陳民先詩：「碧落已驂丹鳳駕，紅塵空望紫薇巖。」爲五仙巖。巖，五石並列，中一石高起二十丈許，攀緣無路，意獨神仙得游之。爲文筆峰，爲三琅峰，爲百六峰，以自清廉里之方山至此，爲峰凡百有六十，其可記者，爲玉水峰，爲富山峰，爲貪狼峰，爲蓮花峰，爲方巖峰，爲白鹿峰，爲古城峰，爲飛蓬峰，爲紫苔峰，爲太平峰，爲金仙峰，爲天柱峰，爲朝陽峰，爲金欄峰，爲起雲峰，爲寶臺峰，爲大座峰，爲玉蕊峰，爲雙童峰。其傍小山，爲石鼓、石壁、岱頂。岱頂之南，峭壁數仞，下有群潭焉。

東峰山 高不亞鼓山，俗呼東峰，鼻脉連五仙巖。峰頂巨石有仙人跡。

塔峰山 突起平地。里名尚幹，宋鄉人林津龍，積官至尚書幹，故名。

木嶼山 連於塔峰，周遭有江：三江、淘江、潮汐通焉。

〔校記〕

〔一〕「福州府 閩縣」六字，各本原脫，據本書體例補。

〔二〕「坊四」二字，各本原脫，據下文及本書體例補。

〔三〕「統圖一百二十六」，下文實列一百二十七圖。

〔四〕〔六〕「琅崎」，各本原作「琅琦」，據下文及《八閩通志·地理》改。

〔五〕「並不見小琉球也」至「鳳丘山」，福建省圖書館六十五冊本上，異文如下：

卧牛山 府城東首山也。

王埔山 中有海雷石，波濤穿射，孔竅豁舒，風至旬震有聲。其對峙口湖江山，一曰浮江山。浮江之後口文筆山，甘泉出焉。前有雙龜嶼，後有五虎山，有青羊山、琅崎山、福斗山并列海中。皇朝林良箴詩：「載酒入江色，還從福斗游。委蛇山翠晚，洶湧海濤秋。嶼合雙龜近，門深五虎浮。風恬鯨練靜，月出蚌珠流。」

雲門山 在南洋嶼，去城七十里。山中有寺，多松竹泉石之美，有觀音巖、彌陀巖、泗洲巖、獅子石、坐禪石、五里泉、望拜石、仙掌石、楞迦室、吸江亭、妙善庵。石筵妙善庵，有宋孝宗書額。石筵，僧安永作頌，有「路繞懸崖萬仞頭，擔泉帶月幾時休」之句。南連芹巖、蒲峰、後灣、石龍諸山。長江前繞，江中琴嶼、雙魚嶼峙焉。

衡山 枕閩江之左。《元和圖志》：閩都有衡山。一名霍山。形如鐘甬，路接鼓山，下有龍脚石突跨江側，長七八丈。

鳳洋山 兩峰相應，勢各搏風。山頂有仙亭遺址、石床、棋枰、几案。舊傳仙人王進才飛昇於此，峭壁刻「登龍」二字，地名龍門。

嬰臺山 傍有銅斗山、天馬峰。下有傳野橋，龍溪之水出焉。

鷺峰山 上有馬面潭，歲旱橋此。

磐石山 山頂三石，高十餘丈。上疊一石，方如棋盤。天欲雨，雲出焉。迴港繞其下，水出衡山之龍溪，為灣三十六，合流注閩江，港口有石橋，風恬濤靜，綸網集焉。

石門山 南接湖林，北連濠山。山兩旁壁立，上有二石，峭拔夾峙其傍。山曰重雲，山中有巖，平坦十餘丈，中有龍井。

金鷄山 秦始皇時望氣者云：「此山有金鷄之祥。」斷山脊以壓之。其所斷處，人行為巷，號鷄公巷。山北漸高，曰青

鵝，桑溪之水出焉。

龍窟山 亦名曲水，閩王曲水流觴處也。溪東荔枝林，唐宋時荔枝最盛。傍有三友墓，皇朝弘治間有徐、吳、林者，三人莫逆也，死而同穴，在金鷄山後。山古有穴蟠，額帶「王」字，人以爲龍而祀之。有嶺曰獵嶺。有崗曰鷄心嶺。西連奇山，山多怪石。其諸小山，曰峭谷山，曰東湖山。東湖山，宋林觀過，林夙之居在焉。

鳳丘山

〔七〕〔南朝〕《陳書》，各本原作「五代《陳書》」，據《陳書·虞奇傳》改。

閩書卷之二

方域志

福州府 閩縣二 侯官縣一

山

方山 一名五虎山。九鼻東向，四面如城郭，突兀端方，省會南有三案，是山削拔秀碧，又出二案之上，正直閩藩，顧取名爲五虎，若於菟然。古時旣作譙樓可五十仞鎮之。而閩藩出樓下，亦杜正門，旁出以避之。漢仙人介琰，嘗隱此山。《列仙傳》：「琰，不知何許人，住建安方山，師白羊公杜泌，受玄一無爲之道，能變化隱形。嘗往東海，過秣陵，吳主孫權禮之，爲起靜室，日遣人問起居。琰或爲童子，或爲老翁，無所食。琰不受餉遺。吳主欲學其術，琰以吳主多內御，不傳。吳主怒，縛琰，着甲兵引弩射之，弩發，唯繩索存，不知琰之所之。」傳云：「住方山，而以屬建安」者，漢時未立晉安也。上有阿育王塔。陳天嘉元年，置有方山寺。有石壇、石床、石棋局。有靈壁巖。山之陰，有峰隆然。逆馳而西，曰黃巖，鄉人於此禱雨。又有巖曰靈源。溪中有鯉魚，石甚奇，四周橘柚，其味特甘，可食而不可竊。唐天寶中，賜號甘果山。有唐賈島《章敬國師碑銘》。按《章敬國師碑銘》，權德輿所撰，而島作未見。或權撰賈書也。《德輿

碑銘：「師懷暉，姓謝氏，東晉流寓，今爲泉州人。孩提秀發，博究書術。一旦慨然曰：『我之祖先，今安在耶？四支百體，視聽動用，孰使然耶？』」漼然雨泣，改服緇褐，志在楞伽。行在曹溪，得圓明清淨之本，去妄想因緣之習，百八句義照其身心，心離文字，化無方所。於是抵清涼，下幽都，登徂徠，入太行。所至之邦，被蒙法味，止於太行百巖寺。門人因以百巖爲號焉。元和三年，有詔徵至京師，宴坐於章敬寺。每歲，召入麟德殿講論。後以疾固辭。十年十二月二十一日，恬然示滅，其年六十。其夏，三十五弟子智朗、志操等，以明年正月起塔於灞陵原。凡一燈所傳，一雨所潤，人法界者，不可勝書。《三山志》無名氏詩：「到山不識山面目，但見九鼻盤溪曲。歸來兀坐小窗下，倚天百里剖寒玉。」宋守王達詩：「衆狀皆奇險，茲形獨擅方。坦夷中砥礪，端正外青蒼。」皇朝林枝《游方山記》：「余以永樂庚寅冬，繇龍巖人董塘，取路登山，蹊徑峻峭，至谷口，兩崖磬石爲寨門，甚隘。陳友定從事朱良初所築，以禦寇也。稍進，有宋人石刻，模糊莫辨。內則平田數頃，溪流屈曲。入寺，荒穢，惟餘殿基。從橫木橋過小溪、石逕，茆屋數間，有老翁止宿小軒地，爐煨榾柮。迨曉，繇雲居寺後巖度山崗，止盤石。復踰數里，至山巔，是爲福州巖。平坡一望，皆短荆，無林木，其前則懸崖，直下視水西、水南、新陞、陽陞、陽鳳岡、洪塘，積蘇累塊也。繇山南至大座巖，巖前盤石上，有仙跡之奇。繇石梯嶺而歸，路僅容尺，懸崖斷壑，上下如羊腸，回視向者，天際矣。」陳叔剛游記：「水南山最高者，曰方山。山巔多古蹟。宣德癸丑，外兄林孔傳、造士黃士廉等八人，邀予緣平麓而上，行二里許，始陟所謂虎頭者。四望遠近諸山，皆蟻封上嵒之，錯置蒼莽間耳。巨石可坐數十人。又一石，狀如牛舌，橫架諸石上，面鐫『神仙所居』及『怡山良石』八字。竝石下窺，峻絕數千仞。士廉邀衆客坐飲其上。酒數行，風氣薄人，亟移席。南行二里許，山間得鯽魚石而憩。石大類虎者，

首尾乃似鯽魚。列看其上，堆石爲磴，環坐劇飲。夕陽既西，乘興過廢寺址，訪僧無率斷碑，冀盡山中諸景。天欲雨，亟返焉。」

浮峰山 俗傳潮盈則山浮。其西曰籌岐、烏石巖。巖東爲玉壺山，上有三台石，相傳此石自武夷飛來。山之別支，有文筆山，大江環其下。

九龍山 去城七十里，高插天表。嶺曰狂牛，潭曰昆濟。皇朝成化間，鄉人車水溉田，見其下有大書「昆濟潭」，穴通馬江，爲龍湫。其支爲唐嶼。西曰洞山，有獅子石，下爲洞江。

清涼山 中有仙跡巖，一名法水巖，有跡如傾水，苔不能蝕。

城門山 巔有鰲頂峰。峰東有魁星巖，中有飛來石。石西有龍觀井，南爲虹橋可響，卜爲真隱院，有且止堂，今爲公館。宋吳於《且止堂詩》：「無心終日看雲飛，空梵猶如鳥跡遺。欲問堂中常住相，黃花翠竹幾人知？」

大象山 去城六十里，爲城南大障。峰曰銀峰，山頂石色如銀，嶺界長樂縣，亦名銀峰嶺。其支曰西峽山。下卽西峽江。曰文殊，高百餘丈。曰珠山，周遭溪水環繞九山，俗名「九龍戲珠」。曰黃石，脉連珠山，有蟠龍之勢。皆江上山也。

白田山 晉太守嚴高，欲徙郡治焉。產蕉可布。嶺曰蕉嶺。坑曰蕉坑。溪曰蕉溪。

圓頭山 馬山

玉枕山 在峽江南，驛道候潮之所。巔有枕峰、吉祥二寺，及嘯霞洞、秋塢、紫屏、上冷泉、青田坂諸勝。麓有枕嶼，其傍曰柘枝。山有白雲谷、卧龍岡、鳳巢、白牛嶺、鳴風厓諸勝。

白鹿山 有白鹿寺。唐元和四年，永嘉僧道洪自溫陵來，父老相邀居此。誅茅之日，白鹿適至。下有白鹿溪。

青洋山 界福清。

梁山 一名金鰲峰。五代時，徐知證、知諤平閩屯兵處也。知證、知諤，徐溫之子。而南唐李昇，故溫養子也。昇既傳位爲皇帝，封知證江王，知諤饒王。知證、知諤嘗下江平閩，閩民慕戴，相率建生祠山北，圖像奉之。一日，謂衆曰：「不忍汝違，來歲當別。」及期，相繼化去。未幾，神降於人，言：「並奉帝命，列職斗宮，以祐下土。」於是閩人立靈濟廟祀之，稱知證曰九天金闕明道遠德大仙、顯靈博濟真人江王；知諤曰九天玉闕宣化扶教上仙、昭靈博濟真人饒王。祀禮既虔，禱無弗應。祠下有潭，遇旱禱潭，出赤蛇，雲起雨注，歲則大熟。潢溪霖潦暴溢，民庶倉皇，望祠致懇，忽有役夫如雲，畚鍤疏濬，水不爲患，而竟失所在。宋熙寧中，閩人劉彝，如桂州禦蠻寇，韓世忠戰大義鎮，吳玠戰和尚原，皆得神助。他諸福民，奇效尤數。皇朝永樂十五年，成祖皇帝寢疾，試藥罔效，夢神自海濱來見，尋愈。明禮官上言：「閩中有靈濟廟，二真君應禱有靈。」上專使函香，迎神京師，作洪恩靈濟宮於城西南，復加知證曰清微洞玄沖虛妙應慈惠洪恩真人，知諤曰高明弘靜沖澹妙應仁惠洪恩真人，敕閩有司大新廟宇，虔潔春秋，歲易時衣，給酒灑五戶。御製碑文，系之詩曰：「天產英靈爲世傑，出人幽明猶一覲。生著勳勞保瓊粵，沒爲明神崇偉烈。茫茫海甸倚花樾，雨暘寒燠調以變。冬無凌競夏無暘，冷氣遠珍靡颺颺。下稔高黍歲穰稂，驅掃不祥定妖孽。晨鐘暮鼓樂暨臺，卓彼鰲峰峻且巖。蛇蜒迴抱天造設，春蘭薦芳秋菊醪。寒泉白石漱清漈，神之游兮羽葆翳。飛雲翩翩道幢節，歛來忽往靈僊僊。呼吸響應速以偈，濟利溥博無時歇。四時報

享繁獻醊，衛朕之力疇與埒。書恩著德勒堅碣，垂示萬古昭日月。」廟在京師者，二真君生辰及聖旦、元旦、冬至皆有祭，歲凡五時食薦新。久之，復封溫爲真人，母仙妃。正統二年，加知證曰九天金闕明道遠德大仙、顯靈溥濟清微洞玄冲虛妙應慈惠護國庇民崇福洪恩真君，知謂曰九天玉闕宣化扶教上仙、昭靈博濟高明弘靜冲澹妙應仁惠輔國祐民隆福洪恩真君。成化二十二年，加稱二神爲金玉二闕上帝。五年一遣使下閩中，齎送黃衣。三年一送紅衣，換袍焚化。復加封溫爲高上神主慈悲神父聖帝，母與妃皆稱元君。孝宗卽位，禮部尚書周洪謨言：「金玉二闕上帝雖有保護文皇之功，故封真君，已爲隆重，其父溫，本專權弑主之臣，因子得祀，亦既榮矣，一家之人稱帝稱君，祭告綱繆，焚香奢靡，閩中道路迴遠，尤復勞人，僭擬煩費，莫此爲甚。」有旨：「革去二真君并其父母妻帝號，封號仍舊。」在閩中者，六年一遣使，送換衣袍，然京師之廟，終虔奉不輟。嘉靖中，六年一遣使，以太常寺官屬一人。萬曆三年，停遣，第令本布政司送掛。

飲井山 山有井泉，味佳不涸。

新安山 上有石羊，石跪伏石盤上，如羊。相傳自會稽飛來。有嶺曰大步。西有唐陳礪廟。礪，觀察使巖之兄也，故與同廟，祀於里之蘆川。宋嘉祐七年春，一夕大雷雨，香火遷於山西麓。

石鼈山 山枕江濱，上有三石，形如鼈。中一山，聳起平田，去山南一里，如蟠龍，有溫泉井。山左有拏公廟。拏公者，拏舟漁父也。海舟入閩，當白茭口，港道迴沓莫知深淺。皇朝胡深下閩，有拏舟漁父引之以入，蓋神人也，故廟祀之。

玉頂山 下有龜嶼，一鄉勝境。

君山 上有崑崙石室。下臨潭，曰馬面仙潭。

臚山 有石若芝，名仙芝石。又有三生石、九眼泉。凡十八景。

石山 院跡山 磕下山

疊石山 前有靈泉，下臨絕壑，鉅石周匝，又有疊石傍繞如蟠龍。

平山 在鳳山東。宋少帝航海時，駐兵於此。以其崎嶇，剷而平之。皇朝林瀚《平山懷古詩》：「翠輦金輿載恨游，豈緣南越覓丹丘？鐘聲落日孤村寺，海色西風萬里舟。王氣銷沉天地老，胡塵溟漠古今愁。傷心最是濂江水，還繞行宮麓下流。」有九曲山。有薰風隴、南華峰、蓬萊橋、錦繡谷、逍遙臺。俱有篆、隸石刻，甚佳。

甘泉山 在平山南。山多巖石，少草木。泉湧石上，色白味甘，烹茶釀酒，土人輒能辨之。皇朝林瀚祖墳在其下。林家三世爲尚書。東爲瑞跡嶺，唐大中六年，游客邵環，聞異香，見白光，亟往卽之，化而爲佛，須臾人枯木，光亦不散，隨現巨跡於磐石。後人刻一隻偶之，刻跡尋滅。因鑄像曰白佛，名寺曰瑞跡。南爲邵崎，爲翁崎。有山曰大翁，皇朝林鴻《翁石山房詩》：「玉澗隨深處，蘿衣謝時早。幽棲同鹿門，勝地卽蓬島。」曰傳坑山，前有圓石，俗號金鵝抱卵。曰清涼。曰石几。

琅峰〔二〕 有蓮花嶼，可觀日出。峰東龍井，水甚甘冽。

古嶺 下有鐵鼎潭。皇朝永樂中，有龍潛焉。又有車函、觀音潭。

婆嶺 象嶺 鵝鼻嶺 栢嶺 青布嶺 石湖嶺

螺嶺 以形名，峻如懸梯。北嶺、方山，如在咫尺。

常思嶺 嶺在義溪南二十里。高數百仞，袤三里許，又名相思嶺，在本縣東南盡處，出頌春門也。宋王珪送元絳守福州，有「頌春莫向相思嶺」之句。

動石 石在西坑，指之可動，合北里亦有之。

叢巖石 龍門石壁 石步石 石船 石籠 礮下石

老子巖石 在府城東南。如道士冠，峽立而執簡，俗呼老子。

前嶼 後嶼

官母嶼 嶼有巡檢司，在海中五虎山之五虎門。

洋嶼 猴嶼 殷嶼 獺嶼 竹嶼 鹽嶼 芝嶼 螺洲

川水利附。

閩江 源出浙之龍泉，建之浦城，崇安，又合建、延、汀、邵及古田、閩清、永福大小諸溪之水，至此入海。大抵閩江承建、劍上流，谷陘川激，至馬濱山，漸廣而緩；至馬頭，則衆流所匯，浩瀚無涯，統而名之曰閩江。所異者，隨地取名耳。

下洞江 馬頭江右港也。中有獅子石，與方山對峙。巨浸不沒，諺謂：「水浸方山鼻，不到獅子耳。」

南臺江 越王釣龍處也。上有萬壽橋。元翰林學士馬祖常《橋記》：「福建平海頭陀，王姓。法助，其名。世泉南農家。年十二，爲沙門，研窮內典，洞了佛乘，日發猛勇，以畢至願。嘗見濟江之舟，慙惻先知，曰：『是必及難。』止之弗聽。暴颶卒起，舟尋以溺，師又麾翼，縮潮海濱，埭田得不飮嚙。粵閩會城，三面距江，水下自高，亂石錯出，迅湍回洑，旁折千里，滙爲南臺。昔之濟水，浮舟爲梁，連以大絙，洪潦驟

漲，絕絕舟裂，民多溺死。師將橋江，以利涉者，命弟子吳道可奏聞。天子褒嘉，詔師成之。於是人姓割財，小夫奏力。閩鹽轉運使王某率屬合治，乃爲墩二十八，植木礮石，腹而基之。丁未告竣，師已化去。徒實終卒之。長百七十丈有奇。仍積其贏資，及故端明殿學士王君某捨田歲人，岸南北爲寺。御史中丞曹公，名橋曰萬壽，寺如其橋名。」

瀨江 亦名淘江，與西峽江相會。

上洞江 馬頭江左次港也。

峽江 兩山夾峙，納汀、建、延、邵之溪流以入於海。廣而且深。中流有石屹然，名曰浮焦。焦下有潭，名中焦，龍潛焉。

西峽江 受水福印溪之水，流十四里，與東峽江合。

東峽江 南臺、西峽二江合流於此。

琅崎江

大定江 與南臺江合派。

馬頭江 東通大海，既廣且深。中有馬頭石，潮退則現。是有投桃之洲，洲形如桃，洲上田可千畝。

演江 一名蜺，源出山谷。

善溪 舊名鱗溪，在鼓山之北，木乘之南。山峽間，有二潭，下潭距上潭五里，其廣六丈，深不可計。

昔閩越王郢第三郎，騎射於此，射中大鰓，鰓躍出，以尾纏三郎，人馬俱溺。土人爲立廟，號白馬三郎。唐貞元十年，觀察使王翊，早禱得雨。太和元年，觀察使張仲方率僚屬早禱歸，至聖泉寺，雨已至，作詩曰：

「入門池色淨，登閣雨聲來。」僚屬皆和之。團練副使李貽孫：「旌旆憂民至，風雲逐馬來。」判官李敬彝：「雨隨青嶂合，雲拂畫旗來。」內供奉侍御彭城：「雲陰隨雨度，桂馥逐風來。」咸通六年，觀察使李瓚奏封龍驤侯。梁貞明中，王審知奏封弘潤王。宋慶曆六年，夏旱，蔡忠惠襄爲文往禱，讀畢，大雨，命令賈太冲新其祠，文學范宗韓作記。熙寧八年，勅封「冲濟廣應王」。紹興十一年，以張丞相浚奏，增封「顯應」，仍賜廟額曰永寧。十七年秋，大雨，中夜水暴至，聲聞數十里，詰朝，有石高廣可二丈，峙廟後，水左右注，庭除無恙。紹定五年，李大卿駿奏，增封「孚祐」。淳祐八年，陳侍郎塏爲卿帥，率閩令眉山師興致禱，因閱廟前華表，匾曰鱣溪。詢其故，則土俗疑傳以鱣爲靈，不知靈王之殺鱣也。遂命師興易名曰善溪。判云：「善溪龍潭，故以神能福善，利蘇焦稿。方言以爲鰈鱣之鱣。鱣，微物也，能化龍而雨乎？」師興因爲之記：「孔子：『仁者樂山，智者樂水。』《易》曰：『仁見謂仁，知見謂知。』閩東舊有鱣溪，溪分二潭，神實居之。帥守侍郎可齋陳公，早禱上潭，疑其訛，謂捨魚取善。『善』，嘉號也。心，善淵也。茲非善者見之，謂之善乎？可齋之名斯溪也，一洗固陋，善與人同，千古在後。越王之宅斯土也，一靈如在，福善好直，百世在前。昔唐人守占括，有善政，改惡溪曰好溪。柳子省愚溪之對，昌黎寢惡溪之文，吉水、廉泉、慈湖、直瀆，可齋斯名，蓋將美談後世，並價齊聲者矣。」宋李忠定綱詩：「千年鱣骨專車在，百丈龍湫瀑布垂。」

大坑溪 源出青陽。

東崎岳溪 浩溪

荷溪 地名龍井。中有躍龍潭。

孟溪 溪難方舟，第資灌溉。北有香爐峰。

桑溪 在獵嶺下，以傍有桑園名。越王無諸，嘗流觴於此。

榕溪 一名麻溪。達於西峽，入於海。在青布嶺。舊記：「白鹿山入十五里，號榕溪。橋跨其上，曰綠榕橋。達於義溪，大田驛在焉。」有榮繡坊，宋陳愷典鄉郡制祠，有「榮哉此行，何異畫錦」之語，故以名坊。

苦竹溪 在金鰲峰下。金鰲峰左，有龍湫潭，激水湍急，下通此溪。

大橋河 新河

馬面潭 在大江之上。

直瀆浦 南從江岸開河口通潮，北流至海晏門爲澳橋浦，又北通東湖，以其直如溝瀆。

三角池 湯泉 溫泉 卜槽湯

內湯井 外湯井

蘇公井 在城中凡九。又，城外九井，亦名蘇公井。皆宋提刑蘇舜元所掘。

天台井 更門井

侯官縣 東抵連江，西抵閩清，南抵閩縣，北抵古田。縣名起於漢建安。隋，省入閩縣。唐武德中，於福州城北三十里，復置此縣。貞觀五年，省入閩縣。長安二年，析閩縣西十二鄉復置。貞元五年，水團練觀察使鄭叔則，奏移入州城。元和二年省，五年復置。僞閩龍啟元年，改爲閩興，以長樂爲侯官。三年，皆復舊。宋，元如之。皇朝仍舊。萬曆七年，併懷安縣入焉。懷安縣，則宋太平興國六年，郡守何允

昭奏析閩縣之九鄉、八千戶所置也。鄉二十，領坊四、廂一，(一)都六十二，統圖百一十五。(二)

桂枝鄉唐元間以里人陳去疾登科名。

右一坊，圖四。

西南關廂，圖一。宋延福里。咸平間，劉若虛登第歸，鄉大父母俱無恙，郡守謝泌改爲榮親里，以寵之。

右二坊，圖四。宋永平里。

東孝悌鄉

草市都，圖一。宋孝順里。山曰大夢、貴安、孤山。池曰方池、平章。井曰貴安。

一都，圖二。宋永欽、處仁、正節、美宅四里。山曰鳳山、怡山、(四)後山、鳳凰、高安、清泉、末山、石山。嶺曰祭酒、東岐。池曰

長定官、放生。井曰飲井。

十六、七都，圖五。宋馴舉里。溪口小曰。

三十五都，圖一。宋安平里。湖曰陳湖。

西孝悌鄉舊名修文，宋改今名。

十二都，圖二。宋揚名、惠化二里。石曰石門。

十三都，圖二。宋招賢、順平二里。山曰石門、超山、龍潭。江曰馬渡。

十四都，圖一。宋齊禮里。山口藥山、西山。石曰靈石。

勝業鄉

二都，圖九。宋孝成、新安、方岳、方興四里。山曰洪山、妙峰。江曰洪塘。

修仁鄉

三都，圖三。山口歷山、旗山。嶺曰大夫。

四都，圖四。宋海平、靈鳳、綏平三里。山口厚山。

五都，圖二。宋邊蝗里。山口赤塘、鳳山、華棟。

十都，圖三。宋永康里。山口赤塘、鳳山、華棟。

永安鄉

十九都，圖一。溪曰龍溪。

二十、二十一、二都，圖一。宋永興、清化二里。溪曰大日。

二十五都，圖一。山口梅埔、小箬。溪曰仁溪。潭曰鍾潭。

二十六都，圖一。宋守仁里。山口芹山。

二十九、三十都，圖一。宋嘉祥東里。山口水隆庵。峰曰雪峰。

二十八、三十一都，圖一。山口雪峰、丁山、松嶺、雙髻。

三十二、三都，圖一。宋嘉祥西里。

三十四都，圖一。宋保安上、下二里。溪曰蒙溪。

石門鄉

十五都，圖一。宋九功上、下二里。洲曰甘蔗。

十八都，圖一。宋歸德里。山口唐舉。

三十六都，圖二。宋萬安里。山曰葛岐。

東太平鄉

二十三都，圖一。宋安仁里。

二十七都，圖一。宋東安里。嶺曰黃沙。

西太平鄉舊爲元豐，宋改今名。

十一都，圖一。宋旗亭、志節、惇和、永寧、興和、加川、礮川七里。山曰龍臺、南山、雲頂、下崎、嶼頭、芝田、斗門。嶼口荳嶼、月嶼、環嶼。江曰螺女。

二十四都，圖一。宋仁德里。

五芝鄉舊令善鄉，宋改今名。

六都，圖一。宋清政里。舊名真里，宋避仁宗諱改。嶺曰湯嶺。

七都，圖五。宋名光、三秀二里。山曰大象、尋山、蘇岐、崎頭。江曰黃岸。

八都，圖一。宋新興里。山曰古靈、福頂。崖曰月山。石曰蟠龍。泉口安德、甘泉。

九都，圖一。宋吉壤里。山口龍湖、小臺。泉口天湯。

以上侯官縣。

子城坊，圖四。

右二坊，圖二。

感應鄉

洞溪。

一都，圖二。宋西安、安康、欽德、贊城、清平五里。山曰靈光、後山、石岬、太平、閩山、卧龍、文山、浮倉、桃源。峰曰爐峰。溪曰

崇業鄉宋墩業鄉。

二都，圖四。宋鍾山、擇善、開化、太平、忠信五里。山曰梅亭。嶺曰閩山。石曰應石。

靈山鄉

三都，圖一。宋立德里。山曰昇山、鳳池、保福、馬鞍、九峰、大鵬。嶺曰大夫、杜塢。

四都，圖一。宋懷賢、越城、遵化、寧棋四里。山曰龍腰、五峰、壽山、東寧。嶺曰長箕。井曰義井。

八座鄉

五都，圖一。山曰龍窟、黃巖、澗田、芙蓉。嶺曰北嶺。洞曰芙蓉。

六都，圖一。宋觀風、孝仁、溫泉、高遷、稷下五里。嶺曰湯嶺。

承平鄉

七都，圖一。江曰黃江。

八都，圖三。宋接下、黃信、順安、孝悌、安上五里。

移風鄉

九都，圖三。山曰龍安、（五）楊崎、鳳冠。嶼曰石母、柯嶼。江曰楊崎。

十都，圖二。宋長壽、崇福、清善、勻化、楊崎五里。山曰吳山。嶼曰盤嶼。江曰苗澤、（六）仙崎。溪曰吳山。

積德鄉

十一都，圖五。山曰仙崎。

十二都，圖一。宋恭順、高陽、孝廉、勝平、待賓五里。山曰南陽。洲曰片洲。

侯官鄉

十三都，圖一。山曰西室、沙溪、拜郊。嶺曰枹桐、江曰石岸。溪曰桐溪。

十四都，圖一。山曰龍跡。

十五都，圖一。宋清泰、安定、北平、德風、靈運、超勝、江陽七里。

同樂東鄉

十六都，圖一。

十七都，圖一。

十八都，圖一。

十九都，圖一。

二十都，圖一。山口爪山。

二十一都，圖一。宋施化、前屯、西屯、後屯四里。

同樂西鄉

二十二都，圖一。

二十三都，圖一。

二十四都，圖一。

二十五都，圖一。宋興城、焦溪、前屯、中屯四里。

以上故懷安。

右附郭。

山

烏石山 在城西南隅，與閩縣九仙山東西對峙。唐大寶八載，敕改曰閩山。《宋志》僧神解記有二十奇，後益爲五十五：曰石龜山，石如龜，青舊恐其靈而輕舉，竅龜脇焉。曰射鳥山，一云九日山，相傳九日登高引弓落鳥。曰鶚浴池，亦如九仙山古記之云。曰四聖院，院奉梁武帝、誌公和尚、婁約法師、傳大士。曰華嚴巖，唐嗣聖中，有僧於此持誦《華嚴經》，一夕雷雨大震，劈石成室。巖頂刻李陽冰篆《般若臺記》。是篆與《處州新驛記》、《縉雲縣城隍記》、《麗水志歸臺銘》，當世寶爲四絕。曰盤陀塔，山頂有古磚塔，門忽裂，現一真身。郡人陳公云：「爲兒時，見石橋上，有《盤陀和尚真身塔記》，末云：『大足元年建。』」曰南澗寺，在神光寺東，梁時居士蘇清，捨宅爲之。唐乾寧二年，閩王創天王殿。三年，號南澗護國天王，合庵十二爲寺，以居澗旁，故名南澗。上方有石佛像，唐大寶中雷震而出。歐陽詹記云：「萬物圓闔，各繇襲沿。無襲無沿，而忽以然，苟非妖怪，實爲珍慶。斯石像者，其珍慶歟！始孕靈韞質，兆朕未見，則峨峨巨石，巖峭山立，鎮郡城之前阜，壓蓮宮之上界。海若鞭而莫動，天時泐而終固。皇唐天寶八年五月清晝，忽騰雲旁湧，驟雨來集，驚飈環駭，輶削香冥，雄雄者雷，駭然中震，迸火噴野，大聲殷空，岑嶺躑躅，潭洞簸蕩。須臾，風雨散，雲雷收，項劈輪囷，斬然中闕，南委地以梯落，北干霄而碣樹。不上不下，不束不西，亭亭厥心，隱出真像三十一相，具八十種好備，列侍環衛，品覺有序，莊嚴供養，文物咸秩，端然慈面，儼矣儀形，似倚雪山而授法，如開月殿以趺坐。異矣哉！不曰博聞乎，未聆於既往；不曰

多智乎，罔測其所來。」曰神光寺，唐爲金光明院。後唐，監軍孟彪南莊也，請於朝，捨爲寺。宣宗夜夢神人發光殿庭，覽奏異之，賜名金光明院。後改爲大雲。有絳月、蘭若、紫雲禪窟、幃頭石諸勝。曰仁王寺，晉天福三年，閩連重遇造。有雨花閣、橫山樓。曰五百羅漢寺，貞明五年，王審知夢梵僧數百，奕奕有光，光所至處，有雙檜並池而秀，一僧擎跪前曰：「王能飯吾於此乎？」及旦，訪得如夢中寺而堂之，命池曰浴聖，檜曰息聖。曰頭陀巖，安文頭陀游南澗寺，莽蔓中得一寶，仄足人，宴坐其間，僅可容身，摩崖云：「客至不點茶，相看淡如水。白雲深谷中，穩坐浮生理。」普眼庵，亦安文頭陀晏作之所。曰望潮峰，在神光寺後。曰左神策鐘，咸通五年，與神光寺額並賜。曰五台山，王審知始創，文殊臺，并東、中、南、北四臺。曰王氏像設，王審知建院宇，廣設像鑄。五代於競作《審知德政碑》，所謂「虹梁雕拱，重新忉利之宮；鈿軸牙籤，更演毗尼之藏」，此其證也。曰銅像，王氏用銅六萬斤，黃金三百兩，鑄彌勒像，方三丈六尺。曰百道階，王氏所砌階也。曰金剛跡，峰頂石上，有巨跡。曰般若臺，昔有沙門持誦《般若經》於此。今爲金粟庵。曰迦毗羅神。曰涅槃佛，卧佛也。曰石觀音，僧廣惠於惠勝堂後得異石，琢之。曰大悲院，有僧常止廬嶽三十年，誦《大悲神咒》，空中言曰：「功已成矣，可去救人。」後歸鄉創此。曰僧行道處，相傳有僧創磚室西峰，白日宴坐，清宵經行，一日，坐逝。其夕，聞爆裂聲，詰旦，見一石塞行道處。曰坐禪石，東峰盤石上，有石如筍，微觸即動，又號降睡石。曰霸石，意者以王霸得名。霸，別見。曰天台橋，東峰巖側，有巨石梁，如天台石梁矣。曰宿猿洞，昔有隱者畜猿洞中，因以名之。景福三年，垣在城外，湛郎中俞棄官隱此，有二十五詠。羅源林迴留題：「幾年形勝晦南州，一旦聲名藹湛侯。夜色併來三島月，水光分破五湖秋。荔枝影裡安吟榻，紅藕香中繫釣舟。金印解還天子後，詔書重起不回頭。」曰金蟬穴，在宿猿洞東，

大石後。唐天成間，巨蟒長可六七丈，鱗甲如黃金。王氏填而建佛殿焉。今葫蘆城是也。曰謝公浴堂，鑿井引泉爲之。曰觀稼亭，唐閩濟美守郡時，陞辭之日，德宗喻以農事，且言南方山水之富。到官首創是亭，以茂帝寵。曰初陽頂，濟美守郡之暇，酷愛此峰，謂從事曰：「每旦，群山猶暝，獨此太陽先升。」因題石上。曰落景坪，在初陽西。曰故鶴亭，唐觀察使崔干即寺東峰創亭。曰四向亭，下畜鶴，一日冲去，遂名放鶴，熙寧中，守程師孟，改曰冲天。曰薛老峰，山頂突起，向陽峰「三字。周朴詩：「薛老峰頭三個字，須知此與石齊生。直教截斷蒼苔色，浮世人儕眼始明。」薛老，薛逢也，咸通中爲侯官令，與僧靈觀游，創亭其側。人書其峰曰薛老云。按逢，字陶臣，蒲州人，會昌進士。有《元日田家詩》：「南村晴雪北村梅，樹裡茅簾晚盡開。蠻榼出門兒婦去，烏飛迎路女郎來。」想閩中詩也，但《唐書》本傳，未見逢令侯官爾。靈觀，住山，肩戶罕接，惟一信士，每至食時，送供，方開。僞閩癸卯歲，一夕風雨，聞山上如數千人喧噪，旦則三字倒立，其年閩亡云。曰幽幽亭，宋侯官令沈邈，作臺釋迦院東北隅，曰峻青，後重來爲守，寺僧並臺作亭，館閣校勘蔡襄名之曰幽幽。曰道山亭，守程師孟作，請南豐曾鞏爲記，而林希書之。鞏記略曰：「福州治侯官，於閩爲土中，地最平廣，四出之山皆遠，而長江在其南，大海在其東，其城之內外皆涂，旁有溝，溝通潮汐，舟載者晝夜屬門庭。麓多桀木，而匠多良能，人以屋室相矜，雖下貧必豐其居，而佛老子之徒，其宮又特盛。城中三山：西曰閩山，東曰九仙，北曰粵王，三山鼎趾立。其附山，蓋佛、老子之宮，以數十百，其瓌詭殊絕之狀，已盡人力。光祿卿直昭文館程公爲是州，得山嶽峯之際，爲亭其處。其山川之勝，城邑之大，宮室之榮，不下簞席，盡於四隅。程公謂：「在江海之上，爲登覽之觀，可比於道家蓬萊、方丈、瀛洲之山，故名曰道山之亭。」曰長樂臺，宋曹穎叔詩：「藍接水谷與秋輝，疑作危稜磴翠微。」

向晚山僧苦留我，層層寒牖亂雲歸。」曰不危亭，在山絕頂。曰蟠桃塢，舊志曰：「疑盤陀之誤。」曰跨竈亭，木鴈亭也。孫覺有詩。曰擊壤亭。曰鄰霄，曰凌霄，建時稱平材瓦土聖，若魏之凌雲臺，然誠曰：「毋修也，修且壞。」後人修之，良久壞矣。蔡襄詩：「子夜看先日，陰崖得後春。三韓空瑣碎，萬落自埃塵。」註云：「福人云：『高峰晴海，可見新羅島。』」曰天章臺。曰清冷臺。曰鱗次臺。曰簫香臺。曰白塔。曰宿雲庵。曰惠安明應王廟，王姓陳，漢太丘二十一世孫也，舊隱是山，沒而顯靈。唐元和後，始立廟，廟碑云：「心游墳典，性愛山水。身息宿猿之洞，門臨落景之坪。」王審知表其事，累封顯應王。宋熙寧八年，改封惠安明應王。曰剛顯祠，宋紹興中建，以祀周朴。朴，字大朴，吳人，其初隱於安溪縣南山下，後徙此山。假寺丈室，絕去葷酒，塊然靚居，諸僧晨粥卯食，朴亦携巾盥廁其下，畢飯而退。郡中豪富設供，率施僧錢，朴卽巡行，拱手各丐一錢。有以三數錢與者，朴止受其一。既得千錢，以備茶藥費。將盡，復然。僧徒亦未嘗厭也。寺僧靈觀、薛令逢，皆與友善。雙峰寺法主李中丞瓚、大瀉寺僧嬾安，亦爲禪悅之交。朴吟詩寫景，搜奇抉思，苟得一聯一句，則忻然自快。嘗野逢負薪者，忽持之，且厲聲曰：「我得之矣！」樵夫矍然，掣臂棄薪走，遇游徼卒，以爲偷兒也，執訊之，朴徐往告曰：「適見負薪，因得句耳。」其句云：「子孫何處閑爲客？松柏被人伐作薪。」有一士跨驢遇朴，以其僻於詩句，故欹帽掩頭，吟杜詩云：「禹力不到處，河聲流向東。」朴聞遽隨其後，上但促驢去，行數里及之，告曰：「僕詩流向西，何得言東也？」閩中傳爲笑柄。黃巢至福州，求得朴，問曰：「能從我乎？」朴曰：「我尚不仕天子，安能從賊？」巢怒殺之，湧白乳尺五寸。後人立祠焉，并祀觀與逢，曰三賢。而雙峰寺亦有三賢堂，則法主李中丞瓚、寺僧嬾安，及朴也。宋紹興初，張浚謫福州，將游雙峰，夜夢一僧，與一金紫人及白袍士來謁。翼日，登山

堂，見三公如夢中，異之。後爲帥，游烏石，至朴祠，嘆朴死節三百年，未有廟額，乃以奏請，詔賜號「剛顯」。郡人鄭昂記而序之曰：「東漢之衰，陳蕃、李固、孔融之徒，相與標榜以節義名世，故雖以曹公之陰賊，終身睥睨漢室，不敢取。唐末名節掃地，君子在野，小人在位，朱溫以斗筭穿窬之才，談笑而攘神器，士大夫亦欣然與之，莫敢正議。使公得志，其肯以國與人乎？乃以詩論來者，俾歌以祀公。」詩曰：「公昔隱居烏石岡，老觀禪師同道場。法主、嬾安共徜徉，李、薛咨參互擊揚。擺脫利欲心清涼，是以能全此至剛。黃巢兵亂來福唐，公力抗之不肯降。欣然引頸齒劍芒，白乳上湧如雪霜。老賊自謂暴無傷，纔殺人半於南方。公無爵位至周行，史臣不書名不彰。後三百年丞相張，夜夢三賢與迎將。翼日游山登公堂，宛如夢中貌昂藏。再來爲州剡奏章，賜名剛顯烈有光。葺祠爲廟飾棟梁，普與州人奉肴觴。於薦荔丹與焦黃，歲時來享以爲常。我作銘詩刻其旁，千萬億載死未亡。」嬾安者，郡之陳氏子，受業黃蘗山，習律乘，嘗自念言：「我雖勤苦，未聞玄極。」乃孤錫游方，造百丈，禮而問之。自茲領旨，更不馳求，同參祐禪師創居瀉山，躬耕助道。及祐歸寂，衆請接踵住持。有問：「黃巢軍來，和尚何處回避？」曰：「五蘊山中。」曰：「忽被捉著，如何？」曰：「惱亂將軍。」及朴被殺，嬾安聞而脫去。賊入塔，以劍斫塔，亦湧白乳三尺。巢言：「自入閩，纔殺一人有半而已。」故鄭昂廟詩有「纔殺人半」之語。曰尊勝真堂，像祀知州孟彪、崔千。曰慈氏閣，巡官鍾杲建，後稟官出家，以身餒虎。曰道士井，晉時林氏人闕，有華陽道士謂之曰：「可鑿井南山下，遇盤石則止。」林如言。及盤石有白豕躍入，泉湧出。曰仙井，仙人任放所鑿。放，別兒。曰崔公井，井在尊勝堂前，崔千賞其甘美。曰放生池。

粵王山 在郡城北隅，半蟠城外，束聯冶山。一名屏山。一名平山。閩越王無諸舊城處也。唐刺史

裴次元，游宴城東偏之左衙營，愛其峰巒巖峭，林壑幽美，遂命闢之。啟滌高深，各盡其處。則有望京山、觀海亭、雙松嶺、登山路、天泉池、翫琴臺、筋竹巖、枇杷川、荻蘆岡、桃李塢、芳茗源、山陰亭、合清洞、紅焦坪、越壑橋、獨秀峰、簷簷塢、八角亭、盤石椒、白土谷、漣漪亭、東陽陂、分路橋、乾岡岑、木瓜亭、石堤橋、海榴亭、松筠陌、夜合亭，凡得景二十九，作二十詠詩記之。其山有飲馬池，閩越王池也。有古井，曰越王井，名金鷄井。有琴石，閩越王鼓琴處也。有曲水苔泉，郡第一泉也。有環峰亭，上有宋光宗御書。有絕學寮，宋丞相張浚讀書其中。元薩天錫詩：「粵王故國四圍山，雲氣猶屯虎豹關。銅獸暗隨秋露泣，海鴉多背夕陽還。」皇朝，跨山築城爲樓，曰樣樓，今更名鎮海，有翠濤亭。樣樓者，國初遣駙馬都尉王恭來此築城，恭先作樓爲式樣，故名樣樓。

冶山 在城東北隅。舊屬懷安，歐冶子鑄劍處也。蘇林註：「冶，山名也，今名東冶。」《治平圖》謂之泉山。卽今福州將軍山是也。其陽，唐之元和秣場，塘潭治島在焉。又南百餘步，有劍泉院，唐元和中，僧惟幹濬之，得銅刀劍鏃數枚。猶有冶竈，在竹林間。山北有甌冶池，貞元中，池水赤如血，宋紹興中，有龍畫見，郡爲立廟。守程師孟創甌冶亭，作詩，又爲後序云：「予至州之明年，新子城，城之東北隅，灌木陰翳，因爲開通。始問此水，或對曰：『甌冶池。』予竊嘉其蹟最古，且愛其平潤清泚。又池之南，隴阜盤迂，喬林古木，滄洲野色，鬱然城堞之下。於是亭閣其上，浮以畫航，可燕可游。亭北跨壕而梁，以通新道。旣而州人士女不絕，遂爲勝概。」

閩山 烏石之支也。有巨篆「閩山」二字，又名玉尺山。宋守程師孟以光祿卿知郡，常游此寺，石刻「光祿吟臺」四字。師孟詩：「永日清陰喜獨來，野僧題石作吟臺。無詩可比顏光祿，每憶登臨却自回。」

鐘山 在城西南隅。舊屬懷安。鐘山巷下，有人中寺，故梁太守袁士俊第，內有小山，時聞鐘聲，因捨爲寺，號袁寺。寺有八百羅漢像，題曰天台鴈宕。佛書云：諾矩那，與其徒八百衆，居震旦國。今五百居天台，三百居鴈宕，是堂像八百，故合而題。有觀音像，政和間，清涼院僧宗顏，刻木爲之，像大而色故，將飾之，忽夢謂：「我當城居。」俄大中僧數百人，亦以夢來致。遂設是像。一都亦有鐘山。

大夢山 麓有庵，下有方池。元時有隱者居此，鑿曰墨池。西南有平章池，元陳友定別業。一曰西陂。

貴安山 安，一作庵。有井曰貴安井。

鳳山 一名黃山。上多礪石。下有井曰飲井。

怡山 在鳳山南。一名西禪山，有西禪寺。一名雲山，一名城山。寺，古名信首，仙人王霸上昇地也。霸，梁時人。父增，自齊朝渡江入閩，宅於西禪。增，善黃老術。霸，幼好之。每登怡山，經宿乃返。

年三十，游武夷，十六年還舊居，於山南鑿井，有白龜吐泉，鍊藥成，點瓦爲金。其歲，閩中斗米千錢，乃鬻金運米，以濟貧民。後以所餘藥服之，旬日如醉，忽蛻於所居皂莢木下，林嵩記云：「梁時三月三日也。」唐貞元中，觀察使李若初，嘗登西樓，望有五色雲當其宅，遂以爲冲虛宮，塑任放、董奉、徐登，及霸像，爲四仙祠。初，霸上昇時，爲識鍊藥壇云：「壇壞不用修，木朽不用伐。」識皂木云：「皂木不結子，結子人得道。」識龜云：「西南白龜井，吾乘之去來，龜歸吾亦歸。」後宋慶曆、紹興中，皂莢復生者再。山中數里間，每風雨後，耕者或得遺金，紫磨色半瓦，印文宛然，重至三四銖。唐邑人林植詩：「羽客已登雲路去，丹砂卉木盡凋殘。不知千載歸何日，空使時人禮舊壇。」植，奇童子也。陳植詩：「鼎邊鷄犬知何在？雲外龍

竈去已賒。惟有黃金如瓦礫，貧民時復得些些。」蓋詠耕人得金事。又後唐光啟丁未歲，衢州爛柯山道士徐景立，取上仙壇東北隅，得瓷瓶七口，各可容七升水，中悉有炭，上總蓋青磚。識文云：「樹枯不用伐，壇壞不須結。未滿一千歲，自有系孫列。後來是三皇，潮水蕩禍殃。巖逢一乍間，未免有銷亡。子孫依吾道，代代封閩疆。」黃滔爲王審知作《丈六金身碑頌》，王審知仗鉞之雄，實應蓋磚之識云。白玉蟾云：「王仙君，白龜，應西方白色，謂之金龜亦可。白龜吐泉，蓋金生水之意。皂木，上應奎、婁尾，乃南方火宿，此蓋皂木應火宿，則是火生於木也。仙君得魏伯陽鍊丹之旨，其所以攢簇五行者，實寓意於此。夫白龜，屬西方，皂木屬南方，張紫陽有詩「藥在西南」是也。白龜應金，皂木應木，仙人煉金丹，要須識金木間隔之義也。董奉，字君異，本縣人。吳先主時，有少年爲侯官長，見奉年四十餘，罷官去。後五十餘年，復爲他職行經本縣，復見奉，顏貌如往日，問言：「君得道邪？何轉少也？」奉口：「偶然耳。」後交州刺史杜燮得毒病死，死已三日，奉時在彼，與藥三丸，內燮口中，水灌之，使人捧舉燮頭搖而消之。須臾，手足似動，顏色漸還。半日，能起坐。後四日，能語，云：「死時奄忽如夢，見有十數烏衣人，來收去，入大赤門，徑以付獄。獄各一戶，戶纔容一人。內燮其中，外封以土。忽聞戶外人言云：「太乙遣使，來召杜燮。」又聞：「除其戶土。」良久，引出，見有車馬赤蓋，三人共坐車上，一人持節呼燮上車，將還至門而覺。燮既活，起謝奉，爲奉起樓庭中。一日而三設供奉。來，惟啖脯棗，飲少許酒。來時，或如飛鳥下空，食了飛去，人每不覺。如是年餘，辭去。燮泣留，問：「何之？寧須大船否？」奉曰：「要一棺耳。」燮卽爲治棺。至明日中時，奉死，殯埋之。七日後，有人從容來，曰：「董公囑謝杜君，好自愛理。」燮啟殯，發棺，惟存一帛：一面畫作人形，一面丹書作符。後還居豫章廬山下，有一人中癘垂死，載詣奉。使坐一房中，蓋

以五重布巾，使勿動。病者云：「初聞一物來舐身，痛不可忍，無處不匝。量此舌，廣一尺許，氣息如牛，不知何物也。」良久物去，奉乃取池水浴之，遺之去。十數日，病者身赤無皮，甚痛，得水浴，卽止。二十日，皮生卽愈。縣大旱，令丁士彥齋酒脯請奉致雨，奉仰視屋，曰：「貧道屋皆見天，何堪雨至？」令曰：「先生但爲我致雨，明日自將人吏百餘輩，立架奉屋。」方聚土作泥，擬數里取水。奉曰：「少須。」及暮大雨，高下皆平。奉治病不取錢，重病愈者，使栽杏五株，輕者一株。如此數年，以十萬餘株，乃使山中百禽群獸遊戲其下，卒不生草，常如芸治。後杏大熟，於林中作二草倉，示人曰：「欲買杏者，但將穀一器置倉中，卽自往取一器杏去。」嘗有人置穀少而取杏多，林中群虎出，吼逐之，挈杏踉蹌傾覆，至家量杏，一如穀多少。或有偷者，虎逐到家，嚙偷至死。家人知之，乃送還奉，叩頭謝過，乃却使活。奉每年貨杏，得穀賑掠貧乏，供給行旅，歲一萬餘斛。縣令有女，爲精邪所魅，投奉治之。卽召得一白黿，長數丈，陸行詣病者門，奉使侍者斬之，女病卽愈。令請納女爲奉妻，久無兒息，乃乞一女，養以侍妻。一日，奉竦身入雲，妻女住宅，賣杏取給，有欺之者，虎還逐之。奉凡在人間，三百餘年。徐登，見前九仙山。任放，見後昇山。西禪寺，唐王延鈞奏名「長慶」，有僧慧稜者，居之。慧稜依雪峰九年，一日曬紙衾而泣，且曰：「行脚吊坐此，今已穿破，而未有所見。」雪峰曰：「今夕來，爲汝說。」稜至，侍立達旦。雪峰令捲簾，稜大悟。來住長慶，號超覺。寺有明遠亭，元給事絳詩：「野色遠涵天蓋轉，山圍高插斗車來。」後陸侍郎藻，更名斗車。又有紫翠亭、放生池。

後山

鳳凰山 有香巖寺。西爲清泉山、未山、石山，皆在平田中。

〔校記〕

〔一〕「琅峰」，各本原作「垠峰」，據本書卷二及《八閩通志·地理》改。

〔二〕「坊四、廂二」四字，各本原脫，據下文及本書體例補。

〔三〕「統圖百一十五」，下文實列一百一十六圖。

〔四〕「怡山」，各本原作「恬山」，據下文及《八閩通志·地理》改。

〔五〕「龍安」，下文作「龍鞍」。

〔六〕「苗澤」，下文作「澤苗」。

〔七〕「大足元年」，各本原作「天足元年」，據方詩銘《中國歷史紀年表》改。

閩書卷之三

方域志

福州府 侯官縣二 古田縣

山(一)

高安山 清泉，支山也。其西有祭酒嶺。五代閩時，湛溫者，光州人，事王延翰，官御史大夫國子祭酒。審知養子延康守建州，與延翰有隙，遣使來覘。延翰命溫往餞，且鳩之。溫至嶺下，飲鳩自斃。閩人哀而葬之，遂以名嶺。過洪山橋，有嶺曰東岐。

石門山 二山對峙，中貫清溪，望之如門。傍小阜，曰超山。又西爲龍潭山，山有潭，龍居之。歲旱禱雨，蠟磁瓶之口，懸而下之，以有無得水，測雨候。潭中群魚游泳，無敢捕者。有靈石四，若龜、蛇、劍、印。溪源之水出焉。

藥山

西山 中有瑞、應二潭。又名龍潭山。

洪山 卽洪塘山。其曰瓦埕、東岐、妙峰、佛樓，皆濱於江，東環清溪，亦以洪塘名。

妙峰山 在洪塘江上。有妙峰寺。松石幽邃，可以眺遠。宋林通讀書於此。通有集四十卷，名《妙峰集》。妙峰、佛樓之間爲石倉園，皇明邑人曹學佺之園也。

歷山

旗山 其形若旗，與鼓山東西遙相望。郭璞《遷州記》云：「右旗左鼓，全閩一絕。」巔有仙人石。下有勾漏里。溪流繞前，與現石合，曰錦溪。旗尾偃拖，南折十餘里，爲南嶼。民居鄰次，如一市廛。嶼上有鑪峰石。

厚山

仙宗山 在旗山南，白鶴山窠中。松徑縈紆十數里，澗流有聲。五代唐同光二年，建仙宗院，其法師有行瑫、仁慧、契符、清守、守玘諸人。

梅埔山 下有鍾潭。舊志：「潭水有鍾。」唐貞元中，僧惟亮欲取之，見蛟龍出沒，遂不敢近。其木多梅。梅溪之水出焉。又西爲小箬，界於古田。

芹山

永隆庵山 峰曰玉几。又拖西，爲雪峰。

雪峰山 去城一百八十里。高四十里，蟠據侯官、羅源、古田、閩清四邑。舊名象骨峰。唐乾符中，禪師義存居之。王氏入閩，問師象骨何奇，師曰：「山頂，暑月猶有積雪。」王曰：「可名雪峰。」遂名。義存，泉州南安人，生而鼻逆薰血，耳悅鍾磬，容動佛僧。九歲出家，十七落髮，北游吳、楚、梁、宋、燕、秦，受具足戒於幽州寶刹寺。迄名山，扣諸禪宗，爰及武陵，一面德山，止於珍重而出。其徒數百，咸莫之測。

德山曰：「斯無借也，吾得之矣。」咸通六年，師歸故里之芙蓉山。其年，圓寂。大師亦自滬山擁徒至，坐於怡山王真君上昇之地。其徒熟繫繫而歎關，師拒。而久之，則有行實者，始以師同而議曰：「師之道巍巍乎，法門圍繞之，所不可造次，其地宜若鷲嶺、猴江之爲卜府之西，二百里有山焉，環控四邑，峭拔萬仞，嵒岬以支圓碧，培塿以覲群青，怪石古松，棲鸞龜鶴，靈湫邃壑，隱居龍雷。山之半，頂之上，則先冬而雪，盛夏而寒。其樹皆別垂藤羅，羊茸而以爲之衣，交錯而不呈其形，奇姿異景，不可殫狀。實閩越之神秀，而古仙之未攸居，誠有待於我師也。祈以偕行。」秋七月，穿雲躡屨，陟險昇幽，將及之，師曰：「真吾居也。」雲庵既立，月構旋隆，行實乃請名其山口雪峰。乾符中，唐禧宗錫「真覺太師」之號，仍授以紫袈裟。居久之，東游於丹丘、四明。又二年，自吳還閩，王審知迎館於府之東西甲第。年八十七卒。厥徒百千，高足者五人，其一，號師備，擁徒於賢沙；其二，號可休，擁徒於越州洞巖；其三，號智孚，擁徒於信州鵝湖；其四，號慧稜，擁徒於泉州招慶；其五，號神晏，府之鼓山也。黃滔作《雪峰碑銘》，其文如此。按師備，閩謝氏子，幼好垂釣，泛小艇南臺江上，忽慕出塵，棄舟投芙蓉訓禪師落髮，往豫章開元寺受具。布衲芒屨，終日宴坐，食纔接氣。與雪峰，本法門昆仲，而親近若師資。嘗登象骨山，同力締構，玄徒臻萃。師入室咨決，應機敏捷。至與雪峰徵詰，亦當仁不讓。學徒八百，尊之爲寂禪師。可休、智孚，擁徒他州，不具論。神晏，已見鼓山。獨慧稜未詳。當義存居雪峰時，徒侶衆盛，長者藍文卿施田七十餘畝，建應天雪峰禪院以居之。宋太平興國間，賜額曰雪峰崇聖禪寺。其山，有鳳凰岡、烏石嶺、應潮泉、鰲山閣、枯木庵、留香臺、乘雲臺、無字碑、難提塔、望州亭、卧雲臺、文殊臺、白雲臺、龍月池、湯泉、水磨、鞭鬬石、虎豕石、萬松關、羅漢巖、化城亭、豐澤潭皆奇勝。鳳凰岡，院主山也。應潮泉，廣二二尺，四面皆頑石，有

數沙眼，潮上則涓涓出。鰲山閣，義存識成道之由也。初，義存與欽山、巖頭客澧州，同假鰲山邸，夜坐不寐。欽山詰之，義存曰：「心未穩在。」令吐露襟次，因謂之曰：「從門入者，不是佳珍。丈夫須當蓋天蓋地。」義存廓然一悟。後以名其閣。枯木庵，外嵌中枵，義存所跌坐也。留香臺者，僧敗絮所留香。敗絮瘡毒遍膚，每刮痂血，放穢几席，不堪其惡。主事遣之，獨鄰榻憐之，而送之門。已去數里，謂曰：「荷君意殷，適留香相報。」比還，所坐處異香襲人。章得象爲記。乘雲臺，僧希運與二僧同登，轉盼間，其僧忽騰雲去，希運呀然曰：「早知其然，當斫其脛。」無字碑，古頌云：「一片如屏紫翠間，風吹日炙蘚花斑。莫言箇裡無文字，要在當人着眼看。」難提塔，義存所預造，自序曰：「夫從緣得者，始終成壞。非從緣得者，歷劫常堅。堅則在，壞則損。雖然離散未至，何妨預置者哉？所以石室木函般土爲龜，諸事已備，脚北頭南。比至其時，橫山睡酣。塔後，黃滔爲作銘者也。蘸月池，旁有古杉，乃閩王審知與義存手植，皆數十圍。義存植者，直而參天。閩王植者，樛而連地。湯泉，（一）聖僧可遵詩，有「直待衆生塵趣盡，我方清冷混常流」，爲蘇東坡所賞。水磨，磨下絕雀。初，義存題云：「庵前永日無狼子，磨下終年絕雀兒。」至今信然。豐澤潭，有龍，二年一興，興則暴雨漲溪，衝梁突岸，乃鐵纜纏之，上鑄鐵佛，縫罅皆飲以鐵。其旁諸山，曰丁山，山勢橫去，一麓衝出，如丁字；曰松嶺；曰雙髻山，唐師復出家於此。師復，與林菴同業儒，同人關，至楊子渡口，有出塵之興，賦詩曰：「君自成龍，我成道。」浩然而歸，卜築此山。宋政和間，樵人張姓，於此山遇異人，飲之泉，食以筍，遂絕粒。識字後，削髮爲僧，累住名刹。山巔有鰲峰嶺。嶺下有聖湯。又有湯院。石在土中，閩人掘取供玩。

葛岐山

龍臺山 卽侯官市，與赤塘山對峙。其西，爲竹崎，爲唐舉山。其傍，山口南山，曰雲頂，曰下崎。緣巨數里，界於閩清。

嶼頭山 去城七十里，又曰花嶼。周圍有六橋焉。其西有芝田山、斗門山。有嶼曰月嶼、董嶼、環嶼。月嶼，《方輿記》云：「月嶼，出蟪蛤，號蟪沙。」

大象山 在旗山西，蹲伏如象。頂有觀音泉。傍有尋山、蘇岐山，皆濱浯江。

崎頭山 在象山東。上有仙人石，下橫長江，曰浯江。山半俯瞰清流，有礮石臨水，曰醉漁。又有石如鍾，下懸於江，曰懸鍾。

古靈山 一名古靈，一名大帽，一名席帽。千峰奇峻。前有文筆峰，特峭拔，宋陳襄居之，今有祠。山腰石室，曰太乙巖，一名小方廣，一名羅漢祠。山西南隅，有甘泉出石竅，可飲二十人渴，多生藍草。又有後灣渡、月山崖、安德泉、碧玉潭、贊公房、落鏡橋、小天台、蟠龍石、逗雲亭諸勝。月山崖，崖如半月。安德泉，懸崖甘冽，如匡廬瀑布。碧玉潭，水流清駛，潭底五色石子，粲若機錦。贊公，禪師也，初受業本州大中寺，後行脚，遇百丈，開悟。却回受業本師，發言異常。本師問曰：「汝行脚，故遇何人？」師曰：「蒙百丈和尚指箇歇處，今欲報慈德耳。」本師告衆致齋，請師說法。師登座，舉唱本師言，下感悟曰：「何期垂老得聞極則！」臨遷化剃浴，聲鍾告衆曰：「汝等諸人，還識無聲三昧否？」衆曰：「不識。」師曰：「汝但靜聽。」衆皆側聆，師儼然順寂。塔存本山。山南麓爲福頂山，有古靈廟，廟神曰正佑王。唐天復三年，降靈義興社，後遷此，土人因以福頂名山。

龍湖山 俗名土牛。在崎頭山西，與古靈隔江對峙。下有溫泉，又有龍湖。傍有小臺山。過此爲永

福界。

靈光山 舊有靈光寺，有橋曰靈光橋。溪曰洞溪。

後山

石厝山 出縣舊址也。山巔冠巨石，曰厝石。舊志載：「石歲覺增長，後因火不長矣。」有天赴亭。有善應廟。亭，閩越王游憩之地。廟神姓張，諱德清，靈異感應。宋淳祐五年，賜封號廟額。其驛口半源。

太平山 在城北。《十國紀年》：「王延翰葬閩縣太平山。」即太平地藏也。宋爲晉同墳，張丞浚令芙蓉僧作四穴，分左右，別男女，以待不能葬者。乾道六年，黃監簿啟宗請於府，拾枯骨，爲二大塔於天王院東，則謂之義塚。亦曰北嶼。渡合水橋，有爐峰焉，脉自白鶴山來，屹立闌闌間，稱南嶼。而江水貫穿於二嶼者，稱峴江，亦稱水西。

閩山

卧龍山 有三石，圓聳如品字，名「品石」。叩之，則諸山響應，又名「應石」。有安國寺，僞閩時，僧師備自雪峰來，居館，徒千人。高麗、日本，亦有至者。師備，已見雪峰山。有箋經臺，宋大中祥符中，僧可度箋《楞嚴經》於此，夏竦記其事。有得愛亭，守元絳詩：「朱幡何事獨來頻？不爲溪山只爲民。最愛年年禾稻熟，時豐寧有壤歌人。」有翠楚亭，元泰定間，錢光弼名。來游者衆，題刻甚多。皇朝高濂詩：「天開翠楚卧雲根，品字中分石字門。莫向此中留篆刻，古來名氏蝕苔痕。」

文山 宋隱十鄭育故居也。太守黃裳往謁之，乃石其路。路口有坊，匾曰文山。

浮倉山 近蓮華山下。閩粵王轉漕，以備東甌之地。下有石頭廟，轉漕之民於此祈福。又云晉太康中，鑿東湖，山在湖心，上平下方，若倉然。

桃源山 一名通谷山。有笏石奇峰、仙冠石、紫巖亭、高潔臺、一線天、六華巖諸勝。有井曰桃源，亢旱不竭。《圖經》云：「桃源井半，將軍石半。」

梅亭山

昇山 舊號飛山。世傳越王勾踐時，自會稽一夕飛來。唐天寶中，仙人任放，於此昇舉，因名昇山。今洗藥池、昇仙臺遺趾猶存。山有靈巖寺，陳天嘉三年置。以山西巖石間時聞鍾磬聲，故名曰靈。又有紫雲堂，唐亨元初，僧雅操居之。觀察使孟暉，與操談經相善，紫雲堂其遺跡也。山下有賢沙寺，以在懷賢里名。梁開平元年置。寺前有「飛山」二字，劉提刑嶠書。本宗一禪師塔院也。宗一者，師備。見前黃滔《雪峰碑》，師備擁徒於賢沙者是也。有靜游亭，崖南百步，有運使龐公籍留題。亭西，有熙春臺，臺東有不溢泉，有鬼磨石、仙昇巖、朵芝巖、息龜池、寒巖、覽秀亭、小隱諸勝。唐周朴《昇山詩》：「昇山自古道飛來，此是神功莫浪猜。氣色雖然離禹穴，峰巒猶自接天台。」宋守曾《昇山詩》：「修竹長松十里陰，任敦燒藥洞門深。獨闢金版驚人語，能到清霞出世心。」程師孟《洗藥池詩》：「行處松蘿深似幄，望中城郭細如棋。清泉可惜藏巖下，不作先生洗藥池。」陳襄和詩：「雲中直有三清路，塵外都如一局棋。聞欲引泉深洗藥，未應奪我鳳凰池。」程師孟《靜游亭詩》：「石磴高軒榜靜游，度年紅葉少驚秋。使君會得山僧意，不放笙歌到上頭。」按仙人本名任放，唐天寶間人，而《陶隱居集》云：「晉太康中，任敦自茅山往居大鵬山王霸宅，得金版仙訣。」今會南豐詩用敦字，又有「獨闢金版」之句。當作「晉任敦」也。

鳳池山 山椒有池三四畝，五色鳥浴之。閩王葬夫人任氏於此。王薨亦葬焉。後改葬九峰之蓮花矣。宋守元絳詩：「州人未識鳳池山，朱轂時來此往還。四座杯盤在天上，滿軒雲雨落人間。」曾鞏詩：「經年聞說鳳凰山，躡屐方偷半日閑。笑語客隨朱閣上，醉醒身在白雲間。」溫益詩：「少年曾接元公論，屢話南閩佛刹奇。」葉棣詩：「聞說治平元太守，殷勤晚到鳳凰池。」蓋山見於《圖經》，前此未顯，至絳始發之。山有泉曰水簾。溫益詩：「竹生石上瓊瑤碧，泉落簾間組帶垂。」陳暘詩：「地噴飛泉成雨露，根盤喬木列旌麾。」有擢秀亭，提刑喻陟名，仍隸書。顏亦有詩。守謝卿材、倅幕皆屬和之。有翠微亭，建炎二年進士題名於此。有覽輝亭，有閩華巖，陳璣有記。

保福山 山有唐安寺，陳天嘉二年建。皇朝更名隆壽保福禪院。

馬鞍山^(三)

九峰山 山拔峭若筆架，與芙蓉、壽山號曰三山。大中二年，僧慈惠創九峰院。咸通二年，號九峰鎮國禪院，柳公權書。有嶺曰長箕嶺，一名桃枝。桃枝嶺之上，有蓮花山，山形高峻，上銳下圓，若菡萏然。郡主山也。後唐長興三年，閩王審知自鳳池山改葬於此。有後唐賜《神道碑》，張文寶撰文。皇朝磕源林謹夫記。宣德五年，種屯軍三十人盜發閩王塚。塚門堅甚，竅上隅人之，一人腰纏先緇，忽中絕，呼不應，衆愕然，連梯爇燧而下，見先緇者死矣。墳廣如屋，前祀王繪像，几列五供，悉用金玉珍寶器。後寢紅棺二，王夫人也。既盜出，先緇而死者，見夢其妻云：「蛇實殺我。諸偷所得物，當半分爾。」妻以告諸偷，諸偷不應。訟於百戶傑，傑受偷賂，不問。訟於懷安尉，尉玉得其金鐲、^(四)玉帶，亦罷。遂訟於憲司副使李素魯，僉事鄒穆，捕治之。尉心念匿帝王物當死，即欲自縊，或德之自首以免，遂上鐲若帶。而諸生王琨

者，自言王後，當領所盜物。諸公疑之。琨出其家譜，乃墳中物，皆備載於是。諸公按譜徵物，舉王繪像懸堂中，則見方面大耳，巨目弓鼻，紫面修髯，儼然可畏。四圍朽盡，獨中心如故，咸嗟嘆之。內一水碗，其底寸許，如橄欖，瑩如金色，不識是何寶也，召回回辨之，曰此玻璃碗。諸公乃歸琨像及墳中物十之一，而委庫役鄭浩爲王治塚。浩爲余言，墳中懸棺，推之可動，而蓋已被發，墳前石人石獸，製極工巧云。琨後仕至松陽知縣。松陽丞，有劉鑑者，實王女之所自出，借王像留之不返。琨復訟於憲司，並勾出玉帶一條，花大如掌。宣德八年，進御府。又宋黃榦，有《桃枝嶺詩》。

大鵬山 山如鵬展，任放修鍊於此。迤北爲杜塢嶺。

龍腰山 越王山之後山也。〔五〕自蓮花山發脉，迢遞過飛來峰，半隔城內，爲郡主山。下有水源，接東湖之堤，與潮汐通。相傳昔常欲鑿之，以通西湖，往往晝鑿夜合，俗云龍腰也。有苔井。其北五峰山，爲府社稷壇。又北曰義井。

壽山 山有九峰。是生美石，瑩潤可研可印，大者一二尺許，蓋琨云。距山十餘里，有五花石坑，石有五色，難得者艾綠。

東室山 古戰坂也。五代晉開運中，南唐兵與李仁達鏖戰於此。今荒莽中，隱隱有營壘址。戰坂之西，爲陶竈，閩王審知築南北夾城，於此陶磚。

龍窟山

黃巖山 在西室山東。有瀑布，高百餘丈，聲聞里許。巔有仙井。有石曰盤石，俗曰彭石。相傳越王時，此石在湖中，不沒如盤。

澗田山

芙蓉山 與壽山對峙。若芙蓉然。別麓有洞，曰芙蓉洞，亦曰靈洞，洞口可丈許，縈紆十餘里，游人篝燈束炬以入，巖石互鎖，既隘復廓，紺乳時滴，陰氣逼人。五里至開山堂，僧義存所闢，有石床、石鼓、石盆，過此益凜凜，莫窮其源。宋時縣人謝三，卽釣漁江上，年三十，投竿翻舟，人是山爲頭陀。宋守葉棣詩：「爲問閩江艇釣客，謝家誰更未知名？」

龍鞍山

楊崎山 夾江峙立。連延起伏，雖不甚高，殊有形勝。「楊」或作「陽」。山中，唐子野隱居處也。子野父周，行賈杭州。子野，年十三，從之。其父時就他郡，命子野守舍。適王伾微時，覆舟於羅刹江，子野行見之，奮臂曰：「能生人者，予百金。」於是漁者競援伾。子野卽出舍中，裝直百金，予漁人。其父歸，大異之。子野曰：「身得義名，令父喪羸，非孝也。」去爲人僕賃，主人微聞救伾事，義之，陰倍其償，乃爲小賈。小賈之息，得過當，愈於父。久之，致蓄藏，以其半奉親甘羈，以其半散之貧交昆第。廼折節讀書，治《左氏春秋》。後伾爲散騎常侍，使人召之，則亡矣。令福州觀察處置使物色之，使者得之陽崎江上。伾命隨之至深山中，家徒四壁，几上《周易》一卷。子野佯喜，設脫粟食，約曰：「旦日雪霽，會於傳舍。」及旦，傳舍長展車待，移夕不至。使者還馳，至子野家，書幣封識如故，而子野已行矣。

鳳冠山 在陽崎山西。群山之間，沃野千餘頃。有三小阜鼎立，田中者，爲柯嶼，一名台嶼，一名瓜嶼。宋建州司戶陳嘉言，於中阜築書隱堂焉。

吳山 相傳吳父隱此。一名岫山。下有盤嶼，四繞如盤，或云吳父之所盤桓也。

仙崎山 與陽崎對峙，或曰陰崎也。山上居民稠密。江水蜿蜒出其下。南北行者，必由此山之涯以濟。元鄭潛置義渡焉。潛，字彥昭，歙人。至正中，爲福建監察御史。歷官泉州路總管。致仕，寓居爪山，買田建學，教育後進。立白苗、楊崎二渡，買田給舟子。處士吳海記略：「閩上游四州之水，滙於洪塘，徑臺山，帶郡城以東。其別流，南循方山，會於長隄。臺江右，爲浮橋，以濟行者。延祐始創石橋，少有淫雨，暴流泛溢，鳳岡百里，皆爲巨浸。而其勢日趨於南，新隄、陽隄，實當江流迴幹之衝。又有燧風，不時摧帆、折柁，並岸強獷之徒，植黨專濟，扁舟葦如，坐客俱滿，不勝載而後發，猝遇風濤，率多覆溺。鄭公聞而憫之，白太府，取巨木百章，營二舟，募水工操之。一自白苗濟陽隄，一自新隄濟陽隄。舟鉅，不虞猝。濟利，不虞專。父老告子：『白公之渠，萊公之井，蘇公之堤，李長者之陂，皆以其姓，渡不類歟？願刻石表曰鄭公渡。』」予曰：『諾。』遂爲記。」潛，有子居貞，見縉紳。

西室山 去城二十里。聯絡秀拔，傍爲沙溪山、杜塢山。其北，有梧桐嶺，甘蔗生焉。又西，曰拜郊山，閩粵王燔柴處也。

龍跡山 在九峰山下。中有廣施廟。唐林諝記：「廣德中，一日清晝，雲雷騰震，龍從驟雨，石上遺跡可數寸，歲爲大豐，故名山龍跡矣。宋太平興國後，遇水旱，有禱輒應。民廟祠之，竹椽茅屋而已。嘉祐四年，令樊紀禱雨有應，新大之。紹聖元年，令洪子著禱雨復然，而所潤不過邑境。子著白帥王祖道往謁，即日大雨。三年，大旱，又白帥葉紳，炎烈中，倏然滂沱者繼日。大觀三年，令吳與更基山爲殿，臨溪作亭，亭名曰沛然。自爲文記之。」政和五年，賜額曰廣施。

爪山 聯方山之西，三巒直下，分派如爪。宋潘柄元、鄭潛居之。其支，爲南陽山。巔有四潭，龍潛

焉。曰烏岡潭，巖石險怪，或雲霧騰湧，則大雨如注，歲旱應禱。

天寧山 自橫山南渡三橋，爲是山。有臺曰天寧臺，俗名鹽倉山，又名掛榜山。省會第一案也。西爲黃柏嶺。皇朝嘉靖中，金華太守陳京，大書「望北臺」於石，因名望北臺嶺。又爲白泉山，爲白鷺嶺，爲登平山，爲楊桃嶺，爲虞塘山。

鷄籠山 在虞唐山東。一名斗門山。西爲鳳岡，周圍荔枝以數十里。中有三十六宅，宋劉彝諸賢所居，曰劉宅。《閩中荔支譜》：「郡之附郭。獨鳳岡一村。種類甚夥，不下數百萬株，大者十圍，高三十丈，名曰天柱，皆王氏植，至今蕃盛。」

銅盤山 竹柄山 螺峰山 程田山

五奇仙山 有五石秀聳。相傳有仙居之。

佛國山 火峰山

群鹿山 有泉曰鹿乳。

金山

黃沙嶺 閩山嶺

大夫嶺 相傳舊有大夫墓。

北嶺 路通連江縣，沿崖而躋，高一千八百步。宋嘉祐三年，令樊紀，夷高直曲，培凹續陷，嶺以失險。上有亭。嶺阿有胭脂園，周匝約二百餘步，膏潤不毛，四時紅燁，相傳忠懿王郡主梳粧樓在焉。膏潤紅燁，脂粉之餘注也。

湯嶺 由北嶺行十餘里至此。又三十里，至連江界。諺云：「湯嶺兜，比嶺頭」，言險也。

石門

靈石 有真人宮，內有潭，潭旁有石似龜、劍、印者四。

越王石 《閩中記》：在侯官縣南海邊。常隱雲霧，相傳太守清廉廼見。劉宋時守盧愿往觀，了無蔽隱。今未詳何處。

石母嶼 相傳石母常居於此。石出水僅四尺，巨漲不沒。

甘蔗洲 在江心。上有馬仙宮、驪珠石，居民種蔗爲業，歲課甚豐。

芹洲 澤苗江之西。周圍二十餘里。居民隱然閩閩。洲多產芹，故名。又名瀛洲，以其四面有水，如瀛洲然。

川水利附。

馬瀆江 上接螺女江，納建、延之溪，以至於海。

洪塘江 上接馬瀆江。

螺女江 上接水口，下接閩江，入於海。《搜神記》云：「閩人謝端得一大螺如斗，畜之家，每歸，盤殮恒具，端疑而密伺之，見一姝甚麗，問之，曰：『我天漢白水素女。天帝哀卿少孤，遣妾具君膳。今去，留殼與君。』端用以貯糧，常滿，資給數代。」《方輿勝覽》曰：「螺江也。」《太平廣記》：謝端，侯官人。少喪父母，養於隣人。年十七八，恭謹自守。鄉人愍其無妻，視圖未得，躬耕力作，不捨晝夜。後於邑下得一大螺，如三升壺，以爲異物，取貯甕中。後端每蚤至野，還見其戶中有飯飲湯火。端謂是鄰人爲惠，便往謝。

之。鄰人皆曰：『吾初不爲。』端又以爲鄰人遜，然數爾不止。後更實問，復皆笑曰：『卿密娶妻，何謝鄰炊？』端默然。後以鷄初鳴出去，平蚤潛歸，從籬外竊窺其家。見一少女，從甕中出，至竈下燃火。端使人門，徑造甕所，無螺。但女仍到竈下。問之曰：『新婦何來，而相爲炊？』女人欲還甕不得，答曰：『我白水素女。天帝哀卿少孤慎守，使我權舍炊烹。十年之中，使卿居富得婦，自當還去。而卿竊相伺掩，吾形已見，不宜復留，當便委去。雖爾，留此穀以貯米穀，常可不乏。』端苦留不得。時天忽風雨，翕然而去。端爲立神座，時節祭祀。居常饒足，不致人富爾。於是鄉人以女妻端。端後仕至令長云。」

金鎖江 在城南七里。一名金崎。晉康帝時，有漁父釣得金鎖，曳引至盡，金斗出焉，急挽俄絕，猶得數尺許。詔立廟，曰金崎。

黃岸江 又名沿江。江濱有巨石橫浸，亦名蘇崎，有渡濟涉。大江之支也。

黃江 大江支江也。

楊崎江 上接洪塘江，歷鳳岡，至楊崎，納永福溪，及浯溪之水，達於峽江。皇朝萬曆四十年，巡按陸夢祖改官道，出此江之上。大學士葉向高記：「閩會城南，有江達海，其水自上流四郡千餘里，皆匯於此。有山東之，故名峽江。怒濤激浪，急溜漩渦，險若瞿塘。自峽而上，可二十里，而楊崎江水勢紆緩，〔七〕一革可航。勝國以前，行者皆由此渡。其後，以兵亂，榛蕪間逢虎暴，乃徙而由峽路。雖稍夷，每值風波，輒葬魚腹。卽近者，隆、萬間，大比之年，生儒溺死，以千百計。行旅病之，欲仍復舊路，而人情因循，屢議屢寢。直指陸公歎曰：『茲路不更，毋乃委民於壑下。』郡亟圖，遂移渡於陽崎江。自江而南，剪棘斲石，夷高湮下，闢爲周行者五十餘里。爲橋二，公館二，舖舍六，亭一，徵廬十。增渡舟八。道里視峽江減十

之二。往來於茲者，江行如徒，徒行如市，陽侯不驚，猛獸屏跡。余再拜稽首曰：『公恤我閩，出之鮫宮蜃窟，而登康莊。敢不世世拜賜！』

澤苗江 源出永福江東岸，爪山、黃巖、大鵬諸山之水出焉，合流至崎，與楊崎江合。

仙崎江 一名新崎。源出永福印溪，東流三十里，接西峽江。

石岵江 上接水口江，下接洪塘江。今芋源驛是也。《唐書》云：「侯官西南七里，有洪塘浦。自石岵江而東，經覽瀆，至柳橋，以通舟楫。貞元十一年，觀察使王雄所開也。」宋朱熹《石岵江行》詩：「春日江中注，我行溯其波。揚帆指西瀼，兩岸青山多。」

小月溪 源出永福。

龍溪 是淵多龍。唐大曆中，有女浣紗溪傍，龍吞之。其父號哭不已。聞者爲取龍烹之。溪傍有小金沙，占山園。

大目溪 源出古田。

仁溪、蒙溪 源俱出連江。

吳山溪 源出永福，入於西峽。

桐溪

沙溪 源出分水關，逕建，劍而下，至芋源，與大江合。中有沙壅成洲，故名。

沽溪 源出大鵬、黃巖兩山，注於澤苗。

陳塘溪 源出十四都，縈紆入江。歲旱則堰，以溉田。

浯溪 源出爪山之陽，歷平坡北，由仙坂注澤苗江。

潢溪 源出黃巖山，注澤浦，入於江。

黃石溪 舊名岳江，疑卽石岳江上流也。發源自分關，至白沙，合流入於西峽。

西湖 在城西三里。晉太守嚴高所鑿。畜洩灌民田，周圍十數里。王審知時大之，至四十餘里。其子延政，築臺爲水晶宮。由子城複道，跨羅城而下鹿頂數十武，可至引湖，而入爲浴馬之所，而容小舟焉。携後庭遊戲，不出莊陌。後漸湮。宋守曹穎叔、程師孟、蔡襄，先後修築。淳熙中，趙汝愚請於朝，大濬之。汝愚奏書：「臣州有西湖，接濠而通南湖，瀦蓄灌溉，旱運澇洩，民以享豐年之利。自爲貧緣者，請射爲池戶，魚塘蔬圃，封畛其間，至券售如世業，水源障塞，旱澇皆害。州地狹民貧，小歉難枝梧。此平湖彌望，皆負郭良田，罔納租稅，而池戶長享重利，第以圭撮稍入，不侔甚矣。乞於農隙，稍尋其舊。州舊無放生池，如將西湖充之，仰祝兩宮之壽，歲不過損州公使庫、池戶數百緡，而公私便利，爲惠無窮也。」既復建閣其上，沿舊名曰澄瀾。皇朝按察使徐中行，闢治建閣，復汝愚舊。萬曆中，守江鐸，作水關以通水。中有孤山、開化山。又城東有東湖，亦嚴高所鑿，宋末湮塞。又有南湖，亦塞矣。又有陳湖、石湖，莫詳其處。西、南二湖，宋時太守出觀競渡，有亭榭之美。蔡襄，則寒食、佛日俱往游焉。古圖記：西湖旁有廟，祀閩越王郢，以郢爲州西開大路，畚土成丘，得血食也。

長定官池

天湯泉

龍龕井 廣福井 金鷄井

古田縣 在府城北，東抵連江，西抵南平，南抵侯官，北抵政和。本晉侯官縣山洞。唐開元二十八年，洞民劉強輩千餘計，歸命向化，都督李亞丘以聞。明年，始立邑於雙溪之滙，屏山之南。宋轉運使楊克讓奏遷邑治於水口。端拱元年，轉運使崔策還舊。皇朝因之，在坊爲保五，在鄉爲都四十六，統圖六十三。(八)

城內

一保，圖一。

二保，圖一。

三保，圖一。

四保，圖一。

五保，圖一。

和平里

一都，圖一。

二都，圖一。

三都，圖一。

四都，圖一。

五都，圖一。

山曰九龍。峰曰白銀。嶺曰馬蹄。溪曰濂溪、虎溪。潭曰後溪龍潭。

崇禮里

七都，圖一。

八都，圖一。

九都，圖一。

十都，圖一。

十一都，圖一。山口旗山、五花、五山、北臺、極樂、黃藥、五華。峰口大仙。

保安里

十二都，圖一。

十三都，圖一。

十四都，圖一。山曰翠屏、醴醕、仙亭、月山、龜山、古城、花山。峰曰尖峰、小尖、文筆。巖曰仙巖。嶺曰金仙、仙嶺。溪曰東

溪、感溪。潭曰上方、下方。

慕仁里

十五都，圖一。

十六都，圖一。山口華巖、寶東。峰曰鳳冲、陽谷。嶺曰天宮、覆缸、羊角。

新興里

十七都，圖一。

十八都，圖一。山曰石崎。湖曰平湖。

橫溪里

二十都，圖一。

二十一都，圖一。

二十二都，圖一。

二十三都，圖二。

二十四都，圖二。

二十五都，圖二。
石曰石摩。溪曰橫溪。泉曰清泉。

新俗里

二十六都，圖二。

二十七都，圖一。

二十八都，圖二。

二十九都，圖三。
嶺曰品峰。洞曰天平庵。溪曰白溪、菴溪、青溪、禹溪、雙溪、小溪、倭溪、甘溪、困溪。

移風里

三十都，圖一。

三十一都，圖一。

三十二都，圖二。

三十三都，圖一。

三十四都，圖一。山曰寶泉。石曰石龜。溪曰西溪。

安樂里

三十五都，圖一。

三十六都，圖一。山曰馬山、鼓山。峰曰大夫、麒麟、獬豸峰、象峰。巖曰天平、幽巖。（九）林曰相公。

順委里舊名「慎」。宋避孝宗諱，「慎」因作「順」。

三十七都，圖一。

三十八都，圖二。

三十九都，圖一。巖曰孔雀。

安民里

四十都，圖一。

四十一都，圖一。峰曰幽巖。嶺曰岑洋。石曰龍爪。

邵南里

四十二都，圖二。

四十三都，圖一。

四十四都，圖一。

四十五都，圖二。

四十六都，圖一。嶺曰牛嶺。溪曰甘溪。

翠屏北萃，仙亭南案，文筆東峙，五華西礪。其形勝也。

山

九龍山 九峰，巖崿峭壁。其中有大石，擊之，小石戛戛然有聲。

旗山 以形名。杉洋亦有之。

五花山 北臺山 五山

極樂山 山下有極樂寺，唐天寶初僧志文建。宋令李堪，喜游之，曰：「我死，當棲神是山。」一日，寺僧忽聞堪車馬導，從聲趨迎，則烏有。次日，堪卒，僧神其事，立祠祀堪，奉堪爲護法神。堪《咏寺詩》有序云：「極樂山，蓋美刹殊致，煙霞、樹石、風泉、猿鳥尤多。其間精舍耽耽，景最清絕，與時爲奇。余長玉田，得之部內，登高而賦，風什所繇。」又《八景詩序》：「玉田爲邑，山水之會。環峰複嶂，効奇獻秀。雙溪合流，襟帶其間。北有山曰翠屏，邑主山也。形如屏幃，竹樹蔥蒨，春朝微雨，望之蔚然。其東曰金仙嶺，林木蕃茂，薊蕘者往負薪行歌。東南一峰，銳鋒類筆，夕陽射之，文彩爛然。下有藍洞，薄暮雲歸，布護充斥，虛谷盡白。西南之峻極者，曰五峰，秋晴景明，丹霞冠頂。直邑西，層巒疊嶺，巖崿干雲。窮冬雨雪，他山不白，西山巔有之。霽後仰觀，益增爽氣。溪源二，自北來，至邑合流爲劍溪，委蛇澄徹，其平若鏡，往來漁舟，欸乃相聞。南下里許，石灘橫截中流，巨東西岸，溪流觸石，如鳴佩玉。當素秋無雲，碧落懸鏡，水光月色，灑灑乎清氣爲一景。八者，玉田勝景也。因卽景賦之。」讀堪詩序，知爲文雅君子也。嘉定中，令傅康，疾護法神祠其稱不正，名廟曰靈應。令留元亮，續成之，請趙以夫爲記曰：「李侯當井邑荆榛之時，教俗淪胥之後，典學明道，民奠厥居，而佛家者流，聚廬寧處，亦蒙賚焉。蓋侯之愛，非徒使吾民遷善，雖舐排攘斥，亦易怨爲德矣。」山中寺有三奇：西廊鍾鼓，聲聞三百里。宋朝有旨，鋸其唇三寸，法堂

匾，紹興中，劇寇中之箭鏃，藏殿雕龍，傳昔遇風雨，化飛去。章孝彥詩云：「廊鍾默訴亡唇恨，堂匾猶存箭鏃機。禪關未晚門先閉，似恐雕龍去復歸。」寺後，西山之半，巖空若室，有馬仙小像，曰西巖。亦有伏虎巖。

黃蘗山 山多桃，塢曰桃塢，湖曰桃湖，溪曰桃溪，洲曰桃洲。舊傳，有人由白沙溪沂流，至溪上境界，豁然有如洞天。於時，春風微和，夭桃夾岸，繁英媚川。溪西有湖，曰小湖。黃蘗山下有寺，曰寶峰寺。西南有臺，曰羅溪。併黃蘗山而五。宋令許當，作《桃溪五詠》題之。陳白《小湖詩》：「不與衆流通，湛然如月午。龍吟人盡聞，龜息誰能覩？」

五華山 峙聳千仞，名曰千山，亦名大仙山，亦名大佛嶺。宋李令堪《八景詩》所謂八峰也。上有樓真道院。皇朝蘗城倪灝院記：「五華山，在高峰中，屹然特出，俯視百里間。群崖衆壑，若波濤洶湧，而五華居尊焉。」宋季，北兵入閩越邑境，人民悉避茲山。有姓陸者，忽見一青衣童子，蓬跣騎牛，進曰：「北兵旦來，汝等不宜處此。」陸叱之曰：「小子妄誕，安得而知？」童子忽失去。次日，兵果登山，被掠甚衆，始知此山真有神仙居焉。元時，有劉道齡者，懷仙慕道，草衣木食，結庵絕頂，一犬一鷄，習靜數年。遠游武當，拜謁玄帝，參究真訣，遂奉香火還山供養。延祐庚申夏，忽令人掘地作墳，積薪於旁，曰：「某數周幸滿，誓於六月望日辭去。」如期，老幼登山，送者千餘人。及午刻，雷震微雨，師焚薪自焚，稽首謝衆。皇朝張以寧詩：「大佛嶺盡小石來，黑崖削鍊懸崖鬼。雲翻石根六月雪，雨老石路千年苔。九華天姥昔見之，人間有山無此奇。」

翠屏山 舊名環屏，邑背山也。

醴醴山 山下醴泉出焉，又爲仙亭山。有醴泉道院，院有亭。元時，項道人修道此山。道人名此舟，能行雷法，知人生死。有薛姑者，請往其家，項曰：「衲洗方濕。」薛請益虔，項仰天言曰：「張大哥，借我日光一道。」應時日出衲處，其衲尋乾，日亦復沒。臨終，雷雨驟至，立化而已。山南有山，形如半月，名月山。皇朝高棟《月山詩》：「群峰多獻奇，一峰狀如月。半影出陰崖，四時掛天闕。」又，杉洋亦有月山。龜山 形如龜。山下有洞，草木繁蕪，其色若藍，名藍洞。洞東有嶺，曰金仙。登其巔，可遠眺邑勝概也。上有金仙宮，石磴盤曲。

古城山 葉山 華巖山 石崎山 寶東山

馬山 直杉洋之正南午位，故名杉洋。有鎮。其山多竹，可以楮。有百丈口。上有溪源。宋縣尉盧特，禱雨有龍爪見焉。

鼓山 界旗在馬山之間。

小武當山 在水口。隔江祀真武。宋時爲拱辰堂。相傳有雲水道人，自武當山佩香火來，寓斯堂數日，出不知所向。衆異之，由是祈禱旁午。嘉定間，邑宰傅公康易，爲北極道院。元時，有道士馮守一者居之，苦行焚修，積衆檀施，闢址宮之，曰佑聖。

白銀峰 大仙峰 尖峰 小尖峰

文筆峰 峰形如筆，李堪「八景」之一也。

鳳冲峰 下有覆缸嶺。

陽谷峰

大夫峰 在藍田之蓋竹。上有通奉大夫中丞李皇臣先墓。

麒麟峰、獬豸峰、象峰 三峰皆以形名。橫直十有餘里。

幽巖峰 有幽巖寺。寺後峰有巨石，五代晉天福五年，一夕雷擊，裂成「品」字，又名雷峰。

馬蹄嶺 天宮嶺 羊角嶺 晶峰嶺 岑洋嶺 牛頭嶺

清風嶺 與延平界。

孔雀嶺 中有仙跡。

仙巖

天平巖洞 洞內有龍，祈雨輒應。

相公林 宋太宰余深祖邵國公墓在焉，故名。深，累官御史中丞兼侍讀，與開封尹林攄，治張懷素獄，中連蔡京，獄辭有及京者，輒焚之。京遂力引深與攄，驟至執政。宣和初，爲太宰。言福建以取花果擾民。徽宗不悅。遂請罷，出爲鎮軍節度使、知泉州。靖康初，加恩，乞致仕。建炎二年，降大夫，臨江軍居住。尋，以渡江，恩赦還鄉里。

石障 石龜

龍爪石 在秀峰寺前。形如龍爪。

龍舐石 有孔而潤，故名龍舐。

竹洲 上有顯應廟，神姓黃，諱師蓋，宋景德間人，巫而得道。其墳在此洲前，有二竹能自掃墳，人號竹仙。

戴星洲

川

瀨溪 流逕曹陽橋，合人大溪。

虎溪 昔傳有虎跳溪石上，其跡猶存。岸側有虎溪寨。

東溪 溪有灘，舊名洪瀨。宋令李堪，取陸士衡「飛泉漱鳴玉」之語，改爲鳴玉灘。下有磨劍石，識云

「劍石平，出公卿」。宋令留元亮平之，刻字曰：「劍石已平，公卿出焉。」

感溪 一名錦溪。

橫溪 有橫口東西溪。

白溪 菴溪 青溪 禹溪 雙溪 小溪 倭溪 西溪

甘溪 古名藍溪。流入東溪。

困溪 溪流自縣出，與嵩溪會，名水口溪。關曰困關。宋轉運使楊克讓所遷縣治處。其北有巖，巖上有庵，庵前有塔，名塔嶺，一奇勝也。其庵，祀醫官鄭真人。前有石珠一圓。皇朝嘉靖中，延郡司理徐珪謁祠下，心頗自異。未幾，疾忽作，夢與神歛。翼日，遂愈。因酬以詩。萬曆中，嵯司貳蕭敏道自言：「結髮應試時，夢人授石，圓如珠，大二尺許，命吞之。既寤，腹微懣，異之。既官於是，一日過庵，見石列香几上，如夢所吞者，問厥從來，守庵具對。自詫其驗。」敏道，福郡守終官。

渙文渠 昔人鑿之，爲邑襟帶。

朱舍河 後河

平湖

上方龍潭 下方龍潭 後溪龍潭

清泉 白泉 溫泉

〔校記〕

〔一〕「山」字，各本原脫，據本書體例補。

〔二〕「湯泉」，各本原作「滑泉」，據上文改。

〔三〕「馬鞍山」，各本原作「馬鞭山」，據上文改。

〔四〕「玉」字，疑衍。

〔五〕「越王山」，各本原作「越三山」，據上文改。

〔六〕「時就他郡」，各本原作「就時他郡」，據文義改。

〔七〕「楊崎江」，各本原作「陽崎江」，據上下文改。

〔八〕「統圖六十三」，下文實列六十一圖。

〔九〕「幽巖」，下文作「幽巖峰」。

〔一〇〕「有百丈」下，各本原闕一字。

閩書卷之四

方域志

福州府 閩清縣 長樂縣 連江縣

閩清縣 在郡西北。東抵侯官，西抵尤溪，南抵永福，北抵古田。本漢侯官縣地。唐貞元中，觀察使王栩析縣北十里，置梅溪場。五代梁乾化元年，王審知升爲閩清縣。宋元仍舊。皇朝因之，其鄉二坊、五都，統圖七。

東奉政鄉宣政里

昇平坊，合一都、二都，統圖一。山曰大湖、鳳凰。巖曰烏石。溪曰梅溪。井曰古井。
和豐坊，合十六、十七都，統圖一。山曰猴山、白雲、石竹、朱頂、留錢。

南鄉安仁里

十九都，合十八、二十、二十一、二十二、二十三都，統圖一。山曰白面、鍾南、偃草。泉曰湯頭。

西鄉孝順里

六都，合四都及三都之半，統圖一。山曰峯山。巖曰龍都。

九都，合五、七、八都及三都半，統圖一。山口玉臺，名山。

北壽寧鄉仁壽里

十一都，合十都、十二都，統圖一。山曰大帽、石屋。石曰龍爪。

十四都，合十三、十五都，統圖一。山口鍾湖、鶴林。溪曰演水、羅疊。石曰仙人、坐化。

大江環左，屏山聳前。鳳凰南翔，朱頂西舞。其形勝也。

山

大湖山 山半有湖，約半里許。漢徐登、趙炳得道於此。登、炳，見閩縣。

鳳凰山 以形名，宋陳祥道居焉。下有起傅巖，祥道弟暘隱其處，後以賢良舉。鄉人名巖曰起傅，蓋以方傳說。

猴山 山下有坑，水流相遞，猴猿所窟。

白雲山 山有仙峰巨石，有寺。《夷堅志》：閩清縣白雲寺西廊有大輪藏，名千福，王氏據閩日所建也。淳熙中，寺僧以殿柱朱漆暗淡，命工莊嚴，選行監視。其故時所用漆，略與木不同，拈綴隱隱有紋，引手剥之，見寶珠一顆在柱中，現人定觀音聖像相貌端嚴，極爲明了，觀者無不稽首敬禮。

石竹山 在鳳凰山傍。山半有靈壇，石巧如畫屏。

朱頂山 唐乾符間，山下有池錫者，家畜馴鶴，旦輒飛翔山間，因號山曰朱頂，林曰白鶴。

留錢山 唐乾符間，一夕山鈴鈴有聲，天雨錢，不可量數，林木且視皆折。

白面山 巖石晴望隱隱如面，溫泉出焉。

鍾南山 在臺山南。上有巖曰盤谷。昔有二人，裹糧深入憩草屋下。忽一人出芋數枚，煨落葉相啖。明失其處，但見落葉盈尺，題詩其上曰：「偶與雲水會，不與雲水通。雲散水流後，杳然天地空。」山中有度仙橋，舊傳黃天谷訪徐、葛二子於此。

偃草山 山草分兩偃，其一偃上，其一偃下。舊傳永福有張聖者，宋紹興間，爲白雲寺頭陀，飯牛山下，見仙人圍棋山巔，往視之，仙人尋去，奔追不及，既悵且勞，卧地而滾，滾而下者，草偃而下；滾而上者，草偃而上。雖經鏟鋤，復生如故。

臺山 縣主山也。

玉臺山 唐時有楊姓者，煉真於此，鄉人臺而祀之，名玉臺仙人。傍有井，中產蜥蜴，可以禱雨。或曰蟄龍。玉臺後有石鼓，扣輒鳴。

名山 山產名花異果。逸人薛丕居之。或傳其仙去。一名逸人山，一名薛丕山，一名薛仙山。

大帽山 接永福界。峰巔舊傳有鼓聲，或月一二鳴，或經年一鳴。歲旱禱雨於此。其下爲白面山，有山石壁玉白色，望之隱隱如人面，是出甘泉。

石屋山 巔有石屋及棋局仙跡。

鍾湖山 山半有湖，泥如浦溲，是生蘆荻。有積水，其味特鹹，應潮盈縮。相傳湖中有鍾。下有鍾潭，蛟龍出沒。

芹山 白玉蟾煉丹處也。《鶴林彭耜傳》曰：「先生姓葛，諱長庚，字白叟，福之閩清人。母夢食一物如蟾蜍，覺而分娩。時大父有興董教瓊管，是生於瓊，蓋紹興甲寅三月之十五日。七歲能詩賦，背誦九

經。父亡，母改適。先生師翠虛陳泥丸學道，得太乙刀圭之妙，九鼎金丹之書，長生久視之術，紫霄嘯命風霆之文，出有人無、飛昇隱顯之法。始棄家從師游海上，號瓊海子。至雷州，繼白氏後，改姓白，玉蟾字，以閱衆。甫號海南翁，一號瓊山道人，一號蟾庵，一號武夷散吏，一號神霄散吏，一號紫清真人。白謂曰紫元、紫華先生，乃紫清也。三人乃紫微垣中九皇星之三星也，因誤校勘運之錄，降人間。凡章奏則曰：「金闕玉皇門下選仙舉人臣白玉蟾。」嘉定癸酉，翠虛假水解於臨漳，復出於武夷，悉受諸玄秘。先生盡得其旨。乃披髮狺狂，遍走名山。有疾苦，或草或木，或土或炭，隨所得予之，餌者輒愈。乙亥冬，武夷詹氏之居，火光墜其家，延先生拜章禳之。已，大書一符於中。是夕，聞戶外萬馬聲，有呼云：「火殃移於延平某人家」，驗之果然。丙子春，過江東，憩龍虎山。歲旱，諸羽流誦木郎咒，弗應。先生爲改正，誦之果雨，人疑張虛靖後身。戊寅春，游西山，適降御香建醮於玉隆宮，先生避之。使者督宮門，力挽先生回，爲國陞座，觀者如堵。又邀先生詣九宮山瑞慶宮，主國醮，神龍見於天，具奏以聞，有旨召見，先生遁而去。己卯，自洪都入浙，訪豫王。僧孤雲率諸僧來迎，以先生博極群書，貫通三氏，欲求其爲僧，以光叢林。先生笑曰：「吾中國人也，生中國，則行中國之道。禪宗一法，吾常得之矣。是修靜定之工，爲積陰之魄，以死爲樂。吾中國之道也，是煉純陽之真精，飛身就天，超天地以獨存，以生爲樂也。故曰本乎天者，親上；本乎地者，親下。道不同，不相爲謀也。」壬午孟夏，伏闕言：「天下事，沮不得達。」因醉，執逮京尹，一宿乃釋。十月，先生至臨江軍慧月寺之江月亭，飲酣，袖出一詩與諸從游談，未及展玩，已躍身江流中。諸從游疾呼援溺。先生出水面，搖手止之。洪都人皆謂已水解矣。是月，又見於融州老君洞，由是度桂嶺，返三山，復歸於羅浮。紹定己丑冬，或傳先生解化於吁江。先生常有詩云：「待我年當三十

六，青雲白鶴是歸期。」以歲計之，似若相符。逾年，人皆見於隴蜀，文未嘗有死，竟莫知所終。按尹子曰：「十年死者，十年得道，是得道之速也。百年死者，歷久得道，是得道之晚也。死者煉就純陽之真精，消盡積陰之渣質，故棺空而無尸，復見於他邦，出入天表，與神俱游。」今先生九年道成而仙去，是得道之速也。先生蔬腸絕粒，喜飲酒，不見其醉。大字草書若龍蛇飛動，兼善篆隸，尤妙梅竹。間自寫容，數筆立就，時言休咎，驚動輿俗。姓名達於九重，天子賜以養素之褒，笑而不受。始蓬頭跣足，闢穀斷葷，晚而章甫縫掖，日益放曠，厭世而思遠游。其存亡，殆莫得而曉也。

鶴林山 有鶴林院，唐開元僧悟皈置。院之前崗，峭拔獨立，古號華表，故以「鶴林」名院。

鼎峰山 界永福、長樂、三縣並見。梅溪環流其下，有巖曰雙巖，下有龍潛焉。宋邑人林正卿構龍門庵於山陽。黃幹記：山折二支，東西迭迎而相面，俯而相就，卒而交互以入於海。溪之水，沿山而流，若往而俯，若抵而觸，若渟而溜，莫知其所自出。如是者十餘里，然後聳爲雙巖，瀉爲三灘。崖束灘駛，峯嶺澎湃，露怪呈奇，不可名狀。

檀峰 北通尤溪，有巨檀焉。

烏石巖 在縣西南。巖勢長峻，登其巔，衆山在目。

龍都峰白巖 高數百丈，世傳爲趙真君壇。雙峰對峙，宛若洞門。巖下有石榻、棋局，時聞仙樂縹緲聲。

龍爪石 石勢穹然，下有澄潭，紫雲時見。相傳昔嘗禱雨於此，有龍懸一爪於石，大雨隨至，乃立祠祀之。今爪痕猶存。

川

梅溪 源出永福縣境。由縣西五里入江，江水濁而溪水清，縣所以名閩清。其地多梅，故以名溪。上有昭顯廟，神姓陳，事王審知，有功於閩，民爲立廟。宋天聖間淫雨爲沴，民居高陵皆墊溺，廟在其下，獨不爲害。

演水溪 源出尤溪，流入梅溪。溪中有仙人坐化石，舊傳張聖君卒其上。石傍有穴最深，曰九龍潭。歲旱禱雨多應。潭中游魚群聚，雖洪潦漲溢不散。

瞿曇溪 源出永福縣，流入梅溪。溪傍有佛跡石。

洛洋溪 溪崖磐石之上，有仙人跡，傍有石曰。

鍾湖 相傳湖中有鍾，故名。

湯頭泉 湯下泉

古井 宋祥符間鑿，其泉來自臺山之下，清冽甘美。

陂十有一。其著者曰賢良，邑人陳暘拜石得泉，有灌溉之利，後應賢良舉人，以名陂。

長樂縣 在郡東南。東抵海澳，西抵閩縣，南抵福清，北抵連江。本隋閩縣地，唐武德六年析置新寧縣，尋改爲長樂。元和初省入福唐，尋復置。五代時，閩改安昌縣，後復爲長樂。宋、元仍舊。皇朝因之，其鄉分四鄉，統二隅、二里，(一)二十四都，(二)爲圖百有九。

善政鄉

東、西隅，圖六。宋賓賢里，以孝子鄭吳名。山曰南山，首石。峰曰松石。石曰石屏。江曰馬頭。泉曰義泉。

九都，圖五。宋逍遙、進賢二里。嶺曰黃彈。湖曰桃枝。溪曰沙坂、後洋。

十都，圖四。宋清平、崇德二里。山曰龍泉。石曰仙人梯。溪曰龍泉。溝曰福田。泉曰五峰、龍泉。

十一都，圖五。宋廉風、建興二里。山曰越王、董奉。湖曰橫嶼、上沙。

十二都，圖四。宋敦素、崇賢二里。山曰龜山。澗曰蘇老。

十三都，圖五。宋仁義、招賢、永勝三里。山曰鐘峰、芝山、柯林、鴈峰。嶺曰鶴嶺。岬曰石岬。溪曰稜溪、黃弄、竹林。泉曰瀑

布。湖曰麻湖。

二難鄉宋祥符初，以里人潘循、潘衡兄弟同榜，故名。

二都，圖四。宋崇丘里。山曰洋門、大邊。湖曰延祥。

三都，圖二。宋信德里。山曰登龍、龍門。

四都，圖三。宋嵩平里。溪曰中溪。

五都，圖二。宋泉元里。山曰溪湄。嶺曰石尤。

六都，圖二。宋昆由里。山曰阮山。嶺曰百石。溪曰星溪。潭曰黃龍。

七都，圖五。宋昆由里。山曰鼎峰。

八都，圖二。宋同榮、依樹、寧石三里。溪曰太溪、坵溪、三溪。潭曰破石、搏紗。

昌化鄉

十四都，圖九。宋絃歌里。山曰鴻山。嶺曰繁嶺。岬曰演嶼。石曰石梁、雙髻。湖曰鄭湖。

十五都，圖四。宋慈歌里。山曰郎官。峰曰龍角。

十六都，圖三。宋和風里。山曰藍田。巖曰西石。石曰雙髻。

十七都，圖七。宋崇仁里。山曰冠峰、仙山、五雲、聖娘、魁山。嶺曰榕嶺。峰曰龍翔。湖曰林婆。

十八都，圖二。宋海賓、崇仁二里。石曰東石。

十九都，圖二。宋良田里。山曰靈峰。湖曰長林、金膝。溪曰大溪。

二十都，圖四。宋千零里。山曰衛國、鐘門。溪曰社溪、龍下。湖曰龜湖。

芳桂鄉唐林慎思登第，故名。

二十一都，圖六。今從北里，宋爲敦化。山曰壽峰、響石、鵲山。洞曰宏源。江曰广石。溪曰太倉。（四）

方安里，圖三。石曰閩王禁石。

大宏里，圖八。

二十三都，圖七。宋方樂里。洞曰桃花。

二十四都，圖五。宋新開里。山曰棋山。江曰梅江，湖曰填沙。

東濱大海，西接瀛州，首石峙北，長江經南。六平削玉，十洋成市。紫微、文筆，立其左右；龜麟、太常，揖其前後。馬江瀉空，鶴嶺決雲。其形勝也。

山

南山 山勢迴環，有巨石如龜載物，俯伏其巔。又名登高山。以邑人重九登高於此。宋孝子鄒異者，廬墓山下六年，有甘露、芝草之瑞。元祐間，舉經明行修，有司改其里曰寶賢，坊曰文行。其南有五峰

並峙，曰五馬山。三峰並峙，曰三峰山。

首石山 山巔有石，高二十餘丈，廣數十步，中有泉穴，四面窺之，皆見水，又云四水石山。山有時鳴，古讖云：「首石山鳴出大魁，十洋成市狀元來。」皇朝永樂十年，是山適鳴，會三寶太監鄭和下海通西洋，駐軍十洋街，是科，邑人馬鐸應之。戊戌又鳴，邑人李騏應之。

龍泉山 在縣東南。中有五峰，曰卧牛，曰仙冠，曰品石，曰梯雲，曰蓮花。仙冠麓有巨石，朱文公勸曰朝陽。有唐時龍泉寺。初邑人王氏子，少時事龍泉禪師，師令浣布，見青、黃二龍戲井中，翫之遲歸。師詰之，遂以鉢探二龍獻師，師以爲神，薙髮住洪州百丈山，稱百丈大智禪師。南連福湖山，其峰曰獅子石，曰梯雲。其傍山曰石馬，曰桃坑。宋人鄭申之結樓梯雲之下，文公名樓曰聚遠。

越王山 高一里，周圍三十一里。越王勾踐七世孫無疆與楚戰，不利，子弟或爲王，或爲君，散居南海上，此其一也。其傍曰靈山，有嶺曰古爛。

董奉山 漢時董奉煉丹於此。中有董巖，又曰董平山，又曰董峰山，又名福山。郡國志云：「上有神人，披髮裸身，見者必福。」奉，見侯官縣怡山。

溪湄山 在縣之羅山。有寶山、雲石、澗泉、龍潭津、南陽耕諸勝。山頂有湖，廣五畝，相傳有巨蚌，剖之得珠，是名珠湖。

龜山 山有白龍巖、石人峰、獅子石。山下有白雲溪。山中有竹林寺，唐大中中，戶曹林勣觀捨宅爲之。勣觀故居龜山下，種竹十畝。大曆二年，有釋江照游衡山雲峰寺堂，食頃，鉢中忽現五色雲，雲中有寺，寺有金榜，題曰大聖竹林寺，於是勣觀以其所居有竹林遂捨焉。有白蓮、慈氏、上方、鄰溪、華巖、慈

雲、普雲、地藏、龍溪、瑞應、觀音、文殊、普賢、天冠、白龍、龍丘、釋迦、白雲、寶積、靈源、泗洲、歸雲、延壽、香巖、彌勒、凌雲、龜石、廣平、彌陀、積翠、藏院、懺堂、乾懿、功德堂、育王塔、羅漢院，凡三十六庵。至宋併爲禪寺。寺有藏經五百餘函。其一乃乾德中，巨螺乘之浮海，得而發之，《妙蓮經》也。

鱸峰山 形若香爐，一名爐煙山。

芝山 一曰大山。間有二潭，山陽曰白龍，山陰曰祥雲。昔人見二龍起演江，白者歸山陽，黑者歸山陰。又常於潭側獲卵殼，斗大，五色玄黃。舊碑記：王想之以瑞芝見其宅，捨而爲寺。寺內石屏，宋慶曆中，監司蘇、邵二公刻「去華才翁」四字。

柯林山 宋鄭洙居其下。洙以《三禮》出身，因名其鄉曰喬柯，故山曰柯林。其峰曰龜峰，曰紫微峰，色奇秀，下多居人。又一峰對峙，曰翠微。

鴈峰山 臨嚴公湖之上，而宛在水中央。其小阜曰蟹山、湖傍山。有勝跡六，曰六奇。有潭曰石鼓，鹹潮不入，邑人陳鉅詩：「平地三峰起，凌虛一氣齊。雲間星斗近，島外海天低。」嚴公湖者，西湖也。宋《三山志》：陳大建元年，長樂嚴光之子恭，客於維揚，舟次江潞，市龜五十，放之。光家居，一日，見披黑衣者五十人，送緡錢五千，曰：「君子維揚所附。」及恭歸，問之無有，乃悟市龜之故。光遂捨宅爲寺，鰲田爲湖。鄉人名寺曰嚴寺，湖曰嚴湖矣。

洋門山 皇朝成化十八年，大雨崩渤，壓居民數十口。

大邊山 一作岱邊，上有巨石十餘丈，有泉清冽，旱禱輒應。又有石如鱗，曰鱗石。

登龍山

龍門山 一名翁山，一名半占山。

阮山 爰有平楚，廣十餘里，名曰古縣。

鼎峰山 界永福、閩清、三縣並見。

鴻山

郎官山 山極高峻，達於石允嶺，以通福清。傍諸山曰七巖，曰溪湄。溪湄有十勝：曰幞頭石，曰筆架山，曰寶山雲，曰珠湖月，曰文筆峰，曰石澗泉，曰龍津釣，曰馬嶺樵，曰南隅耕，曰西崙牧。珠湖月在山絕頂，廣袤五畝餘，有人得蚌，剖之得珠。又有瓢窟、天馬、白巖、石牛諸山。

藍田山

冠峰山 山中有石，如進賢冠也。

仙山 有萬壽道院。院西有七星井，其一井，宋鄭尚書丙書「龍泉」二字刻石。

五雲山 唐僧道深過此，五雲覆之。

聖娘山 中有天妃宮。林婆湖在其下。林婆，唐林鸚妻。鸚，字祥鳳，開元中，爲倉曹參軍。大曆中，因南郊沙合，捐田築濱澗湖二十餘里，可溉千頃，澤四里。樹碣湖旁曰：「湖水不竭，由縣官明。」而妻趙氏亦捨畝田爲湖，人稱林婆湖也。皇朝隆慶間，令蔣以忠復濱澗湖傍之壤利爲田者，壞之，凡百五十丈。

魁山 以其爲衆山之魁。有植柱廟，唐開元中，神降察山之陰，乘大木泝湍流而上，有漁人負木趨下流，少選復上，如是者三，心異之，取置石室下，神奉之，遠望若植柱然。里有洪氏女，浣紗廟旁，忽一物浮

水若銀扃，褰裳探之，隨水而沒。其家訴神，忽雷雨暴作，死蛟上浮。割蛟腹，得女。洪氏感涕，虛所居，刻柱爲神像，塑女配焉。宋景祐中，縣尉王者，以禱雨獲應，唱里人立廟。紹興間，海寇朱聰迫境，見神兵如雲，遂不敢前。連歲旱澇，應禱，部使上功，詔賜廟額曰顯應。至嘉定中，累封顯應、淵肅、孚濟、廣佑之神。真文忠爲碑文，其辭曰：「魁山兮崇崇，齋淪亡極兮，魚之宮。皇皇后帝兮，瞻南土，俾神宅茲兮，衆爾主。噓吸雨暘兮，指嘯風雨。盪滌乖沴兮，攘除妖蠱。有蛟婪婪兮，血人以白飽。是震是悼兮，奮厥天討。有兇額額兮，猶蜂之群。恍瞻靈旗兮，悸若獸奔。民恃神兮，我父母。神不言兮，信寒暑。明明我后兮，子萬方。曰民爾恩兮，我豈忘。既賁之以鴻名兮，又申之以顯號。中興百年兮，三焜煌其紫誥。民事神兮，何窮。神報上兮，焉從。異材出兮，棟王國。氓安居兮，稼滋植。公衮兮，王圭，將便藩兮，神錫。」

靈峰山 在縣東南五十里。而遙山多靈勝。有魯公巖、香爐峰、獅子石、歸雲洞、半月池、品字池、佛祖巖、羅漢臺。其麓曰龍龕，里人常見龍乘雲焉。一口天池山，上有石池。其西曰鳳凰山，形如鳳凰。

衛國山 形有捍禦之勢，故名。一名御國，俗呼魚骨。貢夷望此，以識海道。

鍾門山 山隔大海，相傳有僧自廣南載鍾，經此而沒，潮退時有見之者。

籌峰山 一名龍峰，一作籌巖。有唐林慎思讀書石室。朱晦翁題之曰：「德成以慎思，德成於此也。」山中巖爲宋劉砥、劉礪讀書之所。晦翁南游，一劉從學，留斯巖最久。巖奇峭幽絕，逶迤而上，可數百武，有石對峙如削，爲石門。晦翁手題「讀書處」鐫於石門之上。有祠祀晦翁，以一劉配。其巔有海天月亭。皇朝中，璫鄭和嘗加葺治，人名之曰三寶巖，以和奉使人海，人稱三寶太監也。隆慶間，令蔣以忠易之曰晦翁巖。

響石山 人行其上，鏗然響也。

鸛山 山多鸛鶴。石竄有水，鴉浴其中，又名鴉池。又有一石，擊之如磬，名響石。有觀稼亭。皇朝弘治己酉，令潘府出舍省農，訝山以鸛名未見有也，倏忽有鸛數十盤飛至。府登山晝，觀稼「二字於石壁，仰天祝曰：『今茲山游，觀我穡事，雨順風調，謂之福官；救災卹荒，謂之能官。今願爲福，不願能矣。』」是邑前苦旱癘，至是越壬子冬，凡數載，年穀大登，疫癘亦免。耆宿請府建亭，名以瑞鸛。府曰：「鸛偶然耳，有觀稼在，其以名亭。」

名山 邑主山也。上有禱雨祠壇。

周山

棋山 頂有石臺，有仙弈之跡。至今臺傍，荆棘不生。

太常山 卽大斛山。左按籌巖，右連石首，其高若爲群山所尊者，故曰太常。太常之陽，有嶺曰從龍，曰風門。風籟不絕。其陰有嶺曰浮崎，曰提麻，曰潭，曰碧，曰香爐。浮崎北界於閩縣。

鼇頭山 縣案山也。

四明山 高列四峰，中有古壇。生釣竹，有井泉甘甚。

石臺山 與四明山連。宋紹興間，白晝雲雨晦冥，有龍爪樹飛出，因名龍臺。其峰曰松石。下有天王寺，唐大中七年建。先是有檀木溯江而上，牧僮取之，中夜發光，里人林致夢木自云：「我乃北方毗沙門天王。」致雕爲像，捨宅爲寺。

斜頭山 鼓角山 嵐乾山 金鷄山 龜息山

六平山 蜿蜒六曲。宋淳祐中，里人陳合建亭其下。上有巨石嶄立，中有小石洞門可通往來，壁上勒「第一山小有天」，字蹟頗奇。宋寶慶中，太傅陳俞居其下，復名太傅山。皇朝高棟詩：「六平崢嶸何壯哉，六平芙蓉如掌開。九華五老讓光彩，三峰二室爭崔嵬。」

戲崎山

牛壠山 巍然丘阜，四而環之。中有田，可百餘畝。又南曰嵩山，曰三山。有嶺曰瀉水峰，曰鵝眉。

柏山 山多柏木。唐末有當陽寺，寺有二堂，曰山月、雷音。

蛤山 在董峰西。山總一石，下多居民。傍有嶼，曰赤、曰蛤。

福州裡山 紗帽山

定山 中有峰曰龜峰巖，曰清公巖，僧智清寓此。

屏山 在縣東南四十里。有五鯉石。其麓曰豸山。有石門可憩百人。下有石如船。迤西爲蓮花山，疊石若菡萏。

翁山 左右有龍門，二井：一方、一圓。

壺井山 井在山陲，其狀如壺，潮至則沒，潮退其水復淡。

利充山 山有高麗王祖墓。王名宜星，其父元末任宜州判官。生時星墜庭中，因以爲名。父卒，高麗王入貢，見而器之，遂從王歸。王後無子，因以爲嗣，乃襲王矣。按高麗王父在元末，王人貢當在皇朝。高麗國朝貢，其王皆易名，與國中本名異，亦不知宜星國史所載是何王也。又高麗道人遼海，不應出閩，抑從日本來耶？

平地山 《菽園雜記》：「成化十三年，福建長樂縣，平地起一山，山旁一池，忽生大蜆，其味甚美，民爭取食，不數日死者千餘人。」

松石峰 唐末有天王寺，中有枕流軒、望江亭、樂壽堂。皇朝萬曆中，僧重建經堂。

龍翔峰 有豹變巖與此峰對峙。

金峰 雙髻峰 鼇頂峰 龍角峰

冠嶼峰 突起田中，巍然高數丈。

瑞峰 中有石曰釣鼇。亭曰垂露，宋慶曆中，觀察使蘇舜元勒字於石，字作垂露體，故以名亭。

黃彈嶺 鶴嶺 石尤嶺

鰲嶺 有宋林岳書「鰲嶺」二字。

榕嶺 一名沙嶺。宋時有夾道之榕。

登賢嶺 卓嶺 孝義嶺 潭頭嶺

吳宰嶺 宋知縣吳節家其下。

稠巖 峰巒稠疊，林慎思月樓在焉。

宏源洞 桃花洞 歸愚洞

演嶼

石罅 百石堰

石屏 在觀音寺後。

仙人梯石 有麻姑井、石船。踏之則動。

石梁

雙髻石 以形名。十六都、十四、五都，皆有之。

東石

閩王禁石 石在海際，周圍十餘丈。產紫菜，饒纖甘美，王審知時禁私採以自奉。今广石澳是。中丞石 上刻「中丞」二字，唐潘獨坐南歸憇此，里人銘之。

川水利附

馬頭江 吳王造戰艦處也。名吳艦頭。因名縣吳航。漢吳王濞反，獨東甌王搖從之，故濞於此造艦。皇朝太監鄭和泊舟焉，改爲太平港。十洋市在港東。

广石江 江民業漁。宋陸秀夫、張世傑奉二王從此入閩安鎮。

梅江 古云：「梅江水，直千金。」

壺井江 江有王母礁。宋末楊妃負益王、福王航海經此。

沙坂後洋溪 龍泉溪 穫洋王背大溪 黃弄溪 竹林溪 中溪

星溪 卽獵溪。

坵溪 三溪 大溪 社溪 龍下溪 大畚溪 宏源溪 觀音溪 資聖溪 鐵爐溪 九溪 稠庵溪

倒流溪

蘇老澗 蘇舜元經此，臨流樂之，後因名。

福田溝 皇朝里人李長係所鑿，人利灌溉，名曰福田。長孫字原善，時時出金爲鄉人助葬。

桃枝湖 橫嶼湖 上沙湖 延祥湖 鄭湖 長林湖

金膝湖 皇朝嘉靖三十六年，湖上產異種嘉禾二畝許，即秀且實，里人瑞之。

龜湖

嚴湖 皇朝正統十年，縣民劉彥梁言：「本縣嚴湖周圍餘二十里，南接稠庵溪，西通倒流溪。旱則引稠庵溪入湖溉田；雨則疏倒流溪以防其漲。近者湖岸坍塌，溪流湮塞，不能積水防旱，雨至，田或淹沒。又有張塘、涵塘、前涵、大塘涵、陳塘港，其利弊亦如嚴湖，乞勅有司修築疏濬，實爲民便。」下工部，移縣覈之。本縣報稱：「民情所願，雖勞不怨。」貼圖刻期以聞，朝旨從之。

填沙湖

黃龍潭 相傳嘗有巫者之妻，溫麻潭側，見黃龍首藉其上，以告縣官，禱雨輒應。郡志作黃新潭。

破石潭 嘗有女汲潭，蛟吞之，忽雷擊石破，蛟死而女屍見。

搏紗潭 有人測之，搏紗不至其底，故名。

義泉 宋縣令袁正規所鑿。

五峰龍泉 相傳唐大中間，有二龍戲井，亦名龍井。

瀑布泉 一在光嚴寺北二里許，一在龜山竹林寺溪會亭之上。

連江縣 在郡東北，東抵海，西抵懷安，南抵閩縣，北抵羅源。晉以溫麻船屯，置溫麻縣，屬晉安郡。

隋省入閩縣。唐武德六年，復閩縣，置溫麻縣。其年改名連江。宋、元仍舊。皇朝因之，分七鄉、四十二圖。(五)

西寧善鄉

欽平上里，圖五。嶺曰白塔、矮嶺。礁曰胡蝶案。江曰鰲江。

東寧善鄉

欽平下里，圖五。山曰龍湫、湖山、西山。巖曰烏石。洲曰浮洲。

永福鄉

嘉賢下里，圖一。舊屬名閩鄉。溪曰財溪。

二十六都，圖一。宋崇德里，隸寧善鄉。山曰上竿塘、下竿塘。潭曰松阜。

二十七都，圖二。宋崇德里，隸寧善鄉。山曰馬鞍、鰲鼻。石曰小華峰、刻石。

二十八都，圖一。宋崇德里，隸寧善鄉。山曰三德。

二十九都，圖一。宋崇德里，隸寧善鄉。嶺曰關山。

南永福鄉

新安里，圖二。山曰覆釜、兩泉、五馬、荻蘆、文筆。溪曰利坑、竹溪。泉曰解醞。

安慶里，圖二。山曰王孫、定崎、(六)福斗。

永貴里，圖三。山曰雲居、東岱。江曰蟾步。

五賢鄉

安德里，圖一。山曰玉樓、龜魚。

保安里，圖二。山曰香爐、馬鼻、鳳凰。

建興里，圖二。

集政上里，圖一。潭曰鉢盂。

集政下里，圖三。宋集政、招賢上下里。

太平鄉

光臨里，圖一。宋光化、臨江二里。山曰張旗、玉泉。巖口洞口。石曰月石。泉曰溫泉。

清河里，圖一。山口濂湖。嶺曰白蓮、俞裴。巖曰寶華。溪曰局溪。泉曰祠山。

安仁上中里，圖一。山口白巖。石曰香庵。

北名聞鄉

嘉賢上里，圖一。

賢義里，圖一。宋進賢里。嶺口三望。潭曰洋門。

中鵠里，圖一。舊名通化。唐張瑩詩：「一箭不中鵠，五湖歸釣魚。」宋因更名。峰口降虎。巖曰紫巖。泉曰虎跑。

仁賢里，圖一。宋敦賢里。山曰東坂。

安定里，圖一。山口羅漢。潭曰赤坑。

三台外輔，五馬內朝，蝶案沈水，筆峰聳天。其形勝也。

山

龍漈山 縣主山也。崗巒如龍，漈水夾溪而下，有潭曰五峰。《丹陽驛道記》：武陵溪徑龍漈潭，昔有龍孕其間，樵採不人者有年。乾寧中，僧宗珣結茅於上，衆異之，始創屋宇。表聞，賜額曰龍漈報恩院。

湖山 去縣八里。舊稱湖山。古道場。唐景福中，王氏入閩，淮民隨之，有桴浮、香爐及書硯漂於岸側，其人異之，曰：「吾州杜三郎故物也。」因創祠祀之。其麓有筠溪、釣臺，故宋李彌遜以筠溪爲號。

西山 宋李彌遜隱處也。按彌遜本連江人，其祖餘慶，遷居吳縣。彌遜知漳州，還連江，遂隱於此。

上竿塘山 峰巒屈曲，有竹簾、湖尾等六澳。

下竿塘山 有白沙、鏡膝等七澳。是山與上竿塘，並峙大海中。上並有民居，洪武二十年內徙。

馬鞍山 鰲鼻山

三德山 三峰列峙海門，舊名三台，又名筆架。

覆釜山 在縣東南。中有巨石如覆釜。^(七)其峰曰南乾，有仙人棋磐石，並足跡。曰北乾，有巨石，不着苔蘚，形如紗帽。曰矩庾。相傳矩、庾二仙居之。曰金鰲，形如巨鰲。南乾之麓，有石雙峙，道出其中，曰石門。有寺，巨石相倚，其中深邃，曰玉華洞。又有玉人峰，亭亭如玉立。有石鼓，其圓如鼓，擊之有聲。有半月池，形如上弦之月。有清陰洞，巨石合峙，其下平廣，可坐數十人，其上佳木陰翳。有鬪牛石，兩石如牛鬪然。有召魚澗，澗旁有石如魚。有五臺石，五石高平如臺。山右有潭，名覆釜潭。山前有大坪山，山頂坦夷如平地。傍又有山，曰金鷄嶼、曰梅嶼。嶺曰連江、曰東峰。峰曰兌峰。兌峰之下，五代時，有建安人蕭孔冲者居之。孔冲，唐莊宗時中甲科，不樂仕進，人兌峰削髮爲僧，志行堅苦，能伏虎豹，既沒，連江人祀之。宋靖康初，建寇葉儂逼境，遙望高崙，牙旗耀火，鼓角喧闐，賊遂遁去。避寇者，咸見

107-138原书缺页

尺有五寸，橫入，深不可測。

小練山 山周十里。五代間，時有盧皓、林甲避地而釣，愛其山川，誅茅焉。至宋，一族繁盛，立義齋以教子弟，傍嶼皆挾冊往還。淳熙後，登第者相踵，而林氏爲盛，若林適子孫皆是也。人號小瀛州。國初內徙。

龍山 又名瑞峰。有寺。海口、鎮東二城在焉。巔有石塔，可觀海日。西麓有紅蓮樓、疎野堂，宋里人章氏所建。下有粃妝潭。南麓有林光朝草堂。

拱辰山 山有三峰，其勢北拱，形如牛角，俗號牛角山。下有石洞，風芄芄出，深窅難入。傍有石如鼓，方廣丈餘，易搖難撼。又有仙人跡、煉丹竈、石盆。

龍卧山 中有五馬石及龍潭。宋乾道九年，令劉敦禧雨有感，立龍堂焉。

聞讀山 舊名小隱巖。唐陳燦讀書巖中。燦後爲水部，人改口聞讀。上有遏雲碣、潛公室、講經臺、獅子跡。西有金鰲山。

靈巖山 有觀經臺、禮斗壇、龍湫諸勝。

福廬山 故名郭廬山。郭姓者居其下。皇朝邑人大學士葉向高，更之曰福廬。以全省與郡邑皆名福，而茲山從焉。亦以廣洞天福地所未備也。山後有靈巖，奇勝差埒。向高《紀游詩序》曰：「靈巖、福廬二山，並吾邑絕勝。迴環數十里，奇石林立，皆玲瓏嵌空，自下而上，如累丸。爲洞、爲巖，不可枚舉。山下三天門，儼然天造，見者駭心。而自開闢以來，未有至者。惟郭建初先生常爲余言：『吾邑人知有瑞巖，不知靈巖、郭廬之勝，吞瑞巖者八九。余聞而慕之，亦未暇游也。頃歲，何進士玉成，與其宗人東巖輩，芟

關葺治，奇勝始顯。而余適謝事歸來，得留覽於茲，山靈若有閔以待者。今歲孟夏，復同董大理應舉來游，大理驚詫，以爲在武夷之上。山下有牛田場，皇朝戚繼光大破倭於此。又三十里，爲化南、化北二里，隋時掠琉球五千戶居此。化里，則皇朝大學士葉向高之鄉。

大讓山

萬石山 水曰宏溪。峰曰翔鳳。洞曰石賓，曰佳塘。巖曰靈棲，曰宜遠。莊曰花林，曰茶園。皇朝萬安所人歐應昌居焉。葉向高爲序之：「吾邑多佳山水，而少好事之人，遂令靈境奧區，沈沒不耀。如黃蘗之幽深，峰高萬仞，水自絕頂而下，匯爲九潭。珠簾瀑布，可伯仲九鯉，而人跡罕至。近以御賜藏經，余爲建閣、創寺，始有游人。石竹之青葱插天，古樹蒼藤，如龍蟠電掣，峭壁高崖，駭人心目。而王敬美草草着屐，遂謂無奇。頃石孝廉爲之探搜抉剔，紆途以就景，諸勝畢出。董大理一登，大叫以爲奇絕，嗤敬美之失言。靈巖、福廬，迴環數十里，盡皆怪石，巖洞連屬，儼若仙都，而邑人不知有此山。比余歸田，與其里人來游，漸次開闢。於是四方之人，扶筇載酒，肩摩踵接。甚至販夫、牧豎，亦徘徊瞻眺而不忍去。然則宇內之山川，其多奇而久晦，未有如吾邑者也。乃歐世叔復言：萬石山之奇，不下福廬，且有加焉。洞之廣者，可容萬人。其千人、百人者，不可以數計。石之峻峭而插空者，森列如簇。水之縈紆而繚繞爲溪、爲澗者，清泚潺湲，不可名狀。而以僻在海上，無人齒及，獨世叔與其友人商元勳留連眺覽，作爲詩歌，以發舒其湮鬱。余取而讀之，大用驚駭，不意黃蘗、石竹、福廬之外，乃更有此山。吾邑大如葫蘆，而所貯瑰瓌，弘麗之觀，無盡若此。造物信靈巧，然閱之數萬年，至今始出，一何靳也。彼世所稱名山，以石勝者如天竺、飛來、天平、虎丘、棲霞、燕磯之類，尚不能當茲山之一卷，而久擅虛名，何哉？西域賈胡，

與人鬪寶，每先出其中下者，至於焦僥之羽，瓊藥之精，昭華、延喜之璧，一出而萬夫辟易，則必舒徐而後陳，造物之安排丘壑，得無類此？嗟夫！使吾邑而蚤有世叔其人，則茲山不寂寂寥寥至今矣。」

金山 有東金寺。寺有四佛真身。

何山

白嶼山 亦名陳田山。山絕頂有鴻休巖，昔有僧鴻休棲此。巖竇天成，下瞰滄溟，四望無極。巖西有鳥窠巖，累石爲之。初鳥窠游杭，巢木杪而居。白居易爲守，往訪之，曰：「得無危乎？」答曰：「如公所處則危甚。」詰之曰：「薪火不停，性識交攻，安得不危？」白以詩贈之，後居此，故以名巖。

玉融山 縣前山也。以山有石，瑩然如玉名。左有雙旌，以其兩峰峭立若旌。右有五馬，以五峰騰踴，有五驂之象。其麓曰覆釜。宋令郎簡，訪洞然師，寢於延慶寺，夢神僧授梵書，題云《玉融峰志》，有「孤峰萬仞，形勢奇絕」之句。

雙髻山 頂有仙壇天成，高二丈餘，四面如截肪，上平如削，有自然石爲級道。宋乾道初，雷劈爲二，傍有石曰石鑼。有峰曰靈峰、雲峰、鷓鴣峰。靈峰上有仙壇，前有不溢泉。雲峰，峰絕頂爲白澤巖，有大石，巍然不覆，中有石門，大可容數十人。鷓鴣峰，以峰陰多鷓鴣。山西有瀑布，高數千尺，下瀦爲三潭，清澈可鑑。

草堂山 嘗有隱者築草堂於此。傍有小瀑布。壇高數十丈。

余坑山 在海濱塘嶼之上。下有昭靈廟。古老相傳，漢趙昇師事張道陵，隱居鳴鶴山下，嘗乘鐵舸抵浮山，捨舟而陸，憩於磐石，陟而北，留巨跡、鹿蹤於蒼石之上。天禧元年，邑人高贊，率衆立廟曰昭

靈。其後，朝命累加「昭靈妙應普祐」六字。今海旁古舟痕尚存，石上巨跡尺二寸許。宋許難詩：「玉鹿帶符來月苑，鐵船擁旆下星河。」莫儔詩：「群山帶雨陰雲重，滄海連天水氣昏。遙想真人乘鐵舸，往來三島鬼神奔。」又廟前有釀酒風、廬焦石。釀酒風者，歲六月，社民集祠其下，時歛熱，酒善酸敗，輒旬日，北風以待之，號張公釀酒風。廬焦石，高數丈，海濤漱激，爲龜巖玲瓏之狀，或採爲池亭，玩必致譴怪。

小孤山 有林寒齋祠。寒齋，高士也，林通之孫，林同之父。

靈石山 山形九疊。東有石，凡遇久晴不雨，如震吼，不過七日，必應。又有香石，手摩有香氣，故以靈名。中有十勝：口九疊峰，曰通天石，曰報雨峰，口仙人巖，口仙人碑，曰偃松亭，曰竹簾軒，曰留雲峰，曰碧仙洞，曰戲龍瀑。唐武宗時，僧元修庵此，誦七俱胝呪，治疾祟。元結贈之詩：「萬計千謀總不真，虛將文字役心神。俱胝只念三行呪，自得名超一世人。」後深入巖谷中，人謂遁去矣。有蔬甲泛流而下，乃沿源訪得之。再往，則廬已虛。宣宗時，出詣闕貢金，始買山創精舍，名翠石院。至是，賜額曰「靈石俱胝院」，院今爲寺。中有蒼霞亭、蟠桃塢石刻，並朱文公書。宋許難記略：「自香城北沿嶺十里，西渡小橋，入長道，又西入蟠桃塢十步，有石屏，因爲樹。樹之西，有漱玉亭。次有溪光、素波二臺。數十步有松偃蓋，西有散花堂，又西有放鶴、待月二樓，高視亭，白蓮社。乃至塔院中，有胡僧像。僧自西域來，有神術，至今鳥雀不栖。九疊峰，宋林搏隱焉。搏，字圖南，舉八行，入太學。政和中授楚州參軍，不赴，隱九疊峰下。天性豪逸，好鼓琴。有皇甫道士善琴，慾從之學，道士不應。一日聞道士死，曰：「此音絕矣。」涕泣不食，不遠千里返吊之，造門而慟，乃道士實在，聞哭聲，感其意，出授以琴法。搏既得道士法，有以琴請者，即携琴出戶，遇可意，爲一鼓。徽宗聞搏名，召入鼓者三。搏爲鼓《悲風》之操，徽宗不樂。罷後，改爲

《碎玉》。皇朝郭萬程曰：「宋徽機巧，多技藝，修禮樂，爲彌文，窮極淫樂。佳兵樂禍，天變民怨，圖南爲鼓《悲風》，意深遠矣。」

歛石山 下有歛石潭。潭有三，相去可二里許。

金翅山 在鷲峰北。廬山寺枕其前。唐大中初，有僧惠澄，善望氣，往來此間，乞廬氏居宅爲之，故號廬山。皇朝郭造卿曰：「當其止邑阜，而衆山翠然以奔，有高出玉屏、鷲峰間者，乃取名金翅，謂其鳥能止龍見，《禪經》語也。登是遐矚，則諸山龍截然止矣。」

黃蘗山 以山多產黃蘗名。有黃蘗寺。唐貞元五年，沙門正幹從六祖學，既得其旨，乃辭去。祖送之曰：「把苦卽止。」幹抵此，乃安之，遂創院，名般若臺。八年，於其東大闢堂宇。德宗改爲建福禪寺。宋咸平初，降太宗御書，因閣法堂西以藏之。又宋有希運禪師，亦隱此。《五燈會元》：洪州黃蘗希運禪師，閩人也。幼於本州黃蘗山出家，額間隆起如珠，音辭朗潤，志意冲澹。後游天台，逢一僧與言笑如舊識。乃偕行，屬澗水暴漲，捐笠植杖而止。其僧率師同渡，師曰：「兄要渡自渡。」卽褰衣躡波，若履平地。回顧曰：「渡來，渡來！」師曰：「咄！此自了漢！吾早知，當斫汝脛。」其僧嘆曰：「大乘法器，我不及也。」言訖不見。師後游京師，因人啟發，往參百丈，有所答問，丈吟吟而笑。裴相國休鎮宛陵，建大禪苑，請師說法，以師酷愛舊山，還以黃蘗名之。爲師傳《心要》一卷。師法嗣十三人，裴休其一，其餘：鎮州臨濟義玄、杭州千頃楚南、福州烏石靈觀、杭州羅漢宗徹、魏府大覺、睦州龍興寺陳尊宿、揚州六合德元、襄州政土門讚、吳門□□宣、□□幽州趙、蘇州憲，凡十二人。自尊宿以上，機緣語，皆載《傳燈錄》。故是山，舊有十二祖師臺。師，大中年終本山，謚斷際禪師。寺人皇朝，久廢。一日異鳥鳴，主僧大休曰：

「功德主且至矣。」旦出山門待之。莆田周長者志，藜杖幅巾，入山門。休曰：「是也。」遂相與興復，所費不貲。皇朝嘉靖間，燬於火。僧正圓建小院於舊址，之後走京師，請藏經莫道地，淹留十五六年，卒死長安，人哀憐之。萬曆甲寅秋，神宗以聖母升遐，戀慕不忘，廣爲祈福，擇海內名山古剎六所，分置《藏經》，黃蘗在其中，命中官王舉齋送，給內府金錢爲路費，凡三百金，金賜勅俾住僧守護。（三寺後有龍井一，穴如盤，深不滿尺，清冽不竭。山有峰，曰佛座，曰香爐，曰吉祥，曰寶峰，曰鉢盂，曰報雨，曰寶月，曰羅漢，曰天樂，曰屏障，曰天柱，曰文筆。有龍潭，泉勢高鍵淙，崖石爲穴。下潭無底，中有福德龍，禱雨輒應。上絕險處，復有一潭，人跡罕至。龍嘗移，從下潭而上，所立有爪跡。有嵩頭陀巖，至今石猶有乳香出其間。梁江淹詩：「長望竟何極，閩雲連越邊。南州饒奇怪，赤縣多靈仙。金峰各虧日，銅石共臨天。陽岫照鸞采，陰溪噴龍泉。机殘千代木，厝岬萬古煙。禽鳴丹壁上，猿嘯青崖間。秦皇慕隱淪，漢武願長年。皆負雄豪威，棄官爲求仙。況我葵藿志，松木橫眼前。所若同遠好，臨風感悠然。」宋翁卷詩：「天下兩黃蘗，此中山是真。碑看前代刻，僧值故鄉人。一宿禪房雨，經時客路塵。將行更瞻禮，十二祖師身。」卷，永嘉人。詩言「僧值故鄉人」，謂天台僧也。

福勝山 翁陂山 田源山

石竹山 山形峭拔，有石巍然，上粘蛤蠣殼。其產少竹多筍，春夏之交，鄉人於此采筍，欲多則不可得，號濟貧筍。又有古藤，高數十丈，結藤子，堅若無患，然圓大如奕棋子，不知何名藤也。有紫雲洞、羅漢臺、普陀巖、靈寶觀、半山亭，及紫磨、獅子、象玉諸峰，何氏九仙所游也。有石曰天寶，無患溪之水出焉。又有靈寶觀，以祀林真君亥光。亥光於此山煉丹，丹成騎虎上昇。皇朝王世懋游記：「閩人祈夢，以

秋往九鯉湖，以春往石竹。石竹是九仙離宮，爲行春治所耶。皇朝邑人葉向高爲孝廉時，祈夢，夢人語之曰：「腰繫白玉帶」，後果驗。」又王世懋《游記》：「山多狙，公來與吏卒爭攫菓餅，今避人跡，絕矣。」

鍾山 金鰲山

回頭山 山下里人，一日樵薪，只供一里之用。夜夢人以聞帝，帝悉勦其鄉，山爲回頭，若兵禦之。天明，見石尖如鎗，一一北向。

海壇山 在縣東南大海中。其山如壇，又以其有嵐氣往來，名東嵐山。衡狹而從，百餘里，周可三日行。控環島七八百里，於岐海中最大。唐牧馬地，宋初置牧監。尋以駕驛罷。皇祐中，許漁民耕墾。淳熙中，有戶三千矣。元，戶滿四萬，陞州者，以海壇諸里佐之也。其山南曰黃崎，曰紫蘭，曰牧上，曰皆頭，曰沆頭，曰大小鰲，網爲三十六。派湖環繞如隄陀，其東高者曰軍山。王氏有閩，謫戍罪人於此。海壇人《舊事私記》曰：海壇山周圍八百里。分海上，海下四、五、六、七、四都。人戶計三千七百八萬四千餘口。秋鹽魚課等米，計二千餘石。巡河四塞煙墩二十四所。外隔小琉球，三晝夜內通海口，港一潮水。居民依山佃種，瀕海採捕。各村地名，百有餘處。房屋二千餘座，馬牛產畜無數。中有軍山，東北可望鼓、旗二山。西南靚漳梁等處。左有東嵐、瑞湖，中有一團平坡，積雨不溢，久旱不涸。春有靈芝草，夏有雙頭蓮，秋來蘋蓼吐，冬至石花鮮。右有顯跡，湖潭分出三十四凸，一十二凹。深處沙善没人，淺處長流，有龍窟焉，前元庚申，交馬產駒，以貢於朝。有葫蘆澳，其龜鼈高於人，魚鰲不可勝取。有碧沙洋，產人參。百花、砦、鐘門三鎮，街衢闐闐，景物繁華，而科第人材，鐘門爲盛，蓋海表名區也。皇朝洪武中，遣江夏侯視海防倭，侯以轉委福州右衛指揮李彝。彝索賄無厭，而有林揚者，素任俠，有氣。率里人逐彝。彝

怒，遂畫圖貼說本山，畫作微小孤嶼，外通琉球，一晝夜。內接鎮東城，三晝夜。巡司只畫一寨，煙墩悉行抹掄。太祖覽圖下旨，曰：「天下孤山，人民既不得他用，又被他作歹，盡行調過，連山附城居住，給官田與耕，官室與居。」於是，東南至福建、廣東，北直沽、澎湖三十六嶼，盡行調過。下令三日爲期，後者死。皆倉卒不得舟，編門戶床簀爲筏以渡。值暴風，十九覆沒。時海壇已墟，而田稅五千餘石，錢三十餘萬，及其他雜徭皆如故。諸徙者既失業，不任繇賦，鞭笞逮繫無虛日，多鬻子女，至有雉經者。有司不敢問，揚奮然曰：「傷我海頭，民不死海，且死賦。」乃詣闕上書具狀。有旨，逮繫葬，並繫揚。侯守臣還報，葬懼，投繯死。閩中守臣遷延不卽報，至宣德初，報上，詔釋揚，復下旨：「凡白孤山調移者，產業稅銀及遞年雜役，俱免一半。」於是廣、閩、浙、潮調移之人，皆頌揚德。揚子係科第，纍纍不絕云。今其地漸有居人耕墾。

水馬山 有石如舟帆，曰石帆。石上泉甚甘。

南交山 在大海中。

靈曜嶺

蒜嶺 山石間多產蒜苗，或曰山形如蒜瓣。南有漆林書堂，唐翁承贊、承裕，與其猶子襲明肄業之所。承贊卿命至閩，有與侍郎蕭頊，同尋舊書堂詩。又有畫錦亭。嶺西有石馬峰，刻「石馬泉」三字。按承贊，字文堯，父巨隅，榮王府諮議參軍。承贊，乾寧三年進士，擢宏詞科，任京兆府參軍。天祐元年，以右拾遺受詔，冊王審知爲瑯琊王，賜金紫，以行易其鄉名，里號，曰文秀、光賢、畫錦。黃滔贈以詩，有「建水閩山無故事，長卿嚴助是前身」之語。梁開平四年，復爲閩王冊禮副使，滔復贈詩曰：「衣錦還鄉翻是

客，迴車謁帝卻爲歸。」尋守右諫議大夫、福建鹽鐵副使，就加左散騎常侍、御史大夫。既依審知，審知待之殊厚，遂以爲相。承贊勸審知建四門學，以教門士之秀者。沒葬崇安之新豐鄉。今其地名大夫闕。子鑑、載、希、愈，宋時皆入仕。其從子乾度，仕左補闕。有子六人，處厚、處易、處朴、處廉、處恭、處休，相繼登宋建隆、開寶、雍熙進士第，時稱六桂。

常思嶺 界福清、閩縣間，故名相思嶺。亦見閩縣。皇朝王世懋《閩部疏》：「繇石竹山北至常思嶺三十餘里間，皆福清縣屬，特多崇岡壯岳，峰骨怒立，巒岫欲飛舞。」

傀儡嶺 下有應石，如傳聲之谷，在嶺北驛路傍。

石尤義泉嶺 上有孚應廟，其神姓陳，能禁虎爲暴。

螺嶺 半屬閩縣。已見閩縣。

五周巖 界閩縣。上有棋盤、仙跡，相傳有兄弟五人隱此，後俱得道上昇。

仙舉巖 山界永福。峭拔千仞，與靈石九疊峰對峙。有仙人隱此。其巔有石巍然，又一石穴，泉源不竭。傍有石如鼓，扣之即鳴。

七仙巖 相傳有七仙隱此，洞口雖狹，內通長樂縣界。

石靈巖 石人 石牛 石馬 石龜 石蛇

馬頭石 石如馬頭，旁有石如筍，遠望若馬繫其上。

南匿嶼 縣嶼稱里者三：海壇、江陰、南匿也。南匿嶼，上有廬市，所產鹽差淡，以滷魚勝他鹽，今內徙。

雙嶼 江陰嶼也。有壁頭巡檢司，以其二山突起海中，故名。中有古井，甘冽宜旱。有蔡道人巖，及百年洞祠。又呼仙嶼。今皆內徙矣。

塘嶼 是嶼與草嶼率近南匿。一曰大姨山。宋志：「嶼在昭靈廟下，光風霽月，窮目力而東，有碧拳然，乃琉球國也。每風暴作，釣船多爲所漂，一日夜至其界。其水東流不返，莎蔓錯織，不容轉舵。漂者必至而後已。其國人得之，以藤串其踵，令作山間。蓋其國剝木爲孟，乃能周旋莎蔓間。今海中大姨山，夜忌舉火，慮其國望之而至也。」今不然矣。

鐘山嶼 卽海壇中鐘門嶼也。或曰形如鐘，或云昔有鐘沒嶼傍，潮退，蒲牢猶隱隱可見。山四圍鹹漲，獨此岐之水，清淡可飲。近嶼石高二丈，如媼，名老媼石。石前有石天井，方廣二十丈，中有石眼，深與海通。

祭苗墩 王審知祈穀之所。

川

松林江

海口江 源出故興化縣界。流爲百丈溪，至金應舖，爲無患溪。東流二十里，合石埭溪，至水陸寺，合東溪，經縣之阿頭，瀦爲琵琶洋，十餘里入海。《夷堅志》：「海口林夫人廟，莫知何年所立，室宇不甚廣大，而靈異素著。賈客人海，必禱求陰護。有一賈至大洋，遇惡風，遙望百拜乞憐，有神現檣竿，遂以無事。里中商民吳，育山木甚多。一客指某處，欲市，吳許之，而需錢三千緡。客酬以三百，吳不應，客去。是夕大風雨至，忽吳氏啟居，有三百千錢，整疊於地，外人來報，昨客所議之本，已大半倒折，往視其現存

者，每皮皆上書「林夫人」三字。亟詣廟瞻謝，見群木有運致於廟壇者，遂舉此山之杉，悉以獻。仍挈原值，還主廟助營建之費。遠近來者紛集，廟宇殿堂宏偉，樓閣壯麗，甲於閩中。」

龍江 舊名騾文江，後改名龍江。上接龍首河源，下通東南渤澥橋，曰龍江。皇朝嘉靖中，倭蹂閩，大學士葉向高方襁褓，其母夫人舉家遠避。時夫人襁向高行，憊甚。忽有老人謂曰：「吾代若襁先趨，而待於龍江之橋。」母夫人不聽，其舅曰：「事近矣，且夫當此時也，而爲人襁兒，必長者也。」遂解與之。次日，至橋，則老人已先在，問姓名，卒不告，尋失之。

南匿江 距縣隔九海，凡二百九十里。其流自莆田縣來，東流入於海。

逕江 源有二：一出故興化縣界金支大澤，合漁溪。一出黃蘗山北，過鐵場邊，北流並漁溪，合逕港，南至縣亭，東抵烏嶼門，又南至雙嶼頭。岐而爲二：東出白嶼，西出後嶼，復合於昭靈廟前，會迎仙港入海。

海口寨江 距縣亦隔九海，凡百餘里。其源自長樂縣石尤嶺，分水而下，注於江，以達於海。

蘇溪 源出莆田縣界，西通橫山潭，入北溪。

盧溪 源出臺嶺，以其繞盧山，故名。

漁溪 上有昭應廟，祀虞雄，閩王牙將也，戰歿於此。

交溪 其源，一自常思嶺，一自清源里義窰而來，交流會此，入於西溪。

西溪

無患溪 卽宏路驛前大溪也。源出石竹山，入交溪。相傳林真人每以此水愈人病，故名。

迎仙港 源出故興化縣，合桃源之水，爲大溪，至迎仙市，爲子魚潭。又歷縣境黃茅墩，合蒜嶺，出江口，入海。蒜溪卽蒜嶺溪。

大藍潭 宋乾道中，鄉人以旱禱屢應，築石室祀龍焉。

瑞龍潭

橫山潭 潭傍有仙人跡二，各長尺二寸。石上隱起雙字，其大盈尺，畫高二分，鄉民禱雨靈應。

龍水潦潭 去潭七里，又有可坑潭。

扶門潭 龍溪潭

龍門潭 宋乾道六年，令吳玆以禱雨有應，立龍堂祀之。

東潦潭 昔有龍見，歲旱，邑人卽地禱雨，因建龍潭堂。

丹井 在海口鎮福真觀殿西隅。有丹井，飲之愈疾。宋時有丹井玉堂。

〔校記〕

〔一〕「領四十四里」，下文實列四十五里。

〔二〕「統圖一百一十有三」，誤。

〔三〕「圖」下，各本原脫「基數詞」。

〔四〕「唐嶼」，下文作「塘嶼」。

〔五〕「吳門」下，各本原闕二字。

〔六〕「金賜勅傳住僧守護」，「金」字當衍。

閩書卷之七

方域志

泉州府 晉江縣一〔二〕

泉州府 在布政司西南四百一十里。東抵海，西抵長泰，南抵海，北抵尤溪。漢建安初爲侯官縣地。吳永安三年，置東安縣，屬建安郡。晉太康三年，置同安縣，屬晉安郡，卽今福州。梁天監中，析晉安地爲南安郡，置龍溪縣，屬焉，治晉安。陳永定初，屬閩州，後屬豐州。隋開皇九年，郡廢，改爲縣，復析置莆田縣，皆屬泉州。泉州之名，蓋始此。然其治在今福州。尋復省。莆田縣，大業初，屬閩州，尋屬建安郡。唐武德初，屬建州，五年析爲豐州，領南安、莆田二縣。八年隸泉州都督府。貞觀初，州廢，併入泉州。嗣聖十六年，析南安、莆田、龍溪置武榮州，治南安，領縣四，復析莆田，增清源縣。尋廢縣還隸泉州，此亦今福州也。十七年，復置。景雲二年改爲泉州，則今之泉州，蓋始此，隸閩州都督府。開元八年，領縣五，析南安縣，置晉江，卽治於晉江。十三年，隸福州都督府。二十九年，領縣四，析龍溪屬漳州。天寶元年隸長樂郡，復改爲清源郡。乾元元年仍爲泉州。〔一〕上元元年，隸福州節度。大曆六年，隸福州都團練觀察處置使。光啟二年，爲王潮所據。乾寧三年，屬威武軍，後遂屬閩。五代時，仍領南安、莆田、仙

游、晉江四縣。仙游卽清源縣之改名。漸增置同安、德化、永春、清溪、長泰凡九縣。後晉開運二年，南唐滅閩，取其地。既而留從効據之。後漢乾祐二年，南唐升爲清源軍，從効卒，復爲陳洪進所奪。宋乾德二年，改爲平海軍。太平興國三年，洪進納土，復爲州，屬威武軍。五年，以莆田、仙游屬興化軍；以長泰屬漳州，領縣六。六年析晉江置惠安，領縣七。雍熙二年，隸福建路。宣和三年，改清溪爲安溪。元至元十五年，升泉州路總管府，隸福建行中書省。其後改隸不一，語具布政司。領司一，曰錄事司，縣仍舊。大德元年，改福建行省爲福建平海行中書省，治所泉州。二年，改泉州爲泉寧府。三年省廢。至正十八年，立泉州分省。二十二年爲西域那兀那納所據。既屬陳有定。皇朝洪武元年，改爲泉州府，領縣七：晉江、南安、惠安、德化、安溪、同安、永春。

川逼溟渤，山連蒼梧。表以紫帽、龍首之峰，帶以金鷄、石筍之阻。其形勝也。

晉江縣 附郭也。東抵惠安，西抵南安，南抵海，北抵仙游。初爲晉安縣，後爲南安縣。唐開元八年置縣屬泉州。宋元仍舊。皇朝因之，其鄉爲隅三，都四十有三，(三)統圖一百三十有五。(四)

東隅，圖四。

西隅，圖十。

南隅，圖三。

一都，圖一。宋養能里。山曰鼓雷。溪曰磁龜。

二都，圖二。宋養能里。

三都，圖一。宋務本里。

四都，圖一。宋務本里。

五都，圖二。宋仁孝里。山口靈源、華表、高州、象陷、石龜、青陽、崎山。

六都，圖一。宋仁孝里。

七都，圖一。宋修仁里。

八都，圖四。宋修仁里。

九都，圖一。宋仁和里。

十都，圖五。宋仁和里。

十一都，圖四。宋仁和里。

十二都，圖四。宋仁和里。

十三都，圖二。宋勸善里。

十四都，圖五。宋勸善里。山口橫山。

十五都，圖二。宋絃歌里。山口古甯、鴈塔。湖曰龍、魑。

十六都，圖二。宋絃歌里。

十七、八都，圖四。宋絃歌里。

十九都，圖四。宋絃歌里。

二十都，圖四。宋永寧里。山口寶蓋、金鞍。

二十一都，圖二。宋永寧里。山曰靈秀。

二十二都，圖一。宋永寧里。山曰金釵、觀山。嶼曰岱嶼、白嶼。

二十三都，圖四。宋江陰里。山曰雙石、龜山。

二十四都，圖七。宋江陰里。江曰蚶江。

二十五都，圖三。宋聖仁里。山口鼓雷。

二十六都，圖三。宋聚仁里。塘曰七首。

二十七都，圖八。宋永福里。山曰青陽、石鼓。

二十八都，圖四。宋永福里。山曰羅裳。

二十九都，圖六。宋和風里。山曰隔塔、東山。

三十都，圖四。宋和風里。

三十一都，圖四。宋沙塘里。山曰石城、雙石。

三十二都，圖一。宋沙塘里。

三十三都，圖三。宋常太里。山曰紫帽、龍首、小烏。(五)石曰鼓雷。嶼曰洋嶼。

三十四都，圖三。宋興賢里。山曰龜山、石塔、鼓雷。

三十五都，圖三。宋登瀛里。山曰行轡、獅山。

三十六都，圖二。宋臨江里。山曰石壁、法石、赤城、石頭、寶覺、聖姑。

三十七都，圖二。宋鸞歌里。山口靈山、太平、桃花、赤蝦、回龍。

三十八都，圖一。宋鶯歌里。山曰黃嶺。嶼曰鳥嶼。

三十九都，圖一。宋棠陰里。山曰朋山、清源、大旗、鳳山、梁相、覆船。峰曰雲蓋。

四十一都，圖一。宋愛育里。

四十二、三、四都，圖一。宋善政里。

四十五、六都，圖一。宋仙溪里。山曰五洋、鶯峰、花山、豐山。

四十七都，圖一。宋常建里。山曰白虹、大帽、香爐、八尖、建興。溪曰盧溪。

右附郭。

山諸縣山俱次第依都圖，本縣獨從舊志，以脈絡叙。蓋在本貫所習知也。

雲山 在城北。舊時州治皆在山麓。宋韓國華爲守，忠獻魏公實生於此。公生時，治前榕樹悉花，花如攀枝，今樹尚在。《方輿勝覽》：韓魏公生州治，陳了翁兩隨侍來守郡，二名賢生寄於此。郡人所喜談者。

虎頭山 在城東北。地名松灣。有四古松，東晉時物也。故以名。灣本在州城外，陳洪進有女爲尼，作寺曰崇福，居之，因廓城包寺。

鸚鵡山 在城東。俗名鸚鵡山。山頂有巨石立如鸚鵡。承天寺在其下，寺故留從効藍園，捨以奉佛，名南禪。請僧省僦居之。省僦，《五燈會元》：「阮氏，仙游人。上堂：『叢林先達者，不敢相觸忤。若是初心，後學未信，直須信取未省，直須省取諸人本分去處。未有一時不顯露，未有一物鮮蓋覆，得如今但向博地。凡夫位中承當取，豈不省心力？既能省，得便與諸佛齊肩，依而行之。』」宋初賜名真覺禪師。

景德四年，賜寺名承天。則有僧祖珍居之。祖珍，興化林氏子，司法玠之叔也。母陳夢胡僧遺以明珠，因問僧從何來，應曰：「余姓黃，名涅槃。」覺而有娠，以應珠名。相貌奇古，通身毛長二寸許，嘗詣鼓山，謁鑒淳禪師，一見奇之，曰：「此真金毛獅子。異日法器也。」師自念東山大乘有獅子峰，佛心禪師實主之，盍往依棲，符厥本名，遂往謁之。佛心喜曰：「夜夢獅子入吾室，子其應乎？」佛心住鼓山，請作首坐，衆皆驚愕，相顧曰：「珍獅子平日不會開口，縱胸中有佛法，如何舉揚？」一夜，秉佛隨機應答，叩擊不窮，自是禪譽大播。佛心去福，帥請主寺。事後，住錫承天法堂。漕使傅自得特加敬愛。一日師謂之曰：「某平生無長物，近倒囊中所有，造七佛石塔於三門之外，今已畢工，法緣盡矣。」卽升堂別衆去，居夾嶺之白水巖。巖傍居者皆曰：「昔有道者嘗言：『四十年後當有肉身菩薩來興此山』，師此來適四十年矣。」相與出力，一新巖居。未幾，復還法堂，索筆大書曰：「生本無生，死本無死。生死二途，了無彼此。」言訖，趺坐化，茶毗皆爲舍利。傅提刑銘其塔，仍序《語錄》。珍所造七塔，間植榕樹，砌石闌之。至今蒼蠅止塔者，首悉下向。榕樹棲禽，絕無矢污。榕根盤鬱，無侵出闌外者。大觀時，泉中佛教盛行，是山之頂，日有雲覆。守王十朋詩：「泉南傑出一高峰，碣石渾如鸚鵡容。毛羽不生隨地老，彩文難盡等天終。」於今夷爲蔬圃，山十存一二耳。

昇文山 在城西。南宋守葉廷珪《海錄碎事》曰：「昇山在州南，晉司徒王朗每登覽，因名朗山。」朗，字景興，東海人。爲漢會稽太守，居郡四年，惠愛在民。孫策渡江略地，功曹虞翻以爲力不能拒，不如璧之，朗自以身爲漢吏，宜保城邑，遂舉兵與策戰，敗績。浮海至東冶。策又率軍追擊之閩越。朗欲走交州，爲兵所逼，詣軍降。朗在東冶，每登覽泉州城南之昇山。後人因名爲朗山。今郡志未見昇山，意此山

是也。按：《海錄碎事》以是山與下梨山並載本州之下，今郡志既不收入，而建寧志遂竊取之，不知故云泉州，不云建州也；即云建州，不名東冶也。朗爲策敗，欲浮海人交，故止泉中。若人建，反走上游，去海遠矣。

莪山 在城西。山有莪泉。

以上並城中山。

白虹山 自仙游縣之九座山西南行，爲朋山，清源之祖。垂瀑如虹。宋莆田陳宓隱居其下。有白虹瀑，有龍潭，歲旱禱之，或有雲氣升潭中如虹，三日內必雨。有龍潭橋，在桃榔渡上。有玉虹村，村有玉虹橋，本村人彭映所建。映與梁文靖同舍。紹興中，嘗上《萬言書》，不報。年九十七終，家有萬桂樓。

大帽山 山形如帽，自白虹而西，下至姑舅嶺，有鞍四十九，有崙五十。逶迤南安，從葵山而至雙陽、清源焉。凡山凹凸之處曰鞍。

香爐山 在金溪之上。溪中沙，淘之有金。

八尖山 山前後相連，距十里餘，大小纍纍，其尖有八。

建興山

五洋山 高頂中有田千畝。宋時有五姓居之，今訛爲吳矣。上有小髻洞，可以避兵，山麓有清水

巖。

鷺峰山 花山

豐山 水旱祈禱，歲則大豐，故名。又頂有雙丫，亦名雙髻山。上有白水巖，涓若滫漿，豐周瓢飲。

僧祖珍去居夾嶺之白水巖，意此巖也。五代齊有人構此山，石刻亡名氏詩曰：「齊朝誰住古巖阿？絕頂雲霄手可摩。一掬白泉何處得，源來定自出天河。」

朋山 雙峙若圭，亦曰雙陽。大者曰大陽，小者曰小陽。郡多兄弟齊登科第者，是山之祥也。宋曾會記：「泉西北岡阜連絡，若虎而蹲，若龍而奔，黛滴藍噴，藏煙泄雲，自遠而來，豁然屏開，雙峰對峙，中坦數里。」

清源山 郡主山也。以在郡北，名北山。以有孔泉，名泉山也，郡所以名清源矣。又以高頂常雲，名齊雲云。其云孔泉者，《寰宇記》曰：「泉山，泉主山也。」山有孔泉，故名之。朱買臣謂東越王所保之泉山是也。上下皆石，上石如殼，下石如砥，中圻孔竅，泉出焉，故謂孔泉。而舊志乃以「孔」爲訛，改作「乳」也。宋嘉祐中，潛江令張摠謫居此州，取泉煉藥，乘以新瓶，密封逾年，氣味猶新，摠謂無錫惠山泉，寄遠者必投小石，乃可久韻，此泉不及也。是山發自白虹，由西南趨爲朋山，度朋山折而東，二峰昂然天際，爲三台山。三台山者，清源山也。墜隙厓宮，有三十六巖洞焉：曰純陽洞，曰紫澤宮，曰東巖，曰西巖，曰海潮室，曰南臺，曰遵巖，曰半嶺巖，曰棲霞巖，曰大道巖，曰泰嘉巖，曰靈源巖，〔六〕曰碧霄巖，曰不易巖，曰瑞像巖，曰寒山巖，曰日休巖，曰妙覺巖，曰獅巖，曰龜巖，曰虎巖，曰賜恩巖，曰中巖，曰下巖，曰巢雲巖，曰彌陀巖，曰觀音巖，曰梅巖，曰木龍巖，曰勢至巖，曰清泰巖，曰羽仙巖，曰片瓦巖，曰泰空室，曰無塵庵，曰楞伽院是也。純陽洞，亦曰清源洞，在中台絕頂，是名「上洞」。上有蛻巖。蛻者，裴道人。道人，宋紹興時莫知所自來，語音似江東人，頭戴通草花，行歌於市，數載坐化嵌中，而通草花在前，郡人泥軀祀之。《本草圖經·通草》：「通，脫木也。生山側，葉如草麻，中有細，輕白可愛，女工取以飾物。」郡有新守至，見途迂者，自言裴老

人，忽失之。一日守登山，覩蜺巖，恍然曰：「向裴老人此矣。」今其靈可夢也。紫澤宮，去純陽洞半里許，是名「下洞」，菁深靜杳，別爲一區。唐蔡尊師譚紫霄修道於此。今祀董伯華也。尊師名如金，系出晉司徒謨事。唐爲金部員外郎、太原守，晚棄簪紱，修鍊此山，以方技濟人。既卒，葬山之東。久之，留從効爲改葬，啟棺，惟劍、鑑存焉。宋崇寧中，封「虛應先生」，其後累加「冲應普利靈濟」六字。嘉定十年夏五月不雨，守真文忠始至州，問仙祠靈宮之著驗章灼者，咸以尊師對。亟往禱。亡何，雨。是年冬旱，復禱，復雨。越明年，春泊秋，膏澤時至，田高下礪腴，皆告稔，米斗百錢，黃鹹稿項之叟，謹未曾有，以歸真人靈芘，相率白州。州諗於部使者，下旁郡，審覆如州言。詔加「昭博」之號，爲八字真人。紫霄，名峭，字景升，本州人，國子司業洙之子，博學能文，迺嗜黃老，歷游終南、太白、太行、王屋、嵩華、岱嶽，得辟穀養氣術，夏服烏裘，冬衣布衫，或卧霜雪中，嘗作《化書》授宋齊丘令爲序，齊丘攘爲己作。其言類黃老，閩王昶師事之，拜爲「正一先生」。閩亡，居廬山棲隱洞，聚徒百餘，弭鬼魅，祈災福。南唐後主召至建康，賜道號紫金階，不受。宋開寶六年尸解。葬日，有祥雲、白鶴旋繞。伯華者，皇朝成化時人，屠者也。得道術，晝雷兒童掌中，伸之有聲，市中兒悉出錢與買。伯華得錢嚮食自飽，散其餘以給市人。有郭姓者，爲郡小吏，太守熊尚初喜之。汀賊至，太守出兵與戰，吏當行，伯華告其父曰：「亡往也。昨見太守領兵出城，皆喪元，鬼矣。」父曰：「府公欲之，焉避害？」伯華倏忽使其兒暴下，用是得免。伯華與郭善，遺之青石曰雷石。小兒有病，就雷石磨水飲之輒愈。今泉中旱，則迎伯華禱之，以能雷也。界上下洞間，又有清源泉，深五六尺，甘潔無比。舊有靈物，身如魚，耳如牛，現則大水。宋乾道壬辰歲，是物常見，色正白，頭如五斗栲栳，吐舌聃然。是歲大水，撤州門匾額，投洪波中壓之，乃已。是泉又名相泉，謂留、梁二相也。又有

一泉曰藜杖泉，在道傍，若坎井然。云蔡尊師握藜杖，戳之而泉出。東巖、西巖在中台峰前。海潮室在中台峰左。奇石倚天，室居石址，或曰裴道人嘗居之，以吸日月精華。南台，在右台峰，絕頂矗起三石，削成如樓臺，其下山石皆巉峴，鄭重俯望江海、城郭、村墟，歷歷如畫也。遵巖，在左台峰頂東偏，僧可遵所構，其地巨石偃亘，周數百武，名百丈坪，可遵建三石塔焉。可遵，俗姓徐，南安人，微髭碧眼，狀如胡僧，面精修無憾，得施利，則縷經懺，繕橋道，構殿藏。朝散黃元功母病，夢人告曰：「得巖主供之，愈。」元功延可遵，母愈也。百丈坪，聯綴東下，爲半嶺，爲棲霞，爲大道。大道，秦時人修道此山，出游，見人哭，問故，曰：「獨子無兄弟，當築長城塞上。」大道出身代之，卒於軍，人謂其形化，後供奉於此。又綴而下，爲秦嘉，爲靈源。靈源窪廣數百步，水積其中，郡志謂中有鰲龍。宋時，旱禱輒雨。碧霄巖，最奇。巖在碧霄峰之麓，怪石委萃，重複相依，中廣不逾席，北來南去，可百餘武，仰視碧天如線，曰小有天，曰拍洪崖。肩當北人處，曰上碧霄，鐫刻曰透碧霄。南出處左側，石刻「壽」字，高廣丈餘，傍刻「林爽奉親游此山書」。爽，三山人，邑宰也。此地南對紫帽，刻壽於此，曰南山之壽，祝親也。石端琢佛，三巖倚之，曰下碧霄。不易巖，昔有尼居之，有訪之者曰：「若來住山，故不易。」尼曰：「卽到山，亦復不易耳。」後百步，有石如線，名一脉泉。瑞像巖，宋元祐中有林道者，誅茅是山，夜夢有人使鑄釋迦像於石，且示鑄者姓名曰魏周，周夢如焉。鑄成，端麗甲諸相，其石面平如砥，峯嶽巖嶽，亦名天柱峰。一峰對峙，危石排行，如僧群立，名羅漢峰。峰後有靈潭源，潭深可數丈。又有獅子峰、回舶峰、蓮花峰、雲髻峰、石筍、石鱗、石龜、石城、石窗、石門，皆象其象。又有片瓦巖、寒虎巖，皆天然石室，可居止。又有望州亭，俯視城郭如掌握間。又有頭陀巖，天成石罅，謂之石門，深數十丈，上沿小徑，通於瑞像。石門之下，有霹靂石，陳公謙題「北山勝

概「四字」。巖像，嗣祖刻之。嗣祖，高僧也，老內外學。又有「峭壁攢峰」、「忘歸」等字及游人姓名，唱咏尤多，皆唐宋人刻字畫，適美可愛也。寒山巖，與瑞像肩皆相乘，相倚爲奇。日休巖，淳祐郡志曰：「頭陀巖也。」妙覺巖，在倒旗峰下，泉出石屏之底，郡志謂之瑞泉。宋志云：「瑞香泉，在興福院香積廚傍，味極甘芳，字婦無湮，密投錢其中，飲之湮也。」慶元間，刻石曰：「巨靈擘石，石乳湧出，鑑者神清，飲之無疾。」宋志謂陳公譙爲銘，或是刻也。皇朝隆慶間，山下牧叟偶汲泉洗兒瘍而愈。閭里異之，不旬日，聞者趨汲如市。上之江右，下之粵東，蟻行蜂赴，露居野宿，而海上從稅舶來，又日復十數艘。泉不給，絞泥淖以歸。郡人俞大猷時爲總兵，堙之，以杜不虞。今湧冽如故，絕無汲矣。獅巖，在五臺峰之陽，又如龜也。《一統志》：「歐陽詹、林蘊、林藻讀書於此。」有石可濡墨大書曰石硯。有室如瓦窰然，曰歐陽室也。巖奉神曰廣利尊王。王姓陶，唐時來自江介，行賈閩廣間，值歲恆暘，一日晨起，遇異頭怪面二人，怪其不類，詰而問之，至於再三。二人云：「恭受帝命茲土合菑，吾挈囊藥，分投衆井，俾飲且食，咸畢其命。」陶大驚怖：「郡人何罪，帝必不爾。」二人相顧微哂，陶復詰問：「何物疾毒，能畢衆命？試解而裝，俾我別識。」二人解示，陶奮裏奪噉，云：「我代此上生靈，若第休矣。」陶卽立化。郡人爭昇法身供養，爲立廟。郡治街左曰糴糴宮。他日賽神報謝，紙錢揚灰，香煙所指，直詣龜峰。夜有白毫，照耀巖谷，樵牧驚駭，溯煙灰所繇，乃知神屬意此地。郡人因卽巖創廟，昇法身定祀焉。虎巖，在五臺峰右，巨石巖巖如穹，龜伏龜穿石，透空而下，巖在其上。五季時，僧守息安禪巖中，有馴虎之異，名虎巖也。宋元豐間，僧法超亦嘗閱《大藏經》於此。日一食而已。石刻有「大休歇場」四字，亦名大休巖。皇朝郡人都閩歐陽深，卽巖構室以祀歐陽詹，今直名此爲歐陽室矣。賜恩巖，與虎巖上下相綴，望之若前後楹然，唐賜許刺史稷之山也。或曰是

四山，宋李文肅郡隱居是山之下，朝恩四及焉。中有石鑄白衣觀音像。中巖，有青壁屏立，倚石壁爲室。下巖，在平地，亦倚大石構室，有石斜立，如掛鏡，曰鏡石。又有石口，醉月室，曰凌霞觀，曰弄泉亭，曰怡雲塢，曰崇秀，皆李文肅所構。此皆自左右峰而下者也。巢雲巖，皇朝隆慶間郡人詹仰庇，以御史言事謫歸，棲遲此山。卽舊址建書室，門吞流瀑，壁負青天。禮部尚書黃鳳翔記之。惠令葉春及名其峰曰高士。彌陀巖，在擎珠峰之陽，懸泉從巢雲來，墜石壁間，冬夏錚鏦，有竹箭之美。躡磴而上，有石徑若距，石壁夾之，遂可以飲。郡人莊一俊，名其徑曰招飲。折石徑出，有石，元時璩彌陀佛丈六金相，特端妙，石室貯之，結構尤精。觀音巖，中有觀音石像。宋元祐間，民有夜見光相者，相與琢像崖端。紹興中，現夢於蔡氏，愈其痼疾。蔡氏新而金碧之。梅巖，古爲紹慶院，唐人陳錫之讀書於此。谷口刻「梅關」，云昔有古梅，數百年物也，(七)因以名。宋劉忠宣作堂，名曰梅巖。巖高數尺，可容人坐。有潭曰綠潭，石刻「綠潭瀑布」四字，波磔遒勁，殆唐人筆也。沿流上至高峭處，曰風雪，有石棋局、石硯、丹白之屬。北有雙石對峙，泉繞之，宋寺丞黃維之名之曰雲根漱玉。俱見淳祐郡志。木龍巖，巖如覆片瓦，約可容十許人，外石當前，如樹屏，門從屏右入，刻《贊》并《引》曰：「余於此谷口散步，遇將焚古木根，視之，若有異。命加斧斤，宛如龍狀，有符鬘桐之類，玩不足，因作木龍，贊以偉之。」《贊》曰：「三瀑亭下，亂薪堆中，顧是構斷，分茲窪窪，質奇狀古，腿蛇足虎，英上屢瞻，高人驚睹，光華密綴，撫玩悅志，葉公畫情，武侯臥意，夭矯蜿蜒，勢若騰天，疑將孕靈，神化倏然，欲脫塵俗，携之高騫。」末書曰：「木龍携歸北，留贊於石上，示不泯也。」會昌四年四月十日仁澤記。」郡志蓋載《贊》爲歐陽柅作云。皇朝萬曆間，邑人丁衍夏者，隱北山下，常以考古爲業，謂柅，《唐書》無其字，唐刺史有蘇球者，字仁澤，正會昌中任，然則作《贊》或球也。勢至

巖，瀑泉一自泰嘉山來，一自紫澤山來，環巖左右，匯前爲潭，名曰濯衣。今湮爲田，惟石梁在。泉觸嵯蘖，雪激霧散。巖背有石，可坐數人，下可以隱，刻曰陶石。蓋取古陶穴陶復之意。石上留題，皆用陰刻，此獨陽畫，亦一奇也。清泰巖，地與梅關、綠潭諸勝相鄰，題刻爲多，無論唐宋。下有潭曰劍潭，相傳有羽流鑄劍於此。丁衍夏於此隱焉。羽仙巖，在羅山、武山之下。宋羅山下，有北斗殿；武山下，有真君殿，朱文公嘗游焉，今日老君巖。蓋石鑄李老君宴坐像，高十餘尺，不知何年。宋淳祐不載，三必淳祐以後鑄也。當部置鬚髯處，石色皓然，雖露居風雨，苔蘚莫侵蝕，相傳不敢屋也，屋則大蟲至。片瓦巖，郡志云：「片瓦虎巖，皆天然石室，空洞可居」，卽此也。此皆自右台峰而下者也。泰空室在中台峰之東，迤覆鼎峰，垂爲後脇，茶戶居之，茶宜高山之陰，受日光早，處此地霧露蒙密，受陽獨先。有石廣數十尺，足垂如鼎峙，可隱人，故曰覆鼎，又名瞻跡也。《一統志》：「一名斟酌。留從効嘗於此斟酌軍事云。」無塵庵，在五臺峰東，卧石去地千尺，懸穿若風帆。別有石橫立其上，若揚帆，郡人呼曰舟峰。宋慶老禪師結庵其麓，匾曰無塵。慶老，本州人，能文而禪，嘗疏釋宗密《圓覺說》，補惠洪《僧寶傳》，與李文肅卽爲同門友。旣匾庵「無塵」，而文肅印之曰：「塵塵剝剝，皆是道場，何用諱？却若易爲石航，與舟峰相應矣。」因贈之詩，落云：「峰頭大舸誰安楫，我欲看君使石航。」楞伽院，在翠屏峰東迤，宋時有楞伽、羅漢、悟空、彌陀四院，南大旗而北覆鼎，東皇蹟而西翠屏，天成一窩，周數里許。內無長溪、平疇，而雙澗夾流，原田每每，繚曲盤旋，循山步岡，居民竹籬茅屋，瀹蔬種茶，有太上遺風焉。隋孔德紹《南隱游泉山詩》：「名山狎招隱，俗外遠相求。還如倒景望，忽似閭風游。臨崖俯大壑，披霧仰飛流。歲積松方偃，年深椿欲秋。野花開石鏡，雲葉掩山樓。何須問方士，此處卽瀛州。」

大旗山

鳳山 自北山而來，勢如鳳飛泉之北邙也。上有東嶽行祠。宋紹興末，尚書張汝錫捐貲開山，幾落成而沒，汝錫有女嫁爲潁川韓元吉妻。聞父沒，悲慟不禁。元吉乃持橐金來訖功。而汝錫子渤，仕銀青光祿大夫，復買田爲供燈費。元吉嘗爲建安守。後官吏部尚書，其爲朱文公作《武夷精舍記》，自言舊家閩中。文公《鳳山詩》：「門前寒水青銅闕，林外晴峰紫帽孤。記得南垞通柳浪，依稀全是輞川圖。」

梁相山 在鳳山東。宋梁文靖克家墓在焉。

覆船山 在梁相山東南十里許。

黎山 在郡城十五里。《方輿勝覽》云：「黎山，爲郡勝概。」

萬安山 唐觀察使柳冕置萬安監，牧馬於此，故以名山。山至洛陽江南岸而止，萬安橋在其下矣。橋跨晉江、惠安二邑間。其未興時，渡亦曰萬安渡。又宋淳祐郡志：「萬安渡，舊云因山得名。」按是江南北無萬安山，柳冕置監，乃在烈嶼、浯州，渡名非取此。《耆舊傳》：「江險多覆舟，被以美名。」蓋取安濟之義。二說不同，姑兩存之。

黃積山 山以黃石堆積名。宋名「飛落」，下有皇積、七里亭。王審邽葬此，而徐寅撰墓碑云：「皇者，天皇。續者，勳績。誇且諛矣。」去黃積市二百餘步，有龍窟泉。

靈山 自郡東南折而東，遵湖岡南行爲靈山。有默德那國二人葬焉，回回之祖也。回回家言：默德那國有嗎喊叭德聖人，生隋開皇元年，聖真顯美，其國王聘之，御位二十年，降示經典，好善惡惡，奉天傳教，日不曬曝，雨不濕衣，人火不死，人水不溺，呼樹而至，法回而行。門徒有大賢四人，唐武德中來朝，遂

傳教中國。一賢傳教廣州，二賢傳教揚州，三賢、四賢傳教泉州，卒葬此山。然則二人，唐時人也。二人自葬是山，夜光顯發，人異而靈之，名曰聖墓，曰西方聖人之墓也。其在郡城，有清淨寺云。元三山吳鑒《清淨寺記》：「西出玉關萬餘里，有國曰大食，於今爲帖直氏。北連安息，條支，東隔土蕃、高昌，南距雲南、安南，西漸於海。地莽平，廣袤數萬里，自古絕不與中國通。城池官室，園圃溝渠，田畜市列，與江淮風土不異。寒暑應候，民物繁庶，種五谷、蒲萄諸菓。俗重殺好善。書體旁行，有篆楷草三法。著經史、詩文、陰陽、星曆、醫藥、音樂，皆極精妙。製造、織文、雕鏤、器皿尤巧。初默德那國王別諳拔爾謨罕慕德，生而神靈，有大德，臣服西域諸國，咸稱聖人。別諳拔爾，猶華言天使。蓋尊而號之也。其教，以萬物本乎天，天一理，無可像。故事天至虔，而無像設。每歲齋戒一月，更衣沐浴，居必易常處，日西向拜天，淨心誦經。經，本天人所授《三十藏》，計一百一十四部，凡六千六百六十六卷，旨義淵微，以至公無私、正心修德爲本，以祝聖化民、周急解厄爲事，持已接人，內外慎勅，迄今八百餘歲，國俗嚴奉尊信，雖適殊域，傳子孫，累世不敢易。宋紹興元年，有納只卜穆茲喜魯丁者，自撒郎威從商舶來泉，創茲寺於泉州之南城，造銀燈，香爐以供天，買土田、房屋以給衆。後以沒。塔完里阿哈味不任，寺壞不治。至正九年，閩海憲僉赫德爾行部至泉，攝思廉夏不魯罕丁，命舍刺甫丁哈梯卜，領衆分訴憲公任達魯花赤。高昌僕玉立至，議爲之徵復舊物，衆志大悅，於是里人金阿里，願以己貲，新其寺，徵余文爲記，其略如此。」碑末言：「夏不魯罕丁年一百二十歲，博學有才德，精鍵如中年。」其曰攝思廉，猶言主教也。其曰沒塔完里，猶言都寺也。墓之東，有比丘塔院，皇朝嘉靖間，尤烈棄官借隱焉。都御史汪道昆行部往謁，贈之詩曰：「爾從彭澤上書還，獨向祇園借榻安。留客聊供法喜食，逢人不著惠文冠。」門左盤石，可觴坐百人，中閣一巨

石，撼之兀然動。郡守周道光名之曰碧玉毬，而記之曰：「元始無形，太極一丸也。兩儀肇判，天地卵丸也。二曜成魄，日月跳丸也。吾名石以毬，蓋取諸丸。」

太平山 在靈山左。其陽有雲谷室，皇朝胡志和禱雨於此，立應。蔡文莊清讀書其上。後爲歐陽秋作《獨善山房記》言：「予嘗一棲雲谷，亡何而歸。時時登高以望東山之隈，舊日竹松杳靄，猶依依有迎人意。」

石鷄山

法石山 在郡東南。陳洪進築壇於此，以效嵩呼。一名萬歲山。下有法石院。院後洪進妻及女葬焉。宋有碧桃道人隱此。既沒，南外宗正趙必暉作詩懷之，曰：「甘霖下焦土，漸漬苦不濡。城中游俠兒，不識有旱枯。初晴走北山，雜遝還仙都。車徒視豐約，蟻陣緣崎嶇。惟我獨南行，尋煙走平蕪。碧桃弔詩仙，彷彿聞嗟吁。高臺化平陸，曲池已填汙。誰收玉女盆，不見道士湖。」蔡襄《荔枝譜》有「法石白」。

石壁山

赤城山 土色純赤。諺傳：晨昏間，有赤馬出食人禾，追之則入山中，亦名赤馬山。

石頭山 與赤城山相連。山盡處有三石，傑出山陰，疊石數筍，危如欲墜，寔不可動，目爲天石。上有真武殿，宋時望祭海神之所。下爲石頭市，居民鱗次。

回龍山 去石頭十里。山勢自北山分支，遇海而止，有回顧州治之狀。

寶覺山 上有海印室。

聖姑山 相傳地產大菰，里人異之，卽地建祠，訛爲聖姑。

桃花山 地名鷓鴣。土色如桃花。皇朝蔡文莊清葬此。

赤蝦山

鑼鐘山 有石，考之，似鑼鐘。

龜山 出臨漳門一里許，三峰高聳，其形如龜。今置山川壇。壇西有石，卓立二丈許，名石筍。其下爲江，名筍江也。邑之靈秀，在此石矣。宋守高惠連，以私憾擊斷爲二。成化中，守張崑，補而屬之。

石塔山 在石筍南。其山腰至麓，有一磐石，長二百丈，下亘江水之淵，居人室焉，俗名石皮。皇朝丘文莊濬嘗問蔡文莊：「君郡有萬家石？」文莊時爲諸生，尚不解是此石也。上有石塔院，宋禪師定諸所建。定諸，邑人，宅心岑寂，俗囂如遺，巾履之外虛空在室，曾會與爲方外友。所著集曰《去華》。

鼓雷山 山有四：一去石塔山西南一里許聚仁里，有石如鼓，叩之如雷。或云天將雨，則鳴如雷。上有祈雨壇，旁有疊石，危峻若累卵。上有陳君巖，鄉人陳珏嘗廬墓於此，鄉黨孝之，以名其巖。下有龍井。遵井而東放於溪，大阜之椒有石，宋慶曆間，有龍蟠繞焉，因名龍繞石。一在常太里石旗村，中途跨亭，名曰回通。一在養能里石龜鋪之西，相傳天將雨有雷隱隱鳴。石下有巖，名曰靈應。一在縣興賢里，曰鼓雷村，平田千餘頃，仰給水利。皇朝正德中，吳賜捐貲築陂閘，蓄灌注十鄉田，當道旌之，賜家五世同居，鄉稱義民。又永福里有石鼓山。

紫帽山 自南安大烏石山蜿蜒而來。巉巖雄聳，爲十二峰，與清源南北對峙，郡名山也。大抵清源之奇也，以石；紫帽之秀也，以峰。《海錄碎事》曰：「泉案山也，嘗有紫雲覆頂，故名。」其最高者二峰左

峰之陰有金粟洞，唐元德真人鄭文叔居此，有道術。有羽士寓書文叔，文叔握粟犒使。歸視，精金也。宋寧宗御書「金粟洞」，刻於石。白玉蟾詩：「白雲亂山深復深，洞口枯樹鳴幽禽。玉雪影梅春寂寞，琅風韵竹夜蕭森。海流城外青羅帶，巖聳天邊碧玉簪。憶著仙人鄭文叔，淚隨夕照落平林。」又有去華者居之。去華，不詳出處。皇朝南安黃河清詩：「披雲迢遞覓仙宮，老鶴聲中一線通。文叔何心開象罔，去華有意續大工。」注云：「文叔，去華，二仙名也。」左峰絕頂，有凌霄塔。皇朝令錢樞造。右有石鼓、丹爐、試劍、棋局、仙跡、仙掌諸峰。北有天湖巖。南有古玄室、盤古洞。山中有泉，味甚甘冽，《方輿勝覽》：「山椒泉眼，相傳有龍蟠其中，名曰龍池。」宋淳祐志：「甘泉在紫帽山龍潭之側。」疑此山也。又有潮汐井，隨潮盈縮，今久湮矣。古玄室、盤古洞，俱屬南安。皇朝邑人何觀仕歸隱此，其後陳琛亦隱是山有年。陳琛《金粟洞詩》：「拔地凌空失衆丘，雄奇應得數南州。白浮雲谷真堪玩，青映吾廬若可收。」《古玄洞詩》：「有雪偏能暖，無風亦作秋。」蘇濬《凌霄塔詩》：「龍藏恍從雲裡出，江村宛入掌中看。」同安山人傅鑰《紫帽山詩》：「三春欲盡百花飛，郡郭溪橋度曉暉。地絕路難人跡少，山深坐久鳥聲稀。」

龍首山 在紫帽東南麓。有龍翔之勢，亦名龍頭嶺。其下有妙峰堂，唐歐陽詹別墅在焉。詹，少與里人王式、吳播、薛壽、鄭簡、康暉、王雲卿相善。諸公每見詹性行文詞，輒可以進士之目。後爲廉察常袞，州將薛播所知。諸公僉以白詹父。博羅丞令其赴舉京師。詹父特與諸公會此，詢諸可否。諸公益決其行，而詹父自此遭詹從計吏。又，紫帽山東有歐嶺，云歐陽四門故居之後山也。

小烏石山 在郡南十里。山頂有海岸庵。半山有玉泉庵，有蔡公泉。宋曾公濟《記略》：「密學蔡公昔自史館來漕，按部之暇，獨得斯泉。既去，以書來言，郡南嵩之西山麓有泓泉，其味甘美，予與僧洞源尋

訪，久之始獲。好事者聞之，因疏源迅流，鑿池瀦之，架亭北之，郡民朝夕提汲，酌飲不絕，因名曰蔡公泉，時至和二年也。治平甲辰，令王克俊刻「蔡公泉」三字於石上。

行輦山 相傳宋幼主南行，於此下輦，故鋪名下輦。然宋淳祐志已載此山，則又非是。

獅山 自城中望之，聳然連蹠。一曰烽山，昔人置烽燧之所。山頂有巨人跡。

水亭山 去獅山三里，朝揖郡城。

白塔山

鴈塔山 地突高岡，秀聳而圓，其狀如塔。有石高丈餘，周廣四丈餘，上有圓跡，扣之如鼓，號靈鼓石。

東山 溜石鎮在其下。鎮有高甲山井，方廣丈餘，海潮至其旁，與泉不雜，色瑩味甘。

碧峰山

青陽山 山有八石，名八仙石。傍有石鼓山，石鼓廟在焉。宋守真文忠嘗於此禱雨。廟中神有號順正王者，青陽市蔡家之家僮也。生有靈異，蔡嘗命之滌甕，以繩綴群甕赴滌池中，甕皆自往返，後坐化石鼓廟門外，人崇祀之。皇朝里人有從中官鄭和下西洋者，奉其香火以行。和舟次恍惚，見其靈助，言狀於衆，人以神對。還朝，奏聞，賜封曰順正。嘉靖中，鄉紳莊用賓遷神廟東，旁設主以祀其鄉先正之賢者，曰夏秦。曰蔡居陽率鄉人行鄉約其中，約規甚嚴，至於桃李垂街，田疇被畝，人和盜絕，一時爲盛。夏秦，字西仲，元季進士，不知何許人，避亂居此。郡守胡器與部使者，多造其廬。洪武十六年召至京師，以老乞歸。簞瓢屢空，處之晏如。有送郡守詩：「離筵對芳草，去路繞青山，日暮雙旌遠，邦人拭淚看。」時稱爲

二十顆真珠。用寶奉祀之日，爲文以祭曰：「幸隻字之見貽，雖兼金而莫擬。」居陽，見縉紳。山之聯鄉，曰下王，並與青陽衣冠相望。

雙石山 家此山下者，子多雙誕。

石城山 山勢連綴如城。旁有四峰，頂有石洞，相傳昔有僧居是洞，能伏虎，虎隨其言而去。

靈源山 一名吳山。山雄跨四里許，高出東南諸山，頂有靈泉，大旱不渴，號師姑井。宋志云吳六娘井，或此井也。唐時道士蔡明濬者居之。明濬，與虹巖、羅山往來潘湖間，有合鍊之契。歐陽詹少年時，與同居處者三載。宋時有吳氏昆季，隱居山背，故其背名吳明山。又山頂高大而平，名大平山也。上有石曰望江，登之可以返望郡中山，而外望海。有紫雲峰、紫雲室，相傳舊有紫雲覆其上。望江石之下，有靈源庵，有宋林知讀書堂。知死，卽葬於此。知，字子默，隱居篤學。熙寧間，詣闕上書，論時政，久不報。惠安簿林迥訪其旅邸，題壁間曰：「先生平昔命何非，萬卷詩書一布衣。回首長安成底事，吳山蒼翠幾時歸。」知遂歸隱不出。劉濤經《林處士塚詩》：「處士墳三尺，吳山松萬株。空餘著書藁，不見煉丹爐。道古言難合，年高勢最孤。清朝禮樂備，無處用真儒。」皇朝邑人王慎中《靈源山詩》：「奇峰千萬疊，一片飛泉灑。颼颼天風來，松聲如雨下。」山南一支，爲乞雨山。山頂有七星墩，鄉人於此禱雨，掘得炭者，卽雨矣。不者，雨未期也。吳明山，有宮，祀吳氏昆季及其二媼。今往祈嗣者，但知有媼而已。乃井名吳六娘，則媼亦著靈者。

華表山 與靈源相連，兩峰角立如華表。山背之麓，有草庵，元時物也，祀摩尼佛。摩尼佛，名未摩尼光佛，蘇隣國人。又一佛也，號具智大明使。云：老子西人流沙五百餘歲，當漢獻帝建安之戊子，寄形

棕暈。國王拔帝之后，食而甘之，遂有孕，及期擘胸而出。棕暈者，禁苑石榴也。其說與攀李樹出左脇相應。其教口明，衣尚白，朝拜日，夕拜月，「見法性，究竟廣明，云：『即汝之性，是我之身。即我之身，是汝之性。』」蓋合釋老而一之，行於大食、拂林、火羅、波斯諸國。晉武帝太始丙戌，滅度於波斯，以其法屬上首慕闍。慕闍，當唐高宗朝，行教中國。至武則天時，慕闍高弟密烏沒斯拂多誕復入見。群僧妬譖，互相擊難，則天悅其說，留使課經。開元中，作大雲光明寺奉之。自言其國始有二聖，號先意、夷數，若吾中國之言盤古者，末之爲言大也。其經有七部，有《化胡經》，言老子西入流沙，托生蘇隣事。會昌中，汰僧，明教在汰中。有呼祿法師者，來入福唐，授侶三山，游方泉州，卒葬郡北山下。至道中，懷安上人李廷裕，得佛像於京城下肆，鬻以五十千錢，而瑞相遂傳閩中。真宗朝，閩士人林世長，取其經以進，授守福州文學。皇朝太祖定天下，以三教範民，又嫌其教門，上逼國號，擯其徒，毀其宮，戶部尚書郁新、禮部尚書楊隆奏留之，因得置不問。今民間習其術者，行符呪，名師氏，法不甚顯云。庵後有萬石峰，有玉泉，有雲梯百級及諸題刻。

高州山 在靈源、華表二山間，與州治相直，故曰高州。

象陷山 在華表山北數里。其勢雄大，亦直州治。舊有象傷人，唐末南安縣人陳姓者，坎地陷之。蔡尊師亦嘗藏符印是山之頂。舊有靈泉庵、石資巖。

石龜山 在象陷山東南十餘里。峻壁二丈許，形酷似龜。宋岳珂《程史》云：「余外家居泉之石龜。」又俗云：「居龜前者貧，居龜後者富。」官道有石龜鋪，名同地異。

靈秀山 山舊有空相院，內有凌霄塔、七佛塔、方外亭、透龍泉、青蓮池、濯足池、待月橋、君子石、盤

陀石、靈蛇洞、海潮庵。宋守王十朋有詩：「小小精籃亦自奇，一峰靈秀蘊幽姿。無緣細聽山僧話，太守偷閑只片時。」

羅裳山 與清源、紫帽、朋山並爲郡名山。泉中謂之清、紫、朋、羅。山東有玉髻峰，下有畫馬石。唐末羅隱乞食山下，山下人侮之，隱乃畫馬石面，每夜出食人禾，追之則見馬復入石，山下人乃禮焉。隱爲畫椿繫馬，馬不出矣。今其跡瞭然，好事者力鐫深刻，欲與匹，輒不久漫昧也。按：隱，餘杭人，自號江東生，工詩長詠物。光啟中爲錢鏐從事，後表授給事中，年八十餘卒。俗傳羅隱出語成讖，著有《異跡》，若此山之畫馬石，深滄之石壁山書字，及建安書簡灘所載。予初尚未信，其果此羅隱與否？及讀楊文敏《書簡灘記》已，稍信之。因閱黃滔贈隱詩：「三徵不起時賢議，九轉終成道者言。」方知隱學道修真人也。又《唐詩紀事》：「隱貌寢陋，昭宗欲以甲科處之，有大臣奏曰：『隱雖有才，然多輕易。』乃罷。隱與桐廬章魯封齊名，錢鏐以魯封爲表奏孔日官，不就，執之。後以隱爲錢塘令，懼而受命。因宴獻口號曰：『一箇襴衡容不得，思量黃祖漫英雄。』然則隱又橐落任誕人也，其乞食山下，理或然爾。下有龍湫六井，或在高原，或在平田，相去半里許，而泉脉貫通，汲一井，則五井皆動。方知神農時，九井自穿，汲一井，則八井皆動，不獨《路史》所載爲然矣。」

橫山 勢長數里許，橫郡治南。又名許家巷。俗訛爲虎家街。留從効微時，負販過此，時時午食於媼之許姓者，從効貴，賜媼第宅良田，若韓信之於漂母也。南行，爲畫船浦。浦，沙地也。而有船痕，檣帆皆具。雖夜掘土掃除之，明日沙平，其跡復見。其日南風則帆檣向南，其日北風則帆檣向北，蓋異也。又南行十里爲蕭妃村，俗訛爲燒灰矣。《唐書》：唐文宗母貞獻皇后蕭氏，福建人。初人十六宅，爲建安

王待者。元和四年十月生文宗。寶曆三年正月敬宗遇弒。中尉王守澄率兵討賊，迎文宗卽位。追上建安王尊號曰穆宗，冊太后爲皇太后。后因亂去鄉里，別時父母已喪，有母弟一人。及人王邸，不通家問，文宗以母族鮮親，詔聞越連率，訪於故里，有戶部茶綱後人蕭洪，自言有姊流落，佔人趙縝引洪見后姊徐國夫人、女壻呂璋。夫人亦不能省認。俱見太后。嗚咽不自勝，以爲復得元舅。遂拜金吾將軍、檢校戶部尚書、河陽懷節度使，遷檢校左僕射、鄜坊節度使。兩授旄鉞，貴重天下。先是，有自神策兩軍出爲方鎮者，軍中多資其行裝，至鎮，償之三倍。時有自左軍出爲鄜坊者，資錢未償，遽卒於鎮。乃徵錢於洪。宰相李訓雅知洪詐稱國舅，洪懼，請訓兄仲京爲鄜坊從事，以彌縫之。洪恃與訓交，不與所償。又徵於卒者之子，俾其子接訴於訓，判絕之。時太后有真母弟，孱弱不能自達。而閩人有蕭本者，就其家，代及內外，宗屬名諱，遂詣京師，復稱太后家，右軍中尉仇士良故啣訓所爲，因鄉導蕭本發洪之詐，詔自鄜坊追洪下獄。御史臺按鞫，具服其僞，長流驪州，賜死於路。趙縝、呂璋皆連罪。遂拜本爲贊善大夫，賜緋龜，仍追封其三代祖父，賜與鉅萬，歷衛尉少師左金吾將軍。開成二年，福建觀察使唐扶，奏得泉州晉江令蕭弘狀，自稱是皇太后親弟，送赴闕，廷詔御史臺按事，皆僞妄，逐還本貫。開成四年，昭義節度使劉從諫上章言：「今自上及下，異口同音，皆言弘真，本僞。請追蕭弘赴闕，與本證明。」遂詔御史中丞高元裕、刑部侍郎孫簡、大理卿崔郃，三司按弘、本俱詐。詔曰：「恭以皇太后族望承齊梁之後，僑寓流滯，久在閩中。慶靈鍾集，早歸椒掖，終鮮兄弟，常所咨嗟。朕臨御以來，便遣尋訪，冀得諸舅，上慰慈顏。而姦濫之徒，探我情抱，因緣州里，附會名諱，幸覲國恩。蕭洪惡跡未遠，蕭本覆轍相尋。弘之本末，尤更乖戾。朕視膳之時，頻有咨稟，恭聞處分，惟在真實，乞沐墮桑。既無可驗，鑿空作僞，豈得更容？合當極法，聊投荒

裔。本，除名，長流愛州。弘，配流儋州。」而太后終不獲真弟也。太和中，皇太后、太后、寶曆太后，號三宮太后，文宗五日參拜，四節獻賀，皆由複道幸南內，造次不失禮。開成中，正月望夜，於咸泰殿陳燈燭奏仙韶樂，三宮太后俱集，帝奉觴獻壽如家人禮。武宗卽位，徙居積慶殿，供養彌謹，號積慶太后。會昌中崩，謚曰貞獻。此蕭妃所由名村也。《歐陽柅傳》：「里人蕭本妄言與太后近屬，柅以爲耻，用是得罪者，此矣。」又按云「蕭弘，晉江令」者，《舊唐書》。而《新唐書》以爲泉州男子，去闕文之風殊遠也。

崎山

岱峰山 有石佛巖，相傳未巖時，石有夜光三道。宋嘉定中，僧守淨異之，鑄彌陀、觀音、勢至三尊，刻「泉南佛國」四大字於傍。守淨有道術，安平朝天門樓、興化軍安利橋、延平可渡橋、武榮金鷄橋，皆其所建。其鑄是佛也，謬語匠人以斛量石灰，有一斛灰，當售一斛錢，工喜得價。久之，灰被風颺，較其直，正當其日作。又云其造金鷄橋，與鑄是佛，同時興工，法身雙見。近地有青石塔，宋志：「青石山，巨石峙平野，廣袤數里，高十數丈，居民遇亢旱，卽其頂禱雨。」

寶蓋山 山巔有石塔，可以望商舶。宋紹興中，僧介殊所建。而俗名之姑嫂塔。謂昔有姑嫂嫁爲商人婦，商販海久不至，姑嫂登塔而望之，若望夫石然。塔中刻二女像。游人拾瓦擲之，中者生男，不中女也。蜿蜒而南五里許，有虎岫巖，濱海諸山，色皆燥淡，獨此巖雲石光潤，林木青葱，巖是宋元所構，體裁精穩。每八九月，海濱男女携餅饗羊酒其上，名曰游春。皇朝山人黃克晦詩：「力盡千山外，心飛積水東。陰森通客路，窈窕入禪宮。」

金鞍山 寶蓋山，俗名大辜；金鞍山，俗名小辜。相傳辜氏女顯跡神異。或云大孤、小孤猶江南二

山，出於江中，人立二姑廟也。上有室可丈許，當白上墜而下，名永嘉室。有趙永嘉者隱之。永嘉，或曰宋時人，或曰元時人。常喚虎守室。一日山下人送餉，永嘉酬以草葉一楹。山下人怪之，棄以飼牛。牛食之，連日酣睡。就問之，復採草葉解之，牛睡乃醒。山下人始知其異，再求不得矣。人不識其草名，但名曰祥芝。今縣二十都有祥芝澳，以此。其云「宋時人」者，謂與朱文公同時，嘗行山下，遇同人問之，知其爲同安簿聽卒也。曰：「致意朱公。吾趙永嘉也。」文公就訪之，相與游覽山川之勝，曰：「此地二百年後，當爲車馬之區。」今永寧衛城是也。其云「元時人」，云虎岫僧有嘉善者，與永嘉相好，山礪確鮮稼穡，嘉善第網魚作食，永嘉刻詩石上，曰：「青山吐出白龍開，我是地仙趙秀才。嘉善有魚餐得去，永嘉有虎喚能來。」皇朝高士趙復無疾隱此山下，復博通經史，不求仕進，喪祭依古禮。年九十五卒。門人號莊節先生。

畫角山 單山也。獨石聳立，其狀如角，登其巔，可望海外諸山。南鄉之山，惟孤、吳、橫、角四山知名。孤謂寶蓋，吳謂靈源。橫，橫山。角，畫角也。

石壁山 一名獅山。地名深扈。陸魯望曰：「列竹海濱口滬。蓋設以取魚，故魚躍出者謂之跋扈。」石刻「深扈」二字，畫白不昧，如畫馬石跡，亦傳羅隱所書。有崇真寺，祀玄武神，傍有井，歲旱不竭，底有石眼，俗傳複井云。左爲彌陀山，下有天竺井。水甘，早不枯。右爲青山，有市心保。中有井，深可丈餘，足一保汲，名寶泉。傍有寶泉庵，庵左畔無蚊蠅，亦傳羅隱所識。皇朝安溪詹仰庇詩：「層崖分五澳，疊屋聳孤岡。風土魚蝦藪，丘園粟麥鄉。壁山喬木古，玉井細泉香。」

益輔山 繚繞永寧衛治後。一名朝陽。以先受日光，又名瑞海。以上有石如珠，名驪龍山。

仙人山 在永寧衛城中。巨石盤繞，上有仙人跡。出衛城半里許，石臨海側，巖嵌堆崎，如篆，如櫛，如木，如假山，奇莫可狀。近時閩司理阮人阮自華，始表異之，邑人黃克纘詩：「浪有千層皆白練，石無一片不蓮花」。

象山 在永寧城中，形如伏象。

金釵山 地名石湖，又曰日湖，日所出處也。舊浯嶼水寨，今移於此。東西兩山，延袤若兩釵股。其凹處有石塔，號六勝。宋政和初，僧祖慧、宗什等，以其地類明州育王山，募緣爲石塔，其壯麗不減城中開元寺塔也。宋梁文靖嘗讀書塔下。有堂名魁星，久廢。皇朝萬曆中，寨帥臧京構新之。元釋大圭《募緣修塔疏》：「山勢抱金釵，聳一柱，擎天之雄觀。地靈侔玉几，覩六龍迴日之高標。」傳語也。去金釵上左股數十丈餘，卓立一峰，峰傍有石圓淨，名鏡石。西小巖，相傳宋初有僧穴石隱焉。僧貌如獅子，名石獅巖，或鑿巖前石爲泗州像，又名泗洲巖。又其東有沈公堤，堤故種樹障飛沙，以護田。後樹伐堤空，沙仍壅田。萬曆中，寨帥沈有容使出汛兵，各載石還，遂得石百餘艘。復命戍還兵築之，堤不日成，田可耕如故，民名沈公堤也。

豐山 去石湖可里許。上有豐山寺。寺前有大石，有小石附之，驟望如群羊然。

楊原山 山中，宋有釋禹昌者隱之。禹昌，博聞彊識，苦節自厲。有釋省才者，時獨還往。一日，邀之會食，相與附火，譚至夜半，出芋魁分啖而已。有施膏腴，則堅辭曰：「有是吾徒不免虎矣。」賦《山居》十章，有「饑食無名草，寒燒落葉薪」之句。

瑞峰嶺

桃林 在州北數十里。徐鉉《稽神錄》：「閩王審知刺史泉州。光啟初，一夕，桃林村中地震，有聲如鳴數百面鼓，及明視之，禾稼方茂，了無一莖，掘地求之，則皆倒懸土下。其後審知克晉安，盡有甌閩地。至延曦立，村中復聞鼓聲，時禾已收，惟餘梗在田，及明視之亦無一莖，掘地求之，則亦倒懸土下。其年延曦爲左右所殺，王氏遂滅。」

烏嶼 四面皆水，嶼上可居民，砌石爲沉橋。宋寶祐中，僧道詢募建石橋，名鳳嶼盤光橋，長四百餘丈，廣一丈六尺，比洛陽橋長加四百餘尺，闊加一尺。二橋海中相望，如一虹然。道詢少遇丫角髻道人，授以丹丸，遂朗悟內典，精勤修行，耐煩忍垢。漳泉之人翕然信服。若惠安峰崎山之青龍橋、獼窟嶼橋，皆其所建。當獼窟未橋時，與丫角髻道人待渡嶼前，道人曰：「何不橋此？」曰：「風波日，作橋不易也。」道人曰：「患無真念。」道詢遂率其徒成橋七百七十間。一日建庵，或欲捨之田，辭曰：「世間田有數，我不敢與人爭食哉？」自障白沙海墘田之垵，其高處爲庵，其始障也。垵爲潮嚙，道詢扇麾之，曰：「海於天地間最大，不能尺寸相讓邪？」潮爲立退三尺。

洋嶼 去縣南六七里。四面平疇，此嶼獨起。或曰山巔尚有蠣殼，蓋古海洋之嶼歟？上有棲霞洞，小洞也，唐無了禪師居之。宋道人蘇隨亦隱此。無了《示化偈》：「八十年來辨西東，如今不要白頭翁。非長非短非大小，還與諸人聖相同。」

岱嶼 在海中。介石湖、北鎮兩山間，郡水口山也。海舟由此門出，行二日至高華嶼。又二日至龜嶼。又一日，可至琉球國。

白嶼 在石湖港西，聳出江中。洛陽、聖姑、北鎮、石湖諸港湍分匯之處，左右多沉沙，遷徙不常，屢

爲商舶患。

護田嶼 高華嶼 龜龜嶼

澎湖嶼 嶼爲泉州、興化門戶。昔人於此防琉球，而今於此防倭，有汛兵守焉。宋志：「澎湖嶼，在巨浸中，環島三十六，人多僑寓其上，苦茅爲舍，推年大者長之，不畜妻女，耕漁爲業，雅宜放牧，魁然巨羊，散食山谷間，各脅耳爲記。有爭訟者，取決於晉江縣。府外貿易歲數十艘，爲泉外府。其人人夜不敢舉火，以爲近琉球，恐其望煙而來作犯。王忠文爲守時，請添屯永寧寨水軍守禦。」元《島夷志》：「島分三十有六，巨細相間，坡壠相望，有七澳居其間，各得其名。自泉州順風二晝夜可至。有土無木，土瘠不宜禾稻。泉人結茅爲屋居之。氣候常暖，風俗朴野，人多眉壽。男女穿布衫，繫以土布。煮海爲鹽，釀秫爲酒，採魚蝦螺蛤以佐食，燕牛糞以糞焚，魚膏爲油。地產胡麻、菘豆。山羊孳生，數萬爲群，家以烙毛刻角爲記。晝夜不收，各遂生育。上商輿販，以廣其利。地隸泉州晉江縣。」皇朝洪武初內徙其民，遂墟之。萬曆中，於此屯兵防倭也。指揮唐垣京《澎湖要覽》：「澎湖，考之《圖經》，係琉球山川，在東南大浸中，地界泉、漳、興、福，其去內地也，埒於琉球。隋開皇中，遣虎賁陳稜師過其地，虜男女數百人而還。洪武五年，以居民叛服不常，遂大出兵，驅其大族，徙置漳泉間。今蚶江諸處，猶有遺民焉。山之所產，惟山豬、老鼠、花蛇、蜈蚣。菜則芥菜，高五六尺。花則茉莉，其英百葉，其香撲鼻。草則藤蔓，可取爲燒洗兵舡之用。藥則天門冬、山茨菇、蒺藜子、白芥子，其最佳者。山豬之形，無異家豬，但其色赤，跳飛若神，取之亦難，食之令人驟發瘡毒。獨山蛇、蜈蚣，彌山而是。花蛇大者丈餘，小不下六七尺，伏藏地中，暮夜之間，潛來几上，探之亦不咬人，咬人亦不大害。凡洋船過澎湖，則另一氣候：未至，尚穿綿；一至，便穿葛。

其海水號澎湖溝。其水分東西流，一過此溝，水卽東流，達於呂宋。呂宋回日，過此溝，水卽西流，達於泉漳。

鷓鴣礁 在海中。上有巨石百餘丈，一塔獨立，如簪筆然。

〔校記〕

〔一〕「晉江縣」下，各本原脫「一」字，據本書體例補。

〔二〕「乾元元年」，各本原作「乾元元年」，據方詩銘《中國歷史紀年表》改。

〔三〕「都四十有三」，下文實列四十六圖。

〔四〕「統圖一百三十有五」，下文實列一百三十四圖。

〔五〕「小鳥」，下文作「小鳥石」。

〔六〕「靈源巖」，各本原作「靈源庵」，據上文改。

〔七〕「數百年物也」，各本原作「數百物年也」，據文義改。

〔八〕「宋淳祐」下，當脫「志」字。

閩書卷之八

方域志

泉州府 晉江縣二 南安縣一

川水利附。

洛陽江 在晉江縣北。納本邑東北與惠安西北之水，東入於海，蓋晉、惠之界江也。其在晉江東北諸山注於康溪，達於濠市，至於留公陂斗門，又別流爲長溪，又別流合於惠安沙溪。諸水俱至於留公陂斗門，出此江而東入海。宋淳祐郡志引沈存中《筆談》云：「水以漳、洛名甚衆。洛，落也。水落於下，謂之洛。舊號洛洋，《九域志》作樂洋江。以『落』爲『洛』誤矣。後又以洛陽名之。而好事者又云：『唐宣宗出家時至此，謂風景大類西洛。』則不根爲甚。予按宣宗嘗至同安夕陽寺，西洛之說，似亦未必無據者。古識：『洛陽沙平，泉南公卿。』沙今平矣。是江有洛陽橋，名萬安橋，蔡忠惠襄所造。橋心有洲，洲上有關門，晉、惠二邑，界此江也。王忠文十朋詩：『人行跨海金鰲背，亭壓橫空玉虹腰。』蓋詠此關。忠惠《橋記》：『泉州萬安渡石橋，始造於皇祐五年四月庚寅，以嘉祐四年二月辛未訖功，繫趾於淵，醴水爲四十七道。梁空以行，其長三千六百尺，廣丈有五尺，翼以扶欄，如其長之數而兩之。靡金錢一千四百萬，求諸

施者。渡實支海，捨舟而徒，易危以安，民莫不利。職其事：盧錫、王實、許忠、浮屠義波、宗善等十有五人。既成，太守蔡襄爲之合樂譙飲而落之。明年秋，蒙召還京，道由此出，因記所作，勒於岸左。」記作碑二段，今在忠惠祠中。是橋也，坦夷如官道，可三里餘，揚州廿四，空懸月夜，吳江飛壓，僅表虹垂，兼以忠惠記文、書筆並精千古。於是好事者，競傳橋異，謂橋未興時，深不可趾，忠惠爲檄，使隸投之海，若而告之。隸嘆息曰：「茫茫遠海，何所投檄？」買酒劇醉，卧小艇上，起視則檄已換，第書一「醋」字。忠惠公曰：「神示我矣。當廿一日酉時，潮退可址也。」又，二碑之石，一粗一膩，好事者復云：「外國夷人摹倣其書，勒粗石上，夜換載歸。」此二事，要屬《齊東》。而近時有作《皇朝列卿傳》者，又以「移檄海神」，作蔡守錫事，亦不知何據也。惟余同年都給事中劉弘寶者，洛陽里人，爲余言：「幼讀書祠下，嘉靖末，有兵燹之變，祠被賊燬，碑離地四尺許，石理橫裂，斜倚石垣之上，居久之，忽自端正。」意有神物呵護，此則所親見云。又，宋泉守、三山林之奇，手錄造橋二事。其一云：「初造時，石匠四至，各呈其藝。有獻石獅子者，其髮玲瓏有條理。又一人所獻，其口開處不容指，有珠圓轉在口中，殆不可測。元豐八年，轉運副使土子京，圖橋以進，朝命嘉賞。」橋之北亭，榜曰洛陽之橋，趙岸書。又有亭曰濟亨，趙不貽書也。宋末，太學生葉李者，富春人，賈似道爲相，置公田關子法，甚病民，中外毋敢指議。李與同舍生康棣等八十三人，伏闕上書攻之，似道知書出李，嗾其黨林安尹、劉良貴誣李用黃金飾齋區，鍛鍊成獄，竄漳州。似道貶竄，會李赦歸相遇，贈以詩，云：「余歸路，君來路，天理昭昭胡不悟？公田關會竟何如？仔細思量真自誤。雷州戶，崖州戶，人生會有相逢處。客中邂逅欠蒸羊，聊贈一篇長短句。」蓋在是橋之上。

晉江 晉南渡時，衣冠沿江而居，故名晉江。納本邑西北與南安、永春、安溪之水達於江，以入於

海。南安之水曰金溪，永春之水曰桃溪，安溪之水曰藍溪，桃、藍二溪會於南安雙溪，歷金溪、黃龍二溪，東逕於筍江，又東逕於浯江，又東逕於溜石江，又東逕於法石、石頭、聖姑，達於岱嶼，人於海。

筍江 在臨漳門石塔山下。宋皇祐初，郡守陸廣造舟爲櫟，名曰履坦，俗呼浮橋。嘉祐中，守盧革重修，改曰濟民。元豐七年，轉運判官謝仲規重修，改曰通濟。紹興三十年，陳孝則、知柔二公倡，令僧文繪作石橋，長八十餘丈。王忠文作《石筍橋詩》記之：「刺桐爲城石爲筍，萬壑西來流不盡。黃龍窟宅占上游，呼吸風濤勢湍緊。怒潮拍岸鳴霹靂，淫潦滔天沒畦畛。行人欲渡無翼飛，魚腹蛟涎吁可憫。二三大士爲時出，目睹狂瀾心不忍。小試閑居濟川手，遠水孤舟寇忠愍。亦有山僧願力深，解使邦人捐倉囷。五丁挽石投浩渺，萬指琢山登礧礧。辛勤填海効精衛，突兀橫空飛海蜃。趾於千尺蛟人室，護以兩旁獅子楯。南通百粵北三吳，擔負輿肩走駉牝。論功不減商舟楫，遭利宜書漢平準。」其在五代時，有開元寺僧釋文展者，秉戒高潔，不就王延彬之招，積薪自焚，囑徒以骨投此江。旣焚，舍利自飛江上。

浯江 在德濟門外，筍江下流。有順濟橋。故以舟渡，宋嘉定四年，守鄒應龍造石橋，長一百五十餘丈，翼以扶欄，以直順濟官，名橋順濟，俗以其造於石筍橋之後，呼曰新橋。

溜石江 水自東流，逆而北，環城東南，復東行。有行舟之險。江上塔，萬曆間所造。是守蔡善繼建，以祝邦人狀元及第者。旣成，邑人莊際昌應之。

蚶江 在溜石江下。地饒魚鹽，而苦卑隲。宋元符間，僧懷應甃石爲路，自北暨南，凡二十里，中爲巨橋三：曰前埭，曰林灣，曰高港。

盧溪

凌斜溪 會花山飲坑之水，西流五里，至南安澗埕渡，與南安、永春、安溪之水會，而東達於晉江。

金溪 見香爐山下。

康溪 自北髻山，與乾元、院山二水合流，至林田橋。過龍濟、永安二橋，注於是溪。溪中巨石峻激。宋慶元二年，僧紹傑建橋溪上，曰康溪橋。石獅山、白水巖、香嶺山三水，與施陂之水，皆來會於是溪。

長溪 大帽諸山，凡九水合注，達於留公陂者也。

濠市溪 受康溪之水。宋大觀，僧宗爽爲橋，後久廢。邑人俞大猷爲童子時，父攜以涉，曰：「長能興此乎？」曰：「能。」隆慶中，橋焉。

磁窰溪 自南安蟹眼坑之水，迤東達九溪，至是溪，經吟嘯橋，入煙浦埭，以歸於海，有磁市橋，里人蘇展所建。吟嘯橋，咸平中邑人王養及僧行珍所造。《圖經》載歐陽詹嘯咏於此。

葛洲溪 自南安洪嶺、湖洋、五峰諸山，爲九溪，合於礮溪。梅花溪，以及諸山畔大小溪澗，凡有九十，俱會於清洋陂，分經大橋，至潘湖小橋，至黃江，復會於吟嘯浦東北，歷結磚橋，滙於煙浦埭，出溜石六斗門，入於晉江。

錢塘溪 滙仙塘、蘇陂、吳陂、桃陂、相字陂、官陂六水，合爲陂頭。自陂頭合流，爲吟嘯，以入於煙浦埭。

東湖 在城東一里許。郡境諸湖，此爲最大。唐貞元中，席相爲守，置酒湖上，宴赴舉秀才。歐陽詹爲序。湖上復有二公亭，亦詹所記。此時湖面可四十頃。其後，茭葑壅塞。宋慶元春，守劉穎濬之，積土

湖中，爲四山。置斗門四於西南隅，因以爲放生池，歲久侵廢。淳祐三年，守顏頤仲復濬之，又積土湖中，爲三山。以故，郡人名湖曰七星湖也。皇朝天啟五年，守沈翹楚濬之，起湖中土，聯七星若斗柄。然邦人卽二公亭址作亭，曰攬古。歐陽詹序曰：「貢士有宴，我牧席公新禮也。貞元癸酉歲，邑有秀士八人，公將薦之於闕下。古者，相祖有享，有宴，享以昭恭儉，宴以示慈惠。二典爲用，鮮或克兼。諸侯升俊造，於天子遣之日，惟行鄉飲酒之禮，則享禮也。載肉玄酒，莫飲莫食。公念肉不使食，則仁不下浹；酒不使飲，則權不上交，方欲激邦俗於流醺，致王人於德行，而賢者仁未伊浹，才者權未我交，其若蚩蚩何。秋七月，與八人者，鄉飲之禮既修，乃加之以宴。餽移己膳，醴出家醞，求絲桐匏竹以將之，選華軒勝景以光之。後一日，遂有東湖亭之會，公削桑梓之禮，執賓主之儀，揖讓升堂，雍容就筵，樂遍作而性情不流，爵無算而儀刑有肅。鏘鏘焉，濟濟焉。於是老幼來窺，盡室盈岐，非其親懿，則其閭里，皆內訟而誓遷善焉。嗚呼！行其教，不必耳提而口授；移其風，不必門扇而戶吹。公斯宴，則風移教行其間矣。真盡心竭誠，奉主化民之宰也。煙景未暮，酒德俱飽，有逡巡避位而言曰：『夫詩者，有以美盛德之形容，君侯因片善附小能，迴一邑之心，成一邑之行，昭吾人恭儉於嘉享，示吾人慈惠於清宴。迴人心行，周、孔之才也。昭恭儉，示慈惠，管、晏之賢也。不有歌詠，其如六義何？』是日，人有《甘棠》、《頰宮》之什，客有天水姜閱、河東裴參和、潁川陳詡、邑人濟陽蔡沼，佐贊盛事，亦獻雅章。小子，公之賁，幸鼓微聲，先八人者鳴，捧豆伺徹，時在公之側。睹衆君子之作，遂作卜商之後，書其旨。」其《二公亭記》曰：「勝屋曰亭，優爲之名也。古者創棟宇，纔禦風雨，從時適體，未盡其要，則夏寢冬室，春臺秋戶，寒暑酷受，不能自減。及中古，乃有樓、觀、臺、榭，異於平居，所以便春夏而陶堙鬱也。樓則重構，功用倍也。觀亦再成，勤勞厚

也。臺煩版築，榭加欄檻，暢耳目，達神氣，就則就矣，量其才力，實猶有靈。近代襲古增妙者，更作爲亭。亭也者，藉之於人，則與樓觀臺榭同；制之於人，則與樓觀臺榭異。無重構再成之糜費，加版築欄檻之可處，事約而用博，賢人君子多建之，皆選諸勝境。今年暮春月，邦牧安定席公，別駕置同正員天水姜公，念茲邦川逼溟渤，山連滄梧，炎氣時迴，濕雲多來，又日臨胃次，斗建辰位，和氣將阻，畏景方至。《月令》云：『可以升山陵，可以居高明』，蓋謂是月。況地理卑，卑而不擇爽垲，以蕩夫污虐乎？因問風俗，相原隰，郭東里所共得奇阜，高不至崇，卑不至夷，形勢廣袤，四隅若一。舍之以澄湖萬頃，揖之以危峰千嶺。點圓水之心，當奔崖之前。如鏡之紐，狀龜之首。二公止旌輿以迴睇，假魚舟而上陟。幕煙茵草，翫憚移日。心謀意籌，有建亭之算，而未之言也。二公既歸，邑人踵公游於斯者，如市登中，隆觀媚麗，前來後至，異口同辭。昔漢帝不曰：『百姓安其田里，而無愁怨之聲者，其出良二千石乎？』是謂政平教成，時和境清，使俗泰而民以寧者也。《虞書》不曰『股肱良哉，庶事康哉』？是謂翼帝藩皇，調陰序陽，使物阜而民以昌者也。席公今日之化育，吾徒是以寧；姜公昔歲之弼諧，吾徒是以昌。且以之寧，又以之昌，豈悌君子也。《詩》云：『豈弟君子，民之父母』，二公真吾父母矣。今茲阜，二公攸選，尚而加愛，務休訟簡，必復斯至，上露下蕪，忍令父母憇之乎？遂偕發爲公就亭之如牆，而前陳誠於縣尹。縣尹允其請，而爲之辨方、經墟、等周、環當、上頂，誠奢訓簡，以授子來。於是家有餘糧，圃有餘木，或掬一抔土焉，或剪一枝材焉。一心百身，蜂還蟻往，榛藂不去以自難，瓦甃無脛而莽華。一之日，斤斧之功畢；二之日，圻垠之傭息，再晨而成，二公莫知。層梁逗以中豁，飛甍翼而四翥，東南西北方不殊致。糊白墳以呈素，腰頰壤而垂繪。通以虹橋，綴以綺樹。華而非侈，儉而不陋。煙水交游，巖巒疊迴。精舍奉其旁達，都城企其遐。

際，容影光彩，搖潏人瀾，指朱軒於潭底，閱雲岑乎波裏。橫潢油演，如飛若動。又釣人飄飄於左右，游禽出沒乎前後。一盼一睎，千趣萬態，稅息之者，若在蓬壺方丈之上。二公重清曠於舊賞，納衷懇乎群庶，尋幽採異，常於斯勞。賓租客常於斯加。以平疇間關通途，在下可以親耕耨，可以採謳謠，作一亭而衆美具。噫！天造茲阜，其固與人爲亭歟！不然，何不遠郭郭，而博敞詭秀之。若此非常之地，意待非常之人，故越千萬祀，而至二公方觀也。邑人想之，復言曰：『事無隱義，物有正名。地爲二公而見，亭從二公而建。斯亭也，可署曰二公亭。』雖薨葬之云，中實有謂二公不忽，遂以爲號。小子藝忝於文，曾觀光上國，去之日，歷越游吳，歸之辰，踰荆泛漢，會稽之蘭亭、姑蘇之華亭、襄陽峴首、豫章湖中，皆古今稱爲佳境。或棟宇猶在，或基址未沒，山川物象，遍得而覽，方之於此，遠有慚德。懿哉！二公智周德厚，卜地於此，感民若彼，某非飾說。人吾邑者，升吾亭者知之。古之制器物，造宮室，咸有銘頌，以昭其義。斯亭也，豈無効古而爲之章句者？小子薄劣，不敢議其事，粗述其旨，始爲之記。兼借二公之名，紀於左，以爲邦榮。在位賓僚，亦以序從公而列。貞元九年三月二十五日記。』後以萬媼現靈於此，名萬婆湖矣。媼，故居東湖之上，生能爲人療病，黃巢寇閩，媼現靈告巢寇曰：『泉未可犯也。』未說州中境，且看東湖一萬家。』巢衆駭遁，州賴以全。泉人祀之，守臣王潮，請封護國英烈萬氏仙妃。宋梁文靖公病，禱神有應，復卽城東地墮祀之，而爲之記。守王十朋詩：『湖光照我眼，荷香清我襟。平疇入遠望，歲有其自今。牛眠種已畢，蛤吠苗初深。古亭懷二公，遙望羅千岑。』與東湖隔一街者，曰尚書塘，唐刺史趙昌所鑿。又州北一里，有僕射塘，唐刺史馬總所鑿，總贈右僕射，故以名之。皆古蹟也。

潘湖 歐陽詹宅在其下。沿湖而居者，絃誦相聞。

龍湖、應湖 二湖相去僅咫尺，周圍可二十里，龍湖大而應湖小，龍湖水綠，應湖水赤。二湖若雌雄然。龍湖舊傳與海通，湧沙界其中，或見龍出沒焉。應湖云舊有應患，因創佛祠，遂息。真文忠《龍湖禱雨詞》：「晉之南，龍湖在焉。淵澄瑩徹，周數十里。蓋有神物宅其中，二湖之草，可以收。二湖之藻，可以糞。湖有水龜，翼而飛如漆蟲，可以饌，表以嘉名曰龍龜。每冬有鳥從海外來，宿食百千無算，名過冬鳥。既得魚藻之饒，肥不能舉。居民以冬至三日，放風箏粘之以實湖，賦出三日，聽無賦之家粘取焉。」

植壁港 滙橫山以南諸澗之入於海者。

陳坑港 沿植壁而南，滙井尾埭、烽火埭、西湖諸水之趨於海者。

玉瀾浦 滙靈源山東南諸澗之流之趨於海者。

煙浦埭 堰水曰埭。埭九十有四，煙浦最大。承九十九溪來，廣袤五六里，襟帶南鄉三十六埭，綿亘永清、和風、永福、永樂、沙塘、聚仁六里。縣田三分之一仰溉於茲。昔有吳翁築之，罄貲不就，飲恨投水，鄉人廟祀之，後人因而成焉。其埭三萬丈，斗門四間，皆因天然全石，與陳埭斗門共爲尾閭泄水。宋治平二年，洪水埭壞。熙寧初，邑人林知請於令危雍，重修之。貸粟種以予耕民，民德焉。建中靖國元年，復壞，尉黃願補其隙，仍廣開諸淮以通水。靖康元年，壞益甚。紹興六年，邑人李密、李國表，復請築於令洪元英，以僧祖派、體柔領其事。既成，守劉子羽以聞於朝，錫洪元英服，祖派賜「慈惠大師」。民爲洪立祠，以祖派、體柔從。危、黃皆立祠，以林知從。州人王瑀爲記。

陳埭 陳洪進所築。受吟嘯浦東南流，及羅裳東北諸澗，至於西南，分爲衆港。從二斗門，以入於海。鄉曰陳埭。鄉上哈之亭，百鮮所聚。溝東之人丁，溝西之人林，皆衣冠之族也。居人無井，以溝水爲

食。

七首塘 塘四十有二，七首最大，皆天塘也。曰古塘，曰盈塘，曰砂塘，曰小砂塘，曰淤田塘，曰象畔塘，曰龜湖塘。七首之中，盈塘、砂塘最大。塘中有嶼，群峰奇聳，大砂塘則與盈塘相會。小砂塘一名濯纓，以其水清於大砂塘。淤田塘，中有石牛，水漲下沒，鳴則埤堤潰。邑南鄉故乏水利，皆仰七塘。塘水無源，易盈易涸，諺曰：「七塘不乾，南鄉加餐。」近塘之鄉曰下碇，曰長市。下碇之橋，長可里許，軒然田中。長市之民，集髮爲髻，鬻通於江浙賈人，而徽賈爲盛。

陂洋塘 陂八十有二，陂洋陂最大。邑南鄉田口下浯洋，曰沿江洋，曰吟嘯洋，曰潘湖洋，曰池店洋，曰新店洋，曰溝頭洋，曰下埭洋，曰陳翁洋，曰孤帆洋，俱受溉焉。自煙浦而西，水之小者有溪，大者有浦。令危雍旣築煙浦，又相溪浦分流之際，築土爲陂，以灌溪旁田。自南安九溪，至於高溪，凡三十六水，合流數百里，而後爲陂。自陂而下，爲拱塘，爲蘇塘，亦紮迴十餘里而後止。所溉之田千有八百頃。官爲立約，以年高者一人爲之長，次陂長，塘長，聯事分幹，每歲春運土築作，然遇霖溢則壞。淳熙七年，邑人林邦聞與僧了性，始累石埤之，且爲三梁，以泄時水。其長一百八十尺，廣二丈有咫。修小陂於支流者五，爲斗門於下流者七，陂之南北，增築長埤，各三倍，其長之數，尉陳凱爲記。凡諸港浦、埭塘，皆古人填海而成之，所謂「閩在岐海中」也。沿海之民，則魚鮮羸蛤爲業，其沿港、浦、埭、塘而居者，泉無源，田易涸，皆羸而資生。陳坑之民，織竹以爲器；龜湖之民，細布而善釀；下浯之民，織蓆榨油；溝頭之民，陶瓦磚，拱塘之民，線豬瘠土，食業不以傳女婚。

治平陂 與西坂湄陂、上福湄陂、南斗門陂俱受九溪之水。西坂、上福二陂爲上溝，斗門治平爲下

溝，上溝水多，則直放之，下溝旱，則上溝專畜焉。

韓陂 俗名曾陂。水自石壁陂、大房陂、觀音陂，會爲大浦，達於是陂。至南安牛角潭，會永春、安溪之水，出金溪橋。

留公陂 舊名豐谷陂。宋右史留元剛築以灌其庄田者，今俗呼陳三堤。皇朝嘉靖中，守屠僑王士俊先後收壞。

天水淮 在通淮門外之南洋。其出瀕海苦鹹。唐守趙榮鑿清渠，作三十六涵，納筍、浯二水以灌之。取趙姓望，名其淮曰天水淮。今下圍是也。蓋方言謂「淮」爲「圍」云，但《釋名》曰：「淮，圍也。圍繞揚州北界，東至於海也。」則雖屬方言，乃原古義。後陳洪進重興，改曰節度淮。宋守曹修睦，再浚治之，別營三涵，視潮汐爲啟閉。

聖泉 在郡城鎮雅坊。湧泉尊者扣杖而出。

真湧泉 在宋護安院前。名最著。

玉泉 舊有廣濟院。五代時，留從効與朱文進交兵於此，殺傷甚衆，因坎地瘞之，名千人塚，復建是院，以薦冥魂。

樟木泉 周顯德中，歲旱。禱神，一夕雷震古樟木，泉自中出。

鍊丹井 在宋天慶觀東。或云吳崇岳遺跡。崇岳，惠安人，入龍興觀爲道士，休糧輕身。觀有古松，常攝木屐拜禮松杪。轉運使周公謂行部，謁見之，因與西行，至德化縣東，有松高百尺，上有鶴巢，周命登之，師出巢顛，飛步拜禮，與枝低昂。周贈詩云：「楮子爲冠布爲裳，吞得丹霞壽最長。混俗性靈常樂道，

出塵風格早休糧。枕中經妙誰傳與，肘後方新自寫將。百尺松梢便飛去，鶴棲枝上禮虛皇。」以名聞，召赴闕，賜號「通玄先生」，年七十餘解化。

南安縣 在郡城西。東抵晉江，西抵安溪，南抵同安，北抵永春。梁爲南安郡。隋廢郡改縣，曰南安，屬建安郡。唐武德五年，置豐州於此。貞觀初，州廢屬泉州，今福州也。嗣聖十六年，爲武榮州，尋廢，仍屬泉州。十七年復爲武榮州。景雲二年，屬泉州，今泉州也。宋元仍舊。皇朝因之，城內爲坊五，都四十四，（一）統圖五十。

城內坊五，各統圖一。

一都，圖一。宋修文里。山曰九日、金鷄。溪曰金溪、黃龍。

二都，圖二。宋修文里。山曰圭峰。渡曰黃石。

三都，圖一。宋昭文里。山曰葵山、吳亭、西山、翠屏、龍山、潘山。溪曰鵬溪。

四都，圖一。宋爲崇化、遵教二里。潭曰龍潭。

五都，圖一。宋靈感里。山曰瑞峰。

六、七都，圖一。宋嘉禾里，亦曰薊葉。山曰明心。潭曰弓潭。

八都，圖一。宋趨庭里。山曰卓雲、樂山。

九、十都，圖一。宋崇和里。山曰胡洋。

十一都，圖一。宋太平里。山曰高蓋。

十二都，圖一。宋清風里。山口大柱巖、郭山。

十三都，圖一。宋清風里。山口高田、梁山。潭口吳潭。

十四都，圖一。宋崇安里。山口天竺。

十五都，圖一。宋繇風里。山口洪巖。寮曰仙人。井曰小石。

十六都，圖一。宋民壽里。山口城山、汰口、龍卧、白龜。

十七都，圖一。宋崇仁里。山口卧龍、香爐。

十八都，圖一。宋豐年里。山口文筆、廬嶺。

十九都，圖一。宋豐年里。山口龍源、楊梅。溪曰洪灘。

二十都，圖一。宋依仁里。山口齊雲。峰曰金石。

二十一都，圖一。宋禮順里。山口瓊山、福壽。

二十二都，圖一。宋禮順里。山口雙溪、大安。溪曰雙溪。

二十三都，圖一。宋清歌里。

二十四都，圖一。宋仁德里。山口御看。巖曰報巖。津口劍津。井曰龍井。

二十五都，圖一。宋仁德里。

二十六都，圖一。宋崇仁里。山口高鎮、大宇。

二十七都，圖一。宋經善里。山口英山、九仰。

二十八都，圖一。宋經善里。山口翔雲、大羅。

二十九都，圖一。宋崇順里。山曰困山、苦竹、南坑、榮第、蟹坑。井曰湯井。

三十都，圖一。宋歸仁里。山曰小郡、蔡嶺、梅花、鵝眼、大帽、五峰、北陽巖。(二)

三十一都，圖一。宋崇善里。山曰平洋、(三)龜脰、小楊梅、福泉。井曰夜光。

三十二都，圖一。宋田豐里。山曰雲臺、堆美、羅水、福泉。嶺曰八尺。

三十三都，圖一。宋興集里。山曰烏石。

三十四都，圖一。宋興集里。山曰鳳棲、謝墓、三公、松崎。嶺曰梅花。

三十五都，圖一。宋欽風里。山曰半月、五峰、谷口、蔡山。嶺曰白雲。

三十六都，圖一。宋清化里。山曰壺公。

三十七都，圖一。宋長樂里。山曰困山、鷹鴉、柏峰、留旆、龍潭。溪曰九溪。

三十八都，圖一。宋長樂里。山曰雄山、仙境。

三十九都，圖一。宋常安里。山曰鷄暮、大豐。(四)

四十都，圖一。宋常安里。山曰覆鼎。

四十一都，圖一。宋崇教里。溪曰壽溪。

四十二都，圖一。宋崇教里。

四十三都，圖一。宋崇教里。山曰楊子、黃漸。

四十四都，圖一。宋興福里。山曰華表。

四十五都，圖一。宋興福里。山曰象陷。

四十六都，圖一。宋興福里。

九日、姜相高峰環拱於右，佛跡、靈秀二山盤迴於左，揖紫帽、獅子之奇，抱金鷄、黃龍之秀。其形勝也。

山

葵山 自郡雙陽山西北來。山有疊石如筴，號「疊經石」。宋時，上有法華院，下有三華院。唐翰林承旨韓偓、宋邕州守蘇軾、威武軍節度招討使傅實、左丞初寮先生王安中，皆葬是麓。偓，字致光，京兆人。龍紀元年進士，累遷諫議大夫、翰林學士。昭宗幸鳳翔，進兵部侍郎承旨。昭宗反正，勵精政事，偓處可機密，率與意合，欲相，再三讓不敢受。而朱全忠欲害之，貶濮州司馬。昭宗執偓手，流涕曰：「左右無人矣！」再貶榮懿尉，徙鄧州司馬。昭宗既弒，哀帝復召爲學士，還故官。偓不敢入朝，挈族依王審知，寓居南安。三年，復有前命，偓復辭，爲詩曰：「豈獨鴟夷解歸去，五湖漁艇且饋糟。」是年，全忠篡唐爲梁。乾化三年，復召，亦辭不往。明年，梁亡。均王十一年，卒於邑之龍興寺。偓所著有《內庭集》、《金鑾別記》。自貶後，以甲子歷歷自記所在。其詩皆手寫成卷。宋嘉祐間，裔孫奕出以示人，龐穎公籍爲漕，取奏之，因得官。世傳偓別本有《香奩記》，率艷麗之辭。沈括《筆談》以爲和凝所作。凝既貴，惡其側艷，詭稱偓著。或謂江南韓熙載所爲，誤爲偓也。葉石林謂：偓兩召不行，非特避禍，蓋終身不食梁祿，其大節與司空表聖略相等。安中，字履道，陽曲人。舉進士，歷秘書省著作郎。徽宗見其箋表，稱爲奇才，遂以爲中書舍人，累遷御史中丞。屢言事，以宣撫使知燕山府。同知府事者郭藥師，故遼降將，跋扈專行，安中不能制，卒致藥師之叛。及爲檢校太保建雄軍節度使，言者論其前事，罷爲觀文殿大學士，尋貶單州。

團練使、象州安置。高宗卽位，內徙道州，尋放自便。子辟章，知泉州，迎安中就養，未幾卒。安中爲文，豐潤敏拔，尤工四六。侍宴，徽宗命賦詩百韵，賞歎不已，令大書於屏几，侍臣皆以副本賜之。有《初寮集》七十卷。李漢老序之，曰：「初寮先生太保王公，自布衣以名稱天下，甲東觀，人掖垣，由烏府登龍禁，皆天下第一，選司內外制者累年。體大而義嚴，事覈而旨深。奇不失正，雄不爲誇。蓋與本朝張安道、王禹玉、元厚之、蘇子瞻數公不相上下，而馳驟乎燕許常楊之域。自徽宗卽位以來，擅制誥之美者，公一人而已。」緘，見同安。實，今南安傅氏之祖也。山西北行，爲九峰山，爲蓮花峰，爲武榮山，而縣治在焉。九峰山，其山九突，峰頂有巖，曰西華。宋郡守謝臺勸，西華九峰「四字於石。又有「真一泉」三大字，蓋取蘇子瞻《乳泉賦》語。蓮花峰，聳開八石，若蓮花然。峰左有宋熙寧中邑人戴忱刻詩。元豐中，有真覺添志大師居之。師姓陳，永春人，故通直城伯兄也。得佛秘密印，住巖時，持戒如冰雪。從巖居者數百人，皆心如牆壁。後游京師，王公貴人檀施如山，而粗衣刺食。徽宗在潛邸時，陳太后病，師咒水治疾，有功。元祐元年，奉陳太后懿旨，詔入內，祝遂寧王壽，勅賜袈裟袈裟金環繒鈎。哲宗御書貽之。續乞得秀州福巖居止。著作佐郎黃庭堅爲作《蓮花巖銘》曰：「自古在昔，雷雨電擊，天開八石，青蓮趺鄂。中有巖壁，狀數宴息。大士密跡，置鉢倚錫。蛇虺避宅，虎豹服役。行人護戒，如龜藏六。以戒爲甲，如蓮生泥，不染香色，維巖居無斁。」庭堅銘，蓋略倣秦碑之體。又贈詩云：「蒲團木榻付禪翁，茶鼎熏鑪與客同。萬戶參差寫明月，一家寥落共清風。」刑部侍郎陳軒亦嘗贈之詩：「車輪馬足袈裟風煙，競看成都萬炬燃。獨我踏開庭下雪，伴師同坐一庵禪。」厥後，陳休齋知柔、朱文公、廖允、翁信孫諸公來游，皆有題咏。忱詩：「此石非頑石，成因浩劫塵。一蓮花不老，過盡世間春。」今有亭名「不老」，蓋取忱詩。

九日山 在縣西。邑人以重九登高於此，或謂有道人言：「吾自戴雲山來此，九日乃到」，因以名之。山奧衍明秀，溪流演漾，峰巒映發，隱爲一區。自晉以來，縉紳先生以及方外之侶，並從探憩。至唐，秦系棲隱於此，穴硯注《老》。時則山中有松樹千章，盡東晉時物，鬱然幽閤，加以姜公輔、韓偓先後寄寓，遂以名勝。至宋，則士大夫餞送雅集，畢會於此。而延平陳偁兩守泉州，其子瑩中作山房讀書。鄒志完、郭祥正功父俱來過之。紹興丙子，朱文公尉同秩滿，就宿此山。傳竹隱伯成，載酒幙被，泛舟弄月，劇飲放歌。此時文公方二十七歲，去之三十年，爲淳熙乙巳，請祠家居，復來重游，與陳休齋知柔，賦詩懷古，而茲山益增重矣。姜公輔所居峰，在九日山東，慶曆四年，蘇魏公紳大書「姜相峰」三字於石。峰頂有磴，可坐數人。宋人有《姜相臺詩》。《曾楚公會寺記》稱東峰亭基，蓋姜相尋幽而營棟者也。公輔沒，并葬於是。秦系所居，在九日峰西。系，東渡江，邑人爲立亭，號其峰曰「高士」。石刻篆書「高士峰」三字，蒼勁古質，蘇才翁筆也。亭旁因石爲爐、碾、盆、硯，皆系遺物，於今俱在，恨山久如童，無復千章之美矣。按系，字公緒，會稽人。天寶末，避亂入剡。大曆五年，留守薛兼訓得其文，奏爲右衛率府倉曹參軍，辭疾不就。系詩長五言，與劉長卿、韋應物相善，往來酬答，而權德輿評之曰：「長卿自以爲五言長城，系偏師攻之矣。」應物《答系詩》，亦有五言「今日爲君休」之句。久之，客游泉州，隱於是山，穴石爲硯，注《道德經》者彌年，自號「東海釣客」。刺史薛播數往候之，系未嘗一至刺史門。姜公輔謫居，輒築室與近，張建封聞其不可致，請就加校書郎。其後，東渡秣陵，年八十餘卒。公輔，日南人。唐德宗朝爲諫議大夫，同中書門下平章事。德宗幸山南，其長女長安公主道薨，詔所司厚葬之。公輔諫曰：「非久克復京城，公主必須歸葬，今方在道，宜從儉以濟軍興。」德宗怒其賣直售名，罷爲左庶子。以母喪解服，爲右庶

子，不遷者久之。陸贄爲相，公輔向贄求遷，贄密謂曰：「竇丞相擬公官屢矣。上旨不允，尚怒公也。」公輔懼，請爲道士。未報。後又庭奏問故，以贄語對。德宗怒，黜爲泉州別駕。來泉居九日山，築室與秦系相近。順宗立，拜吉州刺史，未之官而卒，系爲葬之山中。山麓有寺，曰延福，其始晉太康中所創，去山二里許，其移山麓，則唐大曆三年。寺額歐陽四門所書也。大中五年，賜名「建造寺」。五代劉乙詩：「曾見畫圖勞健羨，如今親見畫猶粗。」山之勝，故可見矣。寺，故五十有四，宋元豐間，合爲延福禪寺。云有三十六奇：曰神運殿。神運殿者，唐咸通中，僧初建殿，求材於永春之樂山，遇一隻指引其處，是夕又夢許護送。旣一日，江水暴漲，其筏自至，若神齋運，故以名殿。曰靈岳祠，謂指木之叟，樂山之神也。祠以祀之，水旱疫癘，海舶祈風，輒見徵應。宋時累封通遠王，賜廟額「昭惠」。其後迭加至「善利廣福顯濟」六字，詳見永春縣樂山。風之祈也，蓋宋時，泉有市舶，郡守歲以四月十一日同市舶提舉率屬以禱。宣和二年，提舉張祐陛辭，朝廷至頒御香詣殿焚之，其重如此。曰肉身土，姓陳，名益，熙寧間有西夏之警，詔求勇敢士，郡守辟益爲巡轄官。元豐間，從守祈風，睹廟之靈，誓捨身爲佐，遂植杖立化。僧泥益軀，別祠奉之。淳祐中累封「仁福王」。曰檀樾林，云昔殿宇甫成，夜有神人，擁徒歷觀，俄隱於林間，每遇陰雨，其中有燈自明。曰菩薩坑。曰仙人橋。曰石佛巖，陳洪進因山石鑄佛焉。乾道中，僧無可建軒曰琴泉，朱文公書匾曰東峰道場。曰秦君亭。曰姜相臺。曰無等巖。無等，唐時禪師也，會稽人，居石室四十年不出。刺史盧仝白三請不至，遣使仗劍云：「不下山，取頭來。」無等禪寂自若，曰：「身非我有，而況頭耶？」使者還報，仝白嘆曰：「空生之道，一至是乎！」爲詩贈之曰：「九日峰前八十秋，禪庵遙枕晉江流。師心應共山無動，笑指雲霞早晚休。」曰放生池，通遠王神，宋時最爲靈著，州人祈禱，翁赫酒肉，滂施

及乎散昨。飲福觴豆，雜進歌喧紛藉。住山僧禪師慧邃曰：「五教，殺爲大戒，神實依佛。」其有不從，卜於神曰：「其誠易殺爲仁，則兆吉。」吉矣。又曰：「其誠却葷茹爲蔬食，則兆吉。」吉矣。慧邃曰：「神許我哉。」號於衆曰：「吾教有所謂水陸會者，化刀鋒爲金淨土，化鑊湯爲花池；化鍼喉爲火喙，爲天人，化洋銅熱鐵爲香飲。以一色一香爲無邊，以十方三世爲一會。余將爲是會以報神功。」於是，作水陸堂、放生池，歲救物命，不知凡幾。李邕爲之記云。曰御書閣，以藏勅書。曰墨妙堂。堂在奉先院中。林少卿以東壁有蔡忠惠詩，因以墨妙名之。忠惠東壁詩曰：「日照溪山生翠光，春深花草雜幽香。登臨誰識遲留意，門外埃塵去路長。」末云：莆陽蔡襄，慶曆四年二月二十日入延福寺，登秦君亭，觀白雲井，訪北臺，還書奉先東壁。「忠惠字刻在泉郡，凡六，三在寺，一在州治，一在郡庠，一在洛陽之溪。在寺者，此其一也。泉自唐馬懿公總出守，以儒雅稱。而姜公輔以相國廬山下，席相、秦系從之游。內相韓偓寓居此寺中，多題咏。郡人若歐陽四門、林御史昆弟史躡、盛昭州均，與李山之沂、周處士朴，及宋初諸公，題刻亦多，大抵磨滅。巖崖間獨忠惠詩刻巋然。奉先之堂，當以其書重矣。僧無可，因堂壁有忠惠書，遂併取柯氏所藏蘇子瞻《瑞鵲詩》，及黃魯直《蓮花銘》，陳瑩中詩若帖，並列壁中。當其世者，若大參李漢老、謝任伯郎、儒冠先溫叔皮詩贊，亦並附焉，求陳知柔記之。曰亂峰軒，亦無可所建。曰聚秀閣。曰廓然亭，亭在山半。宋元豐間，天台可師建。朱文公有詩曰：思古臺，臺在山阿，文公書亭匾曰：仰高，蓋景行姜、秦二公之意。曰釣臺。曰一眺石。曰翻經石，梁普通中，梵僧拘羅那佗翻譯《金剛經》於石上。曰碧玉峽。兩石並立，在山之陽，張思詩：「野迥方知天廣大，身高更覺石岩嶢。泉人試爲平章看，勝絕何如透碧霄。」透碧霄者，泉清源山巖也。曰小清涼石。曰石龜。曰石碾。曰石盆。曰石峴，隱君遺物也。曰自然磔殿。西

有石如礎，自然天立，當時因以架柱。曰白雲井，在北峰之南，唐進士傅筍寄榻於茲。旭旦汲水，見雲覆井上，波湧其中，有龍躍起，又名釣龍井云。曰惠泉。曰翠光亭。亭在寺前，天光雲影，上下輝映。曰晉朝松。偃蹇蟠屈，異於常木，寺有老僧獨坐，志謂晉時所有也。或天陰雨，晴時，有龍攫其上。曰無名木，宋時木也，而莫識其名，王龜齡詩：「一木蒼然老更奇，肯將名與世人知。我來不具知名眼，深愧平生未學詩。」曰醉石。在高士峰頂，有池一區，其草如茵，可以醉客。曰砌石庭。庭今猶在，廣庭也。此三十六奇矣。

寺後復有菩薩泉，泉無源也，而出盤石中，奔湍漱響，當其湧時，名僧生焉。皇朝有僧天闢者，隱居是山。邑簿邵惟善贈以詩：「居山不如延福清，構屋不如翠光亭。流水迴環此亭下，一派百折絲桐鳴。禪家老衲僧天闢，黃而傳來人不識。九日山下放牛歸，摸得擦天白日隙。一人深山四十年，高卧禪床聽雨眠。常時會客此亭下，班床列坐如神仙。近年亭前山水碧，古冶龍泉匣中出。昨者我游九日山，天闢贈我青琅玕。惜無瓊瑤以足報，且期松栢同歲寒。」讀惟善詩，天闢爲人，可想見也。隆慶中，安溪詹仰庇葬孔希島其下，而志之曰：「希島不知何許人，善鼓琴，遨游海上，問其家，不答。問其年，不知也。冬葛夏裘，遺之錢不受，受輒以與人。時慷慨取琴鼓數行，遇豪貴客，輒避去，強之鼓，弗鼓。往來泉中四十年，貌不加老。有客知之者，曰此地仙也。與顏陀頭各百三十歲，後卒葬於是山。」北有獅巖，黃氏始祖葬焉。

金鷄山 在縣西。飛陽舊地也。相傳有金鷄飛止，因以名之。下有古渡，名金鷄渡。宋時爲橋，名「通濟」，今曰「金鷄橋」矣。古識云：「金溪通人行，狀元方始生。」宋給事江常將葬母，造浮梁以濟，起宣

和，至建炎丁未而橋成。是歲梁文靖克家實生，蓋應識云。歲久梁壞，嘉定間，守葉廷珪命僧守淨募緣豎石墩十七，墩去地四十尺，架梁覆閣，如反宇飛觀。守淨道力，語在晉江岱峰山。後被水決，守真德秀命僧惠魁募緣修之。其《緣疏》，出真公手書，邑人以刻石。皇朝永樂初，梁閣災。成化十年，守徐源欲繕之，工云水深。越數月，走報曰：「沙合可舉也。」遂繕焉。每墩架挑木九十有九，鋪巨梁有十，上建長亭八十三間。傍有翼，遮屏三十有四。落成之日，沙忽淘去，水深如舊。弘治癸丑，橋復壞，令黃濟白守李哲重修之。興工之日，橋下沙合如前時。萬曆間，令蔣如京修治如舊。而亭當風易壞，令趙時用撤之，橋如廣衝矣。飛陽廟，古在渚南，唐末，天雨晦冥，飛過溪北，遂以爲號。王審知刺泉，表其靈應，累封飛陽王，最後封昭德王。宋天禧三年，封顯應王，從祀之神三：一姓游名輔，一姓李名弼，一姓林名恭。淳祐中皆封爲侯。蔡君謨守泉，詣廟禱雨，歲以大稔，題詩廟中曰：「年年乞雨問山神，羞見耕耘隴上人。太守自知才德薄，彼蒼何事罪斯民。」王龜齡題其後云：「賢侯去久跡猶遺，乞雨詩奇字更奇。世俗妄論公政猛，愛民心有彼蒼知。」

吳亭山 以舊有吳氏墓亭。轉而左，學宮在焉。

西山 山前後占跡，曰福清，曰廣福，曰白衣彌陀，曰釋迦，曰佛跡，曰報劬，曰秀峰，曰華巖，曰延壽，曰上生，曰資慶，曰瑞峰，曰長興堂，皆近郭勝境。總而名曰西山。福清寺，王延彬所建，以居高麗僧者，僧名玄衲。延彬問：「何如是家乘事？」玄衲叱之。僧問：「如何是物，物上辯明？」玄衲展示一足。佛跡山，唐光啟中夜現光，延彬使視之，見石山有巨人跡，因以名山。山有挺贊、省權、棲岑塔。挺贊，方氏子，無諸人，居州開元寺，參之者虛來實返，靡不自賀。陳洪進治州，益嚴其道，而贊高年矣。宋開寶五

年，入寂。洪進設千齋飯送，闍維有舍利。省權，廿三能律，尋行樞法華說。延彬優禮之。棲岑，梁貞明中開講席於開元，至者如雨，而辦寫、建瓶，皆高僧也。

靈秀山 宋梁公護隱焉。公護，字湯夫，東平丞相適孫，李邕婿也。晦跡不仕，隱於是山。風節高峻，詩翰清美。山上有巖，早禱輒應。後有石室，奉賓盧尊者，是生芬馥之蘭，名曰空相。

翠屏山 界晉南閭，蒼然屏也。

龍山 在縣東。又名九躍山。山頂有龍山巖，巖下有慈民院。山行而西，距三里，勢如龍偃而復起者九。

大小潘山 在大溪北岸，民居湊集。宋時都巡寨在焉，有陳洪進廟。

瑞峰山 在縣北。端銳秀拔，芝蘭梅竹生焉，是名四瑞。地曰梅溪。皇朝陳觀察學伊原族焉。族多衣冠，以其先自王梅溪祠傍徙家，故名梅溪。

〔校記〕

〔一〕「都四十四」，下文實列四十六都。

〔二〕「北陽巖」，各本原作「北洋巖」，據下文及《八閩通志·地理》改。

〔三〕「平洋」，各本原作「平陽」，據下文及《八閩通志·地理》改。

〔四〕「大豐」，下文作「天豐」。

〔五〕「紹興丙子朱文公尉同秩滿」，據朱熹行事，時任同安縣主簿，而非縣尉。

閩書卷之九

方域志

泉州府 南安縣二

山

明心山 在縣西北。其山高大明秀，上有明心寺，祈雨甚靈。邑人黃河清《游記》：「出縣治十里許，遙見一峰，若立若卓，若文筆，若削玉，若蓮花，高出水際者，明心山也。予素望而愛之。一日，游至巖麓，巖道陟絕，但聞人耳聲潺潺，訊與者，曰：『非泉聲乎？』巖棲信宿，覓一藤杖，令二僧隨攜穀醴，溯所聞處，出巖百餘武，樹林茂密，風習習，有泉自樹杪鳴叢薄間，琤琤琮琤，斷續相應。偵樹根，出人於深潭。潭畔多田畦，歲飲其潤。竚立良久，又前數武，一樹立道，周若張蓋。樹下小池一區，周遭可丈許，上有亂石流泉，瀾瀾漱石，齒注於池。予席池傍流觴焉。又里許，泉自高蓋山尖飛動，蜿蜒如舞白虹而下。至山腰，一石蹲立如青壁，泉循壁瀉如垂乳，如懸瀑，聲瀏瀏，趨於壑，壑趨於溪。予跨一石，平如砥，面壁而坐，觀且聽聽，且吟吟，且酌酌。移時，僧曰：『前一泉更清灑可愛，留餘興往。』移里許，遠望氤氳，銀漢浮閃，古水櫟藤蔓纍纍然，泉流蔓中，如蛇如蚓，迤演而行。初不聞聲，遇石穿罅，始砢砢然赴於注。注中之

石，凸者、凹者、跂者、伏者、卧而僵者，皆成象。草木生泉中，作四時青。掬泉嚙之，泉清入骨，灑酒酬泉，投穀核爲侑。從者報曰：「予弗知也。」將登輿，見一坪，約可坐十餘人，語僧曰：「亟爲予作四泉亭，予將記之。」應曰：「諾。」

卓雲山 在縣北。皇朝黃克晦詩：「怪石千迴角，高松徑尺鱗。樹枝低復掛，蛇徑險難遵。」

樂山 在縣北。上有通遠王廟，九日山之通遠王也。以其來自永春之樂山，故沿其名矣。

胡洋山

高蓋山 山頂方平如蓋，名山也。以其有歐陽詹詩，亦名詩山。其下有村，曰詩村。舊傳詹赴舉時，母沒，里人爲葬是山。旣歸，作詩哀母，曰：「高蓋山前日影微，黃昏宿鳥傍林飛。墳前滴酒空垂淚，不見丁寧道早歸。」《大明一統志》亦載是詩，今按韓文公《歐陽生哀辭》，則於沒時父母俱存。考之《永福縣志》，陳嵩詩也。永福縣，亦有高蓋山。然郡人言詹子櫝故居，鄰詩山之下，或櫝詩歟？山北有報慈院，宋開寶八年，僧法圓處訥置。僧，陳氏兄弟也。幼喪父，事母至孝，初卜地建庵，迎母居之，忽遇異人曰：「此去百步，勝地也。」及母卒，絕粒幾隕滅。因迎居其孀居從母，奉如母焉。後請爲院，參政龔公有詩。東去三十里許，爲青山。皇朝有楊守愷者居其下。守愷，山民也。奉母承歡，兄弟不忍析箸，妯娌襁子互乳無間，作亭嶺頭，以愷行者，人名爲孝子亭。又詩村中有井，名仙人井，在大石盤中。舊有漁人釣得雙鬚童子，驚怪而走。他日縋石引絲測之，其深無極。

天柱巖山 其高可以望郡中高山，有天柱巖，有石佛，里名蓬島。四圍八山拱向，中有田數百餘畝。田中凡起數小山，如棋子。俗謂八仙圍棋。

郭山 山有威鎮廟，神姓郭，世居山下，生而神異，意氣豪偉。年十歲時，忽取甕酒，牽牛登山，明日坐絕頂古藤上，垂足而逝，酒盡於器，牛存其骨。已，見夢鄉人，因爲立廟，號將軍廟，偽閩通文中也。宋建炎四年，寇湯勅逼近境，民欲遁走，卜神不許。一日大雨溪漲，寇不能渡，有白衣乘白馬者誘之淺涉，攻具漂流，黠者多溺死。蓋神爲也矣。其後累加「威鎮忠應侯孚惠廣澤」八字，王胄爲記。

高田山 山最高，頂上闢田數十畝。土人種瑞香花，皆高如人許，以其得雨露氣。有葉姓者世居之，宋時有娶宗室女者，封郡馬，閭閻尚在。

梁山 山松舊是梁姓所種，因以名山。

天竺山 在縣北。下有報慈院。皇朝詹仰庇詩：「山結豪光勝，麓緣天竺名。雲陰連片瓦，野色遠孤城。」

洪巖山

城山 山環樹抱，如城郭然。山前有溫泉，泉有四，三熱一溫。

汰口山 在縣北。兩山爭趨，溪出其下。宋僧不睡，伐木爲梁，名汰口橋。其後累增高大，以卧龍山下瞰，名卧龍橋。又宋時有汰口驛，在劉店、鄭山之間。蓋道出尤溪，以避義江之險。其名劉店，以南漢主劉龔祖墓在焉。《五代史》：「劉隱祖安仁，上蔡人也。後徙閩中，商賈南海，因家焉。父謙爲廣州牙將。謙三子：曰隱、台、龔。」知是故寓居南安也。龔，音儼。詹敦仁有《復留從效問龔詩》：「伏羲初畫卦，蒼氏乃製字。點畫有偏傍，陰陽貴協比。古者不嫌名，周人始稱諱。始諱猶未酷，後習轉多忌。或援他代易，或變文迴避。濫觴久滋蔓，傷心日益熾。孫休命子名，吳國尊王意。靈商蠶舛僻，詎足竅龔異。」

梁復踵已非，時亦跡舊事。說杰自其一，蜀闖是其二。鄙哉仇警名，陋矣越端義。大唐有天下，武后擁神器。私制迄無取，古音實相類。率虜囚匡星，胤忠崖丙峯。正圖及望嵐，作史難詳備。唐祚值傾危，劉襲懷僭偽。吁嗟毒蛟輩，睥睨飛龍位。龔、儼雖同音，形體殊乖致。廢學愧未弘，來問辱不棄。奇字難雄博，摘文伏韓智。因誦鄙所聞，敢布諸下吏。」又按《宋史》：有所謂南安縣者，漳州陳元忠客居南海日，嘗赴省試，過南安，會日暮，投宿野人家，茅茨數椽，竹樹茂密可愛，主翁雖麻衣草屨，而舉止談對，宛若士人。几案間，有文集散亂，視之皆經子也。陳叩之曰：「翁訓子讀書乎？」曰：「種園爲生耳。」亦人城市乎？」曰：「十五年不出矣。」問藏書何用？曰：「偶有之耳。」因雜以他語。少焉，風雨暴作，一子捨鉏揖客，人物不類農家子。翁進豆羹享客，不復共談。遲明，別去，陳以事留城中。翼日，見翁倉遑而行，陳追詰之曰：「翁云十五年不出城，何爲到此？」曰：「吾以急事，不容不出。」問之，乃大兒於關外鬻果，失稅爲關吏所拘。陳爲謁監，徵至則已捕送郡。翁與小兒偕詣庭下，長子當杖，翁懇白郡守曰：「某老鈍無能，藉此子贍給。若渠不勝杖，則翼日乏食矣，願以身代之。」小兒曰：「人人豈可受杖？某願代兄。」大兒又以罪在己，甘心焉。三人爭不決，小兒來父耳旁語，若將有所請。翁叱之，兒必欲前。郡守疑之，問呼所以，對曰：「大人元係帶職正郎，宣和間累典州郡。」翁急拽其衣，使退，曰：「兒狂妄言。」守詢詰勅在否？兒曰：「見作一束真鸞中，埋於山下。」守立遣吏隨兒發取，果得之。卽延翁上坐，謝而釋其子。次日，杜駕訪之，室已虛矣。隆慶舊志：《宋史》言漳州陳元忠，客居南海日，嘗赴省試，過南安。若南海爲廣州之南海，則不知所過之南安，或爲南安府，或爲是縣也。舊志刪「客居南海」，而改「城中」爲「泉城」，以實所過爲今南安縣，似出臆度。又江西志亦載此人於南安府，且隱者必在深山之中，今漳州徑南安，咫

尺地耳。恐未必爲今縣也。予友人黃文炤曰：「宋時有汰口驛，道出龍溪，以避義江險，則所涉今縣，固宜迴遠，且漳人自廣過家，以赴省試，還家省視，人情也，記閩中可耳。」

龍卧山 白龜山 卧龍山 香爐山 文筆山 盧嶺山 龍源山 齊雲山

楊梅山 在縣西。有巖曰虎廳，亦名雪峰。義存禪師居是山下修行，此山其父母葬焉，俗名白馬墳。義存，見侯官雪峰山。以其居雪峰得名，故此山亦名雪峰也。巖祀與義存同時禪師，兩傍塑六祖及王審知像，以存上接六祖之傳，而王審知，舊尊禮之也。宋郡守謝臺圖曰曹溪宗派。巖下有蕉芭坂，緩步徑洗心泉、流觴池。

瓊山 在縣西南。中有龍潭，旱禱輒應。又名龍潭山。

福壽山 在縣西。山陰有石鼓峰，峰故名鶴石。初有鶴巢其上，鄉人以其鳴卜水旱。宋李文肅見其石上下相承如鼓，名曰石鼓。

雙溪山 在縣西。永春、安溪雙溪夾流，至此會合，以達金溪。

大安山 在縣西。上有棲真巖，巖中可容數百人。石下有泉脉自石竇出，旱乾不涸。

御看山 在縣西。山巔有泉，曰聖泉，可療眼。

高鎮山 又名鷄髻山。土肥泉甘，多產棗栗。峰下，宋蔡真人父夔嘗居焉。夔爲嶺南節度，歸寓於此。真人名如金，已見晉江清源山。有翠峰屏，蓋隱者宴坐之所。有天成洞穴，詹道人居之。道人精針灸，有時不食，連日酣寢，人目曰鶴鶴仙，呼其穴曰詹道巖。其東有小穴，僧法盛居之，蔡真人裔也。法盛性高行潔，宴坐拾葉充飢，出人或騎虎。呂經叔造其所，終日並無酬對，經叔問故，曰：「與尊言者，畫餅

也。」經叔歎息稱善，題其堂曰宴默。今巖中有石虎像。

大宇山

英山 中峰尖而勢差伏，旁二峰：一峰爲翁山，形如籬籬，又名駝背山，若老翁壽人，然居其下者多壽考；一峰爲英山，兩翼如鷹欲張舉，又名鷹山也，又名馨山。昔人得古木如佛像，有異香，因琢以爲像，築巖供奉，名馨山巖也。山產茶甚佳。又有龍眼漫生，肉厚而大，取種種山下，不如也。下爲英洋溪，今名英溪。

九仰山 山如仰天者九。上有祿壽、延壽二院，皆唐時所建。對面爲獅子山、石佛山，山有石，高七丈許，如佛身然。其橫出者，長可偃卧一人，望若佛掌。相傳昔有童子牧牛，置兩笠石上，亭午望之，若增高數丈者，鄉人奇之，因鑄佛像。

翔雲山 在縣西。又名象運山，以其形高大如象。一山二名，舊志乃訛爲二山。山下有巖，曰龍鬚，石罅中有龍鬚草，泉循草滴，因以名巖。西南一巖名池溪，蔡忠惠嘗游之。山背有石，長二丈餘，方平如碑，下有石趺，渾然天成。又有巖，名碑巖也。池溪巖橋，名佛溪橋，英溪之源出焉。

大羅山 在縣西。東田溪之水出焉，又名靈水。山西南界同安，上有羅山棲隱院。或云開創時，鑿池得螺，故名螺山。先爲大羅寺，後訛螺也。棲隱院，宋時釋惟慎、子琦居之。惟慎，潔清邃理，天聖中游京師，至則徑歸曾魯公，公亮曰：「闕下無禪侶，如何駐得君？」應聲曰：「敢言知己少，性本類孤雲。」太守郎簡以主西山廣福，辭。羅山方改禪院，同安令葛源夢山神告以慎可主之，源訪得，不辭也，遂延以居。子琦，惠安人，講貫群法，尤長楞嚴圓覺，去游江淮，謁翠嚴可真，參積翠。惠南東林常總聞其講說，

歎曰：「琦首坐如鍊山萬仞，卒難逗他語脉！」斬守喬郎中以開元爲禪林，延琦主之，數年成藁席，四方雲會。亟求退，至廬山歸宗，洪守謝景溫將致之百丈會，泉守陳偁以羅山請還主之，復移主大中，又主承天，朝廷賜紫衣照覺大師，有《五會語子》。琦有徒曰道英，能詩，有語錄行世。東田地有法象庵，唐有釋惟寵者居之，有象銜異花之異。

困山 在縣西。山形如困，海航望鄉之山也。風雨間，雷聲在下，有龍窟泉，或謂龍居之。留從効刺州時，歲旱往祠，至山下，父老曰：「前途峻隘，請壇於此。」從効設壇望祀，雨隨車至。下有來殊山。皇朝萬曆中，九鯉湖仙現夢鄉人：「吾欲居此。」人爲建仙祠云。

苦竹山 一名古蹟。有古蹟巖。昔有隱君寓此，石床、石印遺跡尚存。隱君好竹，至今竹本彌山，土人採其笋曰英笋，乾而絲之，最爲甘美。

南坑山

榮第山 在縣西。附山民家多讀書，少科第，名以兆之。

蟹坑山

小郡山 在縣西。昔時聚落如小郡。

蔡嶺山 山界安溪之洪嶺。有蔡翁者居嶺上，設茶飲待行人。翁沒，人以名嶺。

梅花山 有梅花嶺。漫山皆梅，冬月繁花。

鵝眼山 山麓巨石錯立如累。宋慶元初，道人陳大受剝爲洞，名開化，夷坦靚深，夏涼冬溫，前架一室，鑿石爲佛，長可一丈。大受善琵琶，工草書，諸公多與游。

大帽山 廣袤十餘里。山頂有巨石九層，亦有如帽者。皇朝侍郎黃養蒙葬在其下。

北陽巖山 在縣西。巨石嵌空，深廣以幽，舊名鬼巖。宋有徐道人者，夜止其中，里人莫信也。道人曰：「授我鼓，記其聲，知我止巖中矣。」已果然，乃從道人啟宇，曰陽巖。

平洋山 龜脰山

小楊梅山 山多楊梅，舊有鴻福院。

雲臺山 在縣西。王延彬別館也。延彬舊爲雲臺侍中，故以名山。山形如二象出林，亦名雙象峰。下爲薦國報恩禪院。又有鳳凰、涼峰二山，其下皆有院，並以山爲名，而里名清歌。蓋王氏歲時來游，歌舞之地。延彬沒，葬山左。皇朝大學士史繼偕世兆在焉。

堆美山 羅水山

福泉山 山勢雄崇，中有流泉，又名覆甕，又名象卧，皆取其形。山有八尺嶺，有徐道庵。徐道，宋大觀時人，居烏石山。旣示寂，居人塑真身祀之，祈雨輒應。庵前有橡木合抱。紹興三年，水出其中，或以瘡病。皇朝恭肅黃光昇世兆在焉。

烏石山 在縣西。山不高，石黑滑如漆，轉爲紫帽山，郡名勝也。紫帽山東、南、北屬晉江，西屬本邑矣。是山絕頂處，有三石排立，名三公石。中有九州巖，宋徐道者創庵以奉泗州九座像。東有龍水巖，相傳潭中有龍潛，三巖聳秀。中多石磴，名虎磴巖，可容二百餘人。宋時有二縉紳，漳人，棄官入道，修煉其中。山中有橋，是古榕根所蟠結。其亭最古，皇朝景泰時物也。紫帽山有古玄室，正統中，吳雲靜闢址建之，室作小丹丘，爲修煉之所。又縣北二里許，有大石突出平地，亦名烏石。相傳群鳥常集其上。

鳳棲山 在縣西，發源五峰山。其西有小延福院，下有報先院。東南復起爲南平石柱，有石端方丈餘，潤一丈四尺，可見百里之外。天陰欲雨，其石泉流。

謝墓山 上有謝徽墓。徽，唐時官郎中。

三公山 昔有江、楊、林三姓卜葬是山。

松崎山 山濤雨輒應。山半平夷，可三百丈。氣候常溫，古號陽調坪。

半月山 以形名。下有巨石湧泉。唐時，有尊者契璋曝身石上，以祈雨。鄉人築室祀之。

五峰山 山下有石，長二十餘丈，廣十餘丈，下覆如屋，可容五百餘人，其色蒼然，名白石山，亦名一片瓦。前有二石，長十餘丈，高十餘丈，相對如魚，名雙鯉下灘。頂石有白痕如畫鶴者。二山多靈怪，非有道行者不能久住。唐僧道岑居此。道岑嚴事觀音，刻檀像自隨，一日，行山中，暝投無所。見一宅中有媼，媼有一妙好女子，留宿食。明辭行里許，返顧其宅，無有，乃悟觀音之爲也。縣巖西下半里許，有白雲巖，亦有盤石爲屋，有獅子巖，大石突起如獅子，可容數人。又有大石高丈餘，下有泉石，靈巖泉。又有覺海巖，禪師僧覺海所創，巖石高嵌如燕，亦名燕巖。山前有百丈坪，泉流其上，如瓦溜，所謂泰山之溜。穿石稍遠，有小身瑞跡巖，石室天成，下有三小石槽之，上一石長二丈，鑄彌陀八尺身，宋大觀間，僧行遵所鑄也。宋吳棫《白雲巖二詩》：「雲煙杳靄環諸峰，石徑詰曲穿疎松。更無飛埃趁短屐，祇有鳴溜迎修筇。玲瓏數竇明相通，造化恍惚真難窮。陽回三冬照煖日，陰納九夏吹寒風。」劉濤詩：「白雲巖在白雲間，巖下千山與萬山。莫向公卿容易道，恐伊來此一生閑。」元釋大圭《五峰巖詩》：「一尋五峰老，孤塔在雲端。鉄策已古色，石房空晝寒。」皇朝羅文毅倫詩：「天界青山雲外斷，地分滄海日邊浮。仙家白晝應

無夜，玉樹長春未覺秋。」邑人黃河清《和文毅詩》：「地吹山起聊成象，石貼天分偶亦浮。誰治誰陶隨幻化，佛醒佛定自春秋。」學上豐熙詩：「片石千人屋，天工太洩機。海風吹不破，應待野雲歸。」晉江黃伯善詩：「彌猴得意峰多折，鼯鼠善緣石有稜。」安溪詹仰庇《覺海巖詩》：「亂禽啼樹僧聽慣，一犬吠圍客到稀。荒殿經殘疏雨過，香臺秋盡落花飛。」

谷口山 峰巒峭拔，下列衆山，其邃若谷。

蔡山 有聖林仙廟，舊爲宋氏之宅。古有四老人投宿其家，延之忽失，第見香氣如霧，宋遂捐居爲廟。

壺公山 山形如倒壺，又名太平山。中有天竺巖，山陰有虎岡山，是曾魯公祖塚，名翻天馬蹄，名塚也。有《張方平神道碑》。

麗碧山 峰巒秀麗，山石娟好。

栢峰山 山多栢木，亦名雲秀山，九溪之源出焉。巖曰資福。

留旆山 山勢雙麓如旆下，有龍潭，其深莫測。

龍潭山 山白天竺來。潭水潺流如九鯉湖，然而小。皇朝顏良教面潭建仙洞，曰天心，祈夢亦靈響。

雄山 又名大雄，以其高大雄峙。上有飛瓦巖，昔有僧欲結庵，誑人曰：「吾能飛瓦，不使工匠起手有日矣。」遠近大衆來觀飛瓦，僧傭人肩瓦，大衆欲其急於作法，爭爲挈之，頃刻都盡。僧曰：「多謝大衆，吾法如是。」

仙境山 故名高田山。唐末有樵夫楊者，邑崇安里人，採薪高田，遇二仙奕，予以桃，食其半，半欲遺母，中途失之三日耳，歸家三歲矣。後神氣靈異，能見垣一方。王審知夫人病瘡往聘之，以夫人不面診也，錢察之，初繫於木，曰：「木也。」復繫於犬，曰：「犬也。」最後繫瘡灸，立愈。王大加爵賞，辭不受，第請爲里人濬陂七里許，通九溪以溉田，今自家陂是也。後治藏是山曰：「吾昔觀奕於此。」一日有七道士訪之，樵夫設賓主，談對甚歡，比送出俱化鶴去，樵夫亦化以是日。今子孫居山下，鄉人歲獲歸禾一束，曰：「以報陂恩。」

鷄暮山 或云有金鷄止之，又謂其山高圓四罩，如鷄籠然。

天豐山 與鷄暮相近，下臨大溪，又名太湖山。皇朝有歐陽秋者，詹後也。居山下作獨善山房，蔡文莊爲記，稱秋孝友善教，推餘賑乏，大爲士論所歸。山西爲樸鄉村，宋侍郎呂大圭居焉，以呂公又名東山矣。萬曆中，其裔孫宗瑞築七級浮屠於山巔。

覆鼎山

華表山 雙峰夾拱，如華表然。山麓古嘗產芝，亦名芝瑞。

楊子山 山多活源，清泚常流。有寺名清水巖，舊傳楊進士讀書處。宋呂大圭亦讀書其中。又云楊肅常登是山，名楊子峰，亦名欹髻山。迤右峰石矗立，東有石室，西有龍泉，下爲峰口廟，祀神失姓名。相傳避亂官人居此，有二仙度之。有溜馬石，界一白痕，游者藉坐松楸，爲戲溜竟，直則得雄，偏則雌，每以是驗。

黃漸山 在縣南。以山色多黃。又名鴻漸，以山勢如鴻舉。亦名黃菊山，山麓野菊生焉，如弘農之

有菊水也。宋時有泊泉庵，泉出石罅，祈雨多應。山腰有石窟，深六尺，廣二丈，盈涸應潮。

象陷山 獅子山

妙峰山 峰勢奇特，石巖若削。宋淳熙間，清溪民子文鑿石爲彌陀像，高可三丈，字之。至皇朝幾廢，金粟洞僧本然者，夜夢一羽衣愬厄。晨過妙峰，按其狀，隱隱如夢中，隨白衛帥王某，令吳淵，復興之。圭峰 下有報親寺，寺創自宋初，元有將軍孫明威者，以起廢聞奏，元末有僧介勝修造，併造金溪橋，支費鉅萬，悉出己貲。凡百經營，一手支當，遂化小寺爲上禪。其後，錦田鄉，皇朝邑人吏部郎傅夏器居之，手植荔枝、楊梅、青梅、梨棗，皆名品異種，自給不外求，有道之士也。

金石峰 上有豐石，其傍赤痕類丹書四字，曰周將軍印。又有石刻「金石峰」三字。

湖洋嶺 礪溪之源出焉。

報巖 在縣西南。唐保大中，開山僧庵焉。一日，雷雨晦暝，電光中見一黑蛇，逐之，入穴。視之，有泉清瑩，得占劍三尺許，持以獻王審知，因名龍泉。在法堂西塔下，天將旱則溢，將雨則潤。

觀音石 在興集里道傍，高三丈餘，中有六室，觀音像在焉。其側有圓石如香爐，高二丈餘，號香爐石。

川水利附。

金溪 在金鷄山下，水自雙溪出者，經楊客渡，過金溪橋，轉而東下焉。宋傅自得與朱文公泛舟於此。自記曰：「紹興丙子八月十一日，攜酒襍被，謁朱元晦於九日山。向晚，幅巾藜杖，相與徜徉渡頭，喚舟共載，信流而行，老蟾徐上，四無纖雲。兩岸古木森然搖動，龍蛇布地，溪光山色，月所照耀，遠近上下，

更相映輝。朱子曰：「樂哉斯游。」舉盃引滿，擊楫而歌《楚騷》九章。聲調響壯，魚爲驚躍，棲鳥起而飛鳴也。予亦誦東坡先生《赤壁前後賦》和之。每至會心，輒迭起酬勸。時常飲酒，率不過三盃皆醉，至是連釀十餘觥，而月逾好，舟逾逸，飲逾豪。酒且盡，艤舟岸側，命老兵貸錢，酒家保啜挈一棹來，解維復去，洗盞更酌。少焉，斗轉參橫，風作浪湧。予曰：「樂不可極。」鼓棹而返，會宿於東峰道場。明日，元晦賦詩紀勝，次韻爲謝，恨無傑句稱勝游也。文公詩：「扁舟轉空濶，煙水浩將平。月色中流滿，秋聲兩岸生。杯深同醉極，嘯罷獨魂驚。歸去空山黑，西南河漢傾。」其二：「誰知方外客，亦愛酒中仙。共踏空林月，來尋野渡舡。醉醒非各趣，心跡兩忘緣。江海情何限，秋生蓬鬢邊。」

黃龍溪 在金溪下流二里許，其云黃龍有二。其一云：歸化里西平五峰二山間，石峽夾峙，飛流下注，水湛而深，里人指爲海眼。時有龍見脊影，禱雨時應。五代時有豪民吳長史晝登樓見龍，射之，龍挾起遷宅，山裂爲溪，是此溪也。其二云：宋曾楚公登第時，黃龍見溪南，石起宗登第時，亦如之。二公皆舉進士第二。皇朝嘉靖二十年春，邑人鄭普，與節推葉遇春飲清源山，葉遙指此溪曰：「時大雨中，隱隱若龍起西方者。」群下咸曰：「有之。」語未竟，春榜報至，則黃養蒙又舉爲第二人。邑令唐愛因題養蒙讀書室曰黃龍三見，而普跋之。溪中有黃石，石有黃點礫結，上疊一石，高廣幾一丈，狀如蝦蟆，頭腹並肖，下屬於石，殊不盈尺。四圍空洞，疑若窺窺，而洪潦衝突，屹然不動。相傳此石舊在溪中，後移岸上，比復見溪中矣。岸上黃龍鄉有吳氏，衣冠之族，樹蔭甚盛。

雙溪 水自永春、安溪二縣分派而來，故名雙溪。自永春來者，出於東關，合諸水之流，經於便口渡，又合諸水之流，至於鄭山；又合諸水之流，至於黃灘；又合諸水之流，至於白蚌渡、灣下渡、白葉

渡，又合諸水之流，至澗埕渡。自安溪來者，接於羅渡，合諸水之流，會於烏淹，達於角水；又合諸水之流，至於莊水；又合諸水之流，至於羅水渡；又合諸水之流，至於龍光，遂合流爲雙溪矣。是水流合晉江之筍江，以入於海，合襟繞郡城，一郡風氣也。而說者記：晉江南鄉，田常旱，七首塘不足賴，欲分一支以入南鄉，不知溪小力微，分則兩澀。萬曆間，有治兵使者排衆議，欲開之，輿情大駭，工竟不就，兵使者坐罷官。

九溪 源出栢峰山，逶迤而東，分爲九派，滙於龍潭，東流至大盈橋，然後經晉江之安平，以入於海。

壽溪 源出覆釜山下，縈紆二十餘里，溪南北有王姓居之，人多壽考。

鵬溪 宋時稅務在焉。

蘆溪 溪有橋，廢。皇朝天啟中，永士李曾震修廢渡人，費以千金。

劍津 宋元符中，有雙劍從空飛下，化龍潭津。

洪瀨溪 水自小蘆溪出，路通水德，魚脂成市，以資水德人。市口有鳳凰橋，（一）橋東有陳觀察祠。

觀察居梅溪山下，爲鄉人直枉息爭，鄉人建生祠於此。大學士李廷機爲記：「士大夫羔羊蟋蟀之風微，往往背罕言而蹈在得，當其服官處位，好爵在前，文網在後，宜有所顧惜畏憚，而簞簋不飭者已多有之矣。及其免而歸，前無所覲，後無所忌，受取之柄解而不復操，封殖之欲侈而不可饜，則有以鄉井之人供其求，左網右弋，明攫陰牟。蓋其受享，其徵逐，其東拓西益，以貽所不知何人者，輒於乎取之，曾不念夫人也與吾居相聯，世相處也。彼見吾一日而青其衿，則喜；一日而峨其冠，則大喜；無亦謂榮可割，芘可席，餘明可分，不平，爲之大丘，不能舉火，爲之平仲。今卽不然，而秦越視之，又從而外府之，其可乎？」

至使耳捷音而心悸，日樹幟而首疾，猛者擇肉，瑣者替膚，群苦群詛，將伺其物化，及其子孫而釋憾焉。而不悟者，猶以爲外侮也。夫愛人人愛，桃投李報，固不爽者。吾鄉先輩惺吾張公，嘗爲德於青濠里，歿而里人祀公。余嘗持以勵躬風世。乃今南安五都有生祠，則志齋陳先生，其鄉人德之之深，相與及其生存尸祝之者也。先生弦直鯁介，不諧於世，垂橐而歸，市老屋城隈，以居子孫，而白樓遲於其故鄉，所謂梅溪堪田者。澹持身嚴，訓家表正其鄉，而以藍田呂氏之意，聯屬要束之。有爭，質之而平；有爲不善，憚之而止；有冤狀，問爲白之，不令知，不受謝。蓋環五都之村落有先生在，而雀角鼠牙之訟稀，椎埋胥篋之姦寢，彊不弱食，巧不愚給，隸卒不民螫，其民得相與耕鑿樹藝，輯睦和協，以安於山谷田畝間，是先生未竟之績，乃盡究於鄉。而主爵者，靳之嗇之，方盛年而式遄，其歸若將以私其鄉之人者。其鄉之父老子弟，處先生宇下，願其長生久視，永庇此方民，而爲之祠，以寓其瞻仰敬共之一念，又烏能已乎？祠在鳳凰橋之南，枕山臨道，前故平蕪，邇溪流徙祠下，縈迴若帶，山水之勝，恐畏壘未有。經始萬曆己亥年八月，十月落成。邑宰袁泰玉公匾其堂曰章德。適余請告家居，都人請記再三，辭弗獲，乃爲之記。先生名學伊，字爾聘，嘉靖壬戌進士，官終江西僉憲。」

嚴浦 浦有嚴姓者居之，橋曰嚴浦橋。

仙人滌 下有仙人井，石窟天成，深不可測。

龍潭 凡三：一在四都平洋中；一在二十一都山下，溪曰石磴龍潭；一在三十八都山邊赤石間，曰赤泉龍潭。

弓潭 有上中下三涵如竇，三泓如七甕，涵水各入泓中，相傳有龍潛焉。

永利圳 黃河清《圳記》曰：「去縣治二十里許，有山曰楊梅，勢特聳秀。山之麓，平曠綿亘可百頃餘，土著盤亘若市廛。然曠之窪而田者，可十之九；阜當其十之一；山之泉，溉田不能十之三，雨弗時，稼輒弗奏功，民病之。故老窮水利，抵通溪之源，溯源而下至董湖，湖水駿駛，鑿圳引之，可達於田。顧未有執其柄者。正德甲戌越丁丑，旱既太甚，民益病，適河清自官歸，纍然來言曰：『公活我！』予愕問，具以事白。隨往閱圳道之夷險，衡水與地之高下，諗於衆曰：『利可興矣。予鄉人也，弗可以政。』白於郡守葛公。公命典史唐必盛宣若，令耆民黃弼、黃子光、戴元裕董若役，籌田出粟，籌工出力，按粟出直，鳩工事事。自董湖沂於瀘口，以達於鄭山。又自鄭山以達於琉塘，達泊港，達澗埕，闢障以鑽，隄汊以石，障洪以樹，禦沙以柵，續斷流以漕。繇是，溪與圳會，圳與水會，水與泉會。如招而來，如游而歸，曼衍轉注，支合脉湊，蓋四時雨也。經始戊寅春二月，訖工己卯秋八月。又修頽築堅於辛巳秋七月，以步計四萬，丈計一萬，傭工二萬有二千，佐傭工六萬有三千，傭費百金有奇，佐之費蕆之，歲得稔可萬鍾有奇。可謂一勞永逸，一費永利矣，因名圳曰永利。公名恒，字志貞，錫山人，繇進士歷刑部郎至今官。」

萬石陂 在九日山右。源出葵山，繞縣治城；南合鵬溪，流過學宮，至潘山入大溪。皇朝令甘宮濬。

湯井 舊傳有老婦行渴，至此井，里人以湯供之，婦指曰：「湯泉也。」井卽變溫，因號湯井。今涸。

小石井 在新豐院前。歲旱，鄉人禱雨，有小蛇見水面，則雨至。俗傳湧泉大師常取水於此。

夜光井 在縣三十一都。宋紹興中，有夜汲者，見井中光如半月，投以汲器，光彩煥發。

石井 朱韋齋監稅處。二石夾立海沙上，其下爲盤石，泉出小竇，流而爲盂，深儉尺餘，大抵如清源

孔泉，而水脉尤細，挹盡輒盈，潮來沒焉，潮去則淡。有石并宮，匾曰石井。旁有前進士呂大奎書：「景定甲子詔立。」豈聞於朝而匾歟？二石刻「海上視師」四字。郡守程秀民，破賊於此。邑人鄭普有《平寇碑》：「海巨寇曰阮其寶、四師老、林剪毛者十八種，爲患閩、浙、交、廣間二十餘年。嘉靖□□年四月，（三）掠同安小嶼，死與被執者二百餘人，小嶼遂墟；掠東石、圍頭、深滬，而惠安屬地則一歲三四至。吾侯習齋程公，講求備禦策，治戰艦，募水兵，分遣文武材官截守。是年五月，其寶寇圍頭，統二十餘舟，吾縣貳丞馬一洪、指揮孫廷槐，承侯命，發四澳兵船攻之。侯下令曰：『能得賊者，悉與以所有。』又曰：『勿浪擊，勿妄殺無罪民。』乃用命。五月二十一日，與賊戰小嶼南岸，自己至申，破其三舟，獲賊三十餘人，賊退保草嶼。是嶼，萬石所結，峭聳孤出，忽夜聞風浪有聲，爭解維避之，舟悉衝沒。是月二十八日也。賊黨奔遁，其寶獨携八十餘人屯嶼上覲援，然而煙火已絕，勢將自斃。先是，石井有鄭汝暢、張本應數人爲賊所執，至是歸，且以報侯。侯命馬丞攻圍之。六月朔日，舟四集，賊夜輯殘板謀遁，衆合擊之，殺其寶，斬其首，獲其妻妾，并賊徒番子。浮屍蔽海。先後奔遁者，指揮張文昊守浯洲，盡索得之，械送侯廷者二百餘人。次日，賊援至，已盡殲矣。未幾，林剪毛復合黨寇蓮河，方揚舟登岸，酋檣忽壞，心惡之，乃自焚舟去。是月十八日，寇晉江石湖，又寇蚶江，侯復命馬丞、承霄赴，集諸社有力者百餘人，自隨往，衆力倍奮，遂手殺賊，獲十四人，焚其二舸，賊乃遠遁。親行海上，携酒肉召勞諸效命者。張十一、張尚魁，身被數鎗，面慰賚之。登石井墩臺，料賊所向，呼諸父老，語之曰：『浩浩乎波濤之大，渺無際涯。而浯洲一山，乃逆流高出，此天地造設，爲環海藩屏，爾民務自爲守。吾且申諸戍之令，責諸怠事者，使山前後無可乘之隙，則汝屬保無虞矣。』於是民忻忻樂有所終，相屬車下，三十里不絕。不肖家居是地，目擊戰功，敬將

睹記，輯爲實錄，庶觀風錄能有采焉。」

〔校記〕

〔一〕「鳳凰橋」，各本原作「鳳凰橋」，誤。

〔二〕「嘉靖」下，各本原闕二字。

閩書卷之十

方域志

泉州府 惠安縣 德化縣

惠安縣 在郡東北。東抵海，西抵晉江，南抵海，北抵仙游。本唐晉江縣地。宋太平興國六年析置，元仍舊。皇朝因之，凡轄一坊、二十九都，（一）統圖三十，（二）又一在坊，統圖三。

一都，圖一。宋平康里。山曰萬壽，（三）登科、盤龍。

二都，圖一。宋平康里。山曰樓山。

三、四都，圖一。宋歸化里。山曰螺山、卧龍、泗洲、大帽。溪曰茭布溪，（四）驛坂。

五都，圖一。宋崇德里。

六都，圖一。宋德音里。山曰觀音、靈鷲、五公。

七都，圖一。宋德音里。

八都，圖一。宋德音里。

九都，圖一。宋光德里。

十都，圖一。宋光德里。山口大聖、吳公、（五）塗嶺。巖曰人湖。嶼曰樂嶼。

十一、二、三都，圖一。宋爲待賢、民蘇二里。山口東平。峰曰主峰。嶺曰龍嶺。溪曰西充、真如、澄果。

十四、五都，圖一。宋尊賢里。山口三賢、龍宮。溪曰白巖。

十六、七都，圖一。宋同信里。山口雲峰、大中、沂山、鷄籠、報効、白巖。峰曰太白。溪曰南坑。

十八都，圖一。宋禮興里。山口佛通、石缸。溪曰黃坑。

十九都，圖一。宋民安里。山口松洋、覆缸。井曰金剛。

二十、廿一都，圖一。宋長安里。山口鳳山、馬山、鶴堂。巖曰清水。溪曰下曾。

二十二都，圖一。宋太康里。

二十三都，圖一。宋太康里。

二十四都，圖一。宋太康里。嶼曰岱嶼。

二十五都，圖一。宋守節里。山口楊崎、靈秀。嶼曰獺窟。

二十六都，圖一。宋守節里。山口嘶山、古山。

二十七都，圖一。宋守節里。山口大岬、尖山、小岬。（六）

二十八都，圖一。宋祥符里。山口城山、螺蛳、靈瑞、葛山。

二十九都，圖一。宋祥符里。山口文筆、九峰、陳山。

三十都，圖一。宋延壽里。

三十一都，圖一。宋延壽里。

三十二都，圖一。宋溫陵里。山曰香山、黃崎。

三十三都，圖一。宋安仁里。嶼曰竿嶼。

三十四都，上圖一。宋安仁里。山曰峰崎。

三十四都，下圖一。宋安仁里。

東南瀕海，西北依山，螺峰峙後，文筆聳前。其形勝也。

山

萬歲山 在縣南。下有東嶽行宮。

登科山 舊名登高。在縣西一里許。元盧琦記：「山有林麓泉石之勝，諸峰環峙，萬象在下，大海際天，一望無極，佳辰良月，邦人士女，咸茲以嬉。蓋舊時邑人登高此山也。後以宋盧瞻讀書於此，嘉熙間，令三山鄭清子，易今名。瞻，字從聖，篤志力學，元祐間以八行應詔者，而邑人又名曰高上峰。皇朝令張恒鐫十六字其上：「身在翠微，眼空溟渤，足躡青雲，手扶紅日。」蔡文莊清，因而衍之曰：「身在翠微兮我意登泰山之仲尼，眼空溟渤兮而亦收其吞天之勢，以助胸中之奇。足躡青雲兮揮長風而直上，手扶紅日兮光明宇宙問曰男兒。」

盤龍山 東北七峰，蜿蜒龍勢。宋守王十朋有「青山環繞如盤谷」之句。宗室趙公迴以南外攝州罷官，不治居第，託隱於山下之僧舍。又下有唐王潮墓，留從効爲建寂光寺。皇朝墓發，寺廢久矣。令葉春及髣髴，謝詢擬碑，蘇軾爲置守塚，定歲祭。

樓山 自登科山發脉，迴綰縣治。一名留山，言鎖截風氣，去而復留也。

螺山 縣治負山也，自仙游大尖、小尖而來。相傳唐末羅隱寓此，或名羅山也。後以山形如螺螄吐肉，復名螺山。宋令趙汝稟謂其有龍蟠鳳舞之勢，鑿鳳池，濬龍湫，溝水以注之。崔拱偕二子正則、麗則，讀書其上，相繼登第，又名登龍峰。羅隱，見晉江羅裳山。

卧龍山 一名蓮華。自東平山分支，十盤九曲，中有一峰，昂如龍首，東北爲龍蟠山，至於門山。

泗洲山 在縣北。唐咸通中，有僧得夜光之楂，刻佛像，立精廬奉之。宋熙寧中，令吳克睹其上，松蘿薈鬱，攀緣以登，遙望海山歷歷，遂巖之曰天開。宋王獻臣詩：「大石小石皆羅列，造化安排非力設。覆者如軒深者洞，方者如屏平者席。可以安尊疊，可以橫琴瑟。天邊烏兔眼前飛，海上波濤掌中白。」

大帽山 在縣西北。雄峭盤鬱，縣諸山祖也。絕頂寬平，有泉一泓，禱雨多應，傳有龍騰焉。是產磁石、黃精、萬年之松。深山之中，則熊產焉。其南曰大腹山。

觀音山

靈鷲山 在觀音山東，一名烏石山。北爲崑崙山，以高名。山南有伏虎巖，上有清泉石室。蔡忠惠襄母家在惠，嘗讀書於此。其名伏虎者，宋祥符中僧道養隱此，與虎同寢，時抱虎子示人。元時，逸人連應玄刻其事於巖石。

五公山 在靈鷲山南。梁時有五公隱此，曰唐公、竇公、至公、化公、朗公，石上刻靈符五道，及「五公山」三字。一名下江山，南唐檢校禮部尚書江盈，家山東麓，故以氏之。北麓有小山，皇朝張襄惠岳讀書焉。襄惠刻石曰：「小山，在五公北麓，前挹平蕪，後負列嶂，大帽盤左，輞海環右。嘉靖己丑冬，余還，自香山下結屋居焉。諸葛長嘯之廬，司馬獨樂之園，匪余敢望。若夫川原幽曠，景物鮮澄，仰觀則雲蘿發

興，俯狎則魚鳥會心，盼北極於中霄，結殷念於千載，雖古人可作，未必不同斯抱也。屋成，歌小山叢桂之章以落之，遂書所以，勒之山石。」又題其山之石鼓曰：「厚重少文如勃，沉靜寡言似光，守節堅深不可奪似黯，茲惟淨峰張氏之石鼓。」蓋白許云。

大聖山 崖壑幽絕，東臨大海，堪輿家謂之「大象捲湖」。有大聖巖。東北有嶼曰樂嶼，在海中，有林麓之美。元時陳立功者居之。立功，閒雅有古風，孝親睦族，善於教子，以薦爲泉州庠直學。辭歸，每慕少游之爲人，日騎馬乘車，優游鄉里，稱善人足矣。皇朝，海中居民悉徙內地，是地亦以例徙。

吳山 山南有蔡鎬廟。鎬，莆人。唐大中間家此，後仕梁爲兵馬使，擊賊有功，邑人廟祀之。

塗嶺山 在觀音山北。有涂姓兄弟三人者居此，既沒爲神，人廟祀之。宋淳祐間，賜額「昭惠」。元時有要束木者，爲嶺巡檢，遷莆田尉，邑人盧琦贈之詩曰：「將軍有英氣，負劍游南荒。曾陪繡衣客，經踏烏臺霜。戎閫拔才雋，奔走殊弗遑。屬時臨漳郡，群盜方獷狽。匹馬汗如雨，戰袍北風涼。奮身良間關，許國誠慨慷。茂績固當酬，小試焉足償。」菱溪枉車轍，司警驛道傍。蒞政肅初令，頽綱日更張。月靜鼯鼠驚，山眠狐兔藏。編戶復溪事，在在樂歲康。所居傍林塢，訟簡白晝長。鄰家稻田肥，子舍芸編香。優游有旨趣，於焉度年光。夕露集野草，秋風在垂楊。解裝欲何之？作尉壺山陽。莆民喜公至，夾道相迎將。泉人惜公歸，所懷未渠央。民俗豈不殊？善化端有方。願言頌政謠，毋庸咏離章。他日登宴津，萬里誰能量？」觀是詩也，豈非儀封夷門之流歟？

東平山 在雲峰山南。一名北山。群山聯屬，東有平原三四里許，復突起一山。

三髻山 在縣西北。連延高拔，頂上廣平可百步許。上聳三峰，如會撮然。中有斷塹，深莫測也，石

梁橫之，名仙人橋。旁有方石如砥，曰仙人局。又有龍湫二丈，深倍之，禱雨多應。是生萬年之松，龍鬚之草，靈秀所鍾，高僧出焉。宋時有「山前銑，山後琦」之語。銑曰紹銑，住漳州興化寺，名聞諸蠻，荆湖人號爲古佛。章子厚奉使開梅山，請銑與俱，蠻父老聽銑言，悉合爪聽命。琦曰子琦，已見南安大羅山。

龍宮山 上有聖妃祠，宋真文忠守郡，於此禱雨。其禱文云：「某間者以憫雨修詞，遣邑尉代禱祠下，而某拜送於庭。鄉士馳報：『詞甫至，甘注隨霑。』維此神功，不疾而速，某不勝敬戴！」

雲峰山 自大帽山南爲大腹山，旣斷復起。前有萬歲坡，坡上大石高廣四丈餘，仰承一石，上廣下削，其勢欲墜，挺之搖也，俗名「危石」。下有無憂巖。西有白雲巖，昔有高人道淵誅茅結屋，白雲嘗覆其頂，巖前雙石夾道，其左者扣之有磬聲。去西南二十五里，山名南巖。沙溪上有盤石，亦如之。

大中山 在雲峰西。下有大中寺，唐宣宗賜額，柳公權書。

沂山 在縣西北。下有芹溪，芹藻最佳，又名芹嶺矣。其曰「沂」者，「芹」之誤也。山南有陳店巖，唐末晉江陳轉運使居此名。又西南有府窟，亦云陳轉運所居。

鷄籠山

報劬山 縣西山。在叢山中，特爲雄秀。又以勢似覆缸，名覆缸山。上有寶蓋巖、天香石、牛頭石、坐禪臺、方磚塔、定公塔、龍濟潭。唐刑部郎中陳嘏葬父母此山之下，建院曰報劬。有僧清暉者，參馬祖來歸，值會昌汰僧，隱居於縣之牛頭山，嘏延居之。南爲鷄堂山，獨山也，頂有巨石，望之巋然。嘗有鷄巢之。下有慈恩寺，又有西鷄嶺，其下爲大雲寺。

佛通山 在鷄堂南。以泉有佛國之號，故名。又云洛陽江未橋時，由此山陸行，通郡城佛國庵。

石缸山 在洛陽江頂。奇石橫插山巔，形類缸然。皇朝令葉春及詩：「石缸高駕碧山頭，似畏風波急暮流。十二時中平地起，問君何處不堪愁？」又：「木蘭爲櫂桂爲橈，南接端明學士橋。我自虛舟人不識，海門風雨日瀟瀟。」令錚錚彊項，蓋有感而作。

松洋山 在縣東南。望之蒼然爲巨鎮。絕頂兩石對峙，山北有洞，僅可側入，其中廓然。宋元末，居民避亂於此。

覆缸山 以形名。時有異雲蓋頂，禱雨多應。東南奔出，前接沙溪，又若偃月。

鳳山 山勢翔舞，下接溟波。三國吳時，有黃將軍名興者，及妻曹氏，葬於江潯，陰晴髣髴，光怪絕異，里人廟祀之，常有雲霞覆蓋。一夜雷雨大作，廟忽自移山下。宋紹興間，海寇犯界，里人告廟，有蜂蛇之屬累集港口。淳熙十二年，海寇又作，小兜、大岬俱遭劫掠，惟神所居前後，鑼鼓聞聲，旗幟露色，賊不敢犯者再。紹定六年，邑進士黃璟聞於朝，封順濟侯。

馬山 在縣南。若馬飲泉，又若眠牛，故山右曰馬山，其左曰牛坑。

鶴堂山 在縣西南。峰若飛峙，山下有唐鴻臚卿留公之墳。相傳葬時，有二鶴哀鳴來止，葬畢飛去。

楊崎山 在縣南。東漢末將軍楊大眼居山之陽，故名。

靈秀山 在縣南。閩王延鈞母家在焉。母黃姓，黃滔之家也。父曰訥裕，仕工部侍郎。王審知聘母爲妃。及延鈞僭號，追崇曰后。龍啟二年十有一月癸丑，延鈞來謁黃氏家廟，黃田鋪緹錦，木被綵繒。次日登是山，見峰巒削拔，因改號曰美女峰。己，見第宅周迴，甲乙翼翼，有錦繡之飾，因名里曰錦里，驛曰

錦田，居曰錦第，溪曰錦溪，墓院曰錦院。次日曉起，問黃家人曰：「夜來窗風剪剪，瓦霜稜稜，地如斯時，暫乎常乎？」有克宗者對曰：「茲地濱海，遇秋之日，如城郭之冬也。」延鈞乃命沿海居民屋瓦悉得黏土。斯會也，山頂設帝座，置離宮，山石刊「萬歲龜，千年鶴，鍾旭附鹿，驅鬼於上。」又鑄「通帝座，巍是天」於前後，而延鈞又命鑄書於山曰：「凡登山有道，徐行則不困，措足平穩之地則不跌。」其東有錦田山，山前有田萬頃，相傳唐張清溪居此，後爲漳州刺史，還鄉，鄉人以「畫錦」名之。按泉屋黏瓦，始自王延鈞，而皇朝王世懋《閩部疏》：「漳泉間燒瓦皆黃色。郡人以海風飛瓦，奏請用筒瓦，民居皆儼似黃屋。」蓋行部使者，徒問之隸人與卒，何以得其風土故實耶？又江右鍾允復初登第，夢作一縣，縣中都是黃屋，不知何祥也，尋銓晉江令。

嘶山 相傳五季時，山上忽嘶，聲聞十餘里。山巔有石如笠，上有巨人跡，人石六七寸許。

青山 山面大海。山石色瑩確，僅頂有草樹，故名青山。下有廟，名青山廟，祀張梱之神。梱，三國吳將也，嘗屯兵是山，以禦海寇，歿葬於縣堂左庫，祔祭於邑城隍。至宋太平興國間，令崔某移古縣於今縣，開基得銅牌，志云：「太平興國間，占縣移惠安。若逢崔知縣，送我上青山。」牌陰云：「開我基者立惠安，葬我身者祀青山。」崔令遂送銅牌青山，立廟祀之。建炎南渡，與虜人戰采石，人見大旗上題張將軍姓字。時虞允文訊青山土人之從軍者，得其神蹟，錄功上聞，制人祀典，進封爲侯，後累加封。至景炎元年，敕封靈安王。歲十月二十三日，神誕日也。令來致祭，至今爲常。廟中銅牌，洪武初尚存。島夷人寇，以爲金也，載歸，舡尋沒海。又云，令不親祭，卽有虎患。

大岞山 在縣東南海濱。崇武千戶所在其地。宋則小兜巡檢司在焉。山多怪石，有如鍊磬者，扣之

如磐聲。山陽有洞，其中明豁，容四五百人。旁有小石，間僅可單人，門內丈許，折而右轉，有巨石如屏，以蔽內外。寇擾時，民避人洞，無可攻理。又有石倚江渚，鯢鱣如龍，名龍喉山。是其海中龍蝦，爲諸蝦最。沙參生焉，近者歲饑，居民掘之，可飽數月。

尖山 一名淨山，亦名淨峰。下瞰東溟，山多怪石如水齧，最高而削拔者三，登之見日出。傍有石竇，中洞深可居，今湮廢矣，是產朱丹之石。宋高僧釋道詢，山下人。道詢，詳見晉江烏嶼。

小岞山 在淨山東十里，特出海上。有洞可容數百人。宋時李、陳二姓居之。李，參知政事文會也，字端友，建炎二年進士，歷殿中侍御史，至權參知政事。後調筠州，徙江州。注《金剛經》，撰《三教通論》。居十年，宴如也。起知遂寧，徙瀘南、荆潭二帥，改知成都府，所著有《中興十要》。第其人巽懦，爲御史時，劾時賢以媚秦檜，故時論不與。還鄉之日，有司以其故執政，築沙堤迎之。陳，其先侯官人，宋紹興中有爲承者，卜居於此。其族姓皆同居。人皇朝，五世矣，素風相沿，家政有掌，男女皆鷄鳴起，業作歸公，毋有敢惰，有鮮好衣，別藏之，遇嘉事，遞服以出。士大夫樂善者，往造其家。是其海中，紫菜生焉。

城山 東連大海，西接長江，延縮如城。

螺蛭山 上有盤石大十丈餘，圓如螺蛭。弘治《通志》：「蛭，薄碑切，虫名。」此云「螺蛭」，則音如「否塞」之「否」，蓋泉人呼「螺蛭」爲「螺蛭」，而借用其字也。

靈瑞山 山勢橫列若屏障，中一峰特起，曰靈瑞巖。其南支山下，窪坎尺許，清泉出焉，又曰龍泉山。北有員常院，院東北麓大石上，石痕濃淡，隱隱成「山」字，怪偉可喜也。皇朝張岳詩：「突兀石痕古，蒼茫字畫分。千秋誰辨此，我輩發奇聞。」又：「冉冉雲穿岫，迢迢谷遞聲。平原天際盡，孤嶼海中明。」

葛山

文筆山 三石錯峙，旁象鼎耳，中堆突如蕪香狀，舊名香爐。後人積石兩耳間，刻其上爲「文筆」。學宮當某陽。

九峰山 在文筆山南。峰有九，斷續向背，若蹲獸，若盤螺，若翼而翔，若俯而伏，若人而拱。

陳平山 唐時有陳平者，精堪輿，乘牛過此，瞑目而化。從人至，見其土自湧，留一掌示之。人名山曰陳平，墓曰牛客。

香山 在靈瑞東。宋乾道中，里人吳德彰少孤，父母遠沒，不能歸骨。及長，莫知所在，刻檀木肖像，葬於谷阿，自後山下常聞香氣，人號香山。其南爲獅山。

黃崎山 舊名寧崎，三面瞰海，風濤幽氣所侵蝕，草木不茂，土色微黃，故名黃崎。又以勢如立旗，名曰揚旗。產鐵，宋置鐵爐焉。皇朝有巡檢司。

峰崎山 在靈瑞北，縣水口山也。山陰有橋，曰青龍，宋僧道詢所建。凡縣中諸水，若菱溪、驛坂、菱布、龍津、南坑之會於峰崎港者，皆出橋下，北流至輞川，入於海。有輞川橋，皇朝蔡文莊清爲記：「輞川，海文也。在縣治東三十里。岸居人數百家，皆業海利，遠近趨利，足跡輻輳。岸行隔一水，因循舟濟，風暴水漲，或人衆爭先，則有覆溺之虞。成化癸卯秋，縣尹張侯桓見而病之，相其隘處，東有盤石，其西積土如阜，不受水齧，乃召耆老何迪易等橋之，捐俸爲倡。令里人給丁出銀，又爲疏引，募錢穀佐之，首尾三年而成。迪易等請予爲記，予惟自有此水，未有此橋也，利曠於昔，而興於今。曠於昔者，不知幾千百年，而興於今者，從容爲之，不過二三年而已。利興於今纔二三年，而垂於後又不知當幾何年矣。昔人有

言：天地之雷電草木，人不能爲，人之陶冶舟車，天地亦不能爲。於此見人事功用，有可補化工不及橋梁之利，視陶冶舟車尤爲不動而及，物一成而永賴，孟子談王道，以是爲首，侯其有合也。」

白巖山 頂有白石，留從効葬父母於此，建寺曰白巖。宋晉江呂夏卿墓亦在其下。

虎窟山 在縣西南。有虎寮寨。山谷間，崇山夾峙，狹徑僅通。正統中，沙、汀孽作，永春、安溪相煽起，始發民卒備之。是後西南聞警，輒此成備。

圭峰 在縣東北海濱。元盧琦家其下。

太白峰 一名蓮華峰。有石方直如碑碣，上刻蔡忠惠大書「太白峰」三字。

龍頭嶺 嶺下有石三簇，嵯峨秀出。前有石冠、石笏，後有石羊、石馬，諸峰盤旋，形勢特異。昔有趙將軍葬此，鄉人奉之甚虔。

天湖嶺 在高山坳中。巖前有方塘，刻「天湖放生」四字。

日曝嶺 界仙游。有東坑寨，險塞處也。

龍窟嶺 嶺下有古縣遺址，市廛名號多類今縣。宋太平興國間，崔令移縣處也。

螃蟹嶺

清水巖 山石撐柱如室，扣之空窾有聲。絕頂有泉，泓徹不涸。

虎岫巖 有石竇可容三十人，舊爲虎據其內。有徐道者，驅虎居之。

赤石巖 削立如赤壁。

白馬巖 相傳天色晦暝時，樵牧者見白馬出林下。

試劍石 石四剖如蓮花，外石環之如承盤。皇朝令葉春及詩：「片石春風裡，青苔覆綠雲。蓮花山下吏，無日不逢君。」

岱嶼

獼窟嶼 獼窟巡檢司在焉。嶼北有橋，凡七百七十間，潮至橋沒，潮退可渡，宋僧道詢所建。

竿嶼

川水利附。

茭布溪 發源雲峰山，東逕居仁鋪，至前灣。又一溪，發源五峰巖，逕泗洲橋，亦至前灣，與茭布會，入峰崎港。

驛坂溪 發源大帽東麓，過驛坂橋，至岫頭溪。

西充溪 源二：一出小鼓溪，一出小溪，合流過白水橋，入傅埭。

真如溪 自橫溪發源，東南流過店尾橋，匯爲潭，至下盧與證果東溪合，東至龍田，又南至古縣，過際頭橋，入添崎港。

證果東溪 發源塗嶺北山谷間，東南流過橫山橋，至下盧橋。

白巖溪 源三：一出三髻山前，爲沙溪；一出胡坑，爲前郭溪；一出晉江柯山嶺，爲澳溪，並會於沙溪，過谷口橋，入洛陽港。

南坑溪 源二：一自縣西馬壠發源，東流至周旁口，過陳公橋；一自寂光溪發源，至下林溪，合流至通濟橋北，至進士橋，又北至走馬埭，入峰崎港。

黃坑溪(七) 發源鶴嶺坑，出過九斗坵，入馬山埭。

下曾溪 源二：一出上曾溪，過上田小橋；一出上范溪，過上田大橋，會於充口溪，入馬山埭。

菱溪 發源觀音山後懸鍾嶺，折而東南流，過菱溪橋，至岫頭，與驛坂溪會，人峰崎港。元盧琦《游菱溪記》：「惠之北鄉，其泉石林麓之美，菱溪最勝。溪之上兩峰對峙，蒼翠可愛，崔嵬巒嶸，若相敵而不相讓者。一水出兩峰間，或淵濤黝黑，莫測其底。淺僅沒膝，瑩徹淨幽，往來可數也。溪多石，水觸之則滂湃有聲。其最巨者，離列水中，相距咫尺，水束而過，過則帖然。凡幾屈折，出而抵驛道之衝。宋治平中，橋之以渡，即所謂永濟橋者。水由橋下徑注，有山橫截，其流水復曲行疾逝。自此以往，予亦未暇究所窮也。曩予來訪親舊，愛溪之勝，而屢游之，然信宿則去。至元己亥初夏，與莆陽人方君同寓烏石精舍，溪山烏石之背，每日未晡，主人輒相命出，出則之溪上，至則沿流上下以釣，得魚以歸，歸則月出東山矣。故夕率一至，雖風雨亦往，然猶以爲未極其趣也。五月末，不雨不暘，主人與客，野服芒屨，一僮釣竿，一僮肩酒，雜以肴簞，始由永濟橋側披榛取道以達溪。主人把釣，立於翠蔓青樹之外，倦則與客列坐石上，命酒少酌，酌罷則釣。頃之，步且前，石愈奇，水愈清，地愈奧，意愈適，而魚之嗜餌者亦數數獲之。於是爽氣憑凌，煩襟灑灑，雖屢酌不醉也。已復得石橋數間，盤桓久之，溯此而上，計當猶有佳處，而日入矣。噫！主人生於斯，且將老於斯，余與方皆客也，山色水光，不可奪而取分而去也。雖欲常賞，不可得已！」

龍津溪 發源東平山，逕蓮華山下，至龍津陂，繞縣治前，接山之陰，達下謝溪，入王孫走馬埭。

宣妙溪 發源城山北，至下梁堰爲埭，東至柯埭橋，又東至前澳溪。

金山溪 發源九峰山，下循文筆東麓，至金山宮，又東北流至前澳，與宣妙溪合，東至東井埭。

左潭 在縣東十里。唐大中間，龍見其中，遂於潭側立五龍廟。

大井 在縣治北登龍坊右。味極甘寒，久旱不涸。

金剛井 在官路傍，鑿勒《金剛經》一部。

德化縣 在郡城北。東抵仙游，西抵尤溪，南抵永春，北抵永福。本唐長樂郡永泰縣地，卽今永福也。貞元中，析其歸義鄉爲歸德場。五代唐長興三年，王延鈞立爲德化縣，屬長樂府。漢乾祐二年，南唐改隸清源軍，割今延平、尤溪縣之常平、進城二鄉益之。宋初屬平海軍，後屬泉州。元仍舊。皇朝因之，以附近爲坊隅，在鄉爲八里、十團、一都，後屢經裁省，轄坊隅一、里二、團六，嘉靖十五年割黃認團，添設延平府大田縣，今爲團五。

坊隅。宋歸德鄉蓋化、歸化、惠民三里，集賢鄉永豐里。山曰龍潭、妙峰、大旗、大帽、雙魚、鳳臺、困山、登高、斤山、雲山、擎雲、白牛石鼓、（八）烏石、朝天馬、羅城。嶺曰高陽。

新化里。宋集賢鄉雲峰里，進城鄉小尤上團。山曰戴雲、繡屏、園林、雙桂、騰巖角、雲峰、大尖。溪曰石山。泉曰溫泉。

清泰里。宋永寧鄉嵩平、善均二里。山曰九座、靈山、石牛、飛仙、均山、焦溪、（一〇）東濟、石獅、蘇墓。巖曰伏虎。潭曰佐溪龍潭。（一一）

楊梅上團。宋常平鄉下湧團、進城鄉湯泉下團。山曰鍾山、蓮花、（一二）仁齊、吉山、崎山、漸山、香林。巖曰金鷄。嶺曰湯嶺、姑

楊梅中團。宋常平鄉楊梅下團。山曰梅峰、蓮花崎、石湖崎。

東西園。宋常平鄉東西二園。

湯泉上園。宋進城鄉。山曰九仙、石鼓、銀瓶、石獅、獅子巖、鷄髻寨、觀音。

小尤中園。宋進城鄉。山曰大仙峰、龍湖、鑛山、鑄山、仙濟、牛眠、屏山、金鷄、酒壚寨、巖市南、虎頭、馬山、馬仔、胡蘆、羅城。

諸山環拱，丁溪中流。其形勝也。

山

龍潭山 縣之山磅礴蟠際，不知其幾百里，峰巒岡嶺，回亘蹙沓，而是山峭數千仞，巍然縣治。宋宣和中，令劉正鑿窮巖爲亭，或云不可，正曰：「此睡龍也，鑿之則醒。」逾年，邑中舉薦者三人。皇朝嘉靖中，令緒東山建駕雲亭，以興文事，請參知王慎中爲記。又建醒龍樓，懸鍾其間，令張大綱作書院焉。宋長樂令吳遵詩：「危亭瞰碧虛，縹緲青林薄。坐久人不知，衣上雲光落。」又：「絕構臨層霄，虛窗動元氣。晨興蒼莽間，諸峰在平地。」

妙峰山 在龍潭山東。頂有妙峰庵。

大旗山 在龍潭山西。西爲卓筆山。

大帽山 有二：一在縣北隅，一在楊梅上園。脉自九仙山來，至此卓起大峰，形似大帽。

雙魚山 縣案山也。自困山迢遞而來，左掛右伏，逆流並躍如雙魚然，亦名重魚。

鳳翥山 在重魚後，縣重案也。旁有峰相亞，曰鷓鴣高。

困山 峰巒秀矗，狀如高廩，一名蓋竹根山，一名瓊山，一名芹山。有石床、石竈、石鼎。相傳秦漢有隱君子居焉。秦漢隱君子，莫知何人。皇朝詹仰庇詩：「伊人千載已寥寥，尚有荒祠傍碧霄。桃洞未聞

漁艇到，箕山不應漢廷招。」下爲歐山，宋有姓歐者領解，遂以名之。又歐山，一名英山。

登高山 在縣西南。上有登高亭。山側有塔，曰西塔。又有南塔，在靈化里程田寺側，高數丈，常有夜光。後傾頽，得辟支、佛骨、佛牙，舍利於其頂，移建佛殿東，增爲七級，高七尋，以牙骨藏之，其光不絕。其名程田者，唐時邑人程國知捨田建寺也。天祐間，有僧行端修行此寺，以六月五日坐化。後遇是日，入夜必雨，邑人謂之洗市雨，遂像之，祈禱響應。宋紹興年賜「真濟大師」，後加「慧慈」之號。

斤山 山如斧削。其上，五峰矗起若蓮花，名五華山。山有五華寺。唐咸通間，蜀僧無晦鑿石築室，與虎同居，石前有虎蹲跡，後人號爲「虎蹲巖」。巖故無泉，無晦穴土得之，深數十丈，味甚甘冽。忽五月五日，指井語人：「此泉萬古及此日，則溢而至欄。吾化後，以此爲證。」至今五月朔日則泉涸，至五日，盈坎院，挹注以辦千人齋。翌日如故。號端午泉。

雪山 「南雪不及地」，泉中尤甚，而此山時有之。秋天開朗，可見泉中諸峰也。山中產茶最佳。有金液洞，泉甘水冽。元時，永豐里人吳濟川者，隱居洞中，鍊液養真，絕火飲水，至正丁未，端坐而逝。明日，神往莆田塑像匠家曰：「我泉州德化金液洞徐友山也。請塑吾師真像，君第先行，吾亦隨後。」匠至，其徒問誰致君，匠以名告，皆相顧驚異。蓋友山卽其徒之名。今塑像猶存，早厲應禱。友山弟曰隱山，子曰景陽，亦得玄秘，鄉人併靈而祀之。隱山修道洞中，每旭日初升，輒有雲覆，人名其洞曰紫雲。景陽道成之後，語徒曰：「旦吾行矣。」遂坐化。

雙桂山 舊名雙髻，頂有雙桂祠。相傳仙人時跨白馬來，民以水旱禱輒應。下有溪橋，名連波，占識：「春溪連波，朱紫方多。」東有大戴雲山，西有連城山，北有進龍山。

擎雲山 頂如丫髻，峻絕凌雲。南行突起三峰，爲筆架山。

牛石鼓山 有二石，一如牛，一如鼓。諺云：「石鼓鳴，白牛起。」樵牧者，或時見之。

烏石山 上有烏石隘。

朝天馬山

羅城山 一名豪城。形如覆釜，旁拔上夷。舊有寨基。

戴雲山 山雄跨十里許。上拔十峰，最高者五，曰大戴雲，稍次者五，曰小戴雲。泉人語曰：「天下無山高戴雲」，龍潭山祖也。山中多奇花異果，五鬚之松，高四五尺，蒼鬱可愛。頂有池泉，深宵分爲九派，下注九溪。有戴雲寺居山中麓，上山下山，各十五里。梁開闢二年，所造水田鱗次，可以給僧寺。後有石屏，有天柱石、儒冠石、一線泉。西有石室，口祖師室。石屏之上，左鐘右鼓，皆奇觀也。南唐時，釋智亮者居之。智亮，正覺智廣高弟，或曰身毒人，或曰慈感徒弟，始居泉州開元東律巷，四時袒一膊，行乞市中，人曰袒膊和尚。既移居是山，不火累月，堆趺獨坐，虎馴其側。州旱，守聞其名，致之乞雨，至則一頭陀耳，簡之問雨期，曰：「坐我麗譙外三日。」既三日，日轉熾，守簡滋甚，亭午，雲西北起，少選，大雨至，水三尺。疆守恐，使止之。曰：「須自來。」守自來，雨乃止。遂爲院居智亮，敬事之。智亮不筆硯而能句，有山中詩：「人間漫說上天梯，上萬千回總是迷。爭似老夫巖下坐，清風明月與心齊。」人駭服其天得云。大中中，訣衆逝，其徒泥軀祀之。又有戴雲庵，有戴雲師居之。師，永春蘇氏子。棄家修行，結庵明山頂，赴齋下山，紫雲覆之，上山騎虎以歸。鄉人早，就之禱雨，隨至。

繡屏山 在縣北。頂有印石若覆鍾。又有仙人跡。

園林山 在縣北。花木繁陰，蒼翠如園林也。

騰巖角山 在戴雲南。峰巒峻秀，狀如龍角。

雲峰山 一曰祥雲山。

龍湖山 十二峰崿，旒插雲，旣登絕頂，如履平陸，名金峰。頂有池丈許，一碧如鏡，名曰碧水。旁有奇花茂草，果木陰秀，因名太湖，又名青草湖。又以形若舡，名飛舡山。山側有龍湖巖，祀僧自超。自超，高座也。又宋紹定中，張道源遇異人於九竇溪，使負之渡，口占一詩，我泰山佛，傳汝心印，自是靈異。」一夕，夢神人導往異境，古水流泉，石巖可居。後往太湖，宛如夢中，遂隱焉。

靈山

石牛山 福州諸山祖也。絕頂望見興、泉二郡。山上有石如牛，有石牛洞。宋永福人張法師於此治山鬼。石上有法索劍痕，及披髮禹步之跡。其支山聳秀如柱，名石柱山，又名天柱山。自石牛發脉，爲飛仙山。兩峰角立，懸崖峭壁，飛瀑掛焉。

均山 在善均里，山以里名也。峭拔延袤數十里。

蕉溪山 麓有蕉溪，山以溪名也。

東濟山 頂有澗泉，瀉流而下，濟邑東人家之汲。

石獅山

蘇墓山 山形如壺。蘇攄龜墓在其東。

蓮花崎山 石湖崎山

鍾山 四面石壁如覆鐘然。山麓有澗，澗邊有巖洞，名蔡巖。相傳香山寺僧道徽得道，有佛告曰：「是處，爾福地也。」遂跌逝其中。

蓮花峰山 仁齊山 吉山 崎山 漸山

香林山 中有香林寺。五代末，僧守珍建於楊梅上團湖山之北。宋天聖初，僧了 him 移建於西林，賜額。了他，縣之葛陂人，自幼出家，持律甚嚴，不澡浴者三十餘歲，曰：「形骸外物，何取明淨？」元豐間，九十七終。將入滅，取猪頭不割而噉之，將盡，遂坐化。其徒尊奉如生。後三十年，爪髮復長四寸，或刺其臂，血流三日。今真身猶存。

梅峰山 上有梅峰寺。下有梅峰隘、太平橋。左有三層塔山，右有清從山，南有唐帽山。

九仙山 九峰聳起如筆，戴雲山祖也。一云，昔有隱士九人仙去。又云九仙經此。上有靈鷲、永安、蓮花諸巖，彌勒、魁星、摩雲諸洞。又有九仙洞、甘泉樹、仙人跡、步雲梯、石舟、石井、石棋盤、棋子，皆自然石，淡紫色。左右有獅子石，又有珠樹、午時蓮，有龍池，池中魚有四足。山南有瀑布，泉久晴鳴則雨，久雨鳴則晴。宋主簿柳驥詩：「天插一泉朝漱玉，地高六月夜凝霜。」

石鼓山 銀瓶山

獅子巖山 界尤溪。一名寶蓋。有石如屏，巖在石下。宋有黃頭陀，尸解存焉。上有獅子巖，幽絕可愛。

鷄髻寨山 中有石門隘。

觀音山 派自九仙。亦名長山。

大仙峰山 兩峰尖起，頂有仙峰巖。東南有舡山，西有烏崖山，南有格頭寨山。

大尖山 三峰如指，又名筆架。上有大尖巖，有崔法興者居此，戒行精勤，後化去。鄉人祠之。

鑛山

錡山 從大仙峰迢遞而南，直奔戴雲。德化諸山脉祖也。

仙濟山 峰巒峭拔。上有仙人、仙牛二跡。

牛眠山 屏山

金鷄山 昔人聞上有鷄鳴，山陰有金鷄寨。

酒壩寨山 昔人寨以避賊，賊謂無泉，困之。有一女子，取酒浣衣，賊見，解圍去。

巖市南山

虎頭山 山高險，有古寨可避兵。其中，山水如畫。

牛宅寨山 馬山 胡蘆山

葛坑山 石上有陳仙跡。仙，宋末人，名朗，字子彝，居楊梅中團，精地理。一日，遇仙授之草履，行步如飛。

石礫山 山有大石，上有巨人跡。對山、盤山上亦有之。

高陽嶺 在縣南高陽鋪。南爲大劇嶺，界永春。

湯嶺 界尤溪。有湯嶺隘，湯泉出焉。牡丹、芍藥二花，南土所稀，是嶺有深紅、淺紅、淡白三本。

其近地，有山如鵝黃色，上有神廟，中有地墳起如卵，掃之復墳，名黃鵝抱卵。

姑栖嶺 僧道徽跌逝鍾山下，其姑鄭，失所在，栖惶過此，故名。

大官嶺 界尤溪。相傳昔有達官宿此。

官田嶺 界尤溪。

湖嶺 在縣西五十里。嶺最高，其上微陰，卽山下大雨，及至半嶺，霽色皎然。宋志：泉中諸水，無論派流近遠，或自其縣，或逕郡中，各匯入海。獨是嶺之水，西流過尤溪，轉歸永福人海。又一水，至永春界，曰陽墘，阻高山十里，亦東北流入永福湫口，程次，達於海。

赤水嶺、西溪嶺 二嶺高寒，暑可絮也。

白格嶺

靈馨巖 在城東北。昔有樵人獲異香於此。

金鷄巖

伏虎巖

漿溪橋下石 石有麟、魚、龜、印，人稱四瑞。

下碧村 昔有農婦鎰夫，沙觸夫齒，夫怒欲毆之，有張道人者，過而勸解，尋頓足地震，曰：「沙絕矣。」今環村五里許，無沙也。

川水利附。

滄溪 發源戴雲山。山頂有池，分九派而下，釋智亮詩有「一池分作九條溪」之句。溪北流者二：曰張巖溪，曰盧溪，合而爲赤水。西溪東逶迤爲上湧溪，逕下湧團，曰下湧溪，次逕楊梅上團，曰上茶溪，曰

曾坂溪，曰百葉溪，曰湖頭溪，曰李田溪。人楊梅中團，曰湧口溪，析而至善均里，曰九寶溪。人楊梅下團，曰螺潭，由東北入永福界，以達於海。溪東流者五：曰雙芹，曰馬槽塲，合而爲龍潭，爲左溪，至均善里與九寶溪合。曰上洋，過涵口入石獅渡。曰上雲，爲漿溪，至蕉口，亦入於石獅渡。曰中興坑，爲林翰坑，達於董坂橋，會縣前溪。溪南流者二：曰東埔溪，曰李山溪，會流過丘店橋、雙津橋，爲白泉溪、石山溪，逕蘇津橋，爲蘇溪。又逕會政橋，爲塗坂溪。又逕魁龍橋，爲西門溪。過龍津橋，爲縣前溪。其水回環曲折，俗呼腰帶水，其名曰漚溪。其北進爲龍門橋。十二翰溪，與上洋、上雲二水會於石獅渡，向東北流，與張巖、盧溪、雙芹、馬槽四水同人永福界。

蓋竹溪 發源蓋竹根山，自塗坂溪與東埔、李山二水相會。

黃洋溪 發源和陸場雪山，自白泉溪與東埔、李山二水相會。

大雲溪 發源雙髻山，逕迤西流，爲埔平溪。

下倉溪 自黃斜溪橋與縣前漚溪相會。

丁溪 發源瓊山，入九漚溪，經歐山溪、大坑溪，亦會於縣前漚溪。先是溪水南行，不與漚會。古識云：「水畫丁，羅簪纓。」宋元符間，邑士林程捐貲五十萬買田，請令方安道鑿九漚、歐山、盧、大坑四溪水，會於漚。一夕，雷雨洪流，一縱一橫，若丁字。既，程子揚休出太學登第。其後續世科擢州麾邑士，亦相繼榮登云。縣志：程廣收圖史，延宿儒，合族子弟廩而誨之，命閤「醉經」，命堂「教義」，蓋富而好禮者也。

寨前溪 發源湖嶺頭。其南流者，自丘店橋，與李山溪相會，西流者過尤溪，轉歸永福，乃入海者是

也。

石山溪 有相安寺，宋曾丞相公亮之祖葬焉。丞相時來祭掃，宿路傍山庵，人遂名庵「相安」。而寺之山有龍潭，潭面甚隘，漁人云：行一二里許，水流入山下，道黑不能行，惟近潭淺地遇斜照，稍見其深杳耳。嘗因旱，水齧稍入，探之見大魚十百爲群，黑龍殿後，遂驚遁，不敢復入。

佐溪龍潭 距縣百餘里。巖山之間，有上、中、下三涵如寶，三泓如甕，涵水各入泓中。上泓獨長，夾以石壁，高數十仞。其甕、寶，水聲如鍾，遇陰晦，或龍出。上有龍王廟。宋守真文忠禱雨有應。

雲居井 羅漢井 龍石二井 仙石井

溫泉 在縣東新化里。源自戴雲山。凡七穴。

〔校記〕

〔一〕「二十九都」，下文實列三十四都。

〔二〕「統圖三十」，下文實列二十九圖。

〔三〕「萬壽」，下文作「萬歲」。

〔四〕「茭布溪」，各本原作「茭溪」，據下文及《八閩通志·地理》改。

〔五〕「吳公」，下文作「吳山」。

〔六〕「小岬」，各本原作「山岬」，據下文及《八閩通志·地理》改。

〔七〕「黃坑溪」，各本原作「黃坑橋」，據上下文改。

〔八〕「雲山」，疑作「雪山」。

〔九〕「白牛石鼓」，下文作「牛石鼓」。

〔一〇〕「焦溪」，下文作「蕉溪」。

〔一一〕「佐溪龍潭」，各本原作「佐溪」，據下文及《八閩通志·地理》改。

〔一二〕「蓮花」，下文作「蓮花峰山」，《八閩通志·地理》作「蓮花峰」。

閩書卷之十一

方域志

泉州府 安溪縣 同安縣一

安溪縣 在郡城西。東抵南安，西抵同安，北抵南安，南抵龍溪。本隋南安縣地。唐咸通中，析置小溪場。五代周顯德二年，南唐始立爲清溪縣。宋宣和三年，改爲安溪。元仍舊。皇朝因之，凡一坊、十五里，統圖一十八。(一)

在坊，圖一。山曰鳳山。

歸善鄉

永安里，統圖一。山曰黃龍、金龜、三公、北觀、黃藥、產坑、宮山、旗山、關山、牝杜。

長泰里，統圖一。山曰大厝、小厝、羅漢、馬旗山、高田。巖曰天礫、三層瀑。

光德里，統圖一。巖曰水湖、新巖。

依仁里，統圖一。山曰廬山、烏巖、白菊、龍塘、鐵峰。嶺曰龍門、東嶺。巖曰青林。湯曰金湯。

積德鄉

新溪里，統圖一。山口驢馬。巖曰碧水，（二）聖泉。石曰龍虎，芹石。井曰佛泉。

新康里，統圖一。山口龍蹤、彌勒。巖曰洪恩。嶺曰磨鎗。石曰白胸。

崇信里，統圖一。五代詹敦仁隱居佛耳山，留從効貽之書，有「崇待篤信」之語，後人因名其里。山口佛天、九峰、北巖。巖曰石人、吟詩。

龍涓里，統圖一。山口石鼓、筆架、內壩。嶺曰石梯。巖曰烏石。

金田鄉

龍興里，統圖一。山口大尖、白葉坑、後洋、天馬、三笏、虎吼。溪曰龍潭。湯曰溫泉。

還集里，統圖一。山口南斗、同發、朝天、坑源。巖曰達磨、太湖。石曰仙人臺。溪曰下湖。

感德里，統圖一。山口鐵鑛、人深。湯曰大深。

常樂里，統圖一。山口高蓋、高旗、覆鼎、閭平。

修仁鄉

感化里，統圖一。山口陳五郎、翠屏、碧翠、小尖、雪山。嶺曰寓思、大嶺、吉潔。巖曰獅子。溪曰湖頭。湯曰橫山。

來蘇里，統圖一。山口盤山。嶺曰打鼓。巖曰惠林。潭曰白瀨龍。

崇善里，統圖一。山口蓬萊。巖曰太平。石曰虎跳。湯曰蓬溪。

三峰玉峙，一水環迴，朱鳳迴翔，黃龍內顧。其形勝也。

山

鳳山 縣主山也。深窅袤長，虛靜廣莫。珍禽奇羽，多集其中。故曰鳳山，又曰鳳髻山，又曰展旗

山。五代劉乙隱其下。乙，字子真，不知何許人，仕閩爲鳳閣舍人，後隱是山，與周朴、詹君澤友，所爲詩有「掃石雲隨帚，耕山鳥傍人」之句。君澤嘗遣子珪訪之，贈以詩：「掃石耕山舊子真，布衣草履自隨身。石崖壁立題詩處，知是當年鳳閣人。」觀君澤所贈乙詩，乙蓋高士也。予讀《五代史》：「晉天福二年，閩王昶遣使朝貢，高祖遣散騎常侍盧損人閩，封昶爲王，并其子繼恭主之。遣中書舍人劉乙勞於館。乙見損衣冠偉然，矚目甚盛，他日遇諸途，布衣芒屨而已。損使謂之曰：『鳳閣舍人何偏下甚也？』乙羞愧，掩面反走。」心疑之，夫乙故高士，閩王遣之勞使，蓋明欲藉以爲重，成禮倬盛，遂事芒屨，隱者之致，羞愧掩走，必損惡昶託疾，歸言其主文致之詞，而歐陽公仍之耳。抑損以上國之使，人閩何得無驕？從前呼乙，必待其至，前方見而反走耶？後君澤子珪，亦隱是山，陳洪進薦之朝，固辭，號鳳山山人。山頂有庵曰鳳池，朱文公留按事於此，題句庵壁云：「心外無法，滿目青山。通玄峰頂，不是人間。」國朝令龔穎改庵爲文公書院。宋令陳宓勸民歌曰：「我有衍土，鳳山之陽。昔焉蕪穢，今則歌農桑。旣溫且飽，復習乎典章。嗚呼！帝力於我其忘。」

黃龍山 鳳山對山也。下有黃龍津，又名龍津山。又名登高山，宋令陳宓《修楔序》曰：「得暇日，與佳友，尋勝地，賞良晨，昔兼爲難，況綰銅束帶，吏道拘迫！僕來安溪，愛其山水，事煩才短，此事俱廢。值雨快晴，吏以休告。童子曰：『非楔辰乎？』於是命友聯騎，東出龍津橋，步登高山。山上有臺，翠巘旁繞，下瞰曲湍，如過几席。孟行到手，疾於飛羽，詠《蘭亭》之章，如與昔人同處一席。少焉，西登鳳池橋，憩於中亭，清風掀袂，如跨虹登漢，拏舟抵流惠亭，平湖偃日，紫荷刺水，白鷺窺人，草木芳蔚，游人堤上，不絕，依稀錢塘西湖。酒半，假筆旁舍，卽景成詠。回泊雙清閣，五峰屏立，一水鏡淨，觴一再引。日薄，意

戀，戀猶未足。嗟乎！樂不可極，游不可放，詩以『蘭亭修禊』爲韵云。』按流惠亭，在縣西陳塘上，舊名水花亭，有蘇氏子於此遇尉不避，尉譙呵之，命爲賦，賦立就，乃釋之。故以『流惠』名亭。後以塘生雙蓮，改曰瑞蓮。嘉定間以塘爲放生池，復名流惠。龍津橋，宋令趙師戡所建。鳳池橋，則接於鳳山，宓所建也。令趙彥侯記曰：『自建二橋，邑人物始盛。』陳宓《龍津橋詩》：『兼旬積雨截晴虹，洗出溪山罨畫中。別浦漁歌來暝色，長橋人語半秋空。』《詩話總龜》：黃龍山產蔬菜特美，故曾魯公有『飯思白石紅桃米，菜憶黃龍紫芥心』之句。

金龜山 縣東南水口山也。以形名。舊有識：『龍向江頭角，龜向東臚開。』蓋指黃龍與此山。

三公山 山有三峰，中似公字。又曰文筆峰。旁有龍水巖。東峰頂有池，大旱不涸。旁有仙人石棋盤，卽南安界之麗碧山也。在安溪，又一面勢矣。山下爲宋張讀所居。有龍潭，宋守真文忠於此禱雨。

北觀山 山有石筍，高三丈，曰牛心石。下有溪水迴環縣治，名北地灣。

黃蘗山 一名南山，又名午山。深林邃谷，有筍蕨稜稻之饒，稜，卽稜也，畚田所種。山顛舊傳有遇仙者，從之而往，越旬方歸。山腹有五峰巖，又名頭陀巖。

產坑山 宋處士周朴居此，有瀑布泉，其前有塘，又名周塘山。朴見福州烏石山。

象山 又名象運山，界南安。

林尾山

官山 山半有盤石，可坐數十人，中虛如宮。

旗山

閩山 又名浪來，謂其山勢似蹙浪，然其半爲閩苑巖。先是，清水巖，普足禪師嘗坐是山，指曰：「真佛家鄉也。後數十年，當現身於此。」建中靖國元年示寂。紹興四年七月十日，雷火燒山，自夜達旦，鄉人異之，躋攀崖險，至石門人跡不到處，見白菊一叢，薑三叢，香爐一，普足在焉。俄頃，雲霧擁之上昇，遂卽其地創廟宇，爲清水別巖。普足，詳見下蓬萊山。又有仙姑巖，相傳有馬氏女採花巖中，後成仙也。宋有扶風馬大仙廟。下有月潭，以其形如半月，大旱而雪，龜浮卽雨，潭中蓮花石，出水高三丈餘。

牝牡山

大眉、小眉山 一山也。其形如眉，又名眉田山。宋令黃銳詩：「一嶺復一嶺，一巔復一巔。步丘皆力穡，掌地也成田。」

羅漢山 自大眉發脉。宋有僧來此，一日騰空去。又名羅漢巖。又羅漢山，亦曰九仙巖。下有羅漢渡。

馬旗山

高田山 與大小二眉俱界南安。

廬山 山下有盧氏居之。五行傳禪師修行山中，常有二虎馴伏。廬門前數松，一夕自仆。師爲起之，盧遂徙宅而延師。

烏巖山 地名貴湖。有瑞蓮、龍安二巖。瑞蓮巖，有石室，可容二百餘人，前有池，嘗產雙蓮。龍安巖，前有石筍，卓立溪心。五季間，有清豁禪師居之。清豁，名玄應，福永泰張氏，閩龍啟初，肄業神晏國師，具戒事，參謁永和，坐夏招慶法因席。夜聞油燈聲，爲偈曰：「分明坐裏見身光，迥迥虛明照四方。復

見身於光裏見，身將光相不相妨。凡聖共同真去處，非凡非聖莫思量，以似因因曰上坐。」自證之心乃異於昔，而異非異，善自保持。還同冲煦，造小界山，契如庵主，遂詣杉庵，晤語及夜，豺虎馴擾，豁爲如更室大章山，旋移莆中庵居，去見睡龍道溥，與相證明。溥大悅許之。南唐保大末，置泉開元上方院。既，留從効延主漳之保福。宋建隆三年辭衆曰：「聚如浮沫，散如雲聚。不相將散，不分入郭，當時君是我歸山，今日我非君遂行。」跋涉三嶺，苧溪修阻，多癘毒，吟曰：「世人休說路行難，鳥道羊腸咫尺間。珍重苧溪溪上水，汝歸滄海我歸山。」至貴湖，愛其精邃，休居焉。刺史陳洪進奏賜紫方袍，號性空禪師。豁所居，門無牡鑰，薄曲障風而已。隣玄應時醺倡山中。太平興國元年冬，戒門人以其遺骸食蟲蟻，勿塔。人堪巖坐盤石上，長往留七日，神色儼如入定。火而散之，得舍利三百。

白菊山 山多白石，望之如菊。

荷葉山 瑞峰山

龍塘山 山曰龍塘嶺，曰龍門廟，曰龍王廟。下潭曰龍塘潭，懸瀑數十尺，二壁夾立，舊嘗禱雨，有龍見。古有龍門驛，通同安縣。

鐵峰山 山頂石起數丈，如鐵砧，俗名鐵砧山。下有慈濟巖。

龍山 大漈山

駟馬山 山勢如馬。有石廣二百餘丈，人呼則應，名曰應石。

龍蹤山 山勢蜿蜒。石上有龍跡，下有廟有潭。

彌勒山

佛天山 以形名。又名佛耳。五代詹敦仁謝令後隱此，作堂「清隱」。自爲記：「去邑西踰百餘里，有山曰佛耳，峭絕高大，遠跨三郡，有田可耕，有水可居。予卜而築之，榜堂曰清隱。若夫煙收雨霽，雲捲天高，山聳聳以軒騰，風梳木而微動；寒泉聒耳，戛玉鳴琴，非官非商，不調自協；非絲非桐，不撫自鳴。春而耕，一犁雨足；秋而斂，萬頃雲黃。飢餐飽適，遇酒狂歌，或咏月以嘲風，或眠雪而瀨石。」

九峰山 在佛天山前。詹敦仁作望雲亭面之，目曰九仙。

北巖山 上有石鼓、石棋盤，石跡在焉。

石鼓山 舊傳有仙人抱石如鼓，置盤石上，手抱痕及臍跡尚明。又有石如兔望月，又有巨人手跡。

筆架山 內竈山

白葉坑山 山產白竹葉，地名白葉坂。皇朝嘉靖二十七年，僉事余燝於此平賊，築城堡，戍以官軍，移源口巡檢司，添額兵共守之，今廢。惠安張岳記：「安溪縣西南崇信里白葉坂、九龍洞、大尖、小尖諸山，綿跨泉、漳、汀之交百數十里，重岡複嶺，林菁蒙密。姦徒保聚至數百人，去冬出劫安溪，徑抵同安郭外，劫數大家，質其男女求贖，屯二十里外弗去。僉憲余公調官民與文武將吏，分部追之。賊走還白葉坂。保險旅拒。公馳兵，親將進逼坂口，斬首數十級，遂薄諸險，搏鬪數十合，相持幾一月，以其間探調巢穴，遠近險易，分兵掩擊，賊魁陳日暉與其黨悉就擒。賊巢既空，公建議移戍坂口，彈壓之。是時泉承饑饉之後，物力消耗，海寇番舶警報日聞，安溪山寇又作，人情惶駭，官吏閉城，非余公決機之敏，出身先之，安能使衆心翕奮，以有成功？」東有陽益山。

後洋山 山最高，下有大洋田，一名大洋山。

天馬山 三笏山 虎耽山

南斗山 上有六小山，布列如南斗。又有大帽山、迎富山、松洋山。

同發山 高山也。又名銅鉞山。

朝天山 高山也。上有天寧巖。

坑源山 高山也。上有普陀廟。

鐵鑛山 以產鐵名。旁有桃洲山。

大深山 下有深湯，湯泉也。

高蓋山 高旗山

覆鼎山 界永春。以形名。山高大，可見百里。

閭平山

陳五郎山 山最高，晴明可眺海上。有石平廣，裂痕如砌成者。有巨人跡，舊號仙鋪。庭下有龍潭，祈雨輒應。障水口者，有五山。

翠屏山 山有巨峰，介還集、來蘇、龍舟、感化四里間，故名大尖。宋宣和間，道人黃惠勝自永春來居小尖，又自小尖徙此。初徙時，尖有異光，人怪之，往觀則惠勝在焉。因巖架屋，屋用鐵瓦，悉飛遞而至。紹興甲寅示寂。水旱應禱。或有青蛇之異，人因去其「尖」字，名曰太山。後有顯應大師修行其上。師，永春黃氏子，精禪契佛。鄉值旱，禱不應，師曰：「我能。」人未然之，聊就誦經，經罷曰：「大眾急歸。」少選，滂沱。時號「黃水車」，後坐化。

碧翠山 二峰壁立甚峭。山半有魁巖。

小尖山 在翠屏東。道人黃惠勝，自永春來居此，號山曰寶峰，結臺峰頂，曝身求雨。既徙居於大尖，語人曰：「此地後必爲於城市，劉寶來，吾庵其爲廳事乎！」其後，臨汀寇至，鄉落皆尖頂禦之，朝廷遣官捕寇，兵果駐故庵，其官姓劉，名寶也。

雪山 古有廟，山上有積雪。歲旱禱之，若巖溜滴瀝，卽雨。

鰲山(三) 以形名，又名侯山。上多石。下有龍仙廟。皇朝洪武間，胡氏女名仙英，自幼不葷不狎，稍長得墨刻《黃庭經》，寶惜如頭目，焚香跪誦，誓執不嫁。及笄，婿來親迎，女乃白日飛昇。次日，山旁有降真藤盤結如椅，女現身坐寂焉。旁有昇平山、東甲山。

蓬萊山 故名張巖山。巖水清泚，名清水巖。宋禪師普足道場也。普足，永春人，幼出家大雲院，長結庵高泰山，往事大靜山明禪師，業就辭還，乃勸造橋梁數十，所以度往來，後移庵住麻章，爲衆請雨，如期皆應。元豐六年，清溪大旱，便村劉氏與鄉人謀往請之，比至，雨隨霑足，衆情胥悅，有築室延居之願，適於張巖山成屋數架，名清水巖，奉居焉。普足術行建、劍、汀、漳間，檀施爲盛，居巖十九年，造成通泉谷口、汰口諸橋，砌洋中亭路，糜費巨萬，皆於施者。始草創時，其徒楊道、周明於巖阿累石爲二窄堵，臨崖距壑，非人措手，若有陰相之者。其餉工匠，巖石中自出米，匠斷手而米絕。中有公銳者，久不如葦，堅持梵行，普足悅之。一日囑以後事，說頌訖，端然坐逝，享年五十七，建中靖國元年五月十二日也。遠近盆集，瞻禮讚嘆。越三日，神色不異，鄉人斃塔刻像事之。稍或不虔，輒有雷電迅擊之異。巖舊巨石當路，不便往來，一夜轉於道側，有婦人投宿者，巖前麻竹四裂，遂不敢入。分身應供，現影食羹，凡所祈求，

無不響應。宋累封「昭應廣惠慈濟善和大師」。普足塑像，大是黧黑，俗傳初築室是山時，有鬼窟，畚鬼故穴其中，普足與約：「吾與若，以法相勝。」鬼曰：「諾。」置普足穴中，薰之七日夜。普足不死，出曰：「汝任吾治。」出一布懸崖側，請鬼坐其上，鬼盡往坐，布斷盡墜巖底，遂逐而穴閉之。今像黧黑，被鬼薰致然也。又傳山寇至，斷斷像鼻，僧人取以傅之，了然無跡。顧居常在也，有不慍，鼻輒不見。頃之，或得諸袍袖中，或得之胸腹前。至今郡邑祈雨，必迎奉之。有截竹徑，徑有含笑花，普足所種，其枝至徑而返，尋復內向，又一奇也。宋有來憩亭，嘉定中，令趙彥侯甃池引泉，公暇則携琴游息於此。皇朝邑人詹仰庇詩：「面擁琪林翳，耳喧玉髓鳴。一時天幾色，半榻鳥千聲。」

東嶺 與龍門嶺俱通同安縣。

磨鎗嶺 通長泰縣。

吟詩嶺

石人嶺 嶺下有三石如人。

石梯嶺 巨石高峻，有五十餘層。昔超才大師居嶺塢，凡客至，輒有老鴉噪於簷，獼猴爲之熬火烹茶。師每下山赴齋，歸至半嶺，有虎迎迓，騎之至庵。

寓思嶺 界龍興、感化二里。

大嶺 在縣西北，通永春界。

吉潒嶺 界永春縣。

打鼓嶺 通永春縣。

水湖巖 新巖

青林巖 邑巖之最大者。宋時清水爲上，青林次之。

碧水巖 巖背有石，可容百餘人。水出其下，曰碧水。

聖泉巖

洪恩巖 右有瀑水百餘丈，樹林幽勝。

烏石巖 其石如屋，方員十餘丈。宋釋頭陀居之，名護國巖。

達磨巖 故名玳瑁。宋僧達創居，因名達磨巖。有石獅，宋令陳宓匾曰獅子峰。

太湖巖 宋有道人張道源者，自德化來居。道源，已見德化龍湖山。龍湖，一名太湖。道源居此，以太湖名巖，仍舊隱也。其起手時，邑有巨室，山多杉木，道源往施，巨室曰：「視木末折者，卽以奉君。」何風大起，木盡折。既得木矣，又莫致之。乃白山頂湖中，先後挺出。匠告曰：「木足矣。」遂止不挺。今木頭半挺，尚在湖中。安溪稱三巖之奇曰：「普足構清水，自出米；惠勝構太山，自出瓦；道源構太湖，自出木。」邑人稱普足曰昭應祖師，道源曰惠應祖師，惠勝曰顯應祖師。

惠林巖 宋乾道間，崔道人修行之地。嘉定中，陳宓匾額「惠林」，又名月峰巖。

太平巖

獅子巖 舊名歐巖。宋淳熙間，道人張法慈創居。

白胸石 略似人形。天旱，石帶白雲則雨。

龍虎石 兩石相對，一高而青，一伏而白。

芹石

仙人臺石 石臺高峭，垂濤百丈。上有柑橘、李仙人跡。

虎跳石 蓬溪中有四石，高丈餘，有巨人跡、虎跡，一名仙人跳。

川

湖頭溪 自縣北常樂、覆鼎諸山發源，至建口渡，歷新魁渡，又合坑源諸山之水，至感化爲下林渡，而來蘇、昇平諸山之水注焉。溪有馬上灘、淵灘，當溪阻石數百丈，水從石罅出。皇朝正統間，邑人李森鑿之以通舟，水遂深廣，便裝載。

下湖溪 發源銅鉞山，自還集里至龍興里。

龍潭溪 發源自龍興、崇信二里，達於源口渡，湖頭溪之水至此分而爲二。其下爲家藍灘，勢甚奔激，而白葉坑、後洋、陽益諸山之水又注焉，中經湯港灘、便峒灘、仙人跳灘、流倒藤灘、溪口灘、芒洲灘、石圳灘、東淵灘，至於縣治。西北爲吳埔渡。

藍溪 自北巖、根竹、吟詩諸山發源，合新康、龍蹤諸山之水，至大洋渡，又合依仁、龍塘、烏巖諸山之水，至粵下渡，始通小舟。又流爲凌淵渡，而溪稍大。至於薛坂渡與吳埔渡，溪乃合爲一，入常洲渡，其下有蘆瀨灘，抵黃龍渡曰藍溪，以水香如藍名。龍津渡在其下，繞縣東南，爲學前灘。歷北地灣，東出羅渡，經葛磬灘、桶鈎灘、石佛前灘、參峒灘、夾門灘、象前灘、溪友灘、西淵灘、田隙灘，至南安珠淵渡，達於雙溪口，入於晉江。又有派出崇信里之九峰山，有水逆流東北，則入於漳州龍溪縣之九龍江。又一派出還集里之同發山，有水逆流西北，入於長泰縣，是又藍溪外之別派也。宋有驛在縣治，名藍溪，驛司羅時用

詩：「寥寥孤館白日靜，酣睡有魔那得降？扣戶故人風動竹，斂箕羸馬浪翻江。飛殘蝙蝠燈留壁，啼盡栖鴉月到窗。堪笑浪游成久住，一秋贏得鬢絲雙。」薛坂渡頭，有石刻「仙苑」二字，蒼雅奇古，不知何代人書。皇朝隆慶間，浴溪者得而出之。

黃潭 在縣東五里許大溪中。是地有黃潭村，有塚三十六墳，皆花磚，數十步有亭，號御亭，相傳爲吳王墓，亦不知是何王也。

白瀨龍潭 界來蘇、感化二里。旱鳴則雨，雨鳴則晴。

二層漈龍潭 漈在馬旂山。山色幽黝，有三潭，下一潭最深，有龍王廟，傍祀一尉。云尉嘗禱雨於此，訶責道士，必求見龍，龍見形示尉，尉還，大雷雨擊尉斃之，故祀於廟傍。宋志參村龍潭廟，方二丈餘，側有大石，遇禱雨，龜現則旱，蛇現則雨。皇朝嘉靖七年二月旱甚，令黃懌免冠，帥士民禱潭下，三步一拜，果雨。三十一年六月令汪瑀望潭請水，徒跣路拜，雨亦隨應。

湯泉六 蓬溪湯，在湯港灘旁，舊名便付湯。橫山湯。溫泉湯。金湯，有上金湯、下金湯。華湯。大深湯。

佛泉井 相傳昭應禪師過此，天暑渴甚，無井可汲，一老嫗汲澗泉飲之，師感其意，卓杖出泉，隨斃爲井。

同安縣 在郡西南。東抵南安，西抵漳州龍溪縣，南抵大海黃牛澳，北抵安溪。晉太康三年，置縣，屬晉安郡。後省。隋爲南安縣地。唐貞元十九年，析南安四鄉置大同場。五代唐天成四年，王延鈞升場

爲縣。宋元仍舊。皇朝因之，洪武元年設在坊二隅，里十一，都四十四。二十年，徙大嶧、小嶧二都人民於內地。永樂元年，併爲三十五都。成化六年，二都人民奏復其舊，凡二坊隅、〔五〕十一里、三十七都、〔六〕統圖五十有三。〔七〕

東北隅，一圖。

西南隅，一圖。

西南隅，二圖。

長興里 宋永豐鄉。

一、二、三都，一圖。溪曰東溪、西溪。潭曰北山龍潭、廣濟龍潭。泉曰董塘。

從順里 宋永豐鄉。

一、二都，一圖。山曰聖水泉、豪山、寶蓋、崑山、大柱、岑坪。

一、二都，二圖。

三都。山曰大輪、三秀、胡蘆、大羅、象運、北辰。

四、五都。山口洪巖。溪曰小同。

感化里 宋永豐鄉。

六、七、八都。山曰應城、斗拱、西山、大鳳、吳淮。泉曰興福巖、西源溫泉。

歸德里 宋永豐鄉。

九、十都。山曰蓮花、大尖、龜洋。溪曰蓮溪。潭曰百馬、漂坑。

同禾里 宋綏德鄉。

四都。

五都。山曰九躍、同山。石曰御踏。潭曰侯山龍潭。

六都。山口孤卿、楨船、鷺山、東大帽、崑嶺。

七都。

民安里 宋綏德鄉。

八都。

九都。山曰黃漸。

十都。

十一都。山曰鵲山、香山、卜畫、金山、普陀。嶼曰泗洲。泉曰小嶠。

翔風里 宋綏德鄉。

十二都。

十三都。一圖。山口三魁。

十三都。一圖。嶼曰白嶼、寶珠。

十四都。

十五都。山口夕陽、三重。嶼曰大嶠。

十六都。嶼曰小嶠。泉曰瑞泉。

十七都，六圖。嶼曰涪洲、夾嶼。

十七都，七圖。

十七都，八圖。

十八都，一圖。

十八都，二圖。

十八都，五圖。

十九都，一圖。

十九都，三圖。

二十都。嶼曰小擔、檳榔、大擔、烈嶼。

嘉禾里宋綏德鄉。

二十一都，一圖。嶼曰嘉禾。

二十一都，二圖。

二十二都，一圖。石口官榮。潭曰龍湫。虹井。(八)

二十二都，二圖。嶼曰鼓浪。

二十三都，一圖。

二十三都，二圖。

二十四都，一圖。嶼曰離浦。

二十四都，二圖。

仁德里 宋明盛鄉。

十一都。

十二都。

十三都。 山曰芋溪。 溪曰芋溪。 泉曰洪前鹽泉。

安仁里 宋明盛鄉。

十四都。 溪曰沙溪。

十五都。

十六都，一圖。

十六都，二圖。

積善里 宋明盛鄉。

十七都。 山曰崑山。 嶺曰吾通。

十八都，一圖。 泉曰湯兜、溫泉、蛟井。

十八都，二圖。

十九都。 山曰文圃。

二十都。 石曰白礁。

東南海島，獻奇十一在前，西北峰巒，擁秀十六在後。其形勝也。

山

聖水泉山，山有慈雲巖，水在其庭下，以其建於宋端平，亦曰端平巖。

豪山 自聖泉山，過豪嶺起，是山最遠而大。南行起金鞍山，如馬鞍也，又名天馬矣。其上石罅有泉，大旱不竭，下有豪山廟。宋王明叟《碑記》：「祭法：『山林川谷丘陵，能出雲爲風雨，見怪物，皆曰神。』」又曰：「能禦大災則祀之，能捍大患則祀之。」縣東南三十餘里，曰豪嶺。又南一里曰豪山。山巔有龍潭，天將雨，龍擊水聲如鐘磬，時有蟹五色出潭傍，山麓故有祠，雨禱輒應。崇寧三年，詔天下名山大川有功於民者，聽所在州縣立廟。攝令趙君文仲，奉詔書，度材鳩工，廟成，匾「豪山」焉。初，朱文公主邑簿，嘗詣祠禱雨，雨立至。淳熙十一年春夏旱，令鄭侯公顯榮於潭，是夕雷電交作，俄雨大霽。紹定癸巳，四月，不雨，西山真公遺吏謁祠，爲文告龍神，越二日，雨。明年，端平甲午六月，不雨，守竹湖李公，修真公故事，未幾大雨，遣吏謁謝。所謂「能出雲爲風雨者」歟！豪嶺亭溪間，林薄陰翳，虎豹所穴，民有王姓者父子號訴於神，募善射者，一射中之。先是，秋疫熾盛，病者十室六七，夏蝗蔽天，食苗幾赭，獨近廟數十里人無札瘥，蝗不害稼。白桐嶺，與漳接，黠僑出沒不常，紹興盜起，統制陳敏出兵剿賊，神發蜂導之。紹興庚寅，陳三搶掠永春，撤德化，縣掀長泰，距境才二十里，居民賴神以安，所謂「能禦災捍患者」歟！廟建於崇寧癸未，淳熙戊申新之，修於嘉定甲申，咸淳丙寅重修之，董役鄭遂應等請書其事，遂書。皇朝成化十二年旱，令張遜修故事，雨立至，復新廟。

寶蓋山 豪山之支也。又名寶傘，望之圓秀。

崑山 在文圃山南。山有盤石巨人跡，故取「崑崙玄圃」之義。宋有道士名虛極者，庵此山下。徽宗

賜號金壇郎。

天柱 危峰屹立，若天柱矣。與長泰界。詳見長泰。

岑坪山 下有瓦窑，亦名窑山。

大輪山 出東門外里許。兩峰齊出如車輪，其中黝深幽靜，西南一峰，屹然倚空，名羅漢峰。宋建梵天，爲邑叢林之冠。朱文公詩：「休暇曹事簡，登高恣窺臨。徜徉偶此地，曠望披塵襟。落日瞰遠郊，暮日生寒陰。歡餘去未已，更欲窮幽尋。行披茂樹盡，豁見滄溟深。恨無雙飛翼，往詣蓬山岑。」元悞玉立詩：「羅漢山攢翠作堆，半空天柱擁如來。九霄人立青雲上，笑指曇華玉樹開。」又有金光井、蒼翠岑、金牛石、湫流泉、尊者巖、達夫巖、宋文公「戰龍松瞻亭極目」七字，皆爲勝蹟。「達夫巖」三字，書絕壁上。達夫，邑令莫兼字也，旁書：「皇祐庚寅季夏乙酉，莫兼達夫、張士宗元卿、黃宗曾希聖、陳綜總之、薛穎士之材、林鑄成之、錢城子重、宋溥君覃、楊久中景常，游興教寺北巖院。越明日，王儀子正至，諸君並一時賢者，傾蓋於是，故紀其盛，而以令字名巖。『戰龍松』，松已亡矣，其字在耳。『瞻亭』二字，摹刻於石，今石陷，字畫倒掛，亦一景也。翠微之際，文公書院在焉。皇朝林希元記。」

三秀山 去城北五里。三峰秀出，爲邑北鎮。又名仙人亭。上有石榻如禪床，及巨人石。

胡蘆山 自三秀而來，逕東山人縣城，西北隅突起若胡蘆，又有四小山，俗呼五蘆山，縣治腦山也。宋蘇丞相頌宅在其下。

大羅山 山界南安，二縣並載。山西南又有螻巖，巖巔有螻殼。又西有浮潮山界，相傳潮至其上。象運山 在縣東，與禪居山對峙。每有雲氣生二山之上，雖旱必雨。

北辰山 去城東北二十五里，取高拱北辰之義。上有巖。巖側有十二龍潭。潭側有二磔，東鳴則風，西鳴則雨。

洪巖山 山頂有石巖高大。昔有邑士洪姓者隱此。

應城山 去城西北里許。上有普慈院。偽閩時，傳院中鐘聲與王城中鐘聲相應。

斗拱山 去城西北三十里。其勢高拱北斗。上有石巖，西有高齊山，重岡疊翠，山澗生九節菖蒲。

西山 亦名天龍山。在縣西十餘里。上有巖口西山巖。又名白雲巖。有聖泉，二井湧出其右，旱禱輒應。

大鳳山 去城西北三十里。形如鳳翅。

吳淮山 去城西北三十里。高聳雲霄，若可以望吳淮之地。

蓮花山 去城西北三十里。與寶蓋山相映。舊傳其下多產貴女，又名金冠山，又名夫人山。頂有石巖，南向陟之，衆山皆小。朱文公題曰太華巖。蓋取「華岳蓮花」之義。

大尖山 去城西北四十里。高數百丈，界於安溪。三秀山之發脉也。

龜洋山 去城西北四十里。其形若龜，有化度、慈相、雙林三院。

九躍山 去城東三里許。自卧龍山行而西，九頓九伏而爲是山。蜿蜒至雙溪口，縣左臂也。山南爲佛子岡，隋時有黃佛寺，莆田黃氏女修持淨戒，後端坐蛻去，因立寺祀之。宋崇寧間，賜號應大師。皇朝萬曆庚子，令洪世俊塔焉，表爲學宮之文筆。明年，許編修獬，遂魁南宮。麓有蕉坑，元時陳貞女者，葬其下。貞女，邑東里人，林州判岡孫誌墓曰：「貞女，父陳大臨，母張。女以至元壬午臘月二十五日生，幼常

嬰疾，長誓不嫁。父母親戚強不可奪。共女事，不出戶。己酉喪父時，二妹猶未笄。越五載，復喪母，弟登忽有鼓盆之變，女相登治喪葬畢，婚嫁咸有條理。季妹適康早世，惟存一女，收育訓飭，得其所歸。先廬歲久，勉登堂構。晚慕西方法，日與女流持齋膜拜。年五十八卒，至元己卯七月二十七日。銘曰：許嫁而字，著於《禮經》。女子不字，《易》稱其「貞」。十年且難，而況一生！彼美人兮，玉雪同清。」題曰：「貞女百世其馨」。後有圖史徵諸碣銘。是墓也，至皇朝萬曆四十一年癸丑，三百餘年矣，久化園圃，鋤犁其上。一日耕者闕地，得坂，發之，坎也。石鐫甚楷，莫知何物，邑人葉國欽得之，而張之侯讀之，喟然曰：「是貞女也。」相與詫歎，市石鐫碣曰：「元貞女陳氏墓」。請園主坎其墓誌，即畛爲封祭而表之。侯父靈壁令日益作記曰：「予論貞女之世，所爲極難矣。妻繼庶母伯叔母兄嫂，元人夷狄之習耶。女母亦素聞禮教，寧矯情不字，以示胡俗必不可淪胥，女德必不可染污，獨醒獨清，天固稟之。溯女生年月，是元殺宋文丞相之時，造物或有意焉。女卒之歲，時則中國聖人已生，乾坤且再造，禮樂且再復矣。用是知陽九之運，中國不能却其來；光岳之氣，胡狄不能斷其脉。抵今三百餘年，猶若以荒園靈爽，駕清風而游，恍惚君子曰：『異哉！同有是女也。』」

同山 在縣東北里許。一名梅山。與大輪相映對。石鐫「同山」二字，朱文公筆也。

黃漸山 界南安縣。見南安。

鵲山 在黃漸南。秀拔如鵲跂，是生東園。

香山 去城東四十里。上有佛巖，其巔有石如香爐，雲氣裊裊如煙矣。舊名荒山，令朱徽改今名。

乍畫山 在磨山西。盤踞十餘里，多奇石，如鼓如笏，人見其峰巒倩秀，以畫名之。山下路旁有石如

魚，其高四尺有餘，長一丈四寸，舊傳居魚頭者貧，居魚尾者富。下有海港二百餘丈，宋邑人許伯垓爲橋。

金山 在城南四十里。其山圓麗。旁有九保山。

普陀山 與金山相連。上有清水巖。又連接雙髻山，兩峰並峙。亦名鐘鼓山。

三魁山 去縣東四十里。三峰奇秀，爲邑最。

夕陽山 在城南六十里。以西山最高，故名夕陽。上有遁跡巖、真寂寺，唐宣宗居邸時，遁跡此巖。

三載後還京卽位，勅賜「真寂禪寺」云。宣宗與黃蘗斷際和尚山中觀瀑聯句，蘗先詠云：「穿巖越壑不辭勞，到底方知出處高。」宣宗續云：「溪澗豈能留得住？終歸大海作波濤。」又詩：「惟愛禪林秋月空，誰能歸去宿龍宮？夜深聞法殫甘露，喜在蓮花世界中。」去寺里餘，有石方二丈許，有巖號國師巖。國師，僧懷暉也。懷暉，別見福州。方山。巖前有石橫卧，扣之如鼓。巖頭一竅，相傳宣宗時，中出米，足供食。宣宗去，遂不復有。按唐宣宗，長慶中封光王。《唐書》第稱韜晦，未嘗遁跡。而唐尉遲偓作《中朝故事》載：「宣宗，憲皇少子也。皇昆，卽穆宗也。穆宗、敬宗之後，文宗、武宗相次卽位，宣皇皆叔父也。武宗初登極，深忌焉。一日，會鞠於禁苑間，武宗召上遙睹，瞬目於中官，仇士良躍馬向前曰：『適有旨，王可下馬。』士良命中官輿出軍中，奏曰：『落馬。』已不救矣。」尋請爲僧，行游江表間。會昌末，中人請還京，遂卽位。」則其事固有據者。又斷際，傳法洪州，裴休師事之，亦名所居山口黃蘗，亦載宣宗與蘗觀瀑詩，未知孰是。第余至是山下，有浴龍池，云宣宗將至時，先一夕，伽藍現夢寺僧：「明有皇帝浴此。」僧行山下，見宣宗浴池中，稽首稱萬歲。宣宗詰其故，云伽藍現夢。及入寺，宣宗舉手指伽藍頤曰：「饒舌洩

語！「伽藍爲之西轉。今塑像仍舊。皇朝漳南林魁題二詩，後云相傳詩爲唐宣宗龍潛此寺而作。《通鑑》不載，胡氏以爲鄙妄無稽。余按尉遲偓《中朝故事》有足證者，而茲寺遺跡昭然。表文詩詞，當亦不誣。豈胡氏偶未考與？」魁所稱表文，則宣宗舊出家衡州花藥寺，爲刺史盧景回所困。上書以聞，景回坐誅，罪及九族，其表亦刻寺中。表云：「臣僧瓊俊，忽日愴悴，不奉躬辭，厭皇宮有幻之身，所以樂菩提之路，故乃煙波浪跡，雲水遨遊。禮金仙爲出世之師，披縷褐作離塵之客。偶因訪道直到衡州花藥寺，被逆臣盧景回不訓之男携杯入寺，摘佛花菓，毀辱僧徒，將有罪者同不刑科，將無罪者任遭囚獄。登長天而無路，望雲漢以難通。深慙大覺世尊，有賴聖朝之護。恭惟皇帝陛下十六哥哥開龍顏之寶鑑，憫骨肉之微僧，展鳳閣之精威，滅逆臣之種族！專令獄吏、王猷上奏。冒瀆天庭，罪當鼎沸！僧瓊俊瞻天仰聖，下情無任，激切屏營之至，謹表以聞。」皇帝判云：「朕之骨肉尚被欺凌，何況凡僧，豈能安跡！先斬盧景回一身，後誅九族。改衡州爲恒州，移去吏卒。王猷，勅令永充本州太守。仍詔通行天下。符到奉行，各令知悉。」末云黃蘗立。余以萬曆乙未奉譴入粵西，過衡州，舊僚曾鳳儀邀余花藥寺云：「唐宣宗出家於此」，而《湖廣志》及《衡州府志·花藥山》並不載此事。又《唐書》並未嘗改衡州爲恒州。且天誅及九族，非刑章矣。武宗，舊以穎上，居十六宅是也，而宣宗於武宗爲叔父行，又不應稱哥哥。姑闕之。

三重山

苧溪山 去城西三十里。下有苧溪，溪水出白桐嶺，蛇蟠所蟠蟄，色多黑，爲涉者病。大觀中，邑人徐誠始橋之。王明叟《豪山廟記》載：「虎豹所穴。」而釋清豁《行苧溪詩》有「鳥道羊腸」之句。舊志皆謂：唐末宋初，山修阻多毒。今則曠然修途矣。清豁，見安溪烏石巖山。又苧溪山下，有陳婆陂，陂亦唐

宣宗命築云。宣宗遁跡過此，有陳婆者進麥飯，問之，以旱田對。及卽位，後命有司築陂，名蘇營陂，可灌田數百頃。而俗名「陳婆」云。

文圃山 去城西六十里。南濱大海，四望圓秀，名十八面山。唐謝脁，與其弟修讀書於此。人名其山「文圃」。後南唐主簿洪文用，與族人澤、宋崇寧中處士石贊，亦隱此山。脁，見縉紳。文用，當五季分裂之時，不爲世屈。贊，字蕃甫，以世胄薄游，鯁論忤時，浩然而歸。三人隱居山下，里廬相望，詞藻並推，清節玄風，後先扇映。嘉定間，鄉人楊志作三賢堂，西蜀何致爲記。宋石賡《廣慈院記》略曰：「文圃山，土無頑石，木無荆棘，松蘿邃幽，翠色如畫。深洞長谷，自然天成。佛祠相望，雲名者凡四：雲嶽、雲峰、雲泉、雲嶠，皆其支也。其山又有龍池巖，石贊所廬。半山又有泉南巖、良才山。國師僧懷暉，良才山下人也。其支，爲龍門五通嶺。山界海澄。海澄亦載是山。」

卧龍山 上有龍山巖。

孤卿山 在縣東里許。宋太府少卿林栴居其下，故名。

東大帽山 去城東三十里。廣袤十餘里，形若大帽。上有巨石，如九成之階。下有大帽巖，自然巖室，方高丈餘，鑿石佛其上，有龍潭焉。山之陽口白雲山，有清水巖，宋時建以祀昭應慈濟大師，忽有童子衣緇坐險石上，謂人曰：「巖成之後，當名龍歸。」忽不見，尋有甘泉湧於所坐石下，人名聖泉山。又西去八十里，有西大帽山。

福船山 去縣四十里。宋有《福船院記》略曰：「吾泉之山，莫多西南，其高絕者，莫福船儼也。雲開霧卷，群峰列秀，此山峭舉獨出，勢若船矣。鄉人奇之，加名曰福云。余謂鮑照有「侍宴覆舟山」詩，嘉名

故自緬懇，何必福者？

鷺山 一名鷺峰。

崑嶺山 自東大帽山發源，至此平地突起，其形如象。一溪夾流，至此會合入海，名曰蓮溪。

寶勝山 山下有地，名寶勝營，今曰劉營。昔有劉日新者，討賊於此。日新，固始人，仕唐爲金紫光祿大夫。乾符中，黃巢寇閩，日新領兵追至大同，休營此山之下，開浚陂塘，以資軍食。歸京未幾，復討賊老於寶勝營，遂即居於此。日新有孫崇敏，事陳洪進，歷永春、龍巖令，後事宋，遷仙游令。弟崇牧，亦與官。其裔曰半千，與蘇仲昌同時召試賢良方正直言極諫科，會罷大科，不果試，特奏補官。又，日新一名祐。其所築陂，在從順、感化、歸德三里，名官陂，亦曰石盤陂。今廢。

〔校記〕

〔一〕「統圖二十八」，下文實列十九圖。

〔二〕「碧水」，各本原作「碧泉」，據下文改。

〔三〕「鰲山」，各本原作「魯山」，據上下文及《八閩通志·地理》改。

〔四〕「惠勝」，各本原作「法勝」，據上下文改。

〔五〕「二坊隅」，下文爲三隅。

〔六〕「二十七都」，下文實列二十四都。

〔七〕「統圖五十有三」，下文實列五十四圖。

〔八〕「虹井」上，當脫「井口」二字。

閩書卷之十二

方域志

泉州府 同安縣二 永春縣

山

五通嶺 嶺祀五顯。有二石夾路，其一高百餘尺，石上有跡，若魚頭上向者數十。上刻「龍門」二字，云宋文丞相從幼主過此所刻。予嘗至其處，嶺路崢嶸，非通道也。幼主又自龍窟登舟入海，亦不叶取途。唯嘉禾嶼有五通嶺，幼主所過，乃此嶺也。又，文丞相未嘗奉幼主南行。「龍門」二字，大似米元章筆，亦非丞相筆樣。想當時取象名石，而所云丞相，或陸丞相歟？

醉仙巖 巖巨石下有竅，深二尺，迥復滿，味甘可釀，故名醉仙。有巨石刻「天界」及「傳巖」四字。又有仙跡石棋盤。

御踏石 在龍窟村之上。有三巨石連接水中。宋幼主自龍窟登舟，出大擔嶼入廣。後人名石曰御踏，而窟之名龍，亦以幼主也。

官榮石 在嘉禾煙墩山下。宋幼主過此，民有餽獻者，悉予官，陸丞相書「官榮」刻之。

汭洲嶼 嶼周圍二里餘，當縣丙方。或曰縣兩溪流入巽方。而此嶼在丙，文明之象也。

白嶼 周圍四里。縣治二水夾流入海，俱經汭洲嶼。是嶼南下，又有鼠嶼。

寶珠嶼 在高浦所前，海中沙嶼也。可卓竹深人丈餘，風颺浪淘，沙聚自若。

離浦嶼 在嘉禾里高崎之西北。以與薛浦相離，故名。

大擔嶼 周圍五里，外連浯嶼水寨。宋幼主過此，擲棄累物以浮舟。後水發光怪，漁人往往得古研焉，泉人名爲宋研。

小擔嶼 周圍四里，與大擔連。

檳榔嶼 與小擔連，以形名。

嘉禾嶼 嶼在海中，去縣七十里，在其南。以舊產嘉禾名。又名廈門，又名鷺嶼。今中左所在其中，防扼海門，險地也。嶼廣袤五十餘里。洪濟山最勝，上有方廣寺。有雲頂巖，口出可望日本。又口留雲洞，兩旁傍石爲門，有一片瓦。有風動石，下有星石。鷄鳴時，登頂遙望海，口如火輪。又有蜂窠山，高懸如蜂窠，前海中有沙岸如帶，若隱若現。又有七星石，森列海中。又虎山，儼如虎也。山石多奇，山麓有龍湫亭，下有龍洞。西北有嶺曰薛嶺。嶺南，唐陳黯居焉。嶺北，唐薛令之自福安徙家於此。時號「南陳北薛」。按黯，字希孺。父贊，通經及第，娶妻黃，甚賢，而生黯，獨身而已。黯十歲能詩，十二袖詩通謁清源牧，其首篇《詠河陽花》。時面豆新愈，牧戲之曰：「藻才花貌，胡不詠歌？」應聲曰：「玳瑁應難比，斑犀定不加。天嫌未端正，滿面與裝花。」繇是聲名大振於州里。十七，作《蘇武謁漢武帝陵廟賦》，便爲作者推伏。早孤，事母至孝，無意求仕。子蔚，旣冠，母氏勉之曰：「付蔚潘岳之筵，俟爾郗詵之桂。」芳起鄉

薦，求試貢闈，已過不惑之年矣。黯，松姿柳態，山屹波注，語默有程，進退可法。其爲文詞，不尚奇而重切理，意不偶立而重師古。詩篇、詞賦、牋檄皆精，尤工官試。乃會昌乙丑，連咸通乙酉，凡十八舉不第。所著有《綺藏集》。同郡王肱、蕭樞，同邑林顥、漳浦赫連韜，福州陳莪、陳發、詹雄，皆一時秀士。黯名價相埒，而並不遇，世歎其屈。福安人祖玄，尉龍溪，因卜居於此，令之見福安縉紳。黯久在文場，人稱場老。今豪竈有金榜山，是黯讀書處。書堂側，有大石，高十六丈，名金榜石，刻「談玄石」三字。臨海有釣魚磯，場老垂釣處也。後人築海爲埭，今在田中矣。又云，其當時，書堂有新羅松二本云。又有動石，浮沈石，沙若沈也，而漲亦不沒。天將風，其下有聲，名石虎礁。宋熙寧中，邑尉張翥詠《嘉禾風物詩》：「衣冠陳氏族，桃李薛公園。場老遺文古，巖僧舊跡存。苔磯荒磧岸，金榜勒瑤琨。已憐松特異，尤喜石能翻。」皇朝，則吾友傅鑰國毗居之。鑰，見韋布。又有普照寺，寺後有無盡巖。山凡五峰，而巖在中巔，大石嵌崿，其下虛敞。宋文翠上人斷腕燃頂化成。尉滕翔贈詩：「海翻波浪繞危峰，無盡巖前世界空。不是灰心求佛者，片時艱住寂寥中。」

黃牛嶼 有龍腰渡。古識云：「龍腰斷，黃牛平，嘉禾出公卿」。

鼓浪嶼 在嘉禾海中，民居之。洪武二十年，與大嶼、小嶼俱內徙。成化間，復舊。上有大石壁立，刻「鼓浪洞天」四大字。傍有巖，名日光。

大嶼嶼 廣可十里，有澤路以達大程，兩溪相去七八里。宋建隆初，里人葉祝，甃石爲路，遇港則橋。乾道中，僧宗壽欲加修補，亡何卒。淳熙丁未，見夢於僧道震，卒成之，爲橋六。路以步計者，萬三千有奇。

小嶼嶼 宋末丘鈞磯葵居之。皇朝，邑人靈璧令張日益《訪釣磯故居記》曰：「同遵海而南，巨島錯列，小嶼於諸島若浮漚，而丘鈞磯先生產其上。繇是以有名。先生後考亭百餘歲，而道學獨祖之。淪落腥風，斂德自全，憂悲恫切，遯尾惟危。鄉人皆高先生之風，莫有能言先生者。萬曆壬子夏，予戒小舟，約友數人，直往訪之。舟及懸崖之下，見白沙數武，有泉出沙之三石間，澄澈清甘，潮至則沒，汐涸如故。酌而飲之，爽發於口。先生之裔朝準君爲予言，此泉名仙人井。井當海衝，客舟叢泊，一日可汲四五十舟，不汲卽澄涵不溢。更攝衣緣崖上，從西南行里許，嵒案多石，或峭或圓，如珠如璧。沙有蒼然出者，天與方石，周二尺許，琢爲奕局，中一道鑿「萬機分子路」，一局笑顏回「十字」，已遭斷沒，獨「萬機分」及「回」四字完明可摹，而且甚工。蓋先生手筆。踰局步愈西，先生釣石在焉。石甚巨，若盤。太武嶂前，大嶼擁右。白吸礁錯落微茫環磯前。潮聲長退，鶴鷺棲飛，魚逝鷗集。西望同溪，混混遠流，隨潮而東，興波簸浪，沈浮綸芒，晶光斜煥，倒影飛射，卽嚴子陵七里長灘，勝未加此。從此左轉，東行半里許爲鐘山。山南有宋時章法院，頽壁兀兀風雨中。而北，則先生所宅。自國初內徙嶼民，一嶼皆墟。成化初，復舊。而丘氏列屋山麓，先生宅址廢矣。余與諸君，師風撫景，盤桓低回亭，午憩朝準君別館休焉。朝準君出所藏先生詩一篇示予。見其洞徹性命，觸發皆真。至如《天陰怪事》、《貽吳丞和壽辭》、《元辟》諸章，哦之能令壯氣豎髮，亦可感泣沾襟。蓋先生之風遠已。庚申中，其子孫耕隴，得一穴，探之，則其墳，自書磚爲記。

涪洲嶼 在大海中，去縣治百里。翔風十七、十八、十九、二十都地也。廣袤五十餘里。洪武間，增置金門千戶所、陳坑峰上田鋪、官澳巡檢司、鹽場司。其地儉於田園。民漁鹽，而士詩書。皇朝，科日爲盛。其山之最曰太武，上有海印巖。有十二奇：曰玉几案，曰蘸月池，曰眠雲石，曰偃蓋松，曰跨鰲石，曰

石門關，曰古石室，曰蟹眼泉，曰倒影塔，曰千丈壁，曰一覽亭。皇朝，庵僧有笑堂，與其徒二人，皆名，能詩。笑堂詩如「海天一色鴈雙去，山月半規猿白蹄」，佳句也。又有大、小雙山，並峙若乳。大雙，回顧二里許，結爲平林。小雙，蜿蜒而南，爲後浦、金門諸鄉。金門城南，有寶月庵。庵旁有石如盤，武襄俞大猷署所篆時，作亭望海。海頭有島，天將雨則明現，晴則日光晶晶，反隱不見，人名其島曰變山。海中礁石，落潮退時露馬跡。又有虎山，形如虎伏，與青嶼、獅山相對，俗呼五虎朝獅。轉而西南，三山突起，平地圓若連珠。其大者如龜，左右二山，會繞如蛇，名曰金山。又有五湖：曰許坑，曰湖山，曰湖頭，曰赤庭，曰湖尾，皆天成也。今赤庭、湖尾淤爲田，許坑、湖山魚鼈族焉。其地名「庵前」者，有馬牧王廟。其人陳姓，唐時牧馬翔風諸山之下，馬日蕃息，人買一馬，以一馬贈之，買十馬，亦以十馬贈之。及過海，止所買之馬在，人以爲神，卒而廟祀之。

夾嶼 在活洲、小嶼間，周圍五里。

烈嶼 廣二十里，上有吳、樓、牧、湖四山，而吳山爲最。居民業漁鹽。山前有牧祠，有軍營。山後有馬寨，有草堂。唐柳冕置牧監於此。

白礁 有慈濟宮，祀宋吳真君。真君名本，生太平興國四年。不茹葷，不受室，業醫活人，按病與藥，如矢破鐫。或吸氣噓水，以飲病者。雖沈痼奇怪叵曉之狀，亦就痊愈。於是病人交午來門。本無貴賤，悉爲視療。景祐六年，卒。聞者悼泣，肖像供奉。屬虔賊猖獗，居民魚驚鳥竄，向本請命，未幾賊酋喪死，人獲莫居。於是相與創祠祀之。水旱疾疫，款謁如響。部使以廟額請賜名「慈濟」。慶元中，封忠顯侯。開禧三年春夏之交，亢陽爲沴，鄰境赤地，連數百里，獨漳泉有禱，歲乃大熟。會草竊跳梁，漫淫境上，忽

觀旗幟之異，洵懼而不敢入邑。人又以轉聞，再封英惠侯。於是，東逮莆陽、長樂、建、劍，西被汀、潮，以至二廣，舉知尊事。歷宋累封普祐真君。皇朝永樂十七年，文皇后患乳，百藥不效，一夕夢道人獻方，牽紅絲纏乳上灸之，后乳頓瘥。問其居止，對云某所，明遣訪之，云有道人自言：「福建泉州白礁人，姓吳名卒，昨出試藥，今未還也。」既不得道人所在，遂入閩求而知之。皇后驚異，勅封「恩主昊天醫靈妙惠真君萬壽無極保生大帝」，仍賜龍袍一襲。

川

東溪 在縣東門外。發源大羅山，過長興里。又一派，發源曾溪嶺，下行三十里，至第一溪合流。逶迤曲折，有第一溪、第二溪、第三溪之名，過太師、銅魚二橋，與西溪會。太師橋，留從効所建。銅魚橋，以溪中有石如雙魚，其色似銅。古識云：「東溪水深，朱紫成林。」宋時沙壅，里人許維寅運石填水口。至今人文始盛。同城門名「朱紫門」云。

西溪 在縣西門外。發源安溪界，過同安西北感化里，與竹山坑水合於地洋。西流爲董坑，折而南又合湖溪，上澳三漈，上西洋，上龍山，抱縣治，經西安橋，與東溪會。東行十里，入於海。西安橋，邑人許宜與僧宗宣所建。行人許權記略云：有雙溪會流於巽，其自西來者，勢尤浩蕩，故東石橋成，逾百年而西橋石工睥睨不敢致力。今一旦而成，勢雄址固，雒陽之亞也。是兩溪會處，有銅魚、金車二石，爲水口之鎮。銅魚，見上。金車，以石如車輪名。古識曰：「銅魚石上排金車，此是公侯宰相家。」故同人既以金魚名橋，又以名館。石上朱文公題「中流砥柱」四字。後金車如故，而銅魚填爲塵舍。皇朝萬曆壬子，令李開春濬得之，建亭其上。

蓮溪 東四十里許，發源鴻漸山。自民安里蕭外村，經蔡塘村。又一水發源東大帽山長興、同水二里，合於林溪、寶溪，經崑崙村，與蔡塘溪水會流，至董水村過通橋，東入於海。

小同溪 發源洪巖山北，東過達川橋，至亨泥村入海。

芋溪 發源白桐嶺諸山，經芋溪橋，至海豐莊後溪頭入海。

沙溪 發源長泰縣界，過安仁里，益以三重山之水，過沙溪橋，至林埭村入海。

石馬潭 水流自皇地山來，沿石壁而下，注於潭。潭之四面，怪石鑿出。

滌坑潭 是潭也，每禱雨，有聲如擊鉢，則雨應。

南峰潭 在縣南三十五里。宋淳熙十三年，令鄭君顯將祭龍於潭，先宿澄心堂。夕，雷電交作，神火紛落如炬，須臾大雨。早，視堂前古木，循本至末，皮皆剝落，樹葉焦枯，鄭書壁以記。

北山龍潭

廣濟龍巖潭 在縣東北。遇旱禱，多現靈物，若蛇虺、蜥蜴狀。巖南有瀑布，飛落可三十丈。

侯山龍潭

龍湫潭 潭在嘉禾嶼，地名洪塘。舊傳有龍穿地而出，分爲三竇，其下通爲一穴。

興福巖泉

湯泉四：曰西源，曰董塘，曰湯兜，曰小崎。而小崎有二，皆天成石池，泉出石孔。

洪前鹽泉 東山浮洋屯，海潮所不到。天日晴明，輒有泉汨汨沙土中，淋之可鹽。

瑞泉 海岸有石如臼。宋隆興中，泉湧臼罅，能愈久病。邑令陳彥先屋之，曰瑞泉。

九龍泉 在縣北九龍山。春冬涸，夏長，六月始盈。歲以爲率。

臨溪石井 井能愈瘡。又曰太師井。

蛟井 虹井

永春縣 在郡西北。東抵南安，西抵龍巖，南抵南安，北抵德化。本隋南安縣之桃林場。五代唐長

興三年，王延鈞升爲縣。晉天福三年，王昶改縣曰永春。宋元仍舊。皇朝因之，統都十四。〔一〕

一都。宋民德里。山口岱山、二台、文章、南峰、東湖、華蓋、碧溪。

二、三都。宋民蘇、善化二里。山口鳳山、凍山、狗頭、貴湖、蓮花、蘆內、天湖、船山、覆鼎、銀瓶。

四、五都。宋善化、福德二里。山口泰山、鷄母岫、梁、旗、雪、丘方。〔二〕河澗、洪、謝內、許平、新犁、礮山。溪曰桃溪。

六、七都。宋尚德、昇平二里。山口烏髻、陳巖、馬跳風、南幢、壺、埔兜、陳坂、高巖。溪曰陳巖。

八都。宋招集里。山口片山、洪步。嶺曰猛虎。溪曰埔兜。

九、十都。宋安仁里。山口達里。〔三〕文筆、東易、東平、鳳山、天馬。

十一、一都。宋始安、安平二里。山口魁星、涵林、南峰、雲居、東山、塔口。溪曰小姑、鐵窠。

十二都。宋迎德里。山口龍山、應龍、象山、馬嶺、筆架、仙亭、金龜、泰山、塔口。

十四都。宋昭善里。山口卧龍、羊嶺、石穀、浮空、火鍊、穀平、鳳山、蓬山、笋山、白馬、懸鍾、大帽。峰曰妙峰。

十五、六、七都。宋和平、桃源二里。山口萬歲、東關、崑崙、雲峰、吳田、蓬萊、武極、天竺、紙山、樂山。

十八、九、二十都。宋桃源、清白、鳴琴三里。山口錦繡、翰文、玉柱、石鼓、小尖、苦際。〔四〕西峰、齊雲、三貫、姜連、雙髻、觀

音、高鎮、指撲、大靜、桃溪、御蘭、靈山、環山。嶺口禽嶺、彭崇。

二十一、二都。宋樂安里。山口懸鐘、大帽、馬氏、銀瓶。峰曰火峰。

二十三都。宋義仁里。山曰石鼓。

二十四、五都。宋和風里。山曰大羽、大鵬、白馬、雲龍、康山、高田。

南有象山，東有雙魚、簾幙、馬嶺、樓臺、樂山，群峰走青，一派趨碧。其形勝也。

山

岱山 石盤高大，有岱巖。

三台山

文章山 宋陳光讀書此山，後登第，因名。光，見縉紳。

南峰山 東湖山 華蓋山

碧溪山 山下有溪，泓渟深碧，與山相映。

鳳山 皇朝郡人陳紹功《鳳山巖詩》：「行過晁渚紆途轉，夜宿鳳山梵宇清。霜後綠筠仍舊色，雲中

金磬出新聲。」又十都、十四都，亦有鳳山。十四都鳳山，北接德化縣界。

凍山

狗頭山 九峰連亘，如狗頭。舊有巖室。山阿有泉，四時不竭。

貴湖山 蓮花山

天湖山 九十九峰，峭拔蒼翠。上有大湖巖，一名大池巖。有水一泓，四時不竭。

蘆內山

船山 山形如船。首如舳蓬，上有瑞雲巖。巖石純白，其大如室，室中石紺紫，如龍虎然。末如舳梢，亦有小石室，門徑彎環，旁有石鐘鼓，澗水鳴朝，兩奇觀也。

覆鼎山 童山也。圓如覆鼎，兩旁小山如鼎耳。是生拳勇之士，皇朝義士郭榮六居此，而其後遂以繼出。榮六膽智習兵。正統末，四方寇發，大姓尤麟兒憂之，揀其子弟及鄉驍勇百餘人，聘榮六教之技擊。己巳，鄧茂七起，麟兒率鄉人寨白鶴山，推榮六爲帥，共守之。賊陳敬德繇德化入寇，榮六逆之小尤中，大敗之，被流矢，輿歸。賊方欲轉掠永春，憚榮六未敢前，聞榮六被矢，以爲死矣，則皆喜，進衆數千攻寨。榮六裹瘡督戰，木石矢銃俱發。賊見榮六廼生，駭引去，榮六尾而襲擊，大破之。其年八月，賊復割小姑，衆亦數千。典史陳綬召榮六擊之。榮六曰：「賊衆我寡，當以智勝。」陳官兵釘嶺東南，身引精兵六十，倒戈從西北疾走，穿賊中，出釘嶺，與官兵合。賊見，悉衆逐之。榮六伺其至半嶺，反兵向之。賊窄陡弗能列。榮六號衆曰：「機在是矣。」公等視吾所向。」引兵渡小坑，直趨嶺下。賊逆擊。榮六斬一賊，佯敗走。賊逐之，至釘嶺橋。榮六反兵逆擊，官兵從之，皆殊死戰。賊窮盡投坑下，或倒戈自斃。十月，又攻破賊壘於南安上塔。前後十八戰，皆捷。賊斂手不敢犯永春。榮六有子曰景二，亦驍健。弘治壬子，漳寇溫文進起，景二遏寇白芒坑。正德初，流賊劉莆涵市，反道永春。景二率輕兵逆之上畬，大殺賊。賊皆披靡。乘勝深入，後鋒弗援，遂沒，從死者十二人。自榮六父子以武勇倡，其鄉繇是家習技擊，驍健冠七泉。自正德至嘉靖初，流賊連發，死者接踵，皆覆鼎之人。嘉靖初，邑令柴鑣募其人，與廣、饒、汀、漳寇戰，邑賴以全。賊退，鑣合其死賊者祀之，名祠曰義烈，凡三十三人。尤新五、沈朝美、杜榮茂、廖時通、陳

乾瑞、范文華，元年八月丁亥，戰南桐死。蘇端舉、李成、張周育、蘇舜寧、蘇甫進，庚寅戰赤水死。何廷燦、陳朝宗、張瑤章、吳璇義、莊廷實、蘇寵一、朱祥逸，十二月辛丑戰胡坑死。鍾旺輝，二年元日癸卯戰花石嶺死。郭顯七、郭惠四、郭惠九、陳德克、林啟九，戊申設伏覆鼎，賊突圍去，死。劉富旺，六月戰石鼓死。蔡玉智、王元珍、黃子孝、陳顯清、黃子明，三年十月戰高坪死。張元宗，戰小姑死。陳良，戰尤中死。

銀瓶山 以形名。二十二都亦有之。

泰山 在四都。十三都亦有之，並以高得名。

鷄母岫山 梁山 旗山

雪山 跨德化、永春二縣間。兩縣並載。是生佳茗。

丘峰山

河澗山 九十九峰，頓伏圓秀。

洪山 謝內山 許平山 新犁山 鐵礦山 烏髻山 礦山

陳巖山 一峰疊石卓豎，至絕頂，則尖聳居中，分東西峙，名曰三臺。東臺之半，勢如壁立，中有棋局，又有瀑布，泉飛落數百丈。昔有蕭姓者，即壁之左，憑虛架石，以通龍巖、尤溪，人名「蕭公路」。上有顯應廟，祀威應侯。陳後主叔寶子，兄弟三人，長曰鏡臺翁，季曰易簡，爲御史中丞，侯居中，名不傳，少習兵法，爲時豪傑。徵南越，擊醜虜有功。隋既平陳，侯兄弟三人，引兵南奔，據桃林場之肥湖。後，隋帝有旨，令鏡臺釋兵，命有司四時祭其父祖。侯遂編輯爲民，與其兄弟分居三所，鏡臺翁居肥湖之瑞峰，易

簡居慕仁里溪西，而侯隱陳巖峭峰，歲時挈鞍抹馬，往返桃源間。一夕，憩桃源驛東偏，留弓劍，斃。後屢著靈響，鄉民卽地祠之。

馬跳風山 高崖壁立，瀑布下垂，前僅小石橋可渡，橋名馬跳。舊傳未橋時，民避賊者，騎馬至此，馬躍而過，因以名橋，亦以名山。宋紹興中，邑人陳知柔改建，易名曰高壽。舊有留題：「千尋瀑布如飛練，一簇人煙似畫圖。」

南幢山 山勢極峻。中有望仙崎，頂有一穴，蒼蠅不到。

壺山 一名蓬壺。嘗出土兵。元尹盧琦詩：「匹馬重尋蓬島路，東風二月柳花香。曉煙滿笠人耕隴，夜雨孤燈客卧床。」

埔兜山 陳坂山

高麗山 屹立如屏。絕頂有道場，寨可容萬人。

芹山 狀如猛虎。西連新田、萬代、蓮平、加隔、錢山、歐林諸山。萬代山，有萬代巖。

洪步山

達理山 山峭拔蒼翠，障縣學西，又號筆架山，礪石出焉。山半茂林清泉，六月如秋。上有巖，下有達理仙祠，祀青牛二仙。二仙故隱桃林，人莫識也。後見其駕青牛冉冉入雲去，遂相與祠之。東北有山，名周山，綿亘三十里，有仙人服鍊於此。

文筆山 東易山 東平山 天馬山

魁星山 古桃林場在焉。今其村曰上場，沿舊也。山直學宮。巖石峭拔，舊有詹巖，荆棘蒼翳。宋

乾道中，僧覺圓誅茅新之。明年，邑第進士者一人，曰陳樸、顏應時，因名巖曰魁星。鑄之崖壁，琢石佛三十餘身，山下有泉，泉上石篆「文曲華世」四字。皇朝邑人顏廷渠者，官長史，有詩名。其生時泉竭，及將卒之三日，泉忽湧出，人咸異之。其右爲龜山。

涵林山 南峰山 雲居山

東山 以東方得名。土呼高峰寨。宋江公望《多暇亭記》云：「東山之中，有西蜀隱者居焉，危坐不寐，垂二十年。思與偕游，不可得，扣梧招之，而爲作歌。」歌見公望傳中。西蜀隱者，僧也，名元普，公望嘗設三問扣之之。^五既去，作五詩爲寄。其一曰：「但見山前黃復青，泥牛一去杳無形。我來問道有何得，挖撻煙餘石瓦瓶。」按公望，《宋史》及《宋名臣錄》皆以爲謫南安軍，弘治《通志》亦以爲江南之南安，而《多暇亭記》及《招隱歌》與此詩，歷歷邑記。宋淳祐志已載其令此邑矣。

塔口山 邑右山也，故名大姑。兀然中峙。內有橫坑、駟馬坑、苦澱、龜嶺、邊豆、隔青林、苦坑諸山。左爲石竹、長安二山。南爲南山，西爲西向山，繹絡而東，界於南安。石竹山，十三都亦有之。

龍山 縣治朝山也。後有獅山，右有虎尾山。

應龍山 縣治前山也。又名朝拜山。

象山 形如象鼻。元至正中，大崩壓。

馬嶺山 宋時有南嶽寺，彌勒、明思二院，龍潭廟在其下。支爲烏石山，山石盡黑。有毗藍巖，巖下，宋郵亭道也。道平如掌，花木繁陰，暑月如秋，四季似春，爲縣南一勝。又，九都亦有烏石山。

筆架山 仙亭山 金龜山 卧龍山 羊嶺山 石穀山 浮空山 火燄山

穀平山 山夷可田，豐衍宜穀。

蓬山 上有白石院，土呼白巖。山頂，清泉尺許，四時不絕。

筭山 山如筭立。上有筭洋巖。

白馬山 舊傳有仙人乘白馬昇巖，早見則雨，人號白馬仙。蜿蜒而東，突起二峰，繇縣樓端望之，若魚然，名雙魚山。又以留從効故居在焉，亦呼留灣。灣左股有花石山，石亂如花。其後，爲水口山。其支，爲懸鐘。

萬歲山 上有石刻「萬歲山」三字，前有太平寺，東有龜龍山，兩山相會如龜龍。宋令黃瑀寺記：「邑東有山，曰太平寺，曰龍安。予欲大其殿宇，命匠度材，計當以萬數。念寇攘後，流徙未復，瘡痍未平，茅簷竹瓦未能庇風雨，藜羹短褐未足救饑寒，租稅逋負，未盡時人，能及他哉？僧靈政以因緣果報之說，循循善誘，一唱百和，近悅遠來，貧而慙者輸財，瘠而慵者効力，不約而辨，不戒而成。古語云：『尊所聞則高明，行所知則光大。』靈政之於佛法，聞知之，尊行之，其高明光大者耶。因書其事，以自勉。」

東關山

崑崙山 以高名。上有崑崙洞。皇朝山人黃克晦爲邑人李開芳作《洞記》略：自永之東至崑崙洞，可十里，崇山峻嶺，溪行其中，有灘名衝山、馬甲，相去二三里許。巨石砢砢，瀉水若建瓴，濤浪崩湧，雷殷電擊，舟上下必前挽後曳，又必并數舟力而後進，持篙者稍失尺寸，往往患碎溺。蓋至崑崙而上，始安流，而地迺夷曠。先是，嘉靖中，金液、何李二仙著靈於醫，崑崙繇是有洞云。予與李伯東，歲或一游。嘗陰雨行東關，道中聞灘聲喧騰，青蔥峭發，四顧無人，景意幽古。

雲峰山 山高承雲，連石獅接踵。

吳田山

蓬萊山 與錦繡山對峙。有金龜橋，橫截於外。宋少師莊夏舊居在焉。

武極山

天竺山 界南安、仙游二邑。清淑寥廓，如化人之居。

紙山 出紙。

樂山 上有東西南北四臺，而樂山居中，合爲五臺。天陰靄，常聞音樂，故名以樂。有樂山福王祠。王嘗隱此，後仙去，人爲立祠，俗呼「白鬚公」，又呼「翁爹」也。唐咸通中，南安僧欲建寺九日，求材此山，遇一白鬚老人，指其處，果皆梗楠杞梓。又夢許爲護送。一夕材乘漲下，南安人神之。旣建寺，名殿曰「運」，又作靈岳祠祀之。宋封通遠王，賜額「昭惠」。嘉定中，歲旱應禱，守蔡襄以狀聞，封善利王，尋加「德」福，又加顯濟。廟之從神曰陳益，累封仁福王；曰黃志，累封輔國忠惠侯。益，已見南安九日山。東臺祠，神姓庾，從王潮人閩，爲奮威將軍，戍桃林，年八十卒。猶顯其靈，以衛鄉井，人祀於此。故有橘一樹，橘實隨人取食，袖歸卽變蛇虺，人號東臺仙橘。西臺有海潮庵，宋西蜀隱者所立，庵去海二百餘里，而遠眺則如在望。上有石鼓，下一石承之如架，指觸可動。南臺在山外，迢迢孤峙，上有龍泓。北臺有龍潭，昔有魚受釣，忽變爲雙髻嬰兒，號北臺神魚。皇朝安溪詹仰庇詩：「五朵芙蓉面面尊，逍遙一校人天門。日邊海色魚龍變，足下山形虎豹蹲。」

錦繡山 舊名鬼笑。宋少師莊夏葬父處也。相傳舊有葬者，若有鬼物，三葬而三推之，便作人言。

曰：「此莊某墓也。」及莊葬畢，鬼大柳榆，正其人矣。後光宗爲少師更名曰錦繡，御書賜之。

翰文山 東接仙游，亘數十里，岡巒迴伏，飛舞如禽鳥，俗名獅嶺。

玉柱山 峰突起如柱，其徑行處，上號白隔嶺。

石鼓山 下有石鼓廟，邑令黃瑀建，後令林搗記：「縣治順溪而西五里，有廟曰石鼓。溪中石可一二數。而所謂鼓者，與他石異，以鳴不鳴爲雨暘之候。廟剝不治，紹興乙亥，大夫黃瑀始新之，自是祈望日謹，邑有雨旱，吏必禱焉。淳熙甲辰夏五癸卯，予齋被祠下，祝者曰：『鼓鳴而雷者屢矣。』是日果大雨。越乙巳，至戊申，雨繼作，穡事有成。於是鄉父老請予記之，予泛觀山經地志，石以鼓名有矣，未有異若是。廟實臨溪，俗謂之石鼓山。而鼓之神與龍名俱矣。夫石也，能俱龍乎哉？意有憑是而出靈響者，神之焉可也。」

小尖山 在十九都。山西有大劇、小劇二嶺。邑峻嶺殊多，而是嶺尤劇。朱文公《劇頭鋪詩》有「如何獨宿荒山夜，更擁寒衾聽子規」之句。二、三都及八都，亦有小尖山。

若參山 西峰山 齊雲山

三貫山 三峰秀拔，勢若聯貫。

姜連山 山勢不斷，兩峰低昂。

雙髻山 一名朋山。上有水一泓，名仙人池。相傳有女仙隱於山，後留丹竈山阿飛去，花朝月夜，時見來游。

觀音山

高鎮山 舊志謂其高出群峰之上。皇朝林希元新志謂：「過而見之，崢嶸耳。人不可無名也。」指撲山 山麓廣衍，上峻絕如手指。

大靜山 以高遠名。宋有明禪師者居之，普足禪師之師也。普足，縣之小姑村人，後修道於安溪之蓬萊山。辭師時，師授以方便澹遠，與一布衣裝，而囑之曰：「非致精嚴事，不可衣此。」普足遵行不懈，以底成佛。其相連者，爲雲林山，勢相頽頽。其東高嶺山，高出群山，頂甚夷衍。

桃溪山 桃溪之水出焉。

御蘭山 山嘗產蘭，一莖三十花，異之，而以名山。

靈山 人聲谷應，故以名靈。有靈應巖。

瓊山

懸鐘山 以形名。亦有應聲之谷。北辰火峰，西連橫山、向龍、陳田諸山。

大帽山 在二十二都。十四都亦有之。右爲石壁、白鶴二山。

馬氏山 上有馬姑寺。馬氏二女，幼學修煉，結廬山巔。一日，登山採藥，蛻形百丈深，時時現身山谷間。溔，在山陰，界安溪縣。皇朝郡人陳露詩：「桃源從古有奇事，姊妹今傳馬氏山。招婿喬家嗤小大，吹簫秦女玷姻緣。淒涼風外丁當佩，峯嶺巖頭咫尺天。正值我來山日杲，肯教雲雨夢中便。」山人黃克晦爲邑人李開芳作《馬山圖記》：「予曩耽永春山水，游必與顏左史範卿俱。嘗飲範卿所，酒中相與溪行，樂而忘返。是時秋霽，青林絳葉，點綴若綺繪，遂發登山之興。至雲居寺，西夕矣。範卿曰：『去此十里而遙，有馬山，峻絕奇勝，奈險遠何？』予躍然曰：『亡奇耳。有奇，咫尺矣。』明發，循山脊，躡霧露，日

中晏始至。寺僧出迎，相勞苦。寺在絕頂若冠，基階外無餘地。庭中有奇石，蘿蔓蒙之，每驟雨，雷自罅中發。下視環百餘里，千峰萬嶺，首會脊。顧溪流百道如織，蓋山谷一大觀也。次日釐明，與範卿立於後盤石上，待日出，環顧繚白縈青，邛聚歷歷。俄而溪雲湧上，初若甌煙，少選，沈山駕壑，若巨海大澤。已，若霖雨拂予面，飄颻而去，旋開朗如初。範卿謂予：『樂哉斯游！登天門日觀，以臨滄溟，望游氣吐吞，寧奇是耶？』飯畢別僧，下至猿步寺，十里。又十里，至鳳山寺，始從平地行。當其時，予與範卿俱壯年，不輿不杖，搜奇陟險，無遠不至。至則分韻賦詩。詩雖忘稿，景未嘗忘心也。」

大羽山 縣治主山也。元令盧琦記：「縣隸泉七，獨永春山水秀甲他縣。縣治背大羽，而面象山，下臨溪水，陰陽家以爲最勝。」

大鵬山 發脉尤溪九仙山。若鵬飛翅。絕頂三峰秀出，山腰有大鵬巖，岬岈幽勝，邑人所游。

雲龍山 下有雲龍橋，宋邑令林聘、陳宏規，皇朝令羅汝經、夏忠先後修治。晉江王慎中記曰：「雲龍、東嶽二橋，在邑治衝，爲通道，而雲龍比接關闌，尤爲壯觀。」

康山 自大羽山頓伏而起，爲縣障。後有金峰，小圓如金。

高田山 山勢平衍，泉水注焉。昔有高姓者田其上。右有蒸餅山。

馬德山 以馬仙採藥於此。

妙峰

畚嶺 彭崇嶺 猛虎嶺

雲林巖 林木陰翳。俗傳屋不聚葉，樹不棲鳥。

川水利附

桃溪 發源雪山，所經之溪八：口仙華溪，口陳巖溪，曰岵兜溪，曰湫溪，曰磁竈溪，曰石鼓溪，曰縣前溪，曰留灣溪，以達於西涵灘，出於南安。所匯之支十有四：曰錦溪，曰溪逸，曰龜龍溪，曰新田溪，曰白芒坑，曰西向坑，曰東渡坑，曰小姑溪，曰羅洋坑，曰嶺兜坑，曰芹坑，曰磨刀坑，曰白內溪，曰牛鼻灘。

熊田溪 源出德化之岱山，逕於碧溪，又逕於田中溪，又逕於後坪溪，又逕於大橫溪，入於安溪。

洞口溪 東接上泰、岐安、上畚二水，西接草田一水，合於下洋洞口，出魁斗溪，會黃大安之水，至魚跳潭，入於安溪。

小姑溪 水自西向嶺，分一派東行，出南安塔口村，入於大溪。

龍潭 潭上有袁昭祠。王審知使昭成鎮桃林，既沒，廟祀於此。

湯泉二 一在湯邊，一在登瀛橋北。

〔校記〕

〔一〕「統都十四」，下文實列二十五都。

〔二〕「丘方」，下文作「丘峰」。

〔三〕「達里」，下文作「達理」，《八閩通志·地理》作「達里」、「達理」。

〔四〕「苦際」，下文作「若參」。

〔五〕「公望嘗設三問扣之之」一語中，後「之」字當衍。

閩書卷之十三

方域志

建寧府 建安縣 甌寧縣

建寧府 在布政司西北五百三十里。東抵福安縣，西抵順昌縣，南抵南平縣，北抵江西上饒縣。漢以前，爲冶縣，爲南侯官都尉，屬會稽南部。建安初，始分侯官之北鄉，置建安、南平、漢興三縣，仍屬南部。南平，今延平。漢興，今浦城也。孫策取會稽，遣賀齊領南部都尉，平其地。八年，遂以建安爲南部治所。十年，析建安之桐鄉置建平縣，今建陽也。三國吳永安三年，始改南部爲建安郡，改都尉爲太守，領建安、建平、吳興、東平、將樂、昭武、綏安、南平、侯官、東安十縣。仍治建安。東平，未詳。將樂、南平，今屬延平。昭武、綏安，今屬邵武。侯官，今屬福州。東安，今屬泉州。晉太康三年，析侯官東安置晉安郡。元康元年，以屬江州，領建安、東平、吳興、建平、將樂、邵武、延平七縣。太元元年，改建平曰建陽。宋，省延平、東平二縣。元嘉中，兼有綏城、沙村二縣。陳永定初，屬閩州，後屬豐州。隋開皇九年，郡廢爲縣，屬泉州。大業初，屬閩州。三年，析侯官縣地置閩縣、南安、龍溪并建安四縣，皆屬建安治。唐武德四年，移治建安鎮，復置唐興、建陽、將樂、綏城并閩縣、建安爲六縣。尋爲妖賊武遇所陷。五年，刺史謝

元治敗，遇復之。七年，以邵武來屬，領縣七。八年，省建陽入建安，領縣六，屬泉州都督府。以上泉州皆今福州也。貞觀三年，省綏城入邵武，領縣四。永徽六年，置沙縣，領縣五。嗣聖五年，復置建陽，領縣六。景雲二年，屬閩州都督府。天寶元年，隸長樂郡，復改爲建安郡，隸江南東道採訪使。乾元元年，復爲建州，隸福州都督府。上元元年，屬福州節度。大曆六年，隸福州都團練觀察處置使。十二年，析沙縣屬汀州，領縣五。乾符五年，州治爲黃巢所燬。中和四年，觀察使陳巖表熊博爲刺史，寓治建陽。巖卒，徐歸範據州叛，以應王潮，博遇害，郡爲潮所有。五代晉天福六年，以建州爲鎮安軍，王延政爲節度使，又改鎮武軍。八年，王延政與延曦相攻於此，建國稱大殷，僭號改元。開運二年，改國號曰閩。未幾，南唐滅之，有其城，改永安軍，尋改忠義軍，此時升歸化場爲歸化縣，永安場爲建寧縣，松源鎮爲松源縣，凡領縣八。宋太平興國三年，屬兩浙西南路。五年，析將樂屬南劍州，升邵武爲軍，而以歸化、建寧屬焉，領縣四。雍熙二年，屬福建路。端拱元年，升建寧軍節度。淳化五年，升崇安場爲縣，領縣五。咸平三年，升關隸鎮爲縣，領縣六。治平三年，置甌寧，領縣七。熙寧三年，省甌寧，領縣六。元祐四年，復甌寧，領縣七。建炎元年，州兵葉懷叛，州治寓建陽，懷平復故。四年，郡民范汝爲叛，州治寓崇安，汝爲平復故。紹興三十二年，以孝宗舊邸升爲建寧府。元初，隸杭州。至元十五年，改爲路，隸福建行中書省，領司一，曰錄事司。十七年，改建寧路總管府，隸福建宣慰。二十二年，立建寧分省，旣爲陳有定所據。皇朝洪武元年，復爲建寧府，領縣仍舊景泰六年，增置壽寧縣，領縣八。

東枕甌溟，北走吳越。江浙要衝，福唐襟喉。其形勝也。

建安縣 東抵政和，西抵甌寧，南抵南平，北抵甌寧。漢建安初，始析置。今建陽、甌寧、將樂、泰寧諸縣地皆其所轄，以置自建安，故名建安。自晉至元，皆仍舊。皇朝因之，凡一坊、二隅、四鄉、十三里，統圖一百四十三。(一)

東隅，圖一。

南隅，圖四。

光祿坊，圖一。

畫繡鄉

將相里，圖十。舊名新會，宋以鄭樞密、謝節度居此，改名。山口象山、梨山、曹高。峰曰黃樞。溪曰沙溪。

南才里，圖十五。唐以葉京登第名。峰曰黃龍。巖曰吉雲。洞曰冥陽。石曰石塔。

秦溪內里，圖十一。巖曰白石。

秦溪外里，圖八。山曰虎頭巖。巖曰鶴峰、三姑。溪曰秦溪。

原祐鄉

登仙里，圖十。以漢梅福於此昇仙名。山曰鷄足、三門、龍池、屏風、隊羊。峰曰百丈。嶺口真武。巖曰寒巖、定心、威禮、雲竹。坑曰倪坑。溪曰普通。灘曰梨灘。

房村上里，圖十五。舊名黃孫，國初改爲上下二里。山曰大富、瑞峰、仙人、龜山、曹山、箱山、隊魚、印山、鳳山、虎山、豸山。

嶺口靈池、蛟窟、天湖、大雪、曹巖、丁坑。巖曰龍興、靈仙、圭峰、石鼓、瑞興、洋山、寶曆。溪曰瑛溪。

房村下里，圖八。峰曰獬豸。巖曰伏獅。溪曰房村口。

永和鄉 宋建安鄉。

吉苑里。宋北苑里。國初割原祐鄉東吉里來益，合名吉苑。山曰黃華、馬鞍、鷄籠、白鶴、響山、天馬、鳳凰、白土、龍山。峰曰銅場。溪曰東安源、古老嶺。潭曰蛟潭、白塔。

順陽里，圖八。溪口順陽口。

建寧里，圖十二。山曰東山。溪口東坤口、橫谷。

永平鄉

安泰里，圖十二。山口雙髻。溪曰安泰、東游。灘曰密黯。

川石里，圖九。宋隸建安鄉。山口八仙。巖曰寶勝、靈巖。溪曰川石、潑、漁溪。灘曰書筒。

東菴里，圖九。山曰辰山。巖曰卧牛。溪曰東菴口、千源、山溪。

右附郭。

山

黃華山 在府城中。東北自浙之處州，縣亘六七百里，止於此山。劉宋時，守華瑾之徙治山西麓。

宋韓世忠討范汝為，嘗屯兵其上。後守趙善俊壘其下，為義壘。元末左丞阮德柔，築城山頂，下屬舊城，以禦陳友諒。國初，都指揮時禹拓大之，此山遂在城中，上有樓曰黃華，鐵獅、白鶴、紫芝、黎嶽、屏風、天湖諸峰環峙雄踞，若騫若翥，一郡壯觀也。樓之臺曰冠山，閣曰憑虛，軒曰待月，亭曰咸宜。東門曰寅賓，西門曰寅錢，嘉靖中，僉事汪佃所建。山前有潭曰北潭。

象山 在府城東南三里。山形如象，其鼻迴轉，抱水一泓，冬夏不涸。形象，名白象捲湖。

梨山 上有梨山廟。唐李頻刺州時，雅好此山，公暇時往游。頻卒官，父老相率葬之縣之永洛洲。

既，卽此山立廟。宋時雨暘應禱，累封靈祐福應威濟信順王。然當時以爲「李回」。洪邁守郡時，祈雨神祠，作祝文云「亟回哀眷」，書史持白曰：「回字，犯相公諱，請改之。」蓋徐鉉作《稽神錄》以爲「回」。後邁讀《文藝·李頻傳》，方證爲「頻」。元、國初，則於學宮作澤民分靈祠祀之。揭祐民作祠樂歌：「山爲鉤曲藏神宮，拂天雲旗揭靈風。云何王陽招之東，乘彼赤羆駕文熊。飄然遨遊顧環雍，帝裔隊伍王儀容。手挾隋矢并和弓，下庭考鼓兼鳴鐘。銅梨白雉血在中，淋漓酒肴薦和醢。引接我士俱登庸，上天翩翩策飛龍。」徵南將軍左丞何道人闖，師抵建寧，旬餘不下。左丞震怒，刻日拔城。是夕，夢有唐衣冠者立帳前，圓目長髯曰：「吾以一城生命付汝，勿妄殺之。」覺，詢土人：「此間何神最靈？」一僧以梨山廟對。言其形似，儼如夢中。左丞躍然曰：「果如神言，吾忍戮之？」翌日，守將達元芳以城來獻。越二日，太守瞿也先率耆老諸軍門降。左丞大悅，入城，市不易肆。洪武十一年，釐正祀典，第稱建州。刺史李公，令有司春秋致祭，六月六日爲頻誕日，亦詣祭之。下有小梨山，繇今廟小徑入，約五里許，地名瀨石前。小源濤下有古墓及小廟。又傳神歿葬此。既立今廟，一夕大雷雨，小廟香爐飛上廟前大梨樹。建人遂截梨刻像，今正殿像是也。像貌常澤，相傳座下有井，有龍居之，潤蒸神貌。祠左有臨清閣，刻頻《建中詩》。按《唐書·李頻傳》謂「盜發頻塚，壽昌人爲之掩覆」。鄭谷《哭頻詩》：「令終歸故里，末歲道如初。雨墳生野蕨，鄉墓釣江魚。」曹松《哭頻詩》：「瘴中無子莫，嶺外一妻孀。恐是浮吟骨，東歸就故鄉。」則永洛洲，其衣冠之藏爾。

曹高山 上有曹聖者茶場。

虎頭巖山 山多奇石。前聳一峰若虎首，上有馬仙姑庵。仙姑將相里人，嫁期年而寡，紡績養姑，出人徒跣，展蓋渡溪，不借舟筏。嘗語人曰：「我非世人，奈姑在耳。」或早嘆，鄉人輦迎，祈雨立應，後姑以壽終。襄事畢，遂飛昇去。側有涼傘山，其形如傘，下有孤石，聳如人立，俗呼爲石人。又《霍童志》：「馬仙姑姊妹三人，長適霍童青巖家，貞潔不偶。一日，浣布霍童，流有仙桃一枚，半餘啖二妹，三人同日昇天。」又按《列仙傳》：馬大仙，唐末處州馬氏女。既嫁，家貧，養姑尤謹，遇異人，授以仙術，往來傭織，去家百里。有美食卽以薦姑。今閩中多祀馬仙姑者，亦不知是何仙也。

鷄足山 三峰如鷄足。下有報恩院，又名卧雲庵。宋釋崇因居之。《五燈會元》：「崇因，長樂陳氏子，六歲禮鼓山，披削於國師，言下發明。開堂日，僧問：『諸佛出世，天花亂墜。和尚出世，有何祥瑞？』師曰：『昨日新雷發，今朝細雨飛。』問：『如何是諸佛玄旨？』師曰：『草屨木屨。』開寶三年，示寂茶毗。收舍利三百餘，并靈骨，歸於建州鷄足山卧雲院建塔，卽此也。」

三門山 王氏據閩，於此置柵防守。

龍池山 山頂池有龍居之。遇旱，觸以物，卽雨。

屏風山

隊羊山 連岡接隴而下，形如隊羊。

大富山 在龍津。培塿而潤，其地宜木。元楊達卿，皇朝文敏榮祖也。家素饒，好爲德，左丞阮德柔治建寧，迎致官舍，爲弟子師。強之仕，不應。達卿之爲德也，推衣食以賑饑寒，出貲市牛以助耕作，歲首則設酒食會鄉人；戒毋燬山林，恐傷昆蟲草木之生；有截流毒魚、採巢取殼者，皆予之錢穀，勸勿爲。

會歲饑，欲發廩，惡其有名，告人曰：「有種吾山一株木者，酬以粟一斗。」實不問其種否。及木大，戒子孫毋售也。惟聖人之廟、學、浮屠、老氏之宮、神祠、杠梁，與貧人之欲爲廬舍，死無以爲棺者，於是乎取之。里人名其山曰萬木。

北山 宋徐大正居此，作閒軒。秦觀《軒記》：「建安之北，有山巋然，與州治相直，曰北山。山之南有澗，澗之南有橫阜，背山而面阜。據澗之北濱，有屋數十楹，則東海徐君大正燕居之地也，其名曰閒軒。去軒數十里，有田可以給饘粥，供絲麻，賓婚燕祭之用，取具。君將歸而老焉，而求記於高郵秦觀。觀曰：士累於進退久矣，弁冕端委於廟堂之上者，倦而不知歸；披莽蒼而佃橫野，獵而漁者，閉距而不肯試。二者皆有累焉。君雖少舉進士，而使馬善射，慷慨有氣略，天下奇男子也。夫以精悍之資，遇休明之時，齒髮未衰，足以仕事，而欲就閒曠，處幽隱，分猿狖之居，廁麋鹿之游，竊爲君不取也。」按州志，無進士徐大正之名。記云「東海」，未知是此縣否？聊見於此。

馬鞍山 在城東北。又以占有瑞峰寺，名瑞峰。郡主山也。宋守韓元吉以其卑於朝山，植萬松焉。與馬鞍相屬者，曰鷄籠山。

白鶴山 《寰宇記》：「東晉時，望氣者言：『山有王氣。』將發之，朝鑿暮合。上見白鶴雙翔，因名白鶴山。」宋孝宗初封建國公，後自普安郡王進封建王，既卽位，陞州爲府。張棟記：「州一里，山曰白鶴，望氣者云有王氣，鑿之復合，於是驗矣。山麓有甘泉，飲之愈病，湧則可占歲。前有熙然堂，宋守黃通構以勸農，今夷爲民居矣，但尚名探春亭也。傍有真如寺。寺西南，地勢隆起若伏龜，兩水流前，而紫芝、鐵獅、雲際、梅仙諸峰爭奇獻秀。元，寺僧無涯，爲檀施郡人楊彥禎予以龍津木三百，兼給運資，無涯曰：

「莫爲謝。寺傍西南地，吉壤也。君父未葬，請奉君。」彥禎葬父後，生文敏云。」又，嶽祠東廡壁，有喬戚里畫，元時名畫也。

響山 在府城東五里。空洞枕溪，若傳聲之谷。溪中嶼有小洞，名浮石。人以其水泛不沒，若與浮然。風月之夕，水中笛聲，或聞洲渚。又云，漢梅福煉丹響山。其徒陳先生者，每竊食之。福怒，拔劍逐先生。先生逃入此洞，名逃奴洞矣。《西漢書》：「梅福，字子真，九江壽春人也。少學長安，明《尚書》、《穀梁春秋》，爲郡文學。補南昌尉，去官歸壽春，數因縣道上言變事，求假輅傳，詣行在所條對急政，輒報罷。是時成帝委任大將軍王鳳，京兆尹王章譏刺鳳，爲鳳所誅。群下莫敢齒王氏。福上書極言。既身出孤遠，又譏切王氏，終不見納。居家，以讀書養性爲事。至王莽顓政，一朝棄妻子，去九江。其後，人有見福於會稽，變名姓爲吳門市卒。至今傳以爲仙。」

天馬山 在府城東北二里。山巔有峰高圓。繇東而分爲白鶴山，中爲小黃華山，西來突起圓隴，以至府治之後，與大黃華相接。

鳳凰山 北苑茶焙在其麓。蘇軾《鳳咮石硯銘》曰：「北苑龍焙山，如翔鳳下飲之狀。當其咮，有石蒼墨，堅紋如玉。太原王頤以爲硯，予名之曰鳳咮。」卽此是也。北苑者，其地宜茶，凡三十里。唐邑人張廷暉居之。廷暉仕閩爲閤門使。龍啟中，悉以輸官，繇是有北苑之名。其茶最嘉者曰社前，次曰火前，又次曰雨前。火前，謂寒食前。雨前，謂穀雨也。鳳凰山旁曰壑源山，曰沙溪，皆產茶之地。官焙三十有二，小焙十有四。內園三十六所，外園三十八。內園以上供，外園以備賜予，而壑源爲冠。五代時，王延政併遠近民地，悉入官焙。南唐潘承祐判本道徵稅事，收近焙茶爲獻，以外焙地還民，稅取其乳作片，號

「京錠的乳」，亦名「研膏茶」。宋太平興國二年，置龍焙，造龍鳳茶。咸平中，丁謂爲本路漕監，造御茶，歲進龍鳳團各五觔有奇；「的乳」以下，萬八千四百六十五觔有奇。創造規摹，精至嚴謹。因錄上其園焙，按圖繪器具，及叙採製人貢法式，曰《建安茶錄》。此時建安之茶最天下。其後蔡襄爲漕使，改造小龍團茶，每二十八餅重一觔，尤極精妙。元豐初，復下建州製密雲龍，其品視小團尤高。邑人熊蕃詩：「外臺慶曆有仙官，龍鳳才聞製小團。」曾文昭詩：「莆陽學士蓬萊仙，製成月團飛上天。」又云：「雲蜜新樣尤可喜，名出元豐聖天子。」蓋謂是也。大觀以後，製愈精，數愈多，鑄式屢變，而名色亦不一。自貢新，迄京錠，皆以品色分綱。紹興十六年，去京錠，改造大龍團。至三十二年，凡工用之費，篋羞之式，皆漕臣專之。其細色五綱：第一綱曰貢新；第二綱曰試新；第三綱曰龍團勝雪，曰白茶，曰御苑玉芽，曰萬壽龍芽，曰上林第一，曰乙夜供清，曰承平雅玩，曰龍鳳英華，曰雪葉，曰蜀葵，曰金錢，曰玉華，曰寸金；第四綱曰龍團勝雪，曰無比壽芽，曰萬春銀葉，曰宜年寶玉，曰玉清慶雪，曰無疆壽龍，曰玉葉長春，曰瑞雲翔龍，曰長壽玉圭，曰興國巖鈴，曰香口焙鈴，曰上品揀芽；第五綱曰太平嘉瑞，曰龍苑報春，曰南山應瑞，曰興國巖揀芽，曰興國巖小龍，曰興國巖小鳳，曰大龍大鳳。其粗色七綱：曰小龍小鳳，曰大龍大鳳，曰不入腦上品揀芽小龍，曰入腦小龍，曰入腦小鳳，曰入腦大龍，曰入腦大鳳。苑中有漕司行衙，及茶堂星輝館。又有倉儲，建寧北苑二里，秋苗以給食春夫，今俱久廢，惟御泉亭在焉。御泉一名鳳凰泉，一名龍焙泉，宋上供茶取此，深僅二尺許，有暗渠通溪，泉日夜從渠出，而舊志謂喊之則出，造畢則竭，蓋神異其說，以表茶美矣。建人祀張廷暉爲茶焙地主。而丁謂監製時作堂曰茶堂，前引三泉爲池，曰龍鳳池。池中爲島，曰紅雲島，滿植海棠、檉柳，每旭日初升，晴光掩映，浮動如紅雲然。今塘池俱廢，僅

紅雲島隱隱可辨爾。

白土山 皇朝洪武二十四年三月，詔天下產茶之地，歲有定額，以建寧爲上，聽茶戶採進，勿預有司，茶名有四：曰探春，曰先春，曰次春，曰紫筍，不得碾揉爲大小龍團。可謂一洗前朝弊政矣。

龍山 狀如龍蟠，與鳳凰山對峙。

東山 在府城東北二十五里。一名蘇口山，與相屬者有盤山，以其寬平如盤。皇朝御史滕祐別業在其下。林俊記：「閩山水甲天下，建甲閩，武夷甲建，次則無如東山。繇建東門出不三十里，而近水可舟，陸可輿，馬杖屨山之北，岢然闊壯，雋深中峙，若正土。東西山牆列立，侍若弟子行。南爲鳳山，嵒嶠軒翥，與北相應。接山多貧簷、豫章、儲檀，異花茂草，嵌厓遂谷，巖石之奇。每雲散雨收，煙消日出，歲時代謝之間，霜雪之餘，或如渥丹，或如濡墨，或赭或殷，或濃或淡，或重或叟，或斷復續，或有復無，繁縷擁橫，變幻層出，總而名之，曰東山。滕德甫氏別業在焉。得甫之弟吉甫，爲御史，有名於時。請告歸家，德甫畀之而棲息焉。吉甫額堂曰草堂，曰寶鳳名臺，曰可詩。濬泉於叢木灌莽之間，以爲池，導爲溝澮，以溉高下之人田，人名泉曰御史。夫是東山得吉甫而勝歟，顧吉甫亦將有得於茲山也。」

雙髻山 又名筆架山。

八仙山 俗傳有仙人過之，武隱隱石上。

辰山 郡山之最高者。山有峰曰逍遙，曰飲坑，曰牛頭。又有石若鼓，擊之有聲。有牛心洞，中懸一石，如牛心。旱時鄉人以紙揩石，便有水滴，盛之而出，甘雨隨至。然不誠不得也。下有蘆竹洞，有蛟窟，禱雨輒應。

魚峰 唐龍啟元年建萬葉教寺。有瀑布、石門、菩薩巖、仙人跡、污樽、水簾、七松壇、萬石塔，號八景。瀑布自山頂瀉下數百尺，飛濺尋丈，外若珠簾窳地，號天下第三瀑布。

黃梔峰 地產黃梔。峰下舊有三十寺，今存者五：曰石龜、冷水、威嚴、新安、藥師。

黃龍峰

百丈峰 上有百丈巖，世傳馬仙所居。巖畔有雙龍泉，旱禱輒應。巖二十餘里有寶蓋洞，馬仙飛昇處也。

獬豸峰

銅場七峰 七峰連屬，中三峰並馳，比諸峰特異。

真武嶺

靈地嶺 相傳梅福修煉於此，故靈其地。

蛟窟嶺 舊有蛟滾地成窟，因以名嶺。

天湖嶺

大雪嶺 嶺多積雪。

曹巖嶺 相傳曹聖者嘗棲息於此。地產楊梅，色紅者俗名聖者楊梅。

丁坑嶺

古雲巖 白石巖

鶴峰巖 巖前兩山並立，俗呼寒山拾得。山上有庵，祀魏王、錢鏐二仙。旁有水一泓，可愈患眼。

三姑巖 山形高峙，如人立。

寒巖 下有高澗，發源巖上。

定心巖 舊有道人，結屋禪定，人以名巖。

威禮巖 雲竹巖 龍興巖 靈仙巖 圭峰巖 石鼓巖 瑞興巖 洋山巖 寶曆巖

伏獅巖 相傳越王嘗游其地，下有越王潭。

寶勝巖 吼瀑百丈，直瀉澗底。

靈巖 在玉潭。巖方而兩穴相疊。上起雲氣，則大雨數日間。

卧牛巖

冥陽洞 洞初入甚暗，良久方明。後漢宜新太守楊仲產所居地。

紫霞洲 在城中和坊。宋守韓元吉闢北園以增府治，濬地導泉，作亭臨之，號「紫霞洲」。蓋取「幔亭紫霞褥」之義。內有玉仙池，源出處州之龍泉，至烏龍巢口，南注經月城僧舍，穿城而入，潄爲大池。宋於此置豐國錢監，引之以給鼓鑄。紹興以後，官治停鑄，水道弗修，元吉與後守趙善俊相繼修之，水仍入池。熊克爲記：「惟建之水，厥有二瑞：官焙歲爲茶萬餘斤，取足御泉之一泓；官冶歲爲錢十萬餘緡，取足於龍泉之一派。皆大旱不涸，真天泉也。」

伏洲 洲上有長慶館，館後有唐刺史葉顥廟。顥，武德中以捍賊卒。貞觀初，民廟之。廟左有溪潭，時苦霖漲，一夕，風雨冒之，沙石填闕，人謂神力。後移建城內古富沙地，名富沙廟矣。

倪坑 唐乾寧中，有道人倪彥松居此，爲郡將禱雨，其應如響。及卒，葬所居山左。五代唐同光三

年，郡久旱，加以兵後大疫，鄉人詣墓乞靈，拜伏方輿，雲生而雨，病者愈十六。

川

東溪 在府城東南政和門外。發源處州松源，會松溪、政和之水而下，至城東南繞而西，合甌寧西溪之水爲一大溪，南注延平，抵福州人於海。唐李頻《東溪泛舟詩》：「登岸還人舟，水禽驚笑語。晚葉低衆色，溫雲帶殘暑。落日乘醉歸，溪流復幾許？」

沙溪 源出南才、順陽二里，經本里，入東溪。

秦溪 源出古田縣，逕秦溪外里南瓦口，入大溪。

普通溪 源出南鄉，逕登仙里，入東溪。

璜溪 源出丁坑，合九漈、白塔、大富，四流逕房村口入大溪。上接武夷，下會鐔川，波光滉漾，有聲淙然，勢委曲若璜。其地自宋元至本朝，世族萃處，絃誦相聞。又云唐雷鸞釣璜之所。鸞，五代時爲押衙，鄉人立祠於此，并祀徐將軍。徐將軍，見甌寧縣將軍巖。又有桃源、起莘、龍潭諸溪，俱會於此溪。在璜溪之上，則有仙人山，有龜山，有箱山。而隊魚山，在溪南，群山突出若隊魚。又，在溪西南者曰印山，在西者曰鳳山，在西北者曰虎山，在東北者曰豸山，皆以形名。

房村口溪 源出上里白塔，逕甌寧高陽里、大坊，至葉墩橋下范墩，入大溪。

東安源溪 源出甌寧縣界，流注東溪。

古老嶺溪 源出法雲山下，逕石門，南下至古老嶺下，入大溪。

順陽口溪 與安泰溪互源，出古田縣界。

東坤口溪 源出甌寧，逕建寧，入東溪。

橫谷溪 源出甌寧，逕建寧吉苑二里，抵橫谷鋪下，入東溪。

東游溪 源出政和、甌寧二縣界首，逕東游市，入於東溪。

川石滌溪 源出政和，逕蓬源，至龍蓬口，入於東溪。溪有灘曰書筒，蓋溪上石高二尋，廣四尋有咫，形如書筒，故以名灘。後石淪溪中，世傳唐羅隱過是里，里人慢之，隱因指曰：「書筒淪水，川石無官。里人自此誑惑，絃誦衰竭。皇朝洪武初，詔民家得自擇子弟之秀者送入學宮。有陳伯進者，富人也，欲擇諸孫應詔。其子懷慎，舉隱言對，伯進笑曰：「何誕諺邪！積善之家，必有余慶。」懷慎乃送其子昇入學爲弟子。及永樂中，徙富民實京師，伯進與焉，昇坐往來奉父，廢學者十餘年。人謂隱言驗已。既以明經領鄉薦，會試中乙榜，授嘉魚學。乃謁楊文敏，請記刻石，以解里人之惑，啟後進之心。文敏爲記，引王祐三槐桑維翰鐵硯二事爲證。且言隱，唐末舉進士不第，晚年錢鏐始辟遷給事中。其人蓋致用之士，斯言固非隱所肯道，而灘上之人，尤不宜以之自阻也。」隱，見泉州羅裳山。

漁溪 源出政和界。

東莨口溪 源出古田縣，經莨口，入於東溪。

千源溪 源出政和西里，及古田縣界，流會東莨口溪。

山溪 源出古田縣，流至千源，會陂頭二水，入東溪。

梨灘 險灘也。

密黯灘 險灘也，鄉人立靈山廟鎮之。

蛟潭 蕭子開記：昔有樵子，見潭上浮槎，有金環如指大，涉而取之，遂罹其殃。此潭是也。
白塔潭

甌寧縣 東抵建安，西抵建陽，南抵建安，北抵浦城。宋治平三年，析建安、建陽、浦城三縣地置。熙寧三年省。元祐四年，復析建安地置，而建陽、浦城地不與焉。元仍舊。皇朝因之，凡二隅、一坊、四鄉、十二里，統圖一百九十二。

西隅，圖四。

北隅，圖七。

縣坊，圖四。山曰鐵獅、紫芝、雲際、梅仙、昇山、覆船、龍首、天關地軸、慶成、黑窑坑。洞曰玉清。

安樂鄉

崇安里，圖十六。山曰黃畚、靈鷲、將軍旗鼓。峰曰劍門、圓峰。巖曰白石、徐將軍。洞曰石橋。溪曰小松、宜君。

西鄉里，圖十七。山曰天堂。巖曰擎天、獅巖、北巖、雲巖、仙杵。洞口西峰。溪口下溪、龍村。

禾供里，圖十九。山曰塔嶺、白石人。溪曰清潭、陳溪小溪。

星會鄉

舊名新會。

禾義里，圖十六。山曰洋峰、壺山、東魯峽、鷄籠頂、三峰、蓬嶺、二庵山、般若庵。溪曰東魯、濠村小溪、壺溪。潭曰三山。灘

曰七里。

禾吉里，圖七。山曰禪巖、小湖峽、蔣峰。潭曰清潭。

紫溪里，圖十七。峰曰毛仙。溪曰紫溪。洞曰西峰。

慈善鄉

豐樂里，圖十九。山曰天寶、斗峰。溪曰天寶山前小溪。灘曰青銅。

吉陽里，圖十六。山曰龍陽、屏山、斗概、石塘。嶺曰巖了、秋竹、牛輓、橫歪、黃梅、黃源、巧溪。巖曰栢香、斗回、鳳巖、草巖。

溪口吉陽、大雪、貫道、桐溪、興寶。潭曰大雪山龍潭、（四）東山林龍。泉曰鼓石。

梅岐里，圖十五。山曰高峰。峰曰板巖。（五）巖曰郭巖、峙獅。

溫柔鄉

慈惠里，圖十五。山曰天湖、黑牛、北平、烏石、西巖潭。峰曰蓮花。巖口寶石、歸宗。溪口萬石。潭曰佛母。

麻溪里，圖十。巖曰壽雲。

高陽里，圖十。國初以地近改。山口高陽。巖曰馬大仙、石龍、簫雲、古冲。

山

鐵獅山 在城西南。從溪南渡，歷數招提始至，左紫芝，而右雲際。其巔有庵，庵傍有鐵鑄文殊獅子像，術家謂府治來山，若猛虎出林；溪西諸山，若隊羊，然欲其不爲傷也，鑄鐵獅對山以鎮之。宋宣和間，移置開元寺。未幾，葉、范二寇繼作，有虎渡溪。紹興間，劉子翼復還故處。或云獅瞰城中，形家不利。乃卽舊治聽事及建安堂柱下埋小獅二十四，若子母相應然。皇朝弘治間，庵燬鐵獅亡矣。又云，山對郡學，號文筆峰。昔有僧，庵其上，鑄鐵塔山巔，郡人以其不利於科舉，移置光孝寺。次年盧覺中第，人爲之語云：「城外打鐵塔，城裡得盧覺。」山麓有報恩光孝寺、禪寺，及定光、彌陀二巖。定光巖以祀定光佛，彌

陀巖中有石室，祀彌陀佛。定光，詳見汀州武平縣南安巖下。有滾坑山，相傳王延政時，有蛟滾出，洪水暴作，延政遂以其年卒。

紫芝山 王審知據閩時，是山產芝。其地有紫芝坊。宋朱韋齋尉政和、尤溪二縣時，作環溪精舍，携文公往來於此。文公沙上畫卦，卽其地也。前有橋，橋上有寺，曰方廣。皇朝正德間，勅立精舍，仍名環溪，以祀韋齋。

雲際山 下有永慶寺，寺後有陸羽泉，相傳唐陸羽所鑿。然羽實未嘗到此。宋楊億詩：「陸羽不到此，標名慕昔賢。」山麓有開元寺，晉太康中建，俗傳爲吳呂蒙故宅。又云蒙子孫分居於此，後捨爲寺。初名林泉，唐開元中，賜今額。寺有佛牙，世爲法寶。皇朝天順間，復建丹青閣於寺左半山之阿，駕橋以度。

梅仙山 在府城南二里。漢梅福，丹成之口，驂鸞而去，所乘馬及鞭，從空墜下，天爲降甘露焉。故今原曰甘露洲，曰墜馬渡，曰驂鸞岐，口遺鞭。山巔丹井，壇竈遺跡具存。每秋陰，井上虹光時現，碑刻「大漢甲子梅福立」。宋守韓元吉建堂，榜曰梅仙山。後守李詵修廢，復匾曰梅山。山半創二亭：曰驂鸞，曰虹光。楊億詩：「寒潭吞別派，孤嶼屹中流。昔日驂鸞客，因名墜馬洲。」元惠安盧琦，偕政和簿，會稽胡允文、晉寧李士瞻、古汴楊大年游茲山，賦《梅山行》：「赤旗落色漢火微，端門日日腥風吹。咸陽秋色壓宮樹，金人夜泣銅駝悲。先生袖疏探虎窟，漢鼎猶堪支一足。九重煙霧如海深，門外何人知痛哭。賊莽白日升郊臺，玉璽墜地聲如雷。周公揖讓孺子戲，絳袍將軍何日來。塵飛滄海風擲瓦，白鶴身輕快如馬。一聲鐵笛度閩關，山月溪風共瀟灑。龍爭虎鬪耳不聞，長嘯袖拂松枝雲。夜鑪白石煮秋雨，風佩

赤錦飄霞裙。先生一去已千載，尚有當時遺跡在。題詩絕壁寄先生，頓使孤峰顏色改。藥爐寂寞秋草深，丹井水落莓苔侵。漢家瓦崩灰化土，猶有丹光穿樹林。」

昇山 舊志亦名朗山，云晉司馬王朗所游。今已見泉州。偽閩僭築郊壇於此。

覆船山 吳時太守王蕃、陳刺史駱文廣，皆建徙郡治於此山。

龍首山 在府城西。又名華源山。舊志：昔有華氏廬此下，有華歆井，雖旱不竭。歆未嘗至此，蓋好事者，因山名華源，而附之曰歆。

天關地軸山 慶成山 黑窑坑山

黃畚山 在府城北五里。上有唐京畿令謝夷甫墓及祠。夷甫，越州人，江左諸謝後也。開元中擢第，累遷揚州採訪使、天興令兼安撫招討處置等使。因鳳翔府總兵官孟濬大縱其衆盜掠，夷甫不待詔旨，奮兵擒之。時李輔國用權，與夷甫有隙，譖夷甫於朝，肅宗時坐流建州。有司聽訟不平，一切辯之，陰相及民，不可勝紀。既疾，召家人曰：「城北隅黃畚，山水奇秀，死則葬予。予以公正得罪，異日血食茲土矣。」迨代宗卽位，見夢於朝，訴其忠烈，有詔度恭致祭，官爲立廟，賜額靈通，後加封英武。國初更定神號，載之祀典，曰唐京畿令謝公。

靈鷲山 山半有亭，藏仙骨一函，相傳自武夷迎置。

將軍旗鼓山 山有四峰。右峰如展旗，左如鼓，而中二峰雄峙如將軍。

天堂山 塔嶺山

白石人山 山多白石，有人形似。

洋峰山 屹然衆峰，其頂平夷，山半有仙亭，雨暘應禱。

壺山 山瞰大溪，石壁削立，上鐫「壺天寒、冰玉屏」六大字，筆力遒古。

東魯峽山 山峽中斷，溪流其間。

鷄籠頂山

三峰山 山有三峰，中峰石壁上鐫「洞天」二字。

蓬嶺山 庵山 般若庵山

禪巖山 絕壁有巖穴。唐時有僧無垢自雪峰山來，坐禪其中，其後雨暘應禱。

小湖峽山 兩山爲峽，溪流其中。

蔣峰山 舊有蔣姓者居此，下有蔣庵。

天寶山 下有天寶寺。

斗峰山 上有斗峰寺。

龍陽山 山勢雄偉，接順昌縣界。

屏山 斗概山

石塘山 山巔三峰並秀，其麓有石泉一泓。

高峰山 在郭巖西。連亘延平、甌寧二縣界。中峰挺秀，高千餘丈。郭巖，漢郭仙所居，古有庵祀梅

福、岐公像。舊志，梅福隱建城南山，學仙術，後游武夷，望郭巖有紫氣，往詣，則岐公在焉。因與同處，後俱乘鶴上昇，今里名梅岐以此。又有梅仙留頌石巖，巖下有李偲墓，墓側有仙人跡，馬蹄痕石，相傳偲昇

仙遺跡。

天湖山 自浙龍泉西北來，建鎮山也。山有三十六景，而雙虹泉、空翠亭、紫芝庵尤勝。宋郡守趙研有「美景天湖呈六六」之句。左有古書院遺趾，不知何代所建。右有梅巖，晦庵講學之所。

黑牛山（△） 上有黑石如卧牛，屹爲郡鎮。

北平山 烏石山

西巖濤山 有石壁高十餘丈。上有亭，祠馬、岐二仙。馬仙，見前。岐仙，見後。

高陽山

秀峰 在楊墩之上。宋崇安人楊萬大，性好恬靜，結茅武夷，漁樵爲樂。夜則懸燈獨坐，弦琴詠詩。

一日，有道士黃冠玄服，狀貌甚偉，扣門止宿，萬大禮之，後往返益勤。一日，謂曰：「吾今當歸洞天，特來言別。君行甚善，天且報君，在後人乎。吾有小舟，君可同往。」萬大異之，既訖然，請留曰：「二親未葬，未可從公。」道士曰：「待君襄事，與君偕往。」因共舟至甌寧豐樂里，指示溪灣秀峰下曰：「某年月日，君奉父母柩於此。白狸眠處，葬所也。」萬大俟期奉柩至，果見狸眠。葬不逾年，別處子孫聞其地饒衍，多來居止，因名地曰楊墩，墓曰白狸。時萬大年九十有七矣。一日晝寢，夢前道士來迎曰：「今可俱去。」覺，卽沐浴更衣，端坐而逝。皇朝文敏公，萬大後也。

劍門峰 清溪中注東西兩峰，如劍對峙。

圓峰

毛仙峰 相傳毛、黃二仙煉丹於此。

板巖峰 蓮花峰

巖了嶺 秋竹嶺 牛軛嶺 橫歪嶺

黃梅嶺

黃源嶺 與建陽縣接界。嶺畔有泉，黃色。

巧溪嶺 界甌寧、順昌二縣間。有溪發源嶺下。

白石巖

徐將軍巖 前後二巖，極高廣。黃巢入閩，鄉民千餘避亂其中。舊傳有徐將軍駐兵驅賊於此。將軍
勇烈忠義，建安瓊溪有徐將軍祠者，此也。

擎天巖 宋秦川有祖道悟者居之。謝枋得爲記言：「道悟力慕金汞，參老瞿曇，學法西乾，曠世高逸
之上也。」又言：「宦游東南州郡，於山見衡嶽之高，豈意復有峨峨然峙天半者，雖未獲班名志載，亦見東
南之峙勢不孤。」

獅巖 以形名。慈惠里亦有是巖。

北巖 下有北巖寺。宋政和陳朝老讀書於此。

雲巖 昔有普濟大師，坐化其上，鄉人祠之。頂有二石，大者如獅，小者如鈴，名獅子鈴石巖。右有
雪巖，雙峰並高。連大師用指大書「昇」字於石，字跡尚存，今與普濟同祀，並著靈響。

仙杵巖 三峰高聳，頂有巨石如棋盤。相傳邑童氏子，因母足疾，採藥至頂，見二叟用小石對奕，遂
舉五石以授童氏子。童氏子袖歸，母愈。後五世孫生五子，俱貴顯。

栢香巖

斗回巖 巖側有庵，以奉梅仙，水可愈病者。

鳳巖

草巖 巖勢最高。

峙獅巖 左有小洞，右有天湖，池上有梅，岐二仙庵。

寶石巖 在縣西萬石灘上。又名寶國巖，舊有寶國寺。

歸宗巖 一名鬼子巖，一名梅巖。朱文公嘗講《易》其處。淳熙間，曹道人卓庵居此。有聽泉閣、拈

文堂、洗心亭、太虛寥廓亭、紫雲堆、補天遺品石、棲雲洞、風洞落珠崖、石心泉、香爐峰。巖洞峭奇，一壑萬狀。

壽雲巖 馬大仙巖

石龍巖 巖勢蜿蜒若龍，泉出巖竇，飛瀉而下。有馬仙庵，早禱多應。

簫雲巖 古冲巖

玉清洞 在城西移忠坊玄妙觀前溪潭中。蕭子開記：「昔有彭漁人，捕魚入潭中，見石室金榜曰：『清洞。升其庭有紺青衣者出，曰：『此司命真君府也，何得闌人？』遂之出門，其室遂隱。』」

石橋洞 高峰環抱，石壁峭立，傍有游聖者庵。歲旱，鄉人來禱，歸未抵家，雷雨大至，溪漲陂壞，人號游陂陂。

西峰洞 在西鄉紫溪二里內。可坐百人。有鼎爐石床，石上五坎，其形如碗，皆盛石髓，各具五味之

一。中寒氣逼人，相傳九仙居之。前有巨石如方座，高三十餘丈，上列石棋盤。洞左右二石廚，俗傳常有錦鷄野羊，分宿其內。石壁如削，樵牧不至。

淮沙 在府城西通濟門外。溪濱沙洲，聚散不常。又城南七里橋上下溪之中，亦有沙洲。西爲淮頭，南爲淮尾。舊識：「淮沙圓，出狀元。」皇朝洪武十七年，沙聚而圓，郡人丁顯應之。

萬安洲 卽大伏洲，在府城西北萬安灘下，沙聚平衍，肥饒宜蔬。

川

西溪 在臨江、通濟二門外。源出崇安，浦城及建陽諸溪之水會流於此。逕城西南，與建安東溪水合流，繇延平至福州，以達於海。

小松溪 源出蓬嶺，逕城北達於海。

宜君溪 通慈惠里粟步口，入西溪。上有歸宗巖，宋曹道人居焉。繇巖扃人，有紫雲堆、落珠片、石心泉、香爐峰諸勝。

玉溪 源出里之竹溪，逕禾義里之蓬陂，逕小壺人大溪。宋嘉祐間，有妖鼓浪，里人童志賢，玉尺投之，其妖遂息。

龍村溪 溪有巨石，舊爲雷裂，有龍磨角痕。窮溪之源，有飛瀑繇石巖下注，長數十丈。際下有龍井，傍有龍王祠，遇旱，觸之以錢，輒雨。

清潭溪 源出浦城縣漁梁一嶺，至是爲潭。下逕禾義里，人大溪。

陳溪小溪 源出崇安南山嶺，下注清潭溪。舊溪側，多陳姓。

東魯溪 源出西鄉里，逕東魯峽、黃塘，會小湖口水，入大溪。

濠村溪 源出松溪縣太源山，下注於清潭溪，而人大溪。

壺溪 源出浦城縣漁梁嶺下。

紫溪 源出松溪縣皆望山。

天寶山前小溪 源出石源，逕慈惠、徐墩，入於大溪。

吉陽溪 源出順昌縣，逕葉坊驛口，入大溪。其上出兔毫盞。蔡君謨《茶錄》：「建安所造黑盞，紋如

兔毫。然其毫色黃者，土人謂之毫變盞，其價甚高，且難得之。」

大雪小外小溪 源出巧溪嶺，下逕豐樂里，入於大溪。

貫道橋小溪 源出黃源嶺，下逕豐樂里，入大溪。

桐溪 源出巖了嶺下。唐乾寧間，溪岸有大桐樹，上出雲氣，里人怪而伐焉，解之，有龍鳳文，因製以

進。一名作大夫橋小溪，逕豐樂里，入大溪。

興賢橋小溪 源出斗概山下，入於大溪。

萬石溪 源出漈下，至慈惠里，入於大溪。溪口有灘，名萬石灘，上有室石巖，灘流甚險，而景亦奇。

三山潭 在三山之麓。潭底有大小數石穴，人呼魚屋。

清潭 傍有渡，通浦城縣界。

大雪山龍潭 下有三潭相連，西有石壁千仞，飛泉如屑，潭側空洞，常若風雨聲。

東山林龍潭 石壁峭拔，潭據其巔，深而且廣。

佛母潭 與宋家潭相近。常有巨魚出沒，人疑神物云。
七里灘 在三峰山前。源出大湖灘，清澈，七里許。
青銅灘 在葉坊驛下。水如奔箭，長年戒心。
鼓石泉 石形如鼓，有異人錐之，泉遂涌出。

〔校記〕

- 〔一〕「統圖一百四十三」，下文實列一百三十三圖。
〔二〕「冥陽洞」，各本原作「宜陽洞」，據上文及《八閩通志·地理》改。
〔三〕「蓬嶺」，各本原作「蓬頭」，據下文及《八閩通志·地理》改。
〔四〕「大雪山龍潭」，各本原作「大雪山潭」，據下文及《八閩通志·地理》改。
〔五〕「板巖」，各本原作「板巖」，據下文及《八閩通志·地理》改。
〔六〕「黑牛山」，各本原作「黑斗山」，據上文及《八閩通志·地理》改。

閩書卷之十四

方域志

建寧府 建陽縣

建陽縣 在郡城北。東抵甌寧，西抵邵武，南抵甌寧，北抵崇安。漢建安十年，三國吳析建安縣之桐鄉置建平縣。晉太元元年，改爲建陽。隋開皇九年，省入建安。唐武德四年復置。八年，又省。嗣聖五年，復置。宋景定元年，唐石里嘉禾生，改縣曰嘉禾。元，復名建陽。皇朝因之，其鄉五，轄三坊、十六里，凡統圖二百有六。(一)

建寧鄉

縣坊，圖八。山口大潭、獅子。洞曰桃源、白雲。石曰烏石。溪曰雙溪。窟曰洗馬。

同縣坊，圖十。山口童子、鳳尾。峰曰狀元。溪曰錦溪。

洛繇里，圖十五。山口硯山。峰曰霄峰、蓮源。溪曰芹溪。潭曰龍潭。

建忠里，圖七。山口百丈、章山。

三衢里，圖五。山口鼓角、鵝峰、蟹山。

群玉鄉

三桂坊，圖十。山曰東山、東觀、寶山、勒馬、翠屏、玉枕、玉尺。巖曰油巖。石曰巖頭。溪曰油溪、考亭。灘曰鄭灘。洲曰油洲、滄洲。泉曰匙澗。

均亭里，圖十。山曰九臺、庵山、時山、蓮臺。溪曰將溪。灘曰樟槎。泉曰靈泉。井曰虎井。

仁德里，圖八。山曰焦源、雙牛。溪曰河船。灘曰螺子灘。

興賢上里，圖六。山曰五峰。巖曰郭巖。溪曰南溪。

興賢中里，圖八。山曰葛源仙。峰曰玉田。巖曰獅子、天湖、白水、仙巖、泉巖。溪曰玉溪。

興賢下里，圖七。山曰洪山、黃楊。溪曰徐墩。

仁義鄉

崇泰里，圖二十三。山曰太平、蘆峰、西山、五龍。嶺曰佛跡。灘曰潮灘。

崇文里，圖十三。山曰蘭山。(二)洲口資蓋。灘曰走馬。

崇政里，圖十三。山口大同、書山、天湖、三峰。峰曰黃蓮。石曰床石。

崇政上鄉

嘉禾里，圖十。山曰九峰、武仙、唐石、毛虛際。巖曰鶴跡。石曰龍石。溪曰交溪。(三)武溪。

禾平里，圖十一。山曰白塔、廬山、(四)公裳。巖曰望日。溪曰長平。

永忠里，圖十四。山曰瑤峰、岱障、象巖、靈泉。岡曰松岡。湖曰蓮湖。泉曰靈泉。

崇政下鄉

北洛里，圖十。山曰集公、龜山。

崇化里，圖十九。山曰龍湖、南山、蒼山、高仰、鐵帽。峰曰合掌。湖曰贊湖。

陂山爲城，因溪爲池；群峰襟抱，二水帶束。睡龍驚馬，東南回護；卧牛踞虎，左右相持。其形勝也。

山

大潭山 在縣治內，下瞰大溪，潭水泓澄。舊志：閩越王無諸築城山上，以拒漢。史稱：吳王六千戶，屯大潭城，此地也。山勢蟠屈，亦名卧牛。邑人九日所游，又名登高矣。上有福山寺，舊有擁青、溪山、第一風、望廓如等亭。左瞰北溪，山高且平。右聯開福、景福、隆教三古刹，紺宮華宇，稱邑勝焉。

獅子山 俗名上巖頭。縣治右翼也。

童子山 舊傳宋紹興間，重修拱辰橋，落成之日，有七童子來游，尋飛昇去，故里名童游，而橋今名同繇。文公辭官次潭陽，寓是橋之上。今學官址，在此山下。

鳳凰山 上有瑞相庵。皇朝有泉州釋正映者，於是山度夏，值大水，因說戒，救男女千餘人，正映寒暑一衲，不設床帷，門徒五百餘，有《潔庵語錄》。

硯山 去城四十里，而近記稱爲二十八福地。漢淮南華子期，師角里先生，得隱仙靈寶法，修煉此山。一日能行五百里，力舉千斤，歲十二易形。謝靈運詩有「人華子岡者」，註云：「是子期也。」舊名夫子案山。或曰孔子。疑所謂夫子者，卽子期也。山有石，端平如案，上有微黑點，隱隱若硯。又有方石傍立，名書廚石。有泉七穴，每穴一掬而盡，須臾復出，盈科不溢。山麓朱氏族居焉。上有仙亭，可望數百

里，雪霽雲開，明光逼人，中有硯峰教寺，唐景福時建。

百丈山 朱文公《游記》曰：「登百丈山三里許，右俯絕壑，左控垂崖，疊石爲磴十餘級，乃得度。山之勝蓋自此始。循磴而東，即得小澗，石梁跨其上，蒼藤古木，雖盛夏亭午，無暑氣，水皆清澈，自高淙下，其聲潏然。度石梁，循兩崖，曲折而上，得山門小屋三間，前瞰澗水，後臨石池，風來兩峽間，終日不絕。門內跨池，又爲石梁，度而北，躡石梯數級入庵，老屋數間，迫隘無足觀。獨其西閣爲勝，水自西谷中循石罅奔射出閣下南，與東閣水並注池中。自池而出，乃爲前所謂小澗者，閱據其上流。當水石峻激相搏處，最爲可玩。夜臥其上，則枕石之下，終夕潺潺，出山門而東十許步，得石臺，下臨峭岸，深昧險絕。東南望見瀑布，自前巖穴瀉湧而出，投空下數十尺，其沫乃如散珠噴霧，日光燭之，璀璨奪目。臺當山西南缺，前接蘆山，一峰獨秀出，而數百里間，峰巒高下，亦皆歷歷在眼。日薄西山，餘光橫照，紫翠重疊，不可殫數。旦起下視，白雲滿川，如海波起伏，而遠近諸山出其中者，皆若飛浮來往，或湧或沒，頃刻萬變。臺東徑斷，鄉人鑿石，容磴以度，而作神祠，其東水旱禱焉。畏險者或不敢度，然山之可觀者，至是窮矣。余與劉克父、平父、呂叔敬表弟、徐周賓游之，既皆賦詩紀勝。余又詳次如此，而最可觀者，石磴、小澗、山門、石臺、西閣、瀑布也。因各別爲小詩，識其處。山後爲馬耳山，又寶蓮巖，剏削數百丈。」

章山 高廣百仞。下有章山廟，又名感應王廟。神姓蔣，諱仲賢，兄弟五人，五代時俱爲大夫，所居里以是名。五夫旣卒，鄉人分祀之五所，而神在章山。神之歿也，葬在五夫。一夕風雨晦冥，墓前香瓶移上茲山。衆創亭祀之，禱求皆應。宋寶祐中，里人王褫改亭廟焉。又建忠里，有石郭廟者，祀神弟季實。神舊廟亦在五夫。一日鄉衆席地而祭，忽大風決席，止令廟所，鄉人就祀之。宋范汝爲、熊志寧寇邑，押

示威靈，寇捲旗宵遁，井里獲安。五夫里，今屬崇安。

鼓角山 上有龍池。相傳唐時，一日雷雨晦冥，有雙龍墜池，須臾大水，鄉人懼而禳之，既退，縣以聞，命立觀祀之。後改爲僧寺，雨暘應禱。

鶴峰山 五峰高峙。相傳宋有仙人，跨鶴山巔。

蟹山

東山 山勢雄秀。中一峰挺出，名妙高。有妙高庵。峰傍有宋三濟大師遺跡。師，邑人，修煉於菴巖，土人祀之，有禱皆應。下有環峰書院，宋黃文肅榘講道之所。文肅世居閩環峰下，從學朱文公。文公爲築室考亭側，以是名其精舍，不忘先也。

橫山 與妙高峰聯屬。儒學樂山，縣左翼也。山麓，宋時有橫山王廟，歲祭賽必用童男女，否則鄉里有災。紹興中，薩真人來建陽，王見夢朱文公曰：「妖蟒據廟，食人男女，薩真官乃相委罪，煩先生爲解。」旦，文公詣廟。有一道士施藥廟門。問姓名，薩守堅也。與言夢，許諾。比歸，廟火，餘一大圓石鎮廟中。是夜，王復見夢文公曰：「業蒙公解，亡以爲謝。此去護國寺，風氣甚聚，福地也，公可居之。」後文公議以其地建學，卽舊學基也。大圓石，蓋真人以鎮蟒怪，今呼飛來石。按薩守堅，蜀西河人，少有利物心，學醫而誤，遂棄去，聞信州三十代天師虛靜先生及林侍宸、王侍宸道法，步往師之。至陝，行囊已盡，遇三道人，問堅所往，堅告之故。道人曰：「天師羽化矣。」薩方悵恨。一道云：「今天師道法亦高，吾與有舊，當爲作字，可往訪之。」遂授以咒棗之術。曰：「咒一棗，可取七文，但日咒十棗。」一道與之樓扇一，曰：「有病者以此扇之，立愈也。」一道則授以雷法。及達信州，投書天師，聞舉家慟哭，有虛靜先師手筆書

云：「吾與林王二侍宸遇薩某，各授以一法。授矣，可更授未盡之文。」薩由是道法大顯。後游閩中，一日諸神將現形，環侍云：「天詔召君天樞領位真人。」起身立化。

東觀山 在橫山後，逶迤而南爲縣治。下關山之麓，舊有東觀，今廢。前有洲，諺傳：「沙高則米賤，低則貴」，名米洲。又有潭名水東潭，亦曰浮橋潭。相傳潭中有天機洞，今失所在。五季黃端公避亂居此。端公詩：「青杉木笏尚初官，未老金魚是等閑。世上幾名多將相，門前誰有此溪山？」按端公，名子稜，字元威，洛陽人，隨父入閩，累官侍御史。

寶山 後有嶽山寺，左有黃花山。

勒馬山 與寶山相連，而山勢西來，右顧縣治，形如勒馬。山下有伏洲。古讖云：「睡龍驚馬出公卿。」睡龍，謂伏洲。驚馬，此山也。又曰：「山足有田，水推出元。」國初洲田被水推，邑人丁顯應之。山麓有玉斗庵，距庵五六百步，有樓絕高。永樂中，溪水大發，居民魚鱉，獨避此樓者盡活。今樓枋上，紀：「永樂十四年丙申秋七月十四日水浸至此」，意樓，宋元間物也。

翠屏山 考亭書院前山也。四時蒼翠。下一峰相連，其一稍高，類馬首，名蟹谷，亦名天馬芳洲。俯屬遠渚浮動，山蘊水中，隔溪望之，最爲佳境。右有羅漢山，羅漢之右，曰甕牖山。

玉枕山 白雲谷過佛嶺，而聳是山。考亭在其麓。謂之考亭者，唐黃端公葬父於此，以望先壠也。端公之父，爲故唐禮部尚書。又云，亭是侍中陳遜所建。未知孰是。然黃先墓在洛里，則當以陳爲正。宋朱韋齋游此，愛其溪山清邃，可以卜居。紹熙壬子，文公成先志，自崇安潭溪徙築，時年六十一矣。越年，學徒益衆，廣而居之，名精舍曰竹林。後更改曰滄洲。前作孔子燕居廟，匾堂中和，中奉孔聖，配以

顏、曾、思、孟，廡壁畫周濂溪、程明道、伊川、邵康節、張橫渠、司馬涑水六先生像，後增李延平爲七賢。文公與門徒晨夕禮拜，而自居其右。周垣之傍，若廟祝然。其尊奉聖道，可謂至矣。中和堂聯曰：「道迷先聖統，學誤遠方來。」則其自任之重，若有不得而辭者。「玉枕」、「翠屏」，皆文公所命。滄洲精舍，文公實卒是間。後有黃勉齋草堂，則勉齋構以與諸弟子居文公之喪者也。是有靖安、鷺峰、雲峰三寺。靖安寺，五代處士江爲故宅也。爲，江淹後，與里人劉侗爲友，學詩處士陳貺，游廬山，隱居白鹿洞二十年。其游廬山詩有「山形圍澤國，秋色藹人家」之句，爲時所稱。其自題則云：「詩吟蕭寺旃檀閣，醉倚侯家玳瑁筵。」南唐李景謂左右曰：「吟此詩者，大是貴族」，遂有時譽。爲卒，陳尹覺民哭之詩：「却憶當年江處士，解言秋色藹人家。」蔡元定被竄道州，文公與門徒出餞，亦在是寺。文公見元定舉止如常，歎曰：「朋友相聚之情，季通不挫之志，兩得之矣。」雲峰寺，有匙澗泉，田塍相湊如匙。而滄洲，在路壩，故名龍舌洲，文公命之曰滄洲。與玉枕山分支者曰王尺山，亦曰盤谷。文公九世孫格世居其下，曰獅子山。山下有鯉魚洲。

九臺山 在東南樟灘之上，縣口山也。麓有九臺庵。

庵山 界陽、甌二縣間。高聳萬仞，面勢十二。建陽有五高山：白塔、蒼山、洪山、大同山，庵山其一也。後唐時，有石處士名湖者，結庵其上。今山麓有雲際廟，神卽處士也。其像，就石鐫琢。絕頂有濡泉。山北有石號獅子巖，巖有靈泉，不盈涸，可愈病，名龍井矣。南峰有石平整，號龍壇。壇上疊石爲龕，中藏仙蛻。逶迤西去，又有小庵山、蘆嶺等山。

時山 山高五百餘丈，經十三曲折，始造其巔。唐末有虎踞一小佛置其上，天降甘露，雙松連理，有

朱道人者庵居焉。

蓮臺山 群峰環抱，中一小山，宛如蓮葉。山麓井泉甚冽，可愈眼疾。上有蓮臺水月庵。

焦源山 岌嶮削拔，登者曲折五里。《事林廣記》載：「此山爲第三十一福地。」舊志：「晉尹真人煉丹於此。」

雙牛山 背繞高峰，若雙牛接舞。山麓爲董巖庵。

五峰山 界順昌縣。

葛源仙山 山最高，上有方石如棋盤。元延祐中，樵者葛蘭翁，遇叟於此奕棋，傍觀至夕，叟曰：「盍歸？」言訖不見，至家三載矣。

洪山 當陽、甌之界。下有洪山廟，祀張式。式，邑人，唐末率鄉里禦盜，戰死，血漬地上，因名洪山。以音近「紅」矣。山下溪有灘，曰洪灘，險灘也。

黃楊山 朱文公於此山著述三藏，廬達、盧達兄弟受業焉。庵中文公題匾尚存。相傳匾時有夜光，僧以爲怪，金塗之，光遂絕。庵有一木榔，桐木也，材可以琴，亦文公時物。

太平山 縣發龍山也。去之三十里有寒泉林。朱文公母祝夫人墓在焉。林中有湖，曰天湖，飲之作翰墨香。文公築寒泉精舍墓傍，與呂祖謙編次《近思錄》於此。寒泉林之右，爲宋劉懋母墓。世傳文公與東萊夜讀，文公精神百倍，東萊竭蹶，自愧不及，爰詢。文公夜坐時，書几下若有物抵其足，據踏良久，精神倍旺。數歲後，一夕，忽見神人頭有目光百餘，云：「多目星現已。」嗣是，几下物不至，而文公夜分亦必就寢焉。又傳懋越鄉授徒，歲暮得七金歸，道逢孕婦携兒欲赴水死，問之。曰：「夫婦不相存，債迫到

此。」問債幾何。曰：「七金。」即解與之。及守歲，簞酒炙蝦，夫妻相對，了無愠色，且爲詩曰：「蝦小紅爐炙酒熟，布裙簞正歲之夜。」遂有續題其門曰：「門將金鎖鎖簾掛，玉鈎鈎居數日有。」以佳壤告者，曰：「金鈎掛玉簾」，形也。懋以葬母，而文簡燾、文安炳兄弟生焉。

崑山 界建、崇二邑間。高百餘丈。山上可數十畝，鄉人種西瓜，其長如枕，皮厚味甘，名曰枕瓜。

義寧山

蘆峰山 朱文公詩有「蘆山一何高，上上不可盡。須臾出蒙密，矯首眺無畛。東山切霄漢，首夏正妻繁。萬里俯連環，千里瞰孤隼」之句。後愛其幽勝，作草堂讀書，學徒從之，分列館舍，各就丘壑，具成而勢，號山口雲谷，爲《雲谷山記》曰：雲谷去縣西北七十里。蘆峰之巔處，地最高。群峰上蟠，中阜下踞，內寬外密，自爲一區。晝雲全入，即咫尺靡辯，眩忽變化，則如往莫知。乾道庚寅，予始得之。因作草堂其間，榜曰晦庵。谷中水西南流七里所，至安將院東，茂樹交陰，澗中巨石相倚，水行其間，奔迫澎湃，聲震山谷，自外來者至此，則已神觀蕭爽，入境覺殊。榜曰南澗。以識游始。循澗北上，山益深，樹益老。澗多石，底高下斗絕，曲折回互。水皆自高瀉下，長一二丈，短亦數尺，或詭匿側出，層累相承數級而下，時有支澗，自兩旁山谷橫注其中，亦皆噴薄濺灑。行里餘，俯人蒼翳百步餘，巨石臨水，可跂息。澗西危石側立，蘚封蔓絡，佳木異草，上偃旁綴，水出其下，淙散激射，特爲幽麗。下流曲折十數，騰蹙沸湧，西抵橫石，如巖罅者，乃曳而長，演迤徐去。欲爲小亭臨之，取陸士衡詩語，命以「鳴玉未暇」也。自此北去，歷懸水三四處，高者至五六丈，聚散廣狹，各有姿態，皆可以亭。又北捨澗，循山折而東行，脚底草樹膠葛，不可知其淺深，其下水聲如雷，計應猶有佳處，而亦未暇尋也。行數百步，得石壁高廣，皆百餘丈，瀑布當

中，下視澗中，諸懸水爲最長，徑當其委。跌揭而度，回視所歷群山，皆撫其頂，獨西北望半山，立石叢木，名豹子巖者，槎牙突兀，如在天表。然右瀑窮源，北入雲谷，則又已俯視之矣。谷口距峽爲關，以限內外。兩翼爲軒窗，可坐可卧，以息游者。外植叢篁，內疏蓮沼，梁木跨之，植杉繞徑。西循小山而上，以達於中阜，沼上田數畝，其東欲作田舍數間，名以「雲莊」。徑緣中阜之足，北入泉峽，歷石池、山檻、藥圃、井泉、東寮之西，折旋南入竹中，得草堂三間，所謂晦庵也。山檻前直兩峰，峭聳傑立，下瞰石池。東起層嶂，其脅可耕者數十畝，寮有道流居之。自中阜以東，可食之地，無不闢也。草堂前，隙地數丈，右臂繞前，起爲小山，植以椿桂、蘭蕙、荷蓀、岑蔚。南峰出其背，孤圓貞秀，莫與爲擬。其左亦皆茂樹修竹，翠密環擁，不見間隙，仰俯其間，不自知其身之高，地之迴，直可旁日月，臨風雨也。堂後結草爲廬，稍上山頂北望，俯見武夷諸峰，欲作亭以望，度風高不可久，乃作石臺，名以「懷仙」。小山之東，徑繞山腹，穿竹樹，南出而西，下視山前村墟，井落隱隱可指數，然亦不容置屋，復作臺，名以「揮手」。南循岡脊，下得橫徑，南卽谷口小山，其上小平，田疇卽以祈年，因命之曰「雲社」。經束屬杉徑，西入西崦。西崦有地數十畝，亦有道流，結茅以耕，曰「西寮」。其西山之脊，蟠繞束下，與南峰西垂相嚙，而谷口小山介其間，如巨人垂手，拱玩珠璧，兩源之水，合於其前，出爲南澗。東寮北，有桃蹊、竹塢、漆園。度北嶺，有茶坡。東北行，攀危石，履側徑行東峰之顛，下而復上，乃至絕頂。平處劣丈餘，四隤皆巖削，下前數百丈，使人眩視，悸不自保。俯而四瞰，面各數百里，連峰有無，遠近環合，彩翠雲濤，昏旦萬狀，亦非世人耳目所嘗見也。予嘗名湘西嶽麓之頂曰赫曦臺，張伯和父爲大書，甚壯偉。至是，知彼爲不足以當之。絕頂北下，有魏林橫帶半巖，木氣辛烈，可已痞疾，疑卽方家所用阿魏者。林下巖中，滴水成坎，大如梧槽，不竭不溢，里人謂

之「顯濟」，水旱禱焉。又下爲北澗，有巨石二，對立澗旁，嶙峋齒萃，古木彌覆，藤卉蒙絡，最爲山北奇處。里人名其左曰仁，右曰義。聞自是東北去，有瀑布出油幢峰下，石崖隙下，水瀉空中數十丈，勢尤奇壯。東南別谷，有石室三，皆可居。其一尤勝，比兩房，中通側戶，旁近水泉，可引以漱濯，然皆未暇往觀。自東嶂南出小嶺下數十步，有巨石巖巖，下瞰絕壑，古木叢生，樛枝橫出，是爲中溪。別徑下入村落，其中路及始入南澗。西崖小瀑之源，各有石田數畝，村民以遠瘠棄不耕，皆以貲獲之。歲給守者，以其餘奉增葺費，勢若可以無求於外而足者。蓋此山自西北橫出，以其脊爲崇安、建陽南北之境，環數百里之山，未有高焉者也。此谷自下而上，得五之四，其曠然者可望，其奧然者可居。昔有王君子思者，棄官棲道學，鍊形辟穀之法，數年而去。今東寮，其遺址也。然地高氣寒，又多烈風，飛雲所霑，器用衣巾，皆濕如沐，非志完神王氣盛而骨強者，不敢久居。其四面而登，皆緣崖，壁攀蘿葛，崎嶇數里，非雅意林泉不憚勞苦者，則亦不能至也。文公又有《雜詠》詩二十六章，《雜詩》十二首。山下有蔡文正書院。劉文簡文安兄弟亦築書堂其下，名曰雲莊。

西山 與雲谷對峙，周圍百里，四面峻削，而頂平曠。中有綠疇廣衍，舟楫通流。頂有石城遺基，蓋昔人築以避兵者，蔡元定少結廬山麓，忍飢讀書，時文公寓雲谷，每欲質疑，輒揭燈爲望，及至，淹留數日，通夕晤語。理宗寶祐乙卯，勅建西山書院，繪塑二賢對榻講道像，修飾燈臺，御書「西山」二大字，刻於西南崖山麓苔潭上。有化龍書院，文公門人劉韜仲曾孫應李所建，以開義塾者。邑人熊禾爲記。

五龍山 五脉分峙，中有小山，如五龍爭珠然。

蘭千山 與武夷山對。山半有石室可容五六十人。古木周列如蘭干。石室中，遠望之，隱隱牀帳、

几案之屬。懸棺仙葬，大類武夷。

大同山 高山也。周迴四十里，界建、浦二邑間。旁有一巖，仰觀三四十丈，瀑布下瀉，文公葬長子塾於山麓，曰梓林。山中有大同寺，唐會昌中，蕭、袁二師修行其處，人無知者。梁國公丘良居山下，屢得菜葉於水際，因尋源得二師，忽二虎驟至，師曰：「毋驚地主公。」虎叩頭去。良遂捨地立寺，寺名大蟲，後更名大同。窮崖絕壁，上有龍湫、虎跑泉，左有黃連峰。舊有姓羅者，修煉峰下，有巖名羅巖。巖半有龜峰庵。

畫山

天湖山 與畫山相連。山勢高聳，頂上平曠。有天湖庵。湖長二十丈，其深莫測。

三峰山

九峰山 九尖聳峙，下有大林谷，亦名後塘。文公葬所也。宋時有異人語文公曰：「龍居後塘，先生歸藏。」後文公果得地焉，以葬劉令人，而自規壽藏其側，名亭曰宰如，庵曰順寧。文公卒，合葬焉。其時學禁方興，時宰嚙言官，言四方偽徒，會送偽師之葬，非妄談時人短長，則謬議時政得失，乞令守臣約束之。其見嫉如此！又，崇泰里亦有九峰，蔡文正居山之麓，因以爲號，卒葬焉。

武仙山 舊傳有仙人武裝跨馬於上。今遺跡尚存，深可丈許。頂有石筍峰。石筍之北，有疊石如樓臺。

唐石山 卽大林谷也。山有石，方三四丈，厚五尺，平整如截。下摺三小石。中虛，可容人數百，相傳唐時異人架爲游息之所，每風雨驟作，聞鼓聲，名仙架石。後人名里曰唐石。宋謝枋得嘗寓是里。去

唐石三步許，有石長五丈餘，名笏石。枋得，字君直，信州弋陽人。寶祐中進士，奏名中乙科，除撫州司戶參軍，卽棄去。明年，復出試教官，中兼經科，除教授建寧府。未上，吳潛宣撫江東西，辟差幹辦公事。團結民兵，以紓饒信。五年，替出東方，枋得考試建康，摘似道政事爲問目，漕使陸景思上其藁於似道，坐居鄉不法，結民兵，時冒破科降錢，且訕謗，追兩官，謫居興國軍。咸淳三年，赦歸。德祐元年，呂文煥導元兵東下，遂屯建康，朝命枋得以江東提刑、江西招諭使知信州。明年正月，枋得以兵逆呂軍。呂軍馳至，射枋得，矢及馬前。枋得走入安仁，調淮上張孝忠逆戰。孝忠中流矢死。枋得遂奔信州。信州不守，枋得變姓名入建寧唐石山，轉茶坂，寓逆旅中，日麻衣躡屨，東嚮而哭。已去，賣卜建陽市中。有來卜者，取米屨而已。委以錢，率謝不取。其後，人稍稍識之，多延至其家，爲弟子論學。宋亡，遂居閩中。至元中屢薦，辭不起。二十四年，詔求江南人材，尚書留夢炎，以枋得薦。枋得遺夢炎書：「江南無人材，求一瑕呂飴甥、程嬰杵臼廝養，卒不可得。吾年六十餘矣，所欠一死，復有言哉？」行省參政魏天祐復使其友來言。枋得罵曰：「天祐仕閩，無毫髮推廣德意，反起銀冶病民，顧以我輩飾好邪？」及見，又傲岸不爲禮。與之言，坐不對。天祐怒，強之北。枋卽卽口食菜果。明年四月，至京師，問謝太后攢所及瀛國所在，再拜慟哭。已而病，還憫忠寺，見曹娥碑，泣曰：「小女子猶耳，吾不汝若哉！」留夢炎使醫持藥雜米飲進之，怒而棄之地，不食死。又同縣里，亦有南山。

毛虛滌山 秀拔冠群。皇朝永樂丙申七月大水，推出平衍，可坐五十餘人。

白塔山 山巔有石挺峙，黑白層分如浮屠。又夜火常明，亦名天燈也。山足，跨崇安、鉛山、邵武、建陽四邑，高不知其幾千仞。四麓皆有半山庵，以宿游人。上有三皇元君殿。殿悉鐵瓦，樓宇周遭。相傳

唐時，有三女修煉此山，丹成仙去。三女，曰錢鬱霄，曰劉永志，曰李氏女。貞觀辛丑，跡人呂師，獵獸山中，見三女奕石上，因坐觀之，女食以半桃。俄頃，獵具朽爛，歸家幾十年矣。鄉人因挽師引至其處，忽覩圓光百丈，三女昇天，遂號三皇元君，立靈濟院奉之。院前有飛來石，其一云：唐貞觀時飛至，其一飛自皇朝洪武間。又高頂有新庵，可觀初旭。又武山之陽，亦有白塔巖，亦以石巖如塔名之。山有洞，名雲巖洞，前井水清淺可掬。世傳三皇元君所斃，旱禱卽雨，可痊疫痢。洞口有試心、棋盤二石。又庖有湧泉，少選不汲，溢出井欄。又有龍井，蓋以板石，啟則風雨交作，戒啟甚嚴。俱在是山矣。

廬山 宋游文肅公生其下，今爲廬山書院。對山相近者，曰公裳山。

瑤峰山

岱障山 俗名大將頂。有靈泉，宋紹興二年，太守虞翔有疾，取飲隨愈。

象巖山 巖皆白石，高數十仞，曉望如積雪。蔡季通爲堂曰「顯慶」，讀書其中。紹興辛巳，季通於堂中，推演了孫世數，末有「數終輪奐猶有代，御史尹仁爲吹噓」之句。皇朝成化丙申，巡按御史尹仁入關，夜夢一老人來見。叩姓名，蔡某也。至建陽，訪蔡《家譜》，見顯慶堂推演詩，不覺悚然，卽捐俸爲建傳心堂。晉江蔡元偉曰：「周子出，則知數學者邵子；朱子出，則知數學者西山。」

靈泉山

桃山 蔡爐墓在其下，世傳四代出九賢。

集公山 舊名石壁山。宋江側聚徒讀書於此。忽一日，梁間墜梧葉一片，書「集公山」三字。俄復墜一葉，書云「公集諸賢於此」。旣又墜數葉，皆書「官」字。後側與群弟子，相繼登科如葉。祖洽、游酢、施

述，其尤顯者。

龜山 山頂有石如龜，山腰泉一綫出，曰龜山。宋崇安江灝、范元顥讀書於此。一日，山神告曰：「江當有官職，澤流後裔。范雖登科，未免於難。」言訖不見。後元顥登科，竟死於兵。灝歷守郴、象、南康諸郡，以高壽終。三子世祿，俱登科第。又，同縣里亦有龜山。

龍湖山 又名湖峰。上有古庵，朝大同山。而羅巖、黃連峰，左右排列，風煙益勝。庵內有井，冬夏不竭，舊有龍藏此中，水溢爲湖，故名龍湖。文公《與蔡季通帖》：「書堂高敞，遠勝雲谷、武夷，他時儘可相聚也。」

南山 與迴龍庵相對。宋謝枋得嘗寓此山之下，有《種竹詩》「參天引風挺蒼玉，匝地印月篩黃金」之句。

蒼山 一名龜嶺。絕壁摩空，與庵山齊。上有龔聖者庵，雨暘應禱，產茶亦佳。

高仰山 山巔若仰掌，其中有湖，相傳有逆龍藏其間。元季，僧古梅建仰山寺於此，虞伯生爲記。寺居林中，攀緣石磴，曲折五里許，始達山。後有鳳山庵，古梅與雲陽石塔在焉。古梅，名正友，貴溪人，出家分寧雲巖寺，徧歷江淮兩浙二十餘年。泰定甲子，與釋巖迎師入閩，閩山高仰，東南參學日滿其室，雲陽名德。皇朝萬曆時，僧兀坐董巖庵，不爐不扇，不就寢者三十餘載。己丑歲，邑大旱，出口誦經，甘霖隨注。

鐵帽山

竹原山 劉勉之舊隱，而朱文公問道之所。宋嘉寧中，曾松寓居是縣，慨想陳跡，作樂斯庵其傍，黃

勉齋爲記。松，字堅伯，章貢人。仕至江西帥參，敬賢樂善，有才廉之譽。

狀元峰 爲舊學對山。相傳山舊卑陷，邑人積土崇之，丁顯遂及第一。

霄峰 在洛田昌茂坊。宋尚書都官郎宋咸，建爲論著所，後移建同縣南山下，復廢。今在莒口。俞龍記曰：「宋公咸，以文武之才，天人之學，登天聖乙丑進士，補註《周易》及揚子《法言》。歐陽公修，歆羨其文不已。每仕一任，卽爲一集，宋郊、李泰伯名公，序其端。累官尚書都官郎中，疏輔有年。景祐甲戌，上疏乞骸，詔賜榮歸。明年，謀於鄉之洛田昌茂，有山疊聳，號曰霄峰，於焉開淵明之三徑，廣子雲之一區，前有講堂坐席，後有淨几明窗，揭曰霄峰精舍，屬予爲序。予謂公於賜老歸休之日，不作休休之亭。無意香山之會，學士經生雲集門下，病經則藥誦，叩問則鐘應，蓋其心之所存，欲講明聖學，傳道來哲，而以功安社稷，澤及當時者，尚未足流於無窮也。」

蓮源峰 峰下有崇福院，唐咸通中建。宋紹興中，暨存真來游，愛其山川清淑，乞地作庵。存真，甌寧水吉人，結廬仁德冲源。出入間常有朵雲覆之。時時爲人耕耘，雖絕炎歎，雲亦隨覆。值旱潦，頂香呼天，卽晴雨應期。人有疾病，飲以法水，無不蹶然者。庵居二十餘年坐化，形體不壞，異香滿室。元至正間，賜謚「定應通覺惠昭善濟大師」。每歲六月進香，四方雲集，其有不虔不蠲，地神往往示罰焉。

玉田峰 一名美女山。又名草山巖。三峰削玉，高插雲漢。中有鐵鑪嶺。山之陽，宋魏挾之居址在焉。峰下有龜山，舊有寺，宋陳軒讀書其中，及第後重游，有詩：「山樹似添新喜色，野猿猶聽舊吟聲。」

合掌峰 極西山，足跨邵武、順昌二邑。峰巒有庵，與南山庵相朝。

佛跡嶺 唐馬祖禪師出家始此。馬祖，漢州什邡人也。南嶽讓禪師法嗣第一世，四方禪誦，皆宗仰

之。稱爲江西道·禪師。石上有祖經，行跡如篆鑄，入建寺祀之，曰聖跡。

馬嶺 油嶺

油嶺 上有佛庵，舊傳石中出油，足供日燈。貪僧鑿之，遂絕。下有油洲，宋文公詩：「油洲巖下水冷冷，枕石何妨夢裏聽。要與他年成故事，漫尋幽處着新亭。」

郭巖 巖跨建陽、甌寧、順昌三邑。已見甌寧。

獅子巖 在凌雲寺後。山頂有石嘴懸出，類獅子。又北門外五里亭及庵山頂，亦各有石山名獅子。巖下有龍洞，洞有物如泥鰍，四足，號曰小龍。歲早迎致一二卽雨，上有龍王洞。

天湖巖 上有井水，清瑩不竭，因名天湖。

白水巖 上有飛泉百尺。又，庵山之麓，亦有白水巖。

仙巖 泉巖

鶴跡巖 巖中有鶴痕三處，下鶴卵二處，影各透入臨深壑。稍前爲龍爬巖，有龍爪痕。皇朝黃廷用謁文公墓，途中詩：「洞裡故留仙鶴跡，巖中猶隱卧龍紋。」

望日巖 廬山祠在其下。傍有羅公井，嘗有蒼虬吐氣，簫鼓之聲相聞。諺云：「蒼峰之東泉有靈，下亢空洞神功冥。」

桃源洞 一逕紆人，舊有小巷，植桃種竹，前後映帶。中有古塘，大旱不竭。傳聞其下有竅，直通大潭，人縣龍脉在焉。洞口有井，名桃源。厥泉甘冽，冬汲不冰，響如銅壺之漏。

白雲洞 今爲人家園囿。宋朱韋齋《招卓民表來白雲洞詩》：「剝啄渾無去客嗔，丁寧招換只懷人。」

南風殿角涼如水，來洗眼前朱墨塵。」

松岡 上多松，風撼之，有波濤聲。

鳥石 在縣治後街，巷名鳥石也。

巖嶺石 其狀如屋，高三百餘丈，可緣而登。

床石 在溪澗中，以形名。

龍石 石壁上有龍形，當脊脇間，非鑄非鑿，有紋如火焰，長二百餘尺。

印石 在永寧門外大溪中。

浮石 長二百餘丈。相傳此石遇漲，遠望如浮。

寶蓋洲 舊志：王審知叛將據其城寨，事敗，棄寶物溪中，溪雍爲洲，夜或光發，人謂寶光，呼寶蓋洲云。

川水利附。

雙溪 源出嘉禾里，達於考亭。至此分二支，會於交溪右支。皇朝永樂間，堙於洪水。

錦溪 在邑東，合劉源、芝坑二水，注而與建溪會，源淺而清，濯錦倍瑩，人擬之蜀錦江。皇朝永樂間壅淤。景泰中，知縣龍韜濬復之。

芹溪 源自硯山，而下盤流九曲，注於交溪，潺湲清澈。《事林廣記》謂其第三十一福地。文公有《九曲詩》。而六曲之上，則丘子野隱居焉。子野，文公表兄也，名義，字道濟，一字仁卿，時與文公往來問答，有《易說》傳於世。

油溪 源出油嶺。

考亭溪 源自麻沙、莒口，二水合流，從楮巖曲環玉枕峰後，右旋瀛洲五里。無灘瀨，淳溪考亭書院前，俗名書院潭。

將溪 一名玉溪。水出庵山，達於洪灘。

河船溪 俗傳溪心有古槎，上下鄉人立靈槎廟於此。

南溪 溪上有樟隱祠，祀祝和父先生穆，以和父嘗隱此。和父《南溪樟隱記》：「予卜居南溪上流之湍，有喬木一，蓋古之豫章而今名樟者也，其壽當三百餘載，大且二十圍，團欒偃蹇，庇及數畝，老根盤踞，高突如巨石礪砢。予因募工畚土，厚培其根，使平若一臺，可坐數客。久焉，根人土深，枝葉敷暢，午日不漏。五六月清陰覆地，暑氣不人，涼颼時來。方春稚綠競茂，藹若雲屯。及玄冥凍沍，此獨挺秀。余愛護封殖，遂名吾廬以『南溪樟隱』。暇日搜閱書篋，得晦庵朱子所書四大字，適契命名，模勒揭於廳楣。即其右，闢小室，又取朱子所書『歲寒』二字爲匾，以表古樟之雅致。室僅容膝，處勢最高，平挹翠嵐，下臨綠浸。隔岸擔簦負笈之行人，中流披簑鼓枻之漁父，皆可坐見衽席之上。予蓋於此讀書，以求聖賢之學，庶幾不負朱子疇昔教育之意。日力有餘，則取古人嘉言善行，手自抄錄，類成巨帙。窮年矻矻，樂以忘疲。其西，則小樓四楹，與廳對峙，又取南軒張子所書『藏書閣』三大字，揭匾樓上。雖予無資，聚書不能視鄰侯，乃予性健忘，舊日所讀，不復盡記，必藉檢閱，積久抽取，簡帙散亂，則次其甲乙，使如舊序，剔去蠹魚，燥以風日。蓋茲樓也，檢書則登，曝書則登，當其登時，窗櫺四敞，心目舒暢，至於秋霽爽豁，月鑑澄鮮，朔風怒號，雪絮飛舞，覺水晶宮闕，瓊樓玉宇，去人不遠，此皆樟隱之勝概也。噫！予而敢吾扉，涉吾庭，仰

而瞻吾區，銀鉤鐵勒有法度，則思其人，儼若先儒之臨其上，顧而見吾樟龍身虬柯，昂霄聳壑，則凜然歲寒之友，在吾側也。」

玉溪 源出陳源，達於長湍溪。嘗有怪，陳勝投以玉環，而怪息。

徐墩溪 源出五峰山，至此始通舟楫。

交溪 源有二：一出嘉禾里毛虛濂，逕崇泰里而下；一出崇安縣分水關，合武夷九曲水而下，交注於此，爲一大溪。唐翁承贊過是溪，遇僧亞齊，贈詩曰：「蕭蕭風雨建陽溪，溪畔維舟見亞齊。一軸新詩劍潭北，十年舊識華山西。」

武溪 源出毛虛濂山，合長平溪，合於交溪。宋游輔、游儀皆隱是溪之上。輔，風調散逸，爲詩清勁，而不刺譏當世事，自號「溪釣翁」。儀，早游京師，縱覽名勝。已，浮洞庭，過武昌，有題《黃鶴樓詩》，膾炙人口。輔、儀皆定夫先世也。

長平溪 源出毛虛濂，達於交溪。

莒口溪 源出蒼山、仰山。

化龍橋溪 源出鰲峰山。

龍門橋溪 源出雲谷西山。

馬伏溪 源出大同山。

具墩溪 源出埧頭鑑源。

碗窑溪 源出蘆嶺。

鄭灘 洶湧如雷轟。

樟槎灘 在蓮臺山下，頑石森列。舊不通舟，元季鑿之。舟行最險。

螺子灘

潮灘 小澗灘也。劉文簡公生時，其灘子午有潮。

走馬灘 九石灘

蓮湖

贅湖 以爲溪之別派，因以贅名。

龍潭 相傳有二龍潛其中。一日，見夢里人口：「此地人稠，從此辭矣。」翼日，陰雲四合，二龍飛昇去。

洗馬窟

靈泉 泉出石罅，能愈疾病。一在均亭里，一在永忠里。

開福寺井 地勢最高，大旱不竭。舊志：宋建炎井水湧溢，民遭范汝爲之亂。乾道丁亥又溢，而歲荒。

皇朝永樂丙申又溢，而縣水。

虎井 昔有高僧，術能降虎。虎爲跑井，因以名庵曰虎井。

鐵欄井 在縣治北街。舊傳薩真人投鐵符井中，晨汲之，可愈病，鄉人鑄鐵爲欄。

水月井 盤谷井

〔校記〕

〔一〕「凡統圖二百有六」，下文實列二百零七圖。

〔二〕「闌干」，各本原作「欄干」，據下文及《八閩通志·地理》改。

〔三〕「交溪」，各本原作「文溪」，據下文及《八閩通志·地理》改。

〔四〕「薦山」，各本原作「薦山」，據下文及《八閩通志·地理》改。

閩書卷之十五

方域志

建寧府 崇安縣一〔一〕

崇安縣 在郡城西北。東抵浦城，西抵江西鉛山縣，南抵建陽，北抵浙江溫州府、江西上饒縣。本晉建陽縣地。唐嗣聖五年，析置溫嶺鎮。唐爲崇安場。宋淳化五年，升爲縣。元仍舊。皇朝因之。其鄉八，轄一十九里，〔一〕凡統圖八十又二。〔三〕

武泰鄉

四隅里，圖十一。山曰白華、登高。溪曰崇溪、雙溪。深曰百丈。

石雄里，圖六。山曰金印銅魚。峰曰七賢、狀元、騰雲、白雲。嶺曰溫嶺、牛輓、佛嶺、小漿，〔四〕南嶺、大安、查木、梨木、分水。溪曰漿溪。井曰高禽龍井。

新豐鄉

石白里，圖三。山曰黃石、席帽、岑陽、銅鼓、濟拔。巖曰黃洋。岡曰石龍。石曰金鷄、張源。潭曰萍潭。吳屯里，圖四。山口金籠、馬鞍。巖曰瑞巖。石曰腰帶、卯齋。溪曰浴水、寺溪、新豐。潭曰碧潭。泉曰甘泉。

大渾里，圖六。山曰檜巖、白石、白巖、銀山、蓋里。嶺曰小源、柯嶺、檀香、枯樹、蕉嶺。巖曰白花、望仙。澗曰飛鵝、大小二。澗。井曰許塘。

新塘鄉

黃栢里，圖四。山曰葛山、〔五〕橫山、三髻、虎踞。峰曰馬頂、〔六〕嶺曰棠嶺。巖曰仙人。石曰仙人。洞曰圓通。溪曰黃龍。洲曰師姑。

武夷鄉

上梅里，圖四。山曰寂歷。嶺曰中峰。溪曰潯溪。

會仙里，圖七。山曰武夷、峽山。峰曰壽鶴。溪曰九曲。灘曰磨灘。

下梅里，圖四。山口清泉。溪曰梅溪。

上仁義鄉

黃村里，圖一。峰曰超峰。

將村里，圖五。溪曰柏溪。

周村里，圖一。山曰同龍、白塔。溪曰黃沙。洲曰治州。

下仁義鄉

建平里，圖三。山曰百丈。巖曰九井、紫微、陶真。石曰試劍。

豐陽里，圖六。山曰竹湖。峰曰蘆峰、青鸞。灘曰天灘。

節和里，圖七。

開耀鄉

從籍里，圖五。山曰寨山、董山。峰曰白石。嶺曰梅嶺、崇嶺、南源。巖曰西巖。溪曰黃石、籍溪、瞿溪、金斗源、瀑布。

外五夫里，圖二。山曰西山、仙洲、屏山、拱辰、仙亭、嘯天、大土、龜山、梨嶺。峰曰金鵝、雙峰、隱屏。嶺曰西坑、紫嶺。巖口

北巖、隱仙。石曰鵝籠。溪曰潭溪、嵐溪。潦曰白鵝。潭曰馬膏。

崇政鄉

長平里，圖二。

山拔千仞，溪迴九曲。諸儒集爲文藪，群仙戲於靈囿。閩邦魯國，欲界天都。其形勝也。

山

武夷山以望山，故首列。閩祀山也。去縣南三十里。《列仙傳》云：《茅君內傳》：仙家有三十六洞

天，武夷第十六昇真玄化洞天也。相傳彭祖隱居此山，有子二人，曰武，曰夷，繼之，故名武夷。又云：昔有仙人降此曰：「予，武夷君也，統錄地仙，受館於此。」《古武夷記》曰：武夷君食緇蕤皓本，注云：「緇蕤，苕也。皓本，根也。又云有皇太姥母子二人來居此山，神星之精也。秦人呼曰聖母，衆仙尊曰皇太姥。又《雲笈七籤》云：武夷洞天，真人劉少公治之。又云天台山元虛老君華真仙師，遺其第七子名屬仁者，駕鶴入武夷山中，校定仙籍，遇國主有子名壽者，裸而不衣，集猴蠶爲裳，修行此山有年歲矣。里中叟張湛、孫綽、趙元奇、彭令昭、劉景、顧思遠、白石先生、馬鳴生并女子胡氏、李氏、魚道超、道遠，凡十二人，同詣拜壽。適天旱，請壽禱雨，壽曰：「裸也，安敢見天帝？」衆因爲衣衣壽，壽更衣登天柱峰而禱。遇屬仁過此，遂濡雨澤。壽與湛等因得謁見屬仁。見壽等丰骨異常，訪道精確，乃遣仙童何鳳兒往天台山，校

視仙籍，具載竊與湛。先以酒過忤黃元真人，謫居於此。後八百年，方得仙化。於是賜九品丹書，授以換骨之法。秦始皇二年八月望日，竊設宴會鄉人峰頂，召男女二千餘人。如期而至，橋梁跨空，魚貫以登峰頂，結綵屋幔亭至數百，珍珠間飾，輝煥玲瓏，中設玉皇座，西設皇太姥，東設武夷君，而竊亦自設坐其次，悉施紅雲、綉紫、霞褥。少頃，空中有讀者，使男女以次進拜，並呼爲曾孫。拜畢，竊抗聲語曰：「汝等各安好，曾男孫坐東，曾女孫坐西。」其中亭有青綾帷屋，陳設樂器。又聞讀者命鼓師奏鼓，管師吹橫笛，拊節板，於是東幄奏《寶雲左仙》之曲。次命絃師彈箏篴，撫長歌，於是西幄奏《寶雲右仙》之曲。乃命行酒。酒至，又令彭令昭唱《人間可哀》之曲。歌罷，綵雲四合，環珮車馬，浮空有聲。又聞讀者云：「玉皇太姥與曾孫別，可再拜速去。」少選，風雨暴至，跨空橋板亂飛，橫插巖穴間，仰望山頂，了無所有，於是閩中聞之，諸君長並來禮竊，求不死藥，竊亦尋坐化矣。陸鴻漸《武夷山記》云：武夷君，地官也，相傳於八月十五日大會村人於武夷山上，置幔亭，化虹橋通山下。村人既往，是日太極玉皇太姥、魏真人、武夷君，三座空中告呼村人爲曾孫汝等若男若女。呼至，乃命鼓師張安陵等作樂，行酒令，歌師彭令昭唱《人間可哀》之曲，其詞曰：「天上人間兮會合疏稀，日落西山兮夕鳥飛歸。百年一餉兮志與願違，天宮咫尺兮恨不相隨。」漢武帝遣使築壇祀武夷君，羞用乾魚。宋紹聖二年旱禱，武夷君現相紫雲中，甘露大注，封爲真人。其後別封顯道慈和冲元真君，皇太姥今稱太元夫人，屬仁今稱控鶴仙人。遇，古國名，今延平地，訛爲「魏」也。十二仙中，張湛，或後張仙巖所載漢人張垓者耶？宋浦城楊翊游武夷，每至勝處，必有題詠，旣歸，有道士挾刺來謁，刺稱「張湛」，翊令子弟館之南園，當夜月明如晝，道士長嘯池上，須臾雲氣慘淡，清飈四起，雙鶴嘹唳，遂失所在。明以告翊，翊曰：「此豈武夷山十三真君，所謂張湛白馬者哉？」取刺視

之，乃白赫號矣。顧思遠者，鍊丹於政和縣之滿月山，年百二十歲，白日飛昇。白石先生，見下白石山。魚道超，見政和縣澗山。宋時累封，爲冲妙孚惠真君。端平間，以雨禱應祈，并封湛爲顯應真君，緯爲靈應真君，元奇爲妙應真君，令昭爲冲應真君，景爲嘉應真君，思遠爲靜應真君，白石先生爲善應真君，馬鳴生爲惠應真君，胡氏爲普應真君，李氏爲慈惠真君，魚道超爲助應真君，魚道遠爲順應真君，而中奢舖人有潘遇者，給奉十二仙爲從人。端平間，亦封通靈協濟侯配享焉。去山南十里，有魏王故城，舊所築也。中有王城廟，鸞蜺顯尚存，頂紋裂橫豎兩理，後有回文如「壽」字，福人見之則紋跡漸紅，見黑者凶。皇朝嘉靖末，御史樊獻科送歸大藏巖，以止人惑。至巖穴中，所插橋板，間有墜下者，頗類沉香木，人患嘔泄，磨服即愈，不知是何木也。山下有宮，曰冲祐萬年宮。蓋漢設壇處，唐始屋之，曰武夷觀。玄宗遣顏行之祀仙茲山，行之刻石云：「大唐天寶七載，歲在戊子，七月，封名山大川，登仕郎顏行之記。」凡二十四字。觀，故在洲渚間，南唐李後主弟良佐篤慕希夷，訪道此山，後主勅有司移建今址，賜觀名「會仙」，自金陵鑄鐘，航海來置，環山悉禁採捕，因勅封良佐爲演道冲和先生。宋太宗御書「冲佑」二字，爲觀額。祥符間，賜田若干畝，增修屋宇三百餘楹。元祐間，賜錢八十萬，田四十頃。紹興間，賜田五頃。元天曆間，改觀爲宮，加「萬年」二字。皇朝仍爲觀，中有漢祀亭、拜章臺。有司歲以中秋祭觀。左爲會真廟，宋政和二年賜額同亭舊址也。同亭，占時所建，以祠列仙，謂其同與幔亭之會也。《楊億家集》載：「真、神、哲三示，皆自十三仙中出世。真人吳懷玉，亦嘗醉中指武夷君像曰：『應世人主，實在戊子。』」未幾哲宗登極，果符其年。又指魏真君像曰：「三十有八載，當撫平四海。」後果然。是以陳覺民過武夷詩云：「昇真洞口接天門，靈草丹花日日春。聽說列仙來瑞世，三朝德澤在斯民。」又王桢有歌云：「列仙高拱兮宅玄都，三聖

繼德兮恢炎圖。扶斯世於平，又應皇都兮瑤符。『懷玉，邑新豐鄉人，生平曠達，行坐間，輒閉目曰：『世無足觀。』人因號爲渺翁。年九十六，無疾而化是山也。有晉郭璞題識：『黃岡降勢走飛龍，鬱鬱蒼蒼氣象雄。兩水護纒歸洞府，諸峰羅立拱神宮。林中猛虎橫安跡，天外狡狴對面崇。玉佩霞衣千百衆，萬年仙境似崆峒。』顧不似晉人語意，好事者附會矣。』宋劉斧《武夷山記》：『山周遭百二十，東南枕流水。一水北至，一水西來，湊大王峰前，合流爲建溪。其山東望如樓臺，南視如城壁，西顧如庑廡，北觀如車蓋。峰巒巖岫四十餘所，峭拔奇巧，高下相屬，吞吐雲霧，草木蒙茸，寒暑一色，岸壁紅膩，稜疊可愛。』朱文公爲道士高文舉作《武夷圖序》曰：『武夷着自漢世，祀以乾魚，不知何神也。峰巒巖壑，秀拔奇偉。清溪九曲，流出中間。兩岸絕壁，往往有枯查插石罅間，以皮舟船棺柩之屬。柩貯遺骸，外列陶器，尚皆未壞。頗疑前世道阻未通，川壅未決時，夷落所居，而漢祀者，卽其君長。蓋亦辟世之士，生爲衆所臣服，沒傳爲仙也。今山之群峰，最高且正者，猶以『大王』爲號。半頂有小丘，此卽君長之居耶。』元熊禾《昇真觀記》曰：『武夷山，閩鎮也。是曰昇真玄化洞天。舊記厥初有神星降，曰『聖姥』。母子二人，始居此山。又有神稱武夷君者，三代以前，越在要服，固荒遠難證。大抵太極氣化，其始也。挺生一二至人，爲一方民祖形化。而後，生類益衆，則其間有材德絕異者，衆臣服之，以長其地，故謂之君。上古以來，如姜嫄之棄，簡狄之契，與巴蜀之蠶叢魚鳧，杜宇開明，載在傳記，皆其類也。又世傳魏王子騫，城潼川時，有張湛、劉景等十二人受地爲氓，後皆避秦而仙，而武夷君幔亭之宴，亦在嬴政之二年。按閩地至秦，始列爲郡，時秦威虎視，六合震動，英雄志業，無所成就，棲真至道，而神其說於爲仙意，當時亦不但穀城桃源而已。』皇朝李元陽《游記》：『天下山水，至武夷諸峰，奇詭極矣。五陵之內，山之最大者，百里同形；小者亦數十里

同狀，良以地脉相貫，形狀難殊。獨武夷諸峰，十里之近，九曲之內，變幻百出，姿態橫生，或連脊異形，或一山兩狀，一挾舵而圭壁改觀，一轉盼而方圓異質。兜鑿劍戟，舞馬蹲獅。倉廩設而貓窺，屏嶂陳而人立。人幽壑而得耕稼之場，度石罅而有藏修之地。布列盡乎天巧，體製疑於人爲。游觀至此，將謂造物者有獨私矣。」唐李商隱詩：「只得流霞泛一杯，空中簫鼓當時回。武夷洞裡生毛竹，老盡曾孫更不來。」宋楊億詩：「靈嶽標真牒，孤峰入紫氛。藤蘿暗仙穴，猿鳥駭人群。古栢千年在，懸流萬壑分。漢壇秋藓駁，曾祀武夷君。」楊時詩：「函關崎嶇走秦鹿，天下共逐爭群雄。扶雲翻空折鰲足，黔黎竄伏如寒蛩。武夷山深水清泚，避世合有高人蹤。龍泓東注海波湧，玉女翠擁秋雲鬆。藏舟浮梁跨絕壑，隱見似與天河通。當時鷄犬不復見，空巖依舊煙霞籠。我來秋杪月既望，尚有幽菊埋榛叢。天容洗淨雨初霽，雲幙四捲清無風。掀蓬進棹窮異境，注目想見流殘紅。回船杖屨躡幽徑，松竹窈窕環琳宮。翠琬溫辭輝華袞，金榜大字纏蛟龍。自憐病骨猶塵網，幔亭高會何由逢？解衣歸卧釣磯畔，仰看明月穿疏蓬。」李綱詩：「清氣盤迴作武夷，峰巒窈窕白雲飛。重游未了平生興，六幅輕綃畫得歸。」朱熹詩：「美舟緣碧澗，棲集靈峰阿。夏木紛已成，流泉注驚波。雲闕起蒼茫，高城鬱嵯峨。眷言羽衣子，俛仰日婆娑。不學飛仙術，纍纍丘塚多。」朱大卿詩：「開秋微氣肅，天水湛相照。扁舟愜幽尋，層峰入窈窕。融結幾何年？指顧集群妙。神仙得非幻，遺蛻在巖竅。行往求其蹤，恐墮識者笑。獨鶴去不還，山猿偶然叫。應有採芝人，凌雲發長嘯。」陸放翁詩：「山如嵩少三十六，水似邛崃九折途。我老正須閑處看，白雲一半肯分無？」元薩天錫詩：「溪行望武夷，峭壁何嶄絕！赤霞爛不收，大化元氣泄。下有萬年松，上有太古雪。祇恐月明中，鑊笛吹石裂。」王仲敬詩：「紫簫鍊笛和雲吹，白鶴松巢帶露棲。九曲洞門無鎖鑰，一溪春水出來遲。」

陳元英詩：「斑石濕餘蒼蘚雨，白雲收盡碧山風。柱頭歸鶴無人識，門對寒流霜葉紅。」皇朝劉基詩：「飲馬九曲溪，遙望武夷峰。長林青繚繞，丹崖造空濛。浮暉澹寒翠，水木皆曼容。薄游限塵務，足景尼奇蹤。緬懷紫陽子，千載誰與同？」其二：「崇山奠朱維，寔維群山囿。蔥蘢薄光景，隱顯變氣候。百泉縈虹蜺，萬谷蒸饋饒。深根入無底，峻表切星宿。嶂峻削劍戟，窈窕錯錦繡。騎雲擘高掌，寶石室陰獸。金鷄鳴未晨，玉女來自逗。琪樹縞玄霄，瑤花落清晝。美人游不還，霜月怨猿狖。淒涼駕壑槎，蕪沒白玉樞。蓬萊渺滄海，弱水浩漫溜。良辰不可掩，沉思令人瘦。」王偁詩：「扁舟下溪口，薄暮煙沉沉。群峰暝色秘，九曲寒流深。不見幔亭君，徒懷笙鶴音。雲霞結飛薨，風雨生平林。」其二：「半生慕名山，十年阻登臨。長懸紫宮戀，未遂滄洲心。豈伊真仙源，避我塵跡侵？回轆發長嘯，起坐鳴吾琴。」蘇伯厚詩：「笑入松門鶴警迎，山靈好客更多情。西風一路松花雨，纔上仙舟便放晴。」羅倫詩：「紫雲初曙彩雲飛，碧水丹山面面奇。一棹煙霞看不盡，扁舟何用五湖歸？」孫一元詩：「武夷山高秋意涼，雲陰半落松桂蒼。青壁無人沿月上，蹋船放歌溪水長。」其三：「野鶴照水來清瀟，山樹開花留白雲。他日移居溪水上，道衣同拜武夷君。」蔡汝楠詩：「羽人昔騰化，舟丘留遺筌。乘吾世網暇，獨往凌蒼煙。縱橫標列峰，縈迴襟流泉。翠幄開嶂亭，玄宮藏洞天。深巖匿光晷，遠江瀉長源。霞姿溢林蔚，水色浮山妍。方欲窮登頓，仍懷歷迴沿。聳輿微霄上，寄顏青雲巔。杳冥朋儕絕，翻令懷所憐。」

峰三十六

大王峰，上哆下削，上土下石。宋劉斧記：「在山東南，方圓一千里，高五千丈，一面向東瞰北溪，一面向南瞰西溪，峰南有路可升，但高處危絕，須編梯索節級而上。近頂有天鑑池，至頂有投龍洞。洞門小

而直下，縋綆百二十丈，廼可至水。每朝遣使投金龍玉簡，悉詣其處。峰上頗有嘉竹，多虬屈如龍蛇。又有仙橘，小者如彈丸，其皮可食，大者如鵝卵，味尤甘。又有仙李，如小鳥卵，長而赤色，味亦酸美。又有仙荔枝，叢生密結，成朵可食，但差小耳。又有仙栢古翠可賞，自餘異草嘉木，多不能名。《雜記》曰：「魏王子騫得道此山，遂化開是石與衆仙居，其中別有天地，日月星辰，五嶽四瀆，與世無異，斯可信矣。」金龍玉簡，宋理宗嘉熙元年詣投，用以祈嗣遏虜。其文云：「伏以元儲，虛位未開熊夢之祥，邊關分屯，尚調虎符之戍。內欲隆於國本，外思靜於兵氛。仰惟祖宗積累之艱，深切朝夕繼承之懼。是用肆類上帝，徧禱名山，願垂覆幬之仁宏，賜扶持之力。得男而應，震索茂延百世之期，偃武而致，泰平坐底四方之治。保基圖於鞏固，措民物於枚寧。祇迓靈休，永依大造。」簡長尺許，書刻並精，道士猶獲藏之。宋末道上游道淵、江妙靜、妙正，鑿崖置梯，累石爲門，建樓閣殿宇二層，上奉太上老君，中祀十三仙，下棲道衆。殿東南爲通天臺，又名禮斗壇。奏請賜觀名曰「昇真」。熊禾爲《記》，見前。皇朝羅倫有詩：「大王峰上玉皇家，綵屋紅雲襯紫霞。老盡曾孫今又古，東風空醉碧桃花。」峰石有望鶴臺，一名禪巖，昔有僧坐禪於此。下有止止庵。宋白玉蟾記：「武夷山，蓋錢鏐於此煉丹。第一峰，九曲溪頭，最初曲其地也。晉婁師、鍾唐、薛邨，皆棲真於此。東京李陶、洛濱李鐵笛、燕山李磨鏡，相踵卜築，名庵曰止止。自爾傾壞，山南曾孫詹琰夫，字美中，豪傑人也。一旦結方外友，同爲爐竈砂汞之學。瓊瑋白玉蟾，自廣閩而至，適契臆素，從搜訪庵地，闢幾百年不踐之苔，剗三五里延蔓之草。歲在嘉定丙子之王春，鳩工斲梓，僦夫運甕而開創之。未幾，白玉蟾拂袖天台、鴈蕩去，言旋庵成，而美中強之記。」玉蟾既紀庵之勝，記末復引《周易·艮卦》「兼山」之義，《法華經》「止止妙難思」、《南華經》「吉祥止止」之文，以証妙義云。按《記》所稱婁、鍾、

薛、李，俱無可考。獨李陶者，宋熙豐間至武夷觀，出祠牒，蓋唐開元時牒也。氣岸落落，好吹鐵笛。遇節臘，道衆各於雲房招飲，陶皆赴之。諸房笛韻，同時並作，皆穿雲裂石之音。嘗同游溪上，忽投深潭，衆駭愕，急回則見陶鼾睡榻上。後又煉丹建平里之通仙巖。一日，別衆留詩，吹鐵笛隱隱去。又東陽人黃咸中嘗假宿庵中，夜半有道人月光中來，坐盤石呼語曰：「君名在仙籍，吾且授君秘法。」出書一卷，銅印方寸，其文乃清微訣法，曰：「佩此可濟世延年。」時有綵雲捧月，遂令更名慶雲，仍約曰：「精進勒修，七十年後當再會此。」咸中再拜，問姓名，答曰：「東南子。」即騰空去。咸中自是棄家，遍游名山，參求至道，住洞空山二十年，後回武夷蛻化，時年九十，乃符其約矣。幔亭峰，在大王峰北，峰相屬，高稍亞之，頂甚平曠，子騫宴曾孫處也。與宴者皆登上壽也。皇朝王恭詩：「鶴岑夏天開洞門，仙翁騎龍宴曾孫。曾孫大宴仙翁別，木魅鮫童吊溪月。葛花濛濛簾竹荒，石雲紫蕨參差涼。銀灣逗航嘯蒼突，玉函千年蛻金骨。峰頭藥草九節香，胡麻作飯與君膏，待君騎魚還故鄉。」下有皇朝理學四先生祠。四先生者，浙王文成守仁、嶺南湛文簡若水、江右鄒文莊守益、毗陵唐荆川順之也。文成以言事謫龍場驛丞，行至錢塘，中官劉瑾遣人隨偵，偵者微示文成，意文成托言投江自脫。因附商船欲游舟山，偶颺作，一日夜至閩界。比登岸，巡海兵疑其狀，奔山徑數十里。是山多虎，山中有寺，寺故不納暮客。客無所宿，則宿於寺旁空廟。虎夜殺人，旦而寺僧得其資矣。是夜文成竟投空廟。虎繞廟大吼，竟不入害。旦僧入見文成，熟寢香案下，扣其足曰：「公異人也。」延入寺，寺有道士嘗識文成於鐵柱宮，約二十年相見海上。至是，出詩相示，與論出處，因爲著得《明夷》之卦。遂決策返。乃取問道游武夷，爲詩曰：「肩輿飛度萬峰雲，回首滄波月下聞。海上真爲滄水使，山中又遇武夷君。溪流九曲粗諳路，精舍千年始及門。稍待還家慰垂

白，細探更擬在春分。」若鄒、若湛、若唐，皆嘗游此者也。獅子峰，狀如獅子。兜鍪峰，一名兜鍪石，

一名賭婦石。前高後下，形如武胄。西北有穴，內藏一舟，名閭船巖。下有蔡九峰杭詠歸堂、江三白常庵。詠歸堂，今爲祠。三白，名師隆，建陽人，修道武夷山，得雷霆秘術，能致晴雨。紹定間，錢塘水孽爲患，詔宣赴闕，能止潮湧，授金門羽客。既歸山，御書「常菴」二字賜之。仍勅建州守臣爲建堂樓房廡爲願真所。後遂藏劍於斯。玉女峰，三石差肩而立，其色紅潤，絕頂花草，氍毹如鬢髻，前有粧鏡臺、仙冠石。三髻峰，在玉女峰後，俗呼三娘峰。凌霄峰，在玉女峰右。勒馬峰，在玉女峰側，即粧鏡臺頂。其石迴轉，狀如勒馬。虎嘯峰，在玉女峰南，昔有虎嘯其上，頂有崇真庵及蔡九峰、沈南山書堂舊址。九峰《山中詩》：「才既非時須，性本愛岑寂。決策名山游，幽隱遂成癖。春風百花紅，秋月千嶂碧。煙霞結綢繆，猿鳥日嘯昔。」攬石峰，在虎嘯峰南。兩石攬結高聳，其東從巖縫中累石疊梯以上絕頂，寬平蔥鬱，有隱築遺基。三才峰，在一線天南，與靈巖對。三峰排立，有飛泉、石門之勝。北斗峰，在三姑石後，七峰相連如斗柄。小藏峰，在三曲溪南，巖半數處衍斷，其間，或插木皮板，望之如櫛。又有黃心木函，藏十三仙蛻，中有小藏巖，巖上有仙學堂，一名仙館巖。崖壁迴合，中敞石室，几案布列，若仙家翰墨之館。大藏峰，在四曲溪南，峭壁臨淵，穴開壁上。石如器者，若筍，若筐，若杵，若盤。鷄窠巖在其半。車錢峰，在四曲溪北，與大藏峰對。上有白玉蟾丹竈。舊記云：昔聖姥鞭牛車載錢於此。昇日

峰，在車錢巖側，晨旭照映，金光閃爍，下有金光石。上昇峰，在昇日峰右，一名紫峰。其色青紫。相傳張真君於此上昇。隱屏峰，在五曲溪北，頂有玄元道院，下則朱文公精舍在焉。文公自爲序：「武夷溪東流九曲，第五曲最深。蓋其山自北而南者，至此而盡，聳全石爲一峰，拔地千餘尺。上小平處，微載土，

生林木，極蒼翠，四隕稍下，則反削而人，如方屋帽者，所謂大隱屏也。屏下兩麓，坡陀旁引，還復相抱。抱中，地平廣數畝。抱外，溪水隨山勢從西北來，四屈折而出，溪流兩旁，丹崖翠壁，林立環擁，神剌鬼刻，舟行上下者，方左右顧瞻錯愕之不暇，而忽得平岡長阜，蒼藤茂林，按衍迤靡，膠葛蒙翳，使人心目曠然以舒，竊然以深，即精舍所在也。直屏下，兩麓相抱之中，西南向爲屋三間者，仁智堂也。堂左右兩室，左曰隱求，右曰止宿。左麓之外，復前引而右抱，中又自爲一塢。因累石以門之，而命曰石門塢。別爲屋其中，以俟學者之群居。取《學記》『相觀而善』之義，命之曰觀善之齋。石門西少南，又爲屋，以居道流。取道書《其誥》中語，命之曰寒棲之館。直觀善前山之巔，爲亭回望大隱屏最正，且盡取杜子美詩，名以『晚對』。其東出山，背臨溪水，因故基爲亭，取胡公語，名以『鐵笛』。說具本詩注中。寒棲之外，迺植援列樊，斷兩麓口，掩以柴扉，匾曰武夷精舍，經始淳熙癸卯之春，其夏四月堂成而始來居之。四方朋來，莫不歎其佳勝，而恨他屋之未具，不可久留也。釣磯、茶竈，皆在大隱屏西。磯石上平，在溪北岸。竈在溪中流，巨石屹然，可環坐八九人，四面皆深水，當中科臼，自然如竈，可爨以瀹茗。凡溪水九曲，左右皆石壁，無側足之徑，惟南山之南，有蹊焉。精舍乃在溪北，以故凡出入此者，非漁艇不濟。總之，爲賦小詩十二篇，以紀其實。若夫晦冥昏旦之異候，風煙草木之殊態，以至人物之往來，猿鳥之吟嘯，則有一旦之間，恍惚萬變，而不可窮者。同好之士，其尚有以發予所欲言哉！」韓元吉爲《記》：「武夷在閩粵直北，山勢最雄深盤礴。其峰之最大者，巋然若巨人，戴弁綠隙，磴道可登，世傳避秦而仙者蛻骨在焉。溪出其下，絕壁高峻數千丈，岸側巨石林立，磊落奇秀，平衍景物環會。山故多白鷗、鷓鴣，聞人聲或磔磔集崖上，散漫飛走，無驚懼態。水流有聲，其清處可泳，竹栢叢蔚，草木敷華。予舊家閩中，兩官建安。吾友朱元晦，居

五夫山，去武夷一舍而近，若其後圃，暇則游焉。與其門生弟子，挾書而誦，取古詩三百篇，及楚人之辭，哦而歌之。瀟洒吟咏，留必數日，蓋山中樂，悉爲元晦私也。淳熙十年，元晦既辭使節於江東，遂賦祠官之祿，則又曰：『吾今營其地，果盡有山中之樂矣。』蓋其游益數，而於其溪之五折，負大石屏，規之以爲精舍。奇石佳木，拱揖映帶，若陰相而遺者，使弟子輩具畚鍤，集瓦木，相率成之。元晦躬畫其處，中以爲堂，旁以爲齋，高以爲亭，密以爲室，講書肄業，琴歌酒賦，莫不在是。夫元晦，儒者也。方以學行其鄉，善其徒，非若畸人隱士遁藏山谷，服氣茹芝，慕夫道家者流也。吾夫子，聖者也，其步與趨，莫不有則，至於登泰山而樂舞雩，而一時弟子，鼓瑟鏗然。春服既成之詠，獨爲所予，古之君子息焉游焉，豈以是拘哉？元晦既有以識之，試以告夫來學者，相與酬酢精舍之下，俾咸自得其視慢亭之風，何如也。今精舍爲祠，祀文公，以黃榦、蔡季通、劉燾、真德秀配祠。側有伏羲洞。洞右有石室曰羅漢，謂其頂禿骨露。洞亭，卽鐵笛亭故址。按文公《鐵笛詩注》，山前舊有奪秀亭，故侍郎胡公明仲，嘗與山之隱者劉君兼道游涉賦詩。劉少豪勇，游俠使氣，晚更晦跡，自放山水間，善鐵笛。胡公詩有『更煩橫鐵笛，吹與衆仙聽』之句。亭今廢久，一日與客及道士數人，尋其故址，適有笛聲發林外，悲壯回鬱，巖石皆震，追感舊事，因復作亭，識其處，仍改今名。明仲，胡寅也。兼道，名衡，建炎初，以勤王補官，從韓世忠敗敵濠州，累功遷秩，晚棄官歸隱，潛心邵雍學，徙居是山云。隱屏西，則劉文簡燾雲莊存焉。『玉華峰，在隱屏峰北，白石羅列，瑩然玉光。接筍峰，在隱屏峰右，石有斷痕，復續者三，若接筍。架十五丈木廼得登。及徑，徑折數步，忽斷，有鐵鎖橫綴崖腹，亘百丈，繫支徑以托足，復有磴屈曲盤折爲餘級。至巖頂，有泉池竹樹。皇朝嘉靖中，道人汪痴頤、劉古松築室其上。下有石門瀑布、雲窩道院，內有石臼、石竈，旁有茶洞。筍洲茶洞，劉

兼道讀書處也。洞門狹內寬，四山環夾，煙靄不絕，產茶勝他所。筍洲，吳提刑某建麗澤堂焉。雲窩道院，宋隱士陳丹樞所建，白玉蟾記曰：「丹樞陳先生，未知何許人，辟穀不粒，一衲附身，年七八旬，方瞳漆髮，不語不寢，一旦在五曲間，吟晦翁『山高雲氣深』之句。」平林煙雨如昨也。晚對峰，在五曲南，與大隱屏對，舊名紫石隱，又名小隱屏。因文公之晚對亭向之，遂用其名。天柱峰，在晚對峰右，峭拔特立，子騫更衣處也。相傳於此坐化，峰側有更衣臺。峰後，聯屬一線天。仙掌峰，在六曲溪北，穹崖壁立，高廣數千丈，崖半石紋類人指掌者數處。上有崇賢館，宋游九言建水雲寮其下。旁有瀑布，泉夾流下注，名仙浴池。天游峰，在仙掌峰左，隱屏峰平立於前，外敞內邃，中有天游觀，元道士劉碧雲、張希微鑿基，法師張虛一棲真於此，奏請勅額。又有萬峰亭、一覽臺。蒼屏峰，在六曲溪北，下有蒼屏道院。三仰峰，在六曲溪石堂巖頂之左，三峰聳拔，斜插比連，若仰首然。中有洞曰碧霄軒。豁撐空第二層，有白玉蟾丹竈遺址。峰下有陷石堂、仙山庵。石堂，古寺也。唐建德初，建於接筍、仙掌二峰間。天成中，遷三仰峰右側。宋天聖二年二月朔夜，大雷雨，巖崩地陷，僧果緣與鄉人詹立輩皆罹覆壓，惟釋居仁、行者子明、子雲獲免。黎明，鄉人至，見居仁坐於先師塔前李木下，明雲亦在其側。皆前致問，而居仁方覺，似寐而後寤，且歎惜度牒淪失。少選，有文字一角，浮夾沼岸，取而觀之，則其牒也。居仁語人曰：「是夕風雷大作，良久聞有沙石打瓦聲，開戶視之，忽覺其身如人掖去，不省所之。」子雲、子明，亦同此言。陳普《石堂集》云：「天下名山，釋子占幾堂舍，獨武夷諸峰下無一所。土人云：『茶嶠舊有一區，爲裂石所陷。移構石堂壁下，復陷焉。』今茶巖下，一疤分明，自百仞之上，摧裂而下。石堂中一疤尤奇，据撐枕倚，嵌罅百道，旁窺俯視，其中摧檻折桷，丹碧宛如，故舉頭一片，穿空人雲，如喙一禽。止其頂，絕可愛。」

噫！韓退之、石守道，豈茲山之精靈乎？其可怪矣。又云：『鼓樓巖，舊有仙蛻，有一獸如山羊，常游食院側，僧果緣、詹立輩既鍛仙蛻，以爲齒藥，又捕山羊食之，以故咸及斯難。』今石崖高壘，相倚成門，僅可容身。石門內有一穴，中藏銅佛，可見不可取。中有小澗橫石，爲缸水流石下。步人其內，地復平曠，桑麻黍稷，靄然一村落，人號『小桃源』。劉文簡公祠堂在其下。仙山庵，一名山當庵，道人黃朴蛻處也。宋紹興初，自邵武來求仙，逾數月無所遇，忽於白雲巖下見草庵，有道姑屏處，長眉紅頰，問朴來故。答曰：『洞天有名無實，仙不可見也。』日已暮，姑欲邀宿庵中，朴曰：『於禮不可。』姑曰：『此地多虎，慮君見傷。』朴竟不入，危坐戶外。夜半，果有虎咆哮來，姑急開門呼之，曰：『寧死於虎？』堅坐達明，虎已潛去。姑歎曰：『君真有志！洞天去此不遠，然尚隔深淵，非臂羽足雲不可以渡，君試往，若遇樵者，當拜而問途。』及至水際，溪流洶湧，方顧盼間，有樵者來，道人如姑教，樵者怒曰：『饒舌老婆，妄泄吾事。』遂令朴閉目，挽其衣，步雲而行。俄至中岡，見宮殿崔嵬，一人碧冠朱履，謂曰：『爾何敢至此？宜速歸，積累功行，他時或可再來。』遂與胡麻飯食之，遣出至崖下，回望高山深谷，皆非昨境，道姑與庵亦失所在。自是辟穀，後蛻此山之下。』天壺峰，在北廊巖頂，峰巒環合。中有道院，石泉甘白，舊謂仙人浴丹之所，名丹井焉。下有天壺觀。鼓子峰，一峰屹立，有石如鼓。下有鼓子道院，倚崖爲屋，峻絕開豁，九曲溪山，獻奇目前。舟行白五曲望之，已見巖室，如在天上。絕頂有石穴，右有吳公洞，崖壁廣數百丈，裂開一洞，外隘中寬，相傳吳公於此成道。吳公，名代，失傳。又宋葉夢鼎書堂在焉。三層峰，在鼓子峰後，三峰鱗疊，比群峰尤聳，雨則先翳，霽則先明。三教峰，在鼓子巖前，三峰並峙，狀似儒、道、釋。靈峰，一名白雲巖，在鼓子峰右，奇聳高峙，半壁網縕有如雲氣。旁一穴，內藏小艇及仙蛻數函。巖右有毛竹洞，

巖壑幽邃，毛竹遍生。宋王真人煉丹於此。真人，名通，永平人。元豐間，學道洞中，能飛神御氣，自致雷雨。治平間，辭衆往黃山，會聖洞坐化，詔封洞明普靖真人。下有玄都觀，元里人余夔坡建，郡守爲請額，趙子昂領旨書匾。又有清微太和宮，元道士彭隱空所創。隱空，名日隆，邑吳屯人。能飛步武夷諸峰，不擇危險。居冲佑觀，遇異人，授以雷法，後師黃雷困，傳清微道法，禱雨暘，治沉疴立應。天師張真人書匾，虞集爲記。齊雲峰，在九曲溪南，高插雲漢，靜夜時，見天燈上有齊雲亭，下有齊雲庵。火焰峰，在水簾洞右，高聳如巖焰。玉柱峰，與火焰峰正對，圓直瑩潔，高數千尺，如削成。天心峰，在火焰峰右，象鼻巖左，三峰屈曲毗連，如心字之形。又此地深隱，爲洞天中心。下有山心庵，皇朝嘉靖戊子，徽人韓洞虛壑荒構屋，張真人彥頤匾曰天心。傅汝舟詩：「朝登三仰峰，夕宿天心庵。久入名山游，溪徑頗盡諳。始知九曲外，復有南山南。森邃更險豁，深篁倚煙嵐。沙田稻翼翼，巖桂花毵毵。疎籬隔鷄犬，朽樹藏蜂蚕。」紫嶺峰，在火焰峰左，石色青紫，其巔可達諸處。

巖三十七

張仙巖，從昇真洞口轉右，緣崖稍北，磴道已窮，躡梯而升，梯窮登崖。崖稍平復。東數武，有巖，漢人張垓坐化其中。石上遺骸尚存。或謂真人，故佚其名。有人於大王峰下，拾一古木牌，題真人名，淡初「游武夷，至雲堂掛塔，忽尋覓不得，後有樵者，見大王峰半洞中，已坐化巖石上矣。道衆往觀，則旁有蟾蜍仰顧，因號張金蟾。又云將化時，其母追至，呼之，真人轉盼。今其首猶回。皇朝嘉靖間，令董應翰取泥壘之，今背上泥脫，有白點如錢者五六。徐仙巖，卽仙蛻巖，在昇真洞大王峰東。徐，名熙春，邵武人。熙寧中，嘗夢一鐵冠道人，容貌雄偉，相揖與語，覺而異之。明至城南，果邂逅一道人，宛若夢中，自

云姓蔡，邀熙春飲，食以五華草，臨別約期昇真洞下。自是熙春不復粒食，至期果吟笑相迎於九曲溪頭，授以丹訣，後坐化，全蛻藏側樓上，至今猶存。

仙鶴巖，在大王峰西，峭壁上有繪鶴，霜翎，朱頂，久不滅味。

換骨巖，在幔亭之陰。峰腰，石室方廣，可容百餘人。室前路斷數尺，以黃心木爲棧，可達洞口，內有泉七竅，名「七井」。匍匐採取之，愈疾有効。室中有四柱樓一所，度仙蛻數函。宋徐鉉《稽神錄》：「建

州武夷山，或風雨之夕，聞人馬簫管聲，及明則有棺槨在懸崖之上，中有脛骨一節，上人謂之仙人換骨

函。近代有人深入絕壑，俯見一函，其上題云：「潤州朝京門內染師張某第三女」。好事者記之，後至潤州，

果得張氏之居，云第三女未嫁而卒，已數歲，因發其墓，則空棺，此巖是也。宋時有二山林文能者，博識天

文、地理、術數之學，於此遇仙，授銅鑄雷印，得符水，拯濟沉痾，及祈禱雨暘之法。後修煉大王峰頂天鑑

池側，不爐不扇。又有程斯道者，程正公八世孫也，自永平來參事之，亦得其術。」巖側有白雲莊，四面高

峻，人石門半里許，忽甚平曠，有丹井、石臺井、道院遺址。下有龍潭，從高流石澗中，隱隱雷聲，其深莫

測，相傳有龍居焉。排峰巖，在換骨巖左，輪囷如龜，又名靈龜。觀音巖，在一曲溪南。二石對聳，巔

微戴土，草木蒼翠，有寶冠螺髻之狀。靈巖，在攬石峰右。兩巖相倚，窮崖削壁，長數百尺。其衍嵌處，

因爲室棲神。谷口石門，匾曰靈巖，朱文公筆也。中有修鱗，可以望天，名「線天」。從其右仄徑斜登，

至絕頂，頂平曠可里許。先是，妖蟒據洞穴，吐氣襲人，葛道人驅之，卽洞建巖，其妖遂絕。石洞三，各可

坐數十人，中一洞深廣，風從中出，名「風洞」。右一洞，伏羲洞也。巖穴下，井曰聖泉。滴漏所注。葛道

人，意是白玉蟾也，其舊名葛長庚。仙船巖，卽小藏峰之峭壁。半崖間，一穴高瞰，內有二小船，架橫木

之上，半插崖中，半插崖外。仙機巖，在小藏峰背。峭壁衍開，木板曲直，縱橫如機杼。會仙巖，在昇

口峰右。其石方平，可坐數十人。鷄窠巖，一名金鷄洞，即大藏峰之半壁。上有洞穴，外隘中宏，木篠縱橫如櫺。舊記有金鷄鳴此，因名金鷄洞。有黃心木藏仙蛻十六函。歲旱，鄉民緣竹緇上，迎之以禱雨。下有龍潭，極爲瀟澄，人語棹聲相響應。宋陳升之取賀知章鑑湖之意，建希賀堂於此。宴仙巖，在鷄窠巖頂，與釣魚臺對。一作鳴鶴巖。李仙巖，在四曲溪南，御茶園後，一名燈窩巖。上有石龕，相傳李仙坐化之所，真蛻尚存。其爲李磨鏡？李鐵笛？李陶？俱不可考。御茶園，種茶進御者也。園中有臺，名喊山臺。上有亭，亭傍有泉，取以澆茶有異香。每歲驚蟄日，有司致祭，祭畢，鳴金擊鼓臺上，揚聲同喊曰：「茶發芽。」井泉既滿，用以製茶上供。其泉名石乳，又名通仙，名喊泉，又名呼來泉也。元時設場官二人，茶園百有二所，厥後平章高臺之子創培局於四曲溪。答暗都刺爲牧，復築臺園中，名「喊山」矣。皇朝嘉靖間，守錢僕以茶枯奏請變價造解。題詩巖，與御茶園對，多鐫前賢題咏。雲巖，在李仙巖後。有石室，可容百餘人，昔據巨蟒，詹真人驅之，創雲巖庵。真人佚其名，成道鼓樓巖下。鐵象巖，在接筍峰下，偃伏如象。清隱巖，四環絕壁中，有虛谷可居，頂有清真道院。仙跡巖，在六曲溪南，與接筍峰對，有二膝痕，俗謂仙人跪太姥處。宋辛棄疾詩：「地秘巖藏，尖曲如鶯嘴。」九井巖，在水簾洞左，近鷄蘇坂。洞穴可居。上有九石井，泉特甘冽。白花巖，在武夷山背。鑄錢巖，有石棱層，如梯可躡。黎道巖，在武夷山北，上有招仙館。馬月巖，九曲溪發源於此。歸宗巖，皇朝閩縣傅汝舟好仙術，增挽姓名曰傅汝舟。造服食，說輪關，與吳航人劉一企，治行道食，擔葫瓢，經武夷，臨歸宗巖，築土竈炊食。留十日，忽神風冷然，乾鵲號翔，脉然視天曰：「豈當異人至乎？」立定，果有丈人冉冉至，衣冠聖儒，不知何許人也。着紫履，揮烏扇。兩人問姓名，不答。已視其膚革，有雲氣，口數《三典》，如數一

二，諸衍欽術施咸中文章，儼三神山神人，又克然鉅儒，長者也。兩人遇之甚謹，迎拜，乞爲弟子，丈人頷之，前曰：「內學童子仙術，無旁，但緣倫常。昔上清孝弟王降度世人，示陳孝道，其可知也。已勿令人以他故議我法門甚幸。我終當度若也。」言訖竦身，忽然不見。

石三十六

三姑石，在縵亭側，三石森立並秀。道者石，在三姑石左。二石差倚，如寒山、拾得之狀。登仙

石，在大王峰下，昔控鶴仙人駐此。水光石，一名晴川石，石鑱「九溪」二字，倒影溪中，相傳趙清獻公

筆。上有溪光、瓊瑄二亭。溪光亭，今廢。瓊瑄，白玉蟾號也。仙猿石，在水光石後，昔有仙猿啼其

上。虎鼻石，在溪水濱，有兩竅仰吸。仙羊石，在大王峰西，大小凡六七處，或起或伏。鯉魚石，在

一曲水中。儒巾石，在鐵板嶂前水涯。方印石、仙冠石，皆在玉女峰下水中。題詩石，在玉女峰下

水崖，昔人題刻在上。翰墨石，在鐵板嶂右，與小藏對。半壁有長石一片，如墨黏壁上，又稱回子獻墨

巖。三杯石，在三曲溪水中，方平如砥。水樂石，在三曲溪中，水石衝擊，有金石絲竹之韻。試劍

石，在小九曲上，石分爲二，相傳控鶴仙人試劍於此。希真巖在其上。釣磯石，在晚對亭下，半在溪中，

可以坐釣。曹家石，在仙掌峰下溪水中，相傳昔有曹姓者，過此覆舟，得石以免。撞冠石，在接筍峰

下，狀若道冠，旁有棘隱庵舊址。棘隱庵者，宋女道人劉妙清所結。白玉蟾記：「丹樞先生結廬五曲之

輿，扃戶絕粒。有女道人自東陽來，訴所以求道之狀，遂歷試以恬淡清苦，復語以風俗薄惡，又言居巖谷

之難，女道人答曰：「糲粒可以糜，弊紬可以衣，藜藿可以餐，櫓柚可以煨，但欲覓片地安茅茨，無使雨我

頭，無使霜我肌。父母未生前，寒暑何所思，枯骨既火後，無復可訴饑。山中已如此，辯道亦所宜。俄而

道果成，鸞鶴滿空飛。』先生笑曰：『人道之易如窮猿投林，叛道之易如游魚躍涯，汝能終始，吾何幸焉。』於是亦作數椽附先生之廬，名曰棘隱。蓋取何仙姑『幽居山林間，荆棘隱此身』之句。棋盤石，在三層峰左，方正平坦，可坐十數人，仙人對奕處也。上水龜石，在北廊巖下溪中。晞真館，在六曲溪。北宋紹興間，有漁人得此石巨浪中，傍題子真書，筆勢甚奇。禪笠石，在八曲溪水中，石圓如笠。海蚌石，在八曲溪水中，一名鰓控石。網繚石，與猴藏巖對，石紋縷絡，狀如卷絲。下水龜石，在八曲溪中。貓兒石，在鼓子峰側，山巔有石卧伏如貓。人面石，在八曲。二石大小相向，如人面。將湖石，在北廊巖後。魚磻石，在八曲溪右。香爐石，在三教峰下。鐘模石，在鼓子峰後。高數十丈，圓如鐘，前有翠虛庵。挨人石，在毛竹洞外。側行乃過。石或動搖，若挨人然。宋劉子寰詩：『九段田間砥平處，箇是古來荆棘路。毛竹山頭萬石叢，墜馬摧輪乃其所。方今各取捷徑神，却嗔山石能挨人。』烏石，在九曲溪北，下有李真人丹基。大小廩石，二石圓整如困，在九曲溪濱，宋詹先野廩江隱居處。葫蘆石，在天心庵側。

嶂

鐵板嶂，在大王峰右，石色蒼黑，劖削如板，盤據環迴長數百丈，高稱之。前有復古庵。庵後碧流清泚，亢旱不竭。舊有白玉蟾丹基。元金埜庵繼隱於此，虞集題匾。埜菴，名志陽，永嘉人，先時隱龍虎山，嘗天旱登龍井，召龍語，龍出聽，踰時漸小，躍人袖中，乃警以偈，龍騰人水，少頃大雨如注，其來隱此，不爐不扇，蓬髮不櫛，人目爲蓬頭仙，元初坐化庵中。後羽士余復嬰亦煉丹於此。丹霞嶂，石色丹赤，雄峙如城，綿亘層疊，長數萬丈，高稱之。左有水簾洞，一名唐曜洞天。宋劉甫隱其下。甫，衡子也。朱文

公與蔡元定每過其廬，與之講學。內有清微洞，真觀道人江道判居之。道判，名成真，號心隱，少入武夷，從張巖隱游，修行清謹。法師黃雷困見而奇之，授以清微雷法。後，主龍虎山凝禧觀。遇大旱，祈禱顯應，朝廷授以建寧道職。晚年修真，是洞，無疾而化。皇朝有河南人蔡雙髻者，來棲是洞，日食一粥，或三四日不食，人與語，常不答，一日失所在，人見其終南山中。

洞

玉華洞，巖穴幽邃，舊名幽微碧玉洞天。

昇真洞，宋時有郭道人，名字不傳，居武夷，自稱卧雲子，

能預知人禍福。紹興間，潮州作洞賓純陽會，有諸葛行正自號洞陽子，道人偶遇之，因言其平生事，如目睹，行正大異之，即挽歸，事以師禮。後道人坐化洞旁巖石上，行正亦坐化於鍊板嶂頂。

雲虛洞，在武

夷山東均峰之上。均峰，高與大王峰對。其洞有二，上洞幽深神異，下洞暗邃莫測。傍有龍井洞，上有天

成石盆、石硯，下有朝真石、會聖堂、孔莊葉。三女仙於此成道。三女仙，俱會稽上虞人，不知其名，唐天

寶間來棲天柱峰下，一日遇太姥元君，授以丹訣，教往東南尋雲虛洞，遂至下梅均峰，果得二洞，三仙修真

於此。宋治平間，歲大旱，里中有江公灌田均峰下，三仙惠以小葫蘆水，令洒田，是夕大雨。江公往尋致

謝，至山中得一小逕深入，忽有洞府，匾曰雲虛之洞，仙童引見，二仙飲以胡麻，既辭歸，行數里，桃花夾

逕，渡一小澗，出三石下，至家三載矣。

桃源洞，在武夷山背，長嶺大路之左，巖頂有石洞，辟支佛棲

此。真武洞，一名仙釣臺，在四曲溪，北與大藏峰對。懸崖深穴，外狹內寬，中有仙蛻數函，又有磁甕若

酒壚者數枚，形製精樸，與今壚異。

茶洞，宋劉欽築小隱堂於此。

池

方池，在萬年宮中，玉皇閣之東，暗泉清湧，磴砌成池。朱文公詩：「武夷之境多神仙，我亦駐此臨風軒。方池清夜墮碧月，重簾白日垂洞門。暗泉湧地紫波動，微雨在藻金魚翻。倚檻照影清見底，柱杖卓石尋無源。洗頭玉女去不返，遺此丈八芙蓉盤。」宮門前，左右有二龍井，左者內方，右者外圓，二井底皆石，泉迸其罅，取以烹茶，色味俱美。

〔校記〕

〔一〕「崇安縣」下，各本原脫「一」字，據本書體例補。

〔二〕「轄一十九里」，下文實列十八里。

〔三〕「統圖八十又三」，下文實列八十一圖。

〔四〕「小漿」，各本原作「水漿」，據下文及《八閩通志·地理》改。

〔五〕「葛山」，下文作「葛仙」。

〔六〕「馬頂」，各本原作「馬頂」，據下文及《八閩通志·地理》改。

閩書卷之十六

方域志

建寧府 崇安縣二 浦城縣一

山

白華山 在縣西四里，石山也。狀如蹲狔，體色圓潤，降爲土埠，平若展席。蜿蜒而東，融結縣治，居民環其麓。右爲仙鐔巖，南爲獅子巖，晉楊筠松稱其山川奇勝，毓賢之區。

登高山 縣治左山。圓如覆磐，下臨澄灣潭。九日，邑人登高於此。前有巨石臨溪，其形如龜，右爲鐵砧山，左爲石泉山，上有石泉庵。

金印銅魚山

黃石山 縣負山也。上有玄帝殿，諸山環錯，名萬峰庵。山巔有鷄鳴巖、太極亭，祈夢響應。

蓆帽山 縣治前山也。山側有金鷄山，亦名鷄籠山。上有巨人跡、馬跡、柱杖跡。

岑陽山

銅鈹山 高可望日出，游人七月猶絮也。其初結庵時，闢地得銅鈹。唐貞元中，有壽佛修行其處，

壽佛哀姓，大渾里人，農夫也。事母至孝，蓬跣耐寒暑，涉險如飛，夜豎圓木三尺許，危坐達旦。與同輩芸田，烈日中常有陰雲覆之。初學道黃洋巖，改築是山，肩木轉石，舉重如輕，至其言休咎輒驗，施水療疾輒愈。示寂以火，煙焰亘天，而震鈴誦經之聲不絕。

濟拔山 山有石壇，瀑如玉簾，龍湫至深杳。又有龍井九穴，可鑑眉髮。

金龍山 馬鞍山

檜巖山 去治北二十五里。三峰森立，蒼檜彌望。

白石山 疊石若樓臺，山巔有雷壇石室及三井。舊傳武夷白石先生居之。

白巖山 上有白花巖。山半有石，屹然當徑，如欲墜然，俗呼試心石，巖下有龍井。

銀山 一名金鷄峰。

蓋里山 以山形蓋一里名，上有庵，祈禱多應。

葛仙山 葛仙修煉之所。上有葛仙庵，一名翠巒道院。殿宇皆鐵瓦。元大德十年秋，里中患蝗，禱庵中，其夕風雨反晴，蜻蜓蔽空，蝗遂盡沒。

橫山 去治二十五里，橫亘爲楊庄南障。

三髻山 三峰鼎峙如螺髻。北跨廣信，西抵邵武，神仙之宅也。宋時邑人徐頃於此山遇仙，歸能辟穀。歲旱，邑侯諸葛廷瑞召頃禱雨，頃登鐘樓，望三髻峰，狂呼招之，忽朵雲西來，須臾雨至，合境沾足。後尸解。

虎踞山

寂歷山 朱韋齋墓在焉。韋齋詩嘗有「鄉關落日蒼茫外，尊酒寒花寂歷中」之句。後文公遷葬於此。按《文公年譜》，紹興十四年，葬父西塔山，其後改葬寂歷山中峰之原。及考文公《遷墓記》云：「初府君臨沒，欲葬崇安之五夫。卒之明年，遂窆於里靈梵院側。時熹幼，未更事，卜地不詳，懼體魄之不安。乾道六年，遷於白水之鵝子峰下。」又考文公慶元五年撰《行狀》云：「公卒之明年，熹奉公柩葬於崇安之五夫。地勢卑濕，懼非久計，乃奉而遷武夷鄉上梅里寂歷山中峰，僧舍之北。」卽此觀之，當是三遷而後葬此。

峽山(二) 溪回石束，爲縣治水口。

清泉山

回龍山 去治五十里。中有宋了空禪師道場。師名自然，俗姓程，周村里人。慕禪出家，刻苦清厲。嘗游京師，朝臣聞其富學，試以牋疏，操筆立就。咸平中，奉旨取經西竺，得石鈇歸。煮藥療病，無弗愈者。詣闕奏對稱旨，賜紫衣金蘭，勅號了空大師。章提舉元振贊之曰：「云何是了，觸處皆曉。云何是空，觸處皆融。道了未了，談空非空。皇皇四達，無住無踪。」

白塔山 界江西鉛山及建陽縣，已見建陽。中有雲巖洞。山左有筆架山。三峰秀聳。雲巖洞，元杜清碧隱居其下。作軒曰懷友，自爲記。清碧，名本，字伯原，清江人，一云字原功，京兆人。父謙從文天祥勤王，毀家佐軍，死焉。本，從母陳氏育其家，長通諸經，與虞集、趙子昂、楊載等友善。皇慶中，御史忽剌術薦於朝，不果用。有詹景仁者，辟三公府掾，故家武夷之平川，延本俱歸，相與作思學齋，懷友軒居之。文宗初立，遣使召，不赴，釋書《無逸篇》附進。至正中，丞相脫脫奏授待制兼國史編修，迫之應命，至武林

驛，以疾辭歸。所著有《清江碧嶂集》。又嘗編五聲之韻，自大小篆隸，以至外化壽書，及元蒙古新字，靡不修錄，題曰《華夏同音》。薩天錫贈本詩：「夜宿武夷山，乃識清碧叟。清談道人同，險語山鬼走。出門視河漢，危梯挂星斗。」本《懷友軒記》曰：「余少喜游名山川，聞武夷最勝而遠，常按圖指畫，擊几爲節，詠《九曲櫂歌》，想昔人之餘韻。皇慶初，以御史大夫木公薦，在京師，獲托姓名於四方之士。於時，張君伯起，以童子科校書秘省，景仁亦辟椽三公府，暇輒相從，以問學切磋爲事。景仁世家武夷，極道其溪山高深，千態萬狀，而先世有田數十區，書數百卷，足爲賓友之具，可以徜徉其間，余聞識之。延祐間，景仁出貳浙東，憲幕伯起亦佐郡三山，余以微言忤執事之臣，書不報而去。乃能挾冊山中，償夙所願，遂相與沂流而至星村，則開廓平衍，有詹氏之故居，然與市井相淆綜。又溯流而爲建峰，皆良田、水竹，類嵩、鄆穀間，稍憩息南湖之履堂，始遇一儒者，與叙語，欣然若故人。周行未五里許，平川廓然，問之，百年榛莽矣。自九曲至是，僅半舍，而游者已罕至。然水益深緩，山益磅礴，其西南諸峰，峻絕出霄漢。其最峭拔者爲雲巖，雲氣起伏其下，鄉人於此候暘雨焉。天高氣肅時，一登望江之左右，浙東西，三山海日，八閩煙靄，皆隱約指顧間。武夷諸峰，並列其下，巖巒林壑，澗谷洲渚，泉池潭洞，層見疊出，不可致詰，無不稱奇觀者。余顧而樂之，景仁遂贖其榛莽之墟，剏薙而藝植之。卽其東偏，先構堂室，携妻與子，讀書其中。而予之寓舍，又得弗地而蕃之。植兩楹爲軒，戶牖簡朴，藏修游息在焉。每一俯仰，輒思平生所與交者海內名士，或道德之高深，或文章之雄雅，或政事之明達，或翰墨之神奇，或節操之堅峻，或信義之昭白，或譚論之流綜，或考覈之精審，或出處之慎重，或神情之閒曠，乃皆在於神京太府湖江之外，不得相觀，以成其志。因輯其詞翰，列氏名而記之，以志吾懷。古人之尚友千古，況同一寰宇而生並吾世者也。」

百丈山 馬氏三女修真之地。劉屏山、朱文公、蔡西山，每登臨焉。界建陽。文公《游山記》，見建陽。

竹湖山 下有天湖及慈惠廟。廟神李姓兄弟三人：孟曰材，仲曰樞，季曰槐，唐季屢立戰功，遷指揮使。乾符間，黃巢人寇，共率所部擊之，追至建陽被執，賊欲釋而用之，不屈，死，民相與斂葬之。後，墓圯於水，樞溯流上至是山之下，沙擁而掩之，衆異其神，立廟焉。又後仙亭山，亦有天湖。

寨山 董山

西山 白華山正脉也。舊爲蔡文定祠堂，今學宮在焉。

仙洲山 兩峰並峙，一尖一方。下有永豐寺，有蜜庵，蓋朱文公所頻游者。有四亭：曰書寒，曰紫微，曰清漪，曰野鶴。皆文公所命。文公前後游詩，如：「閩鄉饒奇山，仙洲故稱傑。」「擘開千丈峽，寫盡一襟寒。」「飲泉雲出袖，卧嶺月流空。」「陽崖驚素雪，午扇怯清秋。」「澗瀉千尋白，峰回四面青。」「明滅青羅帶，周遭碧玉環。晴嵐染襟裾，水石清肺肝。」「雲泉增舊觀，怒響震寒木。」「雲山合匝還生霧，雪澗崩騰怒吼雷。」「煖翠乍看渾欲滴，寒流重聽不勝清。」「已驚素雪清人骨，更喜蒼煙染客衣。直到仙丹奇絕處，晝寒亭下玉龍飛。」皆其佳句。山頂有石棋盤石，又名斧空石，其支隴曰起賢山，有茂山、修竹、屏山，文公亦嘗集此。

屏山 三峰疊翠，潭澄溪碧。宋劉文靖公子輩世居其下，而文公舊宅，亦在是山之前。劉氏，本京兆人，有諱楚者，唐末繇光州都督入閩，生三子：曰翺，曰翔，曰幽。翔，起家山南節度幕官，時峒寇据雲安，翺引兵破城，裨將欲屠之，不許，但除首惡而已。河西民多溺子，嚴爲之禁，其俗遂革。累開國公。所得

祿賜，分遺宗族，後受官建州，愛邑山川，遂與其二弟卜居焉。翺居麻沙，翔居後山，幽居是山，三族蕃大，惟屏山最貴且顯。至九世，則忠顯翰，「翰子忠定，三子羽、孫忠肅珙，而次子則文靖也。文靖宅有六經堂、早賦堂、悠然堂、橫秋閣、涼陰軒、山館、萬石亭、意遠亭、懷新亭、百花臺、醴醕洞、海棠洲、蓮池、橘林、桂巖、醒心泉、宴坐巖、南溪，凡十七景。文靖各賦詩記勝，文公爲書刻石。文公宅，則韋齋屬文公於忠定，忠定爲築室里傍，文公奉母遷居焉。匾廳事曰紫陽書室，以新安有紫陽山，不忘舊也；寢室曰韋齋，以奉父；別室曰晦堂；堂旁兩夾室，左曰敬齋，右曰義齋。自名室堂爲記。晚歲乃移居考亭。

拱辰山 三峰雄偉，宋少保劉民先講學於此。劉翰、劉子翬墓俱在其下。

仙亭山 舊傳有仙居此山下。有天湖。宋道謙和尚結庵焉。和尚，五夫里人，氣和行峻，一日以歸期語徒，徒曰：「不留一語耶？」師笑曰：「萬法本空，三界非有死生，何處安着？」遂示寂。

嘯天山 大王山

龜山 宋胡安國世居其旁。

梨嶺山 在白水。劉子翬《雙峽橋記》稱：「梨嶺，建望山也。」朱文公嘗曰：「梨嶺西南，水石佳處不減廬阜。」嶺路舊爲通衢，依山險隘，元縣尹夾谷山壽鑿平之。

崑山 見建陽。

文筆峰 在儒學前山之右。

七賢峰 七峰聯綿，碧秀雲表。峰左有狀元峰，尖秀端凝，俗呼插破天。

騰雲峰 舊有三仙女居此，俗呼三姑峰。

白雲峰 在大安水口。山傍有石，宛如人形。

馬頂峰 峰如華蓋，爲翁氏世居。古識云：「龍頭寺後神仙窟，馬頂峰前宰相家。」

壽鶴峰

超峰 武夷山祖也。上有杜清碧讀書處。有圓庵。

蘆峰 上最高廣，宋處士江贊、道人丁智清，並結屋其巔。贊，字叔圭，初游上庠，著名《易》學，父死，廬墓築石峰巔。政和中，以八行徵，三聘不起。時少微星見，遂賜號少微先生。嘗取司馬溫公《通鑑》，約舉其大，名《少微通鑑》。智清，豐陽里人，少聞人讀《盤山頌》云：「年年賃居住，不識主人翁」，遂大悟，棲隱是峰。能預知人事，一日謂人曰：「吾來日，往迎曹王。」至分水，果遇，遂同歸宿庵中。明日王下山，人問宿何處，王但回顧一指。及問者至庵，則道人已書「曹王一指庵」矣。朱文公《蘆峰詩》：「東峰切霄漢，首夏乃淒緊。萬里俯連環，千里瞰孤隼。」

青鸞峰 在蘆峰西北。傍有白馬峰，傍有幢峰。

白石峰

金鵝峰 一名鵝子峰。峰如雙屏。上有仙壇及仙井、棋盤、插劍跡。又有石室，深廣，中有仙蛻。其地高險，少人跡。五代時，柳崇及張、陳二將，隱此峰之下。崇，字子高，儒學著名，終身處士。王延政聞其名，召補沙縣丞，力謝去。諸子宣、定、實、宏、察、密、察，人宋俱爲郡士，例當奏請推恩，崇戒之曰：「勿奪吾志。」張、陳二將，閩太傅章氏愛將也。後奔南唐。南唐使查文徽來攻王延政，二將副之，屯軍五夫里。里有吳翁善卜，二將、文徽使占之，曰：「吉。」未幾，延政降，二將從文徽歸，復次五夫，召翁與語，賁

遺甚厚，曰：「不意有大賢居此。」因名其山曰居賢。且曰：「願從翁爲方外游。」翁爲大將卜居隱仙巖旁，曰大將村，爲小將卜居所居山側曰小將村。其駐馬之地曰馬鞍山，埋鼓角之地曰鼓角，埋劍之地曰劍巖，棄鼓之地曰鼓亭。文徵臨去，二將餞之鵝山之陽，顧巖石奇磊，登頂長嘯，聲出金石，人因名其巖曰將軍巖。後二將從翁葆年並登上壽。宋胡文定公五世祖，自江南來，寓黃栢里之柘洋，旣遷此峰之下，隱於魚釣，人稱釣翁。而劉勉之宅亦在焉。狀元詹驥，嘗結萬卷樓，讀書是處，後以狀元及第，晝錦之日，來集宗邸，人名地曰燕窠。先是，驥讀書之夕，值夜靜月明，有羽衣策杖，至徘徊談詠上下古今，殊流纒。臨別贈詩曰：「萬言長策耀三台，製錦龍頭屬爾才。珍重鵝峰秋夜月，歸來還擬宴蓬萊。」驥後仕至侍從，道經越州，郡守飲之蓬萊閣，追記夙詩，移住越州矣。金鵝峰之外，又有蓮花峰、清湖峰、石畚峰、廩峰，蓋一山而別五峰。舊識：「一爲鵝子二蓮花，三望清湖四石畚。惟有廩峰居第五，山前却是宰臣家。」宋翁挺居其下，遂總名之曰五峰。清湖峰頂，有霄壇，有石洞，風自中出，又名風洞。其下宋吳道人隱焉。道人，失其名，居五夫里，少業貿遷，遇胡僧斥之曰：「何汨汨忘本來？」道人遂棄家，結庵清湖峰，遠近慕行，戶履常滿。

雙峰 在白水。兩山朋立，時見夜光。

隱屏峰 在隱屏巖下。有仙壇，平廣可十餘丈，宋劉忠顯書堂在焉。

靈龜峰 與壽鶴峰對。

溫嶺 一名營嶺。基延數里。五代時，於此立鎮。

牛輓嶺 一在光化寺左，一在山川壇右，俱在城中。

佛嶺 五季時，有佛托稱徐氏，釣隱於此。元令夾谷山壽於此夷黎嶺路，煉崖鑿險，貲費良多。

小漿嶺 南嶺 大安嶺 查木嶺 梨木嶺

分水嶺 嶺界江、閩二省，有分水關。嶺西頭有望夫石，度關者以見爲吉。

小源嶺 柯嶺

檀香嶺 昔邵、汀寇作，鄉人寨嶺禦之。

枯樹嶺

蕉嶺 抵上饒縣界。舊建寨於此。

棠嶺 中峰嶺

梅嶺 嶺極高峻，朱文公詩：「去路霜威勁，歸程雪意深。」往還無幾日，景物變千林。曉磴初移履，

寒雲欲滿襟。」

崇嶺 南源嶺 西坑嶺

紫嶺 一名三望嶺。

窑嶺

斗米嶺 嶺路傍崖瞰水。皇朝正德初，邑民蕭永寧妻暨氏鍊崖鑿壁，遂便往來。復施笠千數，以濟傭夫。

黃洋巖 一名黃龍巖。山高數百仞。有瀑曰萬丈。有龍井，鄉人禱雨焉。有巖曰空洞。

瑞巖 扣冰佛古場也。上有瑞應泉。側有伏虎巖，相傳扣冰佛驅虎於此。絕頂有將軍巖，奉三神

焉。一姓唐名宏，一姓葛名雍，一姓周名武。世傳三神閩人，於唐時嘗平寇難，因有將軍之號，歸隱於此，以劍囑父老而藏之：「此地行爲道場，吾當護法。」既而同化。草寇發，輒顯靈異。未幾，扣冰卓錫，因建寺而同供奉焉。又云：「周穆王好畋，失政，有臣三人諫不見聽，死而爲神，三神是也。」說荒遠矣。扣冰和尚，法號藻光，翁承贊季子也，母孟氏夢比丘荷錫求宿，人指謂曰：「是辟支佛。」已孕，生於武宗會昌四年，香霧滿室，彌日不散。在乳抱中，見佛像而笑。稍長，慧發慈悲，年十三告親出家。父母追念夙夢，遂從其欲。送依興福院師僧行全。咸通乙酉落髮受具，去謁雲峰禪師，獻龜苾一包，醬一器。峰詰問機鋒，異之曰：「子異日必爲王者師。」後歸溫嶺，結庵爲永豐寺。繼居將軍巖，二虎侍側，神人獻地，爲瑞巖院，學者爭集。嘗謂衆曰：「占聖修行，須憑苦節。吾今夏則衣褚，冬則浴冰。」世人號爲扣冰古佛。天成戊子，應閩王之召，留十日，以疾辭。至十二月二日，沐浴陞堂，告衆而逝。王與道俗，備香薪蘇油，茶毗之，祥耀滿山，獲舍利五色，塔於正寢。謚曰妙應法威慈濟禪師。後二百年而有祖鑒大師。師，扣冰前身也，名從密，字世疎。先是，扣冰赴閩王，請別大衆於松門曰：「二百年後，再歸掃堂。」宣和六年，翁中丞彥國請祖鑒住院，至東嶺，猛省曰：「此吾重來地。」扣冰，法體魁梧，遺有故袈裟，長丈餘，祖鑒披之適稱。人溯松門別語，恰年二百，後以臘月二日坐逝，亦扣冰證聖之日。今院有重來閣，嶺有重來庵，前有壽聖寺，寺前有溪，名浴冰溪。《夷堅志》：建安人程虞卿，嘗爲他郡幕僚。剛豪結俠，椎牛醢酒，畋獵博塞。乾道三年春月，赴一家宴，會半酣，與同坐者入扣冰堂。繪匠方畫佛壁，內二侍者狀貌古怪。指而笑侮之。夜歸醉寢，夢偕其友丁子和抵別館，逢兩僧持挺大呼，向前肆擊，事窮勢逼，乃俯伏哀祈，僧怒少霽，曰：「汝更食牛乎？」對曰：「願永斷絕。」僧曰：「汝若再食，來吾堂中，必別汝足。且縱汝歸。」再拜而出。既覺，

汗浹心怔，坐以待旦。走詣丁門，方擬談說，丁止勿言，先叙所以，無一字異，相率再往扣冰堂，見兩像，夢中僧也。從此絕牛，亦戢餘行。

望仙巖 紫微巖

仙人巖 頂有石室，藏仙骨數函。

陶真巖 昔李陶於此修煉，丹竈尚存。陶，見武夷山。下又有陶真洞。

西巖 巖間有瀑布，傍有觀音，有安福寺，宋有道全和尚者居之。和尚深究經典，善詩，有識鑑。初，扣冰垂讖云：「瑞巖一片雲，西山全是佛。」後人始悟「全」者，「道全」也。朱文公詩有「閒裡披襟弄清泚，靜中合眼聽玲瓏」之句。

北巖 上有庵，每靜夜，巖穴中隱隱聞雷聲。

百花巖 在德星橋左。舊多花草、臺亭，邑人游賞之地。

巢雲巖 宋道人藍復隱其下。復，字性之，號虛白，結廬茲巖，汪月閒授以道術。一日高卧，戒其徒，勿輕通賓客，忽有道人羽衣大袖，借庭曬筆，垂袖，筆種種出，布曬盈庭。少選，垂袖，筆復種種入。即問庵主安在，其徒曰：「熟睡。不敢輕通。」道人書壁去。復起追之，詢路人，皆曰：「前去不遠。」隨詢隨追之，杳然難窺。

圓通洞

金鷄石 宋崇寧間，有二金鷄翔集其上。下有瀑布。有龍井，禱雨多應。

張源石 宋寶元康定間，有蛇出石傍，身若松鱗，人疑龍神，立祠奉之。

腰帶石 石在溪中。長可三丈，縈繞山腰，水涸則見，有紋斑駁，隱若腰帶。

卯齋石 在崇福院後，方廣尋丈。有和尚每日卯時一飯，兀坐石上，終不再食。雖風雨，不笠不蓋，年一百有五，跌坐逝。因號卯齋和尚石。

仙人石 石東北隅，竅繞石出。攀攀而上，方可至頂。有石室，藏仙骨數函。

鵝籠石 逍遙石

步罡石 在虹橋。昔有巫學禹步於此石，有縱橫足跡。

新洲海石 胡致堂寅謫居新洲，嘗坐此石，著《讀史管見》，趙庸齋有詩紀之。

石龍岡 相傳有樵者礪斧，石脊出血焉，因號石龍岡。

壓衙洲 在縣治南。俗謂高洲。縣治邑人丘凌霄曰：古有押衙官意嘗廨此，後人因呼爲押衙洲，既久又誤呼爲「壓耶」。不然，何嘗高縣治也。

馬廠洲 涪洲 師姑洲

川水利附。

崇溪 大溪也。其源有二：一出石舊里岑陽關，漫承甌嶺、寮竹、濟拔諸壑之水，浮於洋屯，而受橫源之水，達於南埂而受同歷之水，至於豐口而豐溪、小潭二水赴焉，至於吳屯里而洛水、南溪、新豐溪三水赴焉，經陽谷，受李陽三溪之水，至下寺口而受大濤寺溪之水，至於東溪。一出分水關，沿二十里，納大安源之水，再下五里，納雙溪之水，直達四渡，溫嶺、觀音諸寨之水，自大富橋而入至石雄，至分人陳灣，陂繇治西而下，貫於中城，達於南郊，逶迤十里，支分廣漑，化墳壤爲沃區，蓋趙清獻所鑿。當鑿渠之初，間有

撤徙民居，民或讎怨，清獻諭之詩曰：「撤屋成河怨亦多，百年恩在怨銷磨。」今呼清獻渠也。清獻渠正流直溯於南，是爲西溪，逾德星橋，與東溪會，縣東南環繞治，是爲崇溪。越青雲橋，則下源，潺溪二水自東入，經赤石渡，則漿溪、黃龍之水自西入，復下里許，梅溪又自東入，又十里許，柘溪縣左衢，周溪、杉溪縣周村合爲九曲，及陳石之水，經於藍源，皆自西入，會而瀉於峽潭，達於黃亭，東納籍溪，西納沙溪，而抵建陽之地，此其源委也。

雙溪 源出分水關。

漿溪 源出陳仔洋，接長灘，下斗祭，經黃龍溪，出赤口渡，入大溪。

浴冰溪 源出瑞巖百丈漈，下入陽谷，至林渡，與西溪合爲大溪，古佛浴冰處也。

寺溪 源出吳屯里之東嶺，下會小寺水，經寺口，會陽谷及廣福橋水，入大溪。溪傍有石，曰笏石。

新豐溪 源出金井坑，經吳屯下陽谷，直抵林渡，合大溪。

黃龍溪 中有黃龍洲。

潺溪 源出馮源，縣東坡橋下，入於大溪。

梅溪 源出西坑嶺，下縣上梅，接下梅牛皮灘之水，流至梅溪口，入於大溪。

柘溪 源出西溪，下左衢十里許，入九曲溪。

九曲溪 武夷山中溪也。源發三保山，經周村里之太源山，流至黃村溪，經星村市，潏洄曲折，深爲淵潭，淺爲灘渚，湛浸激波，各有奇態。曲流數里，出與石鼓渡合大溪。朱文公有《九曲櫂歌》，前輩多屬和者。皇朝項喬《游記》：「或問：武夷、廬山，孰美？曰：廬山，地闊景多，足跡難遍。武夷九曲三里耳，

所取峰巖名號雖不能爲山一一逼真，而仙跡接踵，則廬山未之前聞。且廬山有山而無水，武夷諸山，千丈壁立，骨節堅勁，川源一碧徹底，駕舟可以坐游，景象似爲過焉。」

黃沙溪 源出白塔山。

黃石溪 源出柳源，下游畋流逕岑陂，至黃亭入大溪。

籍溪 源出梨嶺，下合潭溪水，達於黃石，逕岑陂，至黃亭，入大溪。

瞿溪 源出梅嶺。

潭溪 在屏山下。源出拱辰山，合籍溪水。宋劉民先一枝堂在溪上。朱文公舊宅亦在焉，已見屏山。

嵐溪 源出大王山。

小渾溪 源出廊頭山。

李陽溪 源出廟嶺。

杉溪 一出大源山，一出後源。

大漈溪 源出牛欄嶺。

大安源溪 源出黃崗。皇朝晉江林雲程詩：「單車盤谷外，萬木澹秋中。水磴迴殘月，漁航引疾風。」

下源溪 源出到水坑，流至望仙橋下，入大溪。

周溪 源出十八傘。

秦石溪 源出茅嶺。

百丈漈 在四隅里之雙溪。

飛鵝漈 有巨石裂爲三巖。有九井，圓如釜，歲旱，鄉人禱之。

大小二漈 白鵬漈

金斗源瀑布

萍潭 兩畔巖石相薄，水斗瀉下，激爲盤渦。

碧潭 一名鏡潭。天將雨，則波湧。

馬審潭 在金鵝峰之陰。

澄波灣潭 在縣治左。有放生池。白潭至溪光亭下，有漁禁。

白圭泉 甘泉

高禽龍井 源谷深邃，上有霧氣氤氳，旱禱必雨。

許塘井 在大潭韭塘高山之巔，無旱療盈涸。有龍君祠，可禱雨。祠左右多驕蟲，至者不敬，輒被蟲螫。

營嶺古井 西井 丁公井 葡萄井 西坡井 西山井 甌嶺井

浦城縣 在郡城東。東抵浙江龍泉，西抵崇安，南抵甌寧，北抵江西永豐。漢建安初析置，曰漢興。三國吳永安三年，改吳興。隋開皇九年省。唐武德四年復置，改曰唐興。嗣聖八年，改曰武寧。天授中

改曰武德。景龍元年，復改唐興。天寶元年，始改浦城。宋元仍舊。皇朝因之，凡十鄉（四）四隅、三十里，統圖百五十又七。

安仁鄉

東隅，統圖四。山曰越王。潭曰白雲。

西隅，統圖四。溪口新溪。潭曰鳧綠。

南隅，統圖四。溪曰南浦。

北隅，統圖四。山曰皇華、橫山。

太平里，統圖五。嶺口致孝。灘曰蓮花。

郊陽里，統圖六。山曰榆桑。

欽德鄉

募泰里，統圖四。山曰吳山。

泰寧里，統圖七。

高泉里，統圖五。

大石里，統圖五。巖曰白馬、七房。溪曰南溪。

永興鄉

永康里，統圖六。山曰泉山。

船山里，統圖三。

畢嶺里，統圖四。山曰蓋仙。〔五〕

總章鄉

永平里，統圖一。泉曰瀑布。

通德里，統圖三。山曰石龍、銅鉢。巖曰白花。

忠信上鄉

清湖里，統圖五。山曰西陽。溪曰臨江。

上原里，統圖六。

孝弟里，統圖八。山曰株林、禪寂、子期。溪曰東源。潭曰九石。灘曰茅洲。

忠信下鄉

新興里，統圖七。嶺曰駐嶺。洞曰查源。

仁風里，統圖四。

東樓鄉

靖安里，統圖二。山曰大湖。

東禮里，統圖二。

人和里，統圖三。溪曰石岐。

昭文鄉

上相里，統圖五。山曰夢筆。溪曰前源。嶺曰西巖、密嶺。

昭賢里，統圖七。山曰溫山，百丈。溪曰洪源。

登雲里，統圖二。山曰回隆，（六）將軍、荆山。洞曰羅漢。巖曰古嶽。灘曰將軍山下。

總章里，統圖四。山曰嵩山、大同。崗曰牛石。潭曰龍背、巴獸。灘曰丘源、塔嶺。

福安鄉舊名載初。

官田里，統圖六。山曰船山。

登俊里，統圖四。灘曰旱灘。

乾封鄉

長樂里，統圖四。山曰百向、油果。

樂平里，統圖二。山曰漁梁。峰曰漁峰。

安樂里，統圖六。嶺曰梨嶺、泗洲。

鴈塘里，統圖七。嶺曰柘嶺。溪曰江村。

忠信里，統圖八。山曰太姥。

雷霆入地，星斗逼人。其山奇峻，其水湍急。其形勝也。

山

越王山 在縣東隅。自橫山蜿蜒來入縣治。其勢獨高，傍瞰大溪。左接金鷄嶺。漢越王餘慶之塚臺也。東隅舊有越王行宮，今爲勝果寺矣。寺有內史到溉遺跡。乾元、元和中，聖僧見於竹院，威鳳棲於梧枝，甘露泫於松梢，芝草產於莎徑，因錄瑞應上奏，勅置戒壇。福州支提山蔡、柳二禪師受戒於此，宋章

德象撰記：金鷄嶺，上有石如鷄，故名。路通處之龍泉。皇朝成化間造城，築門其上。

皇華山 在縣治。北宋時，建皇華館其側，後爲天心寺。皇朝嘉靖初，作學宮焉。

橫山 在縣治東北。峰巒橫亘如屏，山陰有井。上有馬氏仙祠，旱禱多應。

榆桑山 山下有慶遠橋，皇朝成化中，道人王士謬所造，教諭翁賜記：古稱山景復出，舊有雲聖仙祠，前畫工吳梅友繪壁，墨跡尚存。梅嶺玉蘭叢生，不葉而異香飄遠。榆溪仙杏，樹古槎牙，生果不乏。

汀渚之外，峰巒疊翠，鷗鳥翔飛，波濤浩渺，鱗介泳游。四時環視，萬象呈露，宛然若畫，可以娛目怡情，消塵滌慮，不必入蓬壺而登員嶠也。

吳山 四面奇秀，邑望山也。山下居民多吳姓者。漢興，得吳氏六千戶，別屯大澤，卽此吳也。故山曰吳山，灘曰吳家灘。上有巖洞如燕壘，號燕巢巖。巖畔有石穴瀑布，又名石寶山。唐至德間，有潘禪師結庵焉。

泉山 頂有泉二派：一入建溪，一入處州。梁江淹《渡泉嶠詩》：「岑峯蔽日月，左右信艱哉。萬壑共馳驚，百谷爭往來。鷹隼旣厲翼，蛟魚亦曝鰓。崩壁迭枕卧，巖石屢盤迴。伏波未能鑿，樓船不敢開。百年積流水，千歲生青苔。行行詎半景，予馬以長懷。南方天炎火，魂兮可歸來。」

蓋仙山 一名浮蓋山。界抵江浙衢、信、處三府，周圍三百餘里。上有仙壇。石洞深處，有竅可以窺天。石五色異狀，其一如龍，出泉甘美。又有卧牛石、水精石、雙筍石、石人峰諸景。

石龍山 三峰鼎峙，南接武夷。中一峰名鵝兒，其側有池，廣袤數丈，下有巨石，其形如龍，石首有井，井畔有龍堂。又有鵝子巖、白花巖。有坐禪石，淨空大士棲隱於此。峰南有石室，石室之外，有危岑

曰峨眉，稍下有泉壁。

銅鉞山 山跨崇安縣界，二縣並載此山。中有泉井，祈禱多應。

西陽山 《建安記》：「宋時，西陽太守全景文所居。」

株林山 峰巒起伏，林木森秀，有嶺曰却笠。相傳華子期人此山，却笠而坐，騰空以去。子期，見建陽硯山。真文忠墓，在是山之陽，魏了翁撰碑。

禪寂山 下有禪寂寺。寺記：「建州屬邑浦城南鄙，岡嶺奇秀，景致岑鬱。粵唐至德初，有何、鄧、蕭氏三大禪師，遠自信州來游茲土，停杯舍筏，始車後庵，選高卜深，乃建前院，梵刹爰立，香燈孔燦，諸佛攸館西源塔。小師振錫長安，持鉢輦轂，受王公之請，爲人天之師，綽有餘風，光及後裔。復有上人，法名義昭，俗姓謝，即今監院尚翁也。於大中十二年，遠詣京師，請置院額，爰奉勅旨，錫以大中禪寂之號。」

子期山 與株林相屬。仙人華子期修煉溪澗之臺，有神語之曰：「臺前石鼓鳴，君功行滿矣。」子期一日扣石，石鏗然有聲，遂仙去。

大湖山 一名聖湖山。山巔有湖，澄若懸空，舊有採藥人見芙蓉瀾湖，取之，石也。

夢筆山 一名孤山。江淹爲令，夢神賜筆之地。偽閩時，有夢筆和尚居之。閩王請和尚齋，問：「和尚還將得筆來也無？」曰：「不。是稽山繡管，慙非月裡兔毫。大王旣垂問，願山僧敢不通呈。」王曰：「如何是法？」曰：「此非夢筆家風」。宋里人楊澄爲本縣令，建等覺院其下。澄子徽少讀書此山，旣去，以文學節義擅聲中朝。後人卽其處爲書堂，繪澄父子祠之。嘉定中，郡守李大異作五大字，表其額，請真文忠德秀爲記。文忠記言：「徽之甫冠通群經，尤刻意於詩。時李氏王江表，公恥官偽廷，杖策中原，以

顯德三年進士高第入文館，陞諫垣。嘗論太祖有人望，不可典禁兵。國初出司徵於方城，繼令大興、峨眉二縣。開寶中，召還，寢以登用，太宗尤深器之，青宮倣建，命爲首僚。世謂帝以能詩知公，不知公之受知聖明，不專在是。昔丁公一心於漢，高祖戮之，姚思廉盡節於隋文皇，寵以高位，前世大度之主率常以是觀人。公忠於所事如此。以之事人，何往非忠？此二帝所以知公而以遺後聖也。當公之去國也，一遷而楚，再徙而秦，又再轉而蜀，山川益寥遠，風物益淒涼，昔之詞人墨客，悲傷顛顚，若不可生，而公嘉陽諸詠皆悠然自得，亡秋毫隕穫意。胸中所存，其亦遠矣。人侍禁中，新承聖眷，至摘其詩雋語，筆御屏中。詞章翰墨，同時豈乏？而公獨得。此非重其詩，重其節也。晚事定陵，尤被寵渥，初置翰林講讀學士，公與邢昺首與其選，雖未及大用以終，而平生所凜凜玉雪，亡一節可疵。從孫文公億，少依公學，皆以文章名天下，而清風雅操，奕奕相望。浦城人物之盛，自二公始。」德秀貌是晚出，匪工於辭，獨念前輩風流日遠，後生小子鮮或聞知，故爲推跡本末，刻之堂中，使吾黨之士，聞而慕之，平居講學，以淬磨志行，自期有位於時，以扶植世道自許，公之遺風，庶幾復見，而吾邦人物，其有興乎？」文忠復作夢筆山房，魏了翁爲記曰：「江文通令吳興，夢人授五色筆，繇是文藻日新。吳興，今浦城也。縣故有孤山，里人因以『夢筆』稱之。鄉先生楊文莊，嘗讀書其間。比歲，真希元得數畝地於山麓，藝卉木，營闔廬，爲息游藏修之所。旣爲文莊識其事，又以書抵了翁曰：『子爲我發之。』了翁每恨繇周而上，聖賢之生，鮮不百年。蓋歷年彌久，則德盛仁熟，故從心所欲，罔有擇言，皆足信。今貽後聖人之心如天之運，純亦不已，如川之逝，晝夜不捨。雖血氣盛衰，所不能免，而才壯志堅，始終弗貳。曷嘗銳情於老少，榮瘁於窮達哉？靈均以來，文詞上興，已有虛憍恃氣之習。魏晉而後，則以纖文麗藻，爲學問極致。方其年盛氣強，位亨志得，往往時

以所能眩俗譁世。歲滔月邁，血氣隨之，則不惟形諸文辭衰頹不振，雖建功立事，蓄縮顧畏，亦非復盛年之比。如史所書，任彥升、丘靈鞠、江文通諸人，皆有才盡之嘆。而於文通末年，至謂夢張景陽奪錦，郭景純徵筆，才不逮前。夫才命於氣，氣稟於志，志立於學者也。窮當益堅，老當益壯，此豈一夢之間，他人得予奪乎？爲此言者，不惟昧三王夢授之義，亦未知先民志氣之學。繇是，夢筆之事，如王元琳、紀少瑜、李太白、李巨山諸人，史不絕書，而杜子美、歐陽永叔、陳履常，庶幾知道者，亦曰『老去才盡』，曰『詩隨年老』，曰『才隨年盡』，雖深自抑損，亦習焉言之。不知二漢時，猶未有是說也。希元用力聖賢之學，月異歲殊，志隨年長，其自今所資益深，所居益廣。觀聖武公，年九十五，作《抑》詩曰：『相在爾室，不愧屋漏。嗚呼！爲學如此，才有盡而志可頤乎？』既以復希元，又以自儆云。」

溫山 中有泉，夏寒冬溫。

百丈山 山高聳百丈，跨浦、崇、陽三縣，故三縣並載。宋元豐中，山中叢竹結實，炊而食之，大似古城米，鄉人謂之竹米。提舉黃靜因圖上之，謂同穎之禾，兩岐之麥，雖其瑞自天，其應在民，未若結自然於深山，得實濟於荒年。詔付史館。山有誠應廟，廟祀靈澤慶惠夫人。宋龔栗爲誌，真文忠跋之，稱夫人生以誠事親，歿以誠惠民。民始祠於浦城百丈。今建、處、信、衢間，薌火殆徧。東嶺有鍾離亭，又有石似人像，俗謂之馬大仙。中有龍井，旱禱輒應。

回隆山 峰巒秀拔，俯臨南浦，縣治南山也。

將軍山

荆山 自西巖嶺起伏而來。上有安邊廟，廟有二神，一姓黃名寵，一姓范名滔，並本里下沙人。唐末

閩亂，黃爲制置鎮節級，范爲廂虞候，並有戰功而亡，人爲立廟。

嵩山 上有龍井。

大同山 界建陽、崇、浦三縣，已見建陽。

船山 前有玉女峰。舊傳閩平昌王避亂，有女死此，因名。今官田里王歸峰，有平昌王廟。王，姓名無考。舊傳，王之亡也，有敝鼓投水，溯流而上者數里，里人異之，相與廟焉。

百向山 俯臨大溪，其勢挺拔，四面皆見。

油果山 舊傳唐末占星者云：「山有異氣。」命工鑿之，經宿復合。已得方士訣，祀以油果，兼用符籙，遂鑿開矣。宋時有周露者，煉丹於此，沒著靈響，朝命封冲真人。按露，字史卿，元祐中遇異人，得養生術，隱此山煉丹二十年。一日風雨大作，失丹所在，露出神求之，語妻楊曰：「七日來復。」未七日也，有僧告其妻曰：「學道外形。夫，夫子寄也，而遂棄之矣。」妻遽焚露身。屆期，露神返舍，自失其軀，歎叱而行。蓋洪适《夷堅志》載此，兼歎斯言之誕。後真文忠爲露作祠，樓鑰爲記云：「神仙之說，茫乎邈哉，有邪無邪，不可知也。洪內相志夷堅，言周真人事，謂是山淺陋，非神仙所居。嘉定五年，學士院權直真希元爲真人求祠記於予，以真人弟待制公所爲行狀，及閒樂先生陳公師錫、容臺何博士去非所書。陳、何皆同鄉，始末甚明，始知內相得於傳聞而已。真人天分素高，夙有仙骨，神既授之，加以積久之功。其妻楊氏，文公之孫，亦有隱操，相與枯槁山林間，乃探其垂成，猶未至形神俱妙，輕舉飛昇之地，則世所謂有一遇而遂羽化者又難矣。然其精神翕聚，靈響昭徹，惠流里社，得侈命封，則真人固有益於世者，因書屬希元，并前二公之文刻之，以洗內相傳聞之異。」按待制名常，見續紳。

漁梁山 鄉人多竭水養魚，故名。山有水源，南流爲建溪，北流爲信溪。舊志：「天下十名山，漁梁其十一也。」

太姥山 太姥，魏夫人也。老子《玉真經》云：魏夫人，棲真羅浮、天台、大霍、洞宮四處。此山，洞宮山之隣也。上有太姥寺，下有徐淵書齋。洞宮，見政和縣。

金銀山 二山相連，一赤一白。

西巖山 在德星門外。南唐時，章仔鈞爲王審知所知，付步卒五千，使屯山下。南唐使其將盧將軍來急攻。仔鈞於此拒之。後其子孫家巖東。宋真文忠爲江西安撫，丁母憂，築室講學於此，曰西山精舍。有拱極堂，有睦亭，各自爲記。或云睦亭在仙陽鎮，文忠祖父丘壘在焉，非此山也。按江文通有《遷陽亭詩》：「攄淚訪亭侯，茲地乃閩城。萬古通漢使，千載連吳兵。瑤磯復嶄峩，銅山鬱縱橫。方水埋金腹，圓岸伏丹瓊。下視雄虹照，俯看綠霞明。桂枝空命折，煙氣坐自驚。劍逕羞前檢，岷山慙舊名。伊我從霜露，僕御復孤徵。楚客心命絕，一願聞越聲。」遷陽、「仙陽」，字相近而從俗，音相近而從便矣。

〔校記〕

〔一〕「峽山」，各本原作「峽石山」，據本書卷十六及《八閩通志·地理》改。

〔二〕「〔三〕」，各本原作「〔給〕」，據下文及《八閩通志·人物》改。

〔四〕「一鄉」二字，各本原脫，據下文及本書體例補。

〔五〕「蓋仙」，各本原作「蓋山」，據下文及《八閩通志·地理》改。

〔六〕「回隆」，各本原作「回陰」，據下文及《八閩通志·地理》改。

閩書卷之十七

方域志

建寧府 浦城縣二 政和縣 松溪縣 壽寧縣

山

致孝嶺 舊號章家嶺。邑人章仔鈞撰《三策》，將往獻王審知，登嶺卜天，其夕地湧神瀆。既至，審知館爲上賓，辟於朝。仔鈞歸里，親故夾道迎候，名嶺曰章家。其曰致孝嶺者，長老言章得象布衣時，婿於石鼻頭練家，練輕之，得象携婦歸，誓不復登此嶺，後練氏翁媪沒，得象夫人陟嶺瞻涕而已。

駐嶺

西巖嶺 嶺勢最高。晉王欽儒、吳興陸邁愛此山，嘗游其所。宋章得象少時讀書山下。

密嶺 梁江淹嘗游其地。

梨嶺 路通衢之江山。厥土宜梨。宋楊億《談苑》云：「天下水皆東，獨梨嶺水北流人廣信。」皇朝洪武間，令張鵬舉表曰梨關。正德七年，江西徭寇亂，調軍民防守於此。唐歐陽詹詩：「南北風煙卽異方，連峰危棧倚蒼蒼。哀猿咽木傍高處，誰不沾衣望故鄉？」皇朝鄭善夫詩：「梨嶺遙於楓嶺遙，小關高

比大關高，傭夫過嶺如平地，一口來迴一百遭。」

泗洲嶺（一）舊名折桂。唐林藻與弟蘊登第過此，題詩有「而今折得兩枝桂，又向山頭聯影歸」之語。後有僧自泗上入閩，度嶺見水車碓磨，歎息機巧。人擬泗洲和尚，遂易是名。

柘嶺 界處州麗水縣，地多柘樹。謝靈運《永嘉記》：「柘水源出吳興。」吳興，浦城古名也。陸羽記：「高一萬七十餘丈，絕頂周迴一百步。」又舊記云：「柘嶺峻極，勢徹蒼霄。」

石牛岡

白馬巖 舊見仙人乘白馬至此。傍有傅築巖，宋祖秀實故居。

七房巖 巖有七層，最上有泉穴，圓如鏡，名鏡泉。舊泉與九石潭通，旱禱卽雨。

查源洞 在查溪之源，界崇安縣，絕壁懸崖。宋紹興初，設西安、臨江二寨以備寇。紹熙元年，洞寇張海起，民多避入此山。

羅漢洞

川

新溪 在縣西。源出百丈山，與南浦水合。

南浦溪 源出漁梁山及柘嶺，自縣北折而東南，匯爲大溪，復西繞學宮及縣治前，至新溪合流，復轉東南，縈行迴抱，馳赴崇安、建陽溪，合流以達於甌寧西溪。

南溪 源出高泉里，流至錦江，會於大溪。

臨江溪 源出新興澄湖橋，流至觀前，入大溪。

東源溪 源出西陽山，至登雲里，下沙溪，入於大溪。

石陂溪 自大湖山，至總章里南岸，會入大溪。

前源溪 源山登雲里，下沙橋，至古湫，會入大溪。

江村溪 自柘嶺轉流，與漁梁水匯，入於大溪。

洪源溪 源出夢筆山前，會於大溪。

游辣溪

大石溪 昔朱文公訪友過此，值山花盛開，畫「錦江」二字於石壁，後人橋之，名橋曰錦江，內有龍湫，名巖谷井，旱禱輒應。

白雲潭 在縣治東，即陂下渡。上有飛湍奔瀨，至此則深沈淨瑩，有古白雲石塔。

鳧綠潭 在縣治西，當南浦，新溪二水合流，深沈瑩綠。

九石潭 在西洋渡。上列九石如獅形，下深莫測。

古湫潭 深不可測，下有石洞。

龍背潭 潭有巨石，高五丈，廣十丈，狀若龍背。

巴獸潭 潭深莫測，左右皆石壁，北有石板，長二丈，高八尺。舊傳惡獸潛潭中，詭質怪章，能覆舟，搏羊豕。唐會昌中，道人張衡過而治之，咒符入水，獸遁呈狀。衡以指模狀石板，入石三分。故老相傳：皇朝嘉靖間，猶有見之者，多屬吉兆。一云山有獸，名縣神，豕身人首，狀貌醜惡，好出水邊石上。張平叔往寫之，獸人潭不出。或云此獸畏畫，故不出，可去紙筆，獸出矣。

蓮花灘

茅洲灘 在九石渡下。溪石低昂，曲折奇異。

將軍山下灘 波濤洶湧，奇險爲最。

丘源灘 狂瀾巨石，下抵巴獸潭。

塔嶺灘 在縣西南岸鋪側。邑水悉會於此。濤洪浪巨，山橫抱如襟帶。

早灘 地名黨溪。昔有暑月過此求飲無與者，插杖水中，遂涸不流。

龍井坑 皇朝上官通隱居是處。通，少爲椽，一旦苦子，絕緣寂默。通道符能愈病，咒可致雨，作口

號云：「老骨崢嶸裏皺皮，精神不似少年時。一周甲子從新數，急速回頭亦是遲！」

鳳池 在儒學後。

日月池 在縣南，臨溪，今名湖塘，以瀦越王山泉，井九曲溝之水。蓋南方火位，鑿此制火。

七星井 狀元井 天池井 雙門井 石井 東山井 鉢孟井 龍嶺井

政和縣 在郡城東。東抵壽寧，西抵建安，南抵古田，北抵慶元。古福州寧德縣地。五代閩，析置關隸鎮。宋咸平三年，升爲關隸縣，而析建安五里以益，屬建寧軍。政和五年始改爲政和縣。元仍舊。皇朝因焉，其鄉舊分四十里、三十二都，統六十四圖，景泰六年，按察僉事沈訥以縣之東北二里，山谷深阻，且銀坑在焉，遂與巡撫劉廣衡議，析東、南、北三里六都隸壽寧縣。本縣統坊一、鄉四、里八、都三十六，爲圖凡五十。

在坊，圖五。

感化鄉

下里，一都，圖二。山曰黃熊。峰曰蓮花。嶺曰和尚。巖曰紫雲、白雲。(二)

二都，圖二。山口銅盤。溪曰七星、石龜。

三都，圖二。

四都，圖二。山曰大風、下藥山、金字。

上里，一都，圖二。嶺曰鶴都。

六都，圖一。

善政鄉

南里，八都，圖二。山曰籌坑、池棟。嶺曰黃嶺、俞嶺、(三)石豹。石曰大柱。溪口胡屯、赤磳。

九都，圖一。

西里，十六都，圖三。山口洞宮。嶺曰筋竹、秋竹。

十七都，圖三。山曰芝山。

十八都，圖三。

東衢鄉

東衢里，十九都，圖一。山口文筆、九蓮。峰曰蝦蟆。溪口浴龍。

二十都，圖一。山口佛宇。

二十一都，圖一。嶺曰斧鑒，〔四〕虎嘯。

二十二都，圖一。

二十三都，圖一。嶺曰桐嶺。

高宅里，二十四都，圖一。山口滿月。巖口棋枰。

二十五都，圖一。

太平鄉

長城里，二十六都，圖一。巖曰白鶴、白犬、南安。洞曰壩坑。

二十七都，圖一。

二十八都，圖一。山曰浙山。嶺曰常思。

東平里，二十九都，圖二。嶺口姥嶺，〔五〕山表、逃奴。

三十都，圖二。

三十一都，圖一。

三十二都，圖二。山口南禪。

三十三都，圖二。山曰獎山。溪曰東平。

群山迴環，二水縈繞，大奇聳，〔六〕左望漸障，右南則文筆効奇，北則黃熊獻秀。其形勝也。

山

黃熊山 縣治在其麓。相傳有黃熊見此。又其山如旆，亦名文旆山。東有大風，西有望浙，南有文

筆，北有湛盧。四山之勝，皆挹於此。山間有白雲精舍，俗名上天堂。堂側有雲嶠井，深廣不滿尺，縱不能二尺許，源出石竇，不滿不溢。萬曆中，令車鳴時命從人遍酌，至百五十瓢，不能竭其湧，大詫奇也。

銅盤山 在縣東偏三十里。高數千仞。胡仙姬嘗煉丹於此。丹成上昇，遺銅盤山上，有欲持去者，卽化爲石爐。有飛昇巖，下有龍井。仙姬，疑武夷山所稱胡氏女子也。

大風山 在縣治東南十五里。巖巒秀拔，絕類廬山五老峰。商周之世，有趙元琦者，彭祖鼓師也，受控鶴仙人丹訣，於此修道，嘗言不畏大風，則大山可登，後於此飛昇。峰背有三巨跡，號仙牛跡。世傳皇太姥魏夫人嘗乘牛跡出焉。唐顏魯公《南嶽魏夫人仙壇碑》：「夫人諱華存，字賢安，任城人，晉司徒劇陽文康公舒之女。挺瓊蘭之流映，體自然之靈璞，天才卓異，玄標幽拔。《老》、《莊》、《三傳》、《五經》、《百子》，無不該覽。性樂神仙，味真慕道，少服胡麻散、茯苓丸，吐納氣液，攝生夷靜，常欲別居閒處，父母不許。年二十四，強適太保掾南陽劉文幼彥，生二子璞、遐。幼彥後爲修武令，夫人心期幽靈，精誠苦盡，逮子息粗立，乃離隔室宇，齋於別寢，清修百日，感諸真仙來降。已，幼彥以暴疾殞世。值天下荒亂，夫人撫養內外，傍救窮乏，乃攜細小，徑來東南。及兒息各大，並處官位，夫人服藥稱疾，閉目寢息，飲而不食，七日夜半，太乙玄仙遣鸞車來迎，夫人用藏景之法，託形神劍，化成死骸，從此而逸。天帝令使者致命，授夫人玉札金文，位爲紫虛元君，領上真司命南嶽夫人。」魯公碑，在撫州，末云：「初夫人旣渡江，遍游名山，至臨川郡臨汝水西立壇，置精舍。」政和，去撫不遠，蓋夫人游至焉。石室左有觀音巖，右有羅漢洞，有泗洲禪僧石像，上有寶勝庵。

下藥山 山下穴泉清甘，冬溫夏冽，陰陽家取以定銅壺刻數，名定漏泉。

金字山 下有桃源處士范公祠。范公，唐末人，居此山之下，純厚孝友，教九子，皆爲善人。鄉邑有爭，必質直焉。聞其德音，皆頓首謝去。後以上壽，無疾卒。

籌坑山 其最高者天柱峰，峰巔巨石數十仞，狀如獅子，曰獅子巖。巨石側立如人，曰羅漢巖，曰將軍巖，皆數十仞。又有屏風石、葫蘆石。又有石室，可容數百人。而獅子巖傍，又有圓照庵。庵前有聖水，凡三石井，一井外狹內廣，深不可測，舊傳神龍所居，遇旱投以鐵石，雷雨立至。旁有泉清，甘可飲，昔見有雙牛鬪其畔者，取石擊之，牛犇人穴，雷雨大作。

池棟山 巖壁峭聳，橫截溪流，形如屋棟。下有兩穴，以泄東池之水。

洞宮山 道家三十七福地也。其山重疊九峰，如蓮葉然，謂之九蓮峰。昔有魏、虞二真人鍊丹於此，因號無爲神化洞天九蓮峰。峰下澗草多葦，或曰棄餘丹所化。其谷名洋，謂其平衍，若水洋洋矣。谷洋之地，銀沙出焉。餘四五里，夾岫如壁，更起迭伏，而皆迴拱九蓮峰下，宋坑冶司基址猶存。自坑冶司至西門嶺，官道在焉。自嶺右行，奇峰峭拔，沿澗多白鶴花，其左右皆石壁，上戴喬松，謂之翠屏峰。自翠屏峰磬析而南，岑樓巖屋，巍然並立，是名東西二寶臺。峰自寶臺峰委曲而西，山勢開豁，有平田數頃，魏、虞二真人宮在焉，曰魏虞洞天，宋黃榦書額。旁有禪院，亦名洞宮，出山門南望，有十奇焉。遙見青石壇，高三百六十尺，如籩豆然者，真人飛昇所也，名仙人壇。壇左右有二香山。峰有蓮花，石有石蟆，巖有觀音，有羅漢，皆絕奇也。壇東石筍插天，而南爲絕壁，上有五龕，龕皆如鑿，而澗皆三丈餘，是爲真人鍊丹室。室南爲獅子巖，其首圓大而怪，高人雲中，草樹叢生若拳毛倒披，方寶橫開若口回顧。獅子巖下五里灘，有巨石如龜形，名石龜坑。此十奇矣。按太姥山，《老子真經》：「魏夫人棲真、羅浮、太霞、洞宮四

處」。則魏真人者，魏夫人也。

芝山 巖間有石如龍，下有會仙庵。

文筆山

九蓮山 其最高峰，葱翠雄峙者，龍馬峰也。宋末太學生蔣粹翁先世家此山之下，舍側有龍潭，所養牝馬人潭而浴，生駒焉。龍首馬身，狀如《河圖》，父老語之曰：「此馬與龍構，瑞物也。昔仲尼筆削六經而麒麟出，今晦翁表章四書而龍馬生。蓋其應乎！」粹翁先世聞之甚喜，養馬殊謹，後牧放林中，竟失所在。粹翁詩有「千載聖人闕海出，喜看龍馬亦騰驤」之句。

佛字山 石上有紋，成「佛」字。

滿月山 山勢孤聳，峰圓若滿月然。顧思遠，武夷山魏王子騫中十三仙人也，鍊丹此山，白日飛昇。後樵人人山，見兩翁奕棋，飛昇壇上，並化鶴冲舉。山下有南潞院，有龍井。蔣粹翁，宋亡不出，隱此山下。

浙山 一名望浙峰。仙姬魚道超，從武夷山中，受控鶴仙人丹訣，修道此山，時時登山候望。控鶴仙人，在浙東天台山，華真仙師第七子也。故名浙山矣。山上有仙池，宋末里民於此避范汝爲亂，全活以數千人。

南禪山 峰巒秀異，上有龍井。

獎山 其山峭壁入雲。攀緣石梯而上，及至峰頂，坳涔若臼，中涵平田百餘畝，唐僧玄奘嘗游焉，曰：「此白象捲湖形也。」創庵其上，遂名獎公庵。元僧慧空復創庵於獎公庵東，相去五十步。慧空，古田

蘇氏子也。初爲甌寧劉氏家僮，比長，往依瑤山堂，又往浦城萬壽寺，投禮清勤爲師。後至獎公庵，庵尼却之，遂於庵東結茅。慧空本不悟性，而急於成佛。或教之焚身，則佛可成。廼於大德庚子七月望日，入塔燒身，仍自爲「慧空菩薩」之號，命徒塑像尊稱之，可謂迷誕。又有東梅女子，因旱鑿山成圳，引水南注，東梅之田，遂爲沃饒。鄉人卽圳上創庵像之。山有觀音巖、白牛巖、石龍洞、雙門洞、葫蘆潭、七聖潭，皆聖境也。慧空庵東十里絕巘上，有吳公所築望海堂、石梯巖。下有普照庵。

飛鳳山 一名正拜山，一名黃華山。上有英烈廟，祀唐張謹。謹以福建招討使擊黃巢於鐵山，與其裨將郭榮死之。語見閩縣弁翰志。政和人始祀謹，稱張將軍。宋時安福鄭樞密，童時館於李母家，嘗禱神及顯，上蹟於朝，進封侯爵。其後累加封號爲王。榮亦以佑靈侯進至公。皇朝吳廷用《英烈廟記》：「宋時建城，左翼軍黃勇，千夫長黃華，先後嘯聚，皆以神中阻。紅巾賊帥馬某，率衆火神祠，望見祠下盡甲，遂宵遁。郡守黃萬石，以早迎神，未至城五里，雨從東來，四野霑足。元達魯花赤、馬速忽迎神禱雨，日色方熾，忽露珠沱，踰時雨至。軍吏葉某，奪民迎神，具藏之家，火隨起，吏挈囊避曰：「神其我何？」火熄啟囊，神具無恙，囊資燼矣。趙千戶出民，適迎神，爲少辟阻千戶馬仆，驚懼拜謝，馬廼蹶起，其靈異如此！成化十年，處州賊入境，參議陳渤按邑，白晝夢神大聲曰：「賊不來，公無恐！」賊退，渤復修其廟。

蓮花峰 下有護國禪院。宋朱松尉縣，父退林公森來就養，卒官舍。時方臘亂，道梗，松權厝院西廡外，後竟葬焉。元末有儒士張以仁、魏伯堅卜築峰下，而國子助教謝坤、知州孫蘊、儒學訓導余應皆往，從游講論經史以二十年，號山中五鳳。後俱以文行知名，而以仁、伯堅石隱不仕。皇朝都御史高明立祠退林墓前，曰啟賢，以比孔氏之有正考父。

蝦蟆峰 宋時禱雨，有應。

報國嶺 西門嶺 和尚嶺 鶴都嶺 黃嶺 俞嶺 石豹嶺 筋竹嶺 斧鑿嶺 虎嘯嶺 桐嶺 常

思嶺 姥嶺 山表嶺 秋竹嶺

逃奴嶺 縣志云，嶺名不知何義。一名倒爐。舊傳詩云：「憶昔炎劉法網疏，季生當醢却傭逋。至今猶號逃奴嶺，簇簇人家誰姓朱。」蓋不知其義，而借用季布事。今按《建安志》：「漢梅福煉丹鑿山，其徒陳先生常竊食之，福怒，持劍逐先生，先生逃入浮玉洞，乃捨之。」今洞名逃奴，意陳先生經斯嶺矣。

紫雲巖 界閩浙間，高插雲表。諸山川一覽可盡。有庵在巖右。有龍湫，祈雨靈應。

白巖 縣祖山也。山勢如屏，而頂平衍。皇朝正統間，十人避亂其上，全活甚多。於今禱雨焉。

棋枰巖 秀拔如方几。相傳魏、虞二仙局戲於此。

白鶴、白狗二巖 二巖與松溪縣湛盧山聯屬。相傳魏、虞二仙携鶴與犬來游。巖南有萬松庵，北有會龍庵，皆在山頂，極爲清絕。

南安巖 有石室廣數丈，中有馬仙祠。馬仙，見建安。

奇巖 地名石巖窠。

硿坑洞 西據巖崖、石壁之間，其中寬廣，邑人於此避寇。

天柱石 方廣數丈，高數十丈，上下大小不殊，望若柱然。

川水利附

七星溪 源出銅盤山，下經感化、東衢、長城三里，迤邐西流，南會浴龍溪，西會東平溪，合於大溪，人

於建安東溪。溪有七石若北斗。

石龜溪 源出長嶺腰，南至鐵山口，入七星溪。

胡屯溪 納黃嶺坑之水，出池棟，入七星溪。

赤硃溪 源出石豹坑，自西流至於黃嶺，東十五里而會煖溪之水，經石門，入於大溪。

浴龍溪 源出九蓬山，北經考口，入於七星溪。

和溪 源出西表嶺，至放生潭，析而東流，入寧德縣界。

東平溪 發源樊山，出常口，受松溪之水，至西津，會七星溪。

東梅溪 源出師姑圳，入於松溪。

山表溪 其源有六，分爲二水，西流入甌寧縣界。

苦竹溪 在縣北。源出苦竹嶺，自北而南。有十里灘。

下園溪 源出籌嶺，而至蛟龍潭，與李洋水合流，入雙澗溪。

雙澗溪 在縣東。源出西門嶺，自東而西，至赤巖寨口，析而東流。

淳江溪 源出峽頭。

上五溪俱東流入寧德界。

放生池 在考口溪側。

松溪縣 在郡城東。東抵浙之慶元，西南俱抵政和，北抵浦城。本建安縣地。五代時，屬吳越，爲處

州東鄉，王審知奪而有之，以爲松源鎮。周廣順元年，南唐升爲縣。宋開寶八年，改曰松溪。元仍舊。皇朝因之，凡三鄉、七里、二十五都。

東平鄉

東關里，圖八。山曰湛盧、妙峰、誥屏、七峰、東山、圓珠、南屏。峰口花蕊、石牛。巖曰瑞巖、寶勝、靈應。溪曰松源、樂平、松峽。沙曰迴沙。

皈伏里，圖八。

古縣治在焉，宋始遷東關，爲今治。山曰萬山、蹲獅、石壁、中峰、王認。巖曰花巖、百丈。溪曰新坑、直源。

永寧里，圖九。

溪曰渡頭。

豪田里，圖八。

山曰筋竹。巖曰使君、香婆。

永和里，圖四。

山曰鸞峰。溪曰清泉。

善政鄉

杉溪里，圖十。

山曰南峰、皆望、大窰。巖曰龍津、白石。溪曰杉溪。

崇仁鄉

慶元里，圖六。

山口白馬、雲峰。巖曰獅子。溪曰雲溪。

湛盧峙南，蹲獅宸北，七峰聳左，虹亭列右，山明水秀，甲於上游，其形勝也。

山

湛盧山 在縣南。連亘東關、杉溪二里及政和縣界，山形峻峭，雲霧浮凝。唐《拾遺記》、《九域志》並云此山爲湛王鑄劍之所。爐冶遺跡，及唐貞觀中崖刻，至今尚存。又云歐冶子鑄湛盧之劍，因以名山。

傍有劍池，一清徹底。宋元符己卯，歲旱應禱，邑令周公才祠焉。鑿跡之日，西南隅露出石洞，冽泉隨湧，桃花數片，演漾而呈。因名洞曰桃源。朱退林葬政和，文公祭掃祖墳，往來茲邑，時寓此山讀書，書「吟室」二字。今民家往往模字爲匾。舊有精舍膳田，久已湮廢。皇朝嘉靖間，同知汪玩，令黃金復立書院，置田五十餘畝供祀。

妙峰山 左接太姥，石聯花蕊，峰巒稠疊。宋紹興間，僧懷辯、德雲結庵其上。

誥屏山 山勢秀聳，有石如屏，下有石缸，舊立亭其上，又名缸亭山。世傳有頭陀柯普者坐化於此，又名柯亭山。山下有洞深邃，名石洞也。中有流泉，大旱不涸，旁有修身巖。

七峰山 七峰連亘，龍騰鳳舞。有庵曰雲際，元無垢禪師居之。師，俗氏凌，古田人，自傭松溪，時時放牛山下。一日，遇異人曰石化、石壁，授以道術，遂就雲際出家，葷腥不苟，常人市乞米，暮必齷肉還，人疑而矚之，覓師至中林，一虎出迎，飼肉騎歸。大德戊戌，結木塔於蓮花峰，跌坐而逝。鄉人收葬之北山，光現林樾。

東山 舊名吳家山。山有銀礦十餘處。紹興末，有龍泉縣匠作過山下，見礦氣盤結，私人採煉。隆興間，立場瑞應，設官掌之。有林癸者，任崇安擺鋪巡檢，被命掌場。既卒，鄉人爲立廟。旁有圓珠山，一名珠林山。癸建會春亭。其下又有三巖，曰瑞巖，曰寶勝，曰靈應。瑞巖下有石室，可容三四十人。崖上有黑紋如畫叢篁之狀。西邊有泉迸出。下有石竇，元邑人吳華居之。華自幼不啖腥葷，至元間，棄家人巖，修煉數日，一二過食，凡四十餘年。巖旁蒔蔬，有盜之者，慮其眊而傷足，每纖屨懸樹間待之。齷蔬得錢，輒以施貧子。人病疫，迎至，靡不應驗。夜趺坐蒲團，山鬼滿前，恬不怪也。寶勝巖有石室，前後有

門，相傳吳道者居此辟穀，數年羽化。靈應巖，傳有柴、胡二仙羽化於此。上有石棋盤。東有靈頸。山西有虎頭石，前有飛泉三級。山巔有小竅常枯，歲旱禱之，得泉卽雨。又其西有峰，曰石牛山，西北有吳十七郎者居之。十七郎，慶元人，或云五代仕周爲諫議大夫，歸居於此，開闢田野，募人耕種，鄉人利之，沒爲立祠，曰吳土主。

南屏山 峰巒迴疊，孕翠凝嵐，亘如屏矣。巔有石狗、石龜、石佛、石僧等像，石牛、石馬諸峰，又名石林山也。

萬山 周迴五十餘里。或謂山所產萬種，或謂姓萬者居之。

蹲獅山 以形名。繇西北萬山而來，盤迴起伏，屹立縣北，縣主山也。舊傳有元索翁者修真於此，又名尊師山。

石壁山 縣南掛榜山也。石壁峭立，高數十丈。下有龍潭，潭上下皆石灘，淺甚，潭居中獨深，舊傳有龍出沒，又名龍井。

中峰山 有中峰寺，唐時伏虎禪師居之。師，法名行儒，謹律行，邃理學。唐景福元年，創庵此山，山有虎，鄉人競逐，師廼驅之出迎，繇是鄉人爲寺焉。旁有伏虎壇，石跡猶存。

王認山 宋益王昱，繇浙入閩經此，賞其奇勝，邑人因以名。山有瀑、龍井、石門、聚猿八景。

筋竹山 有石室，可容十數人。傳聞異人在山中修行，後乘雲而去，遺壇猶在。傍有石井、石竇常乾，旱禱若有泉湧，取瓶盛之，泉竭卽雨。

鸞峰山 山勢峻拔，延袤二百餘里，南接龍泉，北連南浦。相傳有仙人乘鸞翺游其間。上有古壇。

壇東有龍井，可禱雨。

白峰山 舊有三仙憩此。

皆望山 巋然峭拔，可俯望環邑諸山。

大崙山 白馬山 雲峰山。

花蕊峰

花巖 巖石有五色雜紋如花。有馬仙祠，前三女井，應旱禱。後二大石如鼓如帽，狀甚奇異。

百丈巖 舊傳馬仙於此上昇，峭壁間有馬蹄剪尺遺痕。巖有三聖井，又有石礪，宛若陶成，不容一物，鄉人禱雨不至，投以木石，滾出卽雨。

使君巖 舊志：刺史王汝休，嘗發兵收復此地，因名。

香婆巖 宋嘉定間，里人陳翁女自少不字，鬻香爲業，有剩香輒焚之巖下，或依巖宿，數日不食，人以爲癡。惟李五郎善遇之，一日，鬻香還，呼五郎，比追至，已化去矣。因食其所遺飯，亦化。

龍津巖 在風屯牛皮灘。巖上有「龍津」二字。元趙孟頫所書。

獅子巖 巖前石室高丈餘，廣五尺許，室中有竅，僅容側人。

川水利附。

松源溪 一名大溪。源出浙之慶元縣松源鄉，經梓亭寨，迤邐而下，出關口渡，合流抵政和縣西津，接七星溪，下建安東溪。

樂平溪（七） 發源瑞應場，西北流三十里合松峽溪，合流又三十里，出關口渡，入大溪。

松峽溪 源出東關里鐵嶺，至於關口渡。

新坑溪 源出慶元梓亭寨，經皈伏里，至新坑橋。

直源溪 源出花巖，東流至縣，南入大溪。

渡頭溪 源出筋竹山，西流經永寧里，入大溪。

清泉溪 源出筋竹山，東北經永和里，入大溪。

杉溪 源出上元，南至杉溪橋，入大溪。

白石溪 源出皆望山，西流十五里，經官橋，入大溪。

雲溪 源出慶元，至獅子巖南流六十里，至政和，入大溪。

迴沙 在政平橋東放生池上。相傳迴沙成坂，士人首薦。宋時沙迴者四，而李懌、吳巖夫、李扶、葉元，皆鄉薦居首。

龍居陂 溉田千餘畝。

壽寧縣 在郡城東。東抵福安，西抵政和，南抵寧德，北抵浙江景寧縣。本政和及福安二縣地。皇朝景泰六年，按察僉事沈訥以其地險遠，不便徵輸，大寶坑銀場時被溫處流民盜採，因肆剽掠，會三司請於朝，析置。治楊梅村。其鄉析於政和者爲坊隅，及政和里；析於福安者，爲福安里。轄坊隅一、都十二，凡統圖二十有五。

坊隅，統圖五。山曰香爐、高山、小托、大蜀。嶺曰紙被、溪頭、車嶺、彈子、章坑、楊梅、九嶺、黃客、東門、清源、青竹。

福安里山曰官臺、漸山、孤長。峰曰天池。嶺曰石虎、新峰、花嶺、大同。障曰鐵仙。

一都

二都

三都

四都

五都

六都

已上凡統圖八。

政和里山曰牧童、紫翠巖、〔八〕白巖仙、佛滌、基德八仙、仙人跡、古鼎、百里林、東山、立茂。嶺曰西表、俞嶺、虎奔、芹洋、尤溪、官田、小東古鼎、立茂、黃奇。

七都

八都

九都

十都

十一都

十二都

已上凡統圖十二。

四山列屏，一水縈帶。疊障重岡，湧若波浪。其形勝也。

山

鎮武山 縣主山也。山若人形，秀甲一境，故建縣據之。在縣南者曰翠屏，在縣東者曰叢珠，在縣西者曰天馬。

板仙山 上有巖，如石乳，禱雨多應。

香爐山 高山 小托山 大蜀山 官臺山 漸山 孤長山 牧童山 紫翠巖山 白巖仙山 佛潑山 基德八仙山 仙人跡山 古鼎山 百里林山 東山 立茂山

天池峰 山巔有池，清泚不竭。元主簿徐元德詩：「地靈特遣泉通石，天近常留水滿池。」

紙被嶺 溪頭嶺 車嶺 彈子嶺 章坑嶺 楊梅嶺 九嶺 黃客嶺 清源青竹嶺 東門嶺 石虎

嶺 新峰嶺 花嶺 大同嶺 西表嶺 俞嶺 虎穿嶺 芹洋嶺 尤溪嶺 官田嶺 小東古鼎嶺 立茂

嶺 黃奇嶺

鐵仙障 三峰秀峙，石林陰森，仙人所居。

川

蟾溪 發源大蜀山下，經縣東流至福安縣，至於海。

茗溪 源出高山，北流入於蟾溪。

源底溪 源出青竹嶺下，北流會潑頭，入蟾溪。

南溪 源出紫翠巖，迤邐流至福安，入於海。

平溪 源出西表嶺，東流。

尤溪 源出虎穿嶺下，東流。

丹溪 源出芹洋嶺，東流。

九嶺溪 源出大黍，繇芹洋東流。

上四溪俱入南溪。

鐵梗溪 源出東山下，會梅洲溪，經東溪頭雙港，至福安，入海。

上地溪 源出百里林山下，入楊州溪。

漁溪 源出立茂山下，南流繞花嶺，至福安縣入海。

犀溪 源出佛滌上，東流入官田場龍潭溪，至福安縣入海。

龍潭溪 與犀溪同源。

禾溪 源出牧童坂山下，至溪口，經福寧州入海。

〔校記〕

〔一〕「泗洲嶺」，各本原作「泗州嶺」，據下文及《八閩通志·地理》改。

〔二〕「白雲」，下文作「白」，疑誤。

〔三〕「俞嶺」，各本原作「箭嶺」，據下文及《八閩通志·地理》改。

〔四〕「斧鑿」，各本原作「釜鑿」，據下文及《八閩通志·地理》改。

〔五〕「姥嶺」，各本原作「桺嶺」，據下文及《八閩通志·地理》改。

〔六〕「大奇聲」，疑屬「大風奇聲」，下文有「大風山」條。

〔七〕「樂平溪」，各本原作「平樂溪」，據上文及《八閩通志·地理》改。

〔八〕「紫翠巖」，各本原作「紫翠」，據下文及《八閩通志·地理》改。

閩書卷之十八

方域志

延平府 南平縣 將樂縣

延平府(二) 在布政司西四百一十五里。東抵建安，西抵清流，南抵古田，北抵邵武。漢建安初，分侯官北鄉置南平縣。三國吳，以屬會稽南部，後屬建安郡。東晉大元四年，改爲延平縣。劉宋明帝時，廢。隋開皇九年，郡亦廢。隸泉州。大業初，屬閩州，後屬建安郡。唐武德初，屬建州。三年，置延平軍。仍屬建州。上元元年，改爲劍州。五代時，王審知改爲延平鎮。審知子延翰，改爲永平鎮。延政僭位於建州，升爲龍津縣，尋置鐔州。唐開運二年，南唐兵拔鐔州，復以爲延平軍，制置鎮。明年改爲劍州。析建州之南平，卽今府治。劍浦、舊龍津縣。富沙今府城東北有富沙鄉。三縣屬焉。漢乾祐元年，南唐復以福州，而以建州之將樂縣屬焉。省延平、富沙二縣，治劍浦，領縣五。雍熙二年，隸福建路。元至元十五年，升南劍路。大德六年改延平路隸福建行中書，其後改隸不一，詳見布政司下。領司一，曰錄事司。縣仍舊。改劍浦爲南平。至正末，陳有定據而守之。皇朝洪武元年，爲府，領縣五：曰南平，曰尤溪，曰沙，曰順

昌，曰將樂。景泰三年，析沙、尤二縣地，增置永安縣。嘉靖十四年，析尤溪，增置大田縣。今領縣七。
重巒複隴，蜿蜒城郭之中。官舍民廬，映發溪山之會。舟車往來，襟帶高下，清明偉麗，最於東南。
其形勝也。

南平縣 東南抵福州，西南抵永安，東北、西北抵甌寧。漢南平縣。晉延平縣。五代閩爲延平鎮，爲永平鎮，爲龍津縣。南唐爲劍浦。宋仍之。元大德中，復爲南平。皇朝因之，鄉分四架，領四隅、四十一里，統圖九十又九。^{〔三〕}

東架

東隅，圖二。

羅源里，圖四。以羅豫章名。宋歸善鄉。山曰南山。峰曰文筆。溪曰羅源。湖曰鰲湖。

雲蓋里，圖二。宋歸善鄉。巖曰美巖。溪曰雲蓋里。^{〔三〕}

社溪里，圖二。宋歸善鄉。石曰盤陀。溪曰杜溪。

壽山里，圖二。宋歸善鄉。巖曰鹿坑。淵曰大淵。

崇仁里，圖一。宋歸善鄉。

崇福里，圖二。宋歸善鄉。巖曰容照、百花。洞曰羅鱗。石曰仙書。

演仙上里，圖一。宋富沙鄉。

演仙下里，圖三。宋富沙縣。山曰演仙。峰曰小鷲。嶺曰湖頭。巖曰中巖。洞曰石精。峽曰歸雲。

仁州里，圖二。宋富沙鄉。石口金星、鳳味。

汾常里，圖二。宋富沙鄉。巖曰雲頂。洲曰濠洲。

西架

西隅，圖一。

資福里，圖二。宋上陽鄉。山曰寶雲、文筆。嶺口梧桐。

太平里，圖六。宋上陽鄉。山曰天馬、天柱。溪曰太平里。（四）

天竺里，圖六。宋延平鄉。山曰蓮花。巖曰聖泉。峽曰寶峽。

劍津里，圖一。宋延平鄉。山曰九峰、展旗。溪曰源鳳。湖曰花心。石曰平寇頌、花紋、蝦蟆、笏石、嘆頭。潭曰萬丈。泉口漿

澗。坑曰小浴。

長砂上里，圖二。宋延平鄉。巖曰碧巖。石曰耽珥。洲曰離洲。嶺曰鹵水。

長砂下里，圖二。宋延平鄉。

開平里，圖二。宋延平鄉。山曰金寶、米頭。溪口開平。

太內里，圖一。宋延平鄉。山曰金鳳。

大外里，圖二。宋延平鄉。巖曰西巖、天片。

梅東里，圖三。宋芹峭鄉。巖曰青巖。洞曰含源、金源仙洞。（五）

南架

南隅，圖二。

餘慶東里，圖二。宋積善鄉。山曰金山。

餘慶西里，圖一。宋積善鄉。巖曰虎掌。

遵教里，圖二。宋積善鄉。巖曰獅子。溪曰遵教。

泰平里，圖一。宋積善鄉。

普安里，圖三。宋積善鄉。山曰群山。巖曰紫巖、文筆石、獅巖。

金砂里，圖三。宋積善鄉。嶺曰清風、白沙、黃源。砂曰金砂、白砂。潭曰九里。

遷喬里，圖一。宋積善鄉。

保福里，圖二。宋積善鄉。山曰龍湖、虎掌。湖曰龍湖。

高保里，圖一。宋積善鄉。

長安南里，圖四。宋垂祐鄉。

長安北里，圖二。宋垂祐鄉。山口九龍。巖曰舉巖。峽曰嶺峽。

北架

北隅，圖二。山曰龍山、西山。嶺曰紫芝。

安福里，圖二。宋上陽鄉。山曰賀簍。

建興里，圖一。宋上陽鄉。

壽巖里，圖二。宋芹峭鄉。巖曰郭巖。

吉田里，圖二。宋芹峭鄉。

塘源里，圖二。宋芹哨鄉。

梅西里，圖三。宋芹哨鄉。山曰寶龜，雲頂。

梅南里，圖三。宋芹哨鄉。峰曰蓮花。嶺曰石鼓。

新興里，圖四。宋芹哨鄉。山口百丈瀑。巖曰白土。

峽陽里，圖四。宋芹哨鄉。

梅北里，圖二。宋芹哨鄉。

右附郭。

山

南山 宋羅豫章先生家其下。

演仙山演，一作衍。

舊名含源山。漢梅福時時往來此山。至晉時，有演客避亂，煉丹於此，丹成舉家

上昇。今爐竈猶存。山有文峰巖，中一石特立如佛，名石佛山。下有水雲村。宋尚書黃裳記：「長澗自衍峰道廣教，出田坑，始從父得之於西南山之麓，取其一支，停之以爲沼，走之以爲渠。廚竈之以酌，橋跨之以渡。異花奇果，垂條倚實，飄墜影於泉上。下有雲在山，朝隲暮合，閒適虛白，與流泉相應，其孰爲此者耶？」元豐初，余自京師還省，余從父是間俯仰行坐，瞻顧燕笑，乃以水雲村名之。自是郡人始知村之有可樂也。尋春逃暑，車蓋相屬。越十又五年，友人王公實來京師，謂余曰：「今爲水雲村主人矣，僕將益治之，養生其間。」予曰：「子之得水雲村，固可樂也，其亦知水雲村之得子乎？」公實爲人，苟可而止，不爲生而勞，不爲名而僞，遇吟而忙，得酒而休，方東俄西，未始適，莫要其中，夷曠而惠，直是水雲翁者也。

君歸乎哉？後此數年，予亦築室於衍峰，釣舟劍潭。是時，水雲翁藜杖而相尋，衍山居士肩輿而忽往，與是兩放相得，於無情中有舞有歌，有吟有謔，妙思絕景，不可得而究也。」

寶雲山 文筆山 霧騎山

天馬山 劉禹錫詩：「山如天馬奔」。

天柱山 蓮花山

九峰山 在府城南。九峰岩峽相接，爲郡境諸峰冠。然山若發火，卽府官受厄，一怪事也。

展旗山 在府城南。宋黃裳詩：「崢嶸南挹展旗山，旗鼓相臨縹緲間。」

溪源鳳山 上一井泉，有龍居焉。宋宣和間，道人張聲隱此。聲字鳴道，通《易》象，辟穀煉氣。宣和間，來結廬。邑人范氏子從之，夜忽有客叩門，知爲異人，拜伏求道，客取二丹遺范，以飼之，自是絕煙火食。一日，往郡西花心洞，留一頌於虛舟，躍入水。花心洞，山九曲如花心，又有巖名鳳冠，怪石孤聳。嘉熙間，僧法明住錫其中，伏龍收魔，有司刻像建庵，祠禱多驗。

金寶山

米頭山 巖畔石竅。舊傳出米。

金鳳山

金山 山側有石洞，名金鐘。昔有仙居之。

群山 以群峰競出名。

龍湖山 四山環峙，寺中爲平原，傍有龍湖寺，廢。

虎掌山

九龍山 九峰蜿蜒如龍。右有獅子巖，巖左有禪，巖石壁立峭聳，下有書院，舊祠楊、羅、李、朱四先

生。

龍山 一名龍騎山。山半有道南、大忠二祠。

西山 舊南劍州治之西。郡學據其絕頂。

梅山

簞簞山 以多竹名。皇朝吳國倫詩：「苔蘚石門蒼自合，松篁煙壁翠常勻。猿聲斷續號山鬼，龍氣虛無過海神。」

寶竈山 雲頂山 百丈溱山

虎頭山 在縣治右。形如虎踞，舊縣學在其下。

葫蘆山 屏山

碧山 巖壁峻絕，上有「金」字。

文筆峰 宋張致遠《新學記》：「九龍、雙旌、衍仙、文筆諸峰，皆秀拔摩雲。」

小驚峰 宋漕使曹子方過此，愛其奇秀，有「面前山好無人識，定是飛來小驚峰」之句。

蓮花峰 下有蓮花洞。

湖頭嶺 有湖頭寨，在府城東十里，面溪背山，前建浮梁，宋守張翬設伏破張徹於此。

梧桐嶺 道生梧桐。

鹵水嶺 在府城西。上有鹵水寨。背山枕溪，上下壁立，路僅通步，險巖數折。宋招捕使陳韓嘗寨於此。有鹵水石，葉夢得《避暑錄》：「石有三種，其一出滴水，可爲硯。」

清風嶺 黃源嶺 白沙嶺

紫芝嶺 嶺道逶迤，民居稠密，通舊郡學之西。下有井水，炎月愈甘。

石鼓嶺 山聳絕，方圓數丈。中心尺餘，扣之其聲如鼓。

考窠嶺 上有鵝鼻頭尖寨，十三峰平地聳起，高十餘丈，中有捷路，直通郡城中軍帳。後通峽陽，前通溪源，脫有鄰警，當於此屯兵。

美巖 唐有劉姓者，於此坐化，遺庵尚存。

麕坑巖 山多產麕。

容照巖

百花巖 劍溪之東，石壁峭立，有隸書「百花巖」勒其上。下有碧雲洞。

中巖 在府治東北五里。上有瀑泉，自巖中飛下，又有茯苓泉。巖畔舊有古松，根下結茯苓，泉出其側。

雲頂巖

聖泉巖 當道傍，有巖泉，清甘不涸。相傳有聖僧過此，鑿以濟渴。

碧巖

西巖 巖石崔嵬。唐寶曆初，有蔡、柳二禪師創庵，山神現怪，二師拔松倒植，松遂倒生，神乃歛滅。

天井巖 青巖 虎掌巖

獅子巖 巖下有三井，中井傳有龍居之。井側有廟，祈雨輒應。

紫巖 文筆石巖 獅巖 舉巖

郭巖 梅福岐仙隱地。已見甌寧縣。

白土巖 山產白土，可取製粉。

聞猿洞 在府城玄妙觀右。昔有方士袁深，煉丹其中。二白猿往來而狎，風晨月夕，時聞清嘯。深

詩：「聞猿何似不聞猿，聞得終妨一夜眠。息箇心猿如了得，洞門深鎖月明天。」

隱鱗洞 左依百花巖，右傍藏春峽，前抵雙劍化龍之澚。宋隱士吳儀嘗漁釣其中。藏春峽，在劍溪

東，兩山崇擁，是多繁花雜草。

石觜洞

含源洞 在霧騎山洞。四時泉聲鏗錚，靜聽如笙簧。

金源仙洞 元至正中，有方士隱姓名，修真於此，賜號顯跡道場。

歸雲峽

箕峽 其峽多竹。

滄峽

盤陀石 在府城東南方。廣丈餘，四山環崎，清泉湧出，佳木繁陰。宋李侗、朱熹二先生，嘗游息其

上。

仙書石 金星石

鳳味石 相傳昔有孝子，母疾，妄想鳳肉。遇仙指曰：「此石味同鳳肉。」擊塊煮食，母疾遂愈。予謂此《齊東》也，蓋鳳味石歟。

平寇頌石 李先峰孫降寇於此，郡人刻《頌》。

花紋石 色青紋，素有山水禽魚形狀，可硯可屏。

蝦蟆石 臨水如蝦蟆，夏月無蚊。今鐵冶是焉。

笏石 幞頭石 玳瑁石 馬鞍石

大洲 濠洲 離洲 仙洲

黃龍洲 一名黃龍沙，府城東南，張司空祠前。每春水後，土人視洲沙多寡，以占歲。宋黃裳詩：「看此黃龍沙，涉起，滿城歌吹入豐年。」

小砂

金砂 淘之有金，以名砂。又以名里。

白砂 淘之有銀。

小常村 宋時叛卒楊勛，寇南劍道，出村掠一民婦，欲亂之，婦死不受汙，遂遭害，棄屍道傍。賊退，人爲收瘞。屍所枕籍處，宛然不滅，每雨則乾，晴則濕，削去即復見，覆以他土，其跡愈明。

川水利附。

三溪 在府城南。西溪，源出長汀縣，經將樂縣，東流至順昌縣西，與武溪合。又東流經王臺驛前，

至砂溪口，與沙縣溪合，四十里至劍潭。東溪，源出浦城、崇安、松溪三縣，凡五派，合流會於建寧城外，南流一百二十里，至劍潭，遂合流而下。俗呼「丁字水」者，曰南溪，又九十里，與尤溪水合，直抵福州人海，謂之三溪。潭，一名劍津，又名龍津。府城東南，建寧、邵武二水合流之所。《晉書·張華傳》：「華嘗言，斗牛之間，有紫氣在豫章豐城。補雷煥豐城令，掘獄基，得雙劍，一送與張，一留自佩。華報煥書曰：『詳觀劍文，乃干將也，莫邪何爲不至？天生神物，終當合耳。』華死，失劍所在。其後，煥子持劍行延平津，劍忽躍出墮水。使人沒取之，但見兩龍。時人以謂雙劍復合。雷次宗《豫章記》曰：『吳未亡，恒有紫氣見斗牛間。張華聞雷孔章妙達緯象，要宿問之。孔章曰：『斗牛間有異氣，是寶物也，精在豫章豐城。』張華遂以孔章爲豐城令。至縣，掘深二丈，得玉匣，長八尺，開之，得二劍，其夕斗牛氣不復見。孔章乃留其一，匣而進之，劍光曜燁，燁燁若電。發後，張華遇害，此劍飛入襄城水中。孔章臨亡，戒其子恒以劍自隨。後其子爲建安從事，經淺灘，劍忽於腰間躍出，見二龍焉。津之名劍、名龍，以此也。』唐歐陽詹詩：『想像精靈欲見難，通津一去水漫漫。空餘昔日凌霜色，長與澄潭生畫寒。』宋蔡襄詩：『鳴籟蕭森萬木聲，濃嵐環合萬峰青。樓臺矗處雙溪會，雷雨交時一劍橫。』元薩天錫有《中秋溪行詩》，其序曰：『余薩氏子，家無田，囊無儲。始以進士人官，爲京口錄，長南行臺辟爲掾，繼而御史臺奏爲燕南架閣。官歲餘，遷閩海廉訪知事。又歲餘，詔進河北廉訪經歷。皆奉母行。後至元三年，八月望，舟泊延平津。是夕星河燦然，天無翳雲，月如白日。溪聲潺湲，若奏樂。四山環抱，如拱，如立，如侍。薩氏子奉母船上，與婦具酒餚盤饌，奉觴上壽。若妹，若婿，若婢，若僕，繼以次進，和而不褻，謹而怡怡。月色蕩酒，溪韻雜笑談，母懽甚。至舟人醉飲，亦相與鼓柁作南歌。今夕何夕？不知奉母之在異鄉也。薩氏子於是命婦盥爵滿

酒，再拜壽母，而作歌焉。其歌倣栢梁體，有古色。」又《北窗瑣言》：延平劍津，前有廟。有崔從事者，正直檢身，幕府所重，奉使湖湘，復命在道，遇賊，同行皆死。惟崔倉皇中，忽有人引路，獲免。中途偶患痼疾，求醫無所，行次廟下，夢神賜藥三丸，服之，驚覺頓愈。皇朝萬曆中，大旱。溪傍民養鸕鷀爲活，忽沒水不見。民貧，僅藉此鳥取魚，沒而隨之，漸入龍堂。見一堂乾潔，中有二龍，鸕鷀在堂傍，捉取之。龍目民不動。行出，臆其深邃，當在府治之下。明日，龍怒，風雨大作，翻江漂宅，怪烈異常。

羅源溪 發源自威溪，流經本里，至壽山里，入三溪。又有羅源潦。

雲蓋里溪 發源自尤溪林平，聚流成下澗，又二十里，經羅源里，至壽山里，合羅源里，入三溪。

杜溪 發源自坑柄里下里，會流入崇仁里，又四十里，至水東口，入三溪。

太平里溪 溪源自沙縣界黃泥隔，約三十餘里，至簞簪。

大芹石橋溪 長砂里二小溪，發源尤溪界丹溪嶺下，約三十里至此。

開平里溪 發源自大源里，流五十餘里，至武口，又十餘里，抵大溪。

大源里溪 發源自本里，經大地，歷巖頭蔡坑口，至伏溪口，約二十餘里，至大芹石橋下，入三溪。

遵教里溪 府城東南。發源自建安界小溪，流經本里小演溪，約五十餘里，至黃源口，入三溪。

吉溪 府城東南。發源自建安蓼溪，經普安、遷喬等里，縣吉溪橋，出大溪，匯於省。

東溪諸灘 曰汾，曰竹林後，曰高桐，曰鑿，曰黯澹。此下直至劍津，接西溪。其中黯澹最險。宋天聖中，守劉滋開其港道。元豐中，朝命歲度僧一人道湮塞。紹興間，守上官愔，督漕晁謙之、范同，通判吳達，知縣吳叔虎，募民鑿險爲港，濶二丈，又爲二乾港，濶減三之一，官復以錢三十萬，付院僧佐用。東溪

之險，於是以平。宋劉子翬《黯澹灘詩》：「南來甌粵無平陸，林巒起翠波騰綠。扶輿政恐犯霜露，買舟儻可休僮僕。清灘白晝雷霆作，亂石驚湍犬牙錯。平生珍重千金軀，舟子一篙那可託。飄搖葉漾勢轉急，釜竈傾頽不能立。眼看白浪散銀山，蛟螭百怪堂堂出。人皆乘險欲趨利，我不安行悔可及。吁嗟世路風波猛，巧弄危機暗馳騁。江湖溺舟猶自戒，勢利溺人終莫省。矯情鎮物未足言，書此聊爲後來警。」

西溪諸灘 曰石柱，曰扛猪，曰張人嫂，曰三門，曰小黃口，曰大黃口，曰張巖，曰虎頭，曰樟槎口，曰蘇坑口，曰星窟，曰大湍，曰小湍，曰城門，曰將軍，曰黃墩頭，曰慈油，此下直至劍津，接東溪。

南溪諸灘 曰劍鞘，曰嵩口，曰大傷，曰小傷，曰五港，曰天柱，曰鳩道，曰同場，曰龍窟，其中大傷、天柱、龍窟諸灘最險。守上官悖等既開黯澹灘，復議大開諸灘。有僧祖日者，能相灘勢，因命董役。漕司助錢百萬，悖復請於朝，願益助一百五十萬，而南溪之險稍平。

萬丈潭 在靈源庵前。

九里潭 在城南。上下皆急灘，惟此潭澄碧九里。

鼈湖 龍湖

田坑 在宋廣節營後山。源出廣教寺之東西坑，至中巖合流，經水雲村，至府西四鶴橋下。宋紹興初，葉文、葉武以萬餘人從間道入寇，郡守張翬建此爲斥堠，招捕使陳韓，亦建中軍帳於此。

小浴坑 五代唐莊宗弟，名崇禮，封薛王，值郭從謙之亂，匿名避難，樂延平山水，留居焉，結廬坑口，罄囊金以賑貧乏病革，出封誥示人，人始知其出處。宋淳熙中，鄉人祀之，廟曰永慶。

槃澗泉 源出山巔。盤迴石澗，泓深甘潔。

育德泉 在延平書院橫翠樓右。宋羅豫章、李延平、朱紫陽三先生講道於此。美其甘冽，名曰育德，蓋取諸蒙卦。

金泉 在府城西二里許。潭中沙淘有金。

佛智泉 開平寺方丈後，最清冽。

南山下井 在衣香巷。其泉自下湧上，漫溢平地，釀酒最佳。

將樂縣 在郡城西。東抵順昌，西抵清流，南抵沙縣，北抵泰寧。吳永安三年，始析建安縣之較鄉，置將樂縣，屬建安郡。晉隆安三年，析縣西鄉爲綏安縣。義熙元年，改綏城縣。隋開皇十二年，併入邵武，隸撫州。唐武德五年，復析邵武，仍縣，亦隸撫州。七年，省還邵武。垂拱四年，仍置，隸撫州。元和三年，復省。五年復置，隸建州。五代王延政，陞爲西鏞州。南唐尋復爲縣，仍隸建州。宋太平興國四年，屬南劍州。元仍舊。皇朝因之，凡二隅、四十都。成化八年，分中和、興善二都置汀州之歸化縣。今轄二隅、三十九都，凡六十七圖。(六)

在坊

東北隅，圖三。

西南隅，圖三。

在鄉

龍池都，圖一。宋垂惠鄉。山曰西壘、大旗、封山、蓮花。巖曰龍津。嶺曰青石、尾窟。石曰劍石、雷公。溪曰龍池。潭曰莒

峽。

積善都，圖一。宋垂惠鄉。山曰南山。嶺曰五岐。石曰蓮花。溪曰安福口。灘曰三澗。

忠孝都，圖一。宋垂惠鄉。山曰九仙、石帆、白豹嵇。峰曰溪山。洞曰靈源。石口石門隔、聖石。溪曰石帆。

富穀都，圖一。宋垂惠鄉。山曰孔子、仙橋。溪曰常口。灘曰白渡。潭曰洞澗。

高灘都，圖四。宋垂惠鄉。山曰雲衝、寶山。巖曰甘露、龍興、藤吊、退龍。石曰七賢。溪曰報恩、瀨口、黃坑口。灘曰搖灘。

水南都，圖四。宋垂惠鄉。山曰錦被、飯羅、通天王、烏石、象山、四望。巖曰春巖、瑞龍、寶頭。溪曰大溪、水南小溪。

玉華都，圖一。宋垂惠鄉。山曰白雲、翠簾、天階、馬鞍。峰曰梅子。嶺曰亭嶺。巖曰龍頭。坑曰黃裏。

湖管都，圖一。宋垂惠鄉。嶺曰三崎。溪曰漢村。〔七〕

三溪都，圖一。宋垂惠鄉。山曰天柱、雪裡。嶺曰陂坑。巖曰馬硯。

桃源都，圖一。宋垂惠鄉。峰曰驚坑。嶺曰新嶺。巖曰瑞雲。溪曰桃溪。灘曰黃竹。湖曰西湖。

蛟湖都，圖一。宋垂惠鄉。嶺曰湛嶺。巖曰白石。洲曰浮洲。

永康都，圖一。宋垂惠鄉。巖曰西華。溪曰水口。

南勝都，圖一。宋垂惠鄉。山曰東寶。峰曰君子。

隆安都，圖一。宋垂惠鄉。峰曰羊角。巖曰東巖。

池湖都，圖一。宋垂惠鄉。溪曰池湖。瀑曰白水。泉曰湯泉。

大里都，圖一。宋垂惠鄉。山曰仙人磻。〔八〕洞曰鐵華。石曰獅石。〔九〕

隆蔭都，圖一。宋崇禮鄉。巖曰聖者、花巖。

陽源都，圖三。宋崇禮鄉。灘曰重灘。湖曰蛟洋。坑曰黃沙、金坑。

竹洲都，圖一。宋垂惠鄉。山曰五龍。溪曰竹洲、常溪。

義豐都，圖一。宋垂惠鄉。山曰龍樓。峰曰凌霄。溪曰將溪。

黃潭都，圖三。宋將樂鄉。潭上流有黃石，水清可以見，因以名都。溪曰漠溪。

子教都，圖二。宋垂惠鄉。山曰神童。溪曰望江、蟹村。潭曰楔村。

睡龍都，圖一。宋將樂鄉。洲曰裏洲。灘曰延澗、磴頭。

永吉都，圖二。宋將樂鄉。山曰獅子、五臺。峰曰山門。

光明都，圖一。宋將樂鄉。峰曰王心寨。

陽岸都，圖二。宋將樂鄉。嶺曰臺嶺。巖曰仙井。

莫源都，圖一。宋慈惠鄉。

張源都，圖二。宋崇禮鄉。嶺曰張源。

隆興都，圖一。宋崇禮鄉。巖曰普照。

龍集都，圖二。宋將樂鄉。峰曰寶臺。

萬安下都，圖一。宋崇禮鄉。

萬安上都，圖二。宋崇禮鄉。峰曰太陽。

龍溪下都，圖一。宋垂惠鄉。山曰九臺。

龍溪上都，圖一。宋垂惠鄉。

安仁中都，圖二。宋崇禮鄉。

安仁上都，圖二。宋崇禮鄉。

龍渡都，圖一。宋崇禮鄉。嶺曰馬嶺。巖曰油雲。洞曰油雲。石曰三公、金鷄。

上衝都，圖一。宋將樂鄉。峰曰大龜。嶺曰東嶺。

崇善都，圖一。宋將樂鄉。山曰百丈。洞曰石燕。

崇山大陵爲郭，驚湍激流爲溝池。翠簾翔前，含雲蹲後，封山蜿蜒於其左，五馬馳逐於其右。其形勝也。

山

西臺山 邑主山也。其上坦夷如臺，又形如鉅鐘，一名鐘山，麓有真濟洞。

大旗山 二山高聳如旗。其支曰封山。高大環拱，邑鎮山也。土見赤色，則鬱攸至其麓，有楊龜山書院。南有玉隆萬壽宮。麓有小洞，名真君洞，又名石門洞，昔楊真君煉丹於此。真君，不知何名，道家稱爲披雲真人。山巔昔有靈泉，人禱雨焉。汲泉灑之，則雨輒至。龜山《披雲洞記》：「縣城北隅，封山之麓，有洞焉。聞之長老，楊道真君所居也。真君傳記無傳，洞於《圖經》弗載，是非真偽莫得考也。元祐五年，歲大旱，鄉人詣禱輒應。予竊異之，欲游未暇。越二年，壬申夏四月，與二三昆弟，躡屨往。行近五里餘，頽崖斷壑，荒翳險絕，捫蘿引蔓，僅能至焉。呀然一室，如神祠鬼刻，其中窈然，莫窺遠近。洞之北戶，有泉汪洋汙漫，其能宅靈氣而興雲雨，意在茲乎。」

龜山 封山支峰也。狀如伏龜。楊龜山世居其下，因以爲號。

鳳山

含雲山 其高含雲，下有寺。寺後有泉，石穴涵泓，味極甘美，楊龜山嘗讀書於此。有峰平地突起，秀麗異常，名曰玉標，相傳龜山鍾此而生。後秦檜遣人夷之，故蹟尚存。含雲寺，順昌人有蕭慶真者，出家學禪，棲息於此，龜山嘗稱之。慶真得法於江西泐潭月禪師，遍游諸方，晚留此寺，宗風大振。既沒，人號均慶禪祖。

後山 脉自含雲山來，屏列縣治，城在其巔。前有求雨墩，圓如覆鍾，在縣治左，儒學辰山也。

鍾翠山 含山正支也，建爲縣治。其餘脉爲新學，竹林四時蒼翠。

花坪山 今名章山，含雲右支也。餘脉環繞縣左，爲舊學基。

五馬山 有五山。其一名石壁，周迴三四里，蒼崖壁立，俯瞰金溪之潭。其巔有金溪巖，旁有惠應禪師庵。皇朝令王鈴，作亭曰灑襟，刻石於沒字碑上。其二，名金泉，《建安記》曰：「山南枕溪，有細泉流出，淘沙而得金。」其三，在忠臣祠後。忠臣祠，祀劉瓊也。瓊，固始人，爲王審知部將，統兵來縣。聞王延政降南唐，衆擁瓊爲主，瓊不忍，自刎死。部將收瓊屍，葬山麓，邑人卽土祀之。宋大觀間，賜廟額曰威靈。皇朝改名忠臣祠，列於祀典。其四，在金溪門外民居後，失其名。其五，爲金溪門，城墉半在城內民居後。或云卽下山之餘脉，展布於十字街，盡於北隅之大夫亭，爲縣治。

已上俱城中山。

蓮花山 南山

九仙山 邑最高山也。冬月常雪。舊傳有九異人煉丹於此。其支曰石帆。《神元錄》云：「將樂，石

似張帆」。是也。

白豹毬山(一〇)

孔子山 層巒矗起溪濱。山半有石竅，深邃玲瓏，遇水漲，則巍然孤立，如石疊然。皇朝蕭陽詩：「未聞孔子度三關，將樂何如有此山？想是楊公伊洛去，載將吾道人閩南。」是山也，舊傳嘗產閩閩之兽。閩一作萬，一作鷺，一作鷺。亦名狒狒，亦名梟羊。出《山海經》。宋孝建中，獠子以西波尸地高城郡。安西縣主簿韋文禮，進雌雄二頭。宋帝曰：「吾聞閩閩皆負千鈞，既力如此，何能致之？」彼土人丁鑾進曰：「閩閩是人，喜笑，則上脣掩其額，人以釘釘著額，任其奔馳，候死而取之。髮極長，可爲頭髮，血堪染鞞。其毛一似獼猴，人面，紅赤色。作人言，馬聲。或作鳥字。善知生死。飲其血，使人見鬼。」帝聞而欣然命工圖之。左思《吳都賦》：「猩猩啼而就擒，閩閩笑而被格。」

仙橋山 山勢橫截如飛橋。

雲衢山

寶山 峙將樂、順昌界。邑外屏也。

錦被山 縣譙樓寶山也。隆重蒼翠，下有金華石洞。洞三間，洞口風出甚急，有宋僧普盈之庵，旱禱殊應。

飯蘿山 珠林山 通天王山

烏石山 山下有烏石，或如人立，或如獸蹲。楊龜山葬此。其支曰象山。

四望山 巔有寶頭巖，可登望一邑。

白雲山 上有白雲巖。巖左有石室，亦楊真君煉丹處，禱雨有應。

翠簾山 蒼翠高聳，如垂簾幙。其巔曰天湖，三面峰環，中夷而曠。有龍窟，瀦承天水，下產石散碎，色斑斕如麻子，名麻子石。

天階山 入磴則劣，高若升天。上有聖泉巖，巖穴中有泉一脉，可愈病疫。下有玉華洞，蕭子開《建安記》：「將樂天階山下有洞，赤松子採藥處，號玉華洞。洞爲閩中最奇勝。有石門，相去一二里許，竊深繚曲，中分二路，會於後門。游者當秉炬入中，有雷公、浮源、楊梅、果子、藏禾、黃泥六洞。又有龍井泉、靈泉、石泉合，出爲澗。怪石奇偉萬狀，如世間人物、器用。而仙人拿其最奇者。內產藥石，品類頗多，若石英、寒水、禹餘糧、井泉砂、鍾乳石、燕龍骨、狗牙，其最名者。人其邃處，有小竅通天，光射石壁，若雲霞初曙，名五更天。其陰有洞，曰寶華，一室豁舒，僅容周旋。一石穴，泉寒冽，不盈涸。上有普陀巖，其陽有洞，曰南華，石室方平，景物尤勝，世稱「三華」。皇朝楊載鳴《游記》：「余至將樂之明年，聞玉華勝絕，乃以春正三日，偕令唐君、進士徐君游焉。旦微曉，南行度三華橋，七里爲藤嶺，有亭在焉。小憩，雨作，飯畢，冒雨行，可二三里，見天階山隆然，衆譁曰：『洞至矣。』洞石門低陜，側窺窈黑，秉炬者先，余輩俯躬從之。神悅目鬼，履舄與土石升降，足不謀而捷。泉自石罅流，兩涯有聲潺潺，已或橫亘渟蓄。每數步，山之老人輒指點陳說。時從者數十人，歡呼動地，煙氣人聲助合，滃鬱燠如盎如。背汗沾衣，不知洞外晴雨也。有石離列，如予三人数，坐而休焉，似預設者。頃之，起見石刻至元間人題名，磨滅不可讀。洞高处，滲液凝結，冰雪峻峭，蓋水之久而成石者。迤邐入，欲迷旋廓，稍縱焉，忽闔不開，微茫叵測。繚曲往復，力探旁搜，怪石林羅，撐突崩騰，頑怒巖錯，窮狀極態。牛水飲者，大地蹲者，佛趺坐者，人倒垂下瞰

者，仙耦據枰奕者，蓋未張者，戶闔叩之應者，田丘畫畛分者。宸可負，柱可倚，屋而竅可左右窺者，瑰詭傑特，牢籠供獻，其雜然無名，爲山中人強名者，不可勝數。一石立嵌嵌之巔，無上綴旁附，孤危巖峭。注目久之，徐君云有鐘鼓石。趨往試之，鐘微鏗，鼓逢逢然，幾不可辯。唐君得坐處二石間，上幕而下席，出酒榼共酌。余歌杜少陵詩，二君和之，擊鐘鼓爲節，聲響互答。雲薄巖穴，觴數行，往觀龍潭。潭深黑，似有物云。折而空濶，仰視不見所極。炬者上行，望之如人循睥睨，舉火微煙，颺射霧色。人暝時，度日垂晡，而予輩興益豪，且登且訊，惟恐失一佳境也。及扳緣斗絕，前牽後累，左右翼而進，至所謂七層樓者，足無餘地，擇而後敢投，蓋踐虎尾，摩龍角，戰汗震掉，不知所如。聞有石棺、雪山尤奇，俱不及往，亟尋洞，後遙見天光，皆大喜，至此平曠，又一境。坐定，稍聞外人聲，益覺幽窈。石壁光倒映，雲氣浮動，崖缺樹色交之，若從窗牖中觀。復命酌，兩童子歌侑酒，然望洞口猶在天半。唐君曰：『樂將無極耶。』遂攝衣上步，不任承以梯。既出，距地猶數十仞，俯可視飛鳥之背，而雨不止。石角簾刺鈎衣，徐躑躅草溼以下。唐君步獨先，予憑肩輿，最屬顛頓，昏乃達山菴。徐君後至，與酒相勞苦，因相與嘆，一洞之游，晦明變化，險夷欣厭，於人生何異？而世人顧欲據顯乘便，久愉快，終其身，其可得乎？予方得辜於時，而茲游適來洞，雖未爲遇予，不可謂非遇洞也，宜有記。」提學王世懋詩：「百疊丹梯萬象懸，靈蹤巧斷是何年？金波漏石常流月，玉乳支空別戴天。」其一：「芙蓉片片滴瓊漿，十里樓臺七寶粧。玉節金幢迎帝子，青獅白象坐空王。」是洞形勝，有鍾呂□達磨渡江，（二）仙人吹簫。有仙虎、仙象、渴龍飲泉、金鼠偷桃、珍珠樓、幔天幃、擎天石、美人石、童子拜觀音石、葡萄石、仙羊仙犬石、仙磨石、酒雲石、涼傘石、石床、石竈、仙鐘、仙鼓、藥籠、蛾眉、融雪、半汀月、一天星、沙洲荔枝樹、倒掛霞芝、半懸玉乳、白雲洞、瀑布泉、仙田，皆

極形似，楊載鳴《游記》所謂「雜然而無名，而爲山人強名者」也。又有小玉華洞，在靈源洞下，玉華驛之側。靈源洞蒼崖陡壁，泉響如雷。一石室可六七丈，穿竇而人，黝然而邃者，則玉華也。洞中石奇潤，若結鹽凝雪，可取供玩。

馬鞍山 以形名。又以兩峰突岬並秀，如蝶之飛，名雙蝶也。

天柱山

雪裡山 是界沙縣。由山麓關徑，盤折二十餘里，土膏，砂礫絢白如雪，木耳生樹間。

東寶山 高甲群山，望之時有寶氣。

仙人塘山 山與獅子雪裡鼎峙。上有曲池，竹根盤結，水而如緯如織，霧滃則天必雨，名仙塘。側有仙泉。

五龍山

龍棲山 群峰峭拔，緣坑深人，鳥道縈紆，林木幽映。山底多石潭，有龍潛止。是生煮紙之竹。

神童山 以鍾康侯讀書名。

獅子山 九臺山

百丈山 一名羊角晶，一名鈎刀山。其山三面，南將樂，北邵武，西泰寧。皆懸崖絕壁，有越王校獵臺樹遺址。

三石山 上有三石，色紅白如人形，俗呼三郎石。

賢山 山高林茂，昔有人卜隱此山，自號賢峰。

仙靈山

漢山峰 一員一銳，聯聳霄漢，雲氣杳藹，竹密樹稠，人謂仙境。

笏峰 一名君山。

梅子峰

鸞坑峰 高聳秀麗，相傳亦爲秦檜所鋤。今邑東十里外，望之猶秀拔可愛。

君子峰 元末，邑人湯逢原隱其下，其人文行修潔，時稱君子山。巔有龍居洞。

羊角峰

凌霄峰 登峰絕頂，可望建寧、歸化、順昌、泰寧四邑。

山門峰 高聳雲霄，下有兩石對峙如門。

王心寨峰 寶臺峰 大陽峰

大靈峰 峰頂巖穴嵌空，有靈物藏其間。

金頂峰 下有碗泉。

青石嶺

星窟嶺 下有落星穴。《圖經》：晉義熙中，有長星墜縣北，忽成一穴，近楊氏故居。占者謂：五百年後，當生大賢。楊龜山先生寔應之。

五岐嶺

牛矢嶺 嶺有蓮石，瓣如蓮花。有依山而立者，有覆水而露者。

亭嶺 崔嵬難躋，嶺半有亭。有石罅泉，極甘冽，曰亭嶺泉。

三崎嶺 嶺峻三崎。頂有山泉，清澈可愛。

新嶺 山高十里，行者苦遙。有祥道人開嶺取捷，故名以新。

湛嶺 嶺道里許，極峻。又名蛟湖嶺，以蛟湖在其下。

藤嶺 高峻多藤，下有甘泉，名藤嶺泉。

黎嶺

臺嶺 通龍集，抵江西便路。

張源嶺 馬嶺 東嶺 大嶺 陂坑嶺 真君嶺

庸嶺 古名也。《法苑珠林》云：東越閩中，有庸嶺，高數十里。其下北隰，中有大蛇，長七八丈，圍一丈。士俗常懼，東治都尉，及屬城長吏，多有死者。祭以牛羊，故不得禍。或與人夢，或喻巫祝，欲得噉童女年十二三者。都尉令長患之，共求人家生婢子，兼有罪家女，養之。至八月朝祭，送蛇穴口，蛇輒夜出吞噉之，累年如此，前後已費九女。一歲，將祀，募索未得，縣人李誕家有六女，無男。其小女名寄，欲行應募，父母不聽。寄曰：「父母惟生六女，無有一男，緹縈人身，不逢西傳，木蘭替耶，靡點軍帖。生無所益，徒費衣食，不如賣寄之身，可得少錢，庶幾菽水。」父母慈憐，終不可禁。寄請好劍及咋蛇犬以行，便詣廟坐，懷劍將犬。先作數石米粢，蜜麩以置穴口，蛇夜便出，頭大如困，目光二尺。聞粢香氣，先噉食之。寄便放犬，犬就噉咋，寄從後斫。蛇因踣出，至庭死。寄人穴，得九女髑髏，悉舉以出。咤曰：「汝曹怯弱，甚可哀愍。」遂緩步而歸。越王聞之，聘寄爲后。拜其父母爲將樂令，母姊皆有賜賞。

龍津巖 崖石森聳，潤者可硯。下臨龍津，二水夾流，匯而爲津，靈物潛焉。每風雨晦冥，則波濤騰湧。

甘露巖 宋初有甘露之祥。

龍興巖 藤吊巖

迴龍巖 巖勢如龍迴顧，上有庵，稱奇勝。

春巖 又名春谷。林谷陰翳，花草繁植，四時如春。

瑞龍巖 上有烏石，如人立獸蹲。

龍頭巖 一名虎頭巖。峰巒秀絕。旁一石，類虎形。有石門，山下通山頂，其中明爽可居。下有定光古佛道場，重樓殿閣，爲一邑勝處。定光佛，見武平縣南安巖。宋楊龜山記：「縣東南有虎巖者，顯德間，邑人設像其中，冶金鑊木，朝昏警鐘鼓。旁有隙地，種藝稼穡，僧居此者，足衣食焉。熙寧以來，旁地見奪，朝夕莫濟，遂棄而之他。槎蘗夭喬，樵採凌踐，於是巖之醜形，如張口待哺，聳據於隅，邑人病之。熙寧丁巳，封口有警，民不安居，縣令吳侯來，始爲之還定安集，民復得所。及賊平，閭巷父老謂巖張醜，實召禍災，遂聞於公，請僧可淳葺堂巖腹，刻均慶禪祖像以鎮之。作亭於巖股，以待往來游觀者。落成，可淳求予志之，乃爲之言曰：物之廢興，皆有數焉。窮山川，聚土石，頑然無關於利害，而謂能致禍福於百里之民，豈其然耶？肆凶怙力，慢令侮禁，相視成俗，御之無術，盜賊之興，則有在矣，何與斯巖？然以步仞之虛，而層軒疊徑，乃若繪畫井邑之繁，溪山之秀，環目盡得，則其廢興之由，不可無書。」

馬硯巖

瑞雲巖 一名補陀。下有石室，中立觀音像。

白石巖 有白石潭。潭下連黃竹灘。洲多白石。

西華巖 其巖峻聳，多產方竹。

東巖 巖竇出泉，神龍之窟，旱禱多應。

聖者巖 巖最勝處，有靈泉，禱雨輒應。

花巖 多產嘉茗。

仙井巖 孤峭崔嵬，畔有泉一泓，其深如井。

油雲巖 崖石礧礧，瀑流其間。天欲雨，則雲氣油然。

普照巖

海棠洞 兩山環夾，深入幽邃，中有明真道院。

鐵華洞 洞不甚深廣，其中雲氣吞吐，泉聲清亮，一佳境也。

油雲洞 泉清石潔，洞戶劃然。相傳宋淳熙丙午，有蕭公者，遇異人於此，得道，有庵存焉。

石燕洞 崖壁陟絕，洞方廣丈餘，中有數石如燕。

石劍石

雷公石 相傳石罅中，有泉清瑩。土人禱雨，汲水，卽有雷聲。

石門隔石 其石光潤，可碑可硯。

聖石 相傳有僧禱雨於石，頃之雨澍。

七賢石 里人余氏，世居其傍，有七人相繼登科。

石獅石 三公石 金鷄石

浮洲

裏洲 有裏洲潭。

川

龍池溪 源出泰寧張源嶺，下分水，會諸澗而來八十里，入大溪。唐大曆中，廖藏真人祖廖太歲，指其中有龍居，名曰龍池。溪中有洲，形如飯籬，每值詔歲，湧出，則邑士有與薦者，名飯籬洲。

安福口溪 一源出龍渡，一源出泰寧界，至隆溪始合。又一源出邵武，經安仁，中至萬安合流，九十里，入大溪。

石帆溪 源出靈洞，後二十五里，至孔子山，下入大溪。

常口溪 源出常源村，間合小常溪，二十里，至大溪。有灘曰常口灘，中有沙洲，二水分流，雖急而淺，較他灘爲常。

報恩寺前溪 源出河坑，二十里，繞報恩寺，而南入大溪。

瀨口溪 出順昌界，三十里，入大溪，中有瀨口灘。

黃坑口溪 出順昌蓋竹村，會五坑、張坑之水，二十里，入大溪。

大溪 發源南自清流，北自建寧、泰寧，合流至縣。金溪縈紆逕縣前，折而東，至順昌，會邵武溪。至郡城外，入三溪。溪南有蛟窟。相傳昔一小兒，見溪傍巨螺，拾歸，穴地澌水畜之。未竟日，其地橫清，水

勢洶洶，民懼，投以經卷、鐵器方息。今周回畝許，清澈不涸。蛟窟之右，有星穴，亦傳落星穴。

水南小溪 源自苦竹村，匯諸澗水，流十里，至龍頭巖下，入於大溪。

漢村溪 一源出沙縣，經胡管都。一源出順昌界，經三溪都。合流至曹溪，凡八十里，入大溪。

桃溪 源自桃源，與白蓮院前水合，十五里，至大溪。先是兩岸皆種桃，桃夭溪流，一佳境也。

水口溪 源出沙溪黃源嶺，下經南勝都，會濮溪而來，八十里，入大溪。

池湖溪 源出歸化界鐵嶺下，會諸澗，經隆安、南勝，八十里，入大溪。

竹洲溪 源自泰寧縣分水，來人大溪，中有洲，曰竹洲。

常溪 源自寧化界而來，八十里，入大溪。

將溪 源自石牌場，有澗曰將溪。澗有洲，曰橋洲。橋洲之右，有鰲洲。

漠溪 源自泰寧分水而來，六十里，入大溪。

望江溪 源自石牌場而來，二十五里，入大溪。

獬村溪 源出本都山谷，會諸澗，二十里，入大溪。

三澗澗 澗中聚沙成洲，春漲則分爲三，繁紆而下，約一里許，復合爲一。有三澗浮橋，去之二十里，

爲蛟湖。

白渡澗 怪石屹立，水勢奔瀉。

搖澗澗 黃竹澗 重澗 延澗澗

硿頭澗 俗呼謝家硿。又名榕林澗。左列亂石，右峙沙洲，當中一石巋然。

莒峽潭 洞澗潭 楔村潭

西湖 一名野水。有桃源漈，自漈至此，會爲湖。

蛟洋湖 發源建寧，諸崖谷滙流，經黃潭入湖，渟滢窈窕深，蛟龍所穴。逶迤東注，二十里，橫繞城下，如環玦。

黃裡坑 接壤順昌。東連劍津，會省北沂、邵、建、浙東西，通汀、漳、廣、閩通衢也，有橋曰文昌。

黃沙坑 金坑

白水漈

蟹眼泉 一名甘泉。

湯泉 靈山寺東崖之巔。

〔校記〕

〔一〕「延平府」，各本原脫「府」字，據下文及本書體例補。

〔二〕「統圖九十又九」，下文實列一百零一圖。

〔三〕「雲蓋里」，各本原作「雲蓋」，據下文及《八閩通志·地理》補。

〔四〕「太平里」，各本原作「太平」，據下文及《八閩通志·地理》補。

〔五〕「金源仙洞」，各本原作「金源仙洞」，據下文及《八閩通志·地理》改。

〔六〕「凡六十七圖」，下文實列六十五圖。

〔七〕「漢村」，下文作「漢村」。

〔八〕「仙人塘」，下文作「仙人塘」。

〔九〕「獅石」，下文作「石獅」。

〔一〇〕「白豹嵯山」，各本原殘「白」字，據上文補。

〔一一〕「達磨」上，各本原殘一字。

〔一二〕「瑞龍巖」，各本原作「瑞雲巖」，據上文及《八閩通志·地理》改。

〔一三〕「將溪」，各本原作「將源」，據上文及《八閩通志·地理》改。

閩書卷之十九

方域志

延平府 大田縣 沙縣

大田縣 在郡西南。東抵尤溪，西抵漳平，南抵德化，東北抵沙縣，西北抵永安。本尤溪縣地。皇朝嘉靖十四年，府判林元倫提兵平尤盜，行經其處，以其介於延、漳、泉三府之交，深阻可窟穴，而大、小田爲劍、尤諸邑衝，扼吭拊背，置邑爲宜。以白御史白賁、守帥張時徹，往相良然，乃奏請割尤溪縣一十四都、永安縣一都、漳平縣一里十社、德化縣黃認一團，凡四十圖地，置縣焉。萬曆元年，析聚賢里三圖，入寧洋縣。今轄鄉二、里三、都十五、(一)團一，統圖三十一。(一)

進城鄉

大田里

三十都，圖一。 峰曰插雲。嶺曰樓梯、長嶺、坵坪。巖曰白巖、赤巖、登雲、高峰、大羅。灘曰松栢、粗石、石碑、合劍、牛厄、雄崎、陳庄、築牆、嶺頭、鷺鶯、大牛鈴、小牛鈴、大櫓、小櫓、小姨、大腰、牛皮。

三十一都，圖二。 山曰雙髻、鳳山、掛榜、簪纓、龜山、蝦山、螺山、猛虎、獅山、象山、文筆、鷓鴣、銀瓶、甲榜、壺山、屏山、廉坑、

大仙。峰曰大仙。嶺曰燠嶺、撼嶺、吉坑、(三)尤床。巖曰獅子、廣明。石曰玉印、跡石、棋盤、蓮花、印石、象石。潦曰九重、三元。池曰青池、溫池。泉曰雙澗、公母。

分流。
三十二都，圖二。嶺曰南坑、川石。巖曰師姑。石曰川石。坑曰清水。潭曰塔兜、大潭、青龍、樟木、大井、天柱、雙龍。泉曰

三十三、四都，圖二。

豐城鄉

萬足里

三十五都，圖一。山曰太素、小壺、三台、鐘山、東山、穹窿。洞曰龍門。坑曰後坑。潭曰五龍。

三十六都，圖一。山曰石鼓、金碑。嶺曰柿模。湖曰南湖。潭曰鱗溪。泉曰蛟龍。

三十七都，圖一。山曰天馬、瓊山。潭曰大鼎、小鼎。

三十八都，圖一。山曰半山、雷公。嶺曰白沙。洞曰後溪。坑曰小汰。潭曰鯉澹。

三十九都，圖三。山曰旗鼓。峰曰潦頭。嶺曰白土、佛嶺。坑曰牛牯。潦曰楊柳。

四十都，圖一。山曰大寶、西巖。峰曰石笋。嶺曰湯嶺、陳平。池曰湯池。

四十四都，圖二。巖曰大石、郎官。

逕田里

四十五都，圖三。山曰白鶴、東屏、筆格、醉翁、金屏。峰曰五臺、大雲、游龍、鐘峰。嶺曰釣竿、山後、三望。巖曰靈惠、太虛、太和、太玄、東巖、傅巖、黃龍、虎跳、桃洲。洲曰桃洲。潦曰秋陽。潭曰石花、七星、七龍。池曰清水、楊井、龍池。

四十六都，圖一。嶺曰桃坂。坑曰葛藤。

四十七都，圖二。山曰葫蘆、虹山、天馬、甲榜、席帽。巖曰柳溪。石曰獅石。湖曰菱曲。潭曰石鼓、石獅。圳曰西窠。

四十八都，圖一。嶺曰魁星、薩星、白巖。洲曰竹洲、滄洲。石曰馬石。湖曰後湖。溪曰龍馬。潭曰長潭。

聚賢里，圖九。山曰黃界、福德、大富、西壺、校椅、金山、靈龜、伏獅、三台、同合、黃舍、虎山。峰曰銀瓶、石峰。嶺曰百丈、羊角、飲水。巖曰虎符、福星。洲曰高洲。石曰仙踏、筭石、牛石。坑曰湯坑。湖曰溪下、尾壩。溪曰梅林。潭曰九溪、通天、朱櫃、（四）倉潭。池曰蓮池、瑤池、鰲池。泉曰早伯。陂曰卓坡、當寶。

黃認團，圖一。山曰雪山、象山、臺閣、和尚、蝴蝶、靈峰、石櫃、蓮花崎、天湖崎、懸鐘、石笋崎、微陽。峰曰大話、筆連。嶺曰塢前、暗天、茶盤。巖曰西湖。洞曰浮竹。石曰盤石。坑曰林柄。溪曰黃認。

雙髻、五臺屹立摩漢，銀峰、文筆壁峙干霄。白鶴轟萬仞之岡，太素飛千林之霰。滴龍鳴於巖峭，玉乳產於石根。其形勝也。

山

雙髻山 二峰並峙，縣主山也。麓有溪曰龍源，其高百仞，匯下爲龍潭。聚賢里亦有是山。

鳳山 儒學後山也。

掛榜山

簪纓山 一名寶山。其左曰文山。

龜山 蝦山 螺山 猛虎山 獅山 象山

文筆山 縣水口山也。

鷓鴣山 三面牆立，下有灘水湍急，傍一徑可達山巔，鄉人避難於此。

銀瓶山 舊產銀鐵。國初置銀冶，鼓鑄者折，往往鬻妻子、家室償課，致通聚爲盜。景泰後罷之，惟鐵冶尚存。奸民穴之，積久蠶食，貧民多得僱直，米因騰貴，夜仍爲盜，一方之害也。

甲榜山 壺山 屏山

巖坑山 有洞名龍口。山有一孔，氣吐吹葉。

太素山 自羊蹇嶺、飛龍峰，蕤綏縷絡，突而爲新寨，折而西爲梅嶺。山每冬霰雪，千林爲白。

小壺山 三台山 鐘山 東山

穹窿山 山逶迤入，有小口。口有一巨石，三小石支之。內有懸鐘、觀音二廳，石乳凝結，冷若蒼玉，名蒼玉洞。

石鼓山 金碑山 天馬山 瓊山 半山 雷公山 旗鼓山

大寶、小寶二山 產鐵鑛。

西巖山

白鶴山 層巒疊障，其巔昂然似鶴。

東屏山 蒼峭壁立，方正如屏，南引面爲旗山。

筆格山 一名三台。

醉翁山 西有伏虎崖。

金屏山 有石洞，雅潔可居。

葫蘆山 虹山 天馬山 甲榜山 席帽山 黃界山 福德山

大富山 上有泉，足溉一鄉之田。

西壺山 校椅山 金山 靈龜山 伏獅山 三台山 同合山 黃畚山

虎山 勢如伏虎。麓有古寺，名水月堂。

雪山 延袤十餘里，高千仞，臘雪常凝。上產草苧，可以和藥。其南有靈峰山。

象山 群峰連蜷秀屹，有危巖、怪石、深林、密樹之觀。

臺閣山 頂平如砥。有石池，泉水不涸。山下田數百畝，皆資灌溉。泉州舊志：南臺山，卽此山

也。

和尚山

蝴蝶山 與和尚山相連，如飛蝶。

石櫃山 山頂一石，方長如櫃，上有仙人武。

蓮花崎山 中有龍安寺。安仁巡檢司、安仁場、龍興寺在焉。

天湖崎山 極巖有湖，四時瀦水。

懸鐘山 頂有石巖，峭壁中間，一石如鐘懸。

石笋崎山 山頂有三五峰，卓之如笋。

微陽山 上有像山巖。昔僧劉姓者，化此雨暘，疾病禱之多應。

插雲峰

大仙峰 縣南巨鎮。兩峰並峙，高入雲表。

漂頭峰 石笋峰

五臺峰 五峰並峙。其二最高如雙鬟，一名雙髻，有漂曰白水。

大雲峰 峰前後天湖凡九。最上一湖，怪石森立，鄉人作九湖巖寺焉。有漂曰馬蹄。

游龍峰 鐘峰

銀瓶峰 一名文筆。

石峰 高丈餘，未銳若石笋。

大誥峰 兩峰屹峙，高插雲霄。

筆連峰 二山並連，尖聳如筆。

樓梯嶺 一縣北，一縣西。

長嶺 坵墀嶺

燠嶺 興、泉商旅於此往來。

撼嶺 急坑嶺 尤床嶺 南坑嶺 川石嶺 柿模嶺 白沙嶺 白土嶺 佛嶺 湯嶺

陳平嶺 元陳友定開此以通尤溪，故名。

釣竿臺 通沙縣界。

山後嶺 東屏山背，自屏山麓至尤溪縣界後漂崎，迤邐約十五里，松杉夾道，水響鈴淙。

三望嶺 桃板嶺

魁星嶺 上有二石，若印若盤。

百丈嶺 羊角嶺

飲水嶺 上有泉，清冽可飲。

場前嶺 階天嶺 茶盤嶺

白巖

赤巖 與白巖對峙，二山俱以色名。

登雲巖

高峰巖 頂有佛寺，巖泉湧出，淵深。

大羅巖

獅子巖 界德化縣。一名白馬峰。下有佛宇。

廣明巖 師姑巖 大石巖

郎官巖 尤溪知縣李文充，勦寇駐兵於此。

靈惠巖 巖壁峭拔，有竇可入。內若廳事者二所，可環坐千人。洞外群峰竦立，有泉出石罅，號聖泉，飲汲隨多寡。上有師姑嶺，道沙縣。其上泥可以腴田，泥三大斗，可腴百畝，農民輕百里來市。

太虛巖 下有冰壺洞，流乳積洞壁間，如素鸞騰翥。中一石如麒麟，右一窟正黑，投以石子，洞然有水聲。巖背有望鶴臺，高平可坐數十人。下有四瓣石、屏風石、金牌石、棋盤石。

太和巖 上有仙人跌坐跡，下有二懸石，聲如鐘磬。

太玄巖 洞穴幽竊，游者秉炬入，如行玄冬深夜中。多蝙蝠，洞石有玉乳泉，出崖根後，竅間有石屏，高四丈許。

東巖 懸崖阻峭，惟一逕通巖嶺。鄧茂七之亂，鄉人結砦於此。一穴深黑，戰骨狼藉，捉石塊推其崖壁，聲如鐘鉦。巖根一臺屹峙洄波間，可坐而漁，名釣魚臺。巖壁流乳結二龍，水滴滴自龍頭下，今惟存一，其一相傳風雨化去。

傅巖 上有石穴二，可登眺。

黃龍巖 兩巖對峙，相距丈許，流水出其間。鑿崖根爲逕，行里許，有洞豁豁，臨道旁。

虎跳巖 水口兩巖對起，峭拔百餘尺，相距丈許。其下石潭爲虎過潭。

桃洲巖 柳濤巖 薩星巖

白巖 石稜峭危立，下有洞窟深邃。

虎符巖 福星巖 西湖巖

龍口洞 山有孔穴，其氣吐出可吹木葉，如龍噴珠，故名。

龍門洞 峻絕萬仞，四面無徑，一小羊腸通洞中，可容二三百人。

浮竹洞 與漳平縣界。

後溪洞

桃洲 竹洲 滄洲 高洲

玉印石

跡石 在城西方。平二丈餘，石上有巨人馬跡。

棋盤石 蓮花石 印石 象石 川石 獅石 馬石

仙踏石 上有禽獸跡。

筭石

牛石 有母子二石。

盤石

川水利附。

縣前溪 源出德化縣小尤，中經林柄坑，會黃認團、宋坑小壺溪，逕小田，匯爲塔兜潭。東過鎮東橋，至京口，會仙豐溪，過杞溪，逕高才坂，下達尤溪縣二十九都，會四十八都大溪，匯爲七里潭。至尤溪縣，入潭水，達省城。初大田未縣，溪堙。嘉靖乙巳，令謝廷訓鑿石決堤，使可舟。又一支，在縣東北隅七十里，源出三十六都觴溪，過英果花橋，逕朱坂，會渡頭橋，東過四十八都，會二十九都溪。又一支，渡頭橋溪，源出永安，合三十九都、四十五等都水，匯爲大溪，會朱坂溪，皆可舟。其聚賢里溪，源自本里，西入漳平。

火烧坑 清水坑

後坑 山深谷邃，中有石室，可坐數十人。車馬不通，民嘗阻險負固。

小汰坑

牛牯坑 地僻而險，深林茂竹，中有石室，可列數十人。

葛藤坑

湯坑 湯熱可浴。

林柄坑

南湖 茭曲湖

後湖 內有巨魚若舟。

潦下湖 尾墀湖

九重潦 高百仞，水流九層而下。

三元潦

楊柳潦 水如懸練，下有潭，其深莫測，有龍居焉。

秋陽潦 三級而下，高百餘尺，其半有陂堰、水碓。

龍馬潦 梅林潦 黃認潦

塔兜潭 在縣前潭上，有古寺塔，故名。

大潭 聯亘五里，皆爲小潭，至此匯爲大潭。有龍居之，邑人於此禱雨。五潭：曰夾劍潭，曰螺旋潭，曰大魁潭，曰鼎潭，曰雷潭。(五)

青龍潭 潭濶一里許。有石百丈，俯瞰潭中，有「青龍潭」三字隱然。世傳龍乘仙人所書，非人跡能到。

大井潭 樟木潭 天柱潭 合劍潭 雙龍潭 五龍潭 觴溪潭 大鼎潭 小鼎潭 鯢滄潭

石花潭 巖瀑飛流，衝激崖石，水花如雨，散布潭中。兩岸石壁陡絕，人跡罕到，有龍居之。

七星潭 自東巖而下，七潭相屬，曲折如北斗。

七龍潭 兩山夾澗，巨石爲底，其中凹爲七潭，上下相綴，水節級下。

石鼓潭

石獅潭 兩岸壁立，中僅橫舟，延亘三里許。

長潭

九溪潭 上流有九，下匯爲一。

通天潭 西岸壁立，旁一孔，深不可測，四時泉滴。

米櫃潭 倉潭

青池 溫池 湯池 清水池 楊井池 龍池 蓮池

瑤池 地勢環抱，周圍里許，積水不涸。

鰲池 周圍二十餘里，大旱湧，不溢涸。池東有祠，朔望則群魚浮列朝向。

雙澗泉

公母泉 兩岸相對，清泉湧出。

毒泉 在翠雲潭路側，毒不可飲。

分流泉 水分二流，陽年流右，陰年流左。

蛟龍泉 天將雨，則水先渾。

早伯泉

西竅圳 去四十七都十里許。里人廖賜募衆竅山導泉，凡數重來，灌田數百畝。

沙縣 在郡城西。東抵南平，西抵永安，南抵尤溪，北抵順昌。本漢南平縣地。晉太元四年，析其南鄉，置沙戍□，〔八〕宋元嘉中，始置沙村縣。隋改爲沙縣，尋廢。唐武德四年，復置，隸建州。後省入建安縣。永徽六年，復置。大曆十二年，改隸汀州。五代漢乾祐元年，南唐始以來屬。宋元仍舊。皇朝因之，凡二坊、三十三都。景泰三年，分二十四都至三十二都共九都隸永安縣。成化八年，又分十九都隸汀州歸化縣。今轄二坊、二十三都，統圖一百有五。

和仁坊，圖九。山曰淘金、獬豸。洞曰涵清。

興義坊，圖五。山曰鳳凰、勒馬、羅公、七朵。

一都，圖三。宋洛陽里。山曰天湖。溪曰楊溪。

二都，圖三。宋洛陽里。山曰卓筆。湖曰下龍。

三都，圖二。宋洛陽里。山口馬頭。溪曰漁溪。

四都，圖一。宋洛陽里。山曰白鶴。溪曰黃簪。潭曰湖源。

五都，圖五。宋洛陽里。山曰玉山。璣瓊、金鳳。嶺曰蔣公。崖曰龍湖、鐵碛、黃巖、虎頭。石曰試劍。湖曰上龍、蛟湖。溪曰大

磯頭、百丈。

六都，圖二。宋洛陽里。

七都，圖二。宋洛陽里。山口橫山、南山。巖曰羅巖、蕉皮、大基。洞曰雲梯、〔七〕靈龜。溪曰洛陽。

八都，圖五。宋洛陽里。山口越王、武仙、大章、青草、山儼。峰曰龍泉、蒸餅。嶺曰桐岡。潦曰小洛。

九都，圖六。宋威義里。山曰文筆、石舫、龜山、怡山、巖山、鷄籠、屏風、聚峰。峰口雙髻、祥雲、性天。嶺曰佛子、棲雲。巖曰龍鬚、龍龜、高巖、龍噴。洞曰七仙。

十都，圖五。宋威義里。山曰幼山、馬笠、插笏、鸚鵡。嶺口茶盤、蕉坑、靈應、棲霞、東衙。溪口幼溪。

十一都，圖四。宋化劍里。山曰何家、上下坂、大上、〔八〕峰口蓮花。嶺曰黃巖。石曰路傍。溪曰丹溪。潦曰柳源。

十二都，圖三。宋化劍里。山曰旗鼓、〔九〕五穀。

十三都，圖五。宋化劍里。山曰吳早、筆峰。巖曰陳震。

十四都，圖三。宋化劍里。山曰天台、金鐘、馬山、太平。嶺曰官嶺、官簪、茅嶺、苦藤、齊嶺。

十五都，圖五。宋化劍里。山曰佐山、金斗。嶺曰磨石。潦曰梅花。

十六都，圖二。宋禮賓里。巖曰殊勝。

十七都，圖三。宋禮賓里。山曰將軍、七寶、鷄樂。

十八都，圖二。宋禮賓里。山曰倪家。嶺曰三崎。巖口雷震、隆興。〔一〇〕

二十都，圖九。宋歸仁里。山曰馮山、陳山、蓋竹、三台、塗山、鐵筆、騰蛇、小寨、赤嶺、龍山、高源。峰口尖峰。嶺曰上城頭。洞曰雨林。溪曰班竹。潦曰東潦、西潦。

二十一都，圖九。宋歸仁里。山曰呂峰、池山、補陀、馬鞍、招寶。嶺口槐米、禪山、板嶺。巖曰三姑、豪峰。湖曰碧湖。潦曰陳公溪。

二十二都，圖七。宋歸仁里。山曰虎頭、鐵壁、龜山、洋山、（一一）蕉山。

二十三都，圖二。宋歸仁里。山曰龍會。峰曰蓮花。潦曰莘口銀河。

二十四都，圖三。宋歸仁里。山曰普賢、大壯、蓮花頂、莊山。潭曰蛟潭、均竹龍、籬筒、馬腹、五潦。潦曰五潭。

鳳岡北峙，七峰南列，煙崖霧壑，迴旋左右。太史溪流，澄湛無聲。其形勝也。

山

淘金山 昔有人淘金其下，故名。山多奇石，有三叢、屏風、石門、玉女洗頭盆。小洞可坐者，如永和洞、涵清洞，凡十餘。頂曠可容千餘人，邑未城時，屯軍於此，亦名屯軍山。又於此避寇焉。有泉自山巔飛下，清澈如鑑。元時樹桃滿山，花時游人甚盛。今叢薄中，往往有遺種着花。上有洞天巖，石壁峭絕，依險架閣，視定光佛，以李忠定謫居時，遇定光佛於此。佛嘗幻身為老僧，自溪南步虛而渡，忠定見之，知其異人也，追至巖下，僧鼾睡，覺，延叩姓名，土著，因就卜前程。僧援筆作偈曰：「青着立，米去皮，那時節，再光輝。」語竟，沿溪游乘虛冉冉去。及靖康改元，詔徵忠定還朝，僧偈悉驗。憶其姓名，土著，乃知是定光也，遂立步雲橋識之。巖上有小天池，邑人鄧佑文葬母巖上，石罅忽進出一泉，甘冷可給數百人。巖下有石五：曰瓊臺、曰瓊谷、曰拂雲、曰幞頭、曰枕流，謂之曰瓊臺、瓊谷者。國初，民甫脫湯火，會瓊瑄張公善教，爲之師，士庶樂之，日與觴咏其中，名臺名谷，識不忘也。又有飛瀑，下注數十丈，曰洞天巖潦。其下舊有漱玉亭，羅豫章所居。在是巖之麓，有顏樂齋、濯纓亭等景。洞天巖西，有古佛巖，元時張宗華過之，有鬼使數十，遮道飲茶。宗華手書「喫茶去」三字，鬼尋遁跡。宗華本邑人，有道誼，精六書。巖側有石，如幞頭狀，鄉人以其肖像冠服，有疾病，多往禱之。又相傳宋元間，有神僧，自楚挈瓶水瘞茲地，驅

龍物蟄其中，先時故老，有知其處者，發之，若蜂蜜，早極，出瓶，雷雨隨應。今莫識故址矣。

解豸山 在淘金山東。昔鄧將軍光布遷縣，占之云：「百年後，當出忠義士，爲國觸邪。」故以解豸名山。後邑人謂臺官相踵，謂此山之應。左爲大靈峰，上有真濟庵，爲皇朝大學士陳山讀書處。大靈山下，爲小靈峰。光布，見文蒞，邑民廟祀，宋時屢著靈跡，賜封號曰靈衛侯。鄧栢欄肅載其靈跡之文曰：「宣和八年二月，聞金人不恭，敢拒大邦，羽檄星馳，郡邑驚擾，切得兵符讀之，往往泣下。靖康改元，癸卯，夜夢有老人東嚮坐，呼所統兵，紛來無窮，皆屏息受命。老人語之：『若等善護！』皆曰：『某屬於公，敢他爲哉？』覺而異之，是何神乎？獨祐我也。忽鄭中踵門請曰：『靈衛被旨創廟，冠絕吾邦，出師者爭禱焉，未有祝文，幸夫子製之！』撰錄未果，捷音到矣。天兵所指，摧朽拉枯，因其請降，捨之使去。嗚呼快哉！肅祝文云：楛矢南飛，漫天如雪。左蔽江南，右闔吳越，嗟嗟七閩、江浙之間，凜如累卵，上壓太山。我邑在閩，浪名富庶，兵大鼎來，僉曰『可慮』。爰率儒士，列拜廟庭，冀公之庇，以竊康寧。天書夜報，賊兵稍北。奠枕舊居，實公之德。公德如山，我不敢忘，旣陳牲幣，又奠椒漿。君恩如天，公其可忽，旣福此邦，當佐上國。黃屋蒙塵，今猶海鄉，公其相之，萬國來王。」

鳳岡山 邑朝山也。

鳳凰山 山形如鳳，多產梧桐。下有鳳岡書院，宋黃灝建。其西曰西山，鳳凰西翼也。其東曰赤珠，鳳凰東翼也。赤珠山石皆赤，所謂丹山碧水，七閩之勝。

勒馬山

羅公山 在蚌洲之上，與羅灘對，故名。側有虎丘山。

七朵山 在太史溪濱。《寰宇記》：「七朵山，石壁峭立，各異情態。」宋李忠定謫官於此，各易以名，曰朝陽峰、碧雲峰、妙高峰、真隱峰、桂華峰、凝翠東峰、凝翠西峰，各賦以詩。凝翠峰，忠定嘗寓其下，有《寓軒記》。

天湖山 其巔有泉，遇旱不竭。

卓筆山 馬頭山

白鶴山 上有白鶴洞，石乳數處，歲旱禱之，乳滴卽雨。

玉山_(二) 有玉山寺。寺右有玉溪瀑，飛流約二十餘丈，名黃金井。其上有石橋，中有石窟如井，與玉山對峙者，曰鍊鉢山。

璣瓊山

金鳳山 半據南平，半臨沙邑，磅礴巖巖，數都可見。

橫山 山勢橫絕，爲允溪縣界。

南山 有峰曰華表。

越王山 越王嘗屯兵於此，俗呼越王寨。山頂有越王墓，又有石棋局。下有峽，曰漂峽。

武仙山 山勢高峻，其頂夷曠，可容千餘人。山揖縣治，俗呼報衙山，又名天馬山。

大章山

青草山 里人巖公坐化於此。巖公學佛，持戒嚴甚，人泥軀祀之。

山儼山 在大湊灘頭。俗名朝天馬。

文筆山 縣案山也。其支曰靈寶。

石舫山

龜山 在半溪洋中。

怡山 下有栖山寺，相傳昔有兄弟二人，棲禪於此。

巖山 上有佛庵，頂有寨，昔人避兵處。其右稍平，曰平山。

鷄籠山 屏風山

聚峰山 衆峰一簇，奇秀可愛，但爲外山所掩。雨雪初霽，白雲繞之，巒岫顯然，一奇觀也。上有天平石，平廣如棋枰，可容人數百。

幼山 《寰宇記》：孤峰上聳直上，約三十里，盤根約三百里。上有普照寺、宴坐峰、鐵碓石、聚星石、忘憂石、降魔石、天威石、藏雲塢、歸雲洞。又有風洞，廣徑尺餘，風生洞中。山之東，有石如盤，五更可以觀日出。宋羅畸爲福州司理，坐忤使者，投檄歸隱此山之下。有「脚底搖青寒樹杪，面前凝翠亂峰巔」之句。其脊曰黃竹崎，陰天山行，前後兩相失。山下有龍峽。皇朝邑人魏知縣文紳，善禱雨。其術用大蝦蟆一隻，作火字四十九道，納之腹中，立壇瘞之山上，三日而雨至，暴雷震電。雨罷，於瘞所失蝦蟆所在，但不敢常試。一日，卽龍峽立壇。二日，夜忽大雷雨，天明視之，門前池水皆涸，池魚無小大，各剖爲二。文紳懼，遂不復試。又山中有獸，似人。生毛黑色，身長丈餘，逢人卽笑，鄉人謂之山揶揄，或野人也。《爾雅》云：「狒狒，如人披髮，迅走食人」，卽此獸？

籠山 與幼山並峙，自下而望，乃似高之。及上幼山，則俯視之矣。

馬笠山 高出群山，如人騎而笠者。

插笏山 鸛鶴山 何家山 上下坂山 大广山 鼓旗山 五穀山

吳早山 俗呼西金山。

筆峰山

天台山 西巖之巔，界南平、順、沙。內多古洞、仙蹤，祀張、蕭四真人。又有石庵，時或米穀自飛而至。春秋之際，三縣人多來祈禱。下有屏山。

金鐘山 馬山 太平山 佐山 金斗山

將軍山 山勢高峻。宋紹定，山寇所集，陳韓卽此破之。

七寶山

鷄槃山 俗呼馬岵頭。險絕可守，通將樂之隘也。

倪家山 馮山

陳山 山本尖也，夷之使平。鄧茂七寨於此，名陳山營。

蓋竹山 山有貴人峰。

三台山 塗山 鐵筆山 騰蛇山 小寨山 赤嶺山

龍山 山最高峻，雖不及幼山，遠望若並峙然。

高原山 尖秀孤拔，如雙筆然。

呂峰山 山盤據二十、廿一、廿二、廿四諸都，高出漢表，冬常積雪。山頂舊有泉七泓，俗呼呂七塘

潭。夏月，鄉人聚牛寄牧於此，乃不致瘴，謂之過夏。又山產紅泥，可以糞田。每三歲，聚里人激水一洗，隨畝灌注，三年大饒，一方賴之。皇朝學士陳山《呂山望雪詩》：「山落鴻濛外，名傳呂七家。寒光傍玉女，瓊彩散瑤華。」

池山 補陀山 馬鞍山 招寶山

虎頭山 高入雲際，勢如展旗，爲廿二、廿四兩都之鎮。下視沙城，如在履舄。

鐵壁山 山石鐵色，奇峭如壁。皇朝尼常淨坐化於此。常淨，徐姓，歷東女，鞠於富民。洪武間，主翁垂沒，托以遺孤。常淨鞠之。既長，盡歸以所遺貲，去爲尼。蔬食數十年，忽爾靈悟。一夕，有盜數人，欲禦之。戒侍者曰：「今夜客來，可具齋供待之，席若干。」有頃，盜至，出迓曰：「山門僻左，無可相款，薄具齋供，瀆公一飯。」諸盜見供設與人數合，相顧失色，遂不敢犯。年九十，坐化鐵壁堂。

龜山 垵山 蕉山

龍會山 在莘口對過。衆山環捲如龍蟠。里人鄧法坐化處。法得佑正大師饒松心印，嘗自杉口歸，渡，以笠爲舟，以杖爲楫。後歛柴自化，其所遺法器、法衣，不火亦焚。又有坐化臺、試劍石。

普賢山

大狀山 在黃淡坑。於衆高山中，獨爲挺出。

蓮峰頂山 邑溪南龍山之祖。山自連城而來，逶迤至此，卓起一峰，中分九派。分蔭溪南諸村落，絕頂平曠，可數十丈。時有異香冉冉而聞，每日必有一物直日，或蜂，或蝶，或鳥，或虫，旋繞蔽之，風勁疾，至者亦不能久立。或云仙靈窟宅也。

莊山 峻嶺之上，忽平曠爲村落，居多壽人。側有真人峰。

龍泉峰 山自尤溪縣界分三隴蜿蜒而來，至此崛起三峰。中有龍泉寺。

蒸餅峰

雙髻峰 在水南。宋陳正式詩：「屹立一峰高插天，石疊髻撮雙其巔。昨朝乘興躡履上，眼界足以吞山川。是時雲散雨初霽，洗出萬象春爭妍。縈青繚白望不斷，積蘚萃塊觀人煙。恍疑身在不周頂，揮斥八極誠所便。兩腋生風欲仙去，誰能與世同腥羶。身輕足健興未已，冷笑韓公登華指。王生不見盡歸歟，更約再來餐石髓。」

祥雲峰 性天峰 蓮花三峰 尖峰

蓮花峰 宋經略使鄧杲居其下，號蓮花居士。

東衙峰 有石曰棋盤、曰飯甑。

蔣公嶺 蔣公，宋紹聖中道人也。有石名蔣公石，亦曰虎跡石，以虎馴其傍云。

桐岡嶺 多產梧桐。又曰黃泥，曰倒油，曰章坑，皆蜿蜒起伏數十里。

佛子嶺 棲雲嶺 茶盤嶺 蕉坑嶺

靈應嶺_(二三) 有靈應潭，高十餘丈。

棲霞嶺 東衙嶺 黃巖嶺 官嶺

簞簍嶺 上有羊角崎，二峰玉立漢表，俯視環邑，諸山如翠濤白浪。

茅嶺 苦藤嶺 齊嶺 磨石嶺

三崎嶺 路通將樂。嶺下一潭。相傳有龍居焉。

上城頭嶺 有石曰靈龜，曰設帳，曰牙笏，皆鄧綰欄肅所命。

碗米嶺 禪山嶺 板嶺

龍湖巖 下有龍湖，上有佛庵。

鐵碓巖 一名羊蹄巖。

黃巖 下有玉山寺，寺右飛流二十餘丈，名玉溪瀑。上有石橋，有石窟如井，名黃金井。

虎頭巖

羅巖 上有羅巖嶺，通尤溪界。

蕉皮巖 下有蕉皮洞，深廣可一里，清泉怪石，樹木陰翳。

大基巖 巖有聖泉。昔有何姓者，忘其名，嘗尹處州龍泉縣。夜夢一美婦人謁。詰旦，縣人禱雨仙姑祠，得聖水一瓶，爭取不均，來訟於尹，尹悉收之。任滿攜歸，分畀其二子一女，一藏大基巖，一藏八都泡塢，一失藏所。歲旱，鄉人啟瓶取水，水輒湧噴一二丈，遇蛇虺則雨，至今猶然。其在泡塢者，名琅泉，牛踐瓶破，水入地成泉，流至琅口街明興堂下，其味甘美。

龍鬚巖 龍龜巖

高巖（二四） 下有石，曰蝦蟆。有潭曰高山巖。潭水光澄碧，巨石中屹。相傳有龍潛焉。右爲飯甑巖。

龍噴巖 屹立大溪中。相傳昔有龍蟠其上。至今鳧鷖無敢集止。歲旱，於沙磧中築壇斬鵝以祭，則

輒雨。

陳震巖 殊勝巖

雷震巖 俗呼雷霆巖。下有佛庵，中有龍井，日夜如雷聲。

隆興巖 觀音巖 頭陀巖

蓬仙巖 以祀安溪縣之清水祖師。前眺尤溪，後俯沙邑。六月無暑，四時可絮。佛堂後有石洞，光

明徹達，可坐千人。嚴寒反燠。

三姑巖 豪峰巖

涵清洞 縣西瓊山亭之下，俯臨溪水，中可容十人。後有源泉洞。

梯雲洞 靈龜洞

七仙洞 洞凡三。一深廣莫測，昔人有束炬入者，至一處光明可見，前有流水，上有石額曰「請君回首」。因不敢渡，比反，已窮日矣。一中構佛宮。一中有流水，滴乳成佛相者。又其右一洞，昏黑不知深廣，外聽有聲如雷。土人云：「蝙蝠飛聲也。」其大者狀如老鴉，亦有白色者，網之可以饌，亦云補虛。蓋久食鐘乳，理或然也。洞口有蕉花石，石倒懸若蕉花，正覆洞門。又有石柄如梢，長可數丈，皆自然天成。

雨林洞 一名金盒，洞深廣可容千人。佛庵當其口，奇偉可玩。中有二石乳滴泉，隨人多寡，取用不竭。

試劍石 在高砂大溪中。長約三丈，截爲兩段，相傳仙人試劍。又名鯉魚石。後鑿爲迎仙橋，石有

肝膽痕如魚腹然。

路傍石 皇朝嘉靖甲辰，秋七月既望，大路傍有巨石一片，方數丈，忽暴雨震電，石傍數十丈昏黑莫辯，隱隱雷鳴不止。約二時頃，乃雨晴雷止。行人見石上刻五十七字，大六寸，皆如符篆之文，又有如禹刻者，竟莫辯何字也，今歲久糊模矣。

仙洲 縣治東門對岸。一名山洲，一名崇安洲。溪傍，三面阻水，唐時崇安鎮在焉。

川

太史溪 縣治前七峰下，十里澄碧。宋李忠定以太史謫監河稅，觴咏於此。猶昔人名郎官湖也。溪發源汀之寧化、連城，及漳之龍巖，皆會於吉溪。自是合三溪爲一。東溪會梅溪、左坂溪、鬱溪、固發溪、黃沙溪、荆山溪、館前溪、碧湖龜溪、洋鄉。至縣治東，朝陽峰下會北鄉溪。自是又合二溪爲一。逕縣南門，會洛溪、洛陽溪、高砂溪、九曲水、玉溪、楊溪、丹溪、漁溪、下湧溪、篳管溪，至沙溪口，與順昌、將樂合流，直抵延平府下，郡人謂之西溪。皇朝嘉靖丙辰四月大水後，太史溪中高山巖下，忽豎起一石，狀類朝冠，潤八尺，高丈許，屹立中流，且其傍石有舊刻云：「馬小十一乘」五字，又倒刻云：「政和元年十二月二十八日記。」溪中有洲，曰長洲，俗呼金沙墩，長數百丈，一水中分之。宋殿撰《羅崎靈衛廟碑》，云：「長洲亘其左，有潛蚪出水之勢，又謂之蚪洲。中有千餘家，後漸落爲蘆葦之場。」

鬱溪 源出徭田。

固發溪 源出自獲村。

黃沙溪 源出歸化鐵嶺溪。至淳化巖前合諸水三十里，出黃沙口，入太史溪，是人沙水北條之始。

洛溪 源出尤溪縣界，北流與卜洛溪會，又會雙溪、塵程溪，入大海。宋宋南強爲令，有善政，其去也，道出此溪之上，邑人名路曰甘棠，勒碑曰《甘棠碑》。

玉溪 源出大竹下太源，經百丈漈，南流入大溪。

楊溪 源出窟溪潭，出梅花漈，入大溪。

下湧溪 源出天湖之南，流入大溪。

漁溪 源出南平縣大源里。人大溪。有漁溪湖，鄧耕欄所居。溪灣有石，東西對峙，曰鑼鼓。又舊志：「有石倉，云能出米，供行人糧乏。」

簞簪溪 源出南平縣界，出湖光橋，入大溪。

洛陽溪 亦曰琅溪。源出尤溪縣濁水，西流過漕溪，出漈峽，繞洛陽溪，入大溪。

幼溪 源出幼山，合柳源之白溪，爲雙溪口。

丹溪 源出西坑、上广、葱坑，三水合流至丹溪橋，過隱相橋，入大溪。

北鄉溪 發源將樂縣界，南流會湧溪、庇口溪、幼溪、傑溪，至縣治東，入太史溪。

湧溪 源出將樂縣界。

庇口溪 源出順昌界，自湧溪下，與赤溪、黃沙溪會。赤溪源出化劍里龍興寺山，流十里會於是溪。

黃沙溪 源出順昌縣界，流三十里，會於是溪。

傑溪 源發傑村。

班竹溪 在善硤園。有竹可燭，燃畢無灰。相傳昔有人借宿民家，辭不納，曰：「孤村無燈燭可照。」

夜。」其人曰：「溪前嶺竹皆燭也。」教取以燃，遂傳至今。

下龍湖

上龍湖，四面皆石壁。其中積水爲湖，龍居也。

蛟湖

碧湖，其水湛碧，中有「勒馬三公石」。

小西湖，在荆川水西，大溪之濱，隔以洲沙，四時不竭。中出一魚，小如髮，潔白甘美，俗名鯢狗，或卽鯢魚子也。三四月有之，餘月不見。

湖源潭，小坑中石潭深碧，土人傳爲龍窟，旱禱輒應。

蛟潭

均竹龍潭，潭有龍居，水流分二路。濁者旁出，清者入潭。舊旱，鄉人禱雨，以磁瓶繫長繩，置表其上，有頃，瓶並表自入水中，若表有誤字，仍浮披水上示人，其靈異如此。

籤筒潭，潭石狀如籤筒，板投之，久輒復出，如抽籤狀。

馬腹潭，其石如馬，水流人腹，極深。

五漈潭，五漈相連，清深莫測。

大淘口潭

西溪上流十四灘，牛角灘、上黃石灘、張司空灘、荆冲灘、斑竹尖灘、三姑巖灘、弦瀨灘、蕉峽灘、三花灘、牛濟灘、黃石灘、火劫灘、歌月灘、水磨灘，凡十四灘。而蕉峽、黃石最險。

西溪下流三十灘。窮灘在太史溪下。騰龜灘。湓灘。大磯灘，一名大姨。小磯灘，一名小姨。池倉灘。雷霹靂灘，宋鄧肅詩：「嶺似車盤方稅駕，灘如雷霹更行舟。」張婆灘。排港灘。石鶴灘。青龍灘。將軍灘。靈港灘。鷓鴣灘。張判官灘。雷濺灘，俗呼螺紋灘，港灣環若螺旋然。玉山灘。胡師曲灘。白苧沖灘。弦沖灘。玉陂灘。牛穴灘，灘下石壁夾峙，潭滙其中，一名漁溪潭。佛子灘，一名囡仔灘，中流一巨石，狀如蟾蜍。相傳每遇暴漲，有一小豎格鬬石上。篙師見之，舟往往溺於迴湍。後有異人經此，繪金仙像於石，其怪遂滅。上書「佛子灘」三字，行舟以見金佛爲候。諺云：「水浸佛肩，不敢行船。水浸佛足，舟行宜速。」樂灘，旁有沙洲，其居人多樂姓，故以名灘。烘肉灘。三涉灘。伊周灘。水噴頭灘。刀劈石灘。金砂灘。凡三十灘。

大磯頭濤 白丈濤 小洛濤 柳源濤

梅花濤 瀑流飛注巖石數十丈，激沫如梅花然。濤下石窪清深，名窟溪潭，相傳有龍居焉。

東濤 洋溪濤 陳公溪濤

莘口銀河濤 飛流百餘丈，如銀河下注濤中。有石黃色，狀如牛，名黃牛石。

西濤

瑤池 縣溪南。池水四時清澈。相傳有月影映水，毋論晦朔，俗呼月池。

龍池 一縣東二十里，泉溫，相傳有龍潛其中。一縣治前，水九曲，名九曲龍池。

熱水池 其水夏冷冬溫。

王母池

石井泉 漿溪泉

〔校記〕

〔二〕「都十五」，下文實列十六都。

〔三〕「統圖三十一」，下文實列三十四圖。

〔三〕「吉坑」，下文作「急坑」。

〔四〕「朱櫨」，下文作「米櫨」。

〔五〕「雷潭」，各本原作「雷澤」，據上文改。

〔六〕「沙戕」下，各本原殘一字。

〔七〕「雲梯」，下文作「梯雲」。

〔八〕「大十」，下文作「大」。

〔九〕「旗鼓」，下文作「鼓旗」。

●〔一〇〕「巖」，各本原作「嶺」，據下文及《八閩通志·地理》改。

〔一一〕「洋山」，下文作「坪山」。

〔一二〕「玉山」，各本原作「三山」，據上文及《八閩通志·地理》改。

〔一三〕「靈應嶺」，各本原作「雲應嶺」，據上下文及《八閩通志·地理》改。

〔一四〕「高巖」，各本原作「高山巖」，據上文及《八閩通志·地理》改。

閩書卷之二十

方域志

延平府 尤溪縣 順昌縣 永安縣

尤溪縣 在郡城南。東抵閩清，西抵龍巖，南抵德化，北抵沙縣。本晉延平縣之山洞。唐開元二十二年，經略使唐修忠招諭其酋長高伏來歸。二十九年拓爲縣，隸福州。南唐滅閩，以爲制置鎮。居二年，割隸劍州，宋、元仍舊。皇朝因之，爲都五十。景泰三年，析四十至四十三共四都隸永安。嘉靖十四年，析三十至四十八共十五都隸大田。今轄都三十一，統圖六十一。

常平鄉

進溪里

一都，圖二。

二都，圖三。山口七星。石曰羅庚。

三都，圖二。山曰二峰。嶺曰戴公。洞曰凌霄。

四都，圖二。嶺口大雪、小雪。溪曰胡覽。

五都，圖三。山曰天台、鶴籠。嶺曰黃砂、茶峰。巖曰賴巖。石曰寶珠。潦曰白頭。

六都，圖一。山曰仙山。嶺曰杉嶺、佛嶺、安州、（一）東嶺。巖曰銅盤。潭曰曲尺。（二）

七都，圖十。山口伏獅、雙峰、公山、文山、錦屏、碧鷄、眠象。峰口蓮花。嶺口小主、小村。峽曰藏劍。潦曰懸劍。

八都，圖一。山口豸角。嶺曰褒溪、關嶺。洞曰白雲。石口三龜。潭曰沅潭。（三）

九都，圖一。嶺曰秋竹。洞曰天成。潭曰鬼坑。

興文鄉

安福里

十都，圖一。山曰應仙、董山。湖曰沅湖、龜湖。潦曰百丈。

十一都，圖一。山曰五雷。峰曰皇華。嶺曰車桶。

十二都，圖一。山曰金鷄。嶺曰丹溪。

十三都，圖一。

十四都，圖一。

十五都，圖一。嶺曰人帽。巖曰石門。

長安里

十六都，圖二。

十七都，圖一。山曰騰雲。

十八都，圖二。山口石井、大峰。嶺曰分水。潭曰落星。

十九都，圖二。山口白巖。

二十都，圖五。山口芝山、席帽。峰曰珠峰。嶺曰黃龍。潦曰楊柳。陂曰官陂。

二十一都，圖二。嶺曰板嶺。潦曰瓶峰。

和順里

二十二都，圖二。山口蟠龍。

二十三都，圖一。山口仙靈。嶺曰分枝。巖曰白鶴。

二十四都，圖一。石曰龍爪、石牛。湖曰石榴。

二十五都，圖二。山口靈旗、鸛鷄。峰曰文筆。嶺曰百丈、飛龍、松山。潭曰莒溪。

二十六都，圖一。山口龍門。洞曰龍門。

二十七都，圖一。山口金樓、羅漢。

進賢鄉

大田里

二十八都，圖一。山口蓬萊。嶺曰麒麟。巖曰小嵩、竹峰。石曰馬鞍。

二十九都，圖一。山口靈龜。嶺曰黃坑、馬軍、鐵山、古竹。巖曰流溪、蓮莒。石曰石龜。潭曰莒溪、鑿柄。

豐城鄉

逕田里

四十九都，圖二。山口保峰。

五十都，圖二。嶺曰藍嶺、新嶺。

獅籠虹橋，東巖西津，雙峰挂口，二水明霞。龍臺牛嶺聳其勢，玉溪金鯽湛其泉。其形勝也。

山

伏獅山 自雙峰山南隴，逶迤起伏三十里，爲貴人峰。峰迴突聳，爲縣鎮山。其旁出環抱，曰屏帷山。其山腰，山曰馬鞍山。縣人歲爲竈，必取土於是山，謂龍脈也。

雙峰山 一名雙髻山。兩峰峭拔千仞。昔有陸道人廬此，爲邑人祈雨，曝身山巔，山腰雲暝雷轟，四郊霧霏，而峰頂日色如常。巔有潤泉，瀉玉濺珠，有堂以祀觀音，是生異草二種，一如婦人束髮篋，名觀音篋。一如樺燭，可灌油照夜，名觀音燭。其陽有觀音洞。陸道人覽勝得一石室，見其泉石可愛，他日窮巔崖，見有小石塔在崖隙中，異之。謀衆建洞，方鑿治尋尺，忽得佛像，因以名洞。傍有泉，深可尺許，不溢不竭。其左有小雙峰山，視此山差小。

玉釜山 在伏獅山右。一名登高山，邑人九日所游。

帷山 參拜山 七星山 二峰山 天台山 鷄籠山

仙山 山勢凌雙峰之巔，一石穴吐吞雲氣，深不可測。相傳有牧豎擲石其中，聲隱隱若雷，卽有異禽飛出，鄉人相戒勿褻也。

公山 在青印溪南。其麓爲南溪書院。宋朱文公產此，後人以似「公」字，名曰公山，亦名其峰曰毓秀。

文山 與公山相對。其下有嶺曰高原。

錦屏山 在公山左。

眠象山 牛嶺在其上。縣中十景，此其一也，曰牛嶺耕煙。

應仙山 山極秀麗，凌歷絕頂，群峰一覽在目，舊名鷄心山。

董山 上有石室，相傳爲董真人煉丹所。

五雷山 金鷄山

騰雲山 其山絕頂可以望福州。山中有庵，早禱輒應。下有二石井，琢削天成，每欲雨，必有龍緣崖上下，或盤旋波間。

石井山 下有龍潭。

大峰山 白巖山 芝山 席帽山 蟠龍山

仙靈山 唐末有王道人者，結廬煉丹其上，不知所終，人仙之。山頂有十奇，曰雙鑑池、曰靈泉井、曰飛昇壇、曰卓筆峰、曰宿雲洞、曰鷹嘴巖、曰白雲庵、曰棋盤石、曰獅子石、曰仙樂臺。

靈旗山

鷓鴣山 三面壁立，鷓鴣灘環其下。一徑盤旋至山巔，如羊腸然。皇朝嘉靖間，鄉人避亂於此。

劍門山 唐乾寧四年，建劍門庵於此。宋安分庵主，往參大慧，行次江干，仰瞻宮闕，聞街司喝：「侍郎來！」釋然大悟。因作偈曰：「幾年箇事掛胸懷，問盡諸方眼不開。肝膽此時俱裂破，一聲江上侍郎來。」

龍門山 高聳千餘丈，巔有石泉，歲旱不涸，相傳有龍居焉。洞口廣纔四尺，而深莫測，中有石龍狀，

及棋局棋子狀，石竇滴水如雨，又名滴水洞。人百步許，蝙蝠如鴉，百千爲群，鄉人取其糞以擁田。宋朱松游龍門洞詩：「虛簷日偃仰，蒼壁對橫截。柱藤危磴響，濯足細泉潔。束薪取奇觀，滴乳嘗嘉設。摩石驚蜿蜒，信矣耆舊說。」

金樓山 翠聳雲間，狀如樓閣。

羅漢山

蓬萊山 一名九仙山。峰巒秀拔，人跡罕到，上有金鯽池、石棋盤、黑白二石子、煉丹竈，時有仙人來往，髣髴聞樂音。昔鄉人林五樵山中，遇二人奕，徙倚觀之，見二白鶴啄楊梅，墮顆，令拾啖之，遽失奕者所在，抵家辟穀，知人休咎。

靈龜山

保峰山 下有保峰潭，有龍居之。

蓮花峰 宋鄧杵居其下，自號蓮花居士。峰頂有天湖，杉篁蓊翳，湖水紺碧，魚鱉克羽，人不敢取。宋時每見五色雲開，並蒂蓮生，歲則大稔。皇朝田頊《天湖詩》：「天湖雪深山未分。伏獅眠象皆春雲。面茲梅花獨爛熳，宜爾杖屨來繽紛。幽地禿鶴濕不下，峭壑哀猿聲相聞。捫蘿困倚風杉屨，迥立蒼茫江霧曛。」

牛角峰

皇華峰 有亭名仙亭。宋宣和六年旱，邑人禱雨，忽有神降於巫，自稱神姬馬姓，欲托跡山下，致霖蘇民，語畢隨霧。

珠峰 文筆

戴公嶺 嶺道紆迴，凡三十二折。宋正言鄧肅詩：「天寒歲暮兩無聊，訪戴寧辭千里遙。直上洞天三十六，馬蹄迤邐步瓊瑤。」

大雪嶺 又有小雪嶺在其下。

黃砂嶺

茶峰嶺 下有百級嶺。

杉嶺 佛嶺

安州嶺 有石巋然臨潭上。俗呼虎頭山。

棗嶺 縈迴可五里。有瀑。

小王嶺 道通漳、泉，艱於躋攀。邑人朱綬別開嶺道，是嶺遂廢。

小村嶺 褒溪嶺 秋竹嶺 關嶺 車楯嶺

丹溪嶺 又名桃木嶺。縈迴可五十里，自嶺址至巔，凡三疊，皆數百丈。回視數十里，中川源隱隱，

溝塍棋布，如在雲霄間。宋朱松《丹溪道中》詩：「日出露芒重，涼生風葉翻。秋杭已照眼，社酒飲暮村。」
皇朝邑人田頊詩：「丹溪嶺頭，流水濺濺，上有石蹊，盤雲造天。嶺頭流水，瀾瀾西下。祈寒晨登，凍顏爲赭。高山多風，刮膚裂脣。斧水作糜，指詰不神。熊蟄窟棲，鳥鵲林號。馬瘖不前，客行奈何。」

大帽嶺 分水嶺 黃龍嶺 板嶺

分枝嶺 南臨德化縣，嶺居二縣界。上有大樹，南北分枝。又有關，俗呼大嶺關。

百丈嶺 飛龍嶺 松山嶺 麒麟嶺

黃坑嶺 黃茅苦竹，澗水潺湲。

馬軍嶺 昔人嘗屯兵禦寇。

鐵山嶺 產鐵。

古竹嶺 黃林嶺

藍嶺 嶺之石塔皆作藍色。

新嶺

賴巖 上有怪石萬數，鉅者如屋，綿亘可三里，宛然一洞府也。洞口緣梯而上，石室連屬，皆有竇如戶，俛而入其中，流泉可愛。石罅如牕牖者數百所。宋時常有怪孽，變幻多端，僧智孜跏坐巖中九晝夜，其怪遂滅。建寇葉亮犯縣，鄉人匿其間，家室以完。

銅盤巖 懸崖峻峭，竹樹陰翳，鳥道縈紆，澗泉似雨。巖下有潭，禱雨輒應。

東巖 一名虎窟。懸崖陡峻，前逼流水，中有一窟，可列坐數十人，縣中十景，此其一也。

彭坑巖 有巨石疊其巔，或云有物憑之，夜發火光，間出虛響，如鼓角聲。

石門巖 白鶴巖 珍巖 小嵩巖

竹峰巖 上有洞窟九。

流溪巖 高約百餘丈，其崖石皆鐵礦，可冶也。

蓮莖巖 巖石峭絕，多猿。

高峰巖 頂有佛庵巖窟，湧泉如深淵，有龍潛焉。

凌霄洞 山崖壁立，惟一竇可躋。宋時鄉人卽以避寇。

白雲洞

天成洞 在褒溪之傍壁上，儼然龍藏。波浪鱗鬣，畫筆遜工，石刻「天成」三字。

羅庚石 石圓若盤，中一線如針，分子午。

寶珠石 在山澗中。相傳嘗產異珠，光彩夜發。

三龜石 三石似龜，曝於溪上。

方石 興文溪側。俗呼頭巾石。

龍爪石 在西華村。有池方廣約六丈，池中一巨石，青色，高七尺許，龍爪痕人石者四。

石牛石 石如卧牛，天欲雨則汗。

馬鞍石

藏劍峽 相傳張真人斬蛟劍藏峽中。

洗馬洲 應龍洲 尤溪洲

白沙

川水利附。

青印溪 源出縣西沙縣界東，迤邐會山坑溪、王衛溪、牛皮溪、新坑溪、渡源溪、胡鼈溪、飛溪、戴公溪、杉溪、莒積溪，凡十又一溪。逕縣前入湖頭溪。縣宣化門外，平水灘上，有石高丈餘，曰青印。宋南渡

後，露出溪上。先是，唐澄槃僧妙應留偈曰：「塔前青印見，家家親筆硯。水流保安前，允溪出狀元。」宋慶曆中，林積登第，尤人始知學，逮宣和，士風漸盛，南渡後石露，則弦誦比屋矣。又，青印溪上有虎跳潭，潭上雙崖相逼，虎可跳也。潭水澄深，有龍潛焉。歲旱禱雨，投以鐵龍，頃有白龜浮水面，則雨至。宋賜廟額，曰豐澤潭。

湖頭溪 源出泉州德化縣。至尤溪境西北，迤邐會湯泉溪，巖下溪，牙坑溪，上蹠溪，上、下池溪，小湖溪，黃乾溪，石堰溪，莢洋溪，莽蕩洋溪，石圳溪，枕村溪，湯溪，白石溪，上芹溪，潦頭溪，蓋竹溪，橫背溪，黑藤溪，青印溪，凡二十源。自是轉北流，是謂湖頭溪。至尤口涵，會劍津。按《太平寰宇記》謂允溪源發雙髻山下。殊不知一源出泉德化縣白石上斤，一源出漳龍巖縣。其長幾三百里。若雙髻山，則流細而短，蓋前記未及考也。溪中灘凡二十六。曰大截，占湖頭溪上流。上蹠、上下一池，一溪會小湖溪，激而成灘。德化縣於此截界，故名曰側枕，有石狀如側枕。曰春牆，兩旁石壁，水衝其間。曰帶，延袤七里如帶。下此爲樟木潭，潭下流六灘聯屬，曰魚煎、曰鷓鴣、曰樟根、曰大連興、曰小連興、曰大石頭。下三十里爲莽蕩洋。洋之下凡八灘，曰吳令、曰大覽、曰小覽、曰大昌、曰小昌、曰三夷、曰鍾山、曰連乾。縣是疏爲張四岔。下流又八灘，曰猿、曰白羊挨、曰大極盡、曰冲、曰沈、曰黃坑、曰牛角、曰繪。以上諸灘俱在湖頭上流。下一百一十里，爲灘三十，注尤口涵。

枕溪 兩山崇擁，石壁如削，瀑水下注，高千餘仞。山岷放木筏至此，躡蹻循山行，其筏隨水自射潭底，移時浮出，或了無寸木可尋者。

胡鼈溪 溪有龍潭，上有龍祠。

曲尺潭 以形名。石壁嵌巖，臨於潭上，瀑瀉如練。多產鮪魚，不可漁釣。

沅潭 潭岸側有仙人石，昔人鑿之，有聲轟然，人懼而止。

鬼坑潭 昔鄉有陳歸者，見黑龍橫亘潭面，奔語鄉人。士人王度狀形，刻石壁上，以表靈異。今祈雨，以鐵攪潭，有赤蛇見，卽雨。

落星潭 上有石七，錯落如星。潭水深碧，有龍潛焉。宋侍郎陳暘自閩清來，致奠禱雨，雨隨霽。

芑溪潭 潭上石壁矗起，履之瓏瓏有聲，嵌巖之下，湍流浩淼，有龍居焉。舊俗遇旱，則投鐵龍以祈雨。宋紹聖三年，邑久旱，令張溥升壇行事，未竟，油雲四作，繼成甘霖。溥構祠以答靈貺，塑繪方作，龍見潭上，蜿蜒裴徊，鱗角牙距，纖悉呈露。崇寧元年賜廟額曰利澤。紹興初，守廟僧病久不瘥，自沈於潭。潭畔樵人忽聞山足如雷震，俯見石井中，有物鱗鬣森聳，火光赫然，俄而涎沫漲湧數丈，遂失井所在。紹興八年，邑久旱，禱潭不應。或以樵者之言白令蘇灝。灝卽失井處禱之，卽復雨。潭中有石龜、石天，將雨輒汗。左有石魚，石長丈餘，大可五尺，首尾鬣鬣畢具。

鑿柄潭 潭側削壁萬仞，猿獠千百爲群。潭下有苦竹潭，潭潛五龍，人嘗見之。

大井潭 會石堰、菱洋二水。山陡水深，有龍居焉。

水陸潭

沅湖 兩岸巉巖怪石，綠波泓渟，可五里。又有龜湖，亦泓渟三四里。綠波怪石，隱映間出。

石榴湖
白頭潦 懸劍潦 百丈潦 楊柳潦 瓶峰潦

長坑泉 發源毓秀山，四時滔滔。朱文公詩所謂「源頭活水」，卽此也。

通駟井 在縣治西通駟坊。味甚甘冽，下有石斛，瀦水不踰尋丈，供汲不涸。嘗有金鯽泳其間，宋秘書黃聲刻石紀異。

靈源井 在靈源院前。米價高，則泉溢。

官陂

順昌縣 在郡城西。東抵南平，西抵邵武，南抵沙縣，北抵建寧。三國時，爲吳西南之板鄉。唐貞觀三年，以其東南二鄉，置將水場。嗣聖四年，分南鄉將水口爲獨科鎮。景福二年，改爲將水鎮。尋改爲永順場，隸建州。五代漢乾祐元年，南唐始置順昌縣，隸劍州。宋熙寧三年，割劍浦縣交溪鄉益之。元仍舊。皇朝因之，領六坊、二十八都，統圖五十八。

鯉潭鄉

阜城坊，圖一。

宣化坊，圖一。

興賢坊，圖一。

愛民坊，圖一。

崇德坊，圖一。

安靖坊，圖一。

石溪都，圖一。嶺曰蜚沙。洞曰靈龜。石曰郎官。溪曰棋溪、石溪。潭曰溪水、蜚人。

石豆都，圖二。山曰龍山、屏風、五馬、板山、魚袋。峰曰獅子、文筆、多角、丫髻、祥雲。嶺曰溝嶺。巖曰柏木。石曰虎跳。溪

曰竹步。

水南都，圖一。山曰貴人、超華。嶺曰范家、泗洲。溪曰泗村。泉曰瀑布。

驛站都，圖一。山曰吳地。峰曰旗峰、君子。巖曰合掌、凌雲。洞曰赤松。

吉舟都，圖一。巖曰吉巖。

石湖都，圖一。嶺曰石湖。

仙源都，圖一。山曰華陽。嶺曰佛嶺。巖曰烏石。石曰龜石。溪曰密溪。

交溪鄉

長壽都，圖三。峰曰七寶。洞曰洋沽、白巖。谷曰蒙谷。溪曰水南。

西峰都，圖二。山曰大明、巖山。溪曰交溪。潭曰谿水。

義豐都，圖一。

廣福都，圖一。

寧安都，圖二。山曰寨山。

靖安都，圖三。山曰鳳山、景巖、圓山、五峰。峰曰高峰。嶺曰交槎、〔四〕桂嶺。谷曰池坑。石曰盤石、仙字、浮玉。溪曰交

溪。

婁杉都，圖五。山曰寶山。溪曰婁杉。

招仁鄉

大幹都，圖二。山曰幹山、魚山。溪口大幹。

慈悲都，圖一。山曰七臺、鉢盂。

莒口都，圖四。山曰片山。嶺曰楓嶺、雒嶺。溪曰莒尋、順陽。池曰方池。井曰鱖魚。

富屯都，圖二。山曰靈山。溪曰富屯。

安富都，圖二。溪曰沙溪。

白水都，圖三。嶺曰赤嶺。

昏田都，圖一。

順陽鄉

崧溪都，圖二。山口九龍。溪曰順陽。

壽榮都，圖一。山曰西巖。泉曰冰壺。

田溪都，圖一。

興賢都，圖二。山曰梅仙。巖曰寒巖。溪曰田溪。

仁壽都，圖二。山曰鼓山。峰曰吳道。巖曰谷巖。

桂溪都，圖二。山曰屏峰。

杉溪都，圖一。山曰洪山。

介西江東廣之衝，多角北立，五馬南障，雙峰仙掌，列在東西，而清溪一派流其下。其形勝也。

山

龍山 宋黃裳記：「南望一峰若游龍。」卽此也。余良弼創庵山下，自號龍山居士。《宋史》有順昌山人者，隱居順昌山中。靖康末，有避亂入山者，深人，得茅舍，主人風裁甚整。怪而問曰：「諸君何事挈妻孥至是耶？」因語之故。主人曰：「亂何自起？」衆爭爲言。主人嗟惻曰：「我父，仁宗朝人也，自嘉祐末卜居於此，因不復出。以我所聞，但知有熙寧紀年，亦不知於今幾何年矣。」順昌山人所居，不知是何山也，姑首附於此。

屏風山 山頂之右，有怪石礪礪如龍頭，泉清冽出。石罅上刻「龍頭巖」三字。

五馬山

板山 相傳有得道者，於此上昇。

魚袋山 貴人山

超華山 周圍甚廣，西北人邵武境。有泉出石罅中，分爲五澗，東出者名橫溪，北出者名李坊，南出者橋所跨澗也，其流俱入順昌。西北二澗，俱入邵武境。山之幽曠處，有田園池塘，居民數十家，鷄犬聲在煙霞竹樹間，有世外意。有嶺名寶嶺，舊出光焰，人謂有寶氣焉。

吳地山

華陽山 三峰並列。山半有石門，高廣數丈，盛夏亦寒。中峰之頂，有仙水，壇石常潤，旱禱輒應，一名仙水巖。

大明山 孤峙峭立，見日最先。左有巖名白鶴，相傳有道士化鶴飛昇。巔有石高丈餘，名石馬。與

是山相屬者，曰金籠山。巔有壇，旱禱輒應。

巖山 寨山

鳳山 五峰疊翠，高數百仞。

景靈山 與鳳山對峙，神物棲焉，禱雨輒應。山左有耳珠巖，多生異草，相傳唐耳珠先生嘗採藥此山。下有黃家洞，宋建炎中，黃氏數百人避亂其中。

圓山 五峰山

寶山 峭拔秀麗，群峰次第而列。正峰絕頂，一庵梁柱椽瓦，皆斷石爲之。

幹山 晉太康中，道士陳紫幹煉丹於此。其山周迴二十里，巔有石洞，可容數百人，清泉出焉。

魚山 二水夾流，山形如魚。

七臺山 高峰峭壁，動逾千丈，磊落相連，莫知其紀。唐會昌中，有惠應大師乘虎出入此山。師劉姓，今山有劉聖者庵。山上有石高數丈，其下空虛，名試心石。相傳茹葷者不敢入，故名試心。

鉢盂山 與七臺山相望。

芹山 泉甘木茂，多產香芹。里人以爲定光佛第二道場。其傍有楓嶺、雒嶺。

靈山 五代時，一僧從王潮入閩。久之，欲望嶺表。過順昌，遙望此山幽峻，歎曰：「可爲終焉之計矣。何必遠游？」遂結茅於此，躬耕自給，不與物接，故人不知其名。

九龍山

西巖山 山有饒公巖。饒公，不知何許人，嘗於是山禱雨，屢應。饒公死，里人旱禱亦驗。

梅仙山 界甌寧、順昌二縣間。山巔平坦，廣袤數里，相傳梅福煉丹於此。有泉曰靈泉。有塔，是石所繫，石皆如藥粒，高危不墮。

鼓山 屏峰山 洪山

獅子峰 元時有顏丙者，母死，葬峰下，廬墓側，後悟禪學，號如居士，所著有《六時淨土文》，坐化於邵武清涼寺。子孫歸櫬，亦葬是峰。峰左爲亨龍嶺，亦名徘徊嶺，高五十丈，有懸崖瀑布，竹樹鳥聲之美。徘徊掩映，謂之佃村嶺。有亨龍庵，宋元符中，有謝寶所者，自邵武來寓，長眠不食。一日與山下人告別，鄉人設供相留，罷，人房而寢。衆候久不出，啟門視之，惟留衣冠。時山中樵夫見庵頂白鶴飛去，庵草石上腳跡存焉。皇朝正德中，令馬性魯禱雨瀑布之下，見其白色蜿蜒，號曰白龍。有井曰古龍井。又庵側有石，曰幞頭石。

文筆峰

豸角峰 有巖曰龍興泉，出石罅，源長味甘。皇朝洪武中，令張縉行視其流，於西南得古渠一里許，遂鑿山通渠。自龍興山脇，過赤嶺，至縣九里有奇，注入泮池，餘水環縣治，官民便之，名張公渠，亦曰西渠。巖後爲居民所侵，水日壅涸。弘治中，令李震開復之。

丫髻峰

祥雲峰 宋紹聖中，里人祈雨至此，有祥雲來覆，甘雨隨澍。下有釣潭。咸平、景德間，里人余起隱釣其中，不求聞達，人高其風，因以名潭。

旗峰

君子峰 高特端重，故名君子。

七寶峰 七峰峭可玩。

高峰 一峰拔出。唐懿宗時，將樂人廖鎮爲吉王府司馬，弟廖業爲睦王府司馬，遷居於此。至宋朝，廖剛、廖德明以理學，廖中、廖天覺、廖邦傑以名臣，廖澄以中烈，廖遜、廖執象、廖曉、廖衡、廖伯憲、廖駒以文苑，皆著聞於時。其子孙今尚繁衍云。

吳道峰 相傳吳道者修道其上，旁有谷巖。

松林嶺 蜚沙嶺 溝嶺

范家嶺 又名象嶺。其下多范姓。

泗洲嶺 秋竹嶺

石湖嶺 奇石巉巖。下有石湖，一名龍湖。邵武溪流至此，兩岸石崖高聳，夾水如門，下積爲湖，深不可測。相傳有龍居焉。宋政和末、紹興初，龍見者再。水濱一石，有「莊濠」二字，大徑數尺，名莊濠石。

交槎嶺 桂嶺 赤嶺

柏木巖

合掌巖 兩石如掌相合，一名仙掌巖。前有泉，甘美。下有池，口圓池，寬廣如鑑。

凌雲巖

吉巖 相傳常有神珠見，遂之莫得。

烏石巖 有水一泓，旱潦不涸。一名仙水境，禱雨輒應。

寒巖

靈龜洞 洞有靈龜石，紫色如金。又有石如鐘磬魚鼓，叩之清越。傍有通天、藏雲、蓮花三洞。

赤松洞 洞有石室，洞傍花石，如人物鳥獸。

洋沽洞 白巖洞

蒙谷 四山高峙，日影不及。

池坑谷 居民造紙爲業，因名池坑紙。

龜嶼

郎官石 在石溪都興國寺。石上磨「郎官」二字，不知所始。

虎跳石 溪中一石竇，通水道，可以舟。

龜石 初隱沙中。宋崇寧間，有術上云：「石龜見，朱紫遍。」大觀初，石龜見，自是邑人仕者寢盛。

又縣西有石龜，捍水口。

盤石

仙字石 秋江淨渟，則字形隱隱如篆，世謂仙書。

浮玉石 與仙字石對。有「浮玉」二字，亦秋水淨迺見。

川水利附。

西溪 源出邵武之光澤，縈紆流至縣治西確砧，與西南溪合。溪有三灘，曰牛輓，暗石橫激，水勢屈

曲若輓。曰相公，自牛輓流至驛砧都，水急難牽挽，雖公相亦須下舟。曰水磨灘，流灣環如旋磨。

西南溪 一名大溪。源出將樂，至縣治與確砧溪合流。^(五)又六十里，會沙縣溪，東流至劍溪，因名雙溪。溪爲灘五，其流至婁杉都者，曰婁杉灘。至淨安都者，曰幕坂灘，曰桂嶺灘。會西溪水磨，流逕縣治前。東注者曰石柱灘。又有錢龍灘，相傳昔人造舟競渡，以錢爲鱗溺此。

棋溪、石溪 以上二源，皆出沙縣桃源洞。《夷堅志》：石溪村民李甲，年四十不娶，但食宿弟婦家。

嘗伐木燒炭，鬻得錢，則日糴米二升自給。有餘貯留之，爲雨雪不可出之用。紹興二年九月，入山稍深，倦憇一空屋外，聞棋聲，望其中，有二士對奕。入揖之，呼先生。奕者笑問曰：「汝何業？」曰：「賣炭。」曰：「能服藥乎？」曰：「諾。」顧侍童取瓢中藥與之。童頗有吝色，曰：「此何爲者，而輕付之。」咄曰：「非汝所知。」藥正紅而味微醇，服竟亟去，約曰：「三十年後復會此。」出門反顧，茫然無覩，嗅腰間所齎飯，臭不容口，傾水而行，還家，三日矣。遂連夕大瀉，自是不復飲食，唯啖山果，鄉人稱曰李仙。

竹步溪 源出甌寧縣境。

洄村溪 源出沙縣境，至亭龍嶺爲瀑布，傾瀉而下。

密溪 源出甌寧縣境，流與順陽溪會。

水南溪 源出長壽都明源，流與蘇源小溪合。

交溪 在高峰山下。源出沙溪大槎嶺，流合衢村小溪，與將樂大溪會。

婁杉溪 源出邵武縣境。

莒尋溪 源出風流旗山下。

順陽溪 源出建陽縣境，至白芒畚，始通小舟。流會沙縣，^(六)又會密溪。

大幹溪 一源出幹山下，一源出寶山下。

富屯溪 源出昏田都，及超華山下。

沙溪 源出邵武縣境，至沙口，與順陽溪會。上十二溪皆流會西南溪。

田溪 源出梅仙山。至壽榮都，入順陽溪。

仁壽溪 源出建陽縣境，流入順陽溪。

鯢潭 潭產鯢魚，其味甘美。鯢魚，鮓魚也。大首方口，背青黑無鱗。《爾雅》曰鯢。《本草》曰鯢。

《衝波傳》讀：魚有名鯢，亦號爲鯢，化而爲人，曾謁仲尼。鬣戟鱗甲，由也。仆之陳、蔡之厄，天濟聖饑。唐邵武人閻汝明，嘗奉命出使，行過是潭，樂其勝概，曰：「吾沒後，當廟食於此。」後舟再至，溺死，其屍過數灘，凡三返，踰月不朽，人異之，葬之溪南之山。後唐天成中，立廟祀之。

溪水潭

蜚人潭 相傳舊有蜚蜚，故名。按《山海經》：「蜚獸如牛，白首，一目，蛇尾。又有蜚蠊，鳥名，如梟，人面，一足，冬見夏蟄。」則未知其爲蜚蜚與？蜚蠊與？

涇水潭 潭有涇洲，歲荒則湧。

李將軍濠 沙縣界，李將軍提兵陷焉。風雨晦冥，輒聞金鼓聲。

放生池 卽縣治前大溪。宋時，上下五里爲池，禁漁捕。

後河池

方池 里人廖中鑿以灌田，餘水可以確。

甘泉 冰壺泉 瀑布泉

劉氏井 在縣治西舊吏隱坊。宋時，每天欲雨，其井輒生雲氣。後道士曰：「此孽龍也。」投以鐵符，片雲飛出，其井遂枯。

鰕魚井 相傳凡鱗畜其中，輒死，惟鰕則生。

永安縣 在郡城西。東抵尤溪，西抵清流，南抵龍巖，北抵沙縣。本沙、尤二縣地。皇朝正統十四年，賊鄧茂七平，鎮守福建都督范雄、刑部右侍郎薛希璉、巡按監察御史陳員輅，以其地險遠難控制，奏請置縣。景泰三年，始析沙縣新嶺以南、尤溪縣寶山以西地置縣。嘉靖十四年，分四十都隸大田縣。今坊一、都十二，統圖六十三。

在坊，圖十二。

二十四都，圖三。舊尤溪新昌鄉感義里。山曰東山、三台、莊山、大莊、大龍會。（七）峰曰牛角。嶺曰牛嶺、九龍。巖曰瑞龍。

二十五都，圖十。舊沙縣龍山鄉崇仁里。嶺曰新嶺。巖曰黃陽、（八）白丈。洞曰赫靈。

二十六都，圖十一。舊崇仁里。山曰大秀。峰曰翠竹。巖曰黃龍。

二十七都，圖三。舊崇仁里。山曰枏欄、斗山、文筆。嶺曰大望。巖曰官寨。湖曰大湖。

二十八都，圖四。舊崇仁里。嶺曰黃田。

二十九都，圖三。舊沙縣龍山鄉懷恩里。山曰吉山、天臺。巖曰甘乳。溪曰古溪。池曰湯池。

三十都，圖二。舊懷恩里。砂曰安砂。

三十一都，圖一。舊龍山鄉善安里。嶺曰梨子。

三十二都，圖七。舊善安里。嶺曰根隔。

四十一都，圖三。舊允溪豐城鄉萬足里。山曰雪山。峰曰獅子。巖曰通天、蘇巖。

四十二都，圖一。舊萬足里。嶺曰鐵山。

四十三都，圖二。舊萬足里。池曰龍峰。

介龍巖、清流間。大秀山聳立東北，百丈、蓮花、金星、天斗諸山，左蟠右轉。巖巖峭壁，驚駭游目。其形勝也。

山

東山 三台山 莊山 大莊山 大龍興山

大秀山 一名真陽山。

栢欄山 在縣治北。山多產栢欄。宋鄧肅居其下，號栢欄居士。峰巒巖岫，高下相屬。神剎鬼劃，有煙雲草木之勝。舊傳仙人往來其間。宋李綱曰爲小武夷。有天柱峰與獅子峰，並聳削百餘丈。有射垛峰，相傳仙人嘗射於降仙臺，以此峰爲垛。宋明道中，耕者於臺側得數十箭。有觀音巖，在野雲洞側，石壁萬仞。有集仙巖，有頭陀巖，唐時有裴頭陀者，鐵履渡江，來居於此。菴側石罅，日湧米自贍，客至隨增。《書林廣記》云：羽衣仙，沙縣人，疑卽頭陀也。野雲洞其中，雲霧吐吞。降仙臺，石高大而平，有仙人武。舊傳仙人時降其上。臺下一石室，棋局界畫分明，有黑白數子。左右蒼石可坐，名爛柯石。有步

雲臺，有走馬埒，山絕頂寬廣砥平，有馬蹄跡，相傳仙人走馬也。有銅盤澗，流十餘里，瀦而爲潭。有接仙橋，有天池，在山之上，廣一里許，其水澄澈。有金剛石、寶蓋石、試劍石，皆此山奇勝。

斗山 一名天斗山。其山高峻，自頂凹下，廣可五里。厥狀如斗，山陰一石穴，名風穴。一洞名雲洞。每雲冒山卽雨。石竇中，有一石龍，界風穴、雲洞，間有頭角鱗介之異。石蹬險巖，人跡罕到，上有合掌峰。

文筆山 吉山 天臺山 雪山 金星山

卓筆雙峰 羊角峰

翠竹峰 宋秘書少監陳世卿讀書其下，作堂曰師古。

獅子峰 與雪山對。

牛嶺 九龍嶺 新嶺 大望嶺 黃田嶺 梨子嶺

根隔嶺 舊志作艱隔。

鐵山嶺 產鐵礦。

瑞龍巖

黃楊巖 宋鄧肅詩：「石壁巉巖驚鬼劃，異草幽花鎖春色。群山迤邐不能高，突兀獨磨霄漢碧。芒鞋千尺上崔嵬，手摘星辰足下雷。撥破煙雲得洞戶，醉眼恐是天門開。人門嵯峨森碧玉，冷風吹面天花馥。箕踞胡床揮麈尾，萬指難克空洞腹。我因避地訪名山，扁舟夜渡沙溪寒。辛勤博此一歡笑，太平猶在水雲間。猛將今無三角虎，狐狸晝號鯁鱗舞。靈巖知有老龍潛，挽出人間作霖雨。」陳世卿詩：「朔風

夜號空，千隅幾枝木。深山自春色，芳草不凋綠。朋來得進游，招提藏翠麓。新酒赤如丹，竹萌肥勝肉。一醉出門去，缺月掛修竹。歸路沙溪淺，危橋濺寒玉。夜過渭濱居，門庭應不俗。坐對寂無言，泉聲如擊筑。宗明更可人，相邀勤秉燭。開緘得捷音，豺狼俱西北。迴懼云可矣，尚心嗟未足。西去有奇巖，祥雲覆華屋。箕踞列千人，未克空洞腹。更約林宗俱，來伴白雲宿。「界永安、歸化二縣間，巖上多產水黃楊木。又有巖三，一在淳化寺中，有石龍，鱗爪備具。洞口古碑一通，字畫莫辨。其二在半山，有虛白洞。上通天口，中架鐘樓。最上爲第三巖，有龍井。下透兩巖，其深莫測。宋鄭域《龍井詩》：「高山如逸民，不肯近人蹟。介於兩縣間，而獨得窮僻。孤峭尺五天，空洞容數百。不招龍自來，其下爲空窟。噫氣激清風，呼雲布甘澤。有功不知求，塊然等木石。呼童燃松明，入洞窮土脉。幽角散人間，驚起封穴蟄。旁有一竅泉，泓澄淺清白。直下不見深，黑不見丈尺。回步穿嶮峻，動即礙肩額。潛伏固有時，於此何逼窄。恨無照水犀，一見薄形跡。天下待霖雨，胡乃耽睡癖。我今喚飛廉，駕汝上空碧。吾鞭不妄施，慎勿憚勞瘁。」巖後有萬壽巖，四面險石如削，周十餘里，突出群山。其上有洞，洞口空闊，人須秉炬，紆迴曲折二里許，路狹風駛，不可炬矣。相傳有龍居焉。嘗得齒角之屬，每雲氣氤氲，洞戶外輒雨。萬壽巖後有碧雲洞，崖懸怪石，彷彿獅象。其洞深邃嶮巖。外一穴，虛白深廣二十丈，釋子所廬，巖後有梅齋。巖東有石門，攀躋而上。巖腰有穴，名天牕。投之石，輒震響，其深莫測。更上百步至巖巔，群峰突起，奇怪萬狀。皇朝正統戊辰，民人避亂於此，寇莫能攻。巖北有侍郎巖，舊名翠雲巖。宋張駕、楊時、陳瓘讀書於此，歐陽飲水，不至巖下。傍有觀音洞，深可里許，內懸石，多彷彿觀音、羅漢之像。又有石室，廣可六七丈。前數十峰如卓筆。下有石鼓，及試劍諸怪石，好事者多採玩之。

百丈巖 高約百丈，周圍三里，四面峭壁，中一徑陡絕與柃欄相望，僅隔一溪。溪僅通舟，亦名桃源洞。宋初銅盤村，有馬五娘者，少遇九天玄女授以玄秘，馭氣煉形。及笄，父母強之嫁。是夜忽生毒瘡，臭穢不可近。夫家棄還其父。父亦惡之，將沈之河。儻然雲霧騰起，羽駕來迎，直上此巖。於是二妹及嫂杜氏相隨至巖。五娘食以仙果，皆得遐舉。鄉人皆刻像祀之，靈跡顯著。巖背有新庵洞，洞口兩壁峭絕，直路如削。洞中之石，爭奇競異，周覽不暇，元周天玄坐化於此。

黃龍巖

官寨巖 巖石峻絕，幽花異草，四時芳馥。

甘乳巖 下有甘乳洞，廣袤約五十餘丈，怪石森列洞口，中突出一口，如蓮花迸泉，如甘乳。旁一石穴，風生焉。有人秉燭深入三日，聞溪聲澎湃，怖而出。又一石罅，深不可測。出洞過石橋，緣小徑至山巔，有小亭名看經亭。亭後有小庵，繇庵前行轉數十步，一小洞如覆鼎，石光璀璨。洞後又有一洞，名透天，相傳爲仙宅，游者必齋，否則遇怪物。

通天巖 崖壁峻絕，山半一巨石，橫跨如梁。繇石梁行過，僅容二人，闔首而人。其中夷曠，泉石幽潔。後阻高山，因而爲門。其上如竇，仰見天光。

蓮花巖

蘇巖 直起千餘丈，中有石龍頭，吐水注石穴中，名滴乳。近巖有池，方廣畝許，鱗屬甚多，惟鯽至大，人不敢取。

赫靈洞 一名真陽洞。

曹巖洞 可容千餘人。

安砂 九龍灘盡處陰惡殺滅，故名沙曰安。或曰以縣名故。

川

燕水溪 溪源三，一出汀之寧化縣境，流至吉溪。一出汀之連城縣境吉山，下龍灣，歷鸛鵲溪，會吉溪。一出漳龍巖縣界，入掃溪口，過俞皇，歷張波，出車波，至縣治西與吉溪合，是爲燕水。東北流會梅溪、鬱溪、發口溪、黃沙溪，下流逕沙縣，直入劍溪。

吉溪

九龍溪 源出汀州清流縣。有九龍灘，其流下接燕水溪。灘名有九，曰長龍、曰安龍、曰傷龍、曰馬龍、曰三悟龍、曰五白龍、曰興龍、曰暮龍、曰下長龍，內六龍屬清流縣。下此又歷三十九灘至沙縣。曰牛皮、曰狗瀨、曰茅鏹、曰鬱平、曰銅盤、曰雷霹靂、曰縋峰、曰大坡牆、曰五港、曰紫陽、曰牛欄角，凡十有一灘。餘屬沙縣。

太淘口潭 石壁潭

大湖

湯池 一熱水口，一苦竹村，一上村池，又一曰仕洋湯池，又一曰溫湯池，又一曰龍峰湯池。

清水池 在黃假山前，水清澈底，或有兵火之災，池底輒先變紅，水草皆爲赤色。災平，則池仍澈底，水草還綠。

澄清井 大義井 貢川井

〔校記〕

- 〔一〕「安州」，各本原作「安洲」，據下文及《八閩通志·地理》改。
- 〔二〕「曲尺」，各本原作「屈尺」，據下文及《八閩通志·地理》改。
- 〔三〕「沉潭」，各本原作「坑潭」，據下文及《八閩通志·地理》改。
- 〔四〕「交槎」，各本原作「大槎」，據下文及《八閩通志·地理》改。
- 〔五〕「確站」，各本原作「確站」，據上文及《八閩通志·地理》改。
- 〔六〕「沙縣」，當係「沙溪」之誤。
- 〔七〕「大龍會」，下文作「大龍興」。
- 〔八〕「黃陽」，下文作「黃楊」。

閩書卷之二十一

方域志

汀州府 長汀縣 寧化縣 上杭縣 武平縣

汀州府(二) 在布政司西南一千六十里。東抵延平永安縣，西抵江西瑞金縣，南抵廣東程鄉縣，北抵江西廣昌縣。晉太康三年，分建安郡置晉安郡，立新羅縣，屬之。而汀州始基於此。宋、齊、梁、陳、隋皆省。唐開元二十六年，開福、撫二州山洞置汀州，領長汀、黃連、龍巖三縣。天寶元年，改爲臨汀郡，以黃連縣爲寧化縣。乾元元年，復爲汀州。大曆十二年，析龍巖縣歸漳州，以建州之沙縣來屬。光啟元年，王緒陷汀、漳二州，尋爲王潮所得。其弟審知繼而有之。乾寧三年，屬威武軍。五代晉開運元年，朱文進殺其主王延義，以許文績來守。未幾，文績以州降於王延政。二年，王氏滅，地入南唐。越三年，析沙縣歸劍州，領縣二。宋太平興國三年，屬威武軍。雍熙二年，屬福建路。淳化五年，升上杭、武平二場並爲縣，領縣四。元符五年，析長汀、寧化置清流縣，領縣五。紹興三年，以蓮城堡爲縣，領縣六。紹定中，廢清流縣，領縣五。元至元十五年，升爲路，隸福建行中書省。城內置錄事司，領司一。其後改隸不一，縣則仍舊。至正八年，立汀州分元帥府。二十二年，陳有定據而守之。皇朝洪武元年，改爲府，罷錄事司，領縣

仍舊。成化六年，以明溪鎮巡檢司置歸化縣，領縣七。十四年，析上杭縣地置永定縣，領縣八。

甌閩奧壤，東南上游。西隣贛、吉，南接潮、梅。前直圓峰，後枕卧龍。一川迅急，匯乎三溪。千嶂重複，環夫四面。其形勝也。

長汀縣 東抵寧化，西抵瑞金，南抵上杭，北抵瑞金，轄二廂、十里，統圖五十有一。

左廂，圖六。宋金華、登俊、鄞河三坊。山曰南山，拜相、馬鞍、蓮花。嶺曰佛嶺。巖曰通濟。洞曰仙隱、蒼玉。

右廂，圖三。宋清紫、福善、從善三坊。山口圓珠。潭口麻潭。

歸陽里，圖三。宋衣錦鄉，真宗賜羅城錦旗云。明時折桂，衣錦還鄉，以此得名。山曰筆山、翠峰。嶺曰大息。礫曰礫頭。湖

曰青湖。

古貴里，圖一。宋衣錦鄉。山曰玉女。嶺曰新路、白頭。巖曰石燕。礫曰礫角。

青泰里，圖五。宋衣錦鄉。巖曰獅子。泉曰湯泉。

宣城里，圖八。宋永寧鄉。

成上里，圖二。宋永寧鄉。山口鷄籠。嶺曰分水。

成下里，圖六。宋永寧鄉。

四保里，圖五。宋永寧鄉。

平原里，圖三。宋永寧鄉。

宣河里，圖六。宋古田鄉。巖曰八仙。

青巖里，圖三。宋古田鄉。巖曰宣巖。

山

卧龍山 在郡治後。環城四面平田，就中單椒突峙，高可數十丈，廣可五七里，北面峭壁矗起，其南派爲九支，形如九龍蟠卧。又名九龍山，亦名無境山。其首有山，曰東山。山麓有東山堂。宋郡守陳曄《東山堂詩》有「常留綠野春光在」之句。又有「時和歲豐」之堂，賞靜軒，仰高，快哉二亭，香遠臺，俱宋人所建。其旁有山曰蓮花，曰筆山。有嶺曰橫岡。橫岡嶺在府縣儒學後。

南山 在縣南三里，郡治朝山也。宋時爲文殊院、同慶寺。宋洪芻詩：「煙花澹蕩連三里，雲樹低迷過一州。」山崦有朝斗巖，崔然巖幽，潏然泉出，爲汀勝概。山下有雲谷巖，其與山相聯，俯挹卧龍，宛如人拜者，曰拜相山。山隈有霹靂巖。宋元祐間，白晝迅雷一聲，劃開巖洞，中有丹竈、丹井，其傍一石，名烏鼻石。皇朝嘉靖中，徐中行子與爲汀守，宗臣子相以臬帥行郡，相與飲酒賦詩此中，傳爲佳蹟。王世懋詩：「選地偏多物外情，捫碑忽着故人名。千秋霹靂開丹竈，四面芙蓉出化城。」其二：「絳帳南過五百灘，不煩絲竹有清歡。金鰲對湧丹樓出，石燕斜侵玉洞寒。」

馬鞍山

圓珠山 一名龍珠，俗呼寶珠峰。宋守張憲詩：「萬疊層岡揖卧龍，一峰圓頂翠凌空。」

翠峰山

玉女山 舊傳王氏女修真之所。下有通仙橋。

展旗山 賴溪障山

鷄籠山 舊經云高十五里。《九域志》載爲古跡。宋時本郡王中正於此成道。中正字平叔，舊名捷，咸平中，遇羽士授以鉛汞黃金之術，且戒之曰：「非遇萬乘勿輕也。」捷出，挾其術，走上饒，佯狂呼叫，坐流嶺南。復遇羽士，謂之曰：「姑俟他日。」遂走入京師，爲有司所捕。供奉官張德權異之，以聞。真宗命皇城司劉承主問狀，中正面奏，改今名，賜對龍圖閣下，具陳靈異，獻所爲白金，遂特授許州參軍。祥符間，每遇大典禮大工役，率成黃白二金以進。景靈宮成，進黃金四千九百兩，白金萬二千七百四十兩，前後所進以鉅萬。詔書褒諭，累官光祿大夫、檢校禮部尚書、右神武衛大將軍，後卒於京師。命塑像景靈宮，以輔太祖。

赤坑障山

靈蛇山 山舊多蛇，下有佛廬及蛇山廟。《九域志》載爲勝跡。

七寶山 山出七寶，下有上寶場，今廢。

雙峰 峰巒雙聳，高入雲漢。

西峰 在郡西，卧龍山右支也。上有西峰、法林、羅漢三刹。羅漢寺，形如燕窠，木茂泉清，爲郡勝境。法林院有袈裟泉，舊云院僧講經，見窗外有白龍，以袈裟覆之。及旦，袈裟入石，裂而爲泉，形如袈裟。宋郭祥正爲父倅汀，與守陳軒烹茗泉上，倡和爲詩，郭因命院曰新泉軒。詩：「逕石無聲下無穴，停之不盈酌不竭。銀瓶送響落清甃，鏡奩破碎冰壺裂。」又：「奇哉江南郭夫子，一顧能令泉價美。」

二老峰 雙石峭立，以形名。

佛祖峰 在郡西。土名九。轉北二里許，樹木陰翳，石徑崎嶇，中有禪寺，盛夏不暑。明守吳文度

詩：「山坳纈絮通雲氣，木末垂珠滴露華。」

佛嶺 上有通濟巖。壁間畫佛像。宋時，唐長史建佛庵於此，庵側有長史亭。

白葉嶺 上有白鶴庵。

界院嶺 土中有珠，牧兒鋤地得之，見風則碎，亦名真珠嶺。

東莊嶺 去縣東五里。下有民田百畝。又有東莊潭。

构木嶺

牛嶺 在縣西二十里，是江西瑞金道也。與是嶺相接者，曰白頭嶺，以常冒白雲名。

大息嶺

新路嶺 路一作樂。界瑞金、汀、贛間。貢水出焉。

棗木嶺 湘溪嶺 流源大嶺 分水嶺 歸嶺 囊荷嶺 桑溪嶺

石燕巖

獅子巖 雙石爲門，定光佛初振錫於此，後乃隱於南安巖。按定光佛姓鄭，名自嚴，泉州同安人。年十一，出家得佛法，十七游豫章，除蛟患，徙梅州黃楊峽溪流於數里外。乾德二年，來南安巖，攝衣趺坐，大蟒猛虎皆爲蟠伏，鄉人神之，爲師構庵。有虎傷其牛，削木書偈，厥明虎斃。巖院輸布於官，師內手札布中。郡守歐陽程追師問狀，師不語，守怒，命焚其衲帽，火燼而帽如故。疑爲左道，厭以狗血蒜辛，再命焚之，衲纓愈潔，乃謝之。歸，泛舟往南康，江有槎椿害船，手撫去焉。盤古山井無水，薄暮舉杖三敲，詰旦水湧。終三年，復還南巖。郡守趙遂良延人郡齋，結庵州後。庵前舊有古枯池，因遂良請投偈，水溢，

卽金乳泉。是城南有龍潭，爲民害，復因遂良請，投偈而殄，沙壅成洲。遂良以聞，賜南安均慶院額。真宗因設齋進謁。真宗問所從來，答曰：「早自汀州。」問：「汀守爲誰？」曰：「屯田胡咸秩。」齋罷，真宗令持食賜之，至郡尚煥，咸秩驚竦，表謝。時諸朝列貴人名公皆寄詩贈美。淳化八年，壽八十有二，正月六日，集衆而逝。遺骸塑爲真像。朝命賜號定應。黃山谷贊定光古佛：「不顯其光，右錐透穿。大千以爲囊臥像。出家西峰參道，亦俗亦真，一體三寶，彼逆我順，彼順我逆。過卽追求，虛空鳥跡。驅使草木，教誨蛇虎。愁霖出日，枯旱下雨。無男得男，無女得女。法法如是，誰奪誰予。令君威怒，免我伽梨。旣而釋之，遂終白衣。白帽、素履，鬚髮皤皤。壽八十二，與世同波。窮巖草木，枯腊風雨。七閩香光，家以爲祖。薩埵御天，宋有萬姓。乃錫象服，名曰定應。」神宗、哲宗、高宗三朝累封，加至「定光圓應，普通慈濟」八字。紹定庚寅，以有靈顯濟賊之應，賜額曰定光院。續又易「普通」曰「通聖」。

八仙巖 巖內有棋盤石跡。

宣巖 宋崇觀間，宣明隱居於此。明字南仲，貢辟雍，棄去不仕，愛是地有巖洞泉樹之樂，疏池築室其間。郡守謝名其巖曰宣巖，與其子吏部員外郎時往訪之，觴咏終日。暨豫章洪芻、糾曹龔守、戶曹謝詰皆有留題。芻詩：「輪涵碧磻溪釣，千穗垂黃谷口耕。」又：「路側似逢居上屬，歲寒空老大夫松。」仙隱洞 上接龍山，下脉龍潭，石徑淞溪，嶽崎深窈。外兩石閣，一小石，天然成門。宋守趙宗模，闢徑創溪堂及亭。繼守林岳，復創天香書院及白鷗亭。其上有雲驤閣，鄞江偉觀也，先名清陰，後改集景。紹興間，提刑劉高至郡，登而善之，改雲驤焉。後守陳映書鐫之石。閣前後奇石巘岼，門左一石，高廣丈餘，不麗土，傍有小石撐柱，名飛來石。閣下東岸，曰有龍潭。潭東有龍王廟。

蒼玉洞 在縣東東禪寺下。山石奇怪，有石門、煙嶼、仙掌、鶴窠、抱雲、二老獅子、馬鞍諸勝。宋郭祥正詩：「片片蒼崖裂，淙淙雪浪深。」

碧雲洞 洞石朗潤，漳人黃以陞謂其不讓太湖。

白面石

川水利附。

鄭江 一名正溪。在縣東，發源寧化縣李地。出石含，歷謝地、新橋、湘洪峽，迤邐至東莊潭，分爲二派。一派自惠政橋入。一派自太平橋入。至高灘角復爲一，南流經上杭，達潮之神前，會三河水，至海。天下水皆東，惟汀獨南。南，丁位也，故郡名汀州。唐僧靈徹初到汀州，詩有「北之水南流」之句。高灘角有棠棣橋。宋陳曄、陳映兄弟相繼爲守。曄創橋，映成之。郡人以名橋也。

東溪 源發翠峰，出合鄞坑水，流高洋橋，至張家陂，與正溪合。又源出大息嶺左，至南田大溪合者，曰梓步溪。源出南原，至湘洪廟者，曰小湘溪。皆縣東溪也。

西溪 源出太原，過杉嶺，至南拔橋。宋治平五年，築城塹濠，砌石陂，橋下引水注濠。一派入城濠，至崇善坊興雲橋，與正溪合。一派入西田，過高阜坊，與正溪合。

南溪 溪源不一，至側橋合流。經普濟橋，至南口與正溪合。

北溪 源出橫坑，過攀桂橋而下，與正溪合。

魚梁灘 鷓鴣灘

蛇王灘 灘邊有蛇王石爐，灘下河水，湍激曲折，名九曲灘。

王屋灘 有王氏居之，以姓名灘。去灘里許，有石如紗帽，名紗帽灘。

麻潭 郡衆流畢會於此。山勢蟠亘，過此溪流折爲九曲。

白步潭 大潭 曲潭

寅湖 距縣東北二里許。周圍百步，以居郡寅位名湖。深莫測，中一小阜，雖水溢不沒。又子地湖，以居郡子位。有辛湖，居郡辛位。

青草湖 在縣東五十里象牙林。不深不廣，湖草常青。

礫頭 峭壁下仞，瀑聲如雷。又礫角高巖怒灘，溉田甚廣。

金乳泉 在府東。定光佛所喝。皇朝守郡有道關爲池。

湯泉 在縣南何田市。周圍數十丈，熱能熟生。宋紹興間，衆砌石池，疏寒泉以殺其氣，旁結庵名無垢。又一在縣南安仁保。由石竇湧出，乃可溉田，無問熱矣。

玉泉 在縣東七十里。流爲瀑布。有佛庵，前後植茶，號玉泉茶。

開星井 在府治東北塔院前。舊傳白鶴仙人遷郡之初，謂城形如斗，令按斗象掘七井如星應之。

長史井 在福壽樓南街城下。郡人鄧正己開鑿至丈餘，見盤石焉。其下琤琮聲，撞之泉湧。

八角井 在開元寺。井濶可丈許，深十三丈。舊傳，與雲驤閣下河水相通，溢則井溢，清則井清。異

時水忽高湧，衆以爲下通龍潭，疑龍穴焉。今寺入學宮，井從之。

鄞江井 在縣東右廂金花坊。深僅三尺許，溉田甚多。

萬戶井 在胡嶺坊大路傍，泉甘可飲萬戶。

寧化縣 在郡東北。東抵清流縣，西抵江西石城縣，南抵長汀縣，北抵建寧縣。本晉新羅地。舊爲黃連鎮，界福、撫二州間。唐開元十三年，因居民羅令紀之請，置黃連縣。二十四年，開山洞置汀州，因屬焉。天寶元年，改爲寧化，宋元仍舊。皇朝因之，置里十四。成化七年，分柳楊、下覺二里隸歸化縣。今轄里十一，統圖五十一有一。(二)

在城里，圖十二。宋桂枝鄉。山曰翠華、登高。潭曰龍門、院子坑。

龍上上里，圖三。宋桂枝鄉攀龍坊。峰曰三峰。嶺曰狐棲。

龍上下里，圖二。宋桂枝鄉攀龍坊。山曰寶山、鳳凰。湖曰蛟湖。

興善里，圖三。宋桂枝鄉遷善園。山曰南山、牛頭、羅亂。潭曰神頭。潦口雷鳴。

新村里，圖二。宋桂枝鄉新村園。峰曰驚峰。嶺曰獅子、羅漢、黃柏。峽曰烏路。

永豐里，圖三。宋桂枝鄉。嶺曰金船、苦竹、神王、南橋。

會同里，圖六。宋桂枝鄉。

招賢里，圖三。宋登龍鄉。石曰獅子。

招得里，圖五。宋登龍鄉招化里。山曰陶峰、牙梳、龍鬚、伍家筆。嶺曰巖塘。巖曰彌勒。

泉上里，圖四。宋登龍鄉溫泉園。山曰羅平。嶺曰城門。湖曰柘湖。

泉下里，圖三。宋溫泉園。峰曰凌雲。

翠華鳳凰在其北，五臺筆架在其南。城門嶂東峙若屏，牛頭山西立若宸。聖水環前，翠華後聳。其

形勝也。

山

翠華山 縣主山也。四時蒼翠，縣人於此游賞。

登高山

寶山 山有五色石，璀璨如寶。

鳳凰 蜿蜒數里許，其形如鳳。國初，邑人張震讀書其下，後聘起爲教授，官至太原守。

南山 邑望山也。山似筆架，水似帶環。

東山

牛頭山 峰頭峭拔，爲郡勝。

羅亂山

陶峰山 峻聳壁立。舊有陶姓者，結茅其上。

牙梳山 以形名。險峻阨塞，嘯聚所憑。

龍鬚山 高峰繁蔭，崖石間，草如龍鬚也。

伍家筆山 尖聳如筆，世族伍姓者居山下，遂名伍家筆。

羅平山 處士羅平隱居之地。

伍靈山 本名伍家山。昔有時閔者，與妻英學藝游寧化，未幾俱卒，邑人憐之，塋於是山。常示靈爽，因祠祀之。東晉末寇至，過者見其人馬紛紜。寇退，有芝五莖產祠前。有司異之，具聞，封爲伍靈山。

普惠孚寧王，立祠焉。

紫氣山 在縣北，通邵武界。

威膽山 上有寶池寺，其側有石傑出，名寶池石。

平原山 南唐時，有僧惠寬居之。惠寬，邑葉氏子，遍游諸方，慧悟而還，能馴服虎豹，號伏虎禪師。

保大三年，因山有龜峰、獅石之勝，衆爲創庵，名曰普護。庵側吊軍嶺，高峻無水，師頓錫石上，水出不竭。七年，汀苦旱，郡人迎之禱雨，七日不雨，願自焚軀。及日至，命人積薪厝火，坐其中間，火未及燃，雨下如注。建隆三年示滅，封紹興大師。乾道、淳熙以救旱功，累加封號至六字。紹定，群盜犯城，守城卒每夜見二僧巡城，曰：「勿睡，勿睡。」疑師與定光也。嘉熙間，州上狀，復加號「妙顯」二字。

三峰

驚峰 有驚峰院，前有泉，曰甘泉。

凌雲峰 峰高拂雲，中有磔，名龍潭。舊傳，有龜浮水面，溪水即漲。歲旱，鄉人取以禱雨。

芙蓉峰

狐棲嶺 其狀如屏。舊有白狐棲此。

獅子嶺 黃柏嶺 羅漢嶺

金船嶺 舊傳山有金船，其光夜現。

苦竹嶺

神王嶺 上有神王廟，鄉人祈禱焉。

南橋嶺 嶺勢高拱跨山，如橋。

巖塘嶺 竹高嶺 碑嶺

城門障 壁立如障。元末，邑民避寇於此。

龍池巖 昔有龍蟠此。宋運使蔣之奇詩：「蒼龍蛻骨去已久，山根一穴如天開。寄言俗客不可入，往往白晝生風雷。」

西巖 在縣西北五十里。田林田寺向南行五里許，渡小澗，登石梯而上，石筍屹立如門，上有石乳，涓涓下垂，正滴筍末。又有石如龍，當門之上。其中空洞如砥，可坐千人，有數石室。其一曰寶陀，石若龜屋然，中署觀音像。一曰乳穴，非燕炬不可入。中橫石案，旁有泉一泓，遇旱，取水出巖卽雨，謂之聖水。一曰丹室，有一小穴，匍匐而入，其中寬明，丹竈儼然。又一如方丈，初入頗暗，坐久忽明。又一如堂奧，寒氣逼人，立不能久。傍有龍井。

東巖 在西巖側。中有數石室，旁有碧蓮數朵，大如車輪，左右石竈，名經竈。又有石如壺，高可二丈。寒泉湧出，壺口皆成鍾乳。下有芝田數區。上有響石，撞之如鍾。西有石柱高峙，如青琅玕。其南有泉，自石中出，潺湲迅急，復人石縫，不知所之。又南最高處有石鶴，若奮飛之狀，亦有丹室。

彌勒巖 高峻玲瓏，窟中多巢鳥雀。巖下空洞，如一石室，前有彌勒佛殿。

連城洞 地多黃連，又名黃連洞。唐置治處也。

雪隱洞 地名苦竹。舊號洞源巖。宋治平間，僧祖慶結庵於此。洞岡疊巘，小澗橫絕，巖石奇怪，如窗如龕，如設筵席，如列鍾磬，如虎鬬，如鳥翔。又有一石拔地起，上有乳泉滴瀝，能愈病。霖旱洞，下有

石，名石龍。東北十里許，有瑞花巖。多生奇花異草，則歲大豐。

香爐石 在縣四十里。隋義寧間，劉、熊二道士修煉其間。白日飛昇，人爲創昇仙臺。刻二像石壁，祈禱有驗。

獅子石 在縣北田間。

危石 在縣北六十里。突然一峰，四壁陡絕。宋紹興間，僧祖月結庵其下，名曰翠峰。

石牛 在縣西南七十里，以形名。故驛曰石牛驛。

川水利附。

大溪 在縣南。溪源凡六派。其正西，自贛之石城縣陂頭發源，九十里至縣，與大溪合。其西南自長汀界棲狐嶺發源，一百二十里至小吳，與大溪合，又四十里。其西北亦自石城界長放，百里至李田，與大溪合，又二十里至縣。此三水，縣之上流也。其東北自臺田嶺發源，與建寧分水一百四十里，會於大溪，又三十里至縣。其正北自苦竹嶺發源，六十里至馬家渡，會於大溪，又三十里至縣。其正東，自熱水窰頭發源，一百里至側潭，會於大溪。又四十里至縣之東渡溪上二里許。上流三派，合而爲一，然後東至清流縣，又東會劍江水，抵福州，入海。

滑石溪 羅溪 龍門潭 院子坑潭 龍潭 神頭潭 斑竹潭

赤岡潭 其中有石，名狂波。舊傳，或見二龍蟠石上，忽水漲濤洶。

蛟湖 昔有僧結庵其上，常見白龍卧湖面。鄉人遇旱，投以敗鐵，輒作暴雨。怒濤湧出其鐵，乃已。宋嘉泰間，守陳映禱雨有應，建龍神廟湖側。

柘湖 去蛟湖不遠。其水四時不涸，溉田甚多。側有羊鵝湖。舊傳，鵝噪於木，羊跪於地，忽成此湖。

雷鳴潦

潭飛潦 重岡複嶺，登陟極艱。其中山環水合，田足地腴，易於嘯聚。宋紹寧間，有寇據此，陳韓、劉鈍討平之，置南平寨焉。

鳥路峽 在縣南五十里。兩岸壁立，水勢縈深。硤下十五里有七孤龍，石峻路險，怒濤奔湍，反折七曲，舟師憚之。

潔溪泉 在縣北四里。清泚甘冽，一名滴龍泉。

萬斛泉 在縣北五十里石洞中。噴湧而出，流爲小澗，溉田數千畝。

藍布池 舊名永豐池。產藕最佳。

周家井 太平井 古井

大成井 舊在儒學戟門外。皇朝邑人張震記：「本縣學在邑北翠峰山之麓，地極高爽，惟缺井泉，學徒日膳，僕夫取汲山趾，晨夕勞瘁，祭祀亦不蠲潔。洪武十四年冬，陳仲復奉命典學。明年春，林汝嚴亦聘禮來自三山邑司，既爲修治學宮，惟井一事，無議定者。至秋，祀期復邇，仲復、汝嚴白邑，時主簿譚宗遠署邑事，命駕詣學。衆謂：『左右前後，突阜剛出，無地可井。』復曰：『泉行地中，理也。畚鍤未施，得遽謂無？』步之戟門外東偏，信手仗鍤，俛身指曰，鑿是必泉。衆睥睨莫從，至或竊笑。宗遠厲色戒工。其初，掘地丈餘，皆瓦礫雜壤。又丈餘，黃壤矣，色殊滋。又下一二尺，則其上沮洳，有平底巨石，截然上

承，鑿之則鏗鉤空洞。衆異之，起石，得一故井。寒泉澄澈，厥味甘冽。舊甃猶存，初無缺塌。宗遠命工甃好，名大成井焉。」今在光巖寺前，縣治之後。其後邑令惑堪輿，復塞之。

上杭縣 在郡城南。東抵龍巖，西抵武平，南抵永定，北抵長汀。本晉新羅地。唐爲龍巖地，大曆四年，刺史陳劍析龍巖胡雷下保，置上杭場。今屬永定矣。宋淳化五年，升場爲縣，割長汀南境隸焉。元仍舊。皇朝因之。置十里，統九十二圖，後漸省爲五十九圖。成化十五年，分勝運里之圖二，溪南里之圖五，太平里之圖四，及金豐、豐田二里之全圖八，隸永定縣。今轄八里，統圖四十。(三)

在城里，圖十二。 宋來蘇里。山曰七峰，掛袍、展旗、橫琴、冷洋、覆藤、筆架。峰曰美女、普陀。嶺曰三層。石曰赤面。溪曰大溪。灘曰高車、馬尾。湖曰鹹水。

勝運里，圖十。 宋勝運鄉。山曰鐵障、茫蕩洋。嶺曰石碑、燈籠、蜈蚣、棉嶺。巖曰東安、石燕。石曰馬跡。溪曰黃潭、安鄉、跳魚。灘曰逃船、操蓬、上徐、下徐、大籠鈎。潭曰白水。

溪南里，圖一。 宋興化鄉。

來蘇里，圖一。 宋來蘇園。山曰石獅嶺、高唐、上壽、羊廚。巖曰青峰。灘曰大孤。

古田里，圖五。 山曰亂石隔。

平安里，圖二。 宋平原里。山曰金山、(四)靈蛇。嶺曰羅括、雙溪。巖曰管公、石鍾。溪曰金山下、南寶、樊溪、新田、水埔。灘

曰回龍、白石、禾灘、目忌、鑊風。湖曰鬼湖。潭曰黃土。石曰石龍。

太平里，圖一。 宋太平鄉。山曰銅鼓。

白砂里，圖一。宋繁沙里。峰曰文筆。嶺曰香嶺。溪曰九曲、苦竹。

琴岡前案，金山後屏，旗嶂西蟠，髻峰東峙，袍山屹立西南，籬嶠覆峙東北。襟三折之清漪，凡七峰之蒼翠。其形勝也。

山

七峰山 邑後鎮，七峰萃律翠麗。堪輿謂上應北斗，又名七星山。

掛袍山 邑前鎮，以形名。舊云，未縣之先，林木森蔚。有術者過之，曰：「袍山蒼蒼，朱紫盈坊。」未幾遷縣於此。

展旗山 邑右鎮。

橫琴山 平廣延袤，如橫琴然，亦名橫琴岡。後有觀音堂，堂下汎泉澄澄，病者洗以愈，曰觀音井。其旁流一派，溉田可數頃。又城內西北，亦有井曰觀音。

泠洋山 高出群山，俯見縣治。有道人結庵其上，下水一脈，迸石而出，夏月極冷。去西有泠洋嶺，嶺多石。

覆蘿山 筆架山

鐵障山 石壁若障，山西鐵礦出焉。

茫蕩洋山 當上杭、永定兩縣界，磅礴數百里，峰巒嶄絕，人跡罕至。西南通程鄉，東通漳州。頑民所穴，急則入廣。

石獅嶺山

高唐山 舊傳有二人，其一姓高，其一姓唐，年九十餘，同登此山，遂不復歸。

王壽山 端正，高出一十餘丈，形如殿閣，若王者執圭之狀。

羊廚山 高可百丈，盤亘百餘里，據汀、湖二州間。危峰怪石，千態萬狀。其巔常有群羊棲止，人跡罕到。

亂石隔山 路通龍巖界，其上亂石巉巖。

紫金山 邑主山也，以產金名。宋太平興國初，天下產金六州，閩惟汀有之。其時貢金凡百六十七兩，其後有永興、通利、利濟、龍山、石門、語口及金山，凡七場。又去縣稍遠，曰端和，曰嘉興，曰興濟，曰浮流，曰錦豐，凡五場。紫金山之嶧多銳，而礦丹碧如畫，且以色名云。家有龍井，側有澗，出石罅，爲黃金，一溜百丈，曰百丈澗。流下三池，曰膽水池。宋時，縣治遷焉。其水赤苦，取浸生鐵，可以煉銅。崇寧間，臣僚游經言：「膽水可浸鐵爲銅者，凡十一所，是水與焉。」既遷縣治，水味亦變，不可銅矣。堪輿言：「金山如焰，雖嶧邑而亦多災，宜祀玄武鎮之。」皇朝嘉靖庚戌，邑人丘嘉周募而建之。至丁卯，廟成。自記其椒曰：「三山同若龍躍，中則縮立隆起，其石若角，爲麒麟殿。左獅之陰，爲鍾樓，右象之陽，爲鼓樓，統名曰飛龍。廟門下而東，越連雲橋，橋下兩崖，有倒湍。凡石梁三，而至洞門，並岐而下，斗折多苔，步稍弗戒，人罅不復出矣。崖額縣淙，必涉流而西，上有巨石，如墮猿，雨驟至，如雷轟。其隅石亭，曰玉虛亭，右玉髓噴自石心而下。緣古木抵山，迤東，與中路會。折而南，阜有閣，貯昆盧像。去閣三丈，頗衍，而爲紫金庵焉。亦祀玄武，與其椒相伯仲。庵前有樓，樓下路十一折，抵五龍峰，五十武爲百丈澗。落如霏雪，至池如珠噴。初日薄之，滉漾如金碧，故以神光名其宮。有此泉斷野，燒其竹樹，尤蔥菁。溯泉渡

琴橋，沿流而道微，隱約木杪間，而爲桃源洞。洞前爲歸鶴樓，樓下之浸雖狹，宛若武陵谿。自桃源轉下，取道宮右約里許，抵奇古山之脊，爲天門。而顧之金山，其天府矣。」吳人顧聖少詩：「金光日盪長生草，紫氣天標大乙臺。」杭人誦之。金山之陽，望之如筆插空，曰南寶山。宋志言：牧童得雙壁於此。南寶山側有寶興巖。

靈蛇山 聳拔凌空，山下洪元故居，有印曰大唐統軍之記，并劍存屋後。屋火，劍印騰空，得之於平田。邑人以爲勝跡，禱祀之。

銅鼓山 界永定縣，拔地特起，高數十仞，廣可數里。有巖竇、井泉，石壁上有倒書「千年」二字。山腰巨井丈餘，鼓聲聞，則大稔。多產黃楊，爲黃楊巖。下有二湖夾左右，曰銅鼓湖。宋志以鼓自空墜，擊其要，石化爲泉。雙魚出游，網不可得。

安鄉石山 石以象奇。有一巨石，善應。近蛻洋舖五里，而以聲勝。

美女峰 峰有四，皆蒼茸秀茂。

普陀峰 白葉場峰下，端正佳麗，右有普陀寺。

文筆峰 有仙女巖，負岡瞰溪，廣三丈，有穴上透。舊傳，有仙女居此。

雙髻峰

爐背嶺 大嶺

三層嶺^(五) 界永定間，其嶺三級。成化間，李時英沿路植松蔽陰，置佃人修守，行者便之。時英，邑富人，有子源，王翎毛山水，善作風雨歸舟圖。席其父數千金之業，而魁岸瀟灑，家貲以散。

石碑嶺 下有巨石，方正如碑。泉從石罅出，四時澄澈，夏冷冬溫，名龍泉井。

燈籠嶺 上有石，若燈籠。

蜈蚣嶺 高聳繁迴五里許，嶺路蜿蜒，若蜈蚣然。正統間，鄉民吳廣植千松道旁，以便行者。

棉嶺 景泰間，邑人唐常夾道植松，千餘株，行人便之。

羅括嶺 羅括，人名也，結廬於此。

雙溪嶺 與長汀縣分界，有二小溪環繞其下。

香嶺 舊有檀木香數百本，因名。或云嶺多木乳膏，居人採而蒸之。

松風嶺 嶺上松樹夾道戟列，皆宋元間物。龍鱗虬髯，飛濤流翠，使人遽人忘出。

青峰巖 巖有秀峰，竹木蒼翠。

管公巖 舊傳有管姓者，修行於此。巖深廣數丈，內有石鼓，擊之輒鳴。

石鍾巖 中有石乳，傍有巨石，擊考有聲。

黎公巖 有姓黎者，修煉於此。

東安巖 宋定光佛本師，常棲此巖。時何仙姑居武平縣南巖辟穀，師謂宜建禪堂，以所卜杭六十地居之，大郎仙姑遂舍巖宅，施田與之，其後壽至百五十歲。杭人祀師是巖，而爲仙姑建宮昭陽門，內絕巢雀焉。按何仙姑，廣州增城人。生而頂有六毫，唐武后時，住雲母溪，夢神人教之食雲母粉，當輕身不死。姑取餌之，常往來山谷間，行步如飛，後漸辟穀，語言異常。武后遣使召赴闕，中路復失。景龍中，白日昇天。天寶九載，見於麻姑，佇立五色雲中。大曆中，又見身廣州小石樓。今云宋時人，不省所謂。

石燕巖

赤面石 上圓下方，峭壁赤色。

馬跡石 在山澗中，廣二丈餘，厚四之一，兩面皆有馬跡。

石龍 橫亘溪中，背有鱗文。早時積砂石，則天必雨。雨水漲蕩，必至砂石全去，乃已。

獅子石 梅溪寨西水口，山頂石高數十丈。勢若獅卧，數里皆見。

川

大溪 發源長汀縣界衆溪，匯合入縣境，與舊州語口之水會，至縣治南山下，過美女峰，縈迴三摺，環抱而出。又西流五百步，南逕潭口，直抵廣潮入海。三摺水，杭佳景也。中有蓮花石、觀音石、烏虎石。蓮花石波濤洶湧，行舟毫釐失手，卽至覆沒。其上群石叢萃如蓮花。有觀音石、烏虎石，皆以形似名者。

瀨溪

黃潭溪 源出龍巖界石門小澗，至小拔湯，過上南湖，逕三埧、漢漈崆，會大溪，河通舟楫。小拔湯，溫泉也。

安鄉溪 源出東安巖山小澗中，與大溪合。

跳魚溪 發源棕山嶂，至豐稔寺前，合黃潭溪。

金山下溪 在縣北。泠泠清泚，東流數里，滲入沙石中，號乾坑。數百步外，復湧出長流。

南寶溪 源出南寶山，下流數里，納樊水，會金山下溪里鍾寮場，與南橋小澗、竹林坊水合而東流。鍾寮場，宋時縣治在焉。坑治興盛，商旅輻湊。

樊溪 出鍾寮場東，與南寶溪合流。溪西有水溪，出赤色。

新田溪 在鍾寮場西，與南寶合流。逕龍蛇山，會語口溪。南流至舊州，與大溪合流。

水埔溪 源出武平界，經巖頭舖，至水布灘，合大溪。

九曲溪 源出新坊口，紜紆九折，至語口與大溪合。溪之水口，有香爐石。舊傳，縣治南石峽間，兩山如束，中通一徑，竟半里許。未縣之前，有妖怪、虎豹爲害。覲者黃七翁與子及婿姓倖者往治之，因隨身入石，石壁隱映，露有人影，儼然三像，妖怪遂息。風雨時，石中隱隱有金鼓聲。民立廟香爐石下，曰黃倖仙師廟，且家繪像奉之。

苦竹溪 山澗中合衆流，至水西渡，入大溪。

高車灘 傍置高車，轉水溉田。

馬尾灘 水散流若馬尾然。

逃船灘 灘甚險惡，舟人過之，修載而後敢行。

操蓬灘 亂石森列，舟過此，必操蓬以濟。

上徐灘 下徐灘 大籠鈎灘

大孤灘 衆石槎牙，船難上下，行者必易載而渡。

回龍灘 白石灘

禾灘 有石平坦，農者常頓禾其上。

目忌灘 水湍甚，篙師忌之。

鑊風灘 有二水，一直一橫，浪滾如鑊。

草鞋潭 在縣北二里許，延袤數里。舟人云，行竟此潭，可成草鞋一雙。

信豐潭 黃土潭

相公潭 有人寓此產子，宦達後，以名潭。

灘頭潭 石壁潭

鹹水湖 在三層嶺背，出水一泓，味鹹，不涸。又勝運里大陂下亦有之。又有天井湖，濶五十餘丈，

深淺莫測。一日忽涸，水湧出十五里外。又在城里北門外，西有二湖，亦名天井。

鬼湖 廣丈有奇，旁無寸草，其深莫測。相傳下有小溪，蛟龍宅焉。

白水漈 溪邊土中有石塊，質鏤章，能運水至頂，以滋華草。取而工之，可爲假山。舊有屬題「白水

漈頭白屋，白鷄啼白晝」，未有對者。皇朝潮陽修撰林大欽過此，隨車問土，得黃泥壠，遂儷之曰：「黃泥

壠口黃家，黃犬吠黃昏。」

御天池 深蓄廣漑，可以備旱。

佛嶺泉 泉出石孔中，如鏡。飲之不竭。

瀑布泉

吳公井 宋志：在縣東二百步。慶元間，有龍見，遷縣後廢。

靈源井 在縣西。

武平縣 在郡西南。東抵上杭，西抵江西安遠縣，南抵廣東程鄉縣，北抵長汀縣。唐置州。後以本州西南地爲南安、武平二鎮，隸長汀。五代時，僞閩併南安爲武平場。宋淳化五年升爲縣，析長汀西南境益之，以屬汀州。元仍舊。皇朝因之，里凡七，初統圖二十有三，繼統都十九，今統圖二十。

在城高泰里，圖四。宋安豐鄉高吳保。

豐順平里，圖三。宋順義鄉武溪里。溪曰漁溪。灘曰白鷺。

信順園里，圖三。宋永寧鄉招信保。山曰梁野。溪曰千秋、大順嶺小溪。〔六〕

大湘亭里，圖三。宋永寧鄉七里保。灘曰七里。

丘留東里，圖三。宋和順鄉丘田、留田、東流三甲。溪曰濠坑。

歸郡里，圖三。宋永平鄉歸平里。灘曰剪刀、大頂、弩牙、鈎丁、小籠。

盈塘里，圖一。宋永平鄉石塘里。

閩徽盡地，豫章界頭。黃龍北峙，筆架南列，梁野障東，雙豸蟠西。龍溪碧水，環繞合流。其形勝也。

山

靈洞山 在縣西十里，爲洞天之一。大洞三十六，小洞二十八。有仙人、上馬石、蛟池、湯泉、石龜之類。其下舊有靈洞院、洞元觀。又石井三，舊傳葛真人煉丹井也。靈洞院，宋時僧了證居之。了證，姓鍾，本邑人，年十九，禮拜禪果寺僧道松。後游諸方，遇崇首，坐機緣相契，印可得道，普度一切，還居是洞。一日送客，入門謂侍者曰：「緣盡矣，緊斂草鞋爲別。」侍者請頌。證曰：「拙哉！呆子。平居倦爲，

況將行乎？」請益堅，強書曰：「來時本無，去亦非有。珍重諸人，月明清晝。」跌坐而逝。三日茶毗。五色舍利，絜送如雨。

雙鷹山 雙峰如鷹。縣志不識「多」字，而以為「薦」，且解之曰：「雙峰高薦。」陋矣。

交椅山 鵝頭山 天馬山

梁野山 一名梁山，一名梁野仙山。去縣東三十五里，高五十餘仞，分十二面，險峻疊出，絕頂有白蓮池。昔鄉民採茗，誤至一巖，見龍鬚草蒙幕垂門，披而人見，佛像、經帙、鐘磬、幢蓋，如新造。設後再往，失之矣。唐開元中，福僧持鐵駐錫三峰。大曆中，泉州僧靈悟駐山。自後燕沒。絕頂有石，大數丈餘，下有一石載之，登其上，遠見百里，名古母石。

橋背嶺 與太平嶺相連，道通邑中。

石獅嶺

石徑嶺 高峻多石，通羊角水，接江西會昌界。

白鶴嶺 在縣西十里。江、廣往來要路。

當峰嶺 鑿石爲路，其長五里，接永平寨。上有泉兩泓，自石眼傍出，名雙井泉。

黃公嶺 一名黃峰嶺，與長汀分界，修十餘里，上有聖公泉。相傳定公佛卓錫泉傍，(七)水僅杯勺，雖千人飲不竭。

伏牛嶺 嶺有黑石，高廣百丈，狀如伏牛。

平頂嶺 在縣北五十里。民間相傳爲棺材石。新官初至，常戴星入邑治。教諭謝國臣詩：「此山本

是巨門星，閭井訛傳惑宵冥。生死世緣看已破，豈容人意避過經。」

觀音嶺

南安巖 在縣南八十里。形如獅子，舊爲蛟龍窟宅，俗呼龍穿洞。定光大師卓錫於此。中有二巖，南巖窈窕虛明，石室天成。東巖差隘，而石龕尤縝密。又有石鼓、石虎、石龍、石龜、石獅，俱以形似名。巖之前，秀峰十二，名十二峰。定光偈曰：「一峰獅子吼，十二子相隨。」宋郭祥正詩：「汀、梅之間山萬重，南安巖寶何玲瓏。青瑤屹立敞四壁，巧匠縮手難爲工。」又有綠水湖，水色深綠。相傳定光佛創院取水，爲大綠。

新華巖 湖口巖

龍濟巖 在城南三里。(三)林木嘉茂，石徑窈深，洞前有龍牙石、珠簾泉。

象洞 縣南一百里，接潮州界。環抱紆迴，號九十九洞。《海錄碎事》：象洞在潮海間，今屬武平縣。昔未開拓時，群象止其中。其地膏腴，有美稼可釀佳醞，邑人重之，名象洞酒。

棋盤石 果合石 仙人床石

川水利附。

化龍溪 一名南安溪。在縣治前百步許，源出清平鄉，南流合歸順鄉小溪，入廣東程鄉界。

聚靈溪 源出靈洞寨，城中高仰，民病緩急無濟。皇朝令徐甫宰相勢浚導，砌以磚石近五里許，由西門流入，繞城東，出合化龍溪，復折而西。

漁溪 源出東峰嶺下，會禾豐溪，合徑口小溪水，南流入化龍溪。

千秋溪 源出梁野山，自東團經谷孝里，合流，西入化龍溪。

大順嶺小溪 流自露溪保，入長汀縣界七里河。

濠坑溪 源出江西安遠界。

武溪 水接化龍溪，合流至廣東程鄉界。

黃沙溪 多沙少石，縈紆數里，流入化龍溪。

禾豐溪 源出當峰嶺下，南流入漁溪、九潭，合逕口水，流入於化龍溪。

露溪 一溪七彎，俗呼露渡溪七渡。

順明溪 大嶺下，西流，出江西會昌縣界，入大溪。

九龍溪潭 黃泥潭 騰蛟潭

雲礫

蛟塘 在縣南八十里。水深無際。昔有蛟爲民毒，泊南安祖師建院巖下，其毒遂弭。

熱水泉 官陂泉

龍泉井 在縣南禪果院殿後。相傳定光佛所鑿。

銅井 在城內西偏。汲之，聲如銅響，而色又黃。

〔校記〕

〔一〕「汀州府」，各本原脫「府」字，據本書體例補。

〔二〕「統圖五十有二」，下文實列四十七圖。

〔三〕「統圖四十」，下文實例三十四圖。

〔四〕「金山」，下文作「紫金山」，（八閩通志·地理）作「金山」。

〔五〕「三層嶺」，各本均殘，「層」字，據上文及（八閩通志·地理）補。

〔六〕「大順嶺小溪」，各本原作「大順小溪」，據上文及（八閩通志·地理）補。

〔七〕「定公佛」，據本卷「南安巖」條，定光大師卓錫「行事，當作「定光佛」。

閩書卷之二十二

方域志

汀州府 清流縣 連城縣 歸化縣 永定縣

清流縣 在郡東北。东至永安，西、南、北俱抵寧化，東南抵連城，東北抵歸化。本長汀、寧化縣東麻倉團里。舊有清流驛，宋元符元年，提刑王祖道行郡憇驛，愛其山川，因謂長汀、寧化壤地曠遠，奏析寧化六團里、長汀二團里，置縣。紹定中廢。元復置。皇朝因之，初，里凡九，統圖七十九。成化八年，分歸上、歸下一里，隸歸化縣。今轄七里，統圖五十六。(一)

坊郭里，圖九。山曰龍山、屏山、東華、筆山、方山、馬家、西靈、拜柑。嶺曰東隘、高風、崕峽。巖曰瀾湧。石曰玉兔、獅子。溪曰清溪、半溪。灘曰百舌喉。潭曰南岐、漁消。

倉盈里，圖十一。山曰蓮葉、香爐。嶺曰高陽、長空。巖曰龍峰。石曰康石。潭曰池潭。

永得里，圖十。山曰象形、龜山、鷄籠。嶺曰玉華、擊陽、浮竹、高地。巖曰靈龜、七峰、白雲、清溪。(二)溪曰嵩溪、清溪。

四保里，圖六。山口楓隔。溪曰李坊。

夢溪里，圖十。山曰鐵石、貴人、五雷峰、虎頭。巖曰馬兒。溪曰芹溪、夢溪。

羅村里，圖四。山曰豐山、漁漁隔。（二）溪曰羅口。

北團里，圖四。山曰盈山。

屏山後擁，南極前揖，東華左峙，西靈右蹲。一水入鳳翔而出龍津，環抱如帶，清瑩若玉。其形勝也。

山

龍山 自長汀平原，山分脉而來，八十里許，至縣南。群峰高聳，起伏如龍。元陳有定於此纍城屯兵，名南寨山。其支山曰後龍山，曰塔山。其最高峰曰高極，縣治朝山也。

屏山 一名紗帽山，蒼然屏立，擁於縣後。元陳有定纍石屯兵，名北寨山。下有聖水庵，泉水出洞中，味甲寒泉。寒泉者，縣南祐聖祠下泉也，甘冽爲最。

東華山 拔地凌空，前有斗臺，了然曠望，邑勝境也。

烏石山 皇朝天順間，縣民康祿言其山風水有異，圖以進。下三司按視，不實，下獄誅之。

筆山 層巒疊翠，環繞二十里，中聳三峰，最高。

方山

馬家山 縣左山也。邑人昔姓馬者，居其下，頂有萬壽寺。

西靈山 縣右山也。

拜相山 與南極龍山相對，狀若人拜，又名拜龍。

蓮葉山 山若蓮葉。又名斗笠山。中有池，夏蓮盛花，又名蓮花。

香爐山 象形山 龜山 鷄籠山

楓隔山 山多楓木。

鐵石山 山產鐵石，皆堅黑如鐵色。

貴人山 五雷峰山 虎頭山。

豐山 山極峭絕，其頂如磨，常有雲覆，秋霽方露全體。凡登謁者，必於夏末秋初，過則涼冷侵骨矣。宋淳熙間，有劉道士與其徒，裹十日糧，誅棘捫蘿而上。行半日，漸有荒徑，若行跡，六日乃至其巔。坦夷如砥，上有田地，又有棋局、丹竈、礎石，散亂地上，如故居廢址。始行三十里，亂峰如削，絕澗奔雷，古木懸巖，怪松偃蹇。又十里，茶泉繞澗，一掬而齒頰生香。又十里，順真道院在焉。順真道院者，坊郭里人歐陽仙蛻化處也。又山之外，有遠巘，高插天際，名馬山。侵晨登望，延、汀境界了然在目。

漁滄隔山

盈山 亦名老人山。宋□熙間，〔四〕有羅仙者，修道連城之廣福堂，人是山羽化，邑人塑軀祀之。

銅鑼山 案卓山 楊梅山

國母嶼 世傳宋楊太后過此，故名。

東隘嶺 在縣南一里。地接橫口村，懸崖絕壁，可謂一夫當關。皇朝正德間，令林湜，因武平寇亂，隘守焉。

高風嶺

崆峒嶺 山勢臨水，中通一道，至嶺絕高。元陳有定爲關於此。

高陽嶺 長空嶺

玉華嶺 上有玉華洞。翠峰矗立，石勢穿通，若石窗、石龕、石觀音、石蓮花、石獅子之類。宋乾道間，建佛廬，多有留題者。其西有石燕洞。洞三穴，可容人行，深遠莫測。洞口通寧化縣界。東有靈龜洞，巨石如龜。洞亦三穴，深窅无敢入。

擊陽嶺 一名向陽，地名林畬。峻險壁立，太陽可擊，狀其高矣。

浮竹嶺 高地嶺 百步嶺

金錢嶺 清流、寧化界嶺也。

分水嶺 在縣東北吳地鋪。元陳有定屯兵於此。

橫溪嶺 在縣南十里。高五百丈，通寧化新村。

瀾湧嶺 飛泉怪石，鬱爲勝區。定光佛建巖，爲今名。巖故无水，定光合竹引至，亦莫得其源也。

龍峰嶺 地名橘洲，峰巒秀削，松栢交翠。

靈龜巖 舊有大龜見巖下，僧庵而祀之。

七峰巖

白雲巖 巖形如屋。國初江道人於此修煉，坐化，人泥軀祀之。

清溪巖 中有一水，清瑩不竭。

馬兒巖 以形名。

蔣公巖 宋紹興初，有蔣道居此辟穀，莫知所終。

玉兔石 在縣西鳳翔橋下。形圓色白，春夏或變青紅。皇朝成化間，忽墜見底，大有光瑩。縣東龍津橋畔，又有金烏石，與是石相對。

獅子石 在縣西靈庵門首。

廩石 地名嵩口，石若廩矣。

符石 在縣南寒泉亭前溪中，長丈許。相傳有蛟患，邑人任總管書符鎮之，遂無震恐。

鷹嘴石

黃石 溪中大石也，黃色尖突，鎮邑水口。諺云：「黃石蒙頭，十舵九愁。」

川水利附。

清溪 卽清流大溪。發源寧化，出高地、青口，合於正溪。環抱縣邑，邑以此名清流。

正溪 在大溪。發源寧化，濤迴五十里至縣境，澄清如練。合一邑衆溪，度九龍、會延、建二水，至福

州，入於海。

半溪 源出高地，至白石橋溪，西通大溪。半溪中，白石錯落，望之如未消雪，邑一景也。

嵩溪 發源寧化界，合本里小溪水，過玉華，至嵩口，入大溪。

青溪 發源寧化界，經高地，下至青口，合嵩溪入大溪。

李坊溪 發源長汀界，至白石溪，入羅口，合正溪。

夢溪 源自本里山澗流出，至九龍灘口，合正溪入海。說者謂溪上林木蓊鬱，行者如在夢中，此其名也。里復有潭，名秋口潭。

芹溪 源自歸上里，出芹口，入正溪。

羅口溪 發源連城，過北園，至羅口，合正溪。

三港溪 在縣西南五里，連有三小港，其源皆自寧化，會流於清溪。

鄭家坑溪 在縣北。各山坑水合流至古基頭，及南岐入正溪。

巖坊溪 在縣治南，流至橫口，入正溪。

百舌喉灘 亂石驚濤，曲折峻激，又有歪灘。

七里灘 下有楊梅潭。

旗角灘 牛角灘

長空灘 怪石縱橫，中有大黃石，險次九龍。下有長空潭，澄澈映空。

九龍灘 灘名見延平永安縣。灘凡九，其六屬清流，最險，又名六灘。九灘上下二十餘里，每遇一灘，兩岸石峽如闕，水中石高可數丈，如龍橫截其間，屈曲如之玄。乘舟直下，一似墜天，稍失手，即百能不救。凡舟至此，須沽酒市牲，拜禱龍王。舟人更取竹編筩葉裹船頭，以拒浪，倩本土最能爲之欄護，然後敢下。耆舊傳聞，宋元時，舟楫不通。元陳有定始鑿以運汀糧。然張籍《送元汀州詩》有「爲郡暫辭雙鳳闕，全家遠過九龍灘」之句，則唐時已行舟矣。皇朝成化十八年，令凌宗，冬時募工鑿去惡石，灘勢少殺。然中有十八灘，終爲險迅，故俗云：「九龍十八灘。」邑人賴世隆詩：「九龍之險無與比，江淮河海風波爾。豈如此水怪石多，朝夕無風波自起。天劈地闢幾春秋，何人作俑先泛舟？畏途一開不可塞，至今來往行人愁。憶昨乘槎秋潦竭，清流挽至龍頭歇。朝來減載覓擔夫，舟中無物輕如葉。舵頭夾起護波蓬，

左右絆索俱新棕。舵師不敢自放去，又尋本土人梢龍。宰牲酌酒龍王廟，拜禱龍王求好筭。祭罷潛身急上船，相戒舟人勿言笑。一篙撐人碧潭心，中流喝采呼神明。遙觀龍下浪花滾，喧天萬壑春雷鳴。青山兩岸開圖畫，銀河一道當中瀉。槎牙古木遮雲霄，天日无光晝如夜。峽口初過第一龍，禹門三級高更雄。船從天上跌落地，回頭白雪翻晴空。第二龍中長且大，狂瀾駭浪奔澎湃。稍呼舵應疾若飛，生死須臾不停待。三龍纔過四龍迎，滿船浪人舟人驚。欲求小路逃性命，倚天石壁難飛騰。五龍曲折憂回舵，六龍峻瀨防危禍。亂濤勢合如山來，船行水底鑽將過。嶺下擔夫已過磯，息肩岸上待多時。行近溪村日將反，停橈裝載具午炊。暫時蘇息難久駐，龍上梢公別我去。急流數里至七龍，俗傳魔怪留神踪。莫言此龍易與爾，前後覆溺在眼中。八龍崎嶇尤可畏，浪高石大難迴避。九龍出峽到安沙，船內人人皆賀喜。維舟上岸扣溪鄰，典衣沽酒如更生。斜陽無事同暢飲，夢魂半夜猶頻驚。起來蓬上觀山色，龍裏月沉雲氣黑。所經歷歷皆可陳，悔奉親軀臨不測。龍王廟在鐵石洞口，亦名安濟廟，亦名九龍。宋蔡襄守泉州時，有布衣投謁，自稱寧化九龍道士，頃忽不見。取刺觀之，得詩一首：「遠遠青青疊疊峰，峰前真宰讀書翁。半壁冷落高宗雨，一洞淒涼吉甫風。溪隱豹眠寒霧露，井凋鳳宿舊梧桐。九龍山下英雄氣，盡屬君王宇宙中。」明年，襄過謁廟，亦答以詩。宋時，清流尚屬寧化，故謂寧化九龍道士也。

黃栢洋 在縣東五十里。宋文天祥行兵至此，人農家以避風雨，爲題聯句。

漁滄潭 潭三連如貫珠，清絕明瑩。兩岸巨石峯。若關隘，魚子所穴，故名漁滄。上有漁滄廟，祀樊令。令字號甫，秀州華亭縣人。唐末，官銀青光祿大夫。贛寇曾常侍作亂，令奉命徵討，追至羅城，力戰死。鄉人祀之。其後屢著靈異。宋淳熙、慶元間，邑爲建廟。紹興間，贛賊人寇，近城十五里，聞鉦鼓聲

甚震。俄見兵馬幟刃，羅列廟後，遂驚退。元至正二十五年，封爲漁滄感應王。皇朝洪武三年，令方仕英以靈跡聞，得列祀典，改題其主曰：唐銀青光祿大夫樊公之神。九月朔日神誕，亦命有司致祭。本布政司城隍廟，亦設主陪祀。成化十四年，上杭寇黎仲端倡亂，動擾三省。朝命都御史高明討平之。明駐節，爲神賦詩一章，俾邑人歌以侑祀。及去，明於輿中夢路傍樹梢悉插旌旗，朱衣三十餘人，俊偉簇立。就中一朱衣詣白曰：「本縣首領官林大人至此送別。」明心爲林都憲聰也。比至下華館，會副使劉城，爲陳前夢。副使曰：「公行人京，與林相見。」其夜，明復夢朱衣人，笑而告曰：「公與劉，哲心人也，何不解字？」發歎去。明亦驚寤，心甚異之，良久方悟，林大人，樊字也，乃漁滄廟侯，酬前詩矣。遂復詩識之。先是邑人於神誕之月，先期三日，奉以出游爲故事。萬曆丙子秋八月，邑人將奉神出游，會學博率諸青衿行，祭忽火起，後寢焚，莫知其故。詰旦，衆攘闢瓦址，得遺骸一函，寢後，乃知欲盜廟靈氣者，竊瘞求福，神憤殛之。遂投骸於淵，建廟如故。邑人於八九月前後，爲樊公會。四方貨賄，莫不來集。

南岐潭

更鼓潭 地名池溪，相傳昔人嘗夜靜聞有更鼓聲。

門潭 在鐵石磯巡檢司前清鏡里許。舟行如入剡溪，崖水中有石門，故名門潭。

池潭 地名田口，獨爲清深。

角樹泉 在縣晏公廟下。地中湧一泉穴，足應居人日汲。廟後五里許，地名漁滄坑，有東峰泉瀑，長若玉龍。有伍姓者，鑿池引竹，度龍津橋，以便里汲，人德之。晏公失其名，明溪農家也。樵蘇山間，忽聞有旁耳語者，迴盼，見一道人，遺之半桃，晏食已，忽不見。歸若醉，寐者累日，遂不復煙火，嗜惟果實、清

泉而已，顏若童妙，能言禍福，鄉人呼爲晏仙。

溫泉 有三所：一在池溪，一在嵩口，一在北原。其源在出山下，可以熟卵。

聖堂井 倉前井

東嶽廟井

連城縣 在郡東南。東至沙縣，西至長汀，南至上杭，北至長汀，本長河地。宋元符時，置蓮城堡，以邑有蓮峰山名。紹興三年，梅州司上曹事虞觀攝尉長汀，上言：「南北團去縣百餘里，強者喜暴，弱者難恕，乞置縣治，以便統攝。」得旨，縣蓮城村。郡守鄭以境隘，析長汀縣古田鄉六團里益之。元至正六年，草寇羅天麟作亂，既平，因改蓮爲連，去草之義也。其後爲陳友諒所據，陳友定始復之。皇朝因焉，里六，統圖三十三。(五)

在城里，圖四。宋古田鄉。山曰蟠龍、彭屋、赤嶺、馬坑。嶺曰塔背、鷓鴣。溪曰文溪。潭曰楊花、蓮花、龍潭。

南順里，圖四。宋南團隔川鄉。文天祥扶帝昺駐屯是里，經月，指示鄉人開密處，後屯河源里。三月，夜蛙聞，天祥嘆呼境神，蛙鳴遂止。迄今無蛙，連人名其鄉曰王城。山曰銀屏、筆架、西寶、大嶺、羅婆、三將軍、太平、(六)金鷄。岡曰龍子、七星、七里。嶺曰虎忙、陡嶺、(七)野狐、牛輓。巖曰鷲峰、西寶、廣靈。石曰馬鞍。潭曰石固、石城、麻潭。

河源里，圖五。宋河源下里。山曰涼傘、雲山、高貴人、劉池。(八)嶺曰垂珠。溪曰苕溪。

北安里，圖五。宋北團。山曰蓮峰、天馬、獅子、三仙、堆禾、上峽。嶺曰烏石、彭地、分水。巖曰石鐘、旗石、龍興、寶珠、石室。石曰禾康、飯籬、雙髻。灘曰楊梅。

表席里，圖四。宋席湖表正二里。山曰白雲、將軍。峰曰文筆。嶺曰赤竹、牛路、遠水。巖曰白石、朝天、白仙、南峰。溪曰蕭坊、新泉、里岡、隔口。潭曰鐵珠。

姑田里，圖六。宋姑田圍。山口髻頭、橫山。（九）嶺曰貓兒、磨石。

崇岡複嶺，舟車四塞。東引蓮峰，西擁旗石。銀屏特立案其南，文溪九折抱其郭。金鷄、天馬諸峰，奇秀變幻。其形勝也。

山

蟠龍山 源自清流之豐山，東南分支，行九十餘里，至縣之旗石峰。復突起逆聳而上，爲西寶山。又盤伏而南，爲三軍，而下抵於縣。歷六十里餘，屹然拔起縣後，高聳磅礴，縣主山也。亦名後龍山。山側有龍子岡。

彭屋山 以宋彭孫所居名。孫字仲謀，少負才勇，仁宗皇初間，（二〇）率里俠應募，剿江南賊劉石鵠，平田辰州賊陳元猛，繼討嶺南、交趾，皆有功。廖恩寇閩，命孫專徵，單騎諭降之。復以計擒劇賊詹遇。尋命討瀘南叛蠻，會靈武有警，命孫護輜重往西陲。孫上言：「願得精卒五萬，不爲經略所制，靈州可復。」進劄凡十五通，皆邊防機密。會神宗不豫，尋乞老歸。累官萊州防禦使、隴西郡開國侯，食邑千六百戶。孫天性忠實，歷事四朝，屢立奇功，恩寵甚厚。卒穎昌，遂家焉。

馬坑山 下有澗曰馬坑，民居環聚。

高凍山 小張坑山 銀屏山 筆架山

西寶山 其山常有夜光，疑有寶氣，故名。

大嶺山 高峻層疊，有路沿山而上，西抵長汀界。

羅婆山 昔有羅婆居山下，辛勤造家，合瘠土之訓。

二將軍山 大坪山

金鷄山 常有人到山，見一庵，有金鷄飛鳴花餅之上，因寄宿庵中，比曉覺，不見庵所。

涼傘山 雲山

高貴人山 有顯仕姓高者過此，徘徊愛其秀美，後人以名山。

劉地山

蓮峰山 山絕險峻，其上平曠，可容萬人。有寨，有城，有池，有塹，有雲樓，宣武西南四門。宋邑人丘鱗，率縣民避寇於此，舊呼東田，石最爲奇勝。元馬周卿，以福省架閣攝邑，標爲十三景，隸書巖壁間，曰冠豸，曰蒼玉峽，曰雲棧，曰天梯，曰桃源，曰清如許，曰芙蓉波，曰金字泉，曰白雲深處，曰天光咫尺，曰蒼谷，曰靈虛，曰小崆峒，尚有香爐石、九老亭。亭之上，有九十九堦，有仙人下棋處，又有迎春石。歲立春日，人皆詣石禱祝。近歲，游者益以丹梯、靈芝爲十五景，而尚不足以盡之。皇朝僉憲王高桂《登蓮峰詩序》：「茲山，宇宙奇觀也。獨以僻渺，文人學士足跡莫逮，吟咏闕焉。」推官劉玉成《詩序》曰：「汀郡諸勝，紫金弘而敞，朝斗窈而清，滴水奇而秀，語大觀，摩蓮峰若也。」傍有金櫃山，巨石圓整，橫截一縫，若櫃然。山半峭壁間，又有彭侯芋葉，大如盤，冬夏不枯，遞年子落崖下，人難取，取以火劑，亦不能熟，舊傳彭侯所種。

天馬山 怪石昂藏若天馬。舊傳，遇風雨夜則嘶嘶，則鄉里不靖。元末雷擊其首。

獅子山

三仙山 舊傳，有三人會山中，談笑終日，皆乘鶴去。

堆禾山 其山突起平陸，狀若堆禾。

上峽山 白雲山 將軍山

蕭坑山 萬曆中，令徐大化築北閘，鑿石是山。石線中有「徐欽徐昌」四大字，連人異之。

髻頭山

黃屋山 山形高博。黃氏世居其下。

西山 有杜仙隱是山，功成脫化，鄉人建庵祀之。杜，南順里人，佚其名。山下有龍爪石，下瞰溪流。

豐山 去邑九十里。世傳宋時侍郎沈勇營葬於此。後呂純陽仙，令土神送出骸殖，沈覺仍瘞。呂化作一道人曰：「易汝鼓架山穴，是處陽真人道場也。」後清流縣有歐陽姓者，寓此得道。

文筆峰 塔背嶺 鷓鴣嶺

虎忙嶺 接長汀青巖里，虎過亦忙，言嶺峻也。皇朝有僧大行者，建庵嶺中。大行，不知何許人，得禪定法，夜露頂，坐荒郊，人或叩之，頗證前覺。

陡嶺 有小大二路，沿山絕頂，綿五七里，險阻陡峻。

野狐嶺 嶺接虎忙，多狐。

牛輓嶺

垂珠嶺 嶺界上杭。舊傳宋文天祥起兵過此，回顧潸然，居民痛而表之曰垂珠。

烏石嶺 下有石門潭，兩石夾溪，對峙如門，潭在其中。

彭地嶺（二） 以彭侯嘗駐兵於此。

分水嶺 嶺西北界長汀，東南連城。

赤竹嶺 南接上杭，赤竹是生。

牛路嶺 嶺盤旋十餘里，耕民販牛廣東，取路於此。

遠水嶺 接上杭界。行人以重灘患涉，避水而登是嶺。

貓兒嶺 與永安縣接界。兩山對立，如貓兒相顧。

橫山嶺 盤迴十有餘里，東南接龍巖界。

磨石嶺 有石可以礪。

葉屋嶺

石門巖 兩石相峙，中空成門。宋紹興間，雪峰僧倚巖結庵，名曰宿雲。

滴水巖 界歸化縣，見後。

驚峰巖 傍有瀑布泉，又有石倉。

西寶巖 廣靈巖

石鐘巖 俯瞰石壁，秀柱層崖，峭然殊觀。

龍興巖 寶珠巖 石室巖 白石巖 朝天巖

白仙巖 峰巒俱白，洞穴甚寬，下俯小溪焉。

南峰巖 七星岡 七里岡 馬鞍石 禾廩石 飯籬石 雙髻石

川

文溪 舊名清溪。一源發於長汀橋，由新林寺前過。一源發於金鷄山，由法界庵前過。合流至縣，凡九折而東流入清流界，始赴於海。因曲折如「文」字，故名。上有文川橋，下有楊州潭。夾岸多綠柳，春暮，花飛蔽潭，故名楊花潭。下復有蓮花潭。舊傳漁人投水，見潭底有石，狀如蓮花，故名蓮花潭。下有龍潭，爲龍居。

芑溪 源出龍巖山，下接楊家渡頭，西流入長汀界。

蕭坊溪 源出上杭芋園溪，下抵江頭渡，入上杭界。

新泉溪 源自羅地，下流抵湯泉溪，合流通上杭界。

里岡溪 源出文筆山，下流抵河源里馬坊渡，合流至上杭界。

隔口溪 水出俞溪源，下流抵河源里馬坊渡，合流至上杭界。

楊梅灘 源出虎忙嶺，接青泰里，衆流而下，灘流險隘，岸上舊多楊梅樹。

長灘 出巖背，流注上杭，曲折多險。

石固潭 兩岸峭石，水深莫測，衆魚聚焉。常有捕魚者云：潭底有石巖，巖下有大魚，衆魚依之。漁者誤犯，其噴沫及人，腥涎如膠，幾不得出。又有在此伐木者，因採藥毒觸作風雨，溪流泛漲，一鱗不獲。

石城潭 在石航陂之下。其石險陡，環迴如城。

麻潭

鐵珠潭 潭側有路，石壁峭立，內多黑石，如鐵珠然。

龍爪潭 放生池 沙水池 瑞泉 溫泉

三龍井 有雲騰井上，卽雨。舊傳三龍居其間，井上有石平砥，名拜龍石。

福仙井

古佛井

歸化縣 在郡城東。東至將樂，西至清流，南至永定，北至瑞金，本清流之明溪寨巡檢司。皇朝成化六年，府同知程熙，以其地當將樂、沙縣、寧化、清流之交，民梗難治，請於巡撫都御史滕昭，奏析四縣地，升爲歸化縣。里凡七，統圖四十有五。

歸上里，圖十一。舊清流縣地。山口樓臺鼓角，（一二）印詰、蛾眉、象山、屏風、小三台、響石、飛鳳、五馬、雲臺、銀瓶浪。山口覆船。洞曰玉巖。山口橋冠、棋盤、印石。溪曰明溪、珩溪。（一四）礫曰白水。泉曰甘泉。

歸下里，圖十二。舊清流縣地。山曰紫雲臺、旗山。嶺曰騰雲。嶺曰考嶺。峰曰仁壽。石曰金盤。溪曰沙溪。礫曰百丈。

柳楊里，圖七。舊寧化縣地。山曰黃牛、龍西。

下覺里，圖四。舊寧化縣地。山口雲蓋、筆架。峰曰三台、君了。巖口燕子。

興善里，圖三。舊將樂縣地。山曰龜山、鶴遷。嶺曰鐵嶺。巖曰鳳凰、永興。溪曰瀚溪、雷霆。潭曰龍坑。

中和里，圖二。舊將樂縣地。山曰蓮花。峰曰丫峰、塔峰。岡曰天上、水簾。巖曰聖隱。泉曰湯泉。

沙陽里，圖五。舊沙縣地。

樓臺鼓角聳於後，三台飛鳳揖於前。獅巖東峙，仁壽西矗，諸峰羅列，溪水環拱。其形勝也。

山

樓臺鼓角山 在縣治後。數峰聯綴，中一峰聳似樓臺，其餘諸峰似鼓、似角，邑主山也。

印誥山 邑後山也。

蛾眉山 邑前山也。群峰聯絡，中一峰若蛾眉然。

象山 一名南山。

屏風山

小三台山 學前山也。左爲掛榜山。

響石山 其山皆石，空洞傳響。

飛鳳山

五馬山 五峰周遭聯屬其中，土地蕃衍，居民殷實。溪水從西來，轉南出，形如之玄，遙觀若五馬環

槽然。

雲臺山

銀瓶浪盡山 峰巒兩三聯屬，中有二峰，圓尖如銀瓶，餘三峰，圓小似盡，色殊奇秀。

紫雲臺山 山周迴二十里，高十丈。其頂上平，有田、塘、水碓，居民約三百餘戶。又有均山，三峰聯絡，天氣殊涼，暑可衣褶。日出嵐霧空濛，望如紫雲然。山下有饒聖者，宋時人，牧羊至遙車嶺，遇仙人弈

棋，授桃一顆，自是得道，在均山坐化，邑人像祀之。

旗山 宋元祐間，有晏北海者，牧牛是山，遇二仙奕石上，侍看良久，授桃與食，遂得仙。皇朝有晏景者，其裔，生洪武壬戌，百有二歲。

黃牛山 山嶺峻寬。宋曾寡婦晏氏於此結五砦以禦賊。晏，柳楊里人，嫁寧化曾氏，曾死，守子不嫁。紹定間，賊破寧化，令佐俱逃。將樂令黃瑀令民五萬全、王倫，結約諸砦拒之。晏助兵給糧，多所殺獲。已，復依黃牛自爲一砦。賊來，索婦女、金帛甚急。晏召語其田丁曰：「賊索我耳，若輩衣食我若主母，當用命。」因解粧，散之曰：「勝賞汝，不勝以爲僇，無被辱困。」乃選百人爲前鋒，身白搗鼓，使婢鳴金，衆感奮逐賊，賊盡散去。鄉人多挈家來依，有不給者，晏輒贍之，聚以益衆。遂與萬全、倫，析黃牛山砦而五之，選少壯爲義丁，急則相應。賊屢攻弗克，所活以數萬人。知南劍州陳韓題其砦曰萬全，遺之金帛，晏悉散其下。寇平事聞，詔封爲恭人，補其子承信郎。

龍西山 奇峭，約有百丈。中有聖水巖，有水石泉，深尺許，不飲不盈，飲亦不盡，浼卽雷鳴。

雲蓋山 筆架山

龜山 以形名。楊龜山孕靈於此，故以爲號。下有甘潭，約深三丈，水極甘冽。歸上里，亦有龜山。

鶴遷山 相傳初建三清壇於羅坑，常修醮焚楮。有鶴從空下，啣餘燼過青山而止，人以爲異，遂卽地建宮，名鶴遷。

蓮花山

五雷山 在縣西十里，傍有二三石，如雷形。

仁壽峰 三台峰 君子峰。(一五)

丫峰 塔峰

騰雲嶂 高約五百丈，周迴百里，其形如蓋，氣色秀麗。山前後有龍興、白雲二庵。

五頂嶂 在邑西十里。邑之祖龍，從此發脉。

覆船岡 有獅子巖，內有小石室，約寬數丈。

天上岡 近夏陽頂，有路峻長，人行其中，夕嵐曉霧，咫尺莫辨。

考嶺

鐵嶺(一六) 路通將樂，一邑扼要。

大黃嶺

北斗巖 山形環抱，中有小窩。相傳星墜之窟，又名星窟巖。

滴水巖 去縣北五里，界連城縣。上有泉水下滴，亢旱不竭。西有洞，約濶數丈，其石扣之有聲。洞

內孔竅相通，約數十里。下有流泉，出爲滾溪。仙人掌噴水坑，卽此水所出，一方勝境也。宋時賴僧者居

之。僧名慧，本里賴家山人，少投羅漢寺，師古空爲僧。誦經有悟，出游方外二十餘年。開寶二年，來結

庵巖中，端坐不寐，能知休咎。年九十餘，將入定，書几曰：「生也了，死也了，九十三歲磨多少？而今打

破大虛空，一輪明月清皎皎。」旬餘，鄉人始知其逝。將瘞之時，見其顏色如生，破襖上有香氣，乃曰佛

也。群泥軀祀之。皇朝嘉靖中，副使嶺南梁世驃，標巖境爲十：曰天泉石，曰仙橋，曰虛鳴竅，曰隱鵲巖，

曰佛頭巖，曰祥雲洞，曰躍鯉石，曰獅子巖，曰蜂窠石，曰申陽小洞。副使宗臣《游滴水巖記》：「余讀汀

記，歸化東北五里，蓋有滴水巖云。往徐君與余談，茲巖大奇也。戊午九月，督兵西徵，馳之歸化，揭君來謁曰：『君將出師紫雲乎？則請於滴水駐餐焉。』予明日以數騎東行，踰嶺稍折而北，已又折而東，凡三折至巖。巖壁斗絕外墜，逕而上，揭君遲之。旣上，有宇，故名迎仙。余曰：『遲仙不愈迎仙哉。』堂後有亭，亭題，余怪其腐語，因與揭君解衣其中，遂易之曰振衣。已聞垂垂雨，則滴水巖在焉。水有三：一出垂石如蓮者，二從石隙中下，盛之以石盂。揭君曰：『巖人咸飲此水，嘗之甘，烹茶尤甘。』余曰：『蓋天漿乎，蓋天漿乎！』其石乃蜿蜒而曲，若龍足戲雲中，而則隱則見者，余怪焉。稍前，有斗石下垂，類蓮而華者，因名之垂蓮。水石亦蓮，不名者，從水也。又俯而睇，其右隅，僧在焉。爐煙陰陰上也，余曰：『何僧？』揭君曰：『此記所稱賴僧者也。其旣化而坐數日矣，乃巖人始知之，則大異之，因泥軀祀之，此其軀也。』旱而禱輒雨，昇之禱輒大雨。』則嘆曰：『有道哉！有道哉！夫人者，宜顯者也。佛者，宜幽者也。今暴其身於明白四達之區，使豎商牧子，拊其而目，嬉焉。僧而靈，固殷殷怒也。』於是命藏之幽，幽之者，神之也。洞凡三門，其中而豎者數柱，遂名之曰天柱。而柱則又名之曰中天柱、左天柱、右天柱。有石類獅而門者，其上更有斗石外懸，中系甚微，若蒂焉，故名蜂窩。而揭君曰：『閭氓有心疾，輒削其石，水飲之，卽愈。石日日削，不類窩矣。』眺而左，有二門，左者逕，右者乃橋。石橫其上，而又虛其上，若龍焉，遂名之龍梁。龍之左而上，纍纍若珠，又若垂楊之裊裊條條而冰者，仰睇其右，片石突而下，久之，嘆曰：『此墮猿也。』其石五色，爲祥雲，雲之下爲虛鳴二洞，簷擊輒應，谷虛則鳴也。又一洞狹險，旁曰天鼓。簷擊之，彭彭鼓聲焉。余訝之。又有冷然磬而幽者，余曰：『此何聲也？』揭君曰：『所謂石磬者也。』左有洞，洞又有床，火乃人，不火不入，人者床而擊磬，若履禪室焉。余益駭，而揭君命余觴。余令侍子左鼓右磬，颯

然天籟滿山也。有巨石整而偉，余右睨之，不得其名。久之曰：『冕哉。』遂呼爲冕石。冕石者，卽磐而床者，洞門也。其洞最邃，名曰鴻濛。又起而環視鯉石、鷹石、龜石、鰲石，又何其紛錯也。神奇哉！神奇哉！變化總萃，幻鑄紛紜，空白恍灼，蒼萃飄忽，則概名之曰小崆峒云。余於是仰而嘆曰：『嗟夫！余恨不與徐君同游哉！』揭君曰：『何徐君思也？』曰：『余往歲與徐君，蓋游華陽洞，云洞自陶隱君來，赫赫盛矣。乃宋帝又丹書之，其洞固不可人，無奇也。使隱君觀此，宜何以稱焉？且茲巖之奇，天奇之也。既奇之矣，乃置諸荒山僻壤，亂莽草野中，不以稱，而世之以片石假山稱者何限？嗟夫巖！嗟夫巖！余又安知其解乎？』於是罷酒。徐君名中行，汀守，與余友善，先余三日游，遺余書。揭君名鴻則，與余同薦畿中也。明嘉靖三十七年九月既望，廣陵方城宗臣記。」

燕子巖 中有石洞，方三丈許，祈禱響應。

鳳凰巖 巖內有石，翔展如鳳凰，近龜山先生故里，先生嘗讀書焉。

黃楊巖 界延平、永安。已見永安縣。

永興巖 石壁峭然，垂蘿參參。

聖隱巖 巖崖峭壁中，不幽陰。舊有異人隱此。

玉巖洞 洞內虛明，石色光瑩。側怪石蹲踞，如怒貌，中有小石，虛明深邃，一柱屹立，如雕鏤，名獅子洞。

儒冠石 以形名。亦名秀才石。

棋盤石

印石 石疊兩層，上小下大，宛如二印。

金盤石 在溪中，形圓色黃。

川水利附。

明溪 又號明江。自腰帶水流來，繞福林庵側而過，因岸有大小阜，相對如「明」字，故名。邑舊名也。腰帶水源自五通凹流來，至黃溪頭始大，環抱學前，繞如腰帶，又名黃溪水。

珩溪 水接明溪，流入沙溪。溪中有石，沿渚夾峙里許，水從中流，如門檻，名門檻石。

瀚溪 發源龍湖澗，流入沙溪始大。澗中有大石，紋如龜。又有八小石如龜，四圍繞之如八卦，名八卦石。

雷霆溪 水接瀚溪而來，沿渚十里，亂石噴吼，激如雷霆。

沙溪 源接珩、瀚二水，至是始大，可通小舟。下至巖前，合衆流，出黃沙口，往福州。

布溪 源接吉溪、沙溪之水，流至巖前，匯衆水而來。

黃窠水 在縣東十里。源自將樂界來，流至清平橋下，與珩溪水合。

滾水 在縣東十里，仙人堂小溪。水底有石隙，噴出約二尺許，灑如雪花，晝夜不絕。

百丈礫 白水礫

石峽澗 在縣西南二里許。發源山下石浹澗，流至惠利夫人橋，與腰帶水合。惠利夫人，莘七娘也，五代時人。從夫徵討，夫沒於明溪鄉，七娘即葬焉。而即居於明溪。七娘死，合夫葬，人莫靈之也。明溪者，延汀接境要道，是有巡檢司驛，驛左七娘葬矣。一夕，客假館驛中，夜聞吟詩，聲甚悲。客驚異，使反

之，再誦，琅然。其辭曰：「妾身本是良家女，幼習女工及書史。笄年父母常愛憐，遂使良人作鴛侶。五季亂離多寇盜，良人被命事徵討。因隨奔逐道途間，忽染山氣命喪夭。軍令嚴肅行緊急，良人命歿難收拾。獨將骸骨葬明溪，數尺孤魂空寂寂。屈指經今二百年，四時絕祀長瀟然。未能超脫紅塵路，妾心積恨生雲煙。」達旦，客語隣，并書其辭壁間去。自是鄉人構室墓前祀之，禱祈響應。宋紹興間，巡檢李寔謂廟隘，遷司大之。而墓前舊室，以爲祖廟。歲甲戌，豪奸阮定等集衆作亂，懇禱神靈，戢而獲之。淳熙甲辰，西北姜大老官、黃三、潘羊輩，相繼竊據，黎庶遑遑，拜祝庭下，舉兵往勦，卽殄渠魁。餘黨被執者，告云：始至境，四望旗幟羅列，僑衆膽寒，計無所出，以是見擒。嘉定中，寧化賊徒黎七等，四出剽掠。復禱神祠，方擬迎敵，賊懼潛退。端平間，調寨兵戍建康，告行，未幾，聞廟中鉦鼓喧騰，莫解所以。迨兵迴言：恰是日，與虜會戰克之，始知神之陰助。於是耆老具實上聞，賜廟額曰顯應，尋勅封惠利夫人，復加福順夫人。至元至正中，連城草寇羅天麟爲變，又紅巾賊人曹福山、馬文甫等攻掠郡縣，巡檢陳友定興兵擣之，悉就擒戮。仍追遺孽至扶竹凹，日且暮，賊窺明光遍野，兵甲無際，一人乘白馬，前後指揮，矢石如注。賊知神兵，斂跡宵遁。皇朝永樂丙申，沙邑山寇陳添保等，越縣城，劫掠焚毀，退經玉華驛，普爲灰燼。惟明溪一鄉，預避之。賊見四壁罄空，不愜所圖，方將縱火，驚聞哨震，捐命竄奔。適官軍追及，殺死幾半，明溪相慶，賴以無虞。相傳六月十一日爲神誕，自宋、元迄今，士庶虔恭賽饗，毋敢少懈。宋文天祥《題廟詩》曰：「百萬貔貅掃犬羊，家山萬里受封疆。男兒若不平妖虜，死媿明溪聖七娘。」

龍坑潭 潭在山間，深不可測。有龍穴，旱禱卽雨。

水簾 崖間一派，約高十三丈，灑然飛落，四時不改。

甘泉 湯泉 東泉井 西泉井 仙人井 揭家井 八字陂
楊婢陂

永定縣(一七) 在郡東南。東至南靖，西至廣東程鄉，南至廣東大埔，北至上杭。本上杭之勝運、溪南、金豐、豐田、太平五里地，其地距縣遠絕。皇朝正統、天順以來，草寇屢發。成化十四年，賊首鍾三等哨聚劫掠，賊平，巡撫僉都御史高明奏析置縣，鄉分五里如故，統圖十有九。

金豐里，圖四。嶺曰三層。嶺曰楊梅。泉曰下洋湯。

溪南里，圖五。山曰卧龍、掛榜、印厓、龍門、滿山紅、三峰。峰曰雙響、水珠、雪竹。嶺曰分水。嶺曰松栢、桃坑。凹曰伯公。石曰蓮花、藍盤、九燈、蠟石。溪曰大洲。灘曰箭灘、羅灘。井曰雙井。

豐田里，圖四。嶺曰綠嶺。巖曰吳坑。溪曰武溪。

太平里，圖四。山曰銅鼓、筆架、虎岡、蓮花。巖曰龍頭(一八)獅子。石曰橫龍、頭巾。溪曰文溪。灘曰磨石。塘曰金船。湖曰銅鼓。

勝運里，圖二。山曰黎袍。峰曰涼傘。嶺曰徐山。嶺曰牙梳。凹曰寒水。石曰馬跡。溪曰豐稔、跳魚、湯湖。潭曰信豐、齊頭。湯曰李田。

卧龍峙後，掛榜拱前，龍門東聳，印厓莫西。二水交流，一湖瑩徹。其形勝也。

山

卧龍山 邑主山也。脉發茫蕩洋山，蜿蜒如龍卧。茫蕩洋山界上杭、永定間。已見上杭。

掛榜山 邑前案也。橫列如屏，痕如裳襞。又與學宮對峙，形如掛榜。

龍門山 邑東鎮也。貴人峰峙其左。

印匣山 邑西鎮也。舊爲鄉民避兵處。其頂平坦，若印匣然。

滿山紅山 邑水口山也。高聳雄麗，半界潮州。舊傳有父子採薪，父睡山麓，土忽身，第露其趾，子牽覺之，遂刺指漬血，識其處，預爲陰地。後尋訪之，滿山土木皆赤，不識原所，故名滿山紅。

三峰山 自徐山，嶂發連屏，穿出紫紆，起而至卧龍山。

銅鼓山 界上杭、永定二縣間。已見上杭。

筆架山 峰巒如卓筆，高出衆山，邑望也。

虎岡山 兩山相會，紫迴數里。舊志云：煙雨晦冥，有巨虎哮岡，又名斧山。其回中有坑，如巨船，名金船坑。

蓮花山

黎袍山 蓊鬱蒼翠，遠望如畫。

楊梅嶼 岩嶢高峻，盤亘數十里，山多楊梅焉。

牙梳嶼 以形名水。分南北，介於杭、永間。

松栢嶼 山勢磅礴，綿亘饒、永二縣間，鄉民於此避寇。

桃坑嶼 有鐵可冶。

徐山嶂 山綿亘百里，跨太平、豐田、勝運、溪南四面圖界。上有石如馬。謠云：「石馬鳴，縣有兵。」

成化十四年，寇亂，太監盧勝使人絕其首。下有新村嶺，長袤十餘里，路通李田。

雙髻峰

水珠峰 上有飛瀑，兩山相向，一名雙飛蝴蝶，奇峻特出，邑奇觀也。

雪竹峰 涼傘峰

三層嶺 嶺界杭、永二縣間。已見上杭。上有巡檢司。

分水嶺 舊名豬槽曲。山勢崇峻，路通上杭，北入勝運，南入溪南，爲二里地界。

緣嶺 路接漳界。

吳坑巖 崆峒深邃，石似龍蟠。

龍顯巖 巖石如龍狀。

獅子巖 東華巖

眠象岡 在縣南二里，當水口轉流之處，屹立其間，形如眠象。

伯公凹 窑 律高，通潮州界。又倒坑 亦有之。

寒水凹 路通上杭，怪石巖崎險，行者必捨輿馬徒步。皇朝成化中，王環鑿石開道。

龍潭崕 在縣南龍村。石崖下有空廣數，_{（二九）}內有石床、石几。其下溪水澄深。

聖教石 在勝運里新村山腰。其石並大，一陰一陽，有仙人掌跡。

玉璽石 在大埠虎坑。其石四方，浮於溪面，有紋縱橫如隸書。

蓮花石 當杭、永二縣間。已見上杭。

藍盤石

九蹬石 大石層聯，若蹬九級，路通上杭。

蠟石 石色如蠟。民居其傍，以蠟石名鄉。

橫龍石 頭巾石（二〇）

馬跡石 亦界上杭。已見杭志。

鰲石 陂水繞其下。

五石 在縣北橫龍。一名獅子石，一名犀牛石，一名硯池石，一名樸頭石，一名朝拜石。

川水利附。

大洲溪 發自龍巖大池，經高陂，由豐田過永定縣，合成一溪。溪中有龍潭，舊有龍居焉。

武溪 發源寒袍嶺，緣嶺下，由龍潭深渡，合文溪流。

文溪 源自孔夫，經流合武溪，（二二）通大洲溪。

豐稔溪 源自龍巖，經上杭黃潭，過豐稔寺前，至漢 崕合大溪。

跳魚溪 通上杭縣。已見上杭。

湯湖溪 發源黎袍山，經長窖，至牛鼻崕合跳魚溪，出豐朗。

金砂溪 發源猪槽凹南，分流經金谷寺，出與古溪橋合。

箭灘 有湯泉，源出小澗。

羅灘 磨石灘 白沙灘

樵灘 驚湍沸浪，舟師至此，顏色爲樵。

信豐潭 齊頭潭

鷓鴣潭 在縣西。深碧可愛。

無底潭 石圳潭

晏湖 在儒學前。周圍約百餘丈。陂水經流，清漪可愛，停瀦爲湖，春夏可洩以種稻，秋冬可壅以畜魚。

涵水湖 今名龍安寨。湖水澄湛，中起一阜，傍有溫泉迸出。

銅鼓湖 已見上杭銅鼓山下。

湯泉三 大洲湯泉出地中，下洋湯泉出石壁，李田湯泉熱能熟物，旁有溫泉可以和之。
雙井

〔校記〕

〔一〕「統圖五十六」，下文實列五十四圖。

〔二〕「清溪」，下文作「青溪」。

〔三〕「漁滄隔」，各本原作「漁村隔」，據下文及《八閩通志·地理》改。

〔四〕「宋」下，各本原闕一字。

〔五〕「統圖三十三」，下文實列二十八圖。

〔六〕「太平」，下文作「大坪」。

〔七〕「陡嶺」，各本原作「陟嶺」，據下文改。

〔八〕「劉池」，下文作「劉地」。

〔九〕「橫山」，下文作「橫嶺」。

〔一〇〕「仁宗皇初問」，當作「仁宗皇祐問」。

〔一一〕「彭地嶺」，各本原作「彭池嶺」，據上文及《八閩通志·地理》改。

〔一二〕「鼓角」二字，各本原脫，據下文及《八閩通志·地理》補。

〔一三〕「浪盡」二字，各本原脫，據下文及《八閩通志·地理》補。

〔一四〕「珣溪」，原置於「甘泉」下，據本書體例移。

〔一五〕「仁壽峰」三台峰 君子峰，原置於「蓮花山」下，據本書體例移。

〔一六〕「鐵嶺」，各本原作「鐵場嶺」，據上文及《八閩通志·地理》改。

〔一七〕「縣」字，各本原脫，據本書體例補。

〔一八〕「龍頭」，下文作「龍顯」。

〔一九〕「空廣數」，當有脫文。

〔二〇〕「頭巾石」，各本原作「巾石」，據上文及《八閩通志·地理》改。

〔二一〕「經統合武溪」，「經」下疑有脫文。

閩書卷之二十三

方域志

興化府 莆田縣一

興化府 在布政司西南二百七十里。東抵海岸，西抵永春，南抵海岸，北抵永福。梁天監中，置南安郡，地屬南安。陳天嘉五年，陳寶應據建安、晉安二郡，章昭達敗之，逃至莆口，其地始見載籍。隋開皇九年，始析南安縣地，置莆田縣，皆屬泉州，今福州也。尋復廢南安縣。唐武德五年，復置莆田縣，屬豐州。嗣聖十六年，析莆田縣地，增置清源縣，並屬武榮州。州尋廢，縣還隸泉州。十七年復故。景雲二年，改泉州屬閩州，而以武榮州爲泉州，則今泉州也。天寶元年，升泉州爲清源郡，改清源縣爲仙游縣。乾元元年，復改泉州。光啟二年，爲王氏所據，後隨屬閩，又屬留從効，又屬陳洪進。宋太平興國四年，析泉州游洋鎮，置太平軍，尋改興化軍。復析泉州之莆田、仙游，及福州之永福、福清地，合游洋百丈鎮六里，置興化縣，是爲軍治所。五年，以莆田、仙游來屬。八年，轉運使楊克讓，以游洋地不當要衝，請仍移軍治於莆田。宋末改爲興安州。元至元十四年，改爲興化路，隸福建行中書省。其後改隸不一，領司一，曰錄事司，縣仍置。皇朝洪武元年，改爲興化府，領縣仍舊。正統十三年，興化縣人虹縣知縣何誠、貢士蕭敏，以

其地僻民稀，奏省之，於是領縣二：曰莆田，曰仙游。

環城千里，並海一隅。仙境峭壺公之碧，清流奔玉澗之泉。海道舟車，介於泉、福，山川人物，甲於閩中。其形勝也。

莆田縣 東南至海，西至仙游，北至福清。隋開皇九年析置，尋廢。唐武德五年復置。宋元仍舊。皇朝因之。正統十三年，省興化縣西南鄉地入焉，領七區、四廂、三十一里、二百九十四圖。景泰中，省二里、八十九圖。正統十二年，罷興化縣，增廣業一里，領四廂、三十里，圖二百有五，後省。今爲百七十四。(一)

一區

東廂，圖八。宋崇業鄉。山曰石室、太平、北亭。峰曰大象、鷄足。嶺曰龜紋。溪曰上溪。湖曰白湖。

左廂，圖四。宋崇業鄉。

右廂，圖二。宋崇業鄉。

南廂，圖四。宋永嘉鄉。山曰天馬、鳳凰、浮蘆、東坡。石曰摩香。(一)泉曰溫泉。井曰元豐橋側。

常泰里，圖一。宋崇業鄉。山曰九華、苦竹、高陽、方山、大壺、三仙、馬齒、象山。嶺曰吳嶺、松嶺。溪曰芹溪、南菽蘆。(二)魚澗。(三)八灘、延壽。

二區

仁德里，圖四。宋武化鄉。山曰澄渚。

延壽里，圖八。宋唐安鄉。山曰囊山、黃巷。峰曰九峰。嶺曰勸耕。潭曰龍潭。

望江里，圖五。宋唐安鄉。泉曰葆光。井曰張井。

尊賢里，圖二。宋武化鄉。山曰浮山。井曰方公。

延興里，圖二。

待賓里，圖一。宋唐安鄉。山曰戴帽、駟馬。溪曰赫溪。

三區

連江里，圖八。宋感德鄉。山曰瓊山。嶼曰大孤、小孤。海曰寧海。溪曰東華。井曰莫公。

孝義里，圖八。以唐孝子林攢名。宋崇業鄉。山曰陽山。

永豐里，圖二。宋唐安鄉。

待賢里，圖三。宋唐安鄉。山曰雙魚。峰曰靈峰。巖曰香山。江曰江口。溪曰迎仙。潭曰烈女。池曰桃源溫湯。井曰黃

片。

興教里，圖三。宋武化鄉。山曰尖山、崇聖、福平、三山。

四區

南力里，圖七。宋感德鄉。港曰章魚。

莆田里，圖十。宋感德鄉。山曰塔山。湖曰凝翠。

景德里，圖三。宋感德鄉。山曰城山。井曰雙慶。

壺公里，圖二。宋感德鄉。山曰壺公、蓮峰。溪曰寶勝。

新興里，圖一。宋永嘉鄉。山曰將軍、湯亭、白雲、鼓角、九龍。溪曰白沙。

文賦里，圖一。唐朱鄴以能賦名，故以名里。宋永嘉鄉。山口龜山、紫帽、雲平、小壺、石鼓、林葬。峰曰文筆。溪曰瀨溪。

五區

維新里，圖四。宋永嘉鄉。山口橫山、王倉、木蘭。溪曰木蘭。

靈川里，圖一。宋永嘉鄉。山曰石梯、浮山。

國清里，圖六。宋感德鄉。山口白塔、萬玉。

安樂里，圖五。宋感德鄉。山口柯山、石牛、梅花。峰曰翠峰。溪曰梁溪。

醴泉里，圖六。宋感德鄉。山曰石馬、芝山、岳香、金山、嵩山。嶼曰小嶼。

六區

興福里，圖五。宋崇福鄉。山曰五侯、壽山、東山、竹嘯、持久、天龍。

武盛里，圖十五。宋崇福鄉。山曰印山、九跳、東龍、石獅、鳳石、赤崎、柯山、白湖、東山。嶺曰鸛鶴。石曰石鼓、石鐮。泉曰

大泉。

奉國里，圖九。宋崇福鄉。山曰青山、大蚶、蔡山、南日。嶼曰演嶼。

七區

崇福里，圖七。宋崇福鄉。山口吳山、銅山、礪山、蔣山。

合浦里，圖十三。宋崇福鄉。山曰鯽魚、鏡石、石海、龍舌、石鼓。

新安里，圖十一。宋崇福鄉。山口鵲宿、獐龍、門夾、塔林、華胥、龜山、瓊山。嶼曰涓洲。港曰賢良。

廣業里，圖一。故興化縣地。山曰藥林、百丈、大帽、棋山、蔣山、東山。峰曰盧峰、越王、仙臺、端雲、瓊峰、仙壽、長壽、螺峰、文筆。嶺曰楓嶺、百丈、大松、平林、長腰、澳嶺、赤崖。巖曰永興、白龍。溪曰湘溪、碧溪、藻湖、百丈、大松、吉官、杉溪、鳳搏、澳溪、北荻蘆、洙溪。潭曰鴈潭。泉曰乳泉。

右附郭。

山

烏石山 自太平山而東。舊在城東北，國初拓城，半圍城內。上有東巖寺，並石浮屠。又有饕餮塚，名塚也。媼故饕餮，有檻樓生，日食其饕，媼予不吝。歲久辭去，曰：「無以報母，烏石之麓，可塚也。」母從之，是林之祖媼也。林與陳、方、黃、宋、劉、王、鄭、李八家，居是山之下，簪纓不絕，莆人謂之九大姓。又其下多壽，人謂之壽鄉山。下有井，名龍井。皇朝鄭彥成賦：「混沌開，鰲極立，嵩華生，烏石岌。派天馬之末蹤，趨莆田之左腋。壽水偃蹇以環腰，蘭波澄淨以居肘。豁四時於蒼茫，羅萬象於俎豆。爾乃窮不嶺崎，卑不培塿。石立大牙，地湧鵬噉，草若氍毹，花如錦繡。遇仙人之遺識，載莆乘而備書。曰顯宦之蟬聯，共紆紫而拖朱。幸源派之未泯，並列屋而環居。」

梅山 在城中。山連烏石，光孝寺、寶雲庵在焉。寺內有鐘，聲聞江口，察其抑揚，可卜晴雨。宋紹興中，匠人蔡通所鑄。西南偏曰州峰，上有春臺。宋時有共樂亭，郡人登眺勝處。光孝寺中有梅井，林大鼎賦：飲梅山之井者，無廢疾。舊經云：昔有梅叟，指以示人。

鳳山 在城中。永福寺在焉。山形甚隱，有石刻八，天王塔寺左有義井，僧涅槃識云：「市連義井歲時豐，水繞壺公文物盛。」

石室山 在城西三里。僧涅槃舊隱於此。亦名伏虎巖，以涅槃能伏虎也。又莆城畫屏街，有虎亭，舊傳涅槃騎虎至此。涅槃，唐末人，名文炬，字子薰，黃姓。生時火裏開蓮，既長出家，口吐異光，發言成讖。時時往來閩中，爲人穿塚築室。讖語最多，歷歷如券，舉其大者，嘗曰：「生吾前者非聖人，生吾後者非聖人。吾去世六十年後，當有無邊身菩薩來治此國。」聽吾偈曰：小月走燦燦，千落及萬落。處處鳳離穴，家家種葵藿。」異時，莆治在游洋，而指都巡檢廨示人曰：「此地他日有鼓角聲。」又爲人語莆中事曰：「吾所居地，不動干戈。」又曰：「烏石山前，官職綿綿。」又曰：「白湖腰欲斷，莆陽朱紫半。」水繞壺公山，此時大好看。」或問木蘭陂何時築成？曰：「逢築則築。」人都未遽解也。「小月走」者，「趙」也；「燦燦」，火德王也；「鳳離穴」，藩鎮散也；「種葵藿」，人耕耘也；「無邊身」，廣大也。《莆陽比事》：王巖《枕中記》：「世言藝祖自無邊身菩薩以誓願救來世者，未有所出，當俟尋討。」彼未見讖言也。藝祖登極，以建隆庚申，去其示滅於唐光化戊午，蓋年六十二也。都巡檢廨，今莆治也。五季雲擾，莆不及兵，留從効、陳洪進先後歸順，民用安堵，故言「不動干戈」也。「烏石山前，官職綿綿」者，九大姓居山下也。「白湖腰欲斷」者，熙寧時斷水爲橋也。「水繞壺公山」者，李宏創木蘭陂也。「逢築則築」者，陂築於錢媪、林進士者再，竟不成。李宏挾僧智日，來木蘭山下，插竹爲表。智日能夜役鬼物，旦起視之，竹表遽多。智日，俗姓馮。宏喜曰：「涅槃之讖，謂我矣。」逢者，「馮」乎？築者，「竹」乎？而陂遂成。凡涅槃讖驗，此類是也。涅槃卒，朝命封妙應禪師。宋崇寧初，加封圓智大師。紹興中，院僧以涅槃所傳讖偈，奏上於朝，賜塔額曰慧薰。山後有彌陀巖，智泉之水出焉。智泉水，舊名梅花潦。相傳鷄峰道人陳清牧此，有白衣老人叱之曰：「此仙人圃也，勿牛飲污水。」皇朝邑人提學陳伯獻，築室是山，因名之曰智泉，伯獻自爲記：

「石室山巔，有石如芙蕖，高數丈，辨纈突崛，朵蕊亭聳，青奇幽壯，離列可坐數十人。石北山坪，有田數十畝，予因築室以居。盤旋石上，時至忘歸。石常蓄雲霧，或值冥晦，則茫然如泛太乙之舟，駕鴻濛而憑灝氣。天朗氣清，俯視城郭村溪，畢効於前，若垤，若穴，若簇，若練，若聚米，若堆丸。聚睫而望，大海橫東，龜山環北，壺公峙南。紫青綠白，莫窮其概，然後知是山高於莆，而是石高於山也。予嘗質諸士大夫，或有未知者，或知焉而未之奇，奇焉而未之至。其至者，樵夫、牧豎耳。樵夫牧豎，至之而未知，知之而未奇也。予謂石有君子之道三焉：其聳峭拔起，則有特立不群之操；其爍燁如蓮，不爲仙翁佛子之宮，是有潔身自隱之義；其爲文物之宗，能使士大夫不知而不奇，是無競名表襮之心，皆可取也。」

太平山 在城西里許。自福之永福，延袤而生，峰巒峻拔，郡主山也。

北亭山

天馬山 在城西三里。腰凹首驤，其形似馬。

鳳凰山 天馬東麓，南寺也。莆中今以南寺爲勝矣。舊名南湖。梁時鄭露舊家，復捨爲靈巖寺。唐御史黃滔讀書堂在焉。滔《靈巖寺碑》曰：「粵靈巖寺，乃莆山之靈秀焉，神授焉。懿夫嶽立大山，堆下數峰，面乙臂坤，石嵌松瘦。昔梁、陳間，邑儒榮陽鄭生，家山下。生嚴乎一堂，架以詩書。旣而秋夕，風月清明，俄有神人鶴髮麻衣丈餘，其狀見於堂，曰：『誠易茲爲佛宇，善莫之大。』生拜而諾，瞬而失。旋以堂居像佛，獻其居爲金仙院，陳永定二年庚申也。山水推其奇，鶴髮增其異，鎔錫日萃，院落日峻。隋開皇九年，昇爲寺焉。左漱寒泉，右擁疊巖。危樓豁壺公之翠，上方視鱗海之波。唐景雲二年辛亥，寺僧志彥者，人內講四分律，睿宗嘉之，錫號聰明。志彥因獲言所居寺之自。復有僧無際，持《妙法蓮華經》感石，

湧白泉，僧歿，而泉變清焉，遂勅額爲靈巖寺。其僧復有玄悟、玄準、慧全、省文、靈敞、無了、悉間生祇園，堅持密行，或臨壇表德，或降虎示真。厥衆如雲，厥施若市。敞公咸通六年秋八月示滅，靡風而大樹折庭，靡觸而大殿傾瓦。了公八年冬十月坐亡，身色不壞，今龜陽之號真身大師者也。則知僧以行而神，其亦地以靈而感。先是，林御史藻與其弟水部蘊，貞元中，谷茲業，文曰靈巖精廬。歐陽詹聞之，捨泉山而詣焉。其後，皆中書科。御史省試《珠還合浦賦》，有「神授」之名，水部應賢良方正科，擅比干之譽，歐陽垂「四門」之號，與韓文公齊名，得非山水之靈秀乎？大中中，潁川陳蔚、江夏黃楷、長沙歐陽碣兼愚，慕三賢之懿，獨葺齋於東峰者十年。咸通、乾符之際，豪貴塞龍門之路，平人藝士，十攻九敗。故潁川之以家窶也，與二三子率不西邁。而愚奮然凡二十四年，於舉場幸忝甲第。東歸之日，尋舊止，則蒼苔四疊，嘉樹雙亞。訪舊僧，則雲扃十扣，雪頂一存。於是謹祝金儀，以謝茲山之靈秀，刻銘貞石，兼補前賢所未述。寺之上游爲中峰庵，人者爲廣化寺。宋曾開《天宮記》云：「南山廣化寺，有庵百餘區。簷楹相摩，軒楹層出，如中峰、瑞泉、天宮，皆號絕景。」宋翁點爲諸生時，讀書此寺。夜醉擊鐘，忽一人出，呵詰之。其人狀貌詭異。點亦轉詰其人。其人曰：「能屬對，吾語汝。」乃云：「析破磊文三石獨。」點應曰：「分開出字兩山單。」其人頷之曰：「正郎。」言訖不見。後點官至正郎矣。「石獨」、「山單」，皆花名也。寺下有月峰院，院之上爲法堂，辛夷最古，壁間有陳伯獻畫達磨像，晉安鄭善夫留題。寺右麓曰羅漢峰。宋時有僧南游，迫暮過此，見樓閣層出，鐘鼓鏗然，榜「羅漢院」，遂人宿焉。旦失所在，因以名峰。左有曹源洞，隋時有蜀人司馬姓者，於此遇異人，授以數粒，遂著靈異，及卒，人廟之，曰靈巖廟。山南有佛腸坑，云廣化寺開山僧吐出腸胃，洗濯於此。皇朝方熙詩：「此間百有二十寺，多少叢林一路分。野日收殘千嶂」

雨，潤泉界破半山雲。」今存者七寺：曰廣化寺，曰東塔院，曰西塔院，曰月峰院，曰普門庵，曰南山庵，曰法海寺，總名曰南寺。去寺三里，有大迂坑，亂山中，有泉噴湧，匯爲澄潭，兩岸如削。邑人宗伯林堯俞闢治之，曰南谿，山負乎樓背，水周乎堂下。

浮蘆山 自鳳凰山支折而東，過湮槃寺，突起一埠，曰浮蘆。

東坡山 在城治南。傍溪矗石如積。宋淳熙間，朱文公來游，勒石。皇朝中丞林有孚營別墅，更名林坡。

九華山 山九簇如蓮花，又名蓮花峰，又名陳巖，亦名陳仙。蓋古有陳仙隱此，所稱陳、胡二仙者也。巖有石洞，廣可數丈，旁有巨人跡。又有石茶竈、石棋盤、仙篆石。仙篆石，文跡縱橫，若篆書。宋方翥詩：「何人登眺睨絕頂？一樹一石探幽奇。蟲文鳥篆不可識，如讀《岫嶽神禹碑》。」有石蟻山，高數百丈，石上猶黏蟻殼。方翥詩：「纍纍蟻山著石面，此非所有能無疑。細看大石深孔竅，舟人操篙跡猶遺。乃知此山千載前，洶湧尚作海渺瀰。蛟龍魚鼈占窟宅，不省造化能密移。」又有琉璃院、紫雲巖、桃花塢、燕子洞、淘金井。井深可二尺，泉甘而清，云陳仙淘金於此。東北有紫霄巖，上有精舍，特爲幽勝。初人有「雷轟石」，次有「琉璃峽」，宋蘇舜欽書。有天台橋、羅漢洞。洞前有石鼓，大可五六尺，考擊有聲。有石門，有仙人橋、仙人塚。西北有高陽山。

苦竹山 在九華山後，有山鬼巖。唐會昌中，沙門千靈，辭六祖人闕，來此住錫。山魃拒之。千靈曰：「若能喫鐵鍼，則吾去；不能，則若去。」魃不能，遂自喫之，曰：「去矣！去矣！」乃建苦竹院焉。今尚有其所喫餘鍼。

方山

天壺山 去縣北四十里，莒溪之南，高並壺山。古有天壺巖，洞壑奇邃，樹木蒼鬱。山下腴田，可數千畝。

三仙山 馬齒山

象山 在馬齒山北。有金井泉。

澄渚山 本「陳渚」也。唐林蘊市地於陳暄，以作書堂，因改「陳」爲「澄」。按《左傳》：「王在渚宮。」杜預曰：「小州曰渚。」莆未勝海時，海潮至此，故曰渚也。初獨孤及作《觀察使李椅碑》，叙椅興學之美，有「曼胡之纓，化爲青衿」之語。蘊與兄藻，讀之慨然曰：「粵不張九齡，蜀不陳子昂哉！」遂自北螺村來市此，以作書堂，誓志業文，凡十年，藻舉進士，蘊擢明經。鄉人以與歐陽詹並稱，曰：「歐陽獨步，藻、蘊橫行。」

囊山 形如懸囊，或名土囊。僧涅槃隱其下，曰囊山院。廟塔甚爲宏壯，外有放生池。涅槃時時於此趺坐，不食。或臨水餒蛭，或袒露施蚊。行則兩虎隨之，今有伏虎橋，石刻「施虎原」。初，涅槃隱此，九座師見之，曰：「此古辟支佛也。」上有巖，名辟支巖云。山前爲國幢院。曰國幢者，王審知延師於此，故名。涅槃師父母塚，在其後。而囊山院西，則涅槃塔存焉。塔本涅槃所自擇，在院堂東。宋祥符初，有厲伯紹者，來看塔曰：「合徙之院堂西。」一夕，院堂有聲如雷，黎明，塔中現十六字云：「我看山皮，厲看山骨。百年之後，徙我西出。」徙大異之，遂徙於院堂西延福後。唐改塔曰慈壽，宋復改院爲寺，而賜塔額曰慧達。巖中可容數榻，傍有小八石負之，玲瓏如櫺牖，棐几間，有小竅徑寸，時迸異香，樵者間得之。前

有二巨石，對峙爲門。右有石，高廣可五丈，後人因設藥爐、茗碾。下稍平處，石坦卧草間，可八尺。蔡忠惠書詩其上，書如萬安橋體。後有一小石聳立，可四尺，刻同游陳伯孫詩。又有文殊巖、佛日山、石竹山、須彌臺、降龍洞、於兔窟、牛月池、伏虎巖。唐黃滔詩：「山有重囊勢，門開兩徑斜。溪聲寒走澗，海色月流沙。庵外曾游虎，堂中舊雨花。不知遺識地，一一落誰家？」宋郭祥正詩：「磴道岩峽接畫簾，陰森古木翠相啣。寺形突兀從中湧，山勢包藏若外緘。猛虎至今馴片石，異香時復降虛巖。無窮眼界無邊勝，更到幽人宴坐嵌。」林希逸曰：「近囊山寺前，耕者得一穴，其間金銀之器，彝鼎之屬甚多，人皆竊去。最後鄉人相率就觀，取鋤釜擊其屏壁，鏗然有聲，但堅不可破，恐是銅鐵所錮，意有國者之墳也。然籍記不聞，或有之不傳矣。夫吾閩自無諸以來，始見於漢，前尚草昧也。乃知莊周所云『容成大庭』之類，不可謂無爾。」

黃巷山 唐校書黃璞所居山也。璞家在福州，人名其居巷曰黃巷。後避黃巢寇，徙是山下，尚以「黃巷」名之。徐寅《黃校書閑居詩》：「取得驪龍第四珠，退依僧寺卜貧居。青山入眼不干祿，白髮盈頭猶著書。」皇朝裔孫鞏居此，表曰讀書林。是山產火荔，爲莆之冠。

浮山 有兩浮山。一在尊賢里，山側懸崖瀑布，兼有智泉、鐘潭之勝，而幽深瑩潔，險絕過之。智泉已見石室山。鐘潭，在錦亭南，西去二里許，至水磨坑，石壁峻峭，下爲潭。古有鐘飛入，故名山。自龜山歷平洋來注，懸崖千仞，流湍激石，一奇觀也。一在靈川里，白石梯而來，其山近海，小而圓秀。宋陳州長史陳琨居其下，里人呼曰東陳。元時陳紹叔者居之，呼西陳矣。紹叔，字克甫，唐御史稜之後。幼好學，洞達性理，終日危坐一室，俯讀仰思，或中夜炙燭起讀。教人先篤行謹言而後文字。

至於《河圖》、《洛書》、《太極通書》、律曆制度，靡不研究。有外集百餘卷，題曰《浮丘集》。《歷代紀年》、《大元官品》、《競辰》、《切字》、《擇日》，又若干卷。因與學者說璇璣玉衡，遂採木像示之。既鑄銅倣古制，又別制器象天體，虛中而繫之，上刻周天度數，填以鈿螺，揭南北二極，凡天河星宿，皆列其中，其制度精微，名曰小天。有友人贈詩云：「夜過浮丘月滿山，一尊相對坐漫漫。門臨大海風濤壯，家有小天星斗寒。」

戴帽山 在紫帽山東北。上有鸚鵡巖，是多鸚鵡之鳥。

駟馬山

瓊山 有兩瓊山：一在連江里，一在新安里，潔白如瓊，曰大瓊山、小瓊山。

陽山 烏石山一脈，過綬溪，伏而復起，爲圓嶠，亦曰跳山。

雙魚山 在迎仙橋之上，狀如雙魚。下有子魚潭，亦名小姑潭，子魚生焉。宋志：「子魚，惟迎仙橋東小姑潭所出爲最，但通三印，堪登俎者絕無。」建安嚴子翼《藝苑雄黃》曰：「通印，長魚，古人以爲食珍，言其大可容印也。」《容齋隨筆》：「魚通印之語，本出王荊公《送張兵部知福州詩》『長魚俎上通三印』之句，蓋以福州瀕海多魚，其大如此。初不指言爲子魚也。東坡始以『通印』、『子魚』，對『披緜』、『黃雀』，乃借『子』字與『黃』字爲假對耳。山谷所云『子魚通印蟾破山』，蓋承而用之。」陳正敏《遜齋閒覽》云：「其地有通應廟，前港中子魚最佳。」王初寮詩「通應子魚鹽透白」，正採其說。郡人黃處權云：「興化子魚，去城五十里，地名迎仙者爲上，所產之處，土人謂之子魚潭而已，初無通應港之名。有大神祠，賜額曰顯應，乃遜齋所指之廟者，亦非通應也。潭傍又有小祠一間，卑陋之甚，農家以祀田神。好事欲實遜齋之說，遂粉

刷一匾，妄標口通應廟，側題五小字曰：「元祐某年立。」迎仙橋，宋僧祖遜所建，其建此橋時，攬衣南走，視維橋規畫爲之，其直如繩，其平如砥。今廢。

尖山 亦名高山。土神所謂善濟侯者棲焉。其神靈怪，土人不敢犯。興化衛指揮丁晟，讀書持正，直上山頂鞭神而歸，亦不能害。

崇聖山 繇尖山發脉而來。下有崇聖院。其東，太和陂水道也。

福平山 一名北平。起尖山，止北螺村。村地延袤，爽塏如飛鳳之形。唐林蘊先世居此。歐陽詹自泉詣莆，與蘊兄弟讀書，築靈巖精廬，亦於此作別墅焉。詹《客蜀門寄蘊詩》：「村步如延壽，川原似福平。」白註：「延壽，蘊別墅。福平，予別墅也。」其後，詹卒，葬靈巖浮屠之陰，其裔錯居莆中，曰仲、曰盼、曰直卿、清卿，俱登科。而蘊兄弟九人，並仕州牧。其卒也，並葬是山之下。予嘗至其處，見九墳齊列，作龜體，莆人謂之九龜。皇朝蘊裔孫鄴守鳴盛，造鳳山寺焉，而亦預藏其下。寺前有大木，輪囷蔽虧，參漢連牛，東西望不相見，乃甘棠、赤榕、槭樸三木合爲一幹者，蓋其初鳥食一樹之實，遺矢一樹中，若寄生然，久之合爲一樹矣。鄴郡守標名曰三壽。予指而語座客曰：「此同氣連枝之應也。世人葬其父母，常有公位房屬之爭，尺寸至不相假，或有添墳傍葬，至狃狃交訟，孰有兄弟之子合葬其親，不計中邊，並列一丘？此古人孝友之意，千百年後，徵祥此樹矣。」客以爲然。又唐陳嶠、宋王誥、誥弟誥，並讀書是間。誥、誥並擢第，謫尉古田，誥令歸善。當兄弟讀書是間時，有青衣童指階前桂云：「試問梅福尋真隱，聊爲東坡訪故居。」後言皆驗。蓋古田山，梅福嘗隱之，而惠州，東坡謫居在焉。歸善，惠屬也。

三山 平田中三小山突起，一名華蓋。宋志作烽火山，云舉燧之地。

塔山 一名文峰巖。巖下舊有伏龍穴。皇朝御史朱澍居山下，名曰天馬，因爲之賦，有云：「其爲物也，氣吐青煙，目懸皎日，尾掃攢林。足踏礧石，以鈎陳爲韜，維雷霆爲鞭，策雲霞爲輔，江海爲槽，擺動隨氣機，行無轍跡，乃者越嶺徼，破閩荒，望莆口，過游洋。擘八壺之右派，遙五侯於上蒼，靡然東馳，忽焉西顧。行行且止，遲遲不去，挹穀城之仙風，愛沙堤之煙樹。擷錦園之芳蕤，濯銀塘之橫素。島嶼明沒，滄桑朝暮，爾來八萬六千歲於茲矣。」

城山 在壺公山南麓，形如植冠，黃石市主山也。本名國清山，以在國清塘上，好事者以其北有黃石，乃傳會張其事，改曰穀城。又傳，舊有蜘蛛繞山爲城，乃名城也。古識：「城山青水，南出公卿。」緣山石色黃，須青乃秀也。今多栽松，亦名青山矣。舊有興雲洞、呼月臺，有松隱、竹隱、梅隱三巖，第遺跡而已。下則國清塘在焉。里中有紅泉、東林井。北去爲黃石市，支壠起伏，曰蘆峰，曰耕壠，曰象峰，曰塔麓，曰石阜，士大夫群處之。國清，一名姑青，唐時所建，今林氏宅濯纓池，是水與木蘭陂相灌注，澄碧百頃。壺公、穀城倒影其中。紅泉，在裴觀察廟後，水作紅色，宋林回年延林光朝講學其處，朱文公嘗過之。光朝沒，學者祠焉，名水南書院。皇朝宋景濂《林氏先祠記》：「莆田縣東二十里，有山曰穀城。岡岳秀拔，林樾蒼潤。其下滙爲巨浸，號國清塘。一望無際，波濤吞吐於風日雲月間，真絕勝之境也。」《黃四如集序》曰：「濂洛中微，考亭未興，艾軒林公光朝，倡道莆陽，從如歸市，紅泉、東井之學聞天下。其後，網山林公亦之，樂軒陳公藻，先後起而繼之。樂軒，家長樂，網山，居福清，歲來講學東井，風聲所被，氣習所薰，人皆有鄒魯之風。」林井有顯濟廟，祀章烈侯朱默。默，宋時人，在胎孕中，時有啼聲，後母夢神人丈餘，進至堂下，覺遂生默。默生有神異，嘗喟然曰：「今兩陲用兵，朝廷開幕府，使得吾千人將之，可以

鞭笞遠夷。」一日，游穀城，見廟中泥馬，遂乘以往。僕道遇之，見其驕從甚都，走視家，方酣寢，大驚異。年二十二不疾卒。建炎四年，高宗渡江，中流風濤人作，忽有朱氏旗從風而至。已，知爲默，詔封章烈侯，後賜廟額曰顯濟。默，觀察判官朱高四世孫也。與其弟點，及其妹，皆葬黃石之西北，凡十有八人。墓並累甃，形製相似，俗呼「十八佳人一樣粧」。黃石西街有雙慶井，或謂其人鑿井時，遇父母雙慶，或謂井欄如雙磬然。宋鄭樵《松隱巖詩》：「青嶂迴環畫屏倚，晴窗倒人春湖水。村村叢樹綠於藍，點點行人去如蟻。」皇朝柯潛詩：「大山巍巍插天起，小山參差如聚米。長風吹我上高峰，一眺乾坤三萬里。」宋鄭伯玉《國清塘詩》：「寒日一觀眺，四大雲色稀。水風迎棹起，沙鷺背人飛。」林光朝詩：「燭龍醉倒不開眼，遮空萬里雲張繖。小舟塘外日溶溶，漁歌忽斷荷花風。倚巖僧舍扃深戶，我來跋涉倦肩股。喘停更促短竿上，怪石周遭卧萬鼓。」余謙一詩：「湖光山色酒杯中，此會那知一笑同。風暖空巖落松子，雨晴新漲沒鳬翁。」

壺公山 舊經云：昔有隱者，於絕頂遇老人言神仙事，忽見宮闕臺殿，似非人間，曰：「此壺中日月也。」後人因以名山。又云古姓陳，名壺，於此山成道。又云莆有陳、胡二仙，陳仙隱北，胡仙隱南，山名胡公也。後人改「胡」爲「壺」，而里仍舊名曰陳胡爾。又云莆西有靈潭廟，井泉靈異，胡道人修真於此。何氏九仙，自三山來詣，胡曰：「可尋鷄子山隱之，吾亦躡壺山之巔，以了塵寰。異日當會子於白雲法洞。」此壺公所繇名。山有八面，高千餘仞，方銳如圭首。峙立如展旗，爲郡鎮山。有虎丘巖，宋徐師仁曰：「李習之謂，凡山居以怪石奇峰，走泉深潭，老木嘉草新花，視遠爲幽。壺山虎丘巖，殆兼此景。」有真淨巖，有靈雲巖，有桃花洞、蘸月池，泉石奇勝。有南泉巖、竹峰巖，有西雲巖，有盤陀石，有法流泉，有濯纓

沼，有石壁峰，有碧溪灣，有蟹泉井，遇旱，接蟹沫可得雨，今已不復有矣。鄉人尊陳、胡二仙，卽壺公、龍，曰名仙者，爲二仙立廟。宋大觀初，以祈雨數應，賜額「神應」。建炎二年，並封顯靈侯。唐翁承贊《壺公山詩》：「井邑斜連北，蓬瀛直倚東。秋高巖溜白，日出海波紅。」黃滔詩：「八而峰巒秀，孤高可偶然。數人游頂上，滄海見東邊。不信無靈洞，相傳有古仙。橘如朱夏在，池象月垂穿。」自註云：「山頭有池而圓，兼樹橘，朱夏夏在。」髣髴嘗聞樂，岩嶢半插天。山寒徹三伏，松偃出千年。樵牧時迷所，倉箱歲疊川。嚴祠風雨管，怪木薜蘿纏。青草方中藥，蒼苔石裏錢。瓊津流乳竇，春色駐芝田。烏兔中時近，龍蛇蟄處臙。嘉名光列上，秀氣產群賢。瀑鑠瑤臺路，溪勝釣浦船。鰲頭擎恐沒，北軸壓應旋。蠲疾寒甘露，藏珍起瑞煙。畫工飛寐夢，詩客寄林泉。掘地多雲母，緣霜欠木綿。井通鱗吐脉，僧隔虎棲禪。」自註云：「山間井泉盈縮如潮候。貞元中，有僧法通，咸通中，有僧弘播，於其絕頂獨擇，昏行至降虎，而法通曾下遇兩虎爭一牛，乃叱隔之，分令啖食。危磴千尋拔，奇花四季鮮。鶴歸玄圃少，鳳下碧梧偏。桃易炎涼熟，茶推醉醒煎。村家蒙棗栗，俗骨爽猿蟬。谷語聲喬鳥，陂開共帶蓮。落楓丹葉舞，新蕨紫芽拳。翠竹雕羌笛，懸藤煮蜀箋。白雲長掩映，流水別潺湲。作賦前儒闕，冲虛南國先。省郎求牧看，野老茸齋眠。」自註云：「潘郎中《存實詩》云：『雙旌牧清源，吟看壺公翠。』又歐陽拒先輩，自刺史蘇君，書求泉山之圖爲畫屏云：『壺公之高，洛陽之深，夢魂所思。』寺歷興衰創，碑須一二鐫。清吟思却隱，簪紱奈縈牽。」宋劉子翬《蟹井泉詩》：「穴泉類蹄涔，幽靈隱其涯。髣髴小雙螯，控御蛟龍隨。」山西有龍潭，元時有范姓者，養馬潭邊，馬與龍交，生龍駒。事聞，詔取之。駒至大義鎮，念母，一馳卽歸。范爲所苦，殺其母，駒死，詔籍其家。《墨客揮犀》云：「壺山有栢木一株，長數尺，半化爲石，半猶是堅木。蔡君謨見而異焉，運置私第。余在莆陽親見之。」

蓮峰山 在壺山南。小山疊出如蓮華。

將軍山 一名將軍巖。在瀨溪上，地名西許。宋洪氏女名聖保者居之。聖保《和同志頌》曰：「一箇巖龕萬物周，塵中擾擾到無繇。儂家儘有居山意，問著依前隔數州。」聖保居巖十餘載，年五十，於惠安龍泉出家，布衣，一食或絕粒。逾年，皇祐季冬，鄉人夜深聞音樂聲，次早潔髮更衣而卒。

湯亭山

白雲山 在南白沙之南。繇石梯生鐵嶺，鐵嶺生白雲。舊有白雲巖，今廢。

鼓角山 白雲之東，壺山之西，於隈隩處連發數峰。北觀如鼓，南觀如角。宋吳世延詩：「黎明騎馬出城闌，鼓角山前訪故人。白水陂浮鶴背，青山千里疊虬鱗。」前志謂，自錦亭南望，吳詩光景，宛然在目。

九龍山 自鼓角山北行，至溪潭截然而止，分爲九條，故曰九龍。舊志或曰即鼓角也，一山二名耳。今考鼓山在九龍潭南，其形如鼓。九龍山在北，自南觀之，則森聳如角，二山合看，鼓角較明。望鼓角山者，當合九龍也。下有九龍潭。

龜山 在郡城西北一十里。山形圓平如龜殼，古名龜山，以與紫帽山相連，以合帽山之尖，類全龜矣。內有小洋，曰龜洋。唐末，真身大師無了，與其徒志忠居之。無了沈姓，七歲，父携入白重院，視之如家，因而捨愛。十八剃度，受具於西巖寺，後參大寂了達祖乘，即還本院之北。行經是山，是時雲木方深，狼虎有穴。俄值六眸巨龜，足躡四龜，首俛仰如作禮者三，逡巡而失，遂駐錫卓庵，名其地曰龜洋。與志忠修行良苦，山產苦益菜，采充卯齋，來人或稍乖巖潔，蛇騰虎吼，立見驚異。年八十，告寂。瘞正堂。垂

二十載，山泉淹漬，門人慮塔水發之，見身浮水中不壞。閩王聞之，昇府供養，忽臭氣遠聞。王曰：「可還舊山。」言訖，異香普薰，傾城瞻禮。志忠，泉州陳氏子，受具足戒於襄州龍興寺，還繇廬陵，與草庵和尚相值。庵曰：「來自何山？」師曰：「六眸山。」曰：「六通乎？」曰：「慧非重瞳，師行高言寡。」是日對答如流。還山，續大師風，苦益之卯如故。大師法身不壞，南北歸教，闐然無時。師以其煩，遂南五百步之山里，得峰之秀，曰南畝室而禪焉。無了，闐封真寂大師，塔曰靈覺。黃滔爲記。志忠塔，在靈覺塔左，今二真身俱存。志忠，禮部尚書經邦之十六代諸祖也。予讀《酉陽雜俎》，福州唐貞元末，有村人賣一龜，其數十三。販藥人徐仲以五鍰獲之。村人云，此聖龜，不可殺。徐置庭中，一龜藉龜而行，八龜爲導，悉大六寸。徐遂放乾元寺後林中，一夕而失。然則六眸巨龜，足躡四龜者，聖龜也。是山有西淙瀑泉。又新安里，亦有龜山，亦以形名。

紫帽山 與龜山相附著，石山也。四時絢紫，其下小山，亦生紫雲。是逆生烏石梅峰，府治在焉。山西有雲峰石，嶽岑丈餘，駢附疊下，左如卧龍，右如伏虎。

雲平山 故名紫雲，高與雲平，與紫帽略等，延袤五餘里。以上三山駢峙，呼三台山云。

小壺山 以其小於壺山。

石鼓山 有兩石鼓。其一，脉來紫帽，人石門，過寶溪而生。皇朝彭惠安韶葬其處。惠安，號從吾，墳次有從吾亭，人謂之新亭山。其一，在合浦里，有數石，扣之如鼓。

林葬山 在文賦里潘嶺之原。唐林攢葬父母處，又名甘露。林攢，貞元中爲福唐縣尉。壬申歲，母沒，每一痛哭，水漿不人口，或二日，或五日，內外羸憊，殆至殞滅。既將與其父合葬，躬開坎室，自埏磚

臂，兄弟手攻肩負，以鑿以築。春三月二日，忽異氣自天，氛氳下蒙，非雲非煙，羃羃綿綿，彩耀光鮮，馨香馥然。朝起及暝，徘徊不散。明晨，松柏枝葉間，遍懸露滴，齊大如梧桐子。取而嘗之，其味甘異。日漸高，不銷不晞，轉堅轉明，瑩然珠相，鏗然玉聲。如是三日，覩者爭取，或食或翫。復有白鳥，群然翔集。攢既窆畢，廬墓不返。州上其事，併及烏露之祥，觀察使遣官屬驗實，露則晞矣，而烏亦去。攢哭曰：「天禍我耶！」俄陰雲四合，露倏成甘，烏亦來集。事聞，德宗褒詔，賜祿，立雙闕表之，時號闕下林家。歐陽詹爲攢作《甘露述》，又《林氏譜》謂，葬是山畢，忽崛起露馬鬣祭臺，後攢沒亦葬此。莆田弘治志：天子門前有闕，謂群臣至此，心嘗闕如也。唐宋時，旌表孝行，門閭皆賜闕，亦使爲人子者，至此心闕如也。君親一體也，臣子圖報，何有紀極，以此爲教，於義不僭。

橫山 在鼓角山東一支也。渠斷之，南爲上橫，北爲下橫。上橫山下有香山，宋築陂錢媼投水處也。媼築木蘭陂不遂，投水而死。屍流二里許，香聞陂前之山，故曰香山。有香山廟，祀媼。每風雨夕，隱隱見二燈，自山徂木蘭，人謂媼巡陂云。余謂，白起堰水灌楚城，楚人多死，流城東陂，臭聞遠近，人號其陂曰臭陂。香山臭陂，可作駢偶。

王倉山 山勢迤隋，王氏世居其下，故名。林貞肅俊先墓在焉，易口雲莊。前有洗馬池，一名龍崩池，云嘗產龍馬。

木蘭山 下有木蘭溪，木蘭陂在焉。宋李長者宏，與僧智日所築也。山下故有水，曰南洋。唐觀察使裴次元，隄海爲田三百頃，歲則大穫。其時有橫塘、新塘、陳塘、唐坑塘、許塘五塘。與城山之國清塘合爲六，凡溉田千餘頃，蓋《唐書》載之地志云。塘之潴水，易滿易除，旱澇難資。去莆南七里，有溪源永春，

流德化，歷仙游，滙三百六十澗以東，疾趨人海。言者謂，橫而堰之，溉田尤鉅，莫之能也。宋治平初，歲旱塘竭，莆人告病。長樂有錢媼者，提金九撒如斗大，來將軍灘前，僱民陂焉。開渠循鼓角山南行，陂成，媼引棹落之，水暴至，陂壞，媼大息，擗標，投陂死。縣遣主簿黎畛往視，畛傷痛不絕，亦爲水所淹。言者謂，陂據溪上流，是以不遂。媼同邑進士林從世者，悼媼死，挾貲終功，乃相下流，定泉隙，費以數萬緡。既成又決。言者謂，隙扼兩旁，堤岸突高，濤怒流悍，是以再壞。熙寧八年，下詔募修，宏應詔至陂下，而僧智日者已先至矣。智日者，異僧也。貫酒宏家，居三年，不責其券。將行，曰：「當遇子木蘭山前。」至是，爲宏相址。錢、林二陂，間表於溪廣水慢之處，表數竹而已。旦起視，竹表紛如。宏大異之，遂施陂功。其制疊石，布石柱三十二，間於溪底橫石之上，犬牙鉤互，屹於阜岡。深二丈五尺，闊三十五丈有奇。上障諸溪，下截海潮。復卽陂之右，疏渠導水，障東流而南注者三十餘里。爲大溝七條，小溝百有九。設抵海斗門四，木石涵二十九口，約溉田萬有餘頃，遂廢五塘爲民田，惟留國清以備大旱。繇是歲時屢稔，向之貧人，皆爲高貲溫戶。宏卒，莆人立廟陂南，曰李長者廟。淳祐間，更建前後二堂。前祀長者，以林從世、黎畛配，而錢媼祀後。郡守趙與湮請於朝，賜廟額曰協應。景定三年，封長者「惠濟侯」，媼「惠烈協順夫人」。元延祐間，總管張仲儀更作新廟陂下，專祀宏，而陂南祀媼如舊。皇朝景泰元年，令劉玘重修新廟。塑長者衣冠像，配以其弟金紫大夫容。弘治十八年，郡人御史周進隆上言宏功，謂古者西門豹、史起、鄭國、召信臣、鄭當時之流，皆有功勞水利，稱誦至今。顧夷考其時皆守令，命吏興治，其職也。李宏，家在異縣，病急隣封，無尺寸之符，任饑溺之憂，祠廟雖立，不秩國章，農夫田畯，徒薦伏臘，乞勅有司春秋致祭，訪宏孫子，優免其家。錢媼、黎簿畛，與林進士從世，如舊配饗。下禮部，覆奏：「錢、林惠未

及人，黎簿事出偶爾，可但祭宏之日，仍具牲祭媼，而復祀媼於香山之廟。」宋李長者廟，迎神之詞曰：「負鍾兮如雲，散金兮如泥。昔斥鹵兮今穰，昔葦茶兮今飴。」皇朝方樸詩：「萬頃狂瀾越壑低，中流砥柱卧龍棲。二神共享東西廟，一水平分南北溪。」鄭善夫詩：「滄海未銷錢女恨，路人惟誦《李侯碑》。秋江極浦生寒水，神至靈風滿素旗。」

石梯山 峻峭如梯，土最宜茶。莆茶，龜山爲上，石梯次之。上有石梯寺，絕頂有爐峰巖，南望海水，如在山脚。

白塔山 山小而圓秀。下爲東州，南爲橫塘，北爲小橫塘。

萬玉山 名周坑山。多奇石。

柯山 《通志》作爛柯山。一在安樂里，舊名松石。一在武盛里。皇朝學士柯潛，聚族於此，遂以得名。潛有從子宗仁，闢雲洞，讀書聚朋，遵朱文公行五禮，三族有喪，無遠近必弔。暮年患痿，聞訃，輒設位卧榻前望哭。教家嚴敬，庭闈肅穆，里人尊之，指雲洞曰聖洞。

石牛山 形勢雄壯，上有石，作牛形。旁有石，方廣如印，高數丈。下有石閣，之西爲羊眠山。弘治志：「羊眠」，當作「揚明」，舉烽之所也。其頂有窠，平數十丈。

梅花山 在壺山左麓，爲梅壠。宋徐鐸晚居於此。鐸，字振父，莆中狀元也。其初，以給事中直學士院，時與蹇序臣編元祐諸臣章牘事狀，擲拾附著，極其精審。第好惡輕重，阿意章惇。爲御史中丞豐稷所論，落職，知湖州。崇寧初，拜禮部尚書，進吏部尚書，卒。鐸雖以大魁顯名，《宋史》以與常秩、鄧管輩同傳云。

石馬山

芝山 峭石巖岨，草樹蓊鬱，爲海濱勝處。山巔舊有庵，曰萬松。學士柯潛嘗讀書於此。潛《重游詩》：「眼底皆親舊，相邀訪白雲。好山看不了，名酒飲都醺。晴旭移花影，輕鷗護水紋。莫談人世事，詩思正紛紛。」

岳香山 舊志云，山有香氣。

金山 上有金山院。院前一塘，夜靜見壺公倒影。

嵩山 在海濱山頂。有峰名文筆，其上石壁有苔紋，宛然「文筆峰」三大字，刮去復明。旁有石室，俗呼仙姑巖。峰下有萬松怪石，嵩山院在焉。

五侯山 山正視之，爲峰者五，呼「五侯」矣。自郡城視之，則峰三，乃呼「筆架」。側而視之，則峰二，乃呼「雙髻」也。其東麓曰金山，又一金山也。金溪在其下。其西麓曰留仙山。金山之麓，宋林光朝蒲弄草堂在焉。光朝《圖經序》曰：「予嘗走金谿，得蒲弄一席地，東望海上，遠山出沒。」又記金谿水，發源仙人臺，其最上層有雲氣濛濛然。旁有虎齒石、鷄冠石，又有石室，可容十許人。登高臨眺，並見海上數山，若蓮花之狀。皇朝柯潛詩：「艾軒先生鳴大宋，絕世文才豈天縱。橫經講道唱莆中，列構茅堂向蒲弄。蒲弄山高矗天起，倒影平湖三十里。渡頭頻繫問奇船，門巷紛紛響珠履。一從觀化去不來，舊基零落荒蒼苔。高林日暮鳥相語，廢圃春深花自開。花開花落幾千古，風教何曾化塵土。綿綿書澤猶在人，滿邑絃歌比鄒魯。我來行過山之陬，夕陽駐馬空回頭。九原魂爽不可作，臨風一嘯空悠悠。」

壽山 脉出五侯山，形如龜。

竹嘯山

持久山 自五侯發脉，入海。海中突起二嶼，一色青，名青嶼。一色赤，名赤嶼。嶼皆疊石，狀類覆釜，綰郡城水口。

天龍山 山勢騰驤如天龍。其下有塘，方廣四十畝。吳氏世居，號吳塘。有天龍庵，庭院清遠，中有甘井。

印山 有石如印，上鐫「印山」二字。

九跳山 以九華山九疊而下，故名。《通志》作「九潮」。

東龍山 石獅山 鳳石山 赤崎山

白湖山 白湖在其下。

東山 有三東山。一在故興化縣西，旁有西巖，甚幽勝。山多異產。宋鄭夾漈有《東山採藥詩》，刻石上。山之麓曰蕙湖，宋僕射陳靖有宅，夾漈徙居焉，有夾漈草堂。其上有潭，夾漈未聘時，每夜有雲起屬天，莆人名潭曰瑞雲。一在興福里榜頭山西，其山如屏，陳氏世居其下，亦名陳山。一在武盛里。

青山 有青山巡檢司。皇朝王世懋《閩部疏》：「莆田青山海濱，產小白石，狀似杏仁，而擘兩瓣，腹有紋如蟲，向無知其異者。兵入守青山，從沙石中拾歸，試貯之醃碟中，兩石離立相對，須臾能自動兩相迎合，名雌雄石，亦曰相思。曾得四瓣試之果爾。惟醃則行，易他則否。竟不解所以，志所不載也。」

大蚶山 在青山之外。舊志：莆有蚶田百頃，號大蚶山。《泉南錄》：昔嘗海溢，有物如瓦屋，輪囷而至，取之，蚶也。邑人立廟祀之，故惠安縣有大蚶廟。上有大動石、小動石、石船、石獸之屬。宋志謂山

有巖洞，十里之內，水草皆香。南至崎頭，二里許，羅隱廟在焉。莆故老云：昔海中浮大木數百，盡鑄「羅」字。鄉人獲而鏟之，逾鏟逾明，相顧驚異。數日，見一人峨冠黃袍，屹立山下，曰：「我羅仙也，行來居此。」言訖不見。於是鄉人爲立廟。南唐封光濟王。海商祈風，分帆南北。

蔡山 自壺山東折而爲是山。張氏世居之。張氏之先名實者，唐時爲校書。實始遷此，其後多有顯人。其北曰丘山。前志作「泥山」，謂堆泥成之，亦張所築也。

南日山 在平海衛東大海中，與琉球相望，舊名南匿。唐翁承贊有「泊船南匿遙，望竹嘯舊山」詩。國初設寨於此，今徙入內地。山爲會哨之所。

吳山

銅山 山產銅，間有掘得者。

礪山 在海中。山石如礪，舊作「礪山」。其西麓曰大礪。

蔣山 蔣氏世居其下。又廣業里亦有蔣山，磅礴廣袤，石上有巨人跡、石棋枰，又有石泉。下接溪橋，宋方氏作蔣山堂其麓。

鯽魚山 鏡石山

石海山 在石鼓山前。上產白石。

龍舌山

鶻宿山 「宿」讀作「秀」。舊有鶻巢。後人改爲「嶽秀友」，是俗耳。

獐龍山 山下有龍崕井。

門夾山 近莆禧城。兩山相夾如門，亦名文甲也。

塔林山 與惠安縣樂嶼相望，人家稠密。

華胥山 在吉了，亦名極了，謂莆地至此而極，復崛起爲此山。然宋又名擊夢也。山與湄洲嶼隔海相望，層樓隱見，時類仙鄉。下有東、西二澳，閭市輻輳，吉了巡司南日山水寨在焉。

薌林山 在故縣南。有薌林寺。下有靈龜潭，石梁跨焉。歲旱禱雨，若有龜浮，雨徵也。其上有石甚砥，可坐數十人，流泉環繞。宋鄭厚與從弟樵讀書其處，有修史堂、幻住庵、通游、宴寂二閣。樵詩有「泉聲漱玉開心孔，山色挹藍熨眼花」之句。陳正獻《修史堂詩》：「流水三間屋，明公半席分。帝嘗招此老，天未喪斯文。人去留青竹，山空鎖白雲。升堂時想像，金石恍然聞。」

百丈山 山在故縣，形如華蓋，亦名華蓋峰。故有兜率院，石室。唐會昌中，僧崇演辟穀此山，有石室六，其西北最高，曰客廳巖。又北曰古仙巖。並山而東，則華蓋石塔、石傘、石樓、重玄四巖，皆倚空架虛，下或坐百人，或數十人。崇演，號妙雲禪師，居院三十餘年，院西偏四里許，有峰曰瑞雲。其上有泉迸上，東阻大石，西流入永福縣矣。居民苦旱，崇演卓錫一喝，石裂水轉，溉高仰田數百頃，人名所居巖曰轉水巖。宋封慈濟大師。

大帽山 狀如席帽。下有爵山，南有太湖坑、石門、馬尾滌、綠榕橋。南有望江巖，最高，海如在其下。又有靈滌、石龜並列，間有龍見。宋王悅詩：「觚稜脫脫風塵表，峭壁垂垂日月低。」

棋山 山有五奇：曰仙掌峰，有石高三十餘丈，巖立如掌。宋林光朝《豐登樓記》曰：「仙掌一帶如湘潭，其牽映數處如鴈宕。」曰文筆峰，曰香爐峰，曰仙人臺，曰出風穴。文筆峰，一名石竹峰，唐末有郭呂

者，通經解學，士林推重，隱於峰下。沒著靈響，里人社祀之。又有龍山巖，如圍屏，掛瀑三十尺。又有石如室，深廣一二丈。五代時，有隱者居此，亦名西臺山。

靈隱山 唐方金紫長官，自固始避巢寇來莆，卒葬是山。俗曰侯官山，有蘇東坡手書《金紫公墓碣》。

〔校記〕

〔一〕「今爲百七十四」，下文實列一百七十三圖。

〔二〕「摩香」，各本原作「磨香」，據下文改。

〔三〕「南萩蘆」，各本原作「南萩蘆」，據下文及《八閩通志·地理》改。

〔四〕「泔」，各本原作「岑」，據文義及《八閩通志·地理》改。

〔五〕「蟹」，各本原作「蟹」，據文義及《八閩通志·地理》改。

閩書卷之二十四

方域志

興化府 莆田縣二 仙游縣一

山

大象峰 與石室山相連，上有天泉、大夢二巖。皇朝林文詩：「山峙秋空千仞表，寺藏蒼靄萬重間。」
鷄足峰 自大象發脉而來，三岐如鷄跖。唐爲玉澗寺，華嚴院師行標者居之。行標，方姓，莆人。儀梵骯髒，言詞雅直，幼投監寺神皎出家。貞元十七年，辭師北游，抵京薦福寺，受戒品，詣章教大師法會。章教奇之，令首其衆。尋爲功德使推入道場，憲宗善之。元和十一年，東歸。武宗廢除佛舍，師廬於西巖石室，律身守道，如居千衆。及宣宗復寺，卽玉澗之北巖居焉。縣令中山甄宿，與莆士庶爭沐醍醐，共隆蘭若。刺史河東薛戎延之入郡，同扣華嚴大義，幾忘寢食。泊解印，與偕至北巖，題爲華嚴院，以徹祠部。又唐陳嶠、許龜圖、黃奕修並讀書是山。宋李長者宏，欲作木蘭陂，南陂成，累壞，是後衆心狐疑，宏詣僧伽塔下百擲筊杯，上下如一，衆心不惑，遂以成陂。宋劉子翬《華嚴寺詩》：「淺水荷花開傍橋，晚鐘樓殿碧山椒。林松繞路行不徹，野鳥避人飛更遙。」

九峰 在襄山西。山橫九峰，上有九峰院。宋徐師仁記：院之左右，九峰連綴，疊類香爐，疑擬衡山。

靈峰 五峰環立，形勝特異。

文筆峰 有兩文筆：一在文賦里，龜山院案山；一在廣業里，見祺山。

翠峰 壺山之麓，唐校書余鎬居此。

盧峰 在故縣北，以盧道人得名。

越王峰 在故縣東南。山巔築臺十餘層，礎石儼然，名越王臺。郡志、《漢書》：東越王更徙南行，去泉山五百里，居大澤中。今所歷之地，多有遺跡，意此臺是也。傍有三燧峰，意越王舉烽之所。峰西有鐘湖，每雲雨晦冥，隱隱有鐘聲，俗傳越王鐘。

仙臺峰 在故縣西。上有石棋枰、馬蹄跡，又石上有「日月逝酒漿」五字，不知其解。字畫恍如鐫勒，遠則了然，近乃滅昧。前有石竅，深窅，投之石，登登然。

瓊峰 形如圍屏，延袤二十里許，發脉福州五虎山。《通志》云：「虎頭出尚幹，虎尾出瓊峰。」

仙壽峰 在故縣西。昔有修真於此者，故以「仙壽」名。頂有平地，周匝十餘丈，可以望遠。山陽有寒泉，呼「仙人井」。《莆陽比事》：方詠，次彭之父，天禧間，置義齋於壽峰虎蹲崗，四方賢士如陳秀公升之、夏英公竦、曾宣靖公公亮，皆不遠而至，與其子弟肄業齋中。一夕，山神獻花，齋几花凡枝。是歲，七人同薦。後陳、夏、曾三公俱至大官，詠以次彭貴，贈朝議郎。

長壽峰 在故縣西。舊志：何九仙兄弟先隱於此。東北有金鐘潭，在瀑流之下。舊經云：有賈胡，

自嶺外掬溪水飲之，覺有金氣，溯流至此，見金鐘浮潭面，一胡投水戴之，一胡以繩引鼻。繩絕鐘沉，不可復致。其後風雨時，隱隱有聲，又名金谿潭，又名仰月潭。下有雲濠。

螺峰 在故縣西南。有石如立笏。舊有螺峰寺。

龜紋嶺 亦名歸雲。

吳嶺

松嶺 在吳嶺右。其下一里爲茅洋。嶺半有觀音泉。

勸耕嶺

鷓鴣嶺 嶺下有五義祠。元時所立，祀宋時禦寇死事者五人，佚其名姓。

百丈嶺 大松嶺 平牀嶺 長腰嶺 赤崖嶺

澳嶺 下有澳村。流爲澳溪。

香山巖 一名鳧山。有古刻「妙高峰」三字。又有金鷄、玉犬石。有天然井，在石盤中，方廣丈餘，泉極清冽，號香泉。下有鑑池，廣可十畝。

永興巖 一名鬼巖。峭壁三十丈。上有飛瀑，霏霏承雷。舊有洞，可炬行。宋紹興中，山鬼爲厲，永福人張真君與朱、蕭二真君，封鬼其中。洞前，真君巖在焉。左有石獅、石象、香爐、玉女峰，前有將軍、石門峰，皆極形似。皇朝萬曆中，令何南金記：「余耳熟鬼巖之勝，戊申嘉平，取道江口，背莆境西北，指桂苑巖，距苑椒洞，出巖底。洞空透可炬，行十里，因張道人鐵柱鬼王其中，巨石封鎖，故不可入。出苑右折里許，水石清駛，香爐、了髻諸峰，林立斧劈，其勢最奇。人谷，兩危巖轟空百丈，蒼碧掣壑，望而知爲異。」

境，造巖五里，寒門幽壑，蟻旋百折始通。巖身光紫圓膩，直插一幅。雲母屏冠萬山頂，堂皇竦傑，闊視孤倚，如帝座布宸空其案，如玉京崇墉無其雉，如巨靈植掌縮其指，如金鷄張翅坦其腹。巖已絕奇，而飛泉一道，灌頂漫腹，界巖瀉落，則更奇。巖下屋數楹，嵌巖凹人，棲張君像一龕。巖突爲郤，泉落則噴者擊瓦爲珠，細者潤簷爲溜。張君前一石井，溜適承之，巖宇虛闕，溜入井，淙淙皆作鼓鑠音。巖前平地，僅堪布席。低首俯矚，來處則一穴陰風，一甌白霧，逢逢浮浮，撲面起。怪石盡作青獅、蒼兕、昂驤，戲舞於洪濤簸蕩中；人如排罡風，披灝炁，十步九折，而上覲太清，復如九闕當關。虎豹猛蹲，恐喝而忱禁之。至此則鈞天廣庭，丹霄絳闕，萬象在下而已。閩土不雪，獨此地高寒間雪。此日劇寒宜雪，不雪而霧，陰靄滃鬱，出沒變幻，踵底頂端，儼芒乎其非我有，巖卽無鬼，而豁豁豁開，室寥峭嶮，固鬼窟也。吹煙吐霧，招雨嘯風，固鬼候也。『南金，維揚人，有文學。爲莆令，好拉諸生游山，一日，有見其騎從山下者，攝衣逐之，忽不見。亡何，南金死。』所著有《悲華館集》。

白龍巖 在故縣西。有上下二巖，內極寬廣。仰視之，有白石，長可丈餘，頭角鱗爪，宛然龍也。泉出其中，如吐沫矣。宋紹興間，右側復見一石龍，盤旋相向，第頭角已露，而餘尚隱。鄉人祠之，禱雨輒應。

上溪仙人巖 舊經云：巖狀如駿馬垂頸。頸上有平處，下瞰一洞，可容數十人。中有藥爐、丹竈、石棋局、甯不可人，惟一竇如窗眼，斜窺隱隱可見。

大孤嶼 平田突阜如龜，又呼大龜嶼。山東有大石盤，上有巨人武。

小孤嶼 上有程氏八老堂。尚書鄭紀讚：『珠江之濱叟八人，棣萼聯輝六百春。葛天無懷渾噩民，

寄跡煙霞心隱淪。結社啣杯送主賓，壺篴唱酬樂天真。謳歌熙皞沐皇仁，觀風採俗獻帝闕。」

小嶼 在海中。有汐橋可渡。有城，城有巡檢司。皇朝嘉靖中徙。宋志作猴嶼。按嶼上有柳侯廟，以祀唐觀察使柳冕。謂其於此置監牧馬，然則當作「侯」。

演嶼 宋幼主舟泊大峽江，爲元兵所迫，有白馬神忽演一嶼，以蔽舟，遂免。石刻「演嶼聖蹟」四字。

湄洲嶼 一名鯨江。在大海中，與琉球相望。順濟天妃廟在焉。妃林姓，唐閩王時，統軍兵馬使願之女，上人也。始生而地變紫，幼通悟秘法，長能乘席渡海，雲游島嶼，人呼神女。又曰龍女。或謂妃父爲賈胡，泛海舟溺，妃方織，現夢往救，據機而寐者終日。其母問之，曰：「父方溺舟，子救父也。」宋雍熙四年，昇化在室，三十年矣，時時憑祥浮槎，朱衣現光，徧夢湄洲墩父老，父老相率祠之，名墩曰聖墩。自是屢著靈異。泉南、楚、越、淮、浙海島，在在奉嘗。宋宣和間，給事中路允迪使高麗，舟危，神登舟護之。歸聞於朝，請祀焉。賜名「順濟」。其後屢封助順、顯衛、嘉應、善慶等號。元時護海運，著靈異，封護國輔聖庇民明著天妃。皇朝洪武初，復有護海運舟之異。五年，封孝順純正孚濟感應聖妃。永樂初，中使鄭和下西洋，奉神舟中，有急，屢見光怪。歸奏聞，令福建鎮守重新其廟。七年，加今號，遣官致祭。其後，成化中，給事中陳詢使日本；嘉靖中，給事中陳侃使琉球，值風船危，率有靈護，或見紅燈從天而下，或有粉蝶繞檣而飛。至今湄海所在皆廟。朝使冊封諸夷，率諸祭告。航海賈客，人人奉香火不絕也。島有黑白搏石，可作棋子。林文軒《與林晉仲書》：「海中一山，名湄洲，隔岸視約五七里許，一水可到，有田數十頃，可耕可食，魚米易辦。可以卜室讀書，隔絕人世，無賓客書尺之擾。」洪武初，內徙島虛，今居壑如故。

摩香石 在錦亭南，三石駢峙。大比之歲，以手摩之，聞桂花香，則中選。出《阮氏家譜》。

石鼓、石鑼 二石在平海衛前小澳，四面皆石，二石懸倚沙磧，如鼓者，周三丈，如鑼者，差小。扣之各如其聲。

聖石 在府南三十里餘。石高數丈，多仙跡，有「祈雨聖石道場」古字。

川水利附。

江口 有支海自碧頭入，與北山溪諸溪會。江面最濶，中有盤石，突起如平地，人家集焉。有黃井，日給千人。有江口橋，一名龍津橋，一名尚陽橋，官道出焉。橋南屬莆田，北屬福清。岳守蒙泉修橋作記，備載器具物料。岳，故北人，而載南方物甲，方言甚悉，亦一奇也。今撮其一段造橋之法：「材爲要，工次之，役又次之。布石於墩而可度之者謂梁。梁石十，各長二丈有四，廣二尺餘，厚如之。疊石柱水以承梁者之謂墩。墩石小者如几案，大者如床榻，千六七百方。布木水底以承石者之謂地牛。地牛用松，圓徑尺，咫長三丈，縱橫而設之，四十七株。斷木附船以護者之謂斗頭。用松長短不一者，計六十又六段。積木附津以利艤者之謂輦度。松長短餘者，計一十又一條。架如井幹而可緣者之謂梯板，如陸級面可度者之謂跳。跳與梯用松大者三。轉木運石而利於動止者之謂袞。袞用杉大者四。長僅尋丈。銳其末以舉石者之謂楸。削令端直以扛石者之謂槓。杙地爲堰以載土者之謂椿。椿用松小者，通用三百七十有四。筴竹條篾以爲畚者，竿七千。山草編以爲槌者斤七萬。琢以親石者之謂鐮。運以擊鐮者之謂槌。以鉋利鐮者之謂綱。計通用斤者六百，炭資煨者籬二百，麻索絢者斤四百，舟任載者三。鍊爲鐵者五。爲鋤者各二，爲斧、爲鑿、爲鋤、爲鐮、爲斬鋸、爲細鋸者各一。」

涵江 宋國子祭酒劉政家其上，濬水心河爲民溉田。而學士鄭頤吉亦居之。頤吉，與文文山相友，

文山過訪之，會里初建社，爲書「新有社」三字。屢經兵火，墨蹟猶新。

寧海 有支海自下黃竿入，兩涯宏闊，北涯舊有寧海鎮。鎮前有渡。元元統中，僧越浦橋之，曰寧海。國初壞，同知徐則敬欲修之。人謂費鉅，須用浮屠法，度衆財爲之。則敬曰：「浮屠誰可？」人曰：「靈雲僧湘江可。」則敬直上靈雲頂，扣湘江語焉。時湘江方聚徒談教，勉爲則敬下山，積十年而橋成。是橋也，天風雨則先鳴。

上溪 卽北磨溪。發源林葬坑，南流至南門第二橋，與木蘭溪水合。蔡端明有《丙申五月游興化西門上溪詩》。

莒溪 在縣西五十里。首受游洋、蔡溪、九鯉湖諸水，東會萩蘆、漁滄、八瀨水，以達於延壽溪。皇朝方用晦詩：「莒溪環翠入瓢湖，古木雲莊卽舊居。每種秫田秋釀酒，剩收桐子夜觀書。」用晦，見方伎，隱於醫，能詩。與用晦同時，又有高坦，亦能詩。

南萩蘆溪 發源游洋溪，合桃源、白石諸水，同歸迎仙港入海。一自興教里，堰爲太和陂，過漏頭，達龍港入海。一自常泰里，分入可畝陂，過妙寂橋，爲漁滄溪，會延壽溪入海。按《左傳》：「伐雍門之萩」，註：「卽今蒿也。」《史記》：「淮北、常山已南，河濟之間，千樹萩。」樂彥解：「萩，梓木也，可爲輅。」二義不同。本州志：漁滄溪故有長橋，歲久圯壞，架木僅存，尚可托足。舟人鄭廷冠者，渡艇窺利，抽木絕之，恣索渡錢。有樵子空手耳，去時予以包飯，歸被再索，苦投不顧，哭於溪次。溪傍老人陳志旺者，領孫散步，好語勸渡，鄭反詬之。志旺抱孫返舍，亂流負樵子過溪，半幾溺，及崖，樵子叩謝。志旺憤曰：「誓必成橋。」鄭反唇曰：「囊翁，囊翁！西日頹矣，而橋若成，我鬼守之。」志旺歸，視其家牛一頭，穀三十石，衣服、

簪鉗可值數金，遂盡捐爲橋費，而亡何盡矣。鄭揅揅曰：「成哉，橋也。」居三年，里人黃啟憲捐百金續之，鄭乘夜壞其址，忽顛墜溺死溪中，志旺樂觀厥成，而鄭果作守橋鬼。

八瀨溪 在縣西北十里。溪淺流急，曰瀨，亦曰碧瀨，亦曰鯢瀨。旁有五龍廟。昔有黑白二龍，現水端，故廟之。溪東有石，壁立數仞，下闕深潭，石罅隱隱有簑笠釣影。方正字詩：「瀨寒隱魚鯢，廟古動魚龍。」皇朝令何南金構觀止亭其上，爲記：「莆西北諸泉，則使華陂爲之尾，溯陂而溪，以達於瀨，五里而遙，陂受瀉，溪受瀦，瀨受湍。瀨石平鋪軟翠，鱗鱗鈎鈎，故無不奇。而其在北麓，負奇特甚。平地塊石隆起，魁然挺阜也。忽又斬然一丘兩弄，弄石內容天一綫，外封者如帽，突者如卵，渠者如軌，凹者如武，脫者如泔。石身圓轉滑膩，有岌嶮槎枒之觀，而絕無觚稜芒刺嶮鑿之跡。紺碧色澤，直是近時月白豆青染成，手可撫而摩，舌可伏而舐，身可藉而卧，卧可溜滾直下，任其所底，而不作勾刺。虞聞之，春漲兼天，漫過石頂十仞，茲穿透缺嵌之處，蓋馮夷握規，陽侯布砥，幾萬年神力淘刮，以至於此。而此其水落石出，競媚獻巧之時也。溪水觸石則瀑，過瀑則渟，渟則澄泓，瀑則訇磕。石夾溪，踞南麓咫尺，度溪而亭，冠山北向，青牆翠岸，素蜺白蛇，直窮於睇所不及而止。一巨瀑逼石弄而轟，翻銀擣雪，石上人坐轟聲中，身搖股栗，對語不聞，呿口戰手以相指示而已。弄石而外，石田如潮落洗沙，各競爬搔櫛比印就之勢，譬之青蓮匝沼，綠雲湧地，足之所蹈，無之非是。又似入波斯室邸，空青翡翠，木難火齊，狼藉不收。三家賽人，口涎眼飽，耽耽而往，悵悵空歸，苦掇拾之無可奈何耳。瀨與智泉，並附郭以瀑，則瀨之帶溪，信不及智之懸崖以石，則瀨之光潔蒼翠，嵌透玲瓏，什伯智泉而無算也。」

延壽溪 溪自游洋發源，逕莆田，瀦延壽東入海。十里澄湛，無湍激聲。一名綬溪，以其水綠如綬

然。唐時有吳興者，以貲豪里中。謂溪出杜塘，逕流入海，不足溉田，卽延壽陂之後，塍海爲田，築長堤於杜塘，以遏大流，轉入沙塘陂，爲溝若泄，各六十餘，以導以灌北洋田。後分二派以殺水港，曰長生陂，曰兒戲。水有宣洩不能他移，故曰長生。塍沙爲塍，大水時至，捲沙入海，水過溪順，沙復自雍成塍，不勞人力，若兒戲然也。久之，杜塘堤數潰。興曰：「蛟孽堤乃爾！」提刀截流，窮穴索蛟斬之。語其妻曰：「鼓之。水色青者，蛟死也。水色紅者，吾死也。」頃之，紅青渾騰，人蛟俱斃。數日，陂東興所持刀，人乃得之。蛟死堤完，水旱亡害，里人傷興，立廟祀之。名所得刀處曰吳刀。宋累賜廟額曰孚應，封爲勇侯。皇朝嘉靖中，名廟曰吳長官，秩祀典。莆人言南洋水利，曰李長者。言北洋水利，曰吳長官也。長官所陂延壽，溉田可萬餘頃；所堤杜塘，溉田可二千餘頃矣。又唐徐正字寅亦隱此溪。而宋史部尚書許鐸亦家於此溪。有延壽橋，橋北有石微露者，寅釣磯也。有潭名徐潭，亦以寅故。寅常作《斬蛇》及《人生幾何》二賦，渤海高元固入閩求識之，言其國得其二賦，家家以泥金書幃。及隱此，自賦詩云：「賦就神都振大名，斬蛇工與樂天爭。歸來延壽溪頭住，終日無人問一聲。」劉克莊《溪潭詩》有「門外青山皆我有，從今不必呼徐潭」之句，夜夢寅拊背云：「我昔勝君昔，君今勝我今。有隆還有替，何必苦相侵？」良一異也。橋西井八角，內橫截一石，左濁右清，則徐鐸家井。鐸未第時，有瞽者掬溪水飲之，曰：「此地當出狀元。」行至白杜家塾，聞侍郎方會誦書聲，曰：「其人矣！」翼日遇鐸，曰：「此乃是也。」熙寧九年，鐸擢第一。同郡薛奕亦首武舉。神宗賜詩：「一方文武魁天下，四海英雄入彀中。」而自是莆田之名重宇內。

蒜溪 源出福清縣黃跡山，繞蒜嶺，歷五峰陂、駟馬橋、南迎仙橋，入於海。

東華溪 石貫江裡。唐有梅妃者，是里人也。唐人爲傳：梅妃姓江，莆田人。父仲遜世，爲皇妃。

九歲能誦《二南》詩，語父曰：「我期以此爲志。」父奇之，名曰采蘋。開元中，高力士使閩，妃笄矣，見其少麗，選歸侍明皇，大見寵幸。長安大內、大明、興慶三宮，東都大內、上陽、東宮幾萬人，自得妃，視如塵土。宮中亦自以爲不及。妃能屬文，自比謝女。常淡粧雅服，而姿態明秀，筆不可描畫。性喜梅，所居欄檻，悉植梅數株，榜曰梅亭。梅開，賦賞不能去。上以其所好，戲名曰梅妃。有《蘭簫》、《梨園》、《梅花》、《鳳笛》、《玻璃杯》、《剪刀》、《綺窗》七賦。是時承平無事，上於兄弟間極友愛，日從閑燕，必妃侍側。《莆陽比事》：「此傳作於唐大中二年七月，葉石林得之朱遵度家。」皇朝郡志：隆慶五年孟秋，有雙龍現於東華，一昇天，一入江中。余僉事一鵬記：「隆慶辛未秋七月二十日當午，雙龍出自連江里東角海中。初，黑霧彌漫，疎雨甚大，色黃而氣腥，耘者著背皆痛。有頃，雨止，龍擁水高丈餘，濶數丈，長乃亘野，聲若烈爆，勢若浙潮，西至大孤之前。其一飛昇。初甚少，須臾若墜復起，則長數十丈，漸至竟天，拏雲搏霧，橫江經時，準角崢嶸，足距騰踊，尾搖曳而脫，身若水牯，腹背正白，甲蠕動，若鬢足，歷歷可見。其中閃爍不可正視，雲若甬若嶺，跨天東北，上龍在雲中，雖隱顯不定，不甚遮蔽。忽有片雲正黑，西北來，龍回頭宛轉，遂駕以昇，不可復見矣。其一浮游田禾之末，北渡洋水，時雨新霽，水尚沒膝，所至水皆湧從，旋卷噴薄，如火樹銀花。至白石堀，水躍數丈，埠上柚樹皆偃，徘徊良久，去西北，行經東庭，至東華，循古忘飢亭埔，下直江之西，中樂橋南，入潭。潭在余亭之前，江之中央，若有所擇而處者，面江而居者，道人江時，蜿蜒盤薄，噓氣成雲，噴啣直立，高出古榕之上，其聲若雷，豈入潭擁軋使然？遠近聞異觀者，猶見潭心潰滅，起數尺，須臾乃靜。因周視所歷禾樹、草藻，無葉折者。故老載籍所覩，記龍巖穴變化，其常也，未有白日驅浪游，見於田，擇勝而止者。且昇者停露的爍，其晶明晃曜之象，拏搏蟠結之勢，雖丹青不可盡

述。止者平地水隨，旋舞澎湃若山，怒濤翻空，天喬無損，愧焉現怪，忽焉斂寂，真奇觀也。潭在江心，源於仙邑，衍於蘭陂，匯於囊埠之麓，而介大孤、小孤之間。奇石夾輔，一碧萬頃，淵澄靜深。其外四山環繞，古木蒼鬱，異物來居，不可無記。」

迎仙溪 繇萩蘆溪合桃源、白石諸水，東流會迎仙港，以入於海。

寶勝溪 發源寶勝山，合楊園山流水，北流與大溪合。

白沙溪 發源鐵嶺、白雲、鼓角諸山，至古山西合流，縈紆北行，與大溪合。

瀨溪 源自德化、永春、仙游，合澗谷之水，至木蘭陂，以入於海。南有石龜，有石盤橫溪上，其形如龜。

木蘭溪 接瀨溪水，入木蘭陂赴海。陂，宋李長者宏所築也，已載木蘭山下。宏所築，本以灌南洋田。元延祐間，總管郭朵兒、張仲儀相繼創萬金斗門，引陂水北之，以灌延興、孝義、仁德三里田。南洋民爭之曰：「北洋已有延壽、太和等陂，木蘭陂者，李長者專以利南洋人者也，奈何奪此與彼？」朵兒慰遣之曰：「是也，南水直注，其力大。北水橫注，其力小。分汝水，未必遽汝病也。」乃與民約：以三七爲則，南得七分，北得三分。其水口廣狹高下，皆有定數。皇朝鄭善夫詩：「木蘭山下陂水清，南洋北洋風日晴。慣乘舴艋中流穩，頗愛棠梨兩岸明。石塹沙堤迴海勢，鵲鵲鸚鵡亂春聲。漫向雲莊望莆口，更從壺頂看滄瀛。」是水也，自溪下注，縈紆曲折，有大潭三：曰杜家潭，曰清浦家前潭，曰上廊周家潭，總而名之曰清江潭。翁、周、陳、林，四姓環居焉。

梁溪 在壺山下，靈雲巖諸水注此。循山北流，至新塘與溝水合，溪山邃清，樹木陰翳。

湘溪 發源石竹峰，榮紆數里，瀦爲龜潭，南注張洋，逾褐石，達於菽蘆陂，合於江，以入於海。

碧溪(二) 接湘溪水，經菽蘆溪入海。上有仙人巖。巖有野橘，其實無時，得者瑞之。宋慶曆間，陳方、黃中庸、元祐間，方亞夫、薛蕃以九日游巖，人得一橘，並登第。後鄭厚、鄭樵繼得之。厚，試魁南省。樵以草澤召。厚詩：「短帽依然九日風，巖頭的的問仙翁。神仙料不私將橘，乞與陳、黃、方、薛公。」

藻湖溪 在故縣東南。水接大松溪，過馬洋，合洙溪，以達於江。

百丈溪 在故縣東。發源兜率山，經報親橋。又一支出瑯峰，入福清界，爲催洋溪。

大松溪 在故縣西。發源大松嶺下，接藻湖，過洙溪，合流於江。

吉宦溪 在故縣西。發源自黃渡，疏爲黃滌溪，逾鳳搏，嶺南始爲吉宦溪。南流過百俊，與碧溪(三)會於東鎮。

杉溪 「杉」古作「黏」，卽音「杉」。《爾雅》曰：「板，黏。」在故縣西北。發源長壽峰下，接大松溪，過藻湖，以達於菽蘆陂。溪西有仙人井，在盤石凸溪中，方十餘丈，上列三井，水清泉冽，旱禱輒應。

鳳搏溪 在故縣西。發源自蒼山，南流入碧溪。

澳溪 在故縣西。發源澳頭山下，出洙溪，逾菽蘆，朝宗於海。蓋蘇溪、吉宦、鳳搏合流處。

北菽蘆溪 在澳溪下流，至菽蘆陂，岐而爲二：左行者，歷萬安溪、迎仙橋，會菽蘆之水，以達江口；右行者，過漏頭，以達新港，各入於海。

澄溪 木蘭之水從古善涵出，繞其鄉，溉田千餘畝。皇朝成化間，諸生王體忠聚族而濬焉。

洙溪 在故縣南。一名蘇溪。五里有蘇陂。舊經云：大溪之中，有溫泉數眼，百沸如湯，混以溪流，

不能止其沸。居民沐浴、烹飪焉。

大橋河、新橋河 皆城中河也。

龍鬚河 晉時子城河也。

小西湖 本城北舊壕，界梅峰、烏石間。有源出北澗，縣西迤東。皇朝洪武初，闢城壕塞。成化初，岳文肅爲郡，疏以爲湖，邀賓朋泛艦其中，立石紀「小西湖」三字，適而有韻。復鐫詩石上，有「性癖耽山水，莆陽不負吾。林巒清欲滴，城郭隱如無」之句。「欲」字本作「似」字，方鐫石，莆書生林炤讀之，謂工人曰：「鐫且空『似』，府公若問，卽述我言。」已，文肅問故，工俱對。文肅卽過炤門，一再請，乃入謁。具叩之，遂謝再三。文肅曰：「後誰定吾文者？」炤徐曰：「請易『似』以『欲』，庶不合掌。」文肅大喜拜謝，束帛贈之。

白湖 一名玉湖。海自上黃竿入三江口，歷寧海至此。宋熙寧間，設浮橋。紹興間，易以石，欲髣髴泉南洛陽。湔縈識：「白湖腰欲斷，莆陽朱紫半。」《莆陽比事》：「白湖自熙寧斷水爲橋，莆之登第倍昔。」鄭叔僑詩：「千尋水面跨長橋，隱隱晴虹卧海潮。結駟直通黃石市，連艘橫斷白湖腰。」湖側有靈惠井，環境斥鹵，井居其間。舊記云：時疫，有夢神示一井，鑿而飲之，無不愈。於是封神靈惠，名井靈惠泉。

凝翠湖 與清江潭相襟帶，上廊周氏聚族焉。上有延綠亭、歸來亭，湖水繚遶，長百餘丈。迤南有水綿樹百餘章。湖光動盪，亦呼「翠渠」。方伯周瑛以爲號，作池湖上，曰浴雲。

賢良港 在莆禧千戶所前。有山橫亘港上，如象形，木黃螺港也。美之曰賢良，如以鵠宿爲嶽秀者。

章魚港 以形名。

龍潭 有三龍潭：一在西冲，龜山諸水會此，深不可測。鄉人苦旱，取鐵符繫竿上，以香炷火焚之，急下山，則風雨大作，蓋龍性忌鐵，故符下而龍起。一在囊山東里許，水自山凹出，懸瀑丈餘，其下爲潭，深綠如澱。循潭上東行三里許，有桃源洞。石壁峭列，洞出其底，容隙而入，目境頓別。一故在縣西，旁有神祠，宋紹興四年，令詹卓然祈雨龍見，乃作祠焉。

烈女潭 在館後山之下。王氏女，給賊自投，遂以名。

虺潭 源自洙溪而下，深不可測，舊傳群虺出沒焉。

雙池 在龍坡址後。宋氏舊居在焉。《壺山文會》有《宋貴誠宅雙池喬木詩》。

印斗池 在東里黃氏祠前。其池甚小，方正如印。

方池 在萬壽宮內。元延祐初，郡人方廣翁爲監鐵使，盡以家資建萬壽宮，以祈福祐。宮中開鑿，方廣數十步，盡輦所得海上怪石，置其中。今空池耳。

桃源溫湯池 在錦江西。宋大蕭賦：「浴桃源之湯者，多年壽。」

溫泉 在上杭橋西北岸淤泥中。潮漲泉沒，潮退則見，浴之愈瘡。

葆光泉 在巖罅，去余埔東里許。循崖巨石下盤有窪，泉湧其中，久旱不竭，林艾軒命是名。

大泉 在平海城東二里許。泉脉自石罅中湧出。

乳泉 泉色白而香，特重他泉。

洪井 在後塘。元至正間，洪氏得雙鯉，一躍入井。皇朝洪武十一年，六月望，夜雷雨，化龍，水痕去

屋下及尺。

元豐橋側井 涅槃井也。舊記云：「涅槃南歸，同船者渴不獲水，涅槃登岸，拄錫飛泉湧出。」

仙游縣 在府城西。東至莆田，西至永春，南至惠安，北至永福。唐嗣聖十六年，析莆田縣，置清源縣。天寶元年，別駕趙頤正，以縣與郡同名，奏請易之。因以縣有何氏九仙，勅改仙游。宋、元仍舊。皇朝因之。正統十三年，省興化縣西北鄉地入焉。其鄉，國初分爲上下區，統里二十六。永樂、宣德、正統、景泰、天順，代有增減。至成化十八年，始定爲十四里，統十四圖。

上區

功建里，圖一。宋嘉禾鄉。山曰金石、二飛、將軍、富洋、瀑布。湖曰南湖、西湖、東湖。

孝仁里，圖一。宋嘉禾鄉。山曰大智、鄭墓、鳴峰、白石、香山、九峰。溪曰可溪、周溪、九溪。泉曰聖泉、東井。

仁德里，圖一。宋嘉禾鄉。山曰寶幢、天谷、帶帽、鐘石、靈陽。峰曰文筆。溪曰蔣溪。澗曰白虹。

文賢里，圖一。宋歸德鄉。山曰屏山、烏巖、梯雲、紫帽、梁山。嶺曰石獅。洞曰靈源。溪曰中岳。

萬善里，圖一。宋歸德鄉。山曰烏石、雙桂、浩軸、人旗、大柏、留峰、明山、泗洲臺、祥雲。嶺曰日隔、梯雲。溪曰文殊。

善化里，圖一。宋歸德鄉。山曰大帽、鐘山、金鷄。嶺曰歸仙。溪曰三會、大濟、神堂、大目。

興賢里，圖一。宋歸德鄉。山曰九座、九雲、大汾、龍山、鼓樓、寶山、月峰。

下區

永興里，圖一。宋修德鄉。山曰石鼓、飛鳳、走馬、羅山、登科、蔣山、留仙、（三）翹足、洪山、大尖、小尖。嶺曰石碑、新嶺。溪曰

坤溪。潭曰龍潭。泉口雙林、溫泉。

折桂里，圖一。宋修德鄉。山曰崑崙、銅盤、鷄山、鷄子城、新峰、金井欄、古重、九仙、龜城、玉几。嶺曰陽山。溪曰三坑橋、碧溪、龍擊。

安賢里，圖一。宋修德鄉。山口旗山、高望。嶺曰洋陶。溪曰安吉、昆溪。

興泰里，圖一。故興化縣地。山曰牛嶺、東山、南鎮、龍山、林洋、覆鼎、雙髻、如蘭、石所、紫帽、玳瑁、谷目、盤龍、銀巖、蓮花、蛇灣城、小巖、石犬、石屏、尋陽、九十九朝。巖曰南湖、北山、羅漢、蔡溪。嶺曰磨石、翠嶺、（四）白馬、高危、長嶺。溪曰興角、游洋、郭洋、白洋、石馬、尋陽、白浮。湖曰九鯉。水曰何巖、小姑。濤曰龍岡、仙人。泉曰湯泉。

香田里，圖一。宋唐安鄉。山曰瓊山、白馬、雲頂、東山、明山。溪曰新溪。

慈孝里，圖一。宋唐安鄉。山曰銅鼎、柳峰、紫嶼、牛歌亭、九龍、歸縣、照船、五谷、鴻漸、雲峰、牛山。巖曰北坑。溪曰清澤。潭曰鐘潭。

連江里，圖一。宋唐安鄉。山口塔斗、孔方、錦屏。嶺曰馬嶺。溪曰楓亭、沙溪。港曰雙溪、太平。潭曰卓洋、龍潭。

據莆上游，爲郡壯縣。藪澤襟連，原隰鱗次。山川鬱其雄峻，仙人以爲官闕。其形勝也。

山

金石山 在城中，爲登臨勝處。以宋傅楫居此得名。楫，徽宗舊學之臣也。其沒也，賜葬於宜興。楫子謙受，思不得時，詣壠頭作福神院，奉神祀楫其中。楫甥王邁爲記：「金石山福神道院，仙游傅氏所造也。經始建炎庚戌，成於紹興丁巳，中間拓地增屋者不一。淳祐癸卯，嗣孫蒔，囑甥邁文之。金石山者，何以少師公得名也？曷名乎福神道院？公子夔漕公謙受，作祠堂祀公，寓名乎福神也。初，少師公未

冠，試廣文館第一，從古靈先生襄游，時牆屏問道千餘人，先生獨曰：『傅元通，金石人也。』女妻之。熙寧間，王、呂銳於變法，道路以目。先生屢爲神宗言其非便，不聽則疏爭之。公所親告公曰：『時相得君方專上，舉國聽之，先生力詆其非，必犯九闕之怒，子翁婿間宜諫止之，不然禍且及子。』公正色曰：『吾師之道，正道也。相之說，邪說也。以正闕邪，吾徒當相與張而大之，可少諷以貶，且爲潤色。』諫疏明稱王、呂之罪，並爲所惡。暨鄒道卿言事得貶，章子厚使人極之所往。平生故人，人望望去之，公義形於色，曰：『不負楊臨賀，何人哉？』厚贖鄒行，坐是免所居官。踰年，鄒得生還，公亦被召。曾布牢籠之，以助己。公守師說，不爲動。布力擠之，於是有亳州之命。自是黨論日熾，端人莊士之子孫，俱罹禁錮。公以徽廟舊學，僅免竄逐，竟抱杞天之憂，薨於亳。葬於常之宜興。朝廷賜善權山廣教寺以資冥福。夔漕以公故，浮沉州縣二十餘年，不敢背教忠之訓、求合權門也。嘗仕括蒼，乘桴而還，遇風濤洶湧，衆舟俱覆，顧瞻對岸，有北方正神之幟，植乎其前，若有扶之，以濟於險。既歸仙游，每食淚羹曰：『吾親松楸在三千里外，雖蒙恩奉香火，有所不能時展烝嘗，寧不見誚馬鬣、夏畦之鬼？』乃捐俸割地，創堂邑北山，以奉少師，祠名福神焉。括蒼有羽士梅霄洞者，於六飛未南渡之前，嘗言錢塘有天子氣，既而果驗。夔漕携與偕來，其時鑄鐘累月不就，陳夫人投釵於爐而鐘成。既成，叩之無聲，梅劍擊之，聲用天震，至今一釵一劍之痕，隱隱於蹲熊盤龍之上。用是斯堂雖爲祠先之所，而靈異之跡，水旱饗膺，四方並來。嗟夫！生天地間，非親何愛，非君何尊？師也者，教之孝以事親，忠以事君，昭昭乎在三之義，人極所以立，人類所以蕃也。惟少師公事師盡道，事君盡言，不以時之燥濕爲趨背，不以身之升沉爲戚欣。蓋不忍於叛師而忘君，故未嘗染劉輿之賦，而污元規之塵。惟夔漕公事生以禮，事亡如存，一飲食，不忘南陔之蘭；一跬步，必顧太行之

雲。故揭虔妥靈於斯堂也。恍乎音容見，愴乎聲歎聞。夫是之謂忠臣孝子，萃於傅氏一門。雖附益以道家之說，若祭之鄰於非鬼，語之涉於怪神，而因親寓名，君子亦可爲知仁之觀矣，故特書之，俾來者有考於斯文。」

二飛山 縣主山，曰大飛。其山自九座分宗而來，蜿蜒百里，屹立爲二，聳拔飛動，故號二飛。《海錄碎事》云：「自異域飛至，宋俞峙隱焉。峙，紹寧中，特奏名，不仕，居是山之中，與陳宓相唱和。」下爲鐘鼎山、馬鞍山。後爲天馬山。馬鞍山下，有道者井，泉味甘美，爲僧伽經行卓錫之跡。皇朝學士劉定之爲鄭紀作《蒼山書院記》。

將軍山 在二飛東。屹立千丈，峰頂尖圓若武胄，名「將軍」矣。歐陽文忠爲蔡忠惠作墓誌云，莆田縣將軍山下，不知爲此山與否？乃今忠惠葬處，名蔡山也。都御史滕昭修忠惠墓，學士柯潛作記，或謂公墓在赤湖焦坑，而此爲非是。豈當時地屬莆田，後又屬仙游？但今按蔡山之處，並無山似將軍者，或因此近有古將軍墓，故名耶？然蔡山有石碑題識可據，似爲公墓無疑。赤湖焦坑，則去此六七里，公父母墓在焉。文忠公亦嘗銘之，所謂「其里慈孝，其岡平井」，或此地也。赤湖在楓亭市西。舊經云：周環五里，土石皆紫。又下爲焦坑，地形如豹隱，又號豹眠。是蔡忠惠故居，而蔡京父子亦居於此。

瀑布山 懸崖垂練，可數千尺。下有龍潭，禱雨多應。

富洋山 宋有富洋院，唐鄭良士有《寄富洋山禪者詩》：「畫破青山路一條，走鞭飛蓋去何遙？礙天巖樹春先冷，鎖院溪雲晝不消。雪上茗芽因客煮，海南沉屑爲齋燒。誰能學得空門士？冷却心灰守寂寥。」

大智山 唐智廣禪師游此，因以名山。智廣見泉州德化山。

鄭墓山 唐御史中丞鄭良士墓在焉。有聖泉，唐時有法王聖妃，以鐵鞭引泉，從地中行，灌田千餘畝。

鳴峰山 有石高二十餘丈，中有風穴。穴中有螭殼，似室而方，天將雨則鳴，過三日不雨則旱，禱之則應。上有鳴峰巖，昔有卓道人築室於此。疊嶂懸崖，清泉白石，甚爲幽勝。道人名彌真，鋸匠也。遇何仙泗州臺山，授以二桃，食一留一，仙問故，曰：「小人有母，請以遺之。」自是靈悟，能行符咒水，愈人疾。後結庵此山，白日坐化，里人祠其蛻骨。

白石山 《通志》作「白巖」。白石成巖，下插清溪，孤標秀異，靈仙所集。唐鄭良士棄官隱此，號白巖居士。

香山 舊志：有人登山，時聞異香。或於土中得之，若乳香。然下有院，旁有清溪，其源發於泉之晉江，水極清泚。溪旁小徑可通杖屨。又有石梯、掛錢石、銀臺石、馬香爐峰、龍潭。春月游人極盛。

九峰山 縣前山也。亦名九仙峰。列峙爲九，雲生雨至。

寶幢山 下有龍華寺。隋大業中，有潤州僧卓庵，於此精修梵行。有白龍啣白蓮華自空中來獻，因以爲名。今龍井、龍池遺址尚存。有院十一，庵七十七。法華庵之內，有林聘君萍齋象隱處。其東有普惠院，宋僧清忠所建。清忠嘗取經西川，往還數次，川人疑其爲販，欲殺之。斷右手以誓，血湧白紅，川人異之，得墨字本以歸。宋初，賜號弘法大師。仁宗篆書「明堂」及飛白「明堂之門」字賜之。神宗賜以徑尺草書古詩二首，藏於寺之御書閣。劉克莊詩：「不見層巒與複巖，眼中夷曠似江南。煙收綠野連青嶂，樓

瞰朱橋映碧潭。」

天谷山 舊志不載。皇朝萬曆初，有鄭姓者，始開山得泉石之勝，邑人以爲奇觀。

帶帽山 其峰突起千丈，頂如手掌。

鐘石山 形如覆鐘。下有石門，名仙門洞。刻石云：古有樵夫，遇一翁，野服道裝，游於石下。問曰：「翁何自家？」翁曰：「家此五百餘年矣。」樵夫怪曰：「何不見屋宇門戶？」翁指石，石開，化鶴飛去。

靈陽山 下有瑞泉。僧智廣卓錫，泉湧，故名。失名氏詩：「坐斷鰲頭千仞壁，擊開石眼一支泉。」

屏山 在縣極西，界泉永春。初呼鳴山，因其方正如屏，而更之。有屏山書院。

烏巖山 有烏石巖。其山高大聳秀，狀若展旗，又名旗峰。上有飛錫巖。

梯雲山

紫帽山 其形如帽。下有三台山。此山在文賢里，又石所山左亦有紫帽山。

梁山 一峰突起平田。舊傳梁時有紫氣凝結，經旬不散，邑以祥聞，故以「梁」名山。

烏石山 烏石溪口，有一石高數丈，色光如漆。

雙桂山 雙峰峙立，亦名雙髻。自九座而來，頂平處可坐人數百。

誥軸山 形如誥軸。行數里，爲角旗山。

大旗山 舊名大帽。葉正簡頤家在焉。前有正奏、欄樹、南林、魁巖諸山。正奏山，初名精進，以其尖聳如笏，正簡人相改今名，蓋其家面山也。後亦葬是山之下。魁巖山，宋葉大有省試第一，因以名山。

又大旗山下古瀨，有樹一株，婆婆如榕。國有大故，樹輒先悴，人名知國樹。

大柘山 山多柘木。

留峰山

泗洲臺山 在縣西北四十里。舊傳何九仙往來其間，道人卓彌真於此遇之，因名仙人臺。

明山

祥雲山 山有靈濟廟，祀宋楊氏兄弟。長曰泰，次曰梓，建炎間居此，歿而神靈，人廟祀之。

大帽山 山圓整秀拔如席帽。下有北斗、岐山、平光、龜峰、飛鳥諸山。北斗、岐山有石錯列如斗，舊名其里曰璇珠。平光山，山平闊光潤，晝夜發霞光。飛鳥山，亦曰飛鳥，昔有孝子廬墓於此，飛鳥群集。又有飛鳥溪，舊志云：水淺沙平，群鳥戲集。

鐘山 狀如覆鐘。下有小鐘山。

金鷄山

九座山 山最高。循嶺三十五里，得平坦地五里，院當其要，九峰橫前。中一峰熒碧照耀，儼如立筍也。是山有盤髻峰，中多嘉禾、異卉。宋淳熙間，古杉着花，臭如幽蘭，芬馥絕異。有蟒口巖，云山有巨蟒，智廣至，蟒張口如屋，智廣拄錫其中，蟒化為石。有杖錫泉，云智廣以錫卓出。有徹雲澗。院西有大澗，群石堆積，水觸石，琤琮如鐘磬。有龍潭，寬丈餘，深二三尺，湛然而清。其限有險竇，深淺莫測，歲旱，禱即應。有龍透石，云潭有蟄龍，亢旱不雨，智廣叱出之，龍透石出，其斷如截。《泉南錄》云：重巒疊嶂之中，巍然高者九。舊經謂八峰環繞一峰，故名。又以山面如鳳舉，亦名鳳山。唐咸通中，智廣大師創

太平院於此，後人又以智廣自九仙山來此宴坐，名九座也。智廣，陳姓，行日月，中有十二影隨身，浴潭水，水輒暖。一日，浴不暖，隨聞山中有鞭朴聲，若責其不燂，而智廣自是不浴矣。王審知人聞，問十世可知也，智廣曰：「騎馬來，騎馬去。」審知以光啟丙午有閩，至保大丙午而終。又曰：「功下田，刀交連。井底坐，二十年。」後留從効據有泉州，皆如其言。光啟二年示寂，年八十。世謂智廣爲龍樹化身。乾寧中，謚正覺禪師。此地舊屬泉州德化縣。洪邁《夷堅志》：「五代王氏撫閩日，一野僧，一瓢自隨，詣福州永福，營營若有所求。或問何以？曰：『吾欲擇高廣地可安千僧者。』時方尚武，其人應之曰：『我久要尋駐千兵處，未能人手，如何容得閑和尚？』僧乃去。之九座，徘徊覽眺，遂堅卧不動。叱之，曰：『我豈不知此是道場耶？恨溪水太逼，山下勢不寬拓耳！』是夜，驚雷震擊達明，溪移退二十丈。居民怪焉，因共勸勉，使主座令遠近施財，不約而集，遂成禪林。」邁所載野僧，蓋智廣也。宋時又有釋効常者，住楚澧、潭間，待人濟物，笑容滿面。衲子雲從，目爲常歡喜。久之還閩，亦退居此山。從弟効謙復住是山以三十年，禪林推仰。

九雲山 去太平院七里。下有靈湫，祈雨多驗。

大汾山 永福縣界。唐李尚芬世居之。尚芬，唐神堯皇帝七世孫，居閩中。天寶之難，勅閩中召募宗室，尚芬率子弟應募，以戰功，爲奉天定難功臣。漢乾祐間，遷居邑之汾陽。宋初，收錄前代帝王子孫，授尚芬孫庭芝泉州教授。宋陳謙有《賞汾陽李氏白牡丹詩》。

龍山 鼓樓山 寶山

月峰山 上有大仙巖，歲旱禱之。宋傅誠築月山書院其下。王邁詩：「山下聞書聲，勝似聽絲竹。」

山中嚼書味，勝似飽梁肉。絲竹無趣空有音，梁肉悅口不悅心。月山主人真好事，積書連屋床橫琴。直面青天垂闊野，滿懷月色娛良夜。群兒誦書鸞鶴鳴，卧而聽之神思清。人間樂事天所惜，月山之樂爲第一。我看群兒箇箇奇，腰斤行斫月中枝。伊渠來作月山客，未肯輕和月山詩。」

石鼓山 上有巨石如鼓，縣水口山也。山麓有安利橋，宋嘉定間，陳謙造。皇朝鄭紀重修，更曰卧龍。紀爲記，頗似韓文公《畫馬記》。今錄之：「橋始名安利，在邑東三里，石鼓山麓。宋嘉定間，兵部侍郎、清源郡侯、崇清居士陳公謙所造。皇朝永樂初，回祿爲災。至成化乙酉，邑之耆老大家，相與復之。橋成，落讌其上，以其氣勢崢嶸，如龍卧淵，且地相邑治，屬東方七宿，改今名云。疊石水中以承梁者爲墩，墩十有五：存其舊者五，因其舊址而改造者七，闢其地而新增者三。墩盡處，附岸者爲馬頭。馬二，因其舊者一。兩墩之間，通水者爲門，門十有四。水中伏地以負石者爲地牛，松木爲之，根千八百。有畸墩，高二丈四尺，石十有八層，順水直置者爲楣，楣石八百二十。截水橫置者爲鈎，鈎石倍三而又半。墩額承梁處，石橫出兩門，如階之級者爲挑，挑石三層，五百有八。直者亦爲楣，楣石二層，首六十有四。小石旁午於中者，不計焉。橫木墩上者爲梁，梁大徑二尺四寸。有畸門，置六梁，或八，計九十有六。梁之上承土及磚者爲棧道，爲枋五百四十二。棧道之上覆以亭，亭三十四間，楹一百四十有二，棟加楹之數，百六十有六，圓者百七十，扁者百三十有八。梁少棟之數，百七十，圓者七十，扁者六十八。桷千四百，有畸遮陽，百六十餘丈。小木如拱，如斗，如稅，如闌干之類，不計焉。瓦八萬六千，有畸甌三之一，磚十之一。亭盡於舊址，所至凡十有二門，下皆木梁，有棧道。不亭者四門，皆石梁，梁十有六。西岸之馬頭，後爲洪水衝齧，故鑿爲門，疏水勢也。石工鑿琢者、錯攻者、輦輓者、梯升者、鈔者、鑊者，凡六事，九十有八

人。木工斧斫者、錐鑿者、引繩墨者、操丈尺者、解鋸者、鏟者、鑽者、凡七事，四十有三人。隄工鍤者、舉者、木柵者、斃者，凡四事，二十有六人。力於勸募者，三十有六人：嘉禾鄉九人，得穀千二百斛，白金十斤；修德鄉十人，得粟六百斛，白金十八斤；唐安鄉九人，得粟四百斛，白金十五斤；歸德鄉八人，得粟八百斛，白金十六斤。銅錢、布帛，賈隸金數。外有舟人，每經穀斗積二百四十斛有奇，行客有錢積十有二貫。儼直：石工三十斤，食穀二千四百斛。木工三之一，隄工如之，鰲工三十之二。集事鬻材，落成勞賞之費，不計焉。是皆出諸父老之勤勞。而予先君子松庵居士泊柯歸樂先生，與知其簿。會沙門曰惠陽者，實經理之。始事成化乙酉十一月，成於辛卯六月，首末凡七年，沍寒溽暑，水滂休暇之日居半焉。夫橋利涉爾，山川形勝，未必以此，然宋時，吾邑衣冠文物甲閩中。是橋造極完壯，至後頽廢，浸以湮索。橋力亦不可誣，崇清公之。嘉定至今三百年餘，名籍功載猶有可考，故今得因其舊址而復之。異日視今，猶今視嘉定也。故書其事跡大都，并名氏於左方，以詔後之人。」

飛鳳山 勢如飛鳳。樂應巖在其右，云九仙奏樂，巖谷皆應。

走馬山 與石鼓山夾溪對峙。

羅山 在縣南五里。傅氏世居焉。黃巖孫志涅槃禪師指此山可居，得傅氏泉州左翼軍寨，遂與兩易爲護安院道場。識曰：「我居爾室，干戈永息。爾居我穴，衣冠不絕。」又曰：「三百年後異姓同光。」後林氏同居於此。今按左翼軍寨，晉江縣東湖上之東禪寺是其地也。

登科山 舊陳氏所居，科第世有。其相聯者，曰槐山。

蔣山 自洪山分脉而來，圓聳秀拔。

留仙山 距九仙山十里許。巔有石棋枰，天霧雨，或見仙人奕其上。其支曰南坡。

翹足山 自留仙分脉而來，狀如仙人翹足。其西麓有叢林高木，亦名喬木山。

洪山 舊經云：洪厓險峻，層巒洒異。何仙九人嘗陟其巔，輒有紫氣盤繞。又若聞絲竹聲。今天陰夜晦時，有大星出沒巖壑間。與相連者曰魁山，以邑人傳共首鄉薦名。

大尖、小尖山

崑崙山 在大溪南。其山二峰圓整秀拔。上有崑崙巖。舊有蟹井，蟹浮則雨，蟹隱則旱。

銅盤山 峰巒聳翠，遠望甚銳，其頂坦夷如盤。

鷄山 相傳昔有錦鷄飛集，時飲井泉。下有宋侍御王回墓。邑令樊泰之《重修祠記》：「先正御史王公，字景深。而嘉祐中有與公同姓名者，字深父，亦閩人。深父舉進士，主衛真縣簿，未一歲棄去。治平二年，朝廷以南頓縣事起之，而深父已沒矣。後八年，御史公始舉進士，以端方亮直聞天下。爲元祐諸公所知，而紹聖、元符用事者深嫉之。會鄒道卿以言事譴，公坐黨人，遂削官歸里。徽宗卽位，復召公入臺，故名在元祐黨籍者，御史公也。恭惟國家自祖宗涵養士氣，至於嘉祐之末、元祐之初，號爲君子道長，朝廷極盛之時，而吾閩人物益顯於世。矧有如二君子相先後，同姓名，出於其間。嗚呼盛哉！泰之昔嘗敬誦《陳後山文集》，因見御史公挽詩，頗以未及訪公出處之詳爲愧。及來試邑於此，則公之丘墓在焉，始獲拜公之祠於鷄山精舍。暇日，從其家得司諫吳公所述誌文，且訪其家世遺事，乃知公平生交友，皆一時剛正之士。如鄒道卿、陳了翁、田承君，爲尤厚善者。泰陵謀立劉后，道卿以諫臺屬公潤色其間，剴切之詞，皆公發也。迨公捐館，內相王明叟、舍人曾子開，偕諸公力請於上，官其一子。旣而，崇寧鉤黨之禍作，則

復奪其官。雖紹興舉褒贈之典，錄黨人之後，而家貧力弱，吏扼不行，士論至今冤之。泰之於是肅然起敬而言曰：士窮乃見節義，不容然後見君子。所居議論，孰不以名義自任？及一旦迫之以威，誘之以利，鮮不墮所守者。當紹聖黨與氣焰薰灼之時，公之鄉人，方與政使撓節從之，則富貴立致。公乃挺然如此，蓋可立愜夫於百世之下，其關世教，豈不大哉？祠宇蕪陋，不足揭虔妥靈，前人哀挽，揭於楹柱間者，往往漫滅。舊有萍齋先生所書《祠堂記》，歲月寢久，又失其傳。是用卽其故祠，重加葺治，仍取公墓誌，與鄒道卿墨蹟，名公詩文，刻爲二碑，置諸祠側，且叙其顛末，而刊之碑陰。雖未足發揚潛德之萬一，姑使後來有考焉。」祠立於紹興十六年，自靖康黨禁除，至是蓋二十一年矣。邑宰提舉陳公貫道實創爲之，真可爲向賢貴德君子也。陳公，諱致一，長樂人。陳謙謫御史王公高風直節，山斗爭峻，歷年浸遠，或靡聞其詳。紹興間，邑大夫陳侯貫道，爲立祠保福院，作文奠之，今六十餘年矣。復得令尹樊侯重葺祠宇，訪求《墓誌銘》及諸賢《哀》、《挽》，與鄒道卿傳，陳二待制手簡，鋟木傳布，將使公之名節，愈久愈彰，百世之下，聞風立懦。二侯，皆三山人，好尚相同，尤爲可書。

鷄子城山 山巔有城，故名城山。莫詳所起。舊經云：靈異非人力所爲。宋陳昭度《仙水第一源記》：「何氏兄弟經行於鷄子城。今荒煙斷壠耳。」

新峰山 頂平如掌，其高凌天。

金井欄山 上有巨石如井欄。

占重山 在紫澤觀之東。觀，唐建也。峰東一石，高可五仞，陡削玉立，名挂巾石，旁又一石，如獅石。山腰十餘石，則玲瓏相通，其一屹立數仞，修廣十餘丈，下凹爲室。左有飛泉注爲懸瀑，何九仙嘗游

焉。藥竈遺趾，尚亦宛然。又觀東有墩曰浮龜，上有居民，潦漲不沒。

九仙山 發脉永福，至此聳爲一峰。石穴湧泉，色白味甘，世傳何氏兄弟飲此得仙。下有仙水靈惠

廟，宋時士大夫謁夢於此，與九鯉湖並顯。東有仙跡石，南有高平山。

龜城山 分脉九仙而來，其形如龜。

玉几山

旗山 以形名。上多奇石，有石筍、石印、石鼓之狀。

高望山 在九仙西。峰巒高聳，可以遠眺。風日澄霽，海在目睫。巘口浮屠五層，塑五百羅漢，宋僧契行所造。契行，有勇足力，嘗暮投窮谷中，有盜爲虎躍而前，契行手格之，不覺呼痛，乃知盜也。夜止逆旅舍，舍中客踪跡詭異，契行作念，必其黨與，心防之。夜揭扃人，契行復格之，捉之官。官籍盜財，半與契行。契行辭不得，建浮屠焉。有二石，高數丈，稱筍石。南有雙髻山，北有仙人臺，亦以何仙得名。而其下爲何嶺矣。何嶺俗呼寒硯，又曰寒巖，又曰古荷城。世傳何仙過九仙山，居數日，乃踰是嶺而東入湖。宋陳謙大書「何嶺」二字，知縣陳嘉勒石。嶺路殊長，鮑居士建庵道側，鑿石引泉，與僧如月斲砌以濟行渴。里人陳符復捐財而階之。邑簿林正夫刻「仙泉井」三篆字其上。曰何巖，世又謂九仙之父，求子不得而死於此，而又曰九仙山、九鯉湖，總之名何巖也。東有石洞，可坐百餘人。又東有卓巖。皇朝宋文憲濂《人虎說》：「莆田壺山下，有路通海，販鬻者繇之。元至正丁未春，民衣虎皮，鍛利鐵爲爪牙，習其奮躍之態，絕類，乃出伏灌莽中，使偵者緣木而視，有負囊至者，則嘯以爲信虎。躍出，抗其吭殺之，或嚙其肉，爲噬嚙狀。裂其囊，拔物之尤者，餘封秘如故，示人弗疑。人競傳壺山下有虎，不食人，惟吮其血，且神

之。已而，民偶出，其婦守巖穴，聞木上嘯聲急，意必有重貨，乃蒙皮而搏之。婦質脆柔，販者得與抗，婦懼逸去，微見其跡，人也。歸謀諸鄰，譟逐之，抵穴獲金帛無算。」嗚呼！世之人虎，豈獨民也哉！因與契行事類，附載於此。

〔校記〕

〔一〕〔二〕「碧溪」，各本原作「碧溪」，據本書卷二十三及《八閩通志·地理》改。

〔三〕「留仙」，各本原作「留山」，據下文及《八閩通志·地理》改。

〔四〕「高嶺」，各本原作「高嶺」，據下文及《八閩通志·地理》改。

閩書卷之二十五

方域志

興化府 仙游縣二

山

牛嶺山 爲故縣主山。嶺口牛頭嶺。故縣治左，山如伏龜者，曰東山；如展誥者，曰龍山。故縣治前，狀如拜者，曰南鎮山，亦曰拜山。在故縣治西，則曰林洋山。宋蒲菴禪師居之，爲一邑佳致。

覆鼎山 在何巖北。與蓮花、石所、三山分峙而立。羊山、藍黛諸峰，牽映其下。有清溪、垂虹、水竹居人之境。下爲衡鐘山。

雙髻山 由覆鼎山頓伏西馳，突起兩峰，秀若抹黛，一名雙筆峰。

如蘭山

石所山 在縣東北六十里，何巖之東，紫帽之西。山高數千仞，盤踞百餘里。何巖居群峰最上頭，而此山復爲何巖上頭。其上石骨黝黑，一曰烏頭山，浮海者指此爲望。下有平坡十餘里，清麗秀絕。宋董公偃隱居於此。陳聘君易嘗題其軒壁曰：「安知石所洞中人，不是武陵溪上客？」公偃，字公易，大觀

中，以八行舉不應，嘗作靜和軒於家鄉。大夫林逋贈之詩曰：「寂寂峰巒千古意，溶溶花木一家春。」高風雅韻，良足尚也。其後知錄黃鐘建書堂其麓。林光朝目爲小武夷。其頂又有石，可坐百人，曰雲居巖，鄭夾漈書院在焉。元世祖有御書「夾漈書院」，訓導黃哲記之。有石池，清泉，棋局，馬跡，及石上篆字百餘，如以錐畫地，作龍蛇狀，皆不可讀。其石池，云可畜鱉魚。近山十餘巖，（一）若滴水巖、鳴山巖、臨溪巖、極樂巖、善果巖、雲霄巖、樂應巖，皆秀麗可愛，錯峙其間。鳴山巖，卽鳴峰山。善果巖，頂有石如笏，上有牛蹄井，奇跡也。黃鐘《何巖風土記》曰：「余閱天下佳山水多矣，未有如鯉湖、石所者。」

紫帽山 在石所山左，峭壁削成。麥斜巖在其下矣。是巖巨石錯峙，如鐵衣壯士橐鞬儼立。又有卧石縱橫，上聯下洞。宋僧自永結庵於此。自永宴坐，嘗有龍見木杪，誦經不輟，久之復出山澗，爪甲著石有聲，自永誦自如。他日荷汲歸，虎蹶而飲其水，亦復自如。後元林樵谷壁卿築隱焉。壁卿，忠義霆之玄孫，明《易》推星，配象演義，學者稱節隱先生。元世祖欲授以美官，壁卿曰：「家世金紫，一門四忠義。父光世，被遇宋朝，涓埃莫報。」力抗固辭。世祖重之，授妙應道濟真人，許歸巖中，遂封是山爲「萬安禪顏」。以樵谷，人又名山「樵谷」矣。巖後石龕，壁卿修真處也。上有玉泉巖、玄帝閣、佛王宮。群山環拱，如龍如馬，如屏如綺帶，鉅如斷鰲，幻如結廬。莆人謂鯉湖勝以水，麥斜勝以山。巖東里許，有滴水巖。陡削壁立，水涓涓下。前爲石穴，口狹甚，而傾如建瓴。好事者秉燭蛇行以入，屈曲十餘丈。皇朝御史李元陽詩：「雁堂金刹人青冥，樵谷山如綠玉屏。谷轉到門翻失寺，石欹無徑但聞經。」

玳瑁山 在石所山南。下爲龜臺岡，西峙爲瞻山，奇秀特立。

谷目山 在何巖西。爽然而高，與飛鳳相望，又名高陽山也。崇林蓊菁，居人斷木識出入，故曰谷

日。黃定齋謂谷娟秀清明，如人之有眼目，後人訛爲「啄木」。

盤龍山 高並飛鳳，石嵯峨下趨，可當一潦。

銀巖山 又名白巖。奇石生崖間，礪砢玲瓏，其色黃白，質不甚堅，鑿之可以植菖蒲。南有蓮花山，奇秀參差，數峰可愛。

蛇灣城山 俗號越王城。

小巖山 由石門而入，中有石屏、石鏡、石龜、石鼓諸勝。

石犬山 上有石如伏犬，下有五峰寺。

石屏山

尋陽山 有大山自西北來，峙爲三峰。中大雪，北仙臺，西香爐，極爲雄偉。左右環列鷄髻巖、雲頂巖，巖頂正旦有紫霧見者，豐年兆也。紅袍山、笏山、筆架山、烽火山、大象山、鷲峰巖、蓮花峰。循南而東，有石龜巖、龍鬚巖、銀頂峰。雲頂巖，亦名雲頂峰，巖有石室十餘處，舊傳隱者棲息於此，名舊隱。旁有化蟒巖、釣月灣、聞猿洞、眠雲閣，有石並峙，對望如閣。鷲峰巖，巖有石竇，鷲冬蟄焉。其形如橋，春乃飛颺。蓮花峰，下有龍潭。銀頂峰，峯然而高。陳昭度《西軒賦》：「西澗之水，懸流二千尺，發源銀頂峰也。」又有潦坑巖，巖前有鄭隱書堂，面挹其秀。山下有王將軍廟，王將軍與游洋盜戰，死於此，里人廟之。

九十九朝山 山自虎頭山分脉，至此九十有九。

瓊山 上有石盤十餘丈，瑩潔，可坐數百人。

白馬山

東山 在縣東四十里，沙溪橋東。

銅鼎山 形如覆鼎，其旁有耳山。山勢雄壯，與垂簾掛幕之山相並。

柳峰山 自東南望，其形如帽；正南望之，其尖如筆。欲雨則雲蓋其頂，鄉人以爲雨候。

紫幙山 峰秀煙凝，如紫幙然。

牛歌亭山 狀如卧牛。

九龍山 山分九支，與銅鼎山對峙。

歸縣山 森聳翠黛，石峭泉清，旱禱多應。

照船山 登巔睇遠，可見海船。

五谷山

鴻漸山 山色秀麗，是生人材，其名鴻漸，蓋取漸達之意。

雲峰山

牛山 下有清溪交流。又名清澤山。

塔斗山 上有塔。塔前書院口會心三峰，朱文公所建。其後亭曰摘斗，一名螺峰。

孔方山

錦屏山 下爲楓亭市。市北有楓亭驛。所以名亭爲「楓」者，舊傳何氏九仙，結楓爲亭，而處其上。

文筆峰 一名石竹峰。唐末有郭呂者，通經解。學士林推伏隱此峰之下，沒而里人祀之爲神。呂有

仲子，沒亦爲神。元皇慶間，以禱雨有應，立廟峰下。

南湖巖 在何巖西。峰巒聳秀，下瞰平湖。宋時，有需禪師與陳聘君易皆嘗棲此。有需，莆人，卽何巖創萬安院，就南湖墾田，養徒百人。邵使陳覺民聞其名，延住福州鼓山，繼住雷峰。有《註錄》行世。《續傳燈錄》所謂「高田有需禪師」是也。易，字體常，故縣人，該綜經史，工五七言詩。熙寧初，游京師應舉，尋棄去。聞江西有太師應乾者，特往詣之。應朝曰：「可歸見需，無留也。」易歸而與需偕隱。需去，之南湖卓庵，易獨留，寄炊於山下香泉寺。日飯一盂而已，遇風雨溪漲，卽孟飯亦却，或旬浹不食，如是者五十年。崇寧初，舉遺逸，又舉八行。郡守郭重禮聘之，易謝牋曰：「早粗修於八行，晚但了於一心。心既本無，行亦何有？」易嘗傳《易》學於仙游張弼，自謂有得於五行、鑿卜、地理之術。善筆札，作字精謹。平生無忤視妄言，教人本孝弟，其接朋友，或終日不交一談，或爲語莊老大意，或時論古今，至亹亹不倦。需嘗詒易詩：「拂石趺趺樹影寬，定回霜月照人寒。此時况味誰知得？寫與秋藤居士看。」易答：「年來多病愛棲禪，寶鑑慵將照醜妍。却憶南湖孤頂月，定回金磬落巖前。」

北山巖 在縣東北七十五里。上有石室，可坐百人。初，泉源不通，一夕雷裂其石，泉遂迸瀦。

羅漢巖 在何嶺東。其南有古蘭若。唐昭宗賜額曰龍紀。宋紹興中，主僧慈信鑿池種蓮，結亭其上。知縣丘鐸榜曰蓮社。與鄭夾漈樵俱有記。

蔡溪巖 故縣西福興里。陳聘君易舊隱也。九座僧智廣嘗憩此。居人見菜流出溪，目爲菜溪。及蔡卽中樞從聘君游，因改蔡溪。巖前有石，如雙闕，曰石門。高三十餘丈，廣四。之折而北，洪崖峭壁，突突摩雲。飛瀑直瀉下，瀑盡處，爲龍潭。又流爲溪澗，是蔡溪矣。階石門而上，有巽堂，有良軒，瀑布當軒。

而下。有幻游洞，塢曰藏真，石曰眠雲。皆聘君所构也。巖水匯洞前，聲如雷轟，瀦而爲湖。竹松交翠，木之大者，且以百圍。聘君居處，左有象玉峰、普陀巖，右有羅漢洞。禪師有需結草庵與之偕。其後，釋從登者，亦繼隱此。從登，懷安人，周姓。通經敏文，兼工草隸。脣舌如風，氣格雄放。陳聘君、蔡郎中邀與同隱云。聘君《石門草庵歌》：「吾結草庵蔡溪側，四顧峰巒皆削壁。石門千仞鎖天津，來者欲登那措足。住此庵中是何緣，不詩不頌亦不禪。饑來苦益和根煮，疊石爲床困即眠。」

北坑巖 在縣南。巖石周環如城。元末鄉人來此避寇，呼其地爲「無煩惱」。

石獅嶺 白隔嶺 梯雲嶺

歸仙嶺 舊名孤單嶺。《海錄碎事》曰：嶺不連諸山，爲孤峰。唐陳乘、陳光義世居其下。仙游登第自乘始，而光義繼之。邑人榮其還鄉，故以「歸仙」名嶺。

石碑嶺 有石屹立如碑，恍惚鳥跡篆文。

新嶺 陽山嶺 洋陶嶺 磨石嶺 辜嶺 白馬嶺 高危嶺 長嶺 馬嶺

靈源洞 洞前石高數丈，頂平。上有井，深尺餘，大旱不竭。相傳女仙馬氏，遺銅鑪其上。

川

可溪 在縣南。源出香山潘巖，北流入於仙溪。元寶祐二年，有湧錢之異。錢鑄自開元，背有「閩」字，或「福」字。

九溪 在縣南十里。弘治志作「九重溪」。水繞香山九曲，北通仙溪。

周溪 在縣南十里。繞昭靈、龍井，下接仙溪。

蔣溪 在龍華寺前。源自金沙九溪而來，蔣氏居之。

中岳溪 發源梁山之陰，逕大圳溪，東流六里，與會仙溪合。

文殊溪。

三會溪 在縣西十五里。其源一自白隔嶺，東過古瀨溪；一自金華嶺、東山溪，合大目溪，入石壁潭，南過古文殊橋，與古瀨溪會而爲三。萍齋林彖有《三會閑行詩》：「風搖隴麥東西浪，春入郊原遠近花。閑趁溪流到村曲，斷垣喬木兩三家。」其二：「溪上橫岡一道斜，成行鴛鴦落平沙。竹籬茅舍林中見，髣髴孤山處士家。」

大濟溪 在縣西十里。源自九座飛丘，合衆流東南行，入三會溪。

神堂溪 在縣西七里。源自富洋山。

余溪 源出永春縣。流入大目溪，旁有余姓居之。

大目溪 在縣西四十里。舊有神僧大目居之。溪水歲旱不竭。

安吉溪 在縣東十五里。源出九座之龍湫。東南行四十里，爲碧溪。又五里爲清光潭，又五里爲龍擊溪。

昆溪 在縣東十五里。源出安吉溪，歷碧溪、清光潭，出仙水橋南，而爲西林溪，以入大溪。

仙溪 縣前大溪，一名南溪。又名藍溪。橫界縣中，首起西北，受永春、德化諸水。東南行至縣前，環繞如帶，東過青龍橋，歷石馬俞潭，出瀨溪，以入於海。南北溪水皆會，溪橋之上有羅漢墩。

坤溪 在縣東南二里。其源一自早洋坤村，鷺峰、崇福院坑出，合湖嶺下水，與周澤溪、東溪會於石

碑新橋。一自白石山，北流過拱橋東，合建安橋，出坤口，入青龍橋，會於楓亭溪。宋志昆溪卽坤溪也。

三坑橋溪 在縣東。源出富洋山，出瀑布、龍潭、水磨坑而來。

碧溪 在縣東。源出安吉溪。

龍擊溪 在縣東。流自碧溪，而下入於蔣溪。

興角溪 在故縣西。源出東山，下接郭洋溪，踰尋洋，達大樟溪。溪有夫人潭，昔東甌吳氏女，善爲巫步，嘗布席水上禁潭。

游洋溪 在故縣西。源出上院山，與郭洋、銀巖溪合流，至洙溪，與尋洋水會爲虺潭，又與上姑水會，達於龜嶺溪，□大樟，三以入於海。

郭洋溪 在故縣西北。發源雲頂峰，下接游洋溪。

白洋溪 在故縣北。發源石屏山，下接尋洋。

石馬溪 在故縣北。發源銀巖山，下接小姑，繫龜嶺，沿江達海。

尋陽溪

新溪 在縣南。自阮莊直抵雙溪，首尾二十餘里。積石院塞。皇朝成化中，舉人阮韜募鑿以便人。

清澤溪 一自鍾潭、龍潭，流至北坑口，與北坑水會，繞牛山之陰。一自鐵鼎岡發源，繞牛山之陽。

楓亭溪 在縣東南四十五里。發源縣南皂洋靈感院前，合吳坑水，由王坂下洪而東，爲九龍溪。與赤湖、蕉溪之水合，自新嶺南，東流入沙溪，與泉水合。出雙溪口，入太平港。港有《溪海會流石刻》，蔡君謨書也。中有烏石，石有居人跡。港北人煙繁庶，港南陳洪進故居在焉。皇朝林慶亨《螺江風物賦序》：

「極莆陽而南，地爲楓亭，與溫陵之北界相接。山爲青螺，與溪海之地脈相通。水自赤水而東，匯於螺峰之下，與沙坂之人家相爲環繞。其人與物之所出，非他處所比也。」

沙溪 在縣東南四十里。溪旁人煙稠密，號沙溪市。

雙溪港 在縣東南四十五里，太平港之北，海潮至此。

南湖 邑人鄭紀記：「邑治，在蜚山之南。其南，爲學宮。蜚山西原，有水混然出里許，匯爲大澤，以在邑治西，名曰西湖。餘波南流，繞學宮之南，東注迎仙館，潏洄如之，以在邑治東，名曰東湖。學宮之南，西湖東注所經者，其環如帶，名環水湖。中多植芙蕖。有宋盛時，衣冠故老休致林下者，每夏月，買舟載酒，游泛其中。香風交接，仙溪一奇觀也。自元以來，環水決而南注，二湖水涸，始不相通。居民因侵爲田。皇朝天順間，邑教諭泰和歐陽潘，考邑志，謀父老築堤，決隙障餘，注水環流如故。蓋取土則地竄，隄高則水深。舊之如帶者，今皆沮洳，因改今名，請紀記之。」

西湖 東湖

九鯉湖 在縣東北，故興化縣西南，去郡城七十里。高陽扈後，飛鳳峙前。白水福萬山而下，以百餘里，雖有疇畝，並在高原之上，忽至此山，石硤天開，懸崖無際。數百里之水，來入石竅、石穴之中，注爲石湖。湖水日夜從高墜下，巖石嶮巖龍蟠，水流噴激洞心，駭目春夏之際，其觀尤偉，故仙人樂居之。湖上祀何九仙焉。九仙，已見福州九仙山。宋陳藻記：仙擇山而游，山因仙而號。先哲制字，以「人入山」曰仙。仙所擇之宅，信天下名山也。然天下洞山福地不多，名山獨閩東南、莆西北二山，以廬江九伯仲而名，是必神仙多集，乃可名「仙」耶？九何，家臨川，宦淮南，續跡閩山，而仙莆陽。凡有山水曰仙，曰「何」

者，相傳何仙曾憩息於此，隱於此。山有仙則名，諒乎！想是時上有建元天子之樂求，下有淮南邦君之招致，關洛之區，無非名山可宅也，何不厭甌越攻擊之俗，乃由淮左而江南，由江南而閩中，意誠識閩地異日爲禮樂衣冠之鄉，故入閩而游歟？越山之陽，其勝地可止也。何友愛莆中溪山之奇，乃由高蓋而鷄城，由鷄城而何巖、仙水，意預知于山。于山，福州九仙山也。異日邇關閩塵囂之境，故擇莆而隱歟？方爲地游仙也，倚山爲室，結楓爲亭，飲水煮藥，枕月眠雲，時奕而棋，時煉而丹。往往游行之所，皆有遺跡：經閩山，則俱存之跡八也；人莆中，則所歷之地十也；隱於仙山，不惟有奇跡八，而環山東西，與山南侯坂，各有奇跡十；憩於鯉湖，不惟有奇蹟十，而考湖之山與何巖之地，各有舊蹟四。至如長壽雲有詠，與夫預章之奉新，溫陵之德化，各有仙山，果何氏所歷耶？抑名號所同耶？彼臨江，以蕭、杜等仙而名九仙臺、梓潼，以馮龐九女而立九仙觀；諸郡間有九仙名，獨莆因何「仙」名縣。唐朝縣千五百七十有三，名「仙」者僅三。至皇朝景德中，又改「永安」而「仙居」。夫永安因括蒼山名縣，而括蒼弗得以仙名其山。故大小洞天三十六，名「仙」者一，而縉雲之仙都，不可以名郡。福郡七十二，名「仙」者三，而天台之仙源，永嘉之仙窟，不可以名縣。惟福以「三山」名郡，莆以「仙游」名縣，並因九仙，「仙」郡「仙」邑之稱，莆、福宜副其名矣。然既山曰仙山，湖曰仙湖，溪曰仙水，縣曰仙游，反不列四九八九之班，何耶？金華楊氏《洞天記》謂：中國洞天，不載名籍，尚多有之。蓋山川之隱煥，數也，亦人也。黃錄《游記》：「予游湖上盡日，湖廣不數步，水淵以深，風微日和，黝然澗然，有如明鏡。風或北來，草木俱靡，忽焉殷殷轟轟，有如千雷萬霆，發於巖竇之下，使人愕然自失。起而視之，白浪排空，飛流濺雪，落數百丈之外。又如錢塘八月之潮，衝山掠岸，不可遏止。其雄也如是！歸宿湖陽，明日遵微徑，止西山觀。所謂石牆者，高及肩，下臨無地。還北

山，坐湖光亭中。由亭而東，大牆石可坐百餘人，其石有穴，凡數十，其大如輪，如斗，如盆，如罍；其小者，僅一二寸，或不能寸，皆不可測。試之以篙，而續之以千尺之綆，未有知其修者。有竈焉，斯石之竈也，水流其中，出其旁，入於湖。吾不知昔之煉丹者於此否也。湖北爲黃鷄灘，南爲茶槽潭，湖水東南行，被崖而下，爲瀑布，而潭，而平，又繞山而行，不知其幾曲，而爲莒溪，爲壽水，其終入於海。此其大略也。」湖有九漈：曰雷轟，曰瀑布，曰珠簾，曰玉筋，曰石門，曰五星，曰飛鳳，曰棋盤，曰將軍。雷轟漈，在湖東，水自何巖下注爲潭，潭瀉漂渾，如聞帝鼓。漈右有石名蓬萊，鄭尚書紀表爲第一。蓬萊湖東畔，有龍漈，石紋縱橫若鱗，復呼龍鼻石，以如龍鼻障急流也。兩傍俱有巨石，其東爲丹竈，有石如砥，廣可四丈，修可三之。水漫石上，溶溶下於雷轟。石竈大小不啻百餘，細孔如箕，大穴如池。竈脉暗道，紆迴相維。黃錄《記》所謂垂千尺之綆，而未知其修者也。左有巨人跡。漈東爲黃鷄灘，亂石縱橫，水自石罅中出。春夏有聲，雷轟之亞也。去黃鷄灘十步許，有茶潭，一名藥潭。其深數丈，澄泓可玩。黃鷄灘，東爲石床，廣可八尺，修可三之，高可六尺許。四面削成，怪石參差擁其側，水彭彭出石罅中。高阜處，有石如酒尊，有石覆之如蓋。人謂仙人飲酒，醉卧此床矣。湖西則有古梅洞。梅洞北有萬年石。石刻「天子萬年」，宋陳謙所書也。其前有鼓石，其下有仙泉，其西有將軍石，又有道家蓬萊石、玄珠石。云湖水溢，則玄珠石與俱浮。瀑布漈在雷轟西，相距五十步。遵龍漈石而下，如澡練。珠簾漈，自瀑布漈洄而下，約五百步，兩石峽夾出一崖，懸可千仞，泉噴飛如散珠稍下，如縷如綴，餘霏四散，激爲煙霧。崖高蔽日，或晴霽當午，乃日映水花，五色如虹。壑底喬樹森鬱，泉飛出其上，參知太倉王世懋書勒曰：「九漈中最奇處。」參知詩：「春深白雪驕常在，天倒銀河潏自流」，模寫殊稱。玉筋漈，水自湖外盤龍山灌頂岐流，循崖而下，如飄玉

堆埼礫硯，息趾無地，里許處，乃有石如砥，可坐數百人，盤龍山石當其前，崔嵬萬仞。折而西，復有巖，數石憑藉其中，虛可容數十人。石門濤，湖之第五濤也。濤至是返望，雷轟如吼。天門濤，石參差，獨二石谿衍疎豁，亭亭而上，故名石門。五星，距石門二里許，須蹇裝過濤，左從鳥道偃僂進，濤中石不乏，獨錯落如星者五。皇朝慎蒙記：「鯉湖有丹竈三，水光射人如三星然，此仙家水煉法。」飛鳳濤，以飛鳳山名。所謂「飛鳳峙前」者也。其高百仞，濤水繁回，飛鳥不至，聲響俱絕。下有石，名觀音龜。龜外石罅如天窗，可坐十餘人。其前爲潭，水自龜上過，特嶮絕。棋盤濤，距飛鳳里許，濤中卧一石，方廣數丈，宛棋盤也。風雨中或聞敲棋聲。將軍濤，濤窮矣。有兩石當關，如將軍然。此濤去湖二十里，亂石擁塞，崖谷相懸。窮日之力，乃可一至。然不能遵故道還，從苕溪出矣。何氏九仙，相傳來時自三山，卽石竹鼓山，居之月餘，復游於莆，飲龍津廟井，九人目瞽，惟長者明一目。既飲井水，九瞽盡開。廟中有胡道士者，謂之曰：「子名已登仙籍矣。當尋鷄子往往。」九人西行六十里，結楓爲亭，而處其上。已過九仙山，經鷄子城，飲其泉卽飄飄欲冲舉。或謂巔之東大有佳處，遂踰嶺入湖，結廬以居。時有隨九仙行者，至是辭去。則包飯與之，食畢至家，包中餘飯，皆真珠也。九人於是日煉藥湖中，丹成，九鯉化龍，白日乘之昇天。後其父携媼與女，渡江入閩，以覓九子，抵湖則已仙去矣，遂偕隱茲山，而以四女妻人，尋沒，遺銅環、鐵鞭、香爐山中。未幾，飛於溪南磐石上，雖洪水推激不去。後又飛於溪北林木上，鳥雀翔鳴環繞以萬計。里人神之，卽地作宮，中奉翁媼，九仙侍焉。九仙之旁，祀一神者，峨冠朱衣，面色殷黝，凡有祈請，必用白鷄血塗其口者，范侯也。羽衣星冠，坐於侯側者，淮南王也。又一神者，沈祖師也。范侯一謂何氏婿，一謂故仕爲尚書，貴豪於鄉。九仙初至時，范左右之，一日，私啖其所煉丹，腹脹欲死，九仙取白鷄血解之，乃

甦，而面殷黝矣。九仙現夢最靈。四方求者，焚牒通意，必先叩范侯，若尊者不敢徑達，求侯介紹然。沈祖師，不知何代人，相傳號江南懷術真人開山祖也。湖上有九仙宮矣，宋時又有靈顯祠，以祀龍神。蓋郡守朱端學祈雨此湖，有見龍之祥，歲以大稔，故祠祀之。凡仙夢之靈，著其尤異者於左，以擬太史公傳淳於意，褚先生述龜策云。宋陳僕射俊卿，布衣時夢功名事，仙人謂曰：「在黃公渡口。」陳過黃公度語之，黃曰：「我狀元，汝榜眼。」陳曰：「君何尊己而卑人？」黃曰：「夫然則狀元爾，榜眼我。」紹興八年，黃狀元，陳果榜眼矣。及謁御，高宗問曰：「鄉土何奇，輒生二卿？」黃對曰：「子魚、紫菜、荔枝、蠣蜆。」陳對曰：「地瘦栽松柏，家貧子讀書。」高宗問曰：「公不如卿。」即改陳狀元云。皇朝吳中太僕都穆玄敬，其父謁夢，夢一叟謂云：「爾子功名在何處？」都父子望絕矣。玄敬故流品蘊藉，吳文定寬延之西塾。玄敬爲文贈文定，文定喜之，以掛堂壁。有何中丞者過，讀而奇之，文定曰：「此吾塾師。」中丞遂以語督學，屢推轂之。已，成進士，官至太僕。江西舒修撰芬，孝廉時詣祠謁夢，五宿無有，題壁問去，曰：「千里尋真意自虔，五宵無夢竟無緣。神仙不識人間事，歸去揮毫作狀元。」至莒溪，假寐中，夢一叟酬之曰：「千里尋真未作虔，五宵無夢豈無緣？神仙不洩人間事，歸去揮毫作狀元。」吳唐寅伯虎謁夢，夢仙人贈墨一，肩已發鮮被黜，書畫著名。嘉興一郡守未子，莆人黃獻可者爲其屬令，守轉求其弟爲之祈子，夢有二僧揪髮相格，既反命，守嘆曰：「和尚何髮可揪？毋嘲我乎！」啣之。郡故有二僧犯法，守故置不問，久繫之。而僧髮已長矣。當其繫時，守姬已有身。忽一日，二僧開獄中，獄卒告守，守呼出之，至庭下猶揪髮不相放，方怒，欲杖之，廨中報姬得雄，守大喜。罷，乃悟黃令之非嘲也。福州守賀霖當來福時，別內舍，內舍時方娠，謂曰：「生子耶，名福清，女耶名福寧。」既至，請其同年代爲祈子，夢有冕者厲色言曰：「謂福寧耶，固

福清也。」以告賀，賀愕然曰：「衽席之言，神何自知？」已，子矣。南安傅行人凱，方使夷域，謁夢問出使事，有孺子歌曰：「青草流沙六六灣」，默識之。比至，夷王設讌請曰：「小國有一對語，請天使屬之。」曰：「黃河躍浪三三曲。」傅郎舉夢語應聲，夷王驚服久之。蓋中國黃河九曲，而夷域有流沙三十六灣。

彼自謂知吾華之勝，而吾乃悉彼疆界之詳，兩用是悚警。正德己卯歲，宸濠亂起，林貞肅、鄭司馬相與憂形於色，莆人王鑑請齋沐祈靈，才入榻，即夢身立高丘上，尿直下，見宅中天井平列數竿，又見一婦人捧腹來，若患疽疥狀。醒而自念平居持謹，是夢胡爲者，因舉質二公。貞肅訢然曰：「濠旦夕定矣。君，王姓，莆人以尿爲『輪』，高丘溺下，王輪到底矣。天井四方平列竹竿，干戈偃息，四方昇平象也。婦人患疽疥，陰人內潰，宜豎流血徵也。第需之。」不浹旬，濠敗。唐秘書陳乘詩：「洞莓黏屐重，崖雪濺衣輕。窟宅分三島，煙霞接五城。」正字徐寅詩：「鐵障有樓羅欲墜，石門無鎖路還迷。湖頭鯉去轟雷在，樹杪猿啼落日低。」皇朝吏部鄭善夫詩：「湖光亭上日如年，湖光亭下春可憐。雲芽石齒無數好，水瀑珠簾相與懸。」長洲劉鳳詩：「谷館郎玄棲，潛瀟漱丹液。潛似沉疴去，恍如塵霧釋。高吟入重漢，進水下千尺。泫泫幕輕綃，霏霏濺驚石，紛疑散璫藥，淨可正琳壁。方伯趙維垣，詩珠簾不捲。四時雨玉柱，常撐半壁天。」皇甫濂詩：「夕投藥珠宿，旦啟亦源歷。幽谷夾瑤林，飛簷掛倉壁。玉沫揚清風，晶簾薄華日。響奔白雪濤，滄落素練匹。」

何巖水 水源有三：一自谷目溪，發源銀頂峰，歷碧溪，逕駕仙橋，與衆水合，出瀨溪，匯於木蘭陂，以入於海。一自楊梅溪，發源溫山，至龜臺岡，西北與大陂、火洋二溪合。其大陂溪發源石所，火洋溪發源谷目口，皆與楊梅溪合，東南流，瀦於鯉湖，下莒溪爲壽水，以入於海。一自蓮花峰，發源逕蕭橋，出白

馬嶺，下與長嶺小溪合，逕龍津、龍汲、去思三橋，爲壽水，以入於海。

小姑水 源出永福縣白寶山，沿姑溪，北繫上姑，會於龜嶺。

龍岡濤 上有潭，其口如甕，中廣，水清俯視，潭半有一口，如疊甕然，俗呼「重潭」。水出潭底，下流爲濤，其勢甚高。下有石洞，其口盈尺，深如重潭。

仙人濤 源出烽山下。

白虹濤 界晉江。已見晉江。

黃龍坑 在故縣西北。水出峽間，潄爲一潭，黝然而深。舊志云：「一夕晦冥，有龍自東濤飛入，旱禱有應。」

鐘潭 在鐵鼎岡之背。相傳有大鐘飛入，陰雨有聲。

龍潭 在縣南吳坑山下。

皂洋龍潭

天柱溫泉

湯泉 在故縣西。大溪蟠石中，有兩三穴如井，泉出如湯。

雙林溫泉

聖泉 在縣南七里平坂上。一名龍井。旁有昭靈祠，春作致祭，泉注足田，可不虞歲。

東井 在石碑、東溪二嶺間。溪中有石窪，廣數尺，其水深綠，旁有膝足跡、鞭跡，宋志作「張趙井」，謂張趙跪飲於此。

義井

〔校記〕

〔一〕「廢」字，各本原脫，據文義補。

〔二〕「應乾」，下文作「應朝」。

〔三〕「大樟」上，各本原闕一字。

閩書卷之二十六

方域志

邵武府 邵武縣一〔一〕

邵武府 在布政司西北六百七十里。東抵順昌，西抵江西新城，南抵寧化，北抵江西鉛山。三國吳永安三年，立建安郡，始升昭武鎮爲縣，又析建安校鄉西偏地，置綏安縣，皆屬焉。晉安祿元年，〔二〕改昭武爲邵武。大寧元年，又改爲邵陽。一作武陽。義熙元年，改綏安爲綏城。劉宋永初元年，復改邵陽爲邵武。隋開皇九年，郡廢，縣亦隨廢，屬泉州。十二年，以故邵武、綏城二縣地，復置邵武縣，屬撫州。〔隋書〕謂開皇十一年，置邵武縣，〔天文·分野〕謂十一年置。本志謂十二年置。又〔隋書〕謂：綏城縣地，併入龍溪。本志謂併屬撫州，俱未詳。唐武德四年，卽建安郡地置建州，復析邵武縣地，置綏城縣以屬。貞觀三年，省綏城入邵武。嗣聖五年，析邵武及綏城地，置將樂縣。〔唐書〕如此，而本志謂是年復置綏城縣，未詳。唐末爲王氏所據，五代晉天福初，復爲邵武。開運二年，南唐滅王氏，有其地，尋復改爲邵武。復又升歸化場爲歸化縣，升永安場爲建寧縣，俱屬建州。宋太平興國三年，始置邵武軍，本志及〔建寧府志〕俱作四年，〔宋史〕作五年，〔通志〕作三年。割建州之歸化、建寧二縣來屬，治邵武。六年，又析邵武之財演鎮，置光澤縣，並隸焉。本志作五年，〔文獻通考〕、〔宋史〕俱

作六年，今從之。屬福建路。元至元十三年，改爲邵武路，隸福建行中書省。其後改隸不一，詳見布政司下。領司一，曰錄事司。縣四：曰邵武，曰光澤，曰泰寧，曰建寧。十四年，升邵武路總管府。至正二十二年，陳有定據。皇朝改爲府，領縣仍舊。

甌閩西戶，七聚上頭，左劍右盱，枕汀帶劍。杉關、鐵牛控其西，石岐、水口扼其東，梅口、西安阻其南，金山、珠寮障其北。猊踞龍盤，前跨後帶。其形勝也。

邵武縣 東抵順昌，西抵光澤，南抵泰寧，北抵建陽，沿革見上。其鄉上下十、隅四、都五十三，統圖百又七十。(三)

東隅，圖二。

西隅，圖二。

南隅，圖三。

北隅，圖一。

永城上鄉

四十八都，圖六。 山曰五馬。

四十七都，圖五。 山曰白堊。

四十五都，圖二。 山曰白鶴。

四十六都，圖四。 山曰紫雲、潭山。

四十三都，圖二。山曰獅子。

四十四都，圖三。山口雲錦。

永城下鄉

二十九都，圖五。山口壽山、星山、祥雲、紗籠。嶺曰磨石。

三十都，圖三。

二十八都，圖三。山口浮潭。溪曰鶴沖、黃溪、銅青。

三十一都，圖二。山口高蟠。

二十七都，圖三。嶺曰天湖。溪曰芹溪。

三十二都，圖四。山曰道峰。

仁澤上鄉

五十都，圖四。山曰印山、西乾、龍湖。溪曰三澗。

六都，圖四。山曰楊源、四角。

四十九都，圖三。山曰錦障、黃栢、天馬。

五十一都，圖三。山曰旗山、鼓山。嶺曰望州。溪曰義溪。

五十二都，圖二。山曰丫頭、金山。

仁澤下鄉

五十三都，圖七。溪曰藥村。

一都，圖四。山曰文筆、旱山、泉山。峰曰玉龍。

二都，圖二。山曰仙亭、吳三郎。

三都，圖三。山曰官塔。

四都，圖三。山曰白鹿、青雲。

五都，圖四。山曰鷄籠、鷄鳴、壺山。

富陽上鄉

七都，圖三。

八都，圖四。峰曰石人、興元。

九都，圖三。山曰五臺。

十都，圖二。山曰龍山。峰曰合掌。嶺曰吳師。

十一都，圖三。峰曰天筆。

富陽下鄉

十二都，圖三。山曰龍鬚。嶺曰朝天、牛輓。(四)

十三都，圖二。

十四都，圖二。

二十一都，圖二。山曰南午、北厓。溪曰密溪。

二十二都，圖四。山曰清涼、天池。嶺曰五通。溪曰大拿。

仁榮上鄉

二十都，圖三。

二十三都，圖二。山曰凌雲。

二十四都，圖二。

二十五都，圖二。山曰鵲峰。溪曰大竹。

二十六都，圖二。山曰雲巖。嶺曰僉嶺。

仁榮下鄉

十五都，圖四。山曰白水。峰曰金子。(五)溪曰下黃、繡溪。

十六都，圖二。山曰蓮花。(六)九臺。

十七都，圖二。山曰寶山、東山。

十八都，圖二。山曰福山、七臺、觀音、龜山。溪曰桃溪。

十九都，圖三。

書錦上鄉

三十七都，圖二。

三十八都，圖二。山曰翠雲。

四十都，圖二。山曰麻姑。

四十一都，圖二。山曰象牙。嶺曰桃花。

四十二都，圖二。山曰官尖。溪曰官坊。

畫錦下鄉

三十三都，圖四。溪曰三溪。井曰古井。

三十四都，圖二。溪曰泰和。

三十五都，圖二。山曰殊山、小殊山、涼傘。巖口會舉。溪曰將石。

三十六都，圖二。巖口桃花。

三十九都，圖二。山口潮魚。嶺口飛猿。

山

登高山 自潮魚、白鶴，岡巒連屬，迤邐至此，一峰特聳。宋時，在郡城內，至和中，張師忠建熙春臺，左臨大溪，遠挹群山。循臺而北，有磯可釣。治平初，守吳夢得搜林展櫛，花木名列，爲郡壯觀。景定中，守方澄孫詩：「山占樵城最上頭，眼前歷歷記曾游。古來不少二千石，海內今誰第一流？」皇朝弘治中，守夏英建醒翁亭於臺南，林貞肅俊爲記：「昭武群山之圍，而登高最高。升其巔以瞰城郭，則公宇雲連，人居鱗次，溪山環合，斗折於其下，瀑響天墮，林綠地浮，舟帆上下於轟雷噴雪，削丹叢翠之間，轉息而煙霏萬態，海日蒼涼，桑影直射。郡之勝，曰熙春、朝陽者，是山也。吾友夏公育才，先守延劍，哀然廉直幹濟之聲，載移是郡，則旣鼓而桴之矣。久之，人以安公，公亦樂而安於守也。結亭夷處，與僚寮陸君懋昭、陽君元用、朱君奎文，覽民俗而參公政，間携酒約客，公固不廢飲，亦不流飲，飲無醉，醉亦無亂。歲旦得代，而亭無令名，客曰：『名亭醒翁，無可乎？』則走書請記。予笑曰：『是醉翁變例耶？山水無情，而無

累於物者也。』樂而酣焉，無害爲醉；對而適焉，無害爲醒。男子無害同柳下，元亮無害同孔明。公之醒亦奚害，同六一之醉邪？」

象山 與熙春對峙，狀如伏象。

西塔山 又名金鰲峰，在登高南。兩山之間，有泉口靈泉，是爲府治。來山導樵嵐而東。《夷堅志》曰：「大觀初，有危氏葬於西塔山。踰月雨過，視墳側有痕，掘之，得銀盃二、銅水缶及鏡一。又得埋銘石，其文曰：『琅琊王氏女，江南熙載妻。丙申閏七月，葬在石城西。』」云。按熙載，北海人，南唐時爲中書侍郎，有才氣，多藝能，談笑風流，爲當時冠。然少年疏傲，老忽細謹，畜妓四十輩，縱其與客雜居，曰：『以自污避禍。』後主短其少檢，貶右庶子，分司東都。乃盡斥諸妓，後主喜，留爲秘書監。俄復故官，欲遂大用之，而去妓悉還。今未知熙載妻，是姓王與否，豈在四十餘人之列者乎？皇朝守吳國倫《西塔寺》詩：『石門迴合郡城西，岸幘重來路欲迷。池浴九龍將雨過，塔標雙鴈倚天低。』

樵嵐山 俗名鍾家岐，又名金蓮峰，樵水出焉。宋龍圖孫諤居之，又名三諫山。中有馬鞍、石崇二嶺。近樵嵐者曰積善山。山有東堂，宋呂季克隱處也。堂凡九景，曰野塘小隱，曰敬義堂，曰方拙寮，曰吟哦室，曰愛蓮，曰月臺，曰菜畦，曰海棠屏，曰橘堤。季克爲《九咏》，朱文公屬和之。

丹臺山 舊名靈臺山。上有鍊丹臺，隋盧真人、唐樊真人、宋黃希旦鍊丹於此。希旦，號支離子，居九龍觀，倏然有出塵之志，後鍊丹此山。熙寧五年，作五福宮成，希旦以戒行清淨，召至京師。後二年，化形太一宮，後復見於蜀，有詩寄友人曰：「昔游西太一，今日返成都。若問去來事，雲藏月影孤。」下有靈臺坳，今爲市廛。

北平山 上有越王臺，越王駐獵所也。今樵牧時得古瓦，痕皆羅紋鴈翅，扣之有金石聲。宋黃鎮成詩：「北平山上越王城，獵騎如雲此駐兵。瓦礫不隨塵土化，市朝空逐海田更。鴻泥雪點深無跡，鴈翅羅紋碎有聲。」其下古烏阪城在焉。蕭子開《建安記》：越王築六城以拒漢，烏阪其一也。郡人名其地曰故縣。

北石岐山

南石岐山 與北石岐對岐。兩山互抱，勢如龍蟠，爲郡第一水口。下瞰大溪，俗名渴猿飲水溪。上有洲曰萬松，舊名社家洲，俗名上水游魚。山麓有樵溪亭，亭西數步，有泉甘寒，宋建寧流亭其上。又東一里，爲石壁巖。石欽欽而下於溪者，曰老虎鼻頭巖。

五馬山 五峰拱揖郡治。

白壺山

白鶴山 崢嶸峻嶒，如鶴冲天。以其高與天齊，亦名天帝山。

紫雲山 歲旱，鄉人禱雨於此。

潭山 平田中有潭，又名古山。下有桐樹塢，迤邐田中，鹿口之水出焉。

獅子山

雲錦山 有三十六高峰，下有獅子石。

壽山 上有三台峰，下有壽山菴。宋季明詩：「禪林晝靜寶坊新，花木陰深別樣春。不是紅塵飛不到，只因無處着紅塵。」前有月山，形如半月。

星山

祥雲山 上常有雲氣，其陽曰官際嶺。

紗籠山 有兩紗籠：其一，底於石岐山，東盡於浮潭山，西盡於福山；其一，在二十九都，中峰聳峙，號通天燭，又名三千貴人峰。

浮潭山 三峰秀峙，俗名老君荇，其木漆，其植芋葛。

高蟠山 上有風洞，殊深育。又有嶺路通泰寧，以達汀廣。

道峰山 又名道人峰。負長溪，面樵水，跨長樂、泰寧二縣界，廣八十餘里，高出群山之上。上有池，冬夏不涸，又有棋盤、香爐諸石。軟池岡龍井，井如螺殼，旋轉而下，深不可測，時有雲氣覆其上。山側有羅溪巖，深數丈，俯視諸山，皆出其下。歲旱禱雨多應。昔有道人號龔聖者，結庵於此，頗有異跡。巖前有試心石，長可三丈許，迥出巖外，下俛深谷。皇朝周文通詩：「道山峻嶒千丈高，群峰向下如奔濤。岡巒雲氣互吞吐，巖崖瀑布相喧嘈。石梯蟠屈蒼苔冷，山間絕頂瞿曇境。樹色深藏虎豹關，日光斜抱魚龍影。」南有白石嶺，石色瑩潔，仿佛保定。

印山 下有石潭。

西乾山 名大乾山，屹立乾位，故名。隋泉州守歐陽祐墓祠在焉。祐守泉州，官滿西歸，舟次大乾，聞隋鼎既遷，耻事二姓，遲留溪間，挈家水死。土人高計、李定歛而葬此，邵人設祠祀之。祠有祈夢堂，有守趙師龍所鑄香爐。《謁夢錄》云，李忠定少謁祠中，夢神延之上坐，忠定固遜。神曰：「他日更仗主盟。」及爲相，值神加封爲署廟。建陽劉忠肅珙，少謁夢，夢金牌上有「曲巷勒回風」五字。迨登第，除諸

王宮。上幸宮邸，問諸王何業，琪答以屬對。時月照窗隙上，上曰：「可令對『斜窗拗明月』。」諸王方注意間，琪遽以「曲巷勒回風」對。上曰：「神語也。」此類甚多，不能殫述。師龍所鑄香爐，黃煥爲銘，有序：「淳熙五禩，郡侯趙師龍來守之。明年，爰飭有祠，輯所藏凶器，鑄爲鑪鼎，敬致大乾祠下，重神貺也。維邵武俗尚剽悍，眦睚之隙，憑怒恃狠，動必申剴。先是，爲政者徒事剛擊，威憊力弛，猶罔克禁。侯獨濟以平恕，俗用浸殄。而刃不可處，以爲錢鑄，則農必憎悍；以爲矛槊，則時無弄兵。惟夫銷鑠其鷙忍，熏慰其螟螣，杜讐絕牙，以垂於求久者。」銘曰：「漢賣劍刀，良二千石。剛不從革，害何由息？吳氏之風，犀渠鶴膝。因俗勿禁，如兇而翼。偉哉此鼎，一成不易。坐召和氣，潛銷陰慝。朝熏暮靄，有感有格。太守之仁，明神之德。其千萬年，永永無斁。」元草廬吳澄題大乾祠壁：「隋大業十四年戊寅，泉守歐陽公官滿歸，至此夫婦俱溺水死。時楚林士弘、長樂竇建德、魏李密、定陽劉武周、梁梁師都、秦薛舉、涼李軌、梁蕭銑，各已僭號割據，而唐李淵以代王侑帝於長安。是年二月，江都有變，字文化及立秦王浩。五月，李淵奪王侑而白帝，以隋爲唐王。世充以越王侗帝於東都。公，洛人也，將安歸乎？生蓋不如死矣。噫！公之心，誰其知之？後六百七十七年，春二月朔，臨川吳澄過廟，銘壁題。」中有天然石，上刻宋二使君詩：其一張紘詩；其一張徽詩。二公詩俱莊贍整重。紘詩有：「恨君不且留千騎，同折喙花對酒盃。」徽詩有：「三數寺通溪畔路，好尋僧借渡時盃。」皆佳句也。按使君必守也，而二名俱軼，未敢妄置之文苑。

龍湖山 山勢峻拔，深谷盤迴。絕頂有泉，下有龍鬬坪，又有龍湖漈，鄖溪之水出焉。《五燈會元》：「邵武軍龍湖普聞禪師，唐僖宗太子也，幼不苟葷，長無經世意。僖宗鍾愛之，然百計陶寫，終不能回。中和初，僖宗幸蜀，師斷髮逸游，人無知者。造石霜問道，言下頓省。辭去，至邵武城外，見山鬱然深秀，遂

撥草至煙起處，有一苦行居焉。苦行見師至，乃曰：『上人當興此。』長揖而去。師居十餘年。一日，有一老人拜謁，師問何往，至此何求。老人曰：『非人，龍也。』住在此山，行雨不職，上天有罰，當死，願垂救護。』師曰：『得罪於帝，我何能力？雖然，可易形以來。』俄失老人所在，視坐傍有小蛇，延緣入袖，至暮，雷電震山，風雨交作。師危坐不傾，達旦晴霽，垂袖蛇墮地去。有頃，老人拜泣曰：『自非大士慈悲，腥穢此山矣。今何以報？』即穴巖下與泉曰：『此泉爲他日多衆之設。』當時龍湖邦人聞其事，施捨財力，相與建寺，衲子雲趨。師闡化三十餘年，臨寂，聲鐘集衆，說偈而逝，塔於本山，謚圓覺禪師。』按《五燈會元》如此，考唐史，僖宗年二十有七而崩，其幸蜀之年方二十一，安得有子長無經世意，又能斷髮遠游者？或唐諸王孫，借太子之名出家耶？

楊源山 又名三臺山，當建陽、邵武界。自武夷盤礴而來，高下三成如臺。其巔爲分水嶺，東人建陽，西人邵武。

四角山

錦障山 有兩錦障：其一端平蒼翠，望之如玉几，又名覆船山，中有七寶坑，其泉清冽，早禱多應；其一山陰，界於光澤。

黃栢山 下有石崇嶺。

天馬山 勢從空而下，起伏周遭，十有餘里。元黃清老詩：『溪隨天馬西北行，半空忽見蓮花生。雙鸞欲下却飛去，旌旗引人丹霞城。攀蘿上到猿啼處，恍然曠坐消百慮。千山無人雲氣深，終日徘徊不能去。』虛空樓閣時自開，異香忽起三清臺。風吹笙語落天半，知是神仙騎鶴來。」

旗山 有三旗山，一在漢口，一臨青雲溪，一在月山之右。

鼓山 與旗山東西對峙。

丫頭山

金山 舊名巾山，以形名。或有得金於此者，宋饒方詩：「地將雲氣吐林巒，至寶曾淘瓦礫間。若把圖經重校定，此山宜喚作金山。」因名金山矣。

文筆山

旱山 山多旱田。

泉山 其麓爲蒙谷，宋黃簡肅游息之所。

仙亭山 諸峰環列，挺然持秀，山巖深邃，中有龍湫，歲旱可禱。

吳三郎山 下有苦竹嶺，幞石在其西。

官塔山 亦名冠峰山。上有搖石，高闊丈餘，推之輒動。西爲馬鞍嶺。

白鹿山 俗傳唐樊鍊師鍊丹於此，後乘白鹿去。

青雲山 厥土白膩可陶，其嶺曰黃岡嶺、窑嶺，東西合流而爲洒溪。

鷄籠山 上有龔、劉二師祠，水旱禱之，有驕蟲至則應。

鷄鳴山 宋開寶初，盜盧絳來襲，居民不知也。忽夜半鷄鳴，山頂居民皆起，遂免於害。其巔爲倒槎嶺。

壺山 五臺山

龍山 山高而大，上產磁石。

龍鬚山 常順昌、建陽二縣界，周三十餘里。冬月，燕子巢其上，以萬數。柴胡之藥生焉。

南午山 一名天柱山，一名集寮山。有三峰，俱當午位，是爲府治第三几案。大險崖在其西。又有小險崖。

北崖山 清涼山

天池山 山高而頂寬平。有池，方廣數畝，冬夏不涸。

凌雲山 在清涼山之三十里。高千三百餘丈，陰有星槎嶺。

鵝峰山

雲巖山 高出群岫，俯瞰長川，上有巖，吐吞雲氣，宋嚴羽嘗游詠其間。

白水山 上有瀑布泉，飛流數十丈，望之如練。其下爲白水漈。又東十里，爲龍潭。

蓮峰山 群峰層疊，環拱如蓮，屹立道峰之東南。

九臺山 與白水山相對。上有瀑布泉。

寶山 臨將樂、順昌二境。是產鐵鑛，元貢有鐵絲，今絕。

東山 與寶山相屬。高百餘丈，上有瀑布泉。

福山 一名鷲峰，又名腰帶峰。上有福山寺，元黃清老讀書其中。舊有聽雨軒，雲在寮，翠微閣。翠

微閣，杜徵君清碧作占篆書。黃鎮成記：「樵城之陽，樵水出焉。其東南諸山，磅礴而深窅者，福山也。

其山繇天帝三峰，倚空巖碧，聳拔而下，至紫雲爲西峰。蜿蜒隱伏，出紗籠山，復盤辟而上，延袤餘數百

里，鍾靈結秀於茲山。回望城闕，雲樓煙樹，掩靄相映，出乎指顧之內。俯瞰溪流，縈清瀨玉，徹乎聞聽之外。雖濡丹染墨所不能狀，蓋樵郡勝游之最。」皇朝御史朱澍詩：「野鶴秋雲共□鄉，（七）剡巖伐竹結禪房。曇花落盡無人見，老桂深山自在香。」

七臺山 跨汀、延、邵三郡境，高二十餘里。上有七臺：曰合星，曰文殊，曰普賢，曰會仙，曰獅子，曰雲，曰月。（八）有庵祀真濟劉大師。庵前有百花洞，大師蛻化處也。洞畔有石穴，常乾，每旱疫，禱之輒有水，以灑田中則雨；以飲，病者則瘳。有通判泉，在通判何兌宅前。其泉清冽，兌居官有清節，故鄉人以擬之。兌子鎬，築臺溪精舍其下，名堂「味道」，朱文公爲記：「武陽何君鎬叔京，以書來謂熹曰：『吾先君子辰陽府君，少事東平馬公，受《中庸》之說，服習踐行，終身不懈，間嘗榜其燕居之堂曰味道，蓋亦取夫《中庸》所謂莫不飲食，鮮能知味之云也。不肖孤，既無以嗣，聞斯道，惟是朝夕冀除，虔居恪處，不敢忘先志。子爲我記之，以告後之人，而鎬也亦得出人覽觀焉，庶乎有以自勵也。』」熹惟何公，實先君子太史公同年進士，熹不及拜其牀下，獨幸得從叔京游，而兄事之，因得其學行之懿，慕仰之深，願得托名於其屋壁之間，固不敢以不能對。謹按，公諱兌，字太和，始爲小吏南方，會馬公以御史宣慰諸道，一見賢之，奏取爲屬，因受以所聞於程夫子者，及其平生出處大節，告之詳焉。既馬公以言事謫死，公歸守其學，終身不變，其端已接物，發言造事，蓋無食息頃不《中庸》是依也。鄉人至以『中庸何公』目之。公於他經亦無不學，而尤盡心於《易》，作集傳若干卷。其忠純篤厚之姿，廉靜直方之操，得於天而成於學，充於內而不暴於外，世之君子，莫能知也。晚以馬公移書偽楚，斥使避位之節，列上史官，宰相惡其分己功，逮繫詔獄，削籍投荒，而終不自悔，以歿其身。此其於道，真可謂飲食知味矣。惟其知之深，是以守之固而行之樂。行

之樂，是以益味其腹，弗能去也。抑叔京清夷恬曠，不累世紛，既聞道於家庭，又取友於四方，以益求其所未至。其御訓嗣事，而居此堂也，可無媿矣。今又欲由是益自勵焉，是其進之銳而至之遠，其可量哉！」皇朝守吳國倫《七臺寺詩》：「領郡無奇事，看山一杖藜。群靈趨紺宇，萬樹折丹梯。啟戶雲先人，登壇畫亦迷。何當謝塵鞅，日卧海天西？」

觀音山 其植多竹，石可煉爲灰。

龜山

翠雲山 上有石泉。

麻姑山 麻姑修道此山矣。顏魯公《撫州南城縣麻姑山仙壇記》：「麻姑者，葛稚川《神仙傳》云：『王遠，字方平，欲東之括蒼山，過吳蔡經家，教其尸解如蛇蟬也。經去十餘年，忽還，語家言：『七月七日，王君當來過。』』到期日，方平乘羽車，駕五龍，各異色，旌旗導從，威儀赫奕，如大將也。既至，坐須臾，引見經父兄。因遣人與麻姑相問，亦莫知麻姑是何神也。言：『王方平敬報：久不行民間。今來在此，想麻姑能覓來。』有頃，信還，但聞其語，不見所使人，曰：『麻姑再拜：不見忽已五百餘年，尊卑有序，修敬無階。思念久煩，信承在彼。登山顛倒，而先被記。當按行蓬萊，今便暫往，如是便還。還卽親觀，願不卽去。』如此兩時間，麻姑來。時不先聞人馬聲，既至，從官當半於方平也。麻姑至，蔡經亦舉家見之。是好女子，年十八九許，頂中作髻，餘髮垂之至要。其衣有文章，而非錦綺，光彩耀目，不可名字，皆世所無有也。得見方平，平爲起立。坐定，各進行廚，金盤玉杯，無限美膳，多是諸華，而香氣達於外，內辯麟脯行之。麻姑自言：『接待以來，見東海三爲桑田。向聞蓬萊水，乃淺於往者，會時略半也，豈將復還爲陸陵

乎？」方平笑曰：「聖人皆言，海中行，復揚塵也。」麻姑欲見蔡經母及婦。經弟婦新產數十日，麻姑望見之，已知，曰：「噫！且止勿前。」即求少許米，便以擲之，墮地即成丹砂。方平笑曰：「姑故年少，吾了不喜復作，此曹狡獪變化也。」麻姑手似鳥爪，蔡經心中念言：「背痒時，得此爪以爬背，乃佳也。」方平已知經心中念言，即使人牽經，鞭之曰：「麻姑者，神人。汝何忽謂其爪可以爬背耶？」見鞭着經，亦不見有人持鞭者。方平告經曰：「吾鞭不可妄得也。」按如魯公記，則麻姑神人也，南城未必其修道之處。但魯公既引之矣，邵武去南城不遠，或其往來游戲之地邪？

象牙山 界於光澤。

官尖山 上有石塔。

殊山 雙峰。亦名文筆峰。

小殊山 在殊山之側，視殊山小而尤奇，下有愁思嶺，路通盱江，鳥道縈紆，綿亘六七里。宋上官端義砌爲石磴，以便行人。翠微之上，有東巖焉。巖可坐十餘人，鄉人禱雨於此。

涼傘山 潮魚山 雙臺山

銅青山 下有碑亭。《黃中美神道碑》，朱文公所作，後人重其文，作亭覆之。

高婆山 銅青之水出焉。山南之水下於泰寧。嶺曰高婆嶺。

鶴冲山 西巖山

桂林山 建陽劉文簡燭墓在焉。

旗望山 臨於漠口之上。

珠寮山 是爲北山之首。

萬峰山 山據諸峰之會，故名。與萬峰屬者，曰蒼山。下瞰大溪，中有石鼓，又有巨石小石支其下，纍纍似欲墮者。

近嶺山 海棠仙山 虎伏山

石壁山 壁有「魁」字，謝紹祖書。

〔校記〕

〔一〕「」字，各本原脫，據本書體例補。

〔二〕「晉安康元年」，據方詩銘《中國歷史紀年表》，誤。

〔三〕「統圖百又七十」，下文實列一百六十八圖。

〔四〕「牛輓」，各本原作「牛輓」，據下文改。

〔五〕「金字」，各本原脫「字」字，據下文及《八閩通志·地理》補。

〔六〕「蓮花」，下文作「蓮峰」，《八閩通志·地理》作「蓮花峰」。

〔七〕「鄉」上，各本原闕「字」。

〔八〕「日月」，各本原作「田月」，據文義及《八閩通志·地理》改。

閩書卷之二十七

方域志

邵武府 邵武縣二 光澤縣 泰寧縣 建寧縣

山(二)

玉龍峰 上有白石，狀如龍首。

石人峰

興元峰 下有奉議泉。

合掌峰

天筆峰 狀如卓筆，又名君子峰。

金字峰 元峰

磨石嶺 天湖嶺

望州嶺

石鼓嶺 有顯應廟。唐開成中，銅川人廖懋，監昭武鎮，卒葬於此。宋建炎中，蛇蝎爲災，居民立廟

禱之，其災遂息。

吳師嶺 朝天嶺 牛輓嶺 五通嶺

僉嶺 夾道巨松千章，亦名千松嶺。

桃花嶺 亦名碎石嶺。其植多竹，可以紙，粗者，可以衾。是產竹鼠，群食竹萌。

飛猿嶺 垓嶺

會聖巖 石壁峭立，巖內寬廣可數十丈。前有池，不涸。

桃花巖 黃鎮成詩：「小僉山中數塊石，上出浮雲幾千尺。寒泉飛下絕澗響，老樹倒掛蒼苔碧。巨靈臂斷知何年？中有古洞藏神仙。蓬萊宮闕浩杳靄，世外別有壺中天。巉巖磊塊相緣人，雲霧晦冥光景集。丹房石室淨無塵，虎攫龍擎半空濕。山人舊說桃花巖，山高水絕無由探。我來正值桃花發，長嘯獨倚春風酣。」

天平巖 巖左三崖，飛泉如練。崖下石衝激成穴，名曰垣漈。

川水利附。

大溪 上溯光澤極高之東，下游抵於順昌，其川之大者，皆曰大溪。徐鉉《稽神錄》：建州有僧，不知其名，常如狂人，言動多有徵驗。邵武縣前，臨溪有大盤石，去水猶百步。一日，忽以墨畫其半，因坐其上，持竿爲釣魚狀。明日，山水大發，適至其墨畫而退。癸卯歲，盡砍去臨路樹枝之向南者，人問之，曰：「免礙旗旛。」又曰：「要歸一邊。」及吳師之人，皆行其下。又城外僧寺，大署其壁：某等若干人。處處書之。及軍至城下，分據僧寺以爲柵，所安置人數，一無所差，其僧竟爲軍士所殺。初王氏之季，閩建多難，

民不聊生。或問狂僧曰：「世何時安？」答曰：「須待儂去。」既死，閩嶺平，如其言。

樵溪 抱郡城之陰，南納樵嵐之水。黃清老云：「溪上遠山，多蒼崖紫石，望之如紫雲。」又名紫雲溪。水清而駛無大魚，有鮪焉，紅翼白腮，冬月始出。橋曰東欄，曰七星，曰北浮，曰濟川。皇朝沈日禎《紫雲溪詩》：「羈懷久悽愴，士子謀與娛。春光正明媚，相邀出城隅。泛舟樵溪上，花柳競紛敷。喬林語衆鳥，急瀨浮群鳧。夷猶蕩兩槩，繾綣傾一壺。烹魚具甘旨，取次供行廚。豈無渭川筍？亦有松江鱸。仰觀載俯察，春意迷康衢。漾陂少陵杜，赤壁眉山蘇。流觴依曲水，浴沂臨舞雩。世代雖有異，風致良不殊。」

九曲溪 溪逶迤城中。源自樵嵐之巔，溫泉東下十里，注於油榨陂，北折東流，逾悟空山，以趨城西，北爲一曲，上有石如茭杯，曰杯茭石，其橋曰泥橋。循陰溝入城，爲二曲，其橋曰武德。折而東，爲三曲，其橋曰化源。(三)又北折流入泮宮，三繞而東，爲五曲，其橋曰泰和。又折而北，爲六曲，其橋曰仙源。稍北爲七曲，其橋曰晏公。又北爲八曲，其橋曰昇平。又北爲九曲，其橋曰五姊。其下流之橋曰通濟。出城北，東經七星橋，入於大溪。

石硯溪 源自油榨陂之南，東流播於南郊，逾南濠，入陰溝。由西營東折，歷武湯書院，達上水寨。北折至於倉巷口，又西折，歧而爲二，俱北流，歷探花亭，東折至鳳池坊，入烏龍巷，循陰溝，入於大溪。

鶴沖溪 導山坊，東北流入於大溪。有吳公灘、五里灘、大孔灘、五里潭。

黃溪 導西坑，東北流至新埠，以入大溪。

銅青溪 水流道峰南午之北者，導源高婆之東，下石灰爐，逾大險崖，東流，南折至於銅青山，爲是

溪。橋曰銅青，是達驛道。

莒溪 導板陽，度巖坊，會滄浪水，東北流入於大溪。

三澗溪 導瀨源，東流合於助溪。又導龍湖之水，至於漢口溪，芟洋之水入焉。溪上有灘，曰麻倉，曰紫洲。

義溪 導鷄籠山，東南流以入大溪。

藥村溪 源自郭前，東南流入於大溪。其灘曰獅子，曰一郎。

密溪 導天池山，東北流入於大溪。

大拿溪 源自建陽，東北流入於大溪。中有小湖操灘、大湖操灘、編孔灘、高坊潭。

大竹溪 導曾坑，東北流抵銅青溪。中有曲賽灘。

下黃溪 是導建陽之南之水。橋曰東保。

繡溪 中有巨石，謝源明所鐫「繡溪」二字。郡中諸水，東下一百二十里，至順昌之富屯，凡灘五百有奇。諺曰：「一灘高一丈，邵武在天上。」

桃溪 導將樂水，會七臺水爲水口溪，中有雙鯉石。

官坊溪 源自官尖高婆山之南。其流合於北勝，至於舊墟，郭阜諸溪之水，皆同於三溪。西南流，出於泰寧之梅口。

三溪 源自將樂之北。

泰和溪 源自殊山之南，其流合於和平之水。

將石溪 源自新城之東，以合龍湖。其一導桃源，至八都會兩水，東流入於大溪。橋曰步雲，曰將溪。

鹿口溪 導源於潭山。沿芹田，南折至於白渚，逾丹臺之東南爲是溪。中有泉山灘、烏馬灘。橋曰三公，宋咸淳間，漕使黃萬石、尚書馮夢得、守廖邦傑三公所建。

石峽溪 導自光澤之東北，入於大溪。

中坊溪 源自三仙嶺，度印山，西流入於大溪。中有印山潭。

石鼓溪 導草頭之西，逾象山，東北流入於大溪。橋曰石鼓。

雙溪 又名將溪。源導元峰之東，逾龍井，合旱山之水，入於大溪。

洒溪 源導仙亭之東。橋曰昇雲。

青雲溪 在青雲山下。

壺山溪 在壺山下，東合楊源、分水溪之水，南流至洒口，入於大溪。

交溪 導桃源，至八都會兩水，東流入於大溪。

太白溪

澤里溪 導火爐坑，東流入於太白溪。又導山坊，東流入於平洒溪。又合餘全濤、天樂濤、壺山諸水，潞爲大湖。居平洒之巔，灌田數十頃，亦東南流人大溪。有大石潭、磨車灘。

廖全溪 源導溥泉嶺。

洋尾溪 導竹埠、五溪之水，皆東南流入於大溪。

漢溪 導大水演，合諸澗水，以入大溪。橋曰鎮西，曰旅通。

石鼓溪 源出桐木關，流入於大溪。

應溪 在府城西北。《建安記》：邵武縣，衆山西北來。溪源出縣西烏嶺，撫州南城界，謂之應溪。東流，下與密溪合，東南至萬福亭，入縣界。據《大明一統志》如此，而《方輿勝覽》及郡志皆不載。縣境雖有密溪，亦不言與此溪合。或疑卽應口溪，而傳寫之訛。然考其源流，亦不合也。《光澤志》云：豈卽西溪之源，時時異名改歟？

九龍池 在郡城玄妙觀內。唐貞觀中，有九龍見此。

仙源井 宋熙寧中，有徐熙春者，居縣治西，家市酒，井在其對門。有一道人往來市中，或寓於寺。每乞酒於婢，婢與之，後道人無日不來，來則無不與之。其主常撻婢，道人乃與婢百傷丸方，教之製造，與水傾入井中。再製，卽取此水。救治百病，遺方尚存。今藥肆在。在市之邵人，凡病初發，服之多驗。遺其名曰韋道人，名其井曰仙源。後徐熙春亦得其傳焉。

烏龍井 元皇慶元年，^(三)早禱，有烏龍升焉。

古井 在和平市東溪之源。水本甘，俗誤呼「古」爲「苦」，又名苦井。

光澤縣 在郡西北。東抵邵武，西抵新城，南抵邵武，北抵鉛山。本部武縣光澤、鸞鳳二鄉地。唐於此置洋寧鎮。五代周改爲財演鎮，並屬建州。宋太平興國六年，升爲光澤縣，屬邵武軍。元仍舊。皇朝因之，其鄉分在城爲三圖，析里爲三十都，領圖八十有二。後增省不一。今爲圖五十五。

在坊，圖三。

一都，圖一。宋永寧里。

二都，圖二。宋歸仁里。

三都，圖一。宋歸仁里。峰曰聚雲、白雲。

四都，圖一。宋歸仁里。峰曰里仁。

五都，圖二。宋延福里。山曰管密、頂山、雲巖。

六都，圖一。宋延福里。

七都，圖一。宋延福里。

八都，圖二。宋冲霄里。山曰石螺。峰曰頓筆。

九都，圖二。宋冲霄里。山曰黃華、蓮花。峰曰興龍。嶺曰杉嶺。

十都，圖二。宋冲霄里。山曰徐公。

十一都，圖一。宋永曆里。

十二都，圖一。宋永曆里。

十三都，圖二。宋永曆里。

十四都，圖一。宋招德里。

十五都，圖二。宋招德里。

十六都，圖二。宋招德里。

十七都，圖一。宋招福里。

十八都，圖一。宋永寧里。山曰珠寮。

十九都，圖三。宋招福里。

二十都，圖二。宋招賢里。峰曰大里。

二十一都，圖一。宋招賢里。

二十二都，圖一。宋招賢里。巖曰七仙，會仙。

二十三都，圖二。宋永德里。嶺口肩盤。

二十四都，圖三。宋永德里。

二十五都，圖一。宋永德里。嶺曰雲際。溪曰北溪。

二十六都，圖一。宋崇仁里。

二十七都，圖一。宋崇仁里。山曰太和，小和。

二十八都，圖六。宋崇仁里。

二十九都，圖二。宋崇仁里。山曰昂山。

三十都，圖一。宋永寧里。

海嶠喉襟，江閩門戶。雲巖聳南，九峰峙北。東障君山，西繞杭川。其形勝也。

山

交椅山 山形九巘，是爲縣治斧辰。

青山 西連三千嶠。立於邑治七里之上。爲邑寶山。

管蜜山 兩峰相望，前後皆石壁，實惟蜂蜜之廬。宋淳祐中，有管姓者，始取蜜崖中，人因以立。山中有洞光巖，橫濶數丈餘，金坑之水出焉。

頂山 形如獅子，石巖峻絕，在山之陽。

雲巖山 巖巖蒼翠，高人雲表。宋時建半空煙雨亭，邑人以爲勝游。下有雲巖書院，宋李果齋、方公晦講學之所。元邑令況達記：「天曆二年秋八月，雲巖書院成，邑士鄧觀我氏過予，曰：『果齋李氏，父子祖孫，俱登考亭之門，公晦游從最久，故所傳獨探其奧。俛仰百餘年，拓荒起廢，以嘉惠吾杭之民。昉自今日，可無言乎？』予惟書者，所以載道也。墳、典以前，何書之讀？聖賢授受，何所本乎？唐虞三代之制作，何其盛哉！亦曰心與道一而已。先聖人，身任道統之寄，不得行之當時，於是傳諸簡冊。唐虞三代制作，本是，繇之則治，違之則亂，修之君子，悖之小人，後之立綱陳紀，必考證而取則焉。世降俗薄，家異學，人異論，朱夫子生千載之下，懼斯道之愈晦，而異學之莠民也，悉取簡冊所傳，與曾子、子思、孟軻氏之書，神交性融，研究精極，以開悟於後學。其示之以成始成終之要，辟舟車之有指南焉。循而進者，無不至，況得其傳如李氏者乎？光澤之雲巖，去縣三里許，公晦氏方子，未第時讀書所也，崇岡在望，人跡罕至。旣魁天下，調溫陵，察推入爲太學錄，論事不阿，奉祠而歸，起判辰州軍州事而卒。子祐乏嗣，以他子祝之弗類，繇是書院毀焉。其情太常卿葉宗守邵武日，買田築祠，祀文公於郡泮，復錄恒壤四百三十有奇，奉嘗於邑里，皆以公晦侑食。歲用滋久，田祠俱廢，予製邑之明年，學宮告成，祠田始復。因閱族係駿所藏家乘，深悲其學之鬱而不施，且靳於其後者，大乎？曠世相感，吾亦不知其何心也。」山上有湖，大將

雨，則湧聲如雷。《神異錄》：「山神石氏，東晉人，嘗爲父殺人報仇，遁隱此，後爲此山之神，能致雲雨。」其西有籟竹二峰，峰有仙蹟。

石螺山 屹然溪中，兩山對峙，大石犄角如門，僅通單騎。有石如獅，昂踞水中，旁有石如螺，其水奔激，合水口入於西溪。

黃華山 山勢蜿蜒，旁枝與止馬諸山相連。

蓮花山 其陽有五峰，號筆架山。其草曰葦，生於朽楓樹，曰茵，生腐草中。

烏君山 一名烏珮山。高二千一百餘丈。峰上有雙石，皆高二十餘丈，岌然相向，名雙石筭，又名茭杯峰。朗夜，其巔每每生光，人謂天燈。有龍洞，可禱雨。《寰宇記》：山跨邵武、建陽、鉛山三邑。秦漢

間，有徐仲山於此採藥，遇仙。蕭子開《建安記》云：烏君山，建安名山也。在縣西一百里，近世有道士徐仲山者，少求神仙，貧居苦節，年久彌勵。道遇人，修禮無少長。或果穀新熟，輒祭，先獻虛空，次均宿老。鄉人有偷者，坐當死，仲山詣官，承其偷罪，免冠解帶，自抵嚴法，所司疑而赦之。嘗山行遇暴雨，苦風雷，迷失道。忽於電光中見一舍宅，因投避之。至門，見一錦衣人顧仲山。仲山稱名拜謁。錦衣人稱監門使者蕭衡。拜答之，因相延引。仲山問曰：「自有此鄉，無此府舍？」監門曰：「此神仙所處，僕，監門官也。」俄有一女郎，梳綰雙鬟，衣絳赭裙，青文羅衫，左手執金柄塵尾幢旄，傳呼曰：「使者外與何人交通，不入報也？」答云：「此鄉道士徐仲山。」須臾，又傳呼云：「仙官召人。」向所見女郎，引仲山自廊進至堂南小庭，見一丈夫，年可五十餘，膚體鬚髮盡白，戴紗搭腦冠，白羅銀鑲帔，而謂仲山曰：「知卿精修多年，超越凡俗。吾有小女，頗閑道教，以其夙業，合與卿爲妻，今當吉辰耳。」仲山降言謝幾回，起而復請謁。

夫人。丈夫止之曰：「吾喪偶已七年，昔有九子，三男六女，爲卿妻者，最小女也。」乃命後堂備吉禮，既而陳酒殽。與仲山對食訖，漸夜，聞環珮之聲，異香芬郁，熒煌燈燭，引去別室。禮畢三日，仲山悅其所居，巡行屋室，西向廠舍，見衣竿上懸皮羽十四枚，是翠碧皮，餘悉烏皮耳。烏皮之中，有一枚是白烏皮。又至西南，有一廠舍，衣竿之上，見皮羽四十九枚，皆鵠鶴。仲山私怪之。却至室中，女子問曰：「子適游行，有何所見，乃沉醉至此？」仲山未應。女子曰：「夫神仙輕舉，皆假羽翼，不爾何以倏忽致萬里乎？」因問：「白烏皮羽爲誰？」曰：「此大人衣也。」又問曰：「翠碧皮羽爲誰？」曰：「此常使通引婢衣也。」又餘烏皮羽爲誰？」曰：「新婦兄弟姊妹之衣。」又問：「鵠鶴皮羽爲誰？」曰：「司更巡夜者衣，卽監門蕭衡之倫也。」語未畢，忽然舉宅驚懼，問其故，女子謂曰：「村人將獵，縱火燒山。」須臾皆云：「竟未與徐郎造得衣，今日之別，可謂邂逅矣。」乃悉取皮羽隨方飛去。卽向所見舍屋，一無其處，因號其地爲烏君山。」與烏君山接者，曰烏石嶺。其地二千六百六十丈有奇，是多生桫欏之本。元有鄧良貴者，隱居烏珮山下。良貴號秋碧，爲老氏學。又有徐山，祠徐仲山其上。珠寮山，在烏君山南，同源異峰，是爲諸山之母，名諸母岡。

太和山 抵江西南城界山。有鐵牛嶺，嶺舊有鐵牛關。

小和山 與太和相連。舊有大寺寨巡檢司，今徙於松關。

昂山 崇昂秀拔，上有石壇、丹鼎、丹竈。石上有篆文，奇古不可辯。沂洲之水出焉。

冷龍口 界於小和。應溪之水出焉。

竿架山 三峰聳秀，而中尊南望大溪，不遠十里。旗山在其北，疊嶂飛揚，若旗然。又北連於珠寮

山。

后陽山

文筆峰 面於夫子之廟，在邑治東南者，曰九龍峰。

聚雲峰 又峰西有白雲峰，與聚雲石列並峙。〔四〕

里仁峰

頓筆峰 狀如卓筆。上有風掃隘。

興龍峰 大里峰

象牙峰 接邵武縣界，一峰屹立，旁二十四峰森立若象牙。循象牙而東四十里，至於三千嶺，其山多

怪獸奇木，澗泉飛瀉，人不可登。

黃源嶺

極高嶺 源泉東下，注丫金坑。北十里爲高嶺。

馬嶺

杉嶺 距邑七十里，是爲福建、江西之界石。山雄絕，蹊徑僅容單車，其關曰杉關。皇朝胡將軍琛所

入閩道也。洪武三年，徙大寺寨巡檢司，以扼其險。循嶺而南十里，爲豪居峰，高聳插雲，爲關藩屏。

肩盤嶺 東抵弋陽，西抵貴溪。山高徑險，盤曲而上。

雲際嶺 北溪水出焉。宋李呂詩：「凌空石磴三千丈，匝地瑤林百萬花。自有眼來方見此，直疑身

已到仙家。」

七仙巖 巖西十里，爲黃茅巖。巖前有石鼓樓七重，高下相透。上有仙人塚。後有石壁，水自穴出，歲旱禱焉。

會仙巖^(五) 高二千丈有奇。巖口有石穴，中深而方，清泉常滿，俗名石斗。宋嘉定間，有醉人褻慢其地，火從斗中烈燄四起。岸上有朱桃，熟時即墜，人莫能得。巖後澗泉，出自穴，高數丈，名曰水潦。

川

西溪 出洞光巖下，逾雷公灘五十里，至於水口，北會石螺山之水，合流而南。

大溪 又名杭川。逾塘石灘，凡四十里，至於邑西北，流合黃源嶺、徐源之水滙焉。逾黃龍灘，東流南折，又導晏公灘，入於交溪。

磨溪 導玲瓏山之水，東流爲是溪。

漠溪 過大里峰，南逾烏洲，下於交溪。

北溪 導昂山之水，南流四十里，爲沂洲。又南流三十里，逾茶富，出大里峰，東合漠溪之流。逾崇仁市，下於交溪，導雲際嶺之水，爲北溪。元季，邑人危德華隱居是溪之上，家貧教授，不求聞達。當衰亂之時，草竊暴橫，奔走竄伏，靡有寧日。德華爲詩，悲憤激烈，皆嫉奸邪、崇節義、尊君親上之意。其集名《北溪觀海》，同時危太僕、葛元喆、方壺、鄧宇，皆稱賞之。

交溪 自北溪南流八十里，至於茶富，合沂洲水，下於交溪，西北二溪合流，有洲曰烏洲，又名月洲。浮於交溪之上，是生山查，異於他邑。水下交流，乃東南流逾龍孔灘，南流入於大溪。

塘石灘 怪石攢疊，飛流迅激，水涸則舟膠。

雷公灘 北會石螺山之水，南流合於西溪。

九曲水 在邑中，導大簾坑，環繞市廛，以弭火患。逾絃歌橋，下於西溪。

金坑 導極高嶺之東，東北流二十里，注焉。

七星井 井凡七，在城中。

泰寧縣 在郡西南。東至邵武縣，西至建寧縣，南至將樂縣，北至邵武縣。三國吳永安三年，析建安

縣之校鄉西偏，置綏安縣。晉義熙元年，改綏城，並屬建安郡。隋開皇十二年，併入邵武，屬撫州。唐武德四年，析邵武地，及綏城故地，復置縣，還屬建州。五年，析邵武地，增置將樂。七年，省將樂，以邵武地還屬綏城。貞觀三年，省入邵武。嗣聖五年，復析置將樂縣。乾符二年，寧海軍奏請析故綏城縣地爲歸化、黃蓮二鎮，此爲歸化鎮。五代，南唐保大元年，廢鎮爲場。中興元年，升場爲縣，屬建州。宋太平興國五年，始以來屬。元祐元年，右司郎中張治賢，用邑人葉祖洽之言，奏改泰寧縣。元仍舊。按本志謂：吳永安三年，析其校鄉西偏置綏安縣。而《將樂縣志》謂：「晉隆安二年，割縣之西鄉置綏安縣。」本志及《建寧府志》謂：唐武德四年，析邵武地及綏城故地，復置爲縣，還屬建州。而《天文·分野》謂：是年始以將樂地，析置綏城縣。俱未詳。皇朝因之，凡二鄉、三十二保，統圖五十一。〔六〕

綏城鄉

在城保，圖七。

城步保，圖一。宋清泰里。溪口城步。

長興保，圖一。宋清泰里。山曰古窠。峰曰卓筆。

福興上保，圖一。宋清泰里。嶺曰大杉。

福興下保，圖一。宋清泰里。山曰鍾石。

瑞溪保，圖二。宋清泰里。山曰青藤。巖曰瑞豐、聖水。溪曰瑞溪。

崇化保，圖二。宋清泰里。山曰薯山。峰曰淘金。

上高保，圖二。宋清泰里。

安仁保，圖一。宋清泰里。嶺曰茶花。溪曰杉溪。

將溪上保，圖一。宋樂城里。巖曰瑞慶。

將溪下保，圖二。宋樂城里。山曰南石。

朱口保，圖三。宋樂城里。石曰涼傘。溪曰朱口、將溪。

梅林保，圖一。宋樂城里。山曰應響。溪曰梅林。

交溪保，圖二。宋樂城里。嶺曰九棟。溪曰交溪。

信義保，圖一。宋樂城里。

龍湖東保，圖一。宋樂城里。山曰涼傘。溪曰龍湖東溪。

龍湖西保，圖一。宋樂城里。巖曰天神。溪曰龍湖西溪。

崇禮鄉

梅口保，圖二。宋大田里。山曰虎頭、蘭臺。溪曰馮家溪、建寧。

依口保，圖二。宋大田里。山曰貓兒。溪曰依口。

仁壽保，圖一。宋大田里。

大田東保，圖一。宋大田里。山曰蓬源。嶺曰九盤。溪曰大田東溪。

大田西保，圖一。宋大田里。山曰大塢、金龍、金鷄、天臺。峰曰七寶。

善溪上保，圖一。宋大田里。溪曰善溪。

善溪下保，圖一。宋大田里。山曰石仙、金鏡。

龍安保，圖一。宋大田里。山口雲蓋。溪曰龍安。

水南保，圖一。宋高平里。山曰鼓樓。嶺曰高嶺。谷曰南谷。溪曰黃溪、福沖、均福。

永興上保，圖一。宋高平里。峰曰寶閣。溪曰永興。

永興下保，圖二。宋高平里。

福山保，圖一。宋高平里。山曰陰山。溪曰山夾、龍門、長興。

南會保，圖二。宋高平里。山曰南會、鳳棲。洲曰麒麟。溪曰石塘。

開善上保，圖二。宋高平里。溪曰開善、青洲。

開善下保，圖一。宋高平里。溪曰鋪溪。

東高嶠而西挽舟，北大杉而南張源。四山拱峙，三水環流。其形勝也。

山

爐峰山 縣治主山也。狀如香爐。原自茶花嶺東行，踰峨眉峰、大洋嶂，迤邐南來。前納三水，環繞

四境。西北爲壽湖。南麓爲縣治。北麓爲夫子之宮。茶花嶺，廣二十里，杉溪之水出焉。峨眉峰，在縣北安仁保，周迴四十里，高數千丈，類蜀之峨眉峰。左有三仙巖，巖勢甚高，石中一小穴，僅容三人。夏月涼颼襲人，石乳滴泉，旱亦不竭。有刻雷公、電母、風伯、雨師碑，禱雨多應。前三峰，狀如筆架，又名三清壇。峰西接建寧縣界。大洋嶂，在縣北福興下保，特立高聳，前有三峰，多產藥品。上有池，雖旱不涸。下有人跡石，廣丈餘，上有巨人跡。嶂之東，又有小坑嶂，山勢稍平低，則縣治後山在焉。

旗山 勢如展旗，延袤五里，與爐峰峙，縣治來山也。棲真巖，在其西，俗傳爲梅福煉丹之所，有丹爐，有朝斗石，有採藥澗。

古靈山 上銳下圓，高約百餘丈。蒼松蔚鬱，茯苓生焉。東北一里，有豐石寨，北有神仙巖，傍有乘風石。穴高廣二丈，深五丈，風從穴出，冷然，善也。

鍾石山 形如覆鐘，周圍壁立，梯崖以登，其上平坦。緣崖爲徑，上有泉及鵝髻石，雙峰石在其南，絕頂有洞，中有棋盤石。

青簾山 高廣十餘里。壁豁林蒼，宛如簾幙。是有風蛤，秋值薰風，滿布地下，可食。氣化生滅，倏焉而盡。

薯山 廣十里許。南有鷄籠嶂。龍門寨在其西，有潭口龍潭。

南石山 石皆南向。上有寨，下有龍井。北有筍箕，石狀如覆箕，周圍峭壁。南有石穴，人不可到。內有截木，望之如箱然。

應聲山 在大溪之西。山圓谷空，可呼而應。

涼傘山 高數丈，頂平，四面赤石峭壁，層層圓轉，黑溜間下，其狀如傘。

虎頭山 怪石昂崇類虎，山巔夷曠，有流泉、竹木之勝，又名鶴鳴山。

蘭臺山 北爲挽舟嶺，在縣西梅口保。嵯峨千丈，延袤十有三里，必牽挽而後可登，如挽舟上灘然。

又云梅福修煉山中，山鬼竊其藥，追至此得之，曰挽丹矣。上有留雲亭，馮家潦之水出焉。南有三門嶺，二石相對如門，亦呼爲三門寨。北有西巖，亦名寶雲巖。又曰彩雲巖。宋鄒應龍歸老，游憩於此。

貓兒山 其東爲三崖嶺。又西南十里，爲牛嶺山。石鼓山在其南。

蓬源山 延袤十餘里。

大塢山 延袤十里，峭石壁立，巖洞窈深，人跡罕到，可以避難。有葛家崕巖、聖公巖、際隴巖，皆在是山中，險僻可寨。皇朝正統間，民於此避沙寇。

金龍山 舊傳有龍見此。陽尾潦出其下，潦下有池，池中有石如龜。穿甕嶺在其西，俗傳廖半仙穿嶺如甕，通水灌田，人不可入，世久亦不崩。

金鷄山 一名金鷄嶂，一名鷄籠山。大而圓，狀如覆鐘。

天臺山 四峰嵯峨，狀如寶蓋，高千餘丈。上有池。北有雙人石，高聳雲霄，如人偶立。盤結三十餘里，俗傳廖半仙遇仙於此。是產香簞數種，如蓮花蕈、紅蕈之屬。

石仙山 峭直彷彿人形。金鷄嶂在其南。羅洋嶂在其西。南有筆笏石。羅洋嶂，一名閭王嶂，山高林深，人跡罕至。筆笏石，二石岌然對峙，一峭銳如筆，一豐本樸末，中俯如圭。

金鏡山 亦名大歷山，亦名大弋山。有八十四面，周亘四百餘里，跨建寧、泰寧三縣境。宋陳軒詩：

「突兀幾千仞，孤峰難比倫。巨爲三縣鎮，雄據衆山尊。」俗傳無諸游獵，遺金饒於此，夜常有光。有石燕巖，一石罅僅空人身，深二丈許，盤折而入。至正巖，深三丈許，橫闊半之。巖之中有石屏，屏後數步，一石竇通天光，俗謂之石窗。有石凳、石床、石解，位置向背，皆天成。泉瀑清泚，行乎木杪，而注於絕壑，一勝處也。山之半有潭，清澈無底。絕頂有聖紫石，雲蒙其巔則晴，蒙腰則雨，下界雪，其上或晴，下界晴，其上或雪。邑人黃元實賦：「粵惟元氣盤東而融結兮，屹后土之龐鴻。判五嶽之峻極兮，領波濤之諸峰。勝茲山之巍巍兮，據南紀之遐封。視培塿綿亘於炎海兮，竇閭嶠之一雄。道人寶閣，東望欲並驅兮，麻姑四顧，搖曳乎空曠。灘水環繞乎其下兮，靈源仙穴與蓬島而潛通。飛泉數道瀉寒玉，平田萬頃飛流派。有時黃塵赤日吐雲氣，洗滌旱暵回和豐。置樵陽之巨鎮，妙宰物之玄功。重巒疊巘，世傳八十四面兮，頃洞變化，杳靄誰能窮玉芝瑤草。聚珍產，濯以醴露，春蒙茸，碧樹玄猿，蒼崖綠熊。一聲秋籟動林薄，萬里月色橫長空。凌空絕頂罕人跡兮，惟有鞭鸞跨鶴，雪眉碧眼，於此時相逢。拂予袂而游觀兮，覺層雲之湯胸。涼夙昔之有契兮，撫光景而欣從。想匡廬之逸與兮，便擬追躡乎前蹤。松窗半榻對晴雲，瑤琴五月彈清風。與山居兮逍遙，肆巖棲兮從容。泰山標日觀，仙掌擎芙蓉。顧珊珊之霞佩兮，逝將服乎壽宮。委芳澤之所美兮，懷丘垤之所宗。饒山兮饒山，萬古兮誰同？天長地久，垂鴻名於宇宙，配喬嶽於恒嵩。」

雲蓋山 絕頂常有雲氣團團如蓋。上有瀑布，泉垂三十餘丈。渡山在其南。

松山

鼓樓山 在松山西，跨將樂縣界。山形方峻若樓閣。北有龜雲山。

陰山 亦名應山，盤礴十餘里。上有鑼山、鼓山，有赤石，有鷄籠寨。

南會山 延袤十餘里，鳳棲嶺在焉。三石鼎立。旁有數巖，俱深廣三五丈。小徑可登，巖壁險峻。

上有流泉、竹木，可容數百家。南有齊雲巖，登之如在半空。右有獅子巖，下臨清溪。鳥道紆迴，緣石而登，中有石類獅子，右有百丈巖，亦臨清溪。皇朝貞婦杜全死節地也。全，嫁爲邑人李祥妻，正統戊辰，避寇是巖，爲賊所執，欲犯之，全曰：「請就崖穴隱處。」及崖，抱幼子投死焉。又有甘露巖，高十餘丈，石門天成，一逕僅容單騎，飛泉垂巖而下，內有石乳，滴泉如露。宋紹興中，有僧梯棧倚巖，架屋不瓦，繁紆而上，迥然空中，幽深靚豁，景物奇麗。東則醴泉巖，西則白水漈。宋鄒恕《甘露巖詩》：「蘭若半空中，雲山第幾重？瀑流千丈練，鶴宿五株松。曉雨禪房黑，霜林木葉紅。懸崖回首望，歸思過前峰。」

鳳棲山 峭石壁立石漈，羊腸縈繞以登。山南有池，廣數頃，深甚。兩旁崖石峭立，須筏乃濟。至則曠然平野，可居數百家。昔人嘗避地於此，今洞爲田。

寶蓋山 上有仙人塘，有石鼓。又西南十里，爲君子峰，峰聳色翠。上有聖水。中有聖僧巖，龍安之水出焉。

巖頂山 德安山 神石獅山 象鼻山 瑞龍山 登高山

印山 藤嶺在其北，以產藤名。走寧化道也。

登雲山

清涼山 山西爲龍鳳山，山北爲中華山。

寶臺山 高大聳秀，延跨三邑。

五龍山 北十五里，連邵武之道峰山。

御屏山 下瞰大溪。犀帽山在其陰。

朱石山 其色赤。有石亦名朱石。朱石之上，又有涼傘石。白雲山在其東，寶蓋巖在其西。寶蓋巖，石巖如屋，東西五十丈，南北三十二丈，高五丈，徑自半山入。高曠深邃，西有石穴，東有漱玉泉，景概奇絕，或以方武夷。中有寺，殊幽勝。宋黃履《寶蓋寺詩》：「曲逕山隈入，重扉木杪平。巖垂半空蓋，泉滴四時聲。」蔣之奇詩：「斷崖天削成，半腰爲竊竊。殿閣在其中，乃是釋子家。初疑無路通，去必凌紫霞。屈曲轉山足，雲蘿可攀攀。忽然至其上，金碧藏谿谿。揮手挹天漿，引吭吸陽華。却見巖下路，日晴眩生花。化工亦奇巧，其怪乃爾邪。僧有定慧者，來自蜀道賒。五代方亂離，相此山水佳。卜居不復出，焚香擁袈裟。嗟子但企仰，涉世空諠譁。安得寄遁此，可以忘幽遐。」

獅子山 雲翠山 金臺山

卓筆峰 一峰特起，側視則三峰森立，又名鎗山、旗山、牌山。其地人多悍猛，宋蔣之奇過之，名曰卓筆。

淘金峰^(七) 高千餘丈，聳翠冠諸山。下有香水潭，有沙羅渭，峭拔秀麗，水流其下，周環三里之間，灣洄九折，莫知首尾。三郎石在其南，以石峰三聳名。

七寶峰 高千丈，其產金、銀、銅、錫、朱石、黃連、甘草，世傳越王游獵憩此。宋爲銀場，今廢。有貪者鑿取之，山遂崩陀。

寶閣峰 崔嵬嶢嶢若閣。

盤石峰

大杉嶺 道通江西，龍門溪之水出焉，其木多杉。

九棟嶺 其南有鳳林巖，西有小西巖。

九盤嶺 紆迴九曲，大田東溪之水出焉。

鬲嶺 一名回龍嶺。兩山聳峙，嶺當其坳，又名甲嶺。宋偽學禁起，晦庵朱子過泰寧，宿是地，小均李氏遺琴一張，爲書「恂如」二字以去。琴之陰有鐫刻，首橫「漁榔」二字，下分兩行書之曰：「撥櫂夫須，蕭然萬物之表。稿項黃馘，闐然一葦之航。與鷗鷺而物化，發山水之天光。潛鱗出聽，是謂漁榔。」後歷數家，傳以爲寶。

大湖巖 下有莒溪，流巖坊，與滄浪水合。宋末有九巖：鳳山嚴肅、三休嚴參、三愛嚴岳、衲翁嚴必進、駉室嚴必大、良齋嚴奇樵、丈人嚴仁、子野嚴若鳳、滄浪嚴羽，俱能詩。羽著詩法，流傳於世。先有嚴粲者，著《詩緝》，朱文公《詩傳》多采焉。

前排嶺

瑞豐巖 高四丈，廣十五丈。《方輿勝覽》：「瑞豐巖，有院。初闢時得龍斗，以其牙刻觀音像。有泉溜其下。」皇朝御史李元陽，鐫「絡珠巖」三字於石壁，盱江羅汝芳鐫「華蓋」二字於巖右。又有丹霞巖，高二丈餘，深廣十丈。李元陽鐫「窺霞」焉。瑞豐、丹霞二巖間，有羅漢巖，今爲靈源殿。三巖聯列競勝，與寶蓋、甘露齊名。由豐巖登高而東，緣崖上，有巖廣五丈許，袤二丈，高一丈許，有欹倚棋盤石，可四尺徑。無字小碑，擲其下，而跌存焉。木植埋緼，杜痕微見，奇險罕踐，不知所始，一仙跡也。丹霞巖右，有

李忠定讀書樓，遺碑尚在。

聖水巖 中有三石乳下垂，禱雨多應。

瑞慶巖 巖有泉焉。其地曰將溪，厥土宜魚，人皆鑿池養魚。

天神巖

赤石巖 深廣十餘丈，穿三巖而入，幽邃無盡。

楊林嶂

南谷 上多疊巘，曲澗幽壑流其下，鄒應隆歸休之所。中有南谷亭，宋理宗所賜御書也。

蔦蕪坳 在縣治西。一名麥湖坳。以葬命過無依之鬼。

館前洲 狀如游魚。

麒麟洲 在邑東南。俗傳越王戲馬於此。又縣志有樂野宮，云在縣西隅街前，上抵盧家巷，前及南

門街，北底西隅街，今爲民居矣。又有高平苑，在水南保，亦閩王校獵之所。

川

大溪 是爲東流。境內水，此最大。源自邵武縣官尖峰，流逕游源，又西流沿龍湖，逾交溪，過梅林、朱口、福山，山夾凡七十里，匯於邑東，以納諸溪之水。橋曰利涉。

仁壽溪 源自蕭坑三十里，至善溪、下官、常口，入於大溪。

城步溪 源自大洋嶂，流三十五里，至於揭潭，入於大溪。

瑞溪 源自峨眉峰，流四十里，至於臨江寺下，入於大溪。

杉溪 導茶花嶺之水，逕大杉，歷福興，上下七十里，抵縣治北，亦東合於大溪。大溪合黃杉二溪之水，匯爲何潭，是建縣治。西山環拱，乃折而西，歷水南，南會達梅口，納建寧灘江之水爲雙溪渡，而邑之衆水歸焉。梅口有灘曰火夾，亂石巉巖，兩岸石壁峭立，奔湍激浪，舟楫不通。元黃元實《記略》：縣西三十里，石山夾溪立，峯嶺周密，以藩屏山邑。而兩岸開豁，桑麻沃衍，海川一市，於是平在其溪。東接道人峰水，西與淮陽水合，復折而東，趨於劍津。溪合之處，平沙曠堤，雨漲則瀾，霜涸則夷，可舟航而不可輿梁，實當汀、邵往來之衝。

朱口溪 導李家源，十五里至於朝天橋，東入於大溪。

將溪 溯洞永興溪，水溯游十里，至於泥坊，入於大溪。

梅林溪 導道峰下，流過將樂。上渠十五里，至於黃公橋，東入於大溪。

交溪 導邵武道峰三十五里，至於安濟橋，東入於大溪。

龍湖東溪 源自林陽六十里，至於龍湖橋下。宋黃大任隱居是溪之上。大任，字元明，邵武人。博學，游江湖，所交皆當世名士，以詩酒自娛，有集行世。

龍湖西溪 導邵武，經涼傘山十五里，至於顏坊。

馮家漂溪 源自挽舟嶺，入於大溪。

建寧溪 導建寧洛陽保，由大田西上，接建寧溪水，三十里至於梅口，入於大溪。

依口溪 源自金饒山，流四十里，至於小溪口，入於大溪。

大田東溪 源自九盤嶺，十里至於山坊尾，合於大田西溪。上接楚溪之流，下二十里，以至於梅口，

入於大溪。

善溪 導建寧赤上之水，洄游四十餘里，入於大溪。有潭曰鯢潭，又名池潭，其深莫測，有漩渦焉。

龍安溪 源自君子峰，流二十里，至於善溪，會於鋪溪，入於大溪。

黃溪 導將樂寶臺山之源，西北至於安泰橋，亦東合於大溪。安泰橋，今名曰迎恩，東通邵武，南接建寧，孔道也。皇朝萬曆初，雷氏婦爲橋焉。雷婦，縣民李喬妻。

福冲溪 導福冲坑之水，十里至福冲橋，下入於大溪。

均福溪 源自大坑坳，入於大溪。

永興溪 源自寶閣峰，西北流至海口保，爲均溪，入於大溪。

山夾溪 源自大坪坑，五里至於山夾橋，東入於大溪。

龍門溪 源自大杉嶺，下崇化，通將溪，沿長興，至於福山。又鉅鉚潭之流，亦至是溪。

長興溪 源接將樂之水，二十里亦至於福山，東入於大溪。

石塘溪 源自大田東上地，由鳳棲山流二十五里，至於水簾瀑，入於大溪。

開善溪 源自福冲溪而下，（八）自南入於東溪。自城步溪而下，自西入於東溪，鋪溪，自南入於東溪。均溪而下，自西南入於東溪。惟是溪也，導自將樂，入於將樂之竹洲溪。溪西有潭，曰揭潭。

青洲溪

鋪溪 溯洄寧化柳洋之水，溯游二十里，至於合口灘，入於大溪。

二十四溪 導南會之水，循石磴二十四折，歷二十里，以通梅口，入於大溪。

建寧縣 在郡西南。東抵泰寧，西抵建昌，南抵寧化，北抵南豐，本晉綏城縣地。唐嗣聖五年，析置將樂；水之南，隸將樂，屬福州；水之北，隸臨川，屬撫州。乾符二年，分故綏城縣地，爲歸化、黃連二鎮，此爲黃連鎮。五年，邑人陳巖，以鎮兵禦黃巢之寇，表爲義寧軍，置鼓角，賜牌印，治永安。五代時，南唐罷爲永安鎮，又改爲永安場。宋乾德元年，^(九)南唐析置建寧縣，屬建州。太平興國五年，以永安場來屬，改隸邵武軍。元仍舊。皇朝因之，其鄉保三十四：在城保一，在外保三十三，分統於四區，圖凡五十二。

在城保，圖十。山口鳳山、東山、西山。江口灘江。灘口牛輓。

東區

黃舟保，圖一。宋東鄉。石曰廩石、紗帽。

開山保，圖一。宋東鄉。

洛羊保，圖一。宋東鄉。山口屏山。峰曰器村。溪口洛陽。

安寅保，圖一。宋北鄉。溪口漠溪。

楚上保，圖二。宋東鄉。峰曰金斗。嶂曰楚陽。石曰仙人。溪口楚溪。灘口金鼎。

楚下保，圖一。宋東鄉。峰曰雙仙。

永城保，圖二。宋東鄉。峰曰白雲。溪曰永城。

西區

大南保，圖一。宋西鄉。溪曰大南、桃源武陵。

富田保，圖一。宋西鄉。溪曰富田。

上查保，圖一。宋寶賢鄉。

里心保，圖一。宋寶賢鄉。山口望君樓、登高。溪曰里心二溪。

銀坑保，圖一。宋寶賢鄉。

排前保，圖一。宋寶賢鄉。

新城保，圖一。宋寶賢鄉。溪曰新城。

客坊保，圖一。宋孝義鄉。山口嚴峰、雲蓋。

里原保，圖一。宋孝義鄉。溪曰里原。〔○〕

南區

長吉保，圖一。宋南鄉。峰曰仰天。

將屯保，圖一。宋南鄉。

武調保，圖一。宋東鄉。溪曰武調。

饒村保，圖一。宋南鄉。山口金饒。

赤上保，圖一。宋南鄉。峰曰紫雲。峰曰嚴嶂。

赤下保，圖一。宋南鄉。

隆下保，圖一。宋南鄉。

都上保，圖一。宋西鄉。

都下保，圖一。宋西鄉。山曰寶山、密寶。嶂曰仙湖。

隆安保，圖一。宋孝義鄉。

周平保，圖一。宋北鄉。嶂口浮沙。

北區

黃溪保，圖四。宋北鄉。溪曰黃溪。

藍田保，圖一。宋北鄉。嶺口百丈。溪曰藍田。〔一〕

上黎保，圖二。宋孝義鄉。嶺曰蟠湖。溪曰上黎。〔二〕

淨安保，圖二。宋孝義鄉。

安吉保，圖一。宋實賢鄉。山曰馬鞍、白鹿。溪曰安吉。

桂羊保，圖一。宋孝義鄉。

山水刻厲，風氣綿密。百丈嵯峨，濰江縈繞。金饒南聳，鳳巖北嶂。浮沙、東山環其左，白鹿、西山列其右。其形勝也。

山

鳳山 狀若翔鳳。或傳宋元豐間，有樵者見五色禽，翔集其上，故名。上有東嶽行祠、迎簾觀、極樂寺。下有石笋二，高六七尺，俗名捍門。嶽祠內有王母池、放生池，邑人游觀於此。迎簾觀，宣和中，有一道上來游觀中，貼二符於壁旁，書云：「召和氣，作融風。神府未吏王文卿書。」又題詩云：「不肖年小日，仰服誌公名。恨不生羽翼，裏糧問道情。既而風馬牛，蹤跡游神京。遂失平昔願，至今猶飲聲。此行謁

玄元，邂逅瞻神形。令人遂解體，後嗣皆豪英。可以光大教，振我三元情。」邑故老相傳：文卿，江西南豐人。每出鄉市，遇兒童則戲索一錢，畫雷其掌，令握固，行數步，掌開雷鳴，謂之賣雷公。亦號顛道人。一日，平旦風雲晦冥，登樓視之，不見其處。

東山 一名何山，邑東山也。早朝見日，西覽盡邑中。上有跨鰲亭，邑人所游。下有何潭，環繞縣治。又有開山。宋嘉定間，寇平，父老相賀曰：「大道自此開矣。」因名山口開山，保曰開山保。

西山 山形聳峭，其巔平衍，平山在其北。上有戰坪，五代宋齊丘嘗督戰於此。麓有米洲，北有館前洲，其植多竹，可以紙；其萌鞭筍，又有江南筍，色瑩白，可生啖，亦稱玉版筍。

屏山 山方若屏，上有棋盤石。

望君樓山 峰巒秀麗，層疊如樓閣，若人擬立而跂望者。又名聖峰山。烏石山在其南。又十里，爲禪頂峰。

登高山 在禪頂南，形如覆鍾。邑人重九之所游也。東有石鼓潭。

嚴峰山 山脉自江西廣昌，兩峰雙立，一在縣南，一在縣北。雲興山在其西。又五里，爲朝天峰，獅子嶺在焉。石牛嶂在其東。又十五里，爲九仞石，石纍列爲九峰。

雲蓋山 山勢高聳，雲時覆之。石巖懸絕，瀉瀑如簾。西有五龍山，禱雨輒應。上有石印潭，水面有石如印，亦曰印石。其北有金龍山，上有龍潭，舊傳龍見於此。又有釣鰲嶺，有堆穀峰，有馬尾潦。晉時，將樂人廖棠隱此。棠字實卿，爲人質直，不泛交，讀書是山，終歲不出。內史王羲之遣价徵之，固辭不赴。

金鑣山 跨建寧、泰寧二縣。已見泰寧。上有龍湫，有仙池，有仙棋盤，有腰帶石、跣跡石。絕頂有聖觜石，有玉仙峰。峰尖而秀，舊傳有王姓者，修煉其上，故名。八十四峰，在其東，或云山有八十四面。其巘爲長嶺。其南有石燕巖，有光名石。又有華蓋巖，石磴縈迴而上，巖上有水不涸，又名仙塘。又有黃楊坪，龍潭在焉。潭廣數丈，深莫測，溉田可千畝。風雨晦冥，有龍時出，歲旱應禱，亦名龍歸潭。《大明一統志》：「建寧縣南有龍平潭，相傳有異物潛其中，宋時，其旁居民，有享年百餘歲者。」疑此潭也。又有赤下潭，潭水澄瑩。又有紗帽潭，水上一石如帽。山勢軒敞，水口緊密，謂之西源，居民百十餘家，人以擬桃源焉。源出陳家漈，下大溪，謂之三層漈。又有下坊埂，其西有玉龍峰。凡峰、嶺、巖、石坪、潭、漈、埂，十有八，皆在金鑣山之上。

寶山 厥土白壤，可以陶。藍溪流其下。其坪曰桐樹坪，地勢平夷，是多桐樹。其石曰笏石。

窑寶山 與仙湖嶂相峙。

馬鞍山

白鹿山 昔人於此見白鹿焉。

龍歸山 跨藍田、安寅、黃溪間，蜿蜒若龍，其木多漆。

青山 在迎薰門外。舊有宋陳瓘所書「青山」匾刻，及練江亭。

鄧家山 上有二星石、頭巾石。

蝦蟇山 山突起如蝦蟇。石曰蝦蟇石。

寶峰山 香爐山 羊頭山

李家山 產紙細白。東、西巖在其東，兩巖相峙。俗傳巨藤交亘成橋，人以避地。其後藤斷路絕。器村峰 亦名文筆峰。南有鷄籠峰。

金斗峰 上有巨石三，下有小石七，亦名三台七星石。東有石如鼓，名雷鼓石，撞之鏗然。

雙仙峰 亦名雙旻峰。秦寧謂之雙人石。有五龍巖，石壁兩痕，宛然「山水」二字，亦名山水石。山有九流。潦亦名百丈潦。上有龍潭，又有小潦，水流西城坑，入於大溪。

白雲峰 山勢高峻。與對立者，曰筆架峰。（二三）

仰天峰 一峙特立，金饒第一龍脉也。

紫雲峰 與嚴嶂相峙。其北爲青雲嶺，爲休谷，邑人余志之所歸休也。

核桃峰 是爲儒學賓山。其北曰北山，自仰天峰而來，突起一峰，高出雲表，則縣治賓山。

靈應峰 瑞高峰

高圭峰 其木多松。

百丈嶺 嶺極高峻，藍田之水出焉。是江、閩分界處。越王無諸游獵，築臺於此。

嶓湖嶺 抵江西南豐縣界。上有湖瀦，水不涸。大峰在其東，高五百丈。下有小峰，高可二百丈。

大嶺 上有天仙巖。

虎巖 三仙巖

仙山巖 石上有人跡，下有黃桑坪。

楚陽嶂 界於新城、黃舟溪之間。俗訛爲楚王岡。鄉人壑藝其間，往往得古器，如瓶、碗、爐、鉢，然

蓋地氣結而成，既出，隨見隨毀。是有獅子石。又有馬跡石。

嚴嶂

仙湖嶂 中有仙女湖。

浮沙嶂 壁立而多沙。

雲谷 宋侍制俞豐讀書之谷也。有雲谷書院，怡雲、來薰、致爽、浮香、舒嘯諸亭。

廩石

紗帽石 邑人以其花草占科第。

仙人石 石上有人足跡。

茶磨石

九龜石 其山皆石。內一石形分九指，如龜狀，俗謂之九龜下海。

洛陽村 《書箱雜記》：「太傅張公，宰邵武時，以公牒至縣，道由此村。山路險峭穹絕，題『絕村寺』曰：『金谷花時醉幾場？舊游無日不思量。誰知萬水千山裏，枉被人言過洛陽？』」太傅，張公度也。

川水利附

灘江 縣古名綏城，後訛「綏」爲「灘」。曰「江」者，邑人侈之也。俗名大溪，源出寧化縣中順山，逕龍下保，曰寧溪，東北流至縣治南，曰灘江。自是又東北會泰寧縣水，東下將樂，出順昌，達於劍津。

洛陽溪 是導金饒山源，流人將屯、長吉，至於縣南。有灘曰金灘。

漢溪 導何家山，流爲安寅溪，又流爲開山溪。

楚溪 源流楚上，流入泰寧之大田，中有黃瀾灘，有龍潭。

永城溪 源導江西裡嶺之水，逕黃溪，入於橫口，過於武調，傳於淮江。東南流諸水，至於梅口，會泰寧水，逾竹洲，入於大溪，朝宗閩海。

大南溪

桃源武陵溪 溪上衆山環秀，一溪三級，民居其中，彷彿桃源，又爲淨安溪、桂洋溪。

富田溪 抵綏城口，以合寧都二溪之水。

里心二溪 東導排前保水，西導淨安保水，合於上查溪。是導藍田保，接富家源葉尾諸水，至於規頭。

新城溪 源自寧化，流入都上，爲都上小溪、都下小溪。又爲黃連溪，爲熊家溪，爲碧溪，爲銀坑溪。

里源溪 導源自客坊，至於嚴天溪，與隆安溪之水合。

武調溪 源自永城保，逕黃舟保，以會馮家口之水。

黃溪 源出藍田，中有潭，曰魚潭。

藍溪 源自百丈嶺，又爲周平溪。

上黎溪 導自源頭，逕流水口，與排前溪合。

安吉溪 導捲嶺之水，亦入排前溪。

都溪 源自江西廣昌縣雲蓋山。

金鼎灘（一四） 亂石礚礚，湍水衝激。中有石如鼎。

南門灘

牛軛灘 以形名。水環繞邑治，匯爲何潭。

劉家潭 沿隆下溪，匯爲是潭。流爲三灘溪，合於都溪、藍溪。

擂鼓潭

連家潦、楊家潦、艾家潦 三潦之源，皆自楊家潦，出饒村保，入於大溪。

南街井 水獨清冽。

〔校記〕

〔一〕「山」字，各本原脫，據本書體例補。

〔二〕此處各本原脫「第四曲」一段。

〔三〕「元皇慶元年」，各本原作「元皇陵元年」，據方詩銘《中國歷史紀年表》改。

〔四〕「與聚雲石列并峙」，疑作「與聚雲峰并列峙」。

〔五〕「會仙巖」，各本原作「會似巖」，據下文及《八閩通志·地理》改。

〔六〕「統圖五十二」，下文實列五十一圖。

〔七〕「淘金峰」，各本原作「陶金峰」，據上文改。

〔八〕「源」，各本原作「縣」，據文義改。

〔九〕「宋乾德元年」，各本原作「宋乾隆元年」，據方詩銘《中國歷史紀年表》改。

【一〇】「里原」，下文「里源」。

【一一】「藍田」，下文作「藍溪」。

【一二】「上蔡」，下文作「上黎」。

【一三】「筆架峰」，上文作「文筆峰」。

【一四】「金鼎灘」，各本原作「今鼎灘」，據上文及《八閩通志·地理》改。

閩書卷之二十八

方域志

漳州府 龍溪縣 漳浦縣 龍巖縣

漳州府 在布政司西南六百八十里。東抵同安，西抵長汀，南抵廣東海陽，北抵尤溪。梁天監中，屬南安郡地。大同四年，以有九龍戲江之祥，置龍溪縣。其後，廢置從泉州。隋末，海內盜賊蜂起，唐太宗漸次芟夷，獨閩廣鼓遺孽未殄。嗣聖元年，徐敬業起兵維揚、渤海間。又有梁感者，爲之羽翼，朝廷遣王鈴衛大將軍梁郡公李孝逸，提三十萬衆破之。而梁感之徒卒不剪絕。左玉鈴衛翊府左郎中陳元光，奉命掃除，方數千里間，無桴鼓之警，乃請置一州泉、潮間，以抗嶺表。遂析福州西南地，置漳州，即使元光爲刺史，縣漳浦屬之，其治在古雲霄鎮。開元四年，耆老余敬訥等，請徙治李澳川，以避瘴，爲今漳浦縣。二十二年，改隸嶺南經略使。二十八年，析漳浦縣地，置懷恩領縣二。二十九年，省懷恩入漳浦，而以泉之龍溪來屬。天寶元年，改爲漳浦郡，還隸福建。十載，又改隸嶺南。乾元二年，復爲漳州。上元元年，復隸福建。大曆十二年，析汀州龍巖縣來屬，領縣三。貞元二年，從觀察使盧愬請，徙治龍溪，漳浦縣治如故。光啟元年，刺史王緒渡江，陷汀、漳二州，尋爲王潮所奪。其弟審知，繼而有之。五代晉開運中，朱文

進擅命，以程寶爲刺史。既留從効殺寶，遂據漳、泉二州。南唐時，刺史董思安，以其父名章，改爲南州。宋建隆三年，陳洪進有其地，始奉正朔。乾德四年，復爲漳州。太平興國三年，洪進納土屬威武軍。五年，析長泰縣來屬，領縣四。雍熙二年，屬福建路。元至元十五年，改爲漳州路，隸福建行中書省，城內置錄事司，領縣仍舊。其後改隸不一，語具布政司。至治中，析龍溪、漳浦、龍巖三縣地，置南勝縣，合長泰，領縣五。至八年，(一)立漳州分元帥府。十六年，改南勝爲南靖。二十一年，以新翼萬戶羅良，爲福建行省參政，兼守漳州路。二十六年，陳有定襲陷之。皇朝洪武元年，改爲漳州府，領縣如故。成化四年，析龍巖地，置漳平，領縣六。正德十二年，析南靖地，置平和，領縣七。嘉靖八年，析漳浦地，置詔安，領縣八。四十四年，析龍巖及延平府大田、永安地，置寧洋，領縣九。隆慶元年，析龍溪、漳浦地，置海澄，領縣十。

北枕延劍，南襟嶺表，東控清源，西連汀贛，表以天寶圓峰之峻，帶以九龍錦江之川，提封十邑，廣輪千里。其形勝也。

龍溪縣 東抵同安，西抵南靖，南抵漳浦，北抵長泰。國初分三隅、三廂、十五都。永樂間，省一廂，轄一百五十二圖，後省爲一百四十九圖。隆慶元年，析一、二、三都至九都，屬海澄縣。今三隅、二廂、(一)十都、(二)一百一十二圖。

東北隅，圖三。山曰隆壽、禪月。

西隅，圖二。山曰登高、騰龍、起鳳。

南隅，圖三。

東廂，圖一。

南廂，圖一。山曰丹霞。

十一都，圖十三。宋始安鄉惠恩里。山曰文山。

十二、三都，圖八。宋始安鄉惠恩里。山曰石獅巖。

二十一都，圖十。宋游仙鄉瑞泉、樂仁南、樂仁北三里。山曰名第、銅鉢、羅漢、尼姑、天寶、天公、員山。

二十二都，圖五。宋游仙鄉龍川里。山曰金鷄、鼎山。

二十三、四都，圖十一。宋龍川里。山曰龍鞍、〔四〕漕溪、〔五〕巖口水獅。

二十五都，圖九。宋游仙鄉九龍上里。山曰九龍、石蟻。嶺口華封。〔六〕溪曰北溪、天宮。

二十六都，圖七。宋游仙鄉瑞泉東里。山曰龍山、望月、驚峰。

二十七都，圖九。宋永寧鄉唐化里。山曰鶴鳴、鳳凰。嶺曰萬松。江曰柳營。

二十八都，圖九。宋永寧鄉海洋上里。山曰仰孟、榴山、板尾。

二十九、三十都，圖十一。宋海洋下里。山曰白石、覆舟。

右附郭。

山

隆壽山 在紫芝山左。右有保福山，五代梁建有保福寺，及柴周，建有隆壽院、保福寺、淨衆院。內有月淵亭，宋郭功父詩：「仰攀明月輪，俯瞰滄海淵。乾坤惜形勢，此地何其偏。靈溪九龍躍，仙山一峰

圓。邂逅□邦守，〔七〕所樂多林泉。」

禪月山

登高山 在城西北隅，故名紫芝。上有威鎮、甘露二亭。其麓爲開元寺，寺內有滿月池，昔人建亭其側，種松百株，號曰松關。咸通四年，游奕將王嗣造塔於此，宣義郎劉鏞書《佛頂尊勝陀羅尼經》於塔上，書法遒勁，漳南金石刻文，此爲之冠。山頂舊有臨漳臺，曰半漳，朱文公欲作讀書室，未果。嗣守危禎作龍江書院，〔八〕成公志，而自橫經開講其中，撤臨漳臺，作亭曰登高。後守方來，以漳有先輩高登焉，易曰碧玉千峰，取廖中丞剛詩「碧玉千峰照眼開」之語，且溯朱文公、高東溪之美，作詩以訓後進。顏耆仲、頤仲俱屬和之。後廢爲僧舍。皇朝守王文、陳洪謨、孫裕，相繼復舊。今爲紫陽祠、陳布衣祠、道一堂。

騰龍山 舊名龍亭山。奇石攢起，有亭翼然，俯瞰溪流。

起鳳山 舊名高亭山。與龍亭對峙，宋儒吳勳讀書其上。皇朝成化間，重新儒學，以二山在學前，改名是山。有護國廟，長老言，周世宗時，出師北征，夜夢鐵騎數萬，騰躍雲中，載旗稱漳州護國夫人。世宗問王安在，夫人以足疾爲辭。詰朝，師大克捷，雄、霸、莫三州遂入版圖。跡驗其夢，實王靈彰，卽勅修廟，封王爲順義護國興都王，夫人曰顯贊。宋建炎二年，軍人林佺倡亂，遲明盜武庫兵，率逆徒至廟，受誓戒，出門拔刀戮人示武，忽刀柄自毀，衆駭愕相顧，束手就擒。四年，驍將楊就以兵叛，渡柳營江，破木斗石隘，去郡城僅二十里，民情洶洶。三卜於廟，不然其請。已，賊見沙上馬跡盡滿，跡幾八寸，俱逡巡失色，一夕遁去，其靈異如此。又有日華峰，在登高山左。萬松峰、淨安山在登高山右。已上皆城內山。

丹霞山 土石皆赤，晨夕映日色，若丹霞。故郡東西南北四郊，皆以霞稱。山陰有南山寺，亦名南

山。

文山 卽觀音山。在郡正東二十里。北臨大溪，三面通潮，與鳳凰山對峙。南行爲龍溪山。有龍潭，飛泉灑空。有龍祠，可禱雨。有雙峰如削，高出龍溪之上者，曰鳧翠山，俗名魚刺。文山之右爲水頭山。聳秀於郡東水口。舊志有浮山，在龍溪、龍巖之間。和溪之上有聚落，曰水頭，蓋泛舟溯流，至是而止。官鹽場之北一里許，有山當路，圓如覆甌，在兩山間，故曰浮山，疑卽此山也。又其右爲東山。二山迢遞，來自太平、九龍二嶺，而外擁以同第山。同第山，在郡城南稍東，世傳周匡業、匡物兄弟生此嶺。名「太平」者，以其嶺道坦夷。九龍嶺，則兩山夾峙，中縈石磴凡十里許，路通潮廣，巡檢司在焉。

石獅巖山 在城南。一名南巖山。皇朝慎蒙《名山記》：峰巒奇秀，延袤數里。上多怪石，有若獅子，有若蟾蜍，有可梯者，有如門者。又有半月池、羅漢峰、掛仙亭、寶月巖、南泉巖、烏石巖及圓明石、龍泉、妙峰、玉泉。有五庵。而石獅巖最勝，故以名山。其下清泉一泓，傍巖爲庵。昔無隱禪師居之，畜虎隨使，俗名虎磴巖。巖前虎拜石，云師所畜虎禮拜於此。師塔在其下巖右，有石端好如削，宋刻「薛公橋」字，傍勒《郡南通津橋記》。又有石橋、石門。南泉巖之南，有蝙蝠洞。洞口有萬石室。普陀巖，有石刻普陀菩薩數像，下折爲玉泉巖，有泉出石下。獅巖之上，有石名羅漢峰，其下有紫雲巖，宋僧雪山創庵，有紫雲來覆。山背有寂照巖，今名日照。宋李彌遜詩：「翠合峰巒萬葉稠，雲擎佛宇出巖幽。秋光不到庭陰樹，皎月先明竹外樓。」

名第山 本名天城山，唐周匡物讀書此山，登第後，勅賜「名第」，以漳人及第，自匡物始也。又匡物登第，一時同擢者三十三人，「九有贈之詩云：『元和天子丙申年，二十三人同得仙。』今漳南五里有名第

院，祀匡物。而山又有得仙亭，蓋取贈詩語。劉禹錫詩有「危亭誰結據山椒，名第山人不可招」之句。匡物自題云：「窗外捲簾侵碧落，檻前敲竹響清冥。」

銅鉢山 山勢綿亘數里。內一峰，中窪外圓，如鉢然。

羅漢山 五代唐天成中，王延休憩此，忽聞異香薰馥，得一龜，背有羅漢像，遂建寺，因以名山。

尼姑山

天寶山 去城三十里。五峰峭崿，周迴百餘。上有寶巖洞、芙蓉城、百丈泉、鬼漈坑、漳郡諸山，多祖此。宋大中祥符七年三月，龍溪民丘類網魚溪中，得珠一顆，圍闊三寸七分，中有小珠七顆，如七曜，次如七曜者，不可勝數。以進於縣，縣弗敢留，以上王郡守冕。冕召官屬驗視，皆稱慶曰：「天寶也。王者德至，淵泉則出。又其爲色也，瑩淨明清，化民之象也。」冕列表以進，其詞曰：「臣聞皇猷光塞，天乃効祥，聖德升聞，地不藏寶。前件珠得，非蛇口產異，蚌胎有感，必通自生，煙潭之內，無脛而至。忽居寶肆之中，瑩煌外散於月華，皎潔內含於星彩，此蓋皇帝陛下，齋莊奉道，清淨化民，體乾極以握符，致坤靈而薦瑞，遐稽信史，迥殊照乘之光，洞究祥經，忽類媚川之色。臣握蘭郎署，剖竹侯封，幸逢江海之珍，難藏外郡，願繼梯航之貢於頤內庭。」真宗賜勅曰：「省所進珠，良合盛事，具悉。汝方布詔條，克修貢職，偉此媚川之寶，發爲還浦之祥。可配美於鳳庭，比分輝於龍燭。勤順斯著，嘉羨兼深。秋冷，汝輩好否？遣書指不多及。」冕遂立石公廨，左刻表并勅其上，此「天寶」所以得名也。北望爲玳瑁嶺，俗呼大帽。高百丈，迤邐三十餘里，龍溪、長泰之交。天寶峙西，玳瑁列北，郡屏幃也。枕天寶西爲新嶺，石磴盤迴十餘里，通安溪、龍巖、漳平三縣。道西爲揭鴻嶺，去城西北四十里，極高峻。唐將軍陳元光嘗屯營於此，上有營頭亭，

慕容□〔二〇〕歐陽詹有詩，古時所取長安道。元末有蔡公者，以其高峻，從山腰開嶺，又名蔡公嶺。

天公山 在縣北三十里。上有瀑布，泉飛瀉數十丈，《圖經》謂天公所居。《九域志》謂陰雨時，聞簫鼓聲。

員山 在城西南十里。前後望之十二面，皆有紫翠，故曰員山。麓有大仙巖。大仙者，康仙也。昔有賣藥，自言姓康，家在琵琶坂。語竟，不見。後人立祠祀之。唐時黃碣爲中丞，朝退，每遇之長安市中，見其舉止非常，揖而問焉，自言康長史，居清漳員山下。後碣轉運安南，過漳問員山康長史家安在，咸曰：「山已在目，康家不知也。」碣驅馬造祠，入覩神像，宛如長安市所見。後碣來典郡，欲移祠山椒。一夜，月明如晝，小直防城使陳僚夢神衣羽衣，手綵箋授之曰：「賣藥因循未得還，却因耽酒到人間。有心只戀琵琶坂，無意更登上山。」碣乃止。宋蔡襄《員山廟詩》：「風雅遺芬嶽有神，此山靈祀越千春。彩毫佳句言猶在，翠剡新詞意未真。」

金鷄山 在北溪之陽。而南爲兩峽，與岐山相望。

鼎山 在汐浦社。山高大，圓如覆鼎。絕頂有臍，俗呼鼎臍。山上舊有巖，名猴作巖，古名龍泰巖，以在二縣之交。

馬鞍山 在浯滄社。自龍山發祖。逆水而上，至此有石如馬鞍。

曹溪山

九龍山 在縣北三十里。山北有九龍水，有金溪水。下有寶珠石，舊傳漁人所貢珠，時或飛入其穴。

石蟻山 在縣北四十里。最高絕頂有黏蟻石，亦如莆田石山矣。

龍山 在城北十里。山下有寺，其地宜茶。

望月山 驚峰山

鶴鳴山 一名石壁山。鍊師潛翁養鶴於此，名鶴鳴山。潛翁，隋開皇時人，嘗游九鯉湖，見一叟採葉，心異之，遂下拜乞藥，叟與之數葉，卽失所在。後鍊形此山，不知所終。山下爲雲洞，皇朝邑人蔡烈，讀書其中。上有風動石，高五丈，圍一十八丈，下承盤石，風至則動。北而岐者曰岐山，以其一山而岐峰，與鶴鳴並聳龍江上，延袤十里許。五代時，僧楚熙居此，有石禪床，有題詩石，毀落莫辯。可辯者九字，曰：「保大與許碁尋偃月子」。碁，唐許真人也，自稱高陽人，少爲進士，累舉不第，晚學道王屋山，周游五嶽名山洞府，後從峨眉山，經兩京，復自襄汴，來抵江淮茅山，遍歷天台、四明、仙都、委羽、武夷、霍童、羅浮，到處皆於石崖峭壁題云：「許碁自峨眉山尋偃月子到此。」筆蹤神異，竟莫詳偃月子何人也。後多游廬江間，常醉吟曰：「閬苑花前是醉鄉，拈翻王母九霞觴。群仙拍手嫌輕脫，謫向人間作酒狂。」一日當春和氣候，插花滿頭，把花作舞，上酒家樓，醉歌昇雲飛去。有桃源口，以擬桃源。有誦經壇，石斜壘，色如銀，擊之有聲。有一人泉，以供一人汲。有潛翁巖，有石棋枰。有虛白巖，上覆全石，下竊而平，日華照耀，虛白洞然。有千人洞，黃巢之亂，郡人多避此。有仙亭巖，僧從謙者居之。從謙嘗游石壁山，見二羽士對弈，就之，化爲雙鶴冲舉，餘一棋子，取咽之，遂能辟穀，就此坎石爲室，居四十年。有石室巖，巨石如室，皇朝正統初，有僧絕塵者，修行於此，剏竹引水人樓，廚下具竹，節間生笋，今號瑞竹巖。有瑞龜巖，屏風石。

鳳凰山 中爲萬松嶺，孔道出焉。內抱爲好景山，紆迴起伏，風景奇勝。

仰盂山 山高大峭拔，頂凹如盂。上有田地，又有仰盂巖。

榴山 或名樓山。

定山 故名坂尾。皇朝陳布衣真晟居其下，改今名。

白石山 山多白石，亦名鶴石。是有巨人武。有石磴，內可聚千人。皇朝林魁居是山之下。當吾之世，有丁懋己者居焉。隱居著述，自號玉明子，余與參知劉洪謨，賞薦之朝。

覆舟山 以形名。從此趨入海，與銀同接壤，爲郡外庭。

望高山

華峰嶺 在華峰社，亦名龍頭嶺。高千餘丈，壘磴鑿石，以梯行人。北溪之流經其下，傍有石如龍頭，灘粗石怪，有三磴、二花之名。

九龍嶺 兩山夾峙，中象石磴凡十里許。路通潮州，下有木綿庵，宋鄭虎臣扼賈似道處也。其詳見漳州府建置志。

馬岐嶺 路通泉，福之間。上有亭。皇朝正統間，郡人陳克聰植松夾道，今名萬松嶺。

水西巖

川

柳營江 去城四十里。自漫潭南流，至香洲渡，又南出於兩峽，亘虎渡橋，南與南溪合流，爲福河。旁有福河城，障東偏險要也。舊志：「唐末王潮下泉，福，嘗駐輜重，宿重兵守之，故有『柳營』之號。」按

《白石丁氏古譜》：「唐自高宗朝，有曾鎮府者，以將軍鎮閩。丁之先，有丁儒者，曾贅婿也。及將軍陳政，與曾鎮府更代，曾遂流寓龍溪。政歿，子元光代。元光平蠻開郡。先是，六朝以來，戍閩者，屯兵於泉州之龍溪，阻江爲界，插柳爲營，江當溪海之交，兩山夾峙，波濤激湧，永隔西東。至是，元光陰遣人沿溪而北，就上流緩處，結筏連渡，從間道擊襲諸蠻，遂建寨柳江西，以爲進取。諸蠻悉附，遂轄其地，爲唐化里。而龍溪以東之地，次第渡江，田之，且戰且招，追驚寇於盤陀之下，盡殲之。元光既平潮寇，朝廷以元光知州事，以丁儒爲州承事郎。」然則「柳營」之號，自六朝時有之，不應起於王潮，而陳政之前，有曾鎮府者，皆前此諸志所未載也。上有巡檢司。

錦江 有洲曰許戀，曰烏礁，曰紫泥，江流經焉，分爲南北。南流至海澄界，其北流歷白石、青礁、石美鎮，東與南流合納浮宮之水，入於海。其小水有白水、洋溪，有東港，有汰溪，有金沙溪。

北溪 去城二十餘里。源出延、汀界，合寧洋、龍巖、漳平之水而下華峰，又合長泰諸水，逕香洲渡，歷峽中硤，爲柳營江，與南溪環帶郡城，會流入海。梁大同間，有九龍游戲江上，故名九龍江。宋郡守王冕所貢珠，蓋得之此江。其上游爲漫潭，兩山如壁，渾泓淵涵，流十餘里，九龍游戲，卽在此處。郡人遇旱，咒丹符，沉鐵犁，禱雨其下，視有魚躍，則龍起雨至；蝦蟹起，則雨絕。宋陳淳居此溪之上，故號北溪。

天宮溪 上有天宮山。溪中有石濤，高丈餘，傾瀉潭中，發泡有聲。春夏水大聲細，秋冬水小聲洪，夜聞如更鼓聲，名「更鼓水」。

南溪 北源出禾溪、永豐，南源出銅壺小溪，至南靖合流，東逕康仙，渡員山之陰，東過於郡城，南疏爲

三台洲，南橋亘焉。下至方壺洲，水勢微折，而南束以文昌之橋。其云方壺洲者，橋東水中洲也，以西望員嶠得名。從此曲而抱城者再，乃東逕文山，會於北溪。按《隋書·輿地志》：龍溪縣，梁置。隋開皇十二年，併蘭水、綏安二縣入焉。今綏安近漳浦，而蘭水或卽南溪矣。若古龍溪，則九龍江也。自南溪人注於郡城者，曰東閘、西閘。河至中清橋，會其東，由東閘河陰注於泮宮者，曰龍鬚水。中關而滉漾者，曰麗澤。其旁瀦爲麗藻池，俗云斷蛙池，以夏月絕蛙聲。又有預備倉池、鹽倉池、尼姑池、滿月池，皆在城中。宋蔡襄《南溪詩》：「近郭溪光綠好裁，雨晴波底敞樓臺。蔭堤佳樹千圍合，掠水輕舟一箭開。」

西湖 發源金仙院，南流折而東，瀦爲湖。有泉甘美，可辟瘴癘。古讖云：「員山青，西湖平，出公卿。」宋紹興中，統制陳敏填之，以應讖。

東湖 在東門外，周迴千餘畝。中有十二土墩，人稱郡東羅星。宋紹興間，劉才邵、林安宅、趙汝諧、莊夏相繼修治。今悉變爲平田，土墩半沒矣。

惠民泉 在北門外，泉甚清冽。

溫泉 舊西廂城址下，源通南溪。

天慶觀井 在城中。舊傳漳土水熱，初至者飲之多病，惟此井冽，可辟瘴。凡仕宦至者，必先汲數甕，馳往迓之。

天宮井 開元寺東井

石眼泉井 在城北淨衆寺口。相傳井初鑿深丈餘，盤石阻之，一夕，雷震石裂，甘泉迸出。

巖壇井 八角大井 中心井

漳浦縣 在郡城南。東南抵海，西抵南靖，北抵龍溪。本梁龍溪縣地。唐嗣聖三年，始置漳州於梁山，而置漳浦縣漳水北，今雲霄鎮是也。開元四年，徙州治於李澳川，縣從之。二十八年，析置懷恩縣。明年，戶口逃亡，仍省入漳浦。宋、元仍舊。皇朝因之，其鄉一坊、十三都、七十六圖。嘉靖九年，析二、三都、四都、五都共四都隸詔安縣。轄一坊、九都、五十六圖。復省爲五十二圖。(一一)在坊，圖六。

六都，圖三。宋安仁鄉浦東保。山口大神、將軍。石曰梅川、磨劍、試劍。

七都，圖七。宋安仁鄉永清里。山曰羅山、海雲、馬鞍。嶼曰魚腸、竹嶼。湖曰蠟湖。

八都，圖三。宋常樂鄉塘田里。山曰大尖、婆髻、良山、梁山、高山、棋山、峰山。嶺曰盤陀。江曰漳江。溪曰南溪、緩安。(一二)

火田、鹿溪、溫源。

九都，圖三。宋常樂鄉緩康里。山曰鼓雷。

十都，圖四。宋緩康里。

十五都，圖六。宋安仁鄉含恩里。嶼曰將軍、石城、菜嶼。

十七都，圖六。宋嘉賓鄉常樂里。山口臺山、龜山、燈火、香山。嶺曰虎嶺。嶼曰大桑、小桑。(一三)大嶺。

二十三都，圖九。宋安仁鄉砂澳里。山曰太武。嶼曰小嶺、沙澳、茅嶼、浮沉。

二十八都，圖七。宋嘉賓鄉欽賢里。

八閩極地，汀、漳要衝。東南際海，西北奇峰。前屏梁山，而十二峰並秀；旁環鹿浦，而八餘水交

清。其形勝也。

山

好景山 山巔有石，若蹲虎，一名石虎山。縣治在其麓。去縣東門外百武，有印山，石勢如飛鳳，翅上有巨石，方正如印，曰印石。歲禱雨必壇其上。又曰宋有神巫，飛符攝魅，符著石上如印云。旁有石壁，刻「呂令峰傅公河」六大字，餘不可識。呂，名璫，惠卿父也。

大神山 一曰雲霄山。山後有玉女、仙人二峰。雲霄鎮在其下。是其地多禦人焉。

將軍山 雲霄鎮之山也。以陳元光徵蠻居此，名「將軍」矣。下有陳王墓。初元光葬父政於此，有相塚者，謂山有王氣，元光改葬大峰山，以避之。宋宣和五年，有傭人林機請縣官曰：「陳將軍欲徙塚峰山，反葬雲霄。有磚一坎，在普賢院後。幸命五百工將去。」人以爲狂，已發塚，果驗。遙見舉畚鍤如雲，卽之，獨機在耳。居民携酒食往餉，須臾，則瓶罄豆空。未踰月役畢。有吳人成者過之，見黃旗一帶，自峰山直趨舊塋，鹵簿威蕤，鼓吹傳響。山下人趨視之，新墳屹立矣。而尋訪舊塋，灌莽冥鬱，始知王果徙塚。元光廟食於漳，累封王爵，故漳人亦稱其父曰陳王也。其地又有陳將軍廟，時著威靈，犯者立死。邑民崇禳，多殺生命。宋時泉州有釋法超者，過而戒以因果昇墜之說。爾後將軍霽威，無所害擾。法超居泉北山，閱《藏經》，蓄一鐵鉢以爨。日一食，或不覺過，則不復食。昔昔禪誦，不置卧榻，蚊蟲虱蠹不殺。所著有《辯邪正論》、《修進錄》行世。

羅山 環邑諸山，皆此山發脉，羅列拱揖。上有東羅嶺。其北有慈恩嶺。盤折崔嵬，下瞰深谷。

海雲山 去縣東二十里，壁立端重。頂有石如龜。有田。有清泉，旱時不涸。有峰如蓮花。山半有

海雲巖，又名巖山。

馬鞍山 與海雲山並峙，狀如天馬。又有紫薇山、石洞峰，尖如列笏。

大尖山

婆髻山 與大尖山相距，如椎髻。其東有潦，淙鳴輒雨。

良山 東峰距海，西接南詔、潮陽等界，其高刺天。唐賢良潘存實修業此山，故以「良」名。

梁山 在縣南稍西三十里。有九十九峰，盤亘百里。其高千仞，亦稱梁岳。古記：梁岳，閩中之望也。《方輿勝覽》云：「梁山秀麗而崇圓，又稱圓山。」淳祐志：「唐開元十三年十一月，玄宗皇帝東封泰山，漳浦縣梁山白朔旦出祥雲，如天仙、佛像、麟鳳、花草之狀，彌亘百里，竟月乃息。州以白府都督辛子言，會有詔罷奏，祥瑞乃止。遣參軍事王庭共具牲牢、幣帛、音樂，祝版以謝。貞元六年，福建大旱，觀察使吳湊符當州諸官吏，詣山請雨，復感祥雲，應後三日，大雨，五州沾足。」《名山記》云：「峰有十二，開元中，鍾紹京作尉是邑，改爲二十四：曰蓮花山，中峰也。以爲齊武帝所賞，亦名齊帝石。齊武帝仕宋爲贛令，江州刺史晉安王子勳反，武帝不從，子勳繫之南康郡獄，族人蕭欣祖、門客桓康等，破郡迎出帝，帝率部曲百餘人起義，避難揭陽山，過此，嘗登此山，故石名齊帝。」曰獅子。曰金剛，其峰最高。曰力士。曰雙髻。曰長劍。曰七星。曰八柱。曰觀日。曰臨海。曰晉亭，晉葛洪與其徒居之。唐郡守張登詩「孤高齊帝石，瀟灑晉亭峰」是也。曰青閣。餘失其名矣。史集賢維翰名其山，則有雙鳳、玉乳、錦石、月桂、壽星、紫雲、金鷄、丹竈、香爐之目。《丁氏家譜》曰：置漳州在梁山之陰，山之內紆折迴旋，有田，有村，有溪。溪之名，有長源、錦溪、萬頃、仙溪、盛溪、錦石、垂玉、龍潭。其上有水晶坪，水晶產焉，元遣內監採

取。往，本朝鎮守內官亦搜括其奇，今所遺碎屑，第可爲盞碗而已。上有中峰巖，又有瀑布泉，宋蔡希蓮詩：「會稽之南羅浮北，中有大羅神仙宅。瀑流今古掛長虹，瀉下銀河數千尺。」山之東南盤石上，有穴窟折上，穿如井，水泉湧出，謂之靈泉，常有雲氣升降。山南北兩麓，又各有湯泉。其下有宋吳奉議書室。奉議，名與，見縉紳，好藏書，有《古文尚書音》^二，^四唐宋所無，與家有之；又《師春》二卷、《甘氏星經》二卷、《漢官典義》十卷、《京房易鈔》一卷，俱三館四庫所無，並出與家。鄭樵云：「又《爾雅》云：『南方之美者，有梁山之犀象焉。』漳蓋自宋以來，象常患稼，上古僻遠，而此山隋陳岳宮，宜爲異獸所產，第不知此時梁山果入《職方》與否？審爾，則是山之名，從來久遠矣。」又宋龍圖閣學士葉奭《關西湖記》言，山中時見巨人跡，美菓自熟，不知多數，就啖者失道。其奇絕如此。

高山 在縣南四十里。繇梁山發脉，亭亭桀竪。

棋山 高百尺許。舊志云，鄉人人山採藥，得棋子，因以名山。

峰山 又名鰲峰，在縣東南，鹿溪之涯，自梁山發脉，至是單椒特拔。與隔溪柘港山對峙，爲邑內關。

鼓雷山 一作古雷。在縣東南五十里，南行並海，曲崖險絕，下瞰大江，潮音時至，如雷鼓。相傳葛洪嘗煉丹其上，其竈猶存。其下有井，相傳宋幼主汲井烹茶於此，所棄茶久而成樹，今地傍地多種茶，^二其遺種也。

臺山 高數百尺，平坦如臺。近視，與諸山齊。海上舟人自遠望之，則見特出。

竈山 疊嶂高大，周環四十里。上多怪石，有丹竈，有仙跡，有石棋盤、石碣。多產石蘭及黃精。山

陽有田數十畝可耕。東過尖峰山，至赤湖城鐵竈坑。

燈火山 在縣東，距海里許。海舟夜行，或見山有焰光。

香山 山有五峰，如馬馳鳳翥，每海上雲收日出，翠發淋漓。山麓有靈順宮，鄉人祈禱，衆香具聞。

太武山 一名太母山。上有太武夫人壇。前記謂閩中未有生人時，夫人拓土以居，因以名武。一作姥。其說荒遠。但《列仙傳》稱：皇太姥，閩人，婺女之精，已見武夷山。而閩越負海名山多名太姥者。

有小石城。稱爲秦建德城。山高千仞，周迴百餘里，屹立海端。宋淳祐志云：秦討建德王，伏兵於此。或又稱越王建德避兵於此。蔡如松云：越王句踐至無疆七世，未有名建德者。惟漢元鼎間，南越相呂嘉反，立述陽侯建德爲王，城守番禺。據此，則建德稱王，在漢不在秦，其反，在南越，不在東越。其城守在番禺，不在此也。今按沈懷遠《次綏安詩》，有「在昔漢世宗，開疆窮所欲。餘善既辭師，建德仍伐木。番禺竟灰燼，冶南亦淪覆」之語，則志固有所本矣。其南五里，鎮海衛在焉。東望無垠，振衣其巔，漳、泉風景，瞭然在目。山石多奇，有浴仙盆、仙人跡，旁大石刻「象徑」、「雲根洞」大字。有延壽塔，殊工緻。可坐十數人，高數仞，海中歸舶，望以爲標。又有紫石佛，故老相傳，佛身高約有三尺，而色微白，遍身紫點如豆，大若似錐，鑿不見痕跡，稱云生成古佛陀。今庵已廢，佛失所在。

大帽山 亦名東山。高大圓秀，林木蓊鬱。獨頂上有黃茅，形如戴帽，又名戴帽山。其上有玉川瀑布、新村石鼓、龍漈潭、寶珠石、仙人跡之勝，又有天湖、悟道、普陀、金仙、碧石、龍雲、石獅、弘道、常春諸巖。

摩頂山 邑東北諸山之宗，圓平如佛頂。

後到山 形如雙金，邑中視之，若蛾眉然。左爲白鶴嶺。

龜山 聳立橫列，爲邑東北之背。

磁竈山 其山多茶，有白垠人家，其對爲太江。

盤陀嶺 梁山嶺也。藜薄崎峻，盤桓可十里，人潮、廣道也。嶺有巡檢司在焉。漢南越曰蒲葵關。

唐大中十二載，嶺南節度使楊發詩：「南盡封陲見好山，蒼蒼松桂類商顏。誰憐後夜思鄉處，白草黃茅舊漢關。」按唐李衛公德裕，貶嶺南，次漳浦驛詩：「嵩少心期杳莫攀，好山聊復開一顏。明朝便是南荒路，更上層樓望故關。」發移鎮南海道，出漳浦，寓止驛樓，聞衛公舊題，尋訪不得，翼日得本於士人，爰飭驛吏，更屬其詩。發詩蓋次李韵也。宋時曰葵岡嶺，嶺下有無象庵。昔時猛象出沒爲患，有頭陀吳祖華者，聚徒建庵於此，民居既稠，象跡漸絕，故名無象。彭乘《墨客揮犀》云：「漳浦縣地連潮陽，素多象，往往十數爲群，然不爲害。惟獨象遇之，逐人蹂踐，至肉骨糜碎乃去，蓋獨象乃衆象中最獷悍者，不爲群象所容，故遇之，則蹂而害人。」

虎嶺 一名麟山嶺。路通鎮海衛，山林深阻，舊多虎患。皇朝弘治三年，參議程珙命知縣王臣祭之以文，遂絕，改今名。

西庵嶺庵 一作庵。在縣西五里，五山聯絡。

梅川石 高二尺，旁有「梅川」二字，紫色深入。

魚腸嶼 潮通鹿溪。

竹嶼 居民數百家，歲獲魚鹽之利。

將軍嶼 相傳陳元光駐兵其上。或曰古閩越王號力騶等爲吞漢將軍，使據險拒漢，故山澳礁嶼，皆名將軍。

石城嶼 亂石所委，欹疊若城。

菜嶼 紫菜生焉。

大桑嶼

小桑嶼 居民業漁。其地宜桑。

大澈嶼 小澈嶼 沙澳嶼

浮沉嶼 視潮漲減爲小大，漲若沉，減若浮，海中嶼隱現不常。以上諸嶼，所可指者耳。皇朝嘉靖九年正月，海中山峰並列，忽沒不見，江之三山，併爲一峰，屹立騰空，作樓臺之狀，如此者三日，蓋蜃云。

川

漳江 溪水自西林而出，海水自銅山海門而下，清濁合而成章，故名。又曰以「漳」名郡，自「漳浦」也。水自盤陀嶺至無象鋪，匯而爲浦。昔陳元光之父，至漳，曰：「此水如上黨之清漳」，故「漳浦」名縣，「漳州」名郡，皆本此矣。

黃如江 鎮海衛在此江之上。杜氏《通典》：「漳浦郡，東至大海百五十里，南至大海百六十里，西至潮陽郡三百六十里，北至建安郡二千四百里，東南到黃如江一百里，西南到懷恩縣界一百里，西北到石埭溪百五十里，東北到清源郡六百里。」今「黃如」，名「鴻儒」矣。顧「石埭溪」，尚闕其地。淳祐郡志：「石埭渡，有靈著，王故壘及磨劍石。」《通典》載臨漳石埭渡，是時去垂拱未遠，必有所考。按此當時亦不知其處。

矣。正德志漳浦縣下註云：「石埭溪，在西南界盡處。」又引舊志，以爲江西、閩、廣之交，諸惡少出沒其間，昔人有屯營之跡焉。本名石埭，鄉人訛爲「石神」。其流最惡，人涉之兩足皆黑，謂之烏脚瘡。又未知所引舊志何志也。而癸酉志直以屬詔安之二都，與《通典》及淳祐志俱不叶。當知今古勢懸，山川狀改，聊臆斷耳。今考漳浦西北大峰山之東，有高坑石埭，前亦有渡，流經銅壺，下小溪，經南靖、龍溪，入於海，鄉人呼爲「石神」，而無「烏脚瘡」事。其大峰山，又有別流入詔安東溪入海者，是漳浦西南，非西北。其靈著王磨劍石、試劍石，在雲霄六都，豈石埭亦別有是石耶？沈存中《筆談》載，漳州界有水，號烏脚溪，涉者足皆如墨，飲之則病瘡，行人皆載水自隨。梅龍圖素多病，預憂瘡癘，至烏脚溪，使數人負荷之，以物蒙身，恐爲毒水所濺，兢惕過甚，忽墜水中，自謂必死，然自此宿病盡除，無復昔之羸瘵。按此亦未定著以爲石埭，昔人引用，似亦有誤。山川美惡，時或能異，而東西似不可易。唐人所據者，州郡圖經、《筆談》或好怪乎？

南溪 一名李澳川。其源一自平和五寨，一自南靖龍嶺崎溪，一自盤陀嶺九曲溪。唐徙縣治，卽其處。東流會於北溪。

古綏安溪 源出縣界，東流入海。《隋書·輿地志》：「龍溪縣，開皇十二年，併蘭水、綏安二縣人焉。」《廣東通志》：「大埔縣西北一百二十里，曰高昌山。其下有綏安溪。」註云：「一名梁山，漳浦縣界。」《南越志》：「綏安縣北有連山。昔越王建德，伐木爲船，其大千石，以童男女三千人舉之，旣而人船俱墜於潭。時聞拊船有唱喚督進之聲，往往有青牛馳，而與船俱見。」一名越王潭。南宋沈懷遠有《次綏安詩》：「閩方信阻狹，茲地亦豐沃。蒼山繚萬尋，漲海涵千谷。高秋桂尚榮，隆冬泉更燠。在昔漢世宗，開

疆窮所欲。餘善既辭師，建德仍伐木。番禺竟灰燼，治南亦淪覆。至今遺父老，能言古風俗。陰崖猿晝嘯，陽畝藝先熟。穉子練葛衣，樵人薜荔屋。矜爾爲生微，謨予從不辱。」

火田溪 火田，畬也。凡畬，惟種黍稷，皆火耨。此縣西向盡山，因開畬焉。陳政建宅於火田村，此地也。

鹿溪 源接李澳川。舊識云：「梁山嘯，鹿溪平，此地出公卿。」溪舊流波浩蕩，自皇朝天順以來，地擁沙合，溪流日淺。時或暴雨，則水泛濫，上溯梁山之麓，鄉人多堰陂溉田，陂流交響，其聲如嘯，由是邑多貴人。

溫源溪 在縣西南，兩泉並出，一微煖，一極熱，合流南入縣前溪。《圖經》云：「唐嗣聖間，賈胡經此，浴投十錢，其中泉爲漲溢，浴畢澄止。」

西林溪 源出平和，南逕雲霄鎮，名雲霄溪。

巖前溪

甘棠溪 源出三平百丈漈。昔釋義中自潮而漳，過此溪，飲水而甘之，上流有樟樹花浮至，其大異常，因沿流得福地止焉。今名馬口溪。東過於橫口，又東至浮宮，入於海。

西湖 縣西門外。宋令趙師緡所開。周圍五百一十五丈，以坤申之水爲長生，且以制梁山之離火。

蠟湖 舊名淡溪。忽有蛇魚，不知何始。或云陳元光教民蠟祭，建廟於此，後訛爲蛇。

鑑湖 縣東三十里。周圍二里，水清如鑑，其穴通海。

傅公河 入注於縣治。

射圃河 亦在縣治。

龍巖縣 在郡西北。東抵漳平，西抵長汀，南抵南靖，北抵尤溪。本晉新羅地苦草鎮。唐開元二十四年，置汀州，因升爲龍巖縣，以屬之。大曆十二年，始割隸漳州。宋元仍舊。皇朝因之，其鄉一坊、十里、百有五圖。永樂間省爲六十八圖。成化五年，析五里隸漳平縣，凡一坊、五里、三十五圖。後省爲二十九圖。隆慶元年，析集賢里五圖，置寧洋縣。凡一坊、四里、二十四圖。(六)

在坊，圖八。山曰龍巖、東寶。泉曰靈源。

表政里，圖三。宋鐵石鄉。山曰九侯。溪曰曹溪。

節惠里，圖一。宋鐵石鄉。溪曰硤溪、磜頭。

龍門里，圖六。宋鐵石鄉。山口奇邁、紫金。嶺曰石羅、倒嶺、砦門、九曲。溪曰小溪、羅橋。

萬安里，圖五。宋九龍鄉。山曰大宮、高第。嶺曰莒林、鴈石、東溪、迷雲。溪曰蓓溪。

東寶環左，紫金峙右，奇邁前揖，九侯後擁。三川若帶，兩峽如門。其形勝也。

山(七)

北砦山 縣治主山，發源九侯。至城北特起圓峰，亦名後山。

大砦山 在城中。一名官砦山。宋令趙性犬、趙崇揆因而城之，曰趙公城。山西有鄒公廟。鄒，名磐，固始人，從王審知入閩，平汀寇，鎮鴈石有功。

清高山 在城中。積石峻聳。

黃巖山 在城中。丹崖壁立，下有黃巖書院。

龍巖山 邑人潮守王源記云，渡龍津東行四里許，有黑石尖峭，削列鎮□□□□□麓者嵌巖面北，(一八)一大石洞，邃若堂奧，頂底寬平，約危坐二百餘人。洞頂青白小龍紋，紛然不可枚數。壁右湧出一條如柱，黃色鱗甲，若真龍頭角，手足不露，至頂而止。左一條青色，附壁而上，蜿蜒緣頂至簷，頭角鱗鬣宛然。口頰間有竅滴碎水，錯落如珠。洞前躡級而右結土臺，可植花木。大洞左一小石洞，前後有罅，當欹仄人，若畫舫，齋闊僅一丈，長如闊之五，頂上小白龍紋，簇簇小洞。左緣磴穿峽而上，有石狻猊，如舞躍俯伏。前有盤石，夷然可坐十餘人。花木蕭森，翠色可挹，天風時至，如聆雜佩聲。巖之上，怪石駢列，不可名狀。巖洞依三台峰，重巒疊嶂，珍藥奇花蔽地。胡麻、地黃、烏芋、橘柚、絳桃、芙蓉、黃菊、紫芝、紅碧滿山。澗壑五色，璀璨眩目。雲氣晶晶，罩其巔。諸山水少，惟有一脉泠泠，循山腋至廟右淳泓，號龍湫井。遇旱，吏民禱雨輒應。廟下有池，水清瑩，魚若懸空。兩石峰駢列在巖後。巖東三台峰，西望縣治，樓閣市井環羅，長虹卧波。天晴欲曙，遙見城郭川原盡白。良久，三台峰頂，駕出圓象飛影，龍川如金盤濯浪，水光閃爍，或煙霞蔽虛，游衍者登盤四矚，神思飄映，真南閩特勝也。

東寶山 古志云，每風雨晦暝，常有寶光浮動。山腰有二石分峙，俗名玳瑁石。下有東寶山門，又有龍井洞。山麓舊產銀砂。中爲翠屏峰，下卽龍巖洞。左爲涼傘峰。東寶在右，涼傘在左，屏峰在中，統名三台山。腰有嶺通漳平。

九侯山 在縣北三十里，九峰列峙，尊若公侯。《通志》云，峰列如猴，名九猴矣。前志又謂之筋山，謂其山支麓，舛互如身絡筋。又云唐武德初，有惡少聚土神允義侯廟爲盜，雷大震，盜手足筋脉皆攣縮。

吳與《圖經》曰：「九侯，傳夏后之祀。又云筋山屏盜，然則二山也。」其謂「傳夏后之祀」者，《圖經》謂夏禹庶子封於會稽，其後子孫九人，人閩沒而爲神，各主一山。又《史記》：少康庶子封於會稽，二十世至句踐，又六世至無疆，爲楚所滅，子孫散海上。今龍巖、詔安各有九侯山，或當時所居也。

奇邁山 一名九峰崎。嵯峨拱揖，旁峰尤奇，形如襲帽。

紫金山 五峰秀峭，壁立千仞。旭日含輝，夕陽倒影，土石皆紫。上有天然池，游魚歷歷其中，下有赤水巖。

天宮山 在縣北五十里。一名天公。《圖經》云：常有雲氣覆之。陰晦時，或聞簫鼓聲，故曰天宮。《一統志》云：唐初有寇至，爲雷所擊，因而就擒，曰天公。

高第山 山側有高第嶺，縣志作「高地」。山在縣東百餘里，地高而危，層巒聳翠。

梅亭山 元祐教授林公說居此，築亭植梅，自號梅亭。

登高山 虎嶺山

烏石山 在縣西南二里許。山頂有小石室，曰石香爐，爲陳真佛所居。真佛，白土社人，少飯牛孳息，辟穀此山，不知所終，或曰尸解。南麓有巨石，峙官道旁，曰烏石頭。

東山 在縣東南。山形蜿蜒，夾小溪與烏石對峙，縣治視之，若龍虎然。

錫帽山 縣治學宮，俱賓此山。上有文峰塔。

上方山 縣南六十里。適中驛在其下。

雙髻山 縣西五十里，最高且勝。山頂有寺，每中元會，自鄰境至者數百人。

赤巖山

觀音座山 縣東三十里。高數仞，當龍川水門，勢極險阻。

傅溪山 在觀音座外。圓秀回峙，爲東北方之障。

龍宮山

將山 兩峰極秀，俗傳仙人尸解處。

鐵貓兒山 在鐵石洋。特起圓阜，如貓內顧。龍川諸水經其下。

壽山 縣北四十里。故名孝山。縣官始至則祭之，謂「孝」，凶名，或暮乃入。知縣黃廷圭，改曰壽山，自是不祭，而皆無恙。

胡村山 山有丞相巖。宋丞相文天祥經此，有詩懸書石壁。考《文山集》，景炎二年正月，移屯龍巖，三月至梅州，則題詩此時矣。

黃公山

石羅嶺

倒嶺 一名卓嶺。盤曲而峻，嶺嶠有倒勾彎。前志作「到嶺」，謂嶺北有南墩鋪，嶺南有坂寮鋪，各七里至此。文丞相嘗駐師焉。

砦門嶺 連上杭界。

九曲嶺

莒林嶺 有二水，一入龍溪，一入長汀，趨程鄉。

鴈石嶺 與皞林嶺對峙。皞林，舊名惱林。長林陰翳，有越貨者，中有鴈石巡檢司，巡緝之。嶺北爲鴈石渡，上流有石如鴈。一曰硯石，以嶺石可爲硯。

東溪嶺 嶺脚有溪東流。

迷雲嶺

黃土嶺 在縣北，接沙縣界。以土色名。其水流入延平。

均嶺 在縣東北，汀州、沙縣兩分界上。名曰均嶺，謂水自此均分也。一南流入九龍溪，一北流入九溪，趨福州。

大海嶺 在縣北。盤踞數十里，與沙縣接界。其水流歸福州。

胡巖嶺 縣東北百里。峻絕摩空，難於蜀道。

三峰嶺

獅子巖

石鐘巖 巖之爲邑山。多洞穴之勝，有白鼻嶺、赤水巖、白砂巖、聳池巖，而石鐘爲最。皇朝令吳以忠《鐘巖記》：「自獅子巖西，山行數十里，涉澗，北行田間，稍折，最後渡小澗，復山行五里許，水聲濤濤，是爲西溪。白巖前流來者，謂巖當不遠。時自輿中褰帷望之，未數里，忽石崖壁立，數十百丈，稍右一石，山秀削端嚴，間則巖在焉。溪不可舟，又不可輿，第聚石比板以渡。溪側有道人來迎，導至巖前，亂流而西，登崖，則巖下、巖際乳穗駢垂，最長者下垂離地僅尺許，地中石依附上聳，圓秀如鼓，從者驚詫歡呼，道人謂，未奇也。稍前，路漸折而南，上篁叢中，道人編竹爲門。過此，則巖扉弘開，狀若倚蓋，左高右下，右

額石紋攢蹙，多旛旒纓絡之形。巖高可三丈，橫倍之，深丈倍焉，若一廈而三級：前級最深廣，巖右石垣迴合二級左右，石脚插入巖中，左迴伏，彎環如象，右昂起如獅。中級砥平可席。少憩，從者四出搜奇，已報東壁上有石室，伏陽溫暖，索火躡觀之，中有石柱，上下連屬，柱上玲瓏，刻畫如浮屠。後一級遙望東壁，石影若壯士，橫肩距石奮怒。右壁下石柱，剔秀如鰲足，方諦觀之，忽水滴巾幘，因仰見巖頂，石乳所結，古木生巖石間，斜出如蓋，其根抱石盤，曲如虺蛇，數百年物也。至上巖，門稍狹，巖地如雲母石，數步內昏黑，得火乃行。一石如蓮花，花心有無根水二節駢蹙，有文如蓮瓣。受梯垂石，上卷似蓮葉。循此西，有石倒懸不殊，又如未舒菡萏。自此四維上下，皆石乳，玲瓏穿虛，或乘空下垂，或從地突起，飛走生植，屋宇雲霧，器皿世之所有，無一缺者。火光所燭，通透瑩徹，隨脆折。好事者，或持出巖外，得風化爲白石矣。巖中支洞甚夥。南一洞，深不可測。道人云：『昔有繫繩於腰，把火深入，聞水聲乃出，引繩得五十丈』，當不誣也。稍西，巖愈深暗，倍用炬火，從以鼓吹。前數步，見左壁上，怪石林立，如帷中羅漢，雲際如來，列坐禪榻上。又有石自壁下，斜出洞中，昂首若龍，背負諸妙相。從者或出其背，或俯其下。前數步，星然有光。迫視之，則巖頂石穴透漏天明也。命從者掖而登，二十步，見三卧石直達穴口，旁縮中隆，底平闊若鐘，巖之得名，其以此乎？下繇故道出，石壁上有石如嵌，撼不可動。回至巖合處，徘徊久之，呼酒，立盡數觴。時從者報奇疊至，瞻矚之而已。下循中巖，左折數十步，有巖差小，石根沙泥色微綠，或云可煉爲藥。再進不復得矣。道人復云：『隔溪石崖多奇，但榛塞不可到。』余口：『卽不可望乎？』遂同步沙灘上，面崖坐。偶見旁三石，左右突而中平。踞石中置榼，酒數行，水光山色，倒人盃中。俄天風震撼，四山皆響，凜不可留也。』

川

龍川溪 環繞縣郭，受汀州、上杭、占田諸溪水，歷龍門嶺，環繞縣西，會羅筋諸溪，環繞城南而東，到鴈石。舊志名東溪。

曹溪 源出表政里，從登高山下入於龍川。有曹姓者居此，故名。流至隱潭，入於龍川。隱潭者，以其漩渦縈繞，幽隱深僻。

礧溪 源出萬安里，灘流箭急，多石礧。

硿頭溪 溪有大石如廈，水至此噴有聲，硿石聲也。硿溪入焉。

小溪 源出龍門里茶洞，其流清淺，潈折而趨縣治，入於龍川溪之幽勝，或比武陵。

羅橋溪 以古新羅地得名。源出龍門里大小池，合流而行，南注爲石鼓潭，東匯於甕口潭，又東南爲傅軍灘。龍川之水，入觀音座，會傅溪諸水，循石峽，峻急險怪，舊不可艇，今闢成港。過鴈石渡而達漳平。

龍溪 源出連城界，至寧洋界，縈紆三百里，入龍溪縣九龍溪。淳祐志謂：昔人聞溪有龍香氣。

筋溪 源出筋山。

傅溪 發源高平章山，下出蔣武，入龍川。

冢嶴溪 一名下惱。後改今名。發源神前，入於龍川。

蒲山溪 發源古田，流入平西驛。

石鼓潭 在縣南三里。石側潭中，倒照如鼓。

靈源泉 在東寶山左。巔有巖，其孔旋折而入，內寬丈許。水清不竭，常有雲氣。皇朝成化間，令韋濟祈雨有應，立石曰天瓢。

溫泉 在塗潭社。四時可浴。一在小溪社，熱氣尤盛。

上、中、下三井 上井源出石址。中井出城址。下井乃清高山之西源，自地湧出，蓋伏泉也。

〔校記〕

〔一〕「至八年」，據上下文及方詩銘《中國歷史紀年表》，當作「至正八年」。

〔二〕「三隅」，「廂」四字，各本原脫，據本書體例補。

〔三〕「十都」，下文實列十三都。

〔四〕「龍鞍」，下文作「馬鞍」。

〔五〕「清溪」，下文作「曹溪」。

〔六〕「華封」，下文作「華峰」。

〔七〕「邂逅」下，各本原闕一字。

〔八〕「危嶺」，《八閩通志·秩官》作「危嶺」。

〔九〕「三十三人」，下文作「二十三人」。

〔一〇〕「慕容」下，各本原闕二字。

〔一一〕「復省爲五十二圖」，下文實列五十四圖。

〔一二〕「綏安」，下文作「古綏安」。

〔一三〕「小桑」，原作「小嶼」，據下文及《八閩通志·地理》改。

〔一四〕「古文尚書音」下，各本原闕二字。

〔一五〕「今地」，據文義，當作「今井」。

〔一六〕「二十四圖」，下文實列二十二圖。

〔一七〕「山」字，原置於「東寶環左」句上，據本書體例移。

〔一八〕「削列鎮」下，各本原闕五字。

閩書卷之二十九

方域志

漳州府 南靖縣 長泰縣 漳平縣 平和縣 詔安縣

南靖縣 在郡城西。東抵龍溪，西抵龍巖，南抵廣東程鄉，北抵龍巖。本龍溪、漳浦、龍巖三縣地。元至治中，以險遠難控馭，析置南勝縣，在九圍礮山之東。至元三年，畚寇李勝等作亂，殺長史晏只哥，時同知鄭晟、府判喜春、萬戶張哇哇討之，失利。邑人陳君用，襲殺勝，遂徙治於小溪瑄山之陽。至正十六年，縣尹韓景晦以其地僻瘴，又徙雙溪北，改爲南靖縣。皇朝因之。其鄉舊轄二坊、七里，統圖七十二。宣德七年，省一坊，轄圖二十七。後增二圖，共二十九圖。正德十二年，析二里隸平和縣。今轄圖一十七。〔一〕

在坊，圖一。

習賢里，圖五。山曰歐寮、鏡山、寶珠。嶺曰峰蒼。澗曰峰蒼、三脚。潭曰海子。

歸德里，圖二。山口紫荊、麒麟、翠微。

繇義里，圖二。山曰鵝頭、湖山、峽口、圓山。

水豐里，圖四。山曰金山、浮山、傲嶺、榜眼尖。溪曰深渡、三圖。

居仁里，圖二。

山川盤互，土地平衍。大帽後峙。鵝頭前揖，圓山堀起東南，鏡山屹立西北。蒼峰人雲，翠流環壁。其形勝也。

山

歐寮山 縣主山也。從峰蒼嶺來。又名大帽山。又名三鳳。後峙五峰，端嚴峭拔，周迴百餘里。禱雨多應。其旁峙者曰鏡山，曰寶珠山、紫荊山、麒麟山、翠微山，皆摩谿而擁平疇。其南爲鵝頭山、湖山、鼓旗山，則几案之層巒，縣治類焉。溪流逕峽口山之下，而東出。其外有圓山，崇圓峻拔，左郡右邑，百里之內，風雲應之。

金山 在縣北。上尖下侈，形如金字。中有一峰，突起如老鵝頭，俗呼鵝髻山。

浮山 一名浮丘。在縣北八十里龍巖界。和溪之下，有鄉落曰水頭，舟行逆水，至此而止。此山當路，形如覆甌，單椒特拔，不見連陵，如浮至也。山之陰，有廟曰東館，祀玉參之神。宋高登《東館廟記》云：「吾里浮山之陰，有神靈異。問之耆老，曰：『王，彭城人也。姓玉諱參。大唐之際，龍紀之初，肇興此土。此土之人，立廟崇奉，競趨乞靈。』每正月上元，社衆殺牲行酒，慶王華旦。兵興，淫祠率毀，惟王廟歸然。漳浦稱筆路功，必曰玉鈴陳將軍元光，而鮮知王，豈當昭宗之末，干戈雲擾，王實再造此邦乎？」按玉參姓名，史乘無考。鄭西塘俠，爲《吳興太孺人王氏墓誌》：「王本瑯琊，自東晉肅侯彬，始遷於閩。其後子孫，世居龍溪。龍溪分置，是爲漳浦人。唐末有檢校司空彥昌者，當寇亂之時，獨能扞圍強梁，爲鄉

邦依。」按王彥昌，舊志不載，賴鄭存之。豈唐末卽龍紀，玉卽王字，參卽彥字？歲久碑滅，土人舉其偏旁，相傳訛謬爲「玉參」耶？存之以俟博識。

橄欖山

榜眼尖山 一名林璧山。山出水晶。以李貞生此，故稱今名。

西天山 亦名獅山。列障如翡翠成屏，郡城望爲西宸。其麓爲石盤山。

虎頭山 在縣正南。秀色削翠。其下有湖。

峰蒼嶺 以峰高色蒼得名。石磴盤迴，路通贛、汀二府。

川

雙溪 其一大溪，發源平和縣清寧里。自大溪峰，歷銅壺、洪瀨、西場、寨下，趨吳田、仙人渚、黑潭，至於縣前。其一小溪，發源永豐里龍巖縣界，自員沙坂場，歷金山湧口，趨龜洋、下磴，至縣前，與大溪合，東流至峽口，西渡爲府城南門溪，入海。小溪之水，爲深渡溪，源出龍巖界。大溪之水，爲三團溪，源出上杭縣界，其流徙靡常也。

古舊溪

海子潭

峰蒼澗 源出峰蒼嶺銅山寺前，至新寨，過仙橋，而入雙溪。

三脚澗 源出峰蒼嶺，逕三脚橋，入深渡溪。（一）

溫泉 泉有四，永豐里二，歸德里一，清寧里一。

長泰縣 在郡城東。東抵同安，西南抵龍溪，北抵安溪。本隋泉州南安縣武德鄉。唐乾符三年，邑長張進思始置武德場，以便輸納。文德元年，改爲武勝，尋改武安。五代晉天福八年，南唐升爲長泰縣。宋太平興國五年，邑民楊海等，以其地去泉州三百餘里，期會徵輸不便，請泉州林金吾轉奏，乞捨遠就近，遂改隸漳州。元仍舊。皇朝因之。其鄉一坊、八里，統三十六圖。今省爲十二圖。

在坊，圖一。山曰羅侯、石岡、鼎山、西峰。

人和里，圖二。宋歸集鄉。

欽化里，圖二。宋歸集鄉。山曰天柱、雙髻。洞曰白雲、石槽。

方成里，圖一。宋歸集鄉。

恭順里，圖一。宋歸集鄉。山曰吳田、仙人棋。

彰信里，圖一。宋康樂鄉。山曰陳婆。

石銘里，圖一。宋康樂鄉。山曰良崗。嶺曰鸞鵲、下翁。石曰官七代。

旌孝里，圖一。宋康樂鄉。山口鼓鳴、董奉。石曰寶珠。

善化里，圖一。宋康樂鄉。山曰筆架。嶺曰七寧、磨峰。

鳳山、鼓鳴擁其後，雙髻、鼎山植其前，崑山、天柱踞其左，西峰、吳峰峙其右。晶山翼勢，龍津注波。其形勝也。

山

羅侯山 自良岡逶迤入縣治，縣枕其門者，羅侯山也。左瞰大溪，爲新寨山。其有口水晶。稍北曰重桂。其南登科山。縣壤故壑，是環五山，皆城中山也。

石岡山 一名石高。學宮文峰也。嘗掘地得古磚，方二尺許，中有墨書，宋景定元年埋。識其文云：「石岡平，四山明。文星現，賢才生。」

鼎山 縣治案山。爲龍溪界。

西峰山 西峰之外，圓立如螺形者，曰螺山。又遠曰吳峰山。

天柱山 在縣東五十里。最高，巖洞殊勝。上有屏風石，高九丈，闊五丈，劖「天柱巖」三字，如苔蘚紋，各闊三尺。東西南北，有四石門，古名仙門、佛門、人門、鬼門。又有石室、石庫、石梯、忘歸石、盤陀石、百丈巖石、象鼻巖石、觀音巖石、一線泉、應潮泉。應潮泉，兩水合流有聲，潮至卽寂。最東，則暗水泉，泉出石下，聲隱隱如絃，不見流處。有香爐峰、大帽峰、仙人亭、劍春橋、超凡閣，又有海濤巖，勢至巖，爲二十奇。宋時，龍溪人有楊虔誠者，年十四，棄俗慕道，歷住名山，偶於天寶巖夜坐，遙見山中有天燈、雲旗之異，遂來。自古谿、吳峰，至是止焉。有犬侍行，蛇繞地，若尋覓寺址者，遂建庵其處。後鍊氣闕形，莫知所之。邑令曾循《天柱山記》：「長泰縣天柱，爲臨漳第一勝處。有天燈、雲旗之祥，石屏、石柱之秀。高峰鎖雲，四面斗絕。下臨塵寰，一目千里，特以深入巖崖，不接闔閭，登陟良勞，人跡罕到。」皇朝曹學佺《游記》：「是山多石，石所會處，爲一區。大抵平者爲巖，凹者爲洞。又或其下爲洞，其上爲巖。其絕頂有紫玉峰，可東望日出，而下觀海。兩峰駢峙，而東峰尤高。東至大海，西至潮、汀，山北暨溫陵，悉人望中。折而東南，曰朝天嶺。嶺高峻，故通京、省道也。有天成洞云。予以萬曆甲辰，與林德芬、戴亨融至

此山中，時方春月，聞衆山子規啼聲，如在平地。石上落葉，堆積如土，樹生其中，皆擢本合抱，其高且奇如此。

雙髻山

吳田山 一名曷山。泉流成渠，其高可田。絕頂有石室，祀山神，禱雨響應，祈夢靈通。山左爲蜈蚣山，昔有沈部公彬，嘗自指葬穴，以示家人。後開墳，見有漆燈石臺，中有銅牌，篆文云：「佳城今已開，雖開不葬埋。漆燈猶未滅，須待沈彬來。」其相近有大尖峰、小尖峰。

仙人棋山 上有石棋盤，體畫分明。

陳婆山 在縣正東五里。顏色少木。又東曰鼓山，有仙跡石。

良岡山 在石銘里，縣主山也。首自泉之湖頭，循安溪日觀而來，盤礴於縣西北。大而端秀，距縣五十里。山麓有良岡寺，上有龍鬚泉，瀑布出焉。有小大二潌。山之脊，其懸崖頰首者，曰翁婆石。石後有假鈔池，深廣約十餘丈，旱天不竭，其下流爲龍鬚瀑布，相傳昔有人在此造鈔。有大盤石，大可四畝餘。上有瓦屋，祀本山神。舊傳以爲飛騰而至。祠前有磁爐三，貯施錢其中。俗多祈貸，許貸則取錢還息。其里云石銘者，《太平廣記》載：「《宣室志》云，泉州之南，有山焉，峻起壁立。下有潭水，深不可測，周十餘畝。中有蛟螭，常爲人患。人有誤近，或馬牛就而飲者，輒爲吞食。泉人苦之有年矣。由是近山居者，咸挈引妻子遠徙逃患。元和五年，一夕，聞山南有雷暴，震數百里，若山崩之狀。一郡驚懼，里人泊牛馬雞犬，俱失聲伏地。屋瓦交擊，木樹顛拔，自戌及子，雷電方息。旦往視之，其山摧墮，石壁數百仞殆盡，俱填其潭，水溢流，注滿四野。蛟螭之血，遍若玄黃。而石壁之上，有鑿成文字一十九言，字勢甚古，郡中

士庶，無能知者。自是懼者浹息，遷者歸還，結屋架廬，接比其地。郡守因之，名其地爲石銘里，蓋因字爲銘，且識異也。後有客於泉者，能傳其字，持至東洛，故吏部侍郎韓愈，自尚書郎爲河南令，見而識之。其文曰：「詔曰黑視之，」鯉魚天公，界殺人牛。壬癸神書，急急。」然則詳究其義，似上帝責蛟螭之詞，令戮其害也。其字則蝌蚪篆書。又云，漳、泉接境，縣南龍溪界域不分，古來爭競不決。忽一年，大雷雨霹一山，石壁裂，壁口刻字：「漳、泉兩州，分地太平。萬里不惑，千秋作程。」南安、龍溪，山高氣清，其文猶可識。又云，唐開元中，漳、泉二州，分疆界不均，互訟於臺，制使不能斷。迨數年，辭理分亂，終莫之決。於是州官焚香告於天地、山川，以祈神應。俄雷雨大至，霹靂一聲，崖壁中裂，所競之地，拓爲一逕，高千尺，深僅五里，因爲古道。壁中有古篆六行二十四字，皆廣數尺，雖約此爲界，人終莫識。貞元初，流入李協辯之，曰「漳、泉兩州，分地太平。永安、龍溪，山高氣清。千年不惑，萬古作程。」所云永安、龍溪者，兩郡界首鄉名也。

鼓鳴山 距縣東北四十餘里。《圖經》云，風雨晦冥，則聞鼓聲。前志云，山洞窅窅，風吹成聲。唐元和二年，秋不雨彌月，鄉民鄭元善率衆告禱，俄鼓聲四起，雲物油然，霖雨十日。時以有歲，衆赴南安縣，上其事於朝。三年，勅山爲鼓鳴，封其神爲威澤王，建祠祀之。

董奉山 仙人董奉所游，上有丹竈、棋枰、琴室。是山合良岡、鼓鳴、吳田、天柱，爲泰邑五名山。

筆架山

高瀨山 上有風動石。

內方山 下有礦洞。

燈火山 火燄山 覆釜山

產坑山 與長腰林山，疊嶂相連，可候風雨。

待詔山 在縣北。國初縣民林初仔，以孝子被旌，里人在此待詔，故名。初仔，農人也。父遇虎，按於地，初仔直前搏虎，虎懼而退。事聞，詔名其里曰旌孝。

金岡湖山 金沙出焉。

大帽山 山有石如角形者，曰龍角山。相近有鑼山，舊傳常有鑼鳴。宋張漢登第時，二山相應而響。

白桐山 在縣東北。上有觀音巖，下有隘，多樹木。又名桐林。

山後山 雙芹山 馬岐山 東山 寒鐘山 芹山 北營岐山 龍岡山 崎山 白泉山 占九宅山

東稜峰 接安溪界。

黃辛峰

黃西田峰 上有蛤蠣殼。

鷓鴣嶺 下翁嶺 上寧嶺

磨峰嶺 一曰磨鎗，接同安界。

良岡嶺 犁壁嶺 演柄嶺 軍鋪嶺 東山嶺 青洋嶺 角嶺

佛手巖 石形如覆手，下可容百人。

真應巖洞 白雲洞 石槽洞

官七代石 右上有「官七代」三字。

川

龍津溪 在縣東南城外。源發安溪界，繇縣東北境，入善化里，歷旌孝、石銘、彰信等里，合諸溪水，至戴乾分流，又合至歐馬分流，又合抵城東，繞縣治而西，過欽化、洪溝，又分爲兩溪，歷人和，復合於欽化里古溪，至雙溪口，入龍溪界。凡水皆東，惟武德水西流，乃逆而合九龍江，以入於海。其異源同匯入於龍津者，曰青坑溪、百丈溪、內方溪、芹果溪、林口溪、洋山溪、牛皮、葛盤、南樓等溪。其支曰巖溪，曰三江溪，曰東津溪，曰南津溪，曰錦溪。旌孝里溪畔，有石高二丈許，常有夜光，名寶珠石。

馬洋溪 繇恭順里洪巖林發源，有二，歷方化、^(四)欽化里，灘途巖險，有虎渡等橋，至東溪入龍溪縣界，合北溪。又有李宅、可壠溪，俱入馬洋溪。

高層溪 源發安溪縣界，至石銘里大鷓鴣崎灘，入龍溪界北溪。又楊陶溪，發源正達山，至下寮，亦入龍溪縣北溪。

潮潭 鷓鴣潭 緯絲潭 鳳尾潭 蛟龍潭 古井潭 楊婆潭 福信潭

西湖池 在縣治西。^(五)宋淳祐間，令鄭師申以縣治水破庚辛，易田爲湖，作亭其上，匾曰待月。尉呂橋有記。

湯泉二

漳平縣 在郡西北。東抵安溪，西抵龍巖，南抵南靖，北抵大田。本龍巖縣地。皇朝成化三年，以溫

文進之亂，龍巖縣民林廷琥等言居仁、聚賢、感化、和睦、永福五里險遠難制，請別置縣。巡撫都御史滕昭爲奏聞。至七年，遂析置漳平縣以屬。轄五里、三十三圖。嘉靖十四年，割聚賢里九圖，置大田縣，屬延平。今轄四里、二十四圖。

居仁里，圖四。宋龍巖九龍鄉。山曰仙帽、石鼓、凌家、龍亭寨、高巖、銀瓶、小都。峰曰貴人。嶺曰安祖。井曰石龍、神螺。

感化里，圖五。宋九龍鄉。山曰石門隔、雲峰。峰曰洞峰。嶺曰牛頭相觸。洞曰龍門、陽山、蝙蝠。湖曰象湖。井曰青龍。

和睦里，圖八。宋九龍鄉。山曰九仙、花瓶、碧靈、天柱、馬頭溪、白巖、巖頭。嶺曰產孟。湖曰三清。潭曰葫蘆。泉曰白泉、共母、鹹水。

永福里，圖七。宋九龍鄉。山曰龍尾、三尖、螺髻、猛虎、大壯。嶺曰三重、朝天。湖曰三溪林。

銀瓶臂左，龍亭翼右，覆鼎揖前，石鼓擁後。平潭清澈，羅石重關。其形勝也。

山

仙帽山 卽西霧山。自九仙峰發源，至是雄結巍峨，聳出秀麗。相傳鄉人避寇於此，寇將迫，忽西偏大霧濛濛，鄉人神之，名爲西霧山。

石鼓山 與仙帽左右，俱爲北方之障。頂有石如鼓。圍可十餘丈。又山石多仙人武及牛羊跡，皆深入不滅。

凌家山 凌氏居其下。

龍亭寨山 在縣西里許，縣治屢焉。山半有清泉可溉田，山腰有高明寺，山頂可容二百餘人。鄉人嘗寨，以避寇。

高巖山 上有二石洞。

銀瓶山

小都山 山高泉冷，其上有巖。近而剗者，新山之石，可以灰；鉛山之鉛，可以汞。

石門隔山 兩峰夾峙如門，有石如將軍守之。

雲峰山 雄峻接雲中，有寶臺巖。

九仙山 《通志》作「九星山」。石馬、彭廬之間，長營之界，九峰疊聳，雄敞峻絕，是多仙靈。有朱仙洞，石室幽邃，中有石窟，雨不溢，旱不涸，號仙人插劍處。接界龍溪，南趨北蹕，爲一邑鎮者，是山也。

花瓶山 三峰峭立，其狀如瓶。

碧靈山 一曰碧凌。青黛凌漢，龍、漳二邑，文風肇焉。

天柱山

馬頭溪山 一名馬首山。上有二石，一大一小，如馬引駒。又有石盤仙跡。

白巖山 上有巖，山紫巖白。

巖頭山 其山出銅，然革莖耳。

龍尾山 三尖山 螺髻山 猛虎山 大壯山

古濂山 山勢雄壯，爲縣西諸山之宗。

文筆峰山 儒學前山也。

凌雲山 賴家山

覆鼎山 林谷深邃，形如覆釜。相傳多產寶物。

九峰崎

貴人峰 峰勢端重，似貴人。側有篋盆嶺。北界於龍巖。

洞峰 洞深泉湧。有仙人棋、浴馬池。

安祖嶺 產孟嶺

三重嶺 山勢凌絕，高下相因者三。中有三龍井，禱雨多應。

朝天嶺

牛頭相觸岑 兩山夾立，中一坑，相去二丈餘，深數十丈，山峻水怒，鄉人朱崇慶橋其間。

龍門洞 洞如石室，冬溫夏涼。中有盤石，可容百餘人。

陽山洞

蝙蝠洞〔六〕

石壁巉巖，洞穴深邃，寒泉泠冽，衍爲長流。俗傳有竅通尤溪，鄉人秉燭深入，莫窮其

止。

百家畚洞 洞界龍溪、安溪、龍巖、南靖、漳平五縣間，而漳平正當其北，爲要衝。萬山環抱，四面阻

塞，洞口陡隘，僅通人行，中寬廣可容百餘家。畚田播種，足自給。四方亡命，多逋聚焉。皇朝宣德、正統間，有江志賢、李烏嘴、盧赤鬚、羅興進者，烏合跳梁，方岳守臣，連年剿捕，始得寧息。

川

九龍溪 一名漳平。上溪繞縣而東，諸川所聚，深潭大湍通舟，至華封，水石巉險十餘里，又爲下溪，

洪流達於海。

鴈雲溪 自龍巖縣境以上發源，至鴈石通舟，合於漳溪。

羅溪 發源和睦里，流出倒宅，合徐溪。

徐溪 起龍巖集賢里，出羅溪合流。

萬安溪 發源連城縣界，流合漳溪。

吳地溪 發源下界地，合於縣西。

九房溪 源出連城縣，自徐溪、羅溪合流，會於上溪，又納吳地溪、萬安溪，滙爲龍江潭，過駐龍洲，會

於感化溪。

感化溪 自溪南小溪，流出華口。

溪南溪 源出安溪縣，歷華口下折，溪注白華口、華封，至龍溪，爲九龍江，以東達於海。

象湖 數澤半畝許，泉混泥深，昔有奔象陷此。

三清湖 地名魚龍津。自高山發源，湧爲石湖，瀑布而下，疊聯三潭。白滌綠湖，風涼景幽，有龍蹤

仙跡。

三溪林湖 一名白鶴湖。山巔峻絕，湧泉成湖，瀑布而下，爲第二宮、第三宮。一宮雲霧油然，時有

白鶴飛昇。

牛欄潭 碧龍潭 葫蘆潭 龍江潭

龍龜潭 嘗見龍龜焉。

龍興潭

黃畚澗 小塢澗 安坑澗 寧坑澗 高巖澗

白泉 鹹水泉

共母泉 共源分井，其水甘美。

石龍井 青龍井

神螺井 相傳螺大如斗，隱見不測，時生雲霧。

平和縣 在郡西南。東抵南靖，西抵廣東潮州，南抵漳浦，北抵永定。本南靖縣地。皇朝正德間，漳平象湖諸處山寇憑險爲亂，都御史王守仁巡撫南贛、汀、漳等處，討平之。南靖生員張浩然等，因言：「南靖縣治，僻在一隅，相離蘆溪、平和、長汀等處，地里遙遠。小民罔法，今雖殲渠掃黨，猶計一時，未規長久。乞於河頭中營處所，添設縣治，引帶汀、潮、喉襟清寧，人煙輳集，道路適均，政教旣敷，盜賊自息。」南靖縣民曾敦立、林大俊等，亦言：「河頭地方，北與蘆溪流恩山岡接境，西北與漳平象湖山接境，而平和等鄉，又與廣東饒平縣大傘、箭灌等鄉接境，皆係窮險賊巢。兩省民居，相距所屬縣治，各有五日程。雖分設都、圖，不聞政教，往往相誘出劫。正德二年，統兵剿捕，不過數月，遺黨復興。今者調兵剿撫，業少寧息，誠恐漏網，復踵前弊，乞添設縣治，控制之。」守仁下漳南道、漳州府、南靖縣覆按，具言便，因上言：「建立縣治，禦盜安民之策也。但兵後重役，恐民或不堪，臣時督兵其地，詢訪父老，諷咨道路，莫不傾心同調。遣人往視，則官府未有教令，先已伐木畚土，雜然並作。究其所以，皆緣積苦盜賊，渴望控制，故樂

事勸工，不令而速。臣觀河頭形勝，實兩省賊寨咽喉，今象湖、可塘、大傘、箭灌諸巢，雖已破蕩，誠恐殘孽復煽餘黨，臣民請其地開設縣治，誠謂便計。」許之。乃割南靖清寧、新安二里，置縣河頭中營，曰平和，轄二里，統十二圖。

清寧里，圖七。山曰長廬、卓鳳、東山、樓宅、岑山、天馬、象湖、璞山、後塔、巖山、五牙、瑄山、三平、大峰、清寧。嶺曰東陀、小坪。溪曰橫溪、九圍、（七）山隔、翠微。

新安里，圖五。山曰鷄籠、大瓊、小瓊、筆架、龍岡、楊半天、赤鬚、大梁。嶺曰石梯、魚鼓、葛布、磨石、崎嶇、寶珠、陳旗。潭曰和尚。

長廬峙後，天馬揖前，洪瀨左鎮，鷄籠右插，溪水灣環，海潮相通。其形勝也。

山

長廬山 平和諸山，其巔崖皆壁立，而麓多盤紆，是山自汀州永安連峰數百里而來，爲縣治北辰。

卓鳳山 東山

樓宅山 以其狀如樓殿。

岑山 與東山遙對，峙縣治右。

天馬山 在暗竹社。雙峰南矗，卓然文筆，爲縣治案山。

象湖山 璞山 後塔山 巖山

五牙山 五尖如牙，產礬石，可礬，又名礬山。南勝縣初建於此。

瑄山 山麓，南勝縣址。前志云，「瑄」當作「官」，卽今小溪地。元至正間，鄉民李志甫作亂，後始剷

平。今居人甚盛。

三平山 巖谷深邃，詰曲崎危。舊志云：「登者必歷三險三平，乃至。」唐時有義中禪師者隱之。師楊姓，高陵人。父仕閩，生於福唐。年十四出家，造本州懷暉，後謁百丈，仍往撫州石鰲。鰲常張弓架箭接機，師詣法席，鰲曰：「看箭！」師乃當前擊胸，鰲收箭，彈弓弦三下，云：「三十年來張弓架箭，而今祇射得半個聖人。」後南游見大顛，妙造空中，深了無得。一日，韓文公愈，問大顛曰：「軍州事煩，佛法省要處，師可一言？」顛默然良久，時義中在側，敲禪床三下，顛曰：「作麼生？」師曰：「先以動定，後以智拔。」文公嘆曰：「和尚門風高峻，却於侍者邊得箇入處。」寶曆初，於漳開元寺後卓庵。請法者，常有三百餘人。一日，疾背疽，閉戶七日，不通問。洎出，疽已潰矣。無何，門人以母喪聞，又閉戶七日，不食飲。會昌五年，汰僧，乃人三平。初至九層巖山鬼穴前立錫，衆鬼昇師，投之深潭。及還，見師宴坐。復以籠昇師，至瑞龍百丈漈，縋石沉之，復如故，由是驚伏，乞爲師架院。願慈悲閉目七日，師許之。未逾五日，師忽開目，院成，惟山門未就，衆鬼化形逸去。有大魅身毛毯毳，師戲擒往隨侍，指使曰：「毛侍者。」大中三年，本州刺史鄭董，「八」奏號「廣濟禪師」。咸通中，吏部侍郎王諷，以旁累謫守漳浦，人山訪之，和容瞪目，久而無言。徵其意，備得行止事實，相見無間然也。問曰：「《周易》經歷三聖，皆合天旨神道。注之者，以至虛而善應，則以道爲稱，以不思而玄覽，則以神爲名。《經》云：『隱而顯，不言而喻，不疾而速，不行而止。』後之通儒，有何疑也？」異日，又訪之。適有刑獄，因語及，師曰：「孝之至也，無所不善，有其跡乃匹夫之令節，法之至也，莫得而私，一其政，則國之彝典。」言訖領之，不復更言。以咸通十三年十一月六日，宴坐示滅。享年九十二，僧臘六十五。諷又記三平山院者：面離背坎，左生錫杖樹，右樹虎爬泉，

東連大伯山，南接百丈濤，西有九層巖竇，北枕仙人亭臺。水口峰若龜浮，徑頭嶺如虹卓。廣濟沼沚，韓文祠堂，鬼瓦神工，靈蛇錦色。其餘勝概，筆舌難周。而錫杖樹者，相傳師初入山，卓錫而立，化而爲樟樹，今尚存。

大峰山 一名大峰溪山，一名大枋山。陳元光改葬其父處也。漳浦、詔安、海澄、鎮海衛山，皆此發龍。嵒起十七峰，自麓至巔，可十五里餘。海泊番商，望見此山，則喜見閩境矣。中多巨靈斧跡，又多巨石巖洞，窈窕儼若化人之居。有青雲峰，形如獅子口，攀緣丈許方得人，中可坐三十餘人。又青獅巖、獅子巖、佛祖巖。山北有靈巖，其中峰曰龜蛇巖，曰楓山，曰青雲，曰靈通巖，有巨石爲蓋，泉溜垂垂，如雲如霧，如珍珠簾，四時不絕。有風洞，出洞之風，色如綠霧。

清寧山 山中異者爲銅鼓、石船，元末李志甫作亂，人言「銅鼓響，石船浮」，今沉溪淵。

鷄籠山 大瓊山 小瓊山 筆架山 龍岡山 赤鬚山 大梁山 蘆溪山

金溪山 與饒平縣大傘等鄉接境。

東陀嶺 小坪嶺 石梯嶺 魚鼓嶺 葛布嶺 磨石嶺 崎嶺 寶珠嶺 陳旗嶺

銅鼓巖 山兜巖 寶峰巖 瑞雲巖

川

橫溪 源出小平山，流至溪口。

九圍溪 源出漳浦縣，歷洋頭徑，逕後市，出銅湖溪口。

山隔溪 源出三峰，逕侯山。

翠微溪 源出翠微社，歷三平寺，逕圓濟橋，入大溪。

粗溪 其水自高山正西出，西流而至於河頭。

河頭溪 西過樓宅，逕縣治，清瀨可掬。至三河，合蘆溪，以達於海。

高山溪 水自高山東北出，東流而至溪口溪。

河上溪 自旗山發源，流出西林。

西林溪 南流爲雲霄溪，又爲漳江，入於海。

徐坑溪 南流合溪，亦名雙溪。魚鼓溪、馬溪，皆入焉。會於大溪，過詔安，爲東溪，入於海。

和尚潭 趙陂潭 鰲潭 虎頭潭

溫泉 有二處。一在清寧里，一在新安里。

南街井 其味甚甘，釀酒冠九邑。

詔安縣 在郡城南。東抵漳浦，西抵廣東饒平，南抵海，北抵平和。本漳浦縣南詔地。宋爲臨水

驛。元至正間，右丞羅良命屯官陳君用城之。皇朝弘治間，廣寇爲患，調漳州衛後所官軍，置守禦千戶

所。正德己卯，添設捕盜通判，兼平和、饒平提督之，尋廢。嘉靖八年，鄉民許仲遠等請設縣，明年割漳浦

二、三、四、五都爲縣，名曰詔安。轄都四，統圖二十二。

二都，圖二。山曰金溪。峰曰奇金。溪曰大陂。

三都，圖十。山曰南山、初稽、九侯、九上落山、焦坑、龜山、大南、磁窰、和廣、奇山。潭曰龍潭。

四都，圖五。山曰漸山、接仔林、餘甘嶺山、知州、雙岐、楊芳、玄鐘。嶺曰梅嶺。

五都，圖五。山曰大帽、川陵、甘山。嶼曰虎仔、南村、崎嶼。溪曰走馬。

南山前聳，鳳頭後擁。環九侯、赤坑之雄秀，滙象溪、大海之吐吞。控制百粵，屏蔽八閩。其形勝也。

山

良峰山 縣主山也。自赤坑山，轉而鳳嶺，而至是山。識云：「良峰青，出公卿。」

金溪山 前志作「金鷄」，在縣西北四十里。聯接六峒諸山。舊有銀坑，皇朝正德初，浦令胥文相塞之。近者開採，遂爲豪猾漁獵之場，山民岌岌驚變，幸內旨停革。今峒已封閉，遣南詔所千戶一員，更番戍守，然盜礦猶故，爲詔隱憂。

南山 在縣南十五里。兩峰銳秀，縣治、學向焉。

初稽山 山半有三潭，大旱不竭。元季陳汶輝，結庵講學其上。有巨石出泉，號玉泉，取和藥，可久藏。

九侯山 山與龍巖縣同名，其縣具龍巖。山在縣北二十五里，九峰並列，有石門可通車馬。頂上可坐十數人，中有棋盤石、天然橋、香爐石、風動石、觀音三寶石、雲根石，一石如覆船。又有飛來佛羅漢洞。又有一大石，中起一乳，有泉流出，飲之，愈病，名玉泉水。宋禁偽學，時有五儒，隱名姓，來此講學，後人因名九侯書室。有詩云：「奎躔煥五耀，高照東南方。風韻遠相聞，琴書來徜徉。掬彼九侯水，浣爾五儒腸。」金陵趙嘉客詩：「古凌秋霜洛陽周，直言笑語含德芳。」臨汀伍仲求，冰壺瑩瑤光。大林飛仙

者，吸露壽而藏。中有石屏翁，巖棲無炎涼。同躋名山頂，流飲北斗漿。玉皇吹鐵笛，織女製霓裳，皆云五儒者，百歲陟帝鄉，共弄風塵表，悠悠天地長。好事者，列山中景爲二十四云。宋末有沈子真者，隱居是山。子真，字景實，性至孝，居父喪，哀毀骨立。寶祐間，以貢補太學，授揭陽丞，而宋已亡矣，學陶潛，但記義熙甲子，不記年號。

九上落山 其山九上九下。

焦坑山

龜山 在縣西南二十五里。上有巨壑，禱雨多應。有石洞，可容數十人。山右有汀、漳分界巡司，度象頭而止。山外爲潮境矣。

大南山 與龜山綿亘數里，若巨屏然。其巔產蘭。

磁竈山

厚廣山 一名和廣。自初稽、九侯而來，界三、四都之交，峯嶽聳秀，屏障邑治。

奇山

漸山 在縣東五十里。高峭千仞。頂分二峰。中有潭，深杳。宋進士翁待舉、陳景肅、楊仕謹、仕訓，咸生山麓，且築室讀書於上。種榴數百株，號石榴洞。紹興間，有吳大成者，隱居是洞，講明正學，嘗與莆田丞相陳俊卿、三山林澤之，聚樂賦詩，著有《梅月詩卷》、《筆義經疑》。山岐跨至港口渡西南，巨石若屋廬然，內有泉清冽。皇朝正德十四年，龍起，聲如摧屋，食頃乃止，山塌裂深，廣丈餘，人咸異焉。

榛仔林山 在縣東北五十里。山勢龍巖，崖石錯列。有石屋數十處，可容百人，稱十八洞。南行者，

望梁山方盡，逾盤陀而南，群峰插天，又轟轟玉笋矣。顧其地險遠，嘉靖末，附山劇寇嘯聚，出沒菁林要害，奸慝遁藪也。

餘甘嶺山 漳浦、詔安接壤山也。

知州山 在縣東南六十里。從甘嶺山至梅州溪而盡。宋知瓊州軍翁待舉，葬其下，故名。

雙岐山

楊芳山 上有石刻「楊芳」二字，下有潭三畝許。潭中有蓮，或以其花名。

玄鐘山 去之十里許，爲玄鐘所。

大帽山 山極高聳。宋丞相陸秀夫、陳宜中，扶幼主泊舟於此。

川陵山 山濱海而半入於海。俗傳宋幼主南渡，將都南澳，築此爲東京，地陷爲海。今城堞尚存，海中尚有木頭、竹藁，海濱人時往取焉。其峰青聳秀麗，號爲蘇尖，又號蒼陵，又號東山。東面列城垣者，向銅山杜濬文筆插天是焉。科第踵出。與是山相接者，曰虎岡山，峰巒秀麗，曰揭榜山，狀如列榜，東湖之水出其下。

甘山 在川陵南大海中。海中嶼凡四：曰虎仔，曰南村，曰崎，曰大眠，而甘山最奇，遠視若有一小髻，天將颶風驟雨，其狀變幻，若屏若屋，若獅象之形。四面皆海，中有一井，獨淡。俗傳仙入遺柑其上。

赤坑山 勢若五星聚港，良峰祖也。

點燈山 夜有騰光之色，赤坑祖也。

真武山 前有官嶼山，其形如龜。右有洋尾石橋，其形如蛇。

烏山 與九侯相連，峰頭巨石嵯峨，半插天表。北接雲霄鎮，東聯榕仔林山，爲詔後屏。或以形似火，稱火焰山。

葵岡山 山勢綿亘，跨於深田鋪。上下有兩小山相峙，稱相見嶺。有古關隘尚存。宋人有云「常言法到葵岡住」，是此山也。近以上湖、後港諸村豪黠劫掠，遣浙兵守之。

官嶼山 在洋尾江中。

洋尾山 畔有石井，大石橫豎。中有兩孔，旱雨不溢涸。

奇金峰

梅嶺

川

東溪 在縣東。源出平和大溪山，入詔安赤嶺村，過白藤徑、林婆畚，小篆溪自南會，樊沙溪自北會，南至河窰，徑歷麻寮，西南受白葉洞水，抵南坑、馬洋，後復北注，經大布寨，走馬塘，出金溪，下石壠，至溪東村，長田、^(九)塘東諸溪水，南注，至站前渡，乃折而西，至南山橫嶺渡，入海。其支流，一曰官洋頭，上流至東沈村，爲新溪，一由東門外，過林家港，至洋尾渡，同人於海。

站前溪 卽東溪上流。

塘東溪 源出二都，下河山，至塘東村，跨有石橋。歷岑頭、黃塘諸水，至赤水溪，會於東大溪。

港頭溪 源自長坑五斗，過磁埕等村，至港頭會潮水，經平寨溪橋，至象頭入海。

大陂溪 經馬洋山，至大陂南，繞梅州村，復抵漸山，入海。

走馬溪 溪距玄鐘、梅嶺，俱二十里。要害地也。

龍潭 周迴六七里，深不可測。有龍出沒，禱雨多應。
七星井

〔校記〕

〔一〕「今轄圖一十七」，下文實列十六圖。

〔二〕「深渡溪」，各本原作「源渡溪」，據上文及《八閩通志·地理》改。

〔三〕「詔」下，各本原闕一字。

〔四〕「方化里」，上文作「方成里」。

〔五〕「在縣治西」，各本原作「在縣西治」，據文義改。

〔六〕「蝙蝠洞」，各本原作「蝙蝠洞」，據文義及上文改。

〔七〕「九圍」，各本原作「九圍」，據下文及《八閩通志·地理》改。

〔八〕「鄭董」，《唐文粹》卷六十四《漳州三平大師碑銘並序》作「鄭薰」。

〔九〕「長田」上，疑脫「合」字。

閩書卷之三十

方域志

漳州府 海澄縣 寧洋縣鎮海衛、陸鯨所、銅山所、玄鐘所附。

海澄縣 東抵鎮海，西抵龍溪，南抵漳浦，北抵同安。本龍溪漳浦縣地。皇朝正德以來，惡少私出，貨番誘寇，禁之不止。嘉靖九年，巡撫都御史胡璉，議移巡海道鎮漳州，置安邊館於海滄，歲委各府通判一員，住劄半年一易，俗猶未化。二十七年，軍門朱統立保甲，嚴接濟。巡海道柯喬，議設縣治於九都之月港，巡按御史金城，以請轉行覆議，適地方稍寧，知府盧璧議暫停止。三十年，復於月港建靖海館，通判，往來巡緝。三十五年，海寇謝老突至，擄掠，屯燬。久之，倭夷入寇，本土頑民乘機煽亂，自號「二十四將」等名色，結巢盤據，寢成化外。四十二年，軍門譚綸，請設海防同知住劄，姑行招撫，然陽順陰逆，終不馴戢。四十三年，巡海道周賢宣，計擒巨寇張維等，地方始定。適土人聽選官李英、陳鑾，具奏設縣，復行覆議。四十四年，知府唐九德，議割龍溪縣一、二、三都，四、五都，六、七都，八、九都，二十八都第五圖，并漳浦縣二十三都第九圖地方，就於月港橋頭，設爲縣治。軍門汪道昆、巡按御史王宗載，奏請俞允，名縣海澄。隆慶元年，縣治成，乃以八、九都爲附郭，內立五圖，爲三坊，餘都爲鄉落，立四十二圖，爲五里。

第一坊、第二坊，圖三。宋龍溪始安鄉惠恩里。山曰儒山、席帽。

第三坊，圖二。宋始安鄉崇仁里。山曰虎甲、龍頭、陳坑。

第一里，圖十。宋惠恩、崇仁二里。山曰南岐鋪頭、大鰲、石壁、侯山。

第二里，圖九。宋始安鄉崇德里。山曰槐浦、漸山。潭曰龍潭。井曰龍井。

第三里，圖十。宋龍溪始安鄉禾平里，漳浦安仁鄉沙澳里。山曰雲蓋、塘頭。潭曰芟洋。

第四里，圖七。宋龍溪永寧鄉新恩里。山曰文圃、大巖。嶺曰雲嶽。礁曰青礁。嶼曰胡侯、嶼。（一）

第五里，圖六。宋永寧鄉新恩里，海洋下里。（二）

左自鹿石、槐浦，轉行過峽而迤邐，右從龍頭、虎甲，轉折西方而交會。西溪、北溪合潮外進，南溪、倒港接海內旋。席帽峙前，三洲擁後。其形勝也。

山

儒山 在西南二里許，縣主山也。俗呼蔡前山。

席帽山 距縣六七里，狀如冠帽，兩旁有翅。一名筆架。一名觀音獨坐。西爲常春山，東爲鴻福山，相連羅列於縣治之前。常春之東，爲鴻江山。又北東至於鹿石山，絕頂處有大螺殼，蓋閩中之山，屢有此狀。

虎甲山 在縣西一里許。俗名山美。盤踞邑之兌位。上有石，刻「虎甲山美」，字大數尺。在虎甲山西者，曰龍頭山。山麓有石，刻「龍頭」二大字。在龍頭、虎甲中間，曰陳坑，山突出峭拔，遠望若狻猊昂首。

南岐鋪頭山 在縣西南十五里。南溪之水，自濠潯而下，（三）大海之水，自浮宮而入，至此合會，倒流紆延繞邑，亦名倒港山。

大鰲山 在縣治西南十里許。自六、七都而蜿蜒巍峨，左右特聳，二峰如筆架，是爲前宅合浦。

石壁山 在陳坑山西南。最高。其上有巖。

侯山 在縣西南七里。宋謝伯宜居此。

槐浦山

漸山 自九龍嶺數折而來，聳起高峰，鷄籠、南岐諸山擁其水口。

雲蓋山 山多奇石，上有石室，可容百人。下有卓錫泉，清冽而甘，懷真禪師所卓。宋天聖中，勅名雲蓋山大悲巖。

塘頭山 絕頂有金龜漈，漈潭深杳，旱禱多應。

文圃山 界同安。唐隱士謝脩、洪文用、石贊，讀書於此。已見同安。

大巖山

雲嶽嶺

浯嶼 舊置水寨。

胡使二嶼 舊云，荆嶼、梁嶼，在一、二、三都，海門上下，延袤數里。先是居民憑海爲非，皇朝正統初，郡守甘瑛奏移而墟之。今呼爲海門南北山。荆嶼，上多荆木。梁嶼，古時有水人、水豹產焉。

嵩嶼 宋幼主浮舟於此，適其誕節，群臣構行殿呼嵩。遺址猶存。

長嶼 與嵩嶼俱三面臨海，各有居民。

丹霞嶼 一名赤嶼。晏殊《類要》云：「海上有石，朝色如丹，晚色如霞，卽圭嶼也。」在海口中，如龜浮水面，亦名龜嶼。

青礁 吳真人卒，所產地也。真人，已見同安白礁下。二礁相對，其西曰白礁，屬同安；其東曰青礁，屬本縣。白礁有吳真人廟，曰西宮。青礁亦有廟，曰東宮。真人生時，與其族孫同開黃馭山，行過此地，埋三瓦缶，刻盟其上曰：「此地當興，先至爲主。」其後真人沒，鄉人立廟雲嶠院側。有役夫若醉狂，大呼曰：「此非吾居。龍湫之陽，吾昔有盟。」奔而就之，掘地數尺，得三瓦缶，無恙，青蛇盤鬱其中，遂廟爲東宮。

川

港口江 亦名港口大溪。合九龍江及兩南溪之水，同人於海。

普賢港

月港 外通海潮，內接淡水，其形如月，番舶湊焉。

倒港 下接南陂，上接北港，及通河角，謝蒼諸處，可灌田千餘畝。

盧沈港 白海門入，上接南溪，可溉田萬計。

南溪 距縣六里許。源自三平，經馬口，受漸山、椽潭諸水，沿泰江、浮宮，入於海。

龍潭 由漸山、椽潭二溪合流匯而爲潭，嘗有龍起。

茭洋潭 源出龍溪，周圍四里許，可灌田六百畝。

龍井 相傳井底有穴，通大帽山。泉極甘冽，旱禱有應。

寧洋縣 在府城北。東抵延平大田，西抵龍巖，南抵漳平，北抵延平永安。本龍巖縣集賢里，東西洋巡檢司地。皇朝嘉靖四十一年，土賊廖選、蘇阿普等煽亂，殺漳平知縣魏文瑞、曾東田、馬元湘等，復屯聚龍頭寨。至四十四年，御史陳萬言，軍門汪道昆、吳百朋，都督戚繼光等，遣都指揮王如龍部、分守備劉及漳平知縣曾迪等，列柵攻寨，自四月迄七月，克之。乃疏革巡檢分司，割集賢里五圖，并大田、永安縣各三圖，置縣寧洋，時隆慶元年。凡轄圖十一。

集寧里，統圖五。

聚寧里，統圖三。

永寧里，統圖三。

金鳳、玉屏列障後擁，芙蓉、貴人聳翠前拱。麟山峙左，玉岡迤右。其形勝也。

山

金鳳山 縣鎮山也。起馬家山，逶迤由駝駱崎，歷蓋竹溪、百種畚，過鼓樓，隔至謝田崎，轉折而東，特起員峰，前有平洋，是爲縣治。其後爲玉屏山，平展如屏。

玉岡山 麒麟山 芙蓉山

梯雲山 聯亘芙蓉，朝拱學宮。

貴人山 馬峰山

天員山 山高。上夷，可容萬人。有古井焉。

香寮山 山極高大，可容十萬人。鄧茂七嘗據之。上有紫雲洞，絕頂有天臺山。舊有惠真佛廟，前有龍潭、石窟，如釜者纍纍，祈雨是應。

天柱山 在城南三里。有青山石，或方或員，如人攻琢，相傳異人煉成，因以飛昇。

賴家山 山高巔夷，賴氏世居之。上有虎符巖，真君廟，每歲七月，巖、平、永、大四縣人，遠來求禱。

嶺兜山 有穿雲石洞，內有龍鳳形，有石人號石將軍。

均嶺 汀、延分界。其水，一南流入九龍江，一北流入尤溪，趨福州。

大陶嶺 界沙縣。水歸福州。

殺狐嶺 舊名龍頭寨。烏道深阻，寇兵所穴。皇朝嘉靖季，官兵困膠選，蘇阿普二賊於此者四月，忽有大狐從嶺上坑飛下，殺之，三日遂拔賊寨。臺使因改曰殺狐。

川

南溪 發源東北。一自馬家山，一自蔡竹洋，流經新村，合而南流。其北曰北溪，源出北方，由百種會，流於凌坑謝田，過縣北，會南溪。其西口西溪，發源西北方田頭赤水，至嶺兜，會香寮之水，行而南，由員當穿石隔，復轉西行赤洋鋪，與南北二溪會，而南溪三流，合而繞縣郭，其激盪生濤，古稱東西洋焉。總爲九龍江之上源，而流水湍，爲最險。又有大坑溪、徐溪、小溪亦合焉。

羅溪 源出沙縣界，合衆流而下。

石門潭 石塘潭 綠水潭

白水漈

湯池

衛所附諸府山川，不分衛所，唯漳志分屬，今依也。

鎮海衛

皇朝江夏侯周德興所築，在漳浦縣二十三都，太武山之南，鴻江之上，所屬五千戶所，及陸鰲、玄鐘、銅山三千戶所。

龜嶺山 鴻岐山

五星山 曰後山，曰古山，曰昭山，曰曜山，曰蒼山，皆城內山。

登雲嶺

東鎮嶼 南鎮嶼

鴻儒嶼 漳浦縣黃如江嶼也。

連進嶼

風動石

將軍礁 一名鷄心洲。水底石骨，內接鳥鼻頭山，外連東鎮嶼。

半洋洲 在水底。東接龜嶺，西接南鎮，如遇風晴，見白浪一條，長百餘丈，又名白玉礁。

七星井 柳樹井

陸鰲所

青山 首漳浦縣之丹竈山。自鐵竈坑南行，迢遞三十餘里，平沙漠漠，三面皆海，惟正北可陸行。所城如巨鰲，戴岳亦曰鰲山。

大澳山 一名羅崎山。土色純赤。

對面山 虎頭山 烏嘴山 鷄心山

橫嶼 茅嶼

雙石 生海中，大浸不沒。

雙洲 俗呼爲洲門。船自廣人閩者，必經此。

龍潭

東湖

銅山所

銅山 亦名東山。連五都之銅坑、銅鉢。國初易今名。

古樓山 一峰向西，一峰居東，中一峰獨尊。有煙墩，平處爲南溟書院。東爲東壁書院。砌石爲城，如屯金環帶，多有題詠者。

白沙山 瞭望山 東嶺山 水寨大山 烏石平山 大甘山 小甘山

風動石

東門嶼 上多怪石、藥品。平處爲園，種者必以舟渡。有石室深廣，可容二十餘人。一石如船，一石

如人戴笠，流浪衝急，俗呼「大驚門」。漁人於此舉網。其下爲沙島。

鐵釘嶼 五嶼 鷄心嶼 虎窟空

石室 大石如蓋，下如門，其內平坦，可坐三十餘人。

南嶼 汙

後澳港

龍窟井 義井

玄鐘所

果老山 在所城內。一名古老。四面八山，連環相向。

東山

望陽臺石

內嶼 外嶼

七洲嶼 曰蛤洲、獵洲、敏洲、紅洲、卧崗洲、陳洲、蛇洲，凡七。

勝澳

福寧州〔四〕

福寧州 在布政司東北。東抵溫州，西抵福安，南抵寧德，北抵平陽。本漢建安初侯官縣地。晉太康三年，析置溫麻縣，屬晉安郡。隋開皇九年，縣廢，屬泉州。唐武德六年，析置長溪縣，尋省入連江，爲

寧遠鎮。嗣聖十九年，復置。開元十三年，屬福州。開成中，析縣地，並古田縣地，置感德場。五代唐長興四年，偽閩升爲寧德縣。宋淳祐中，又析長溪之曲鄉，置福安縣。元至元二十三年，升長溪縣爲福寧，屬福州路，領福安、寧德二縣。皇朝洪武元年，改爲福寧縣，屬福州。成化九年，巡按御史李釗，奏縣接山海，寇盜出沒，且軍衛雜居，縣卑難制，請仍升爲州，遂升隸布政司，領福安、寧德二縣，凡統圖一百九十有九。後漸省四十三都，（五）統圖八十。（六）

勸儒鄉 唐林嵩登第，觀察使李晦表請賜名。

擢秀里

一都，圖一。山曰松山、火焰。巖曰瑞巖。港口松山。

二、三都，圖一。峰曰諧軸。嶺曰深澳、台州。巖曰東巖、馬仙。港口金臺。潭曰緯絲。井曰龍井。

四都，圖一。山曰簪山、斤山。溪曰倒流、雄溪。潭曰楊門。

五、六都，圖一。嶺曰玉頭陀、梨溪。巖曰鼓角。石曰試劍、屏風。溪口楊家溪、飯溪。潭曰白坑。

七都，圖一。山曰嶺山。港口烏崎。

望海里

八都，圖一。石曰石欄。港曰怯門。潭曰梨溪。

九都，圖一。溪口楊柳。

十都，圖三。山曰太姥。溪曰盤溪。井曰蒙井。

十一都，圖一。

育仁里

十二都，圖一。山口黃崎。

十三都，圖一。山曰積穀、巽城。

十四都，圖一。山曰福鼎、龍鳳。巖曰米巖。

十五都，圖一。巖曰合掌。溪曰黃洞、大蘭。

十六都，圖一。山曰南山、五岱。嶺曰駱駝。

廉江里以薛令之名。

十七都，圖一。峰曰龜峰。巖曰白虎。江口黃江。溪曰桐山。潭曰袁二娘。

十八都，圖一。

十九都，圖一。嶺曰分水。江曰白水。

遙香里

二十都，圖一。山曰鐵障。溪曰百步。

二十一、二都，圖一。山曰馬冠、崑岡。

二十三都，圖一。嶺曰石馬。

二十四都，圖一。溪曰暗溪。

靈霍鄉

柘洋下里

二十五、六都，圖一。嶺曰池家。巖曰牯牛。石曰石鏡。

二十七都，圖一。潭曰蓋石。

二十八都，圖一。山口飛來、望海、鐵埭。峰曰牽宿。巖曰風洞。

二十九都，圖一。嶺曰南樓。岡曰石鈴。石曰石牛。溪曰東溪、牛石、後溪。井曰東津玉井。

柘洋上里

三十都，圖二。岡曰仙池。墩曰王家陽仙。

三十一都，圖一。山口柘洋東山。巖曰任公。井曰鐘龍。

三十二都，圖一。山曰石山。峰曰仙人。

三十三都，圖二。山口雙髻。林曰九甲。溪曰西溪。

萬安里

三十四、五都，圖一。峰曰南峰。嶺曰岡溪、黃沙。巖曰白巖、羅溪。

溫麻里

三十六、七都，圖一。山口慧日。嶺曰董嶺、楊梅、水孟。溪曰杯溪、秦溪。潭曰七娘、龍興、龍潭。

三十八、九都，圖二。山曰龍榜。嶺曰馬跡。溪曰下場。

安東鄉

安民里

四十都，圖一。山口飄峰。石曰疊石。潭曰少府龍潭。井曰後崎雙井。

四十一都，圖一。山口洪山、鼓樓。

四十二都，圖一。山口牛跡、武崎。峰曰石壁。埕曰漁洋。溪曰虎溪。

四十三都，圖一。山口文崎、羅浮。井曰義井。

新化里

四十四、五都，圖一。山口四城。嶺曰蟠嶺。巖曰獅子。嶼曰竹嶼。潭曰龍潭。

新南里

四十六、七都，圖一。山口白瓠〔七〕江曰霞浦、硯江。

四十八都，圖一。山口小洪、霞浦、蓮花、仙崎。嶼曰蓮花。

連海里

四十九、五十都，圖一。江曰連江。

五十一都，圖一。

招賢里

五十二都，圖二。山口南金、劍巖、筆架、浮瀛。潭曰菜臺龍潭。〔八〕井曰鹹井。

五十三都，圖一。巖曰峻巖。

赤岸東據，王巖西峙，龍首擁後，南峰拱前。襟帶大海，控扼山川。其形勝也。

山

龍首山 州主山也。前挹長溪，東抱華峰，西接連坡。其巔平夷千丈。唐季黃巢屯此，號黃巢坪。

三澗之水出焉。其下有「芙蓉臺」三字，山之西脇，爰有清泉，可以瘡病。

金字山 在州治東北。高齊龍首，爲東城主山。皇朝嘉靖己未，武平令徐甫宰於此殲寇。又東曰獅山。

蓮華山 在龍首山西，又名明宗，西城主山也。

馬鞍山 在州東南。舊儒學前山也。如虎如龜，古識以爲人文之瑞。

龍泉山 縣下後山。

松山 在州東南，瀕海。宋有土主七聖廟，相傳神趙姓，名昱，蜀青城山人，仕隋守嘉州，斬蛟拯溺，民祀之藿江口。開慶初，有携其香火至邑，邑人爲立祠。元至正十四年，州大饑，神化爲商人，從湖廣附米舟至，指松山謂舟人曰：「米至是，其直十百。」遂以手中扇畀舟人，從小舟登陸。是夕，見夢，鄉人口：「米舟至矣。亟往松江迓之。」明日，米舟果至。視舟人所執扇，則廟中物也。有司以聞朝，命加封號。人皇朝，屢有禦寇陰功。永樂中，置烽火寨於此山下。其對山曰後崎。唐乾符中，白水仙陳蓬居此，題所居詩曰：「竹籬疎見浦，茅屋漏通星。」去之十里許，有潭淵然，涎沫時沸，凌波數丈，則雷霆風雨，暴不可避，潦漲移月，田廬漂溺，民甚患之。隋開皇三年，梵僧闍那崖多曰：「此龍變也。宜峻佛祠鎮之。」後十年建寺，潭波帖妥，耆艾目曰清潭。當時沙門，若瀉山祐靈、雲勤等十七人，皆出於此。隋唐之世，真修梵境，他所莫擬。潭上有洞，林巒可愛。皇朝傅汝舟詩：「松山不放海水過，坐與潮汐爭咽喉。風沙冥冥海在下，濤浪滾滾天真浮。一目可到九萬里，寸心遙飛十二洲。」

大瀉山 在城東北隅。唐景福中，有僧建大瀉院於山。院東有小山高峻，僧獨居，絕粒者十年。虎

食餒，開口向僧，僧爲除去。後每騎之下山。靈祐祖師也。

靈石山 在城西里許。唐咸通十年，建龍居寺於此。五代周顯德元年，僧雅公建庵，名靈石也。有義韶者，清漳謝氏子，居常不食，着紙爲衣。一日赴赤岸齋，被人推落深潭。人謂死矣。無何，先至齋所，衣殊不濡。每出人，輒有虎隨之。常買肉以飼。因人譏訕，遂不復買。虎饑索食，食以一指。宋太平興國七年重九，示寂。虎亦遁跡，其軀至今不壞。

火焰山 在松山東南，海中斷嶼。皇朝參將黎鵬舉大破倭寇於此。

簪山 山有七佛居焉。

斤山 有英惠、顯赫二侯廟。元時有農人虞姓者，早禱不應，夜夢仙人教以禱雨術，試之，果雨。後以教其婿葉者，奉行亦驗。而二人平生皆仁慈忠孝，輕財尚義。既卒，朝命封虞英惠侯，葉，顯赫侯。虞葬在斤山，故鄉人爲廟山下。

嶠山 大海中，山有三十六澳。昔有居人，皇朝洪武中內徙。其東有山，浮立海面，如七星，名七星山。

太姥山 距州東百里而遙，高十餘里，周遭四十里。舊名才山。《力牧錄》云：「黃帝時，容成先生嘗栖之。」王烈《蟠桃記》：「堯時有老母，家路傍，藍練爲業，性喜給施。有道士就母求漿，母飲以醪。道士奇之，授以九轉丹砂之法。服之，七月七日，乘九色龍馬仙去，因相傳呼爲太母山。」漢武帝命東方朔勅天下名山文，乃改「母」爲「姥」。唐玄宗開元十三年，都督辛子言，自越牧閩，止本州海上，夢朱衣幘冠者執圭前曰：「某神吏也，味爽仙姑將之蓬萊。司風雨者先驅以蕩魚鰲之腥，望中丞移舟，隱避之。」既覺，如

言，果風雨暴至，洪濤駕天。少頃，澄霽，雲霞絢彩，有鸞鶴笙管之音。子言繪圖奏聞，玄宗置側華萼樓，宣示諸王、宰輔，勅有司春秋致祭。乾符四年，勅建國興寺於山麓，僧師待居之。師待圖其奇峰，凡十二，以示林陶。陶因名之新月、多冠、神羊、毬頭、寶旌、仙女、仙童、仙仗、迎仙、象簡、呈珠、團玉、碧鏢、怪石、三靈、抗天、捧玉、摘星、飛蓋、靈龜、龍角、天圭。後人復增以摩霄、仙掌、石虎、懸鐘、石筍、天柱、撥雲、卓筆、童子、蓮花、石鴉、飛仙、棋盤、隱真，爲三十六奇。而摩霄峰尤奇。其峰在山絕頂，東南北三面皆海。西向爲州，窮於省會。諸山東望浙之溫、台。稍南而西，爲南粵五嶺，皆隱隱可辯。相傳太姥乘九色龍至此，摩霄而去，因以名峰。近閩人謝肇淛，復增金峰、錦屏、鉢盂、三台、疊石、曝龍、三枝、三靈和尚九峰，爲四十五。而金峰者，唐咸通間，僧惟亮居焉，結庵宴坐，每月下山乞米一次，日用二三合，煮野菜雜食之。或轉施貧乏，則經旬不食。其後，庵毀於樵火，遂改居柘陽里。久之，見餓虎，因棄身飼之。至其他勝，不可數計。巖之屬曰老鷄，曰湧米，曰羅漢，曰荷葉，曰新戒，曰天冠，曰扞巖。石之屬曰浮屠，曰和尚，曰彈丸，曰石龜，曰鐘離，曰蟠桃，曰兜鍪，曰大盤，曰玉匣，曰屏風，曰蟹鈴，曰獅子，曰石門，曰石鸚鵡，曰石象，曰石兔，曰仙人鋸板，曰石筍、玉笋、牙籤，曰九鯉朝天，曰獨鯉朝天，曰石天門，曰小盤，曰仙人晒靴，曰石麒麟，曰石缸，曰洗頭盆，曰雲板，曰浴盆，曰仙人足，曰金剛把門，曰鹿腳花，曰石鼓，曰石鐘，曰石樓，曰雷轟，曰石鼎，曰三台，曰僧石，曰一線天，曰曝龍，曰頂天。有巨人跡。二洞之屬，曰石巖，曰觀音，曰落星，曰小巖，曰滴水，曰小觀音，曰十八羅漢，曰七賢，曰黃龍，曰團玉，曰丹穴，曰半雲。塔之屬曰國興。寺曰慧明。谷之屬曰傳聲。洋之屬曰太姥。溪之屬曰藍溪。港之屬曰飲港。湖之屬曰仰天，曰玉湖。井之屬曰小龍，曰大龍。大龍井，一名白龍潭。在摩霄峰下三里許，危石棋疊，下臨百仞，人

者縋藤而下，至洞口，深黑燃炬，乃可行。曲折數十武，過木橋，至新戒巖，相傳有沙彌墜其中，二日至官井洋，浮屍而出。又二丈許，達大井口，有巨石若龍頭，踞而覆之，下深數丈，得木梯乃可下。底皆沙洲，廣二丈餘，前後二孔，一承巖上飛瀑，訇轟如雷，其一深窅無際，仰望有一竅通天，陰風淒冽，早時於此取水，禱雨立致。曰七龍，曰蒙井，曰丹井。丹井，在滴水洞下，相傳容成先生居此修煉，泉忽一夕裂，虎爲守洞，猿爲候火，及丹成，猿虎各食其餘，虎變爲白。曰卧龍，曰珍珠，曰曝龍，曰九曲，曰瀑布。池之屬曰九鯉，曰七寶。橋之屬曰望仙。寺之屬曰國興。庵之屬曰玉湖，曰巖湖，曰天源，曰圓潭，曰白箬，曰疊石，曰白龍，曰妙香。宮之屬曰摩尼。堂之屬曰乞夢，曰草堂。草堂，亦曰草堂山，唐林嵩讀書處，上有巖泉，雖旱不枯。里人禱雨，必有蜂白巖中出，俄而石壁流液，甘霖隨應。唐邑人薛令之詩：「揚靈窮海島，選勝訪神山。鬼斧巧開鑿，仙踪常往還。東甌冥漠外，南越渺茫間。爲問容成子，刀圭乞駐顏。」

黃崎山 窮海也，有屏風山爲障。又有文星明山，朱文公避學禁到此，止焉。作《中庸序》於民家，窮鄉無紙，寫序於其家之門板，後門板昇入州庫，傳以爲寶。

積穀山 峰巒峭拔，有清泉一泓。舊傳有仙游此，歲旱取泉禱雨，多獲豐年。

巽城山

福鼎山 一名北頂。自平陽赤洋而來，遠數十里，猶在望中。

龍鳳山 上有石鼓、石角、石上印指、足痕。又有二大石，一長一稍短，斜豎相依，雖雨不漏。

南山五岱 溫州平陽縣在其北。

鐵障山 鐵色，壁立，亦名崑崗。

馬冠山 地名崑田，馬仙煉丹於此，去後留冠，井臼猶存。絕頂有東、西二井，後因避倭，婦人澣濯其中，甘冽遂改。

崑岡山 崑田之南。高聳凌空，望如半月。

飛來山 上有石巖，嘗有異人修煉，後仙去，俗呼仙洞。

望海山 距海百餘里，山勢極高。上有石池，四時不涸。又有石蠣殼，稜層附麗。下有二小山，對峙如門，鄉人九日登高焉。

鐵塢山 山產鐵。下有龍井。

柘洋東山 山最峻削。春間積雪，絕頂尚餘。東望海外，西南北諸山皆在履綦下。崖下洞如削刻，有泉一泓，祈雨輒應。

石山 水分三派：一北流，與暗溪合至福安；一西流柘洋水坑平嶺江邊，至赤岸；一東流烏巖蔣洋楊家溪。

雙髻山

慧日山 巖中古刻「慧山泉迎仙臺」六字。

龍榜山 在州西。上有飛仙石、石臼、馬蹄跡，山形若榜。唐宋時，居山下者，多登科。

瓢峰山 上有瓢木。山秀水清，爲鄉名勝。

洪山 州南第一山也。登高眺遠，溫、台在目。相傳葛洪至此煉丹。山有石洞，洞內石屏、石几、棋局，皆渾然天成。上有篆文六字，人莫能辯。洞口石竅、石罩、石泓泉，通海眼。西有太鄆山、石馬峰、卧

龍潭、釣魚石、桃坑、橋洞、丹泉。東有三了嶺，山陰有洪下村。其支有雙髻巖，巖有石洞，或夜有燐火，俗名鬼洞。

鼓樓山(九) 山下舊爲溫麻縣治，有鼓樓，與山相連，因名。

牛跡山 在棠源溪頭，兩山脊凹相向，宛牛蹄跡。溪水圍繞至其跡痕，乃沒入地底，潛流四十餘丈，復出，入於海。舊傳仙人乘青牛，下溪飲水，水爲之乾，今爲乾溪牛跡。

武崎山

文崎山 與武崎隔江相向，廣袤海中五里。上有玉井峰、鍾冠峰、羅漢巖、金牛跡、桃花塢、梅花坡，凝煙積靄，宛如螺青。

羅浮山 與水澳山相連，泊船可避北風。若南風，石崖齒齒矣。今防倭水寨船，多集其地。

四城山 危峭壁立，上有巨石，黑色，名鐵印山。下多屯田軍營。東隔溪有小馬山。

白瓠山 山白如瓠，卧大海中。山脊寧德縣界。

小洪山 在龍榜山南。上有石洞，以其峻亞洪山。而《一統志》作「紅山」。山上天池如湖，名龍潭。大小風門，天欲雨，二門吐霧。西有雙髻巖。其南支曰霧浦山，昔陀羅仙翁居此。

蓮花山

仙崎山 江中三石浮波中，名磨石嶼。相傳葛仙燕群仙於此。江中小嶼，形如樽俎。又有仙屏山、仙崎石，遠望若臺。

南金山 廣袤二十里。昔有海客，來宿山下人家。翌早，遺金一片去。其家兄弟二人，追至十里，還

之。客謝曰：「君非常人也，異日聲價當比南金。」一名大金。上有江王廟。唐末有巨木浮海而來，土人將斧以爲薪，木見夢於人曰：「吾非凡材也。吾家，台之黃巖，姓江，名清，有道術。鄉人呼我江大聖。吾欲廟此，木爲我軀。」邑人神之，立廟曰阜，俗「江王」。前有保老、中峰二山，南北相向如賓主。又南一山，曰小金。其支峰曰劍巖，上有石洞，有仙人丹竈之遺。

筆架山 在大金海中。皇朝嘉靖四年四月二十三日，南海浮來五山，自筆架山外而至。峰巒突兀，上有草木，人馬往來貿易，闔城聚觀。自午踰申，乃沒。蓋海市也。

浮瀛山 一名浮膺。在大海中，上有四澳，控壓海道。宋元間居民甚蕃。皇朝內徙。

展旗峰 在城西。又呼文筆峰。

誥軸峰 龜峰 奎宿峰 仙人峰

南峰 峰頂岐首有三，亦名三台。上有庵，榕樹懸根成門，名樹門。

石壁峰 峰頂石高如筭，又名玉筆書天，爲一方奇勝。昔有仙人，取石下泉，繪羅漢像，能飛騰顯怪。

深壙嶺 宋王薦，至孝，母病渴，冬月求瓜，不得。行至此嶺，值雪，仰天而哭。忽見石巖間，香蔓離披，有二瓜，因摘歸奉母。太祖皇帝載此事於《孝順事實》。後人呼爲瓜嶺。下有馬井，元末，馬生龍駒，遂名龍井。

台州嶺 昔有台州婦人，携金來鑿嶺路，故名。皇朝正德間，改從嶺西山麓取道允平。

王頭陀嶺 嶺爲王頭陀所砌。北連九嶺，崎嶇險峻。宋王十朋詩：「凌晨飽飮渡秦溪，要上青山九

級梯。不使甌閩隔人世，頭陀力與五丁齊。」嘉定中，令楊志用石甃平之，楊憲武爲記。又呼楊公路。

梨溪嶺 嶺多梨木。下臨青溪。

駱駝嶺

分水嶺 閩、浙之界。

石馬嶺 有石危立如馬，下有石乳流沫，俗傳馬能耗西鄉之粟，人鑿馬口焉。

池家嶺 中有古澗，深百餘丈。又有石門，石有巨人跡，俗呼仙人洞、仙人跡。

南樓嶺 岡溪嶺

黃沙嶺 名水潦州南案山。

董嶺

楊梅嶺 舊產楊梅。宋開禧，寺僧始砌嶺路，東抵五里臺，西抵十八溪。嘉定中，令楊志捐俸甃石，

亦號楊公路。

水孟嶺 路傍有鑿石孟，積水以濟行渴。

馬跡嶺 以形名。又有石室、石棋盤，皆仙人所居。

松橋嶺

瑞巖 山頂有石，方廣十丈餘。石上疊一石，搖之可動。有棋盤、仙人足跡。

東巖 巖在赤岸。上刻「華峰玉井」四字。左龍井，常有雲氣。右鳳池，相傳有鳳浴焉。號曰龍鳳呈

祥。唐宋人才之盛以此。赤岸，唐初林嵩所居。鄉名勸儒者，此也。其田坂中，舊有土墩數百，如群鳥翔

集，名百鳥墩，今存者無幾。

馬仙巖 在東巖後，東隴山下。相傳馬仙居此。巖頂平夷，遇旱禱雨，就地穴坎，隨其人數，湧出可給，觸穢卽涸。再懇復湧。捧淨瓶下巖，有蝴蝶飛過，則瓶中水溢，迎歸卽雨。

鼓角巖 俗名火燒巖。巖有虛空，突出路中。

米巖 合掌巖 白虎巖 風洞巖

牯牛巖 以形名。巖頂有池一畝，常生茭蒲。

任公巖 昔有任公棲此，夜眠石磧，巖後懸岸，篆刻文曰任公鳳棲。巖谷清幽。又任公有手書「卧石」二字，筆力古勁，今沉淵底。

白巖 崖壁峭峻。過脉處，有龍井水，流繞南山，田資灌溉。上有玄應侯廟，神王姓宋，靖康初，嘗出陰兵助戰。戰場中得其兜鍪，皆書神姓及廟之地號，靈蹟甚著。

羅漢巖 在輞嵐。上有王女座，下有石鏡。

獅子巖 少林峰頂，有二巖相顧，俗呼雌雄獅子。繆氏世隱其下。元有繆弈老者，聚書就讀，世亂不仕。皇朝有繆璉者，亦就讀，澹世味。璉子催，亦有父風。

峻巖 俗呼峻灘。上有二大石，相疊搖之可動。傍有石笋，高十餘丈。

石鈴岡 山嶼兩石中空，一圓石大如斗，搖之有聲。

仙池岡 侯、繆二真人修煉仙去，壇址猶存。

試劍石 在金家坑。

石屏風

石欄 石巖長數丈，欄截海山如船。

石鏡 形如鏡。前有美女峰相對。

石牛 大者名牛，小者號爲石猪。

疊石 方圓二石相疊，一人搖之則動，衆搖卽否。

鷓鴣石 在小麻山嶺。

王家陽仙墩

竹嶼 在海中。脉發洪山。上有居民。

蓮花嶼 在海中。

漁洋埕 兩旁皆海，中一徑如蜂腰，去海甚近，而隔絕不通，故曰埕。

九里林 舊有關隘。界福安。

川

海 在州東西南三面。海濱民多扈業。「扈」之爲義。見晉江石壁山。

董江 相傳董奉煉丹山中，渴飲熱濯，皆向此江。

白水江 昔閩人徙居水島者，有七種。或云盧亭、白水郎、樂山、莫搖、游般子、山夷、雲家之屬是

也。白水郎，乃盧循餘種，散居海上，衝波逆浪，以船爲家，唐武德中，招其首領而降之。

霞浦江 江中有青、黑、玄、黃四嶼，有如鳳翅。日升，照映水中如明霞。山則霞浦在其上。宋霞浦

里人莊元美，夢到陰府，吏命誦《度人經》，且曰：「汝前生陀羅天知之乎？」元美唯唯。卽覺，朝夕受持不怠。每誦經，有五色蝸牛數百，集花木上，若諦聽者。自是，不食煙火。乾道六年，家人聞戶外有聲，燭之，見五色鳥，大如掌，高六尺許。元美曰：「雙鸞至，示吾期矣。」書偈而化。

硯江 與霞浦接流。江中有嶼，其平如硯。五代周時，有許光大者，爲沿海都巡檢，寓居於此江。寇至，光大持短兵接戰，既沒於陣，江水如血者三日。尸隨潮歸，鄉人立廟祀之。

倒流溪 源出九都烏巖，流至赤岸。以其西流，故名。

雉溪

楊家溪 中有九里潭，自漆溪、泥溪，至此凡九里。

飯溪

楊柳溪 中有龍潭，厓洞甚深。水合漆溪，禱雨輒應。

藍溪 源出太姥山，每歲八月中，溪水變藍。相傳太姥染衣，居民候其時取水，漚藍染帛最佳。

黃洞溪

大蘭溪 秋時水至溪，石可搗練爲簪。

桐山溪 百步溪

暗溪 源出浙之泰順。

東溪 流出福安茜洋。上有九龍墩山，相傳太姥上昇處。溪中烏柏，葉落，色皆秀碧。諺又謂太姥染柏此溪之中。

牛石溪 以水中有大石如牛名。下有深渡潭。

後溪 西溪 杯溪 下場溪 虎溪

激溪 下有激港。宋熙寧中，有林守真者，自言永嘉人，少爲奉化水軍，有所悟，削籍而歸，來游溪上，衣敝裘，寒暑不易。或爲新者，付酒家，不屑也。或旬日不食，或一日兼數人食。一日，設純陽會，道流至者九十三人。守真旅進旅退，不出一語。丙夜，瞿然而作，於廣延中三拜復位，語隣坐曰：「吾當先行。」乃跌坐，瞑目而逝。探懷中，有遺札曰：「得行便行得去去，明月清風爲伴侶。」翌日，有鶴舞庭中。又翌日，火化，異香芳馥，鄉人累塔於龍澗之上。

松山港 上接白巖前溪之水，前有沙洲，海航多泊於此。後有沙徑，水汐可行。古識云：「東西沙徑合，朱紫如響答。」

金臺港 烏崎港 怯門港

緯絲潭 楊門潭

白坑潭 又有西斜潭，並可禱雨。

梨溪潭 中有伏龍，自旦至午，雲霧恒凝，旱禱屢應。

袁三娘潭 有石床、石籠、石印、石馬蹄，兩兩相對，水涸見之。相傳袁三娘於此仙。潭傍有金鵲花。

蓋石潭 有三穴。相傳上穴，龍居之，上有石蓋。中穴，一大石，平坦而水清冷，爲龍浴之處。下穴，澄湛，鄉人於此禱雨。

七娘潭 源自七寶陽董嶺，來石漳院底。州南前溪，發源於此。

龍興潭

少府龍潭 舊有尉，禱雨獲應，故名。

萊臺龍潭 在閭峽前海中，其味獨淡，蓋龍居之。舟過多危，旱禱輒應。

龍潭 一在三十六、七都，石壇甚奇，旁祠羅、許二巫，水流下白巖。又馬陽水，亦合流州之前溪。一在四十四、五都，源出洪山，迤邐數里，引入龍灣，陂灌田數百畝。

陳八娘坑 在州城北石壕中。有泉自石洞出。相傳陳八娘者，飲此水而病瘳。

方井 在州治東城隍廟前。宋嘉祐初，尹李廷龍所鑿，久而堙塞。皇朝洪武中，知縣尹昌隆重浚，得石刻云：「要重開，須龍來。」一云廷龍浚湮井，得石刻云：「井復開，待龍來。」

雙泉井 一在州治東，一在州治西。

曲井 西巷井 鍾龍井 後崎雙井 義井

龍井 一在赤岸。一在東巖下。一在報恩寺。一在台州嶺下。又赤岸有十八井，唐宋時，其地有十八境，每境一井，今在者八。

蒙井 在靈峰寺前。宋鄭樵稱其不讓惠山。又佛殿後，罅中一泓。

東津玉井 上有怪石，高數十仞。井門可容一人出入。當門水淺，門內絕深。頂有水點，滴如更漏，中有龍居焉。

鹹井 其井並田，八月潮大，田井俱沒。潮退，井水清甘如舊，今湮。

〔校記〕

〔一〕「胡侯二嶼」，下文作「胡使二嶼」。

〔二〕「宋永寧鄉新恩里、海洋下里」，各本原作「宋新恩里、水寧鄉海洋下里」，據文義及上文改。

〔三〕「濠潯」，下文作「濠潯」。

〔四〕「福寧州」，原置於「海澄縣」上，據本書體例移。又，「福寧州」下，原有「福安縣 寧德縣」六字，據下文及本書體例刪。

〔五〕「四十三都」，下文實列五十三都。

〔六〕「統圖八十」，下文實列五十一圖。

〔七〕「白瓠」，各本原作「白瓢」，據下文改。

〔八〕「萊臺龍潭」，下文作「萊臺龍潭」。

〔九〕「鼓樓山」，各本原作「鼓鐘山」，據上下文及《八閩通志·地理》改。

閩書卷之三十一

方域志

福寧州〔一〕 福安縣 寧德縣

福安縣 在州西北。東抵州，西抵寧德，南抵州，北抵浙之處州。本唐長溪縣地。宋淳祐五年析置，隸福州。元隸本州。國初爲縣，隸福州府。成化九年以隸州，凡三鄉、九里，統三十六都。景泰間，割平溪里十一至十四凡四都隸建寧府壽寧縣。今領三十三都，〔一〕九里、四十五圖。〔三〕

福安鄉 宋長溪永樂鄉。

界東里

一都，圖五。山曰龜湖、重金、三台。溪曰環溪。潭曰棲雲。井曰錦屏。

二、三都，圖一。山曰馬仙、巖湖、馬頂。峰曰五馬、龍首、揭旗。溪曰秦溪。潭曰柳斜。灘曰倒油。井曰聖井。

四都，圖一。

五都，圖一。山曰天馬。障曰巖湖。

界西里

六都，圖一。山曰玉案。嶺曰北嶺、棲雲。潭曰沙潭。井曰龜井。

七都，圖二。山曰石羊。峰曰獅子。溪曰東溪、白石。灘曰黃牛。

八都，圖一。山曰菴蒲、崑崙。嶺曰車嶺。巖曰更漏。

平溪里

九都，圖一。嶺曰穀嶺。

上十都，圖一。山口戴首。巖曰虎口。

下十都，圖一。

用儒鄉宋名求樂，以簽樞鄭家改。

欽德里

十五都，圖一。山曰仙境。

十六都，圖一。

十七都，圖一。溪曰周溪。

十八都，圖一。山口秦仙、福源。峰曰秦儒、鳳翔。嶺曰秦嶺、福嶺、急嶺、牛嶺。巖曰獅子、芹照。

十九都，圖一。

西興里

二十都，圖一。山曰靈巖、繆家埔、湖山。洲曰沙洲。潭曰廟山。

二十一都，圖一。山曰芹山。巖曰寶生。

二十二都，圖一。山曰城山。洞曰松源。溪曰穆溪、廉溪。

二十三都，圖二。嶺曰金鷄、九曲。

仁風里

二十四都，圖一。峰曰文筆。嶺曰獅嶺。巖曰金鷄。洞曰馬仙。

二十五都，圖一。巖曰柳屯。洞曰洪三娘洞。洲曰興慶。井曰龜鏡。

二十六都，圖一。峰曰紫藤。嶺曰合掌、獅峰、白沙。溪曰大梅。

二十七都，圖一。

秦溪鄉

宋長溪靈霍鄉。

沼江里

二十八都，圖二。嶺曰閩坑。

上二十九都，圖二。巖曰百辟。井曰帽頭。

下二十九都，圖二。峰曰蓮花。

三十都，圖一。

三十一都，圖一。峰曰五花。巖曰輞秀。江曰蘇江。泉曰綠瑩。

秦溪西里

三十二都，圖一。江曰六印。

三十三都，圖二。嶺曰塔嶺。

三十四都，圖二。山曰馬鞍。嶺曰雙巖、大萊。(四)巖曰金剛。港曰甘棠。

秦溪東里

三十五都，圖二。山曰周大、旗山。嶺曰道者。巖曰白氣。

三十六都，圖一。峰曰天柱，嶺曰飛霞。

五馬據東，仙境峙西，重金揖前，銅冠擁後。秦嶺、鳳渚環繞東北，廉溪、蘇江映帶西南。其形勝也。

山

辰山 縣主山也。其支曰鶴山，故在城中。皇朝嘉靖間，倭破城，以城曠，截出之。萬曆中，令汪美復舊。下有蓮池，宋令林子勳所鑿，以制西郭仙嶺火曜。

銅冠山 縣左輔山。其下流泉，洌可愈疫。

龜湖山 平地突出，有湖浮龜焉。湖亦昔人鑿，以制仙嶺火曜者。唐僧唯亮結庵湖上，乘龜而游。宋學宮在山麓，以此湖爲鰲池。元皇慶間，主簿胡璉徙學金山，地爲僧寺。至正中，元旦，湖水忽應潮盈縮，湖中巨魚幾見。邑士異之，祭以文。皇朝正德十五年仍遷學其上。嘉靖十五年復遷金山如故。萬曆三十八年，令張蔚然改爲西湖書院。對峙者曰鶴山，有鶴山觀。

重金山 一名印山。縣學在其下。上有馬鞍石，鐫云：「淳祐丁未臘月廿九日，北山鄭察偕邑令鄭輔同登。」按宋制，惟兩府得賜金帶、佩魚，謂之重金。淳祐五年乙巳，察同簽樞密，賜「重金」；七年丁未登此。故名山以爲榮。

三台山 儒學前山也。

馬仙山

巖湖山 上有巨石如掌，又有仙掌、馬蹄跡。

馬頂山 山兩端高起，中央平凹，頂朝邑中，狀若奔馬。

天馬山 縣南水口山也。上有香泉庵。皇朝邑令孟充詩：「印鎖琴堂吏散衙，肩輿遠人梵王家。孤舟泛泛橫荒渡，一犬寥寥吠落花。竹引山泉寒滴月，藤牽石磴細侵霞。繇來靜坐堪消日，何必雲門與若耶？」

玉案山 上有玉女洞。

石羊山 山石如群羊。

菖蒲山 山產菖蒲。有樂道巖，石疊如障。東有淨聖庵。

崑崙山 山最高。上有天池，池畔有民居。

戴首山 有白公巖，石室廣數丈。亦名靈澤夫人洞。

葉仙山 葉仙修煉之所。

福源山 上有三峰，高聳如鳳舞，名鳳翔峰。有獅子巖、普照巖、幞頭巖。山下有穆洋，宋鄭宗所居。宗嘗侍理宗，因言其居在北山，築有澄庵。理宗御書「北山澄庵」賜之。時有分縣之請，擇韓陽坂爲治所，論未定。宗因獻詩：「韓陽風景世間無，堪與王維作畫圖。四顧羅山朝虎井，一條帶水繞龜湖。形如丹鳳飛唧唧，勢似蒼龍卧吐珠。此處不堪爲縣治，更於何處拜皇都？」理宗許之，因題扇賜答曰：「秋思太華峰頭雪，晴憶巫山一片雲。去國歸來猶未得，詩篇遙贈北山君。」韓陽坂，卽今縣治也。

靈巖山 下有金印石、釣魚臺。前有雙劍水。唐薛令之居此，嘗聞龍吟聲。後以令之廉，賜名廉溪。嶺，魚貨所出道也。

繆家岫山 唐時有繆氏子，七歲能文，開元間以神童召試，賦《新月》詩：「初出如弓未上弦，分明掛在碧雲邊。時人莫道蛾眉小，十五團圓照滿天。」人因竊掘其山，流出淡血，其人遂不顯。今又呼爲蛾眉山。

湖山 絕頂有積善巖，石洞幽險，有米元章題名石刻。巖石上有仙人掌跡，扣之有聲。山下有龜潭。相傳水深闊，後流沙漸壅。古識云：「石龜沙合狀元生。」薛令之進士及第，破閩天荒，蓋其應云。

芹山 脉發松蘿陽之陰，有石室巍然，中容數十人。山巔有石珠，雲起則雨。

城山 黃巢之亂，鄉人城此避之。上有金印石、釣魚臺。唐薛令之棄官居此。有靈谷草堂。令之弟子芳杜有行誼，卒而鄉人祠之。宋政和中，山賊湯彬率衆寇村，引弓射祠旁木，忽怖伏，若有人圍之者，俄而自至，悉就縛。建炎初，賊葉懷經此，擊祠中鼓，不鳴，走之，溪水暴漲，不得涉，爲邑所殲。嘉定五年，賜號「靈祐侯」。杜四世孫念，其行第十八，亦爲鄉人所敬畏，歿而憑人自稱十八元帥。因附其像於祖祠。每有火災及航海遇風者呼救，元帥卽見像以免。邑有阮氏盜侵令之墓傍地，旋即火其家，咸見元帥指麾於煙中。紹定三年賜號顯應侯。宋朱松《題薛補闕故居》：「有唐進士薛補闕，官兼侍讀開元末。懸知野鹿欲銜花，回向桑榆全晚節。靈武正馬還京師，伊人駒谷猶遐思。甘同西山採薇蕨，團團朝旭升陽谷。」

馬鞍山 以形名。與文筆峰相連，號文武峰。

周大山 宋陳傅良嘗經此，留題。

旗山 形如覆釜。連下三級，又若旗然。

東山 高百仞。自福寧高棣發脉，爲福安諸山祖。

龜仙山 在縣治西，邑巨鎮也。上有馬仙遺跡，旱禱輒應。朱文公到此，鄉民飯焉，文公贈之句：「水雲深處神仙府，黍稻豐時富庶家。」

雙髻山 又名魚袋山。

南山 有浮橋環溪，名萬壽橋。

仙境山 峭峰怪石，巖洞寬豁。嘗有耕叟見三人服唐衣冠，從洞門入，因以名山。

流水坑山 高峰有洞，人跡罕到。

鳳山

覆鐘山 上有魏、虞二仙石，旱禱多應。

五馬峰 獅子峰 揭旗峰

龍首峰 下有鳳渚，後有王母洞，與揭旗峰並峙。

奏儒峰 宋太宰余澤生此，因名。按科第，無余澤，或疑爲余深，豈生此而後遷羅源耶？

鳳翔峰 文筆峰 蓮花峰

獅子峰^(五) 宋《三山志》：西峰十奇，曰獅子峰、金鷄石、卧牛石、鹿跑泉、雙髻峰、筆架峰、石梯峰、

環翠亭、伏虎橋、廣化門。其下爲栢柱村。宋鄭虎臣居此。

五花峰 五峰聳翠。旁有韞秀巖，巖前石甚夷。

天柱峰

棲雲嶺 有棲雲寺，唐時建。皇朝令孟充《寄題棲雲寺詩》：「簷鐸響琅璫，溪雲一路涼。玉龍臨沼吐，金獸度橋香。竹密秋生筍，蓮疎晚露房。明朝須載酒，來此過重陽。」

北嶺 車嶺 棗嶺 福嶺 急墩嶺

穀嶺 米巖在其下。舊傳金鷄吐米。

牛嶺 界寧德，通延、建。其高接天。

金鷄嶺 又名五嶺。爲五路之會，有守隘。又名金鷄嶺。有興慶寺。皇朝成化間，有徐氏子名岳，年七歲，從其父與客游寺，客戲題詩，命岳和之，岳卽題云：「松菊寒仍秀，梅花冷更香。夜來三尺雪，清曉玉爲堂。」又云：「風雨惜春殘，閒庭獨閉關。白雲飛去盡，還我舊青山。」客嘆服，亟自刮所題。岳所題壁間書，亦蒼勁有法，至今尚存。

合掌嶺 白沙嶺 閩坑嶺 塔嶺

雙巖嶺 韓世忠討建寇范汝爲，嘗屯兵於此。

大萊嶺 嶺，盜窟也，爲行旅患，民兵守焉。

道者嶺 飛霞嶺

白鶴嶺 在縣東南二十里。南有柳屯巖。唐時，有異人乘牛至此，里有失牛者遙見，追之，及至，則人牛俱泯，惟牛蹄跡印石上。至今猶存。又有女子常乘白鶴出入洞中，時或與樵者語，自稱洪三娘。後

亦不知所之。人名洞口洪三娘洞。嶺下有龜鏡井，泉與潮盈縮相應。

更漏巖 兩峰屹立，瀑布瀉下，聲如更漏。俗呼百丈漈。

虎口巖 獅子巖 普照巖

寶生巖 三石如笏，面有紅暈一抹，俗謂仙書。

百辟巖 宋少帝航海入閩，集勤王師於此。文天祥自鎮江亡歸，追至，則少帝已移入福州矣。故天祥《長溪道中詩》有「宮殿扃春仗，衣冠鎖月游。傷心今北府，遺恨古東洲」之句。今按名巖百辟，猶舜至上虞，今有地名百官也。皇朝萬曆間，令張蔚然建少帝祠，以陸秀夫諸人配。

金剛巖 石室巖巖，頂有蠟殼。山下岐分，形如展旗。

白氣巖 山頂白色。人以卜晴陰。

松源洞 有巨木及香爐，神人居之。五代時，鹽鐵副使姚建開基於此，移爐溪旁，有大蛇沿流而出，鄉人祀之。

馬仙洞 遇旱，置瓶洞口，有乳泉從竹葉出，即持以供禱。

青林洞 皇朝泰昌元年令張蔚然所名也。山在白石巡檢司後，高峰峭壁，流泉古樹，迴絕人境，未經開鑿。張令刊木砌磴，構亭臺其上。令武林人，西湖有青林洞，令取爲別號，因名洞曰青林。

巖湖障 亦名石板障。高二三仞，廣六七十仞，其平如掌。半巖有穴，可容數十人。下有湖，名巖湖。古諺云：「巖湖石板障，溪水倒流上。」

沙洲 興慶洲

川

蘇江

六印江 在海中，有六小嶼。唐時，文殊院有鐘，廣明中，黃巢欲取以烹牛，鐘忽飛入龍潭，潭塞，復移是江，每晦暝，則與江瀾出沒，鏗然有聲。宋咸平二年，衆競迎之，屹然不動，雙巖寺僧一舉得焉。元符三年，長溪尉馮躬行有記。皇朝正德十五年移譙樓。嘉靖十六年礦徒侵縣，民爭擊毀。

環溪 其溪繞郭。

秦溪 源出鐘龍井，南流合溪口。又名秦川。本州志：「秦，地在隴西天水。閩溪名『秦』何？武陵有秦人洞，零陵有秦山、秦水二地，界在辰沅之獫，山谷窅深，秦人避亂所居也。吾州有秦嶼，有秦溪坊，寧德有秦澳，福安有秦溪鄉，秦溪里，亦此義乎？晉江所以名晉，亦以晉人避亂來居江表者也。」

東溪 卽長溪也。源自浙慶元，流至東口，與平溪會流，下達古鎮門入海。其溪逶迤數百里，故名長溪。溪中盤石屹立，方圓數十仞，平夷如掌，石鐫「洗心臺」。宋林氏兄弟爭田，鄉人勸諭感悟，置酒石上，懽洽如初，鐫石中以志悔。王十朋《長溪詩》：「老矣倦游宦，入閩知山川。三山疑隔海，九嶺類鑽天。插稻到山頂，栽松侵日邊。」

周溪

穆溪 源自政和縣牛嶺，流逕十八都穆洋，入於廉溪。內有青草渡。穆洋之地，有江州司戶羅漢冲者居之。漢冲，固始人，避黃巢亂居此，剪除壅闢，上爲沃壤，民廟祀之。

廉溪 上接穆溪三港口，與東平、大梅各溪會，入於海。亦以薛令之賜名。內有官洋、水北、廉首三

渡。

大梅溪 源自葛坡，流逕梅口，與大溪水會，南入於海。

白石溪

平溪 源自壽寧，流至東口，與東溪會流，旋繞縣治。

甘棠港 上接東平、秦溪、穆溪、大梅溪，諸水會通，南出古鎮門，入於海。舊名黃崎港，有巨石梗舟。王審知就禱海靈，夜夢金甲神，自稱吳安王，許助開鑿，因命判官劉山甫往祭。中祭，海中靈怪畢出。山甫憑高視之，風雷暴興，見一物，非魚非龍，鱗黃鬣赤。凡三日夜，風雷始息，已別開一港，甚便舟楫。閩人以審知德政所致，表請賜今名，封港神爲顯應侯。見建置志于兢《忠懿王廟碑》。

棲雲潭 廣百餘丈，其長莫計。潭中屢有巨龜現怪。或亢旱，龜浮，有木查竹屑湧潭面，則驟雨至。有宋陳藥山真人隱此，亦禱雨有應。是潭多生香魚、鮒魚。鮒魚嚮日而朝。香魚惟溫、台間有之。

柳斜潭 亦名己酉灘。海潮至此。

沙潭 潭水清徹，有蛟潛焉。

廟山潭 潭中石洞岿然，漁人常見之，疑神物所居。

倒油灘 灘水清冽，爲居人取以供饌。

黃牛灘 西旁怪石，狀如黃牛。灘流甚急，舟楫上下，必獻楮於灘神。相傳灘神是邑人池道士。

綠瑩泉 蘇陽南，山澗小石，斫之色綠，可取校書。

錦屏井 泉出石匣中，冬夏不竭。

聖泉井 又名冽泉。胡主簿鑿石得之。

龜井 有石眼。

龜鏡井 潮退泉滿，漲則泉涸。

帽頭井

虎井 在縣中上杭里，泉出石罅。宋淳祐中，邑多虎患，令林子勳禱於城隍，虎來，斃井傍。

湖邊井 泉出石罅，大旱不竭。

旱井 在西門外陽頭。井高溪，下深僅四五尺，而泉湧不竭。

龜湖井

龍井 一在仙境峰巔，一在五馬峰下，一在上治，皆可禱雨。

寧德縣 在州南。東抵福寧，西抵古田，南抵羅源，北抵政和。唐，感德場。偽閩，寧德縣。宋隸福州。元隸本州。國初隸福州府。成化九年復隸州。凡三鄉、七里、二十五都，統圖二十九。(一)

安東鄉

陵山里

一都，圖四。山曰白鶴、碧山、東山、金鷄。峰曰鹿花、星崎、太女。

二都，圖一。山曰勒馬、梅溪、仙步、楊溪、城澳、(一)真龜。峰曰白馬、五馬。嶺曰飛鸞。巖曰燕石。溪曰飛鸞。潭曰使龍。

潭、險峻龍潭。

三都，圖一。峰曰瑞峰、黃灣。溪曰外渺。

四都，圖一。山曰瑞跡、石鐘。巖曰五雲。石曰神仙硯、羅隱題詩、登龍。溪曰金溪。潭曰百丈龍潭。潦曰金剛。井曰康坑。

五都，圖四。巖曰仙人。石曰零鎗。潭曰竹林龍潭。井曰龍江。

六都，圖二。山曰官底、驢山。峰曰蘆坑。巖曰隱仙。

霍童鄉

水潦里

七都，圖一。山曰白石。嶺曰峭嶺。(八)巖曰獅子。石曰和尚。

八都，圖一。山曰扈崎、潦山。洲曰琢玉。

九都，圖一。峰曰雙鷹。

十都，圖一。山曰龜山。

十一都，圖一。

霍童里

十二都，圖二。山曰霍童。巖曰鳳凰。湖曰仙湖。

十三都，圖一。巖曰青巖。湖曰呂公。

青田鄉

東洋里

十四都，圖三。山曰鳳山。洲曰橫洲。

十五都，圖一。嶺曰新嶺。巖曰燕窠。

十六都，圖二。

十七都，圖二。嶺曰麻嶺。

十八都，圖一。峰曰玉屏。嶺口高樓，（九）仙霞。巖曰顯聖。溪曰五丈。

十九都，圖一。潭曰瑞龍。

感德後里

二十都，圖一。山曰石堂。峰曰石屏、雙柱。湖曰周仙。

感德前里

二十一都，圖一。

安遠里

二十二都，圖一。山曰石碑、寶青、棋盤。峰曰文筆。巖曰天湖。洞曰石室。石曰仙跡。湖曰金鐘。

二十三都，圖二。山曰白象。峰曰展旗。巖曰午口、道者。洞曰羅漢、穹窿。溪口穹窿。潭曰午口龍潭、花洲龍潭。

二十四都，圖一。巖曰望仙。潭曰葛池龍潭。

二十五都，圖一。

西鶴山而東瑞峰，北星帽而南海潮。其形勝也。

山

白鶴山 縣主山，脉起白巖，南連飛鸞嶺，北接蓮花峰，因仙鶴來集得名。上有白鶴峰，有白鶴嶺，百

折盤空，「山起人面，雲生馬頭」，此嶺當之。嶺半有黠井，味極甘美。先是，宋樞密曹輔爲縣尉，創亭嶺上，欲引泉以飲行渴，念頭初動，泉忽立湧，遂甃爲井。初名應泉，又名曹公泉。峰北有白鶴巖，懸崖空洞，泉澗清冽，舊爲龍湫，中有靈谿書院。宋趙與擯題白鶴巖詩：「六丁開兩壁，不知始何年。中間一空洞，可張幾客筵？」峰南有南山濤，內有白巖洞，祀馬大三女仙，祈雨多應。邑人謠云：「白巖洞，深復深，女仙跡，何處尋？山前後，火流金，神來惠我三日霖。」

碧山 在郭外，爲縣治拱向。諸縣治皆南向，獨此縣向東，順山勢也。

東山 麓有東山宮。宋寶慶初，道士張志諒所建。將建時，遇白玉蟾經過止宿，告道士曰：「此霍童洞天止氣，振基當有玉石之信。」果得石魚、石龜。

金甌山 海中山也。又名覆釜。與酒嶼、猿毛嶼、大小金崎、橄欖嶼聯絡海中，爲縣治羅城。皇朝邑人林尹詩：「遙望金甌泛水心，潮來潮去不浮沉。漁舟載酒歌明月，笑入蘆花何處尋。」

梅溪山 前筆峰面後屏山，鸞江潮汐繞其下。其相屬者曰勒馬山。東接飛鸞，南俯大海，前峰回拱，狀如勒馬。爲縣學案山宋社將屋。邑人姚國秀作詩有「曠昔何來此？青山與白鷗。絮飛春不去，潮至月頻留」之句。其輔山曰金臺。

仙茅山 舊傳茅仙兄弟煉丹於此。有虛土堆，擊之有聲，曰神仙土鼓。石辣椒實生山頂。

楊溪山

城澳山 回環如城，四際皆海，內有南、北、中三澳，可聚萬人。

真龜山 四峰壁立，中有一石如龜，憑巖左顧。

瑞跡山 迤山有虎溪橋、荔山嶺、卧龍津、龍門關、望源石、日中潭、錦屏障、通仙徑。

石鐘山 脉連石壁嶺，頂有二石如鐘，扣之有聲。石壁嶺有點井焉，泉出巨石中，湧冽甘美。

官廬山 地勢坦舒，土壤沃饒。

驢山 峰巒秀拔，形如驢驢奔馳入海之勢。

白石山

扈崎山 濱海山也。山下有三江洋、三渡洋、官井洋。官井洋，邑設哨兵於此防盜。

龜山 唐蔡、柳二師攜鐵鉢銅瓶，徧尋幽勝，止於是山，作寺以居，談禪往復，心融悟道。《三山志》：

「智具禪師，揚州柳氏子，正源禪師，宣城蔡氏子，唐長慶二年同游建州。太和中，州法曹參軍楊郁及童里人黃瑜等邀請建寺，從之。逢龜而止，名寺龜山。武宗汰僧，以偈示衆：『勅命如雷下翠微，風前垂淚脫禪衣。雲中有寺不容住，塵裡無家何處歸？』後終本山。」宋建炎中，寇至，二師大布顯靈，化強爲善。後謚柳師「寂寂大師」，謚蔡師「性空大師」。寺前有金鷄巖。潞山寺，寺在中潞。自龜山分支，兩峰對峙，飛泉中注，爲三派，山當飛泉之中，故曰中潞。唐乾符中，祖師如珣印證蔡、柳二師，頓悟上機，遂建此寺，又金衣仙人亦與如珣會聚此山，有洞口金仙洞。金衣仙人見下。唐天成三年，僧紫筠刻石記云：「中潞山，百丈飛泉，鳴雷撲雨，千尋怪石，蔽日藏雲。」中和五年，前關隸營使陳飛遠與僧清彥共中聞觀察使陳崑，鑄鐵鐘一口。存。

金鄴山 唐大中中，有僧居白者至山中，遇異人告曰：「此地可居。」是夜，祥光見其處，就視之，得金尺。遂以大中八年創寺。其後，圓軌禪師患寺左瞰深坑，一夕，雷雨裂後山半，平其基，乃拓殿堂，增墀

俱備。寺有十奇：曰盤陀石、靈響石、烏馬石、潛鱗沼、雙石屏、碧水簾、湧金尺、蒙泉井、長老巖、祥雲巖。祥雲巖，亦曰五雲巖，以有五色雲見。

霍童山 在縣北七十里。天下三十六洞天，霍童其第一也。按霍童神仙，姓名周時，居此山，道居仙首。上帝宴會，籍天下洞天福地，還奏爲第一。雲笈七籤、三十六洞天，在諸名山之中，皆上仙所統治。

霍童山係第一洞天，高三千四百丈，洞周迴三十里，名曰霍林之天。鄭思遠、韓衆、許瑛三真人爲司命真君所理。白玉蟾云：「此山周環九十九峰，諸峰俱備名，著者三十六，景勝者四十八。唐大寶中，名山仙游。闔時，封爲東嶽。山四十八景：曰大童峰，峭壁凌空，產松、檜、毛竹，中多紫氣，頂有仙踪丹竈。曰小童峰，在大童峰西高亞之傍，有仙井，泉極甘冽。曰紫磨峰，在霍童。曰紫芝峰，在大童南，宋大中祥符五年，產紫芝十五本，高丈餘，因以名峰。曰蓮花墩，在霍童文岸十里許，有仙蓮，荷花開時，十里五里，或彼或此，初無定在，或出洞天山，或出田中，花大如箕，奇艷異常，紫莖屈曲而上，或十年一出，出則田鄉大稔。又有塘□湖，○亦時生五色蓮花。曰雙髻峰，在霍童上，兩峰並峙。後有葛仙翁巖，或云葛洪，或云白玉蟾也，上有丹爐竈。曰馬鞍山，形如鞍也。曰九仙峰，在邑嶺上。上有九仙庵。庵初成時，有九客借寓，旦化九鶴去。曰仙菜坪，在霍童山北。舊傳有仙橋懸空架此山，二仙童持菜籃從橋過，有老嫗洩之，二橋遂斷，因名其地曰拆橋，坪曰仙菜。曰飛來峰，在普薩峰左。舊有太湖，黃諫議指塞之。諫議名菊，隋時爲諫議大夫，諫隋帝不聽，遂尋閭苑之游，來抵霍童，見其地廣衍，遂起明農之意，鑿斷龍腰，通太湖水，揮指飛來峰塞水口，下鑄鐵牛三鎮之。曰玉女峰，在紫峰左，與金仙塔對峙，後有石筍，高數丈。曰筆硯峰，三峰突起如筆架。曰菩薩峰，在霍童山南，頂有天燈夜現。曰香爐峰，在鉢盂山左，司馬

承禎修煉之處，而李太白時訪之。承禎以十月十四日乘青驪飛昇此山之上。按《唐書》：承禎，字子微，博學能文，攻篆，迴爲一體，號「金剪刀書」，隱天台玉霄峰，自號白雲子，有服餌術。則天累徵不起，睿宗雅尚道教，屢加尊異，承禎方赴召。睿宗問陰陽術數之事。承禎對曰：「《老子經》云：『損之又損，以至無爲。』且心目所知，見損之尚未能已，豈復攻乎異端，而增智慮哉？」睿宗曰：「理身無爲，則清高矣。理國無爲，如之何？」對曰：「國猶身也。老子曰：『留心於淡，合氣於漠，順物無爲，乃無私焉，而天下理。』」睿宗深賞異之。無何，告歸山。玄宗時，累徵到京，留於內殿，問延年度世之事。承禎隱而微言，玄宗亦傳而秘之。承禎年一百餘歲，童顏輕健，若三十許人。一旦，告弟子曰：「吾自居玉霄峰，東望蓬萊，常有真靈降駕。今爲東海青童君、東華君所召，必須去人間。」俄頃氣絕，蛻然解化。今云青驪飛昇，未知其詳，豈霍童卽青童耶？李太白從承禎游，承禎謂其有仙風道骨，可與神游八極之表。白詩云：「家本紫雲山，道風未淪落。沉懷丹壑志，冲賞歸寂寞。謁來游閩荒，捫步涉禹鑿。黃緣泛湖海，偃蹇陟廬霍。」曰卓筆峰，尖聳秀拔。古識云：「金釵斜插地，文筆倒書天。」曰石弼峰，在霍童右。曰左弼峰，在霍童左。《仙經》云：「茅君爲左弼仙卿，韓衆爲右弼仙伯。」今霍童山有左、右二弼峰。世云茅君爲三天都尉，常會群仙於此，是爲石仙壇。壇生龍鬚草，旁生竹一枝，遇風搖動，能自掃壇。壇西南有石甕貯水，色白，味極嘉，有石廊三十餘丈，石室盈丈。曰羊廚峰，以形名。曰展旗峰，在支提南，西鄉諸山皆本於此。曰一劍峰，在霍童左，尖削插空。呂洞賓題詩有「劍峰割斷名利關」之句。曰那羅巖，在葛仙巖西。《華嚴經》云：「一名陀羅延窟。」中有石室數十丈，可容數百人。寺建石室之內，頂石如彈，搖之則動。祈嗣者祝，彈爲應，莫不如響。曰煉丹巖，在昇仙峰左，有司馬承禎搗藥臼。曰鳳凰巖。黃諫議菊有二女，曰丹鳳，

曰赤鳳，俱在巖中昇仙。曰搗米巖，在煉丹巖側，上有搗米臼。曰懸鐘巖，在霍童山，上員下大，高數十丈。曰合掌峰，在霍童西。曰獅子巖，在霍童左，宋陳石堂先生所居主山也。曰響山巖，在霍童左，兩巖對峙，人語響應，龍鬚之草生焉。曰霍林洞。唐乾符時，有金衣仙人修煉於此，後入中潯，與僧如珣說法談玄，靈光夜見，金衣授如珣修真之訣。曰赤城洞，與霍林洞並在霍童萬山中。曰蝙蝠洞，在響山巖右，洞多蝙蝠。曰支提山華藏寺，去霍童二十里。寺前有五龍潭，禱雨神應。按《華嚴經》：「東南有處名山，號曰支提，從昔以來，諸菩薩衆於中止住。現有菩薩名曰天冠，與其眷屬、諸菩薩衆一千人，俱常在其中，而演說法。」山在霍童萬山中，周迴數十里，茂林蔽日，古木生斑，四面拱翠，絕無煙火，東聯高蓋山，西接那羅延窟，南入化成林界，北距紫芝峰，常有祥雲覆其頂，時夜放光。現未常有。經云：「天下有五法界：天、地、水、風、火。茲爲天界」云。考舊志，唐高麗僧曰元表者，歸自西域，領心王菩薩之旨，以「東南震旦支提，千天冠演法於中，可負我華閩木函《華嚴經》八十二本，去隱那羅延窟，以候之。」元表如命勇往，開誦聲聞，爲樵者所覺。閩僧元白知之，支筇搜奇，訪元表，告以借龍潭地卓庵。元白發如是願，隨感龍衆，湧沙塞淵成基，得蓮臺九座。元表以經授之，而身在碧雲端矣。時經藏巖寶，乃抵甘露，邀都尉寺二僧以迎歸，狀其事於吳越閩王。是爲此山創始也。宋開寶四年辛未，吳越王錢俶翻閱《華嚴經》，因詢菩薩住處，大會高僧，無能知者，惟靈隱了悟禪師清聳卽從法座起，道所以然。隨遣若干人，俱夜到山下之小支寺。明，尋鐘聲而進，白猿導前，越三日，入林中松溪摩洞，抵龍井，迤邐至晚，宿一大刹，殿閣崢嶸，衆盈萬指，匾書《古佛《大華嚴》之經》。既曙，依然處林莽間。所見者，天冠千軀、金燈四耀，潛化成寺。清聳還報，錢王捐金建寺，鑄天冠一千身，航海送來，中遇颶大作，舟人以半沉水。及抵寺，其半投水

者已先至矣。故老相傳，舟未至時，鄉人望有冠蓋輝煌，鱗次登嶺若傀儡然，後乃覺爲天冠也。今沿呼爲傀儡嶺。而寺旁有曬衣臺，則天冠沉水者先期曬衣其處，迄今片草不生。其異如此。寺皆錢王矩度，壯麗異常。時封此山爲「東嶽」，勅賜「祐國記室禪師」，住持永爲山鎮。宋淳化元年，宸章寶函龍錫凡四。自景德至皇祐，皆有賜。政和間，以帥書黃公裳之請，勅改「政和萬壽禪寺」額。繇是雲衲林會，爐講大開矣。天冠威德，不可思議。人不辭勞，辦香冥叩，如響斯答，聖鐘鏗鳴，瑞燈燁煜。以志心求者，每示現焉。相傳政和間，福州人李舒長謁天冠千佛，行深山，登奏洞，無水盥手，方折草按莎，忽一人持銅盆盛水奉之，又進手巾。見其手青面白，舒長不覺其異，顧之而笑，其人亦笑，已不見云。胡元末，寺燬廢。皇朝永樂初，遣中使周覺成鼎建，勅名華嚴寺，立田十六頃四十餘畝，齋衆祝聖。嘉靖中，寺燬田廢。萬曆元年，吉祥寺僧大遷雲游至是，夜見天冠放大毫光，奇之，遂鳩財重建，田亦稍復。二十七年，孝定太后鑄鐫金毗盧古佛，遣張中使齎鎮其寺，賜大遷千仙紫衣三襲。中使至，焚香和南虔禱天燈，期以復命。居三日內，夜有燈熒熒從化成林東而下，寺衆遙集，奏大法鼓迓之，須臾，復變爲三，良久乃沒。次夜，復大放無量，百燈錯落木末如晝。中使羅拜加額，大喜歸報。二十八年，神宗復遣中使齎經一藏、御杖、龍幡來鎮寺中。閩巡撫趙參魯以山中曠絕，恐惑衆生亂，請於朝，奉還御杖、藏經於會省。宋大梁王平國詩：「群峰翠擁古禪關，夾道松篁五月寒。欲識天冠真隱處，白雲架頂鎖金壇。」主簿陸游詩：「高明每慣習鑿齒，巨眼適逢支遁林。共語不知紅燭短，對床空嘆白雲深。現前鐘鼓何曾隱，匝地毫光不用尋。欲識天冠真面目，鳥啼猿嘯總知音。」曰說法臺，在辟支巖側，云天冠說法處也。臺產蘭蕙，多檜栢。其上廣平，可坐千人。曰袈裟臺，卽曬衣臺，廣數十丈。曰雪花林，松栢奇勝。曰成化林，在金燈峰左，常有天冠說法其

中，紫雲覆蓋，靜夜有天燈隱現九里許。多產松檜，間有白髮異人出入。皇朝萬曆間，有匠石四五人，市木於支提僧，方結寮開斧，忽有老僧從一道士至寮，阻之曰：「此吾木也。」轉盼失之，匠石驚駭罷。曰五龍潭，在化成林南，五潭聯絡相接。其一名青龍潭，潭水旋人巖中，時起雲霧。次名洗心池，澄清徹底。三名千佛沐浴池，瀑布懸瀉，潭形如荷葉，湛然不動。皇朝萬曆中，僧性吉於潭側誦《大悲咒》，誦方四遍，水忽騰沸，頃之有龍振鱗天蟠波面，腰彎若弓，首尾隱於驚浪飛濤中，不可得見，吉大駭喧呼，金燈精舍僧咸出視之，良久乃奮飛雲表。其中二潭，巖石崎嶇，人跡罕到。曰棋盤石，在仙壇之上。曰三品石，石色青紫。曰桃洲峽，在鶴林宮東一里。唐有此洲，桃花甚盛，至宋不衰。曰雲錦屏，在飛來峰左。曰仙石橋，在石壇東，橫跨澗上，有石盤、石盂、玉鏡、碧色鵲毛、香爐，皆天成也。曰甘露寺。梁天監初，有僧法權、法群二人來山下，飲甘露坑泉，遂白日騰昇。人建寺，曰甘露寺，有九寶金鐘，閩王審知所鑄，聲聞數里外，則天必大晴。曰瀑布泉。曰玉露井，在小童峰前，水極甘冽。或曰海輶井也。井中鱖甚巨，或時出井弄水，久雨必晴，久晴必雨。曰仙巖寺，在仙石橋之上。曰辟支巖，在古木巖右，景極幽勝。巖下寺，辟支佛所棲。辟支佛，闍生佛也，二月三日降生，巖前生成五百天人石，上生成石龜、石桃，能生能落。曰鶴林宮，在霍童村，褚伯玉修真之地。伯玉，鹽官人，東晉時居南霍，游行諸山，上虞吳曇授許椽書《西嶽公禁上符》許椽爲上計椽，主簿書也。及楊書《中黃制虎豹符》楊羲所書也。興寧乙丑年，真降，受《真誥》。凡二短卷，常帶自隨，至梁大同二年正月元日，駕鶴登天，賜號鶴林。此外，修真之士則又有趙昞、鄧伯元、王玄甫、許碯、馬湘、程公、姚道人、尹道人、湯公、馬仙姑姊妹云。昞、碯、馬仙姑，已別見。伯元，吳郡人。玄甫，沛國人。《真誥稽神樞》：「王、鄧二真人，學道霍山，受服青精、石飯，餐白霞丹景之法，用思洞房以來積三

十四年，乃內見五臟。冥夜書來：『晉興寧三年乙丑歲正月五日，天帝遣羽車下迎。』二真人以其日乘雲駕龍，白日登天。今在北玄府受書，位爲中嶽真人。」湘，字自然，鹽官人。南游霍童，宿山下；投宿者衆，主人戲言無宿處，湘曰：「我坐到明。」衆客皆睡，湘躍身梁上。衆客於火光中見之，驚異曰：「梁上猶能睡得，壁間不可攙人。」湘遂攙人壁。衆客祈謝，移時乃出。人山駐泊。唐大中十一年，販家戶解。明年復來此山上昇。程公，縣之二十三都人，煉真山中，端午日，人午日巖，忽然輕舉。姚道人，邑之二十三都人，修真道者巖，丹成，霍山羽化。尹道人，湯公，俱縣之外渺人，同學法閭山道人，得法精高。湯公，逐之道人鞭石人霍童，後遇異人授以仙訣，遂仙。

鳳山 卓立萬仞，旁分兩翼如鳳飛。上有鳳池。聖僧巖，昔羅漢聖僧現其中，紫雲繞繚，音樂騰沸。又有虛石巖，八面玲瓏。又有卓錫泉，相傳僧湛庵卓錫所出。

石堂山 有石窟如堂。上有嶺道通古田嶺。下有塘，名石塘，清泓可鑑，宋儒陳普所居地也。石堂主山則唐山，左有石屋山，又有雙柱峰。

石碑山 多石少木，石皆溫潤，山前有石如碑碣。其西曰寶青山。

棋盤山 地極幽勝，上有仙人坐卧影跡及棋盤石。

白象山 形如象，三台後峙，環溪前繞，清流瑩澈。堪輿家謂之白象飲湖。

蓮花峰 俗呼金字峰，邑勝概也。

星帽峰 林木蕃茂，溪谷幽復，與白鶴、瑞峰皆爲縣治形勝。亦名展誥峰。

白馬峰

五馬峰 縣捍門山也。五峰列峙如馬。縣南諸山則馳海頭，而五峰獨高。

玉女峰 在縣城正南。四傍小山森羅，一峰突起，如玉女亭亭，似武夷矣。前有茶園，後有石笋，高數丈。

瑞峰 海中山也。秀拔萬仞，與白鶴峰對峙。韓、董二仙修煉於此，丹井、棋、枰之屬猶存。又有嵩山、黃灣峰，皆與此峰並高，而嵩山崖有千尺之瀑。

蘆坑峰 上多仙跡，石峰屹立如劍戟，二水交流，境極幽勝。

雙鷹峰

玉屏峰 在塵洞嶺，二峰秀拔，上豐下斂，殊狀奇崛。

石屏峰(二) 上有仙翁巖。相傳葛仙因大旱登巖巔，心念捨軀祈雨，忽有紫雲擁出，沛雨三日。

雪重峰 登其巔，海上歷歷。中有石洞，容十餘人，歲有鼓聲，可卜豐稔。

鐘峰 下有大湖，曰鐘湖，水深莫測，魚龍宅焉。相傳有金鐘自湖中飛騰而去。

飛鸞嶺 與勒馬、梅溪諸山一脉，走羅源道也。其東峰百丈漈，名飛棲雲龍潭，潭有龍宅焉。唐黃岳家此峰之下。岳博通經史，尤邃易象、曆數之學，唐末繇鄉貢入太學。巢寇入閩，避地者無所衣食，聞岳勤施，從之如歸。乾寧中，王審知屢辟，不就。審知既竊王號，必欲起岳，岳投潭死。邦人哀之，立祠祀焉。宋封岳忠烈王。今號爲忠烈仙潭。岳死時，父母妻子二弟一白犬皆赴水死，僞閩使者崇、舒、趙、田四人亦死。今皆肖像祠中。使者必其來召岳者也。嶺下有萬石巖，巖如室，可容數百人，中有石竈、石井、石床，旁有石舟。兩崖之間，有石橋橫跨。

隱仙嶺 地名冲裡。中有石室，號鬼洞，年豐則鬼嘯。皇朝有彭翁者有其山，翁醉行過嶺，睡卧亭中，群鬼相語，具燈燭送之，遂扶翁以歸。景泰二年也。又嘉靖中，邑人會同令陳琯記：「予以嘉靖四十二年壬戌四月，在筠竹坪蘇家，夜方就寢，下床人曰：『今夜更鼓響亮。』予傾耳聽之，正發插定更也。是夜心事悽涼，亦不成寐，聞其更更傳遞甚明，至五鼓煞搖，俱如譙樓。然筠竹去冲裡十餘里，鼓聲在百步之內。比予所親聞也。」

石壁嶺 在縣北一十里。石壁峭拔，高入雲霄。皇朝林保童有「誰信閩中險，無殊蜀道難」之句。嶺上巨石湧泉清冽，嶺下有溪，與瑞跡溪環繞里中，謂之雙溪。溪傍有小山似龜，故名龜嶼。

埔嶺 下有東牆渡，通寶豐銀場。

新嶺 高者大新嶺，次者小新嶺。上有瀑布，泉如懸河，人過其下，盛暑如秋。元末，有僧平麓者，初居鳳山，每見香煙飄飄西往，乃隨其所之，至此萬山之中，群峰圍繞，前有澗水清徹，可照可濯，於是夜坐其間，隱隱有鐘鼓聲，遂以至元五年建寺。先是，平麓禮鳳山雲衲爲師，會構佛殿，諸徒分運木石，平麓後至，爲衆所呵；及衆運至，而麓所當運者業已先在寺中。至正二年元日，端坐石龕而化，遺言：「十年一更衣。」迄今三百餘載，幻身如故。衆呼爲方廣佛，寺曰方廣寺。

麻嶺 通政和、壽寧二縣，巡檢司設此。其地有顯聖巖，石室可容數百人。有虎溪橋、靈巖井、醉經堂、鐵羅漢、虛涼閣、石爐峰、石塔，及顯然泉、天然池，合本巖爲十奇。

萬樓嶺 仙霞嶺

仙人巖 巖中有雙掌印石，痕深數寸。又百步溪畔亦有仙跡。巖上有雙仙掌及馬蹄跡，對面山有仙

人坐痕。山下爲章灣。

獅子巖 鳳凰巖

青巖 皇朝宣德五年七月，督銀場太監周覺成至巖下，令藥魚各溪，煉巨石投水中爆裂，俾魚驚出。忽有道人來告曰：「一切蠢動咸有佛性，乞減藥三分。」覺成不從，但啗以豆腐菜飯。食訖而去。明日下藥各溪，魚蝦盡死。中有大黃蜆，剖其腹，所食豆腐菜飯尚在。覺成病劇，恍惚見魚蝦無數索命，遂死。

燕窠巖 天湖巖

午日巖 高數百丈，瀑布直下。昔程公採藥輕舉處也。

望仙巖

石室洞 歲旱，聞洞中有音樂聲，必雨。舊傳唐有異僧於此仙去。

羅漢洞 洞對石壁嶺。舊傳清秋之夜，常有鐘聲遠揚。曾有樵夫深入，忽遇行脚僧數十，趁其後，杳無所見。旁有羅巖。

穹窿洞 巖洞玲瓏。溪與洞皆以是名。其山中有道者巖、石門、石室，昔有姚道人居此。

神仙硯石

羅隱題詩石 在四都溪邊。舊有羅隱題跡。今尚有「添硯沼」三字。

登龍石 皇朝弘治十年，水漲金溪，山墩崩去半，中有兩石相合，摧流其一，更一尚存，中刻二字曰登龍，字徑方五寸。

磨鎗石 相傳黃巢過此磨鎗，跡深尺餘。

和尚石

仙跡石 余家屋後有石如板，高丈許，厚尺許，上有仙人武。

琢玉洲

櫃洲 水極險惡。居人粥鹽爲業。

川

海 縣境水入海者三：一自酒嶼，縣金崎逕三江洋入於海；一自三嶼前，逕三洋渡，合藍田水入於海；一自岫村港，逕岫門徑至白匏山，通於海。其海潮之水入於縣境者有五：一支從南門溪入，一從金鰲橋入，一從藍田入，一從東牆入，一從金垂入。

飛鸞溪 在飛鸞嶺下。源出羅源縣，至三嶼右，匯於海。

外渺溪 源出政和界，逕清巖、甘露溪，至銅鏡、金垂匯於海。

金溪 源出古田縣，入油溪，逕羅源，會百丈漈、竹林潭，至溪口村，同出三嶼之左，匯於海。

五丈溪

穹窿溪 源出古田，合周仙湖，東流至溪，又東爲定尾，逕赤鑑湖而下，匯於海。溪盡處有石窟，約圍十丈，深不可計，曰天柱窟。

環溪 源出古田，雙溪夾拱周圍，會穹窿溪，逕天柱窟，下至埔源入於海。

仙湖 在霍童。又名堵坪湖。隋諫議大夫黃菊鑿，通溪水，長亘里許，廣百餘丈，溉田千餘頃，皆爲沃壤。宋淳熙二年，有請佃者，縣令儲惇叙詩：「咫尺天湖號堵坪，先賢曾此勸農耕。若教一日歸豪右，

敢向黃公廟下行？」

呂公湖 中多金鯉。

周仙湖 在巖峰之上，鄉田賴其灌溉。昔有周仙於此修煉，白日飛昇。

金鐘湖 相傳宋元祐間，有樵者見金鐘浮水，俄沒，因名。其西曰鐘洋，亦以此得名。

東湖 在城東。宋令李澤民以山高水迅，堤而湖之，起附馬塘，歷酒嶼，聯金甌，延岫至於藍岫，繇是旱澇有備。民號李公堤。

水南湖 在銅鏡。澗水不竭，可資灌溉。

赤鑑湖 一名西陂。宋土民林圭與僧養譽築堤作堰，以灌田。後陷於海。宋韓世忠因平范汝為，特訪阮大成，過此詩：「萬頃琉璃到底清，寒光不動海門平。鑑開波面一天淨，虹吸潮頭萬里聲。吹斷海風漁笛遠，載歸秋月落帆輕。芍陂曾上孤舟看，何似今朝雙眼明。」

險峻龍潭 從石壁嶺沿溪而人，勢極險峻。

百丈龍潭 在菰洋下。潭高百丈，有二井，緣崖攀藤，僅到中井。宋時，主簿丁大全旱禱，令人下銀瓶乞水，縋上，得瓦瓶，人全疑之，復造銀瓶，躬往投之，又得瓦瓶。大全祝曰：「神龍有靈，吾後當貴，幸示顯異。」潭中遂露龍爪。大全後登宰府，奏封龍王。

竹林龍潭 瑞龍潭

午日龍潭 在廉坂姚溪尾。蒙密不見天日，惟午照及之。禱雨有應。

花洲龍潭 水深崖峻，崖上鑿放生二字。相傳洲上有桃花。因水漲，衝洲成潭。

葛地龍潭

金剛澗 俗呼道士澗。有石泉。

定泉 在靈谿寺右，深二丈，旱澇不增減，故□。(一)

博濟泉 在銅鏡。夏冽冬溫。

廉坑井

龍江井 在章灣。井水滿溢，明年必稔，若不供飲汲，則旱。宋乾道元年，邑大旱，官民禱雨不應，

章灣士人阮元齡撰《懇旱魃文》，齋禱龍湫，大雨立至，三日乃止。是夕，元齡夢黃衣使者來曰：「上帝命取《懇魃文》，君請促裝。」元齡覺悟，乃起齋沐，錄其文而焚之，明日遂卒，年三十五。其文曰：「吁咄哉！

酷魃肆虐，多歷時所，恒暘烈燄，炖煖灼煦，譬堪輿大於一高俎，窮極萬有，羅致深弃音舉，藏也。百億魃屬，

悉持巨炬，發爇爇毛，箇簾皺皺箇，未五切。簾，米古切。皺，音肖，火烈也。風伯睡怨睡音篆。怨，音戀，不睡也。勸厥貪

污勸，音盧，助也。動壠塿音課，塵也。出入胥舅音舉。壠，雲疾雷，震赫時暑。九泉焦而揚塵，蘋荇燎而成

旄。音舉，乾菜也。流泉石之淵淵，窮蛟龍而就肱。音汝，魚不鮮也。粢盛夷於蕙艾，糠粃彌於稷黍。民衆而

顛，人音覽，愁也。物妥而脯。妥，音依，落也。倒懸不足以喻其急，啗茶不足以擬其苦。乃刲羊，乃盃醕，盃，音

呼，至也。乃鳴螺，乃敔鼓，敔，音洩，擊也。乃登崇丘而臨吉土，巫咸抑揚，歌間降汝，汝魃百億，於時處處。濟

濟衣冠，盤辟俯偃，亦有奇章，彰我肺腑。汝醉而歌，汝樂而語。巫咸受辭，曰爲我語。我語諸甫：「無病

斯旱，無徒斯楚。吾將倒天潢而下流，吾將擊滄溟而下霽。音渝，雨也。吾將瀉積石之源，吾將決常山之

渚。遲吾須臾，百美俱美，人皆汝然，歡聲噉噉，閱日涉旬，俯伏以佇，石燕不飛，商羊不舞，縱一瓢會，不

人意杼。咄哉酷魃，俟吾之舉：嗟魃爾來，無念爾祖，在昔帝乙，孔仁宣王，孔武戒五事而嘉應未符，率圭壁而寧莫我許，《春秋》二百四十二年，屢書不雨。歷漢涉唐，其間循良之吏、聰明之主，憂民重穀、小心詡詡，乃祖惻然，悍如蝻蚊，名聲不祥，談者孰數？少而乳汝，小子凶緒，遭逢聖明，宜規宜矩，如何不悛，尤深鉏耨？音補計汝之辜，當膏鉞斧。我骨不凡，行跨飛霧，叩之帝閭，再拜覲縷，帝哀下民，寧不震怒？諒勅六丁，撮汝驍鼠。汝於斯時，雖悔何補？『言未及既，有一旱豎，狂然而來，剖析合古，曰：『子，儒者也，言何妄吐！洪範之書，如日之忤，恒暘之罰，繇僭之取。方今上自朝廷，下至郡府，細及黔民，遠逮戎虜，或專威福，或司衡魁，音汝倡優之餘，猶狘楚楚，凡庶之居，侈於禁御，乖天之和，以來斯阻。於我何辜，而蒙我咥。音塢淫巫不信，又何足與！肯彼之言，疑我騰怛。子殆未明耶？』主人未及應，雲霧翳然而去。』又皇朝景泰三年，邑人禱雨龍湫，疏文未善，投之須臾，別浮片紙，取視，乃元至正間禱雨疏也。其文曰：「某等俯陳蟻悃，仰瀆龍顏，乞鑒凡心，顧舒聖眼。言念生居在世，治本於農，蒙天地覆載之恩，感雨露滋濡之德，春耕夏耨，敢辭塗足之勤？秋穫冬藏，實切資身之望。不期茲歲，忽值暘暘，爰從九夏之初，逮及三秋之始，已經六旬不雨，忍見千里揚塵，石燕停飛，商羊絕舞。致泉源之既竭，慨旱魃之爲凶，知作孽自我蒸民，故降災實繇上帝。爰深修省，特致禱祈，虔取某月某時，恭請龍湫，恪求聖水，顧施甘雨，稍救枯苗。伏願龍顏大悅，賜涓滴於金瓶，龜折用消，霈滂沱於隴畝，庸副實粟之詠，預占大有之祥，垂祐我民，逐續乃命。某等無任，願仰之至。謹疏。」衆爲誦之，須臾，大雨如注。

何子曰：予志山川，而郡縣之創立，坊里之因革，以及古今賢豪託寄之蹤、游覽之詞，與夫恢誕奇偉

或有或無之事，莫不羅網，亦或觀方採勝之一助也。

贊曰：閩見載籍，昉自職方，聖人之裔，服此遙疆。秦廢爲郡，人漢復王，分爭寇敗，遂致竄亡。歷吳越晉，吏置官張，以緯以經，侈於隋唐。閩越割據，天統靡綱，有宋聿興，益厚宇章。爰人我明，遠邕遐昌，耀明被景，日出天光。土壤間錯，都里鬱望，古往今來，共此海荒。我志奇勝，亦及荒唐，何如鄒子，曼衍無旁？

〔校記〕

〔一〕「福寧州」下，各本原衍「下」字，據本書體例刪。

〔二〕「今領三十三都」，下文實列三十四都。

〔三〕「四十五圖」四字，各本原脫，據本書體例補。

〔四〕「大萊」，下文作「大萊」。

〔五〕「獅子峰」，各本原作「獅峰」，據上文及《八閩通志·地理》改。

〔六〕「統圖三十九」，下文實列三十六圖。

〔七〕「城澳」，各本原作「城灣」，據下文及《八閩通志·地理》改。

〔八〕「埔嶺」，各本原作「埔嶺」，據下文及《八閩通志·地理》改。

〔九〕「高樓」，下文作「萬樓」。

〔一〇〕「又有塘」下，各本原闕一字。

〔一一〕「石屏峰」，各本原作「石屏山」，據上文及《八閩通志·地理》改。

〔一二〕「故」下，各本原闕一字，當是「名」字。

閩書卷之三十二

建置志

福州府 閩縣 侯官縣 懷安故縣 古田縣 閩清縣 閩清縣 長樂縣 連江縣 羅源縣 永

福縣 福清縣(二)

福州 郡城，自無諸開建以都冶，曰冶城，在今府治東北，依山置壘，據將軍山、歐冶池，稱形勝矣。晉太康三年既詔置郡，命嚴高治故城。高謂故城隘，不足以廣聚，將移白田渡，嫌非南向，圖以咨郭璞。璞指其小山阜曰：「是宜城。」城成，璞爲記，曰：「桑田爲海，人事更改。六旬甲子，當見其害。更重着衣，周迴重載。鄭國歸朝，重關爲待。鳥出木空，千載不昧。前有雙眉，重施粉黛。溪澗水來，盡歸於海。主揖其客，客住主在。穩首東日，高山鎮寨。本自添金，因成右兌。但見蛇影，莫知坐亥。事過方知，知而未會。龍山高山，光照其代。巧婦能裁，得令人愛。若解修心，得其終倍。市籠放火，聚集磊磊。有一老翁，手把竹筒。重添新宰，在言不在。」銘曰：「泰康之載，遷插甌基。四色牢城，層巒三徑。洪許南流，瑞龍地應。其主螺女，現對花峰。千載不雜，世代興隆。諸邦萬古，繁盛仁風。其城形狀，如鸞似鳳。勢氣盤拏，遇兵不鏼，遇荒不掠，逢災不染。其甲子滿，廢而復興。」其後，人又得二識：其一得

於城南釣龍臺石刻。云晉太康三年，太守嚴高圖越王山南之形勢，以咨郭璞。璞云：「方山秀拔於前，二山環峙於後，八百年後大盛。」讖曰：「後閭峯兀創危亭，八百年前兆此名。天降元精如漢佐，岳陶靈氣似周臣。中坻不見容舳舳，古渡應無病涉人。好是蹇裳待今日，晉浦坊中人挺生。」又其一：「南臺沙合，河口路通。先出狀元，後出相公。」晉浦坊，地名河東。初，郡人有詩曰：「疑是分開混沌初，奔奇走秀兩相於。等閑開圃多栽竹，行到人家盡讀書。宴飲直嘗千戶酒，盤餐惟候兩朝魚。九華坊頂真仙宅，晉浦坊中出輔車」者是也。高之所城，子城也。唐中和，觀察使鄭鑑始修廣其東南隅。先是，開城南河，有人得石，記云：「五百年城移東南，本地合出連帥。」自太康至是適五百年。《閩川名士傳》以爲「陳巖，閩人，爲『連帥』之應」。文德元年，陳巖恢其形勢，甃之磚石。王氏國閩，復外築羅城四十里。梁開平三年，復築南北夾城，謂之南月城、北月城。黃滔爲記：「公之築城也，恢守地養民之本，隆暫勞永逸之策。其名舉一而生三，法陽數也，曰大城焉，南月城焉，北月城焉。周圍二十六里四千八百丈。基鑿於地十有五尺，杵上胎石而上，上高二十尺，厚十有七尺；外甃以磚，凡一千五百萬片；上架以屋，其屋曰廊。其大城之廊也，一千八百有十間。自廊凸而出之爲敵樓，樓之層者二十有三；又角立之樓六，其二者層復層焉，皆欄干鉤聯，參差煥赫。而廊之若干步一鋪，又各以鼓而司更焉，凡三十有六，謂之更鋪。其四面之門八：其南曰福安門，福安之東曰清平門，西曰清遠門，其西北曰安善門，安善之東曰通遠門，其東曰通津門，通津之北曰濟川門，其西曰善化門，皆鐵扇銅扃，開陽闔陰。門之上仍揭以樓，三櫺兩挾，兩嚮修廊，雙面遠碧。門之左右，又引而出之，爲之亭兩間一廈。又匪樓之門九，曰暗門焉。又水門三：其二樹欄，飾波卸航，人舟鳴舷，柳浦迴環；一郊堤諸萬戶，注之以堰二，渡之以橋九，鏡瑩虹橫，交舫走蹄。斯

大城之制也。粵南月城也，東貯九仙，西盛烏石之二山，嘉樹蓄雲，茂草藏獸。城上之廊一千有三間，敵樓四十有九，樓之層者三。其門二，曰登庸門、道清門。其上之樓，其下之扉，左右之引亭。建暗門八、水門二。其堰一，其橋五，及廊之更鋪二十，悉與大城類。其外之東西復距而出之，謂之橫城。其東也，城上之廊四十二間五廡，其門一。斯南月城之制也。伊北月城也，城上之廊六百四十二間，敵樓二十有六，樓之層者十。其門二，曰道泰門、嚴勝門。其上之樓，其下之扉，左右之引亭。建暗門四、水門二。其橋一，及廊之更鋪十有四，復與南月城類。又甃而出之，謂之橫城，城上之廊五間一廡，其門一。斯北月城之制也。其東畫長川以爲洫，西連乎南盤，別浦以爲溝，悉通海，鱗朝夕盈縮之波，底澤鱗介，岸泊艤樓。北截越王之故山，派西湖之爲隍，若鼇之負，如甌之置，軒軒然翼翼然，天設之府，神開之地也。審知名月城門曰登庸者，以應郭璞「沙合」之讖，門之橋曰沙合橋。其名「嚴勝」者，云舊有嚴氏，居邇於壕，家鬻米，取贏極薄，會方憂旱，太守夜夢神人告之，必得如嚴者使禱，太守致嚴，遂得雨，故以名門。王氏之爲此城也，壁壘繁山，樓櫓庇馬，重門累甃，至於三四，周迴繚繞，樓堞相屬，豈非爲國深慮傳之亡窮者哉？然其後卒歸於吳越之錢氏。錢昱有此城，復築東南夾城以益之：南自光順門而西，東自東武門而北，又自東武門而南，凡九百餘丈，高丈有六尺，厚半之，石以爲基。累甃覆屋，開沿城河三千餘尺，又增一壯矣。而又卒歸於宋。既歸宋，宋乃命悉墮之云。始，王氏之築城也，陶磚悉令印錢文，後歸錢氏，蓋其兆矣。及錢昱歸宋而城墮，計其爲此城，又直三年而已。予讀王禹偁奏疏，謂五季亂離，各據城壘，豆分瓜剖，七十餘年。太祖、太宗削平僭偽，天下一家，令江淮諸郡毀城隍、收兵甲、撤武備者二十餘年，名爲郡城，蕩若平地。然則宋初江南城壁大抵皆墮撤也。皇祐三年，始詔曹待制穎叔以漸開修，然未有成。熙

寧元年，章太卿岷奏修子城，既得命，會移官，議者慮其費廣，程太卿師孟謂轉運使曰：「第得錢二十萬，半歲可就矣。」乃以四月始事，九月卒功。而外城終宋之世屢議收復，竟以不就。至元末，陳平章友定乃稍葺爲完城。皇朝洪武四年，駙馬都尉王恭承命以來，因址築門，先爲北樓，曰樣樓；南則因故外城，廣袤方十里，高二丈一尺有奇，厚一丈七尺，周三千三百四十九丈。城上敵樓六十有二，警鋪九十有八，堞樓二千六百八十有四，女牆四千八百有五，表裏闢夾道。嘉靖三十八年設倭備，增置外敵臺三十六；環城三面塹濠廣之，延袤三千三百四十六丈有奇；子城之門七：南虎節門，門外還珠門，東南定安門，東康泰門，西豐樂門，門內宜興門，西南清泰門，羅城之門六：南利涉門，東南通津門，東海晏門，東北延遠門，北永安門，西北安善門，西南清遠門；夾城之門六：南寧越門，東南美化門，門內水步門，東北井樓門，北嚴勝門，西北遺愛門，西迎仙門；外城之門六：南沙合門，東南通仙門，東行春門，東北湯井門，船塢門，西怡山門。此宋時之門也，曰南門、曰北門、曰東門、曰西門、曰水部門、曰湯門、曰井樓門。城中水關四：一在水部門東，引南臺江潮自河口，繚繞凡三十有六曲，繇水關入城；一在西門之南，引洪塘江潮自西潭浦，亦三十有六曲，繇西水關入城；城中河數十丈，繁迴於民居前後，舟航隨潮汐往來。其在北門、湯門二關，則但以洩潦水。此今時之門也。

巡撫都察院 在嵩山之麓。嘉靖三十六年始設巡撫，開府於此。其地宋尚書王祖道宅。洪武初，爲駙馬都尉王恭公署。正統中，鎮守內官居之。

巡按察院 在仙塔光澤坊內。舊織染局地。成化間建市舶府。嘉靖二十七年，御史陳宗夔自南院徙居，以後因之。萬曆十四年，御史楊四知闢門之西路而直之。三十二年，御史方元彥疑院署有崇，移駐

福清，時署郡篆者遂改建於院東偏，而虛其舊署。

南察院 舊爲貢院地。成化七年改爲察院，卽御史陳宗夔所徙去者。又有西察院，在三山驛之右，今爲使客公館。

布政使司 當三山之中，後枕越山，前案方山。晉郡守嚴高建爲刺史衙。唐爲都督府，又觀察使衙，又爲威武軍衙。五代梁爲大都督府。偽閩僭號，改作踰制，宮有寶皇、大明、長春、紫薇、東華、躍龍，殿有文明、文德、九龍、大輔、明威，門有紫宸、啟聖、應天、東清、安泰、金德。宋興，錢氏內附，廢撤無留，獨明威殿存。守臣避不敢居，以爲設廳，凡勅設宴乃就焉，而卽其西建大廳，爲視事之所。端宗卽位於閩，以設廳爲垂拱殿。元爲中書省。皇朝洪武初，改爲福建等處承宣布政使司。儀門之外，東曰清軍道，曰分守武平道，西曰督糧道，曰分守福寧道，經歷司、照磨所、理問所、架閣庫、廣積庫皆在焉；前有譙樓，高九十八尺，深八十一尺，廣二百八十尺；石柱四十四，長各二十八尺，廣二尺八寸，拂雲造天，如凌雲之閣，銖兩悉稱。門直方山，以爲五虎對之。杜中門，從左旁門出。

按察司 在布政司南少西，卽宋提刑司也。明道初，提刑劉立之建。乾道初，增置武臣。淳熙中，武提刑葉南仲始建公宇，分爲東西廳。元爲肅政廉訪司，以東廳視事，以西廳爲南臺監察分治行司。皇朝洪武二年改爲福建等處提刑按察司。十七年，僉事謝肅重修，建福寧道於儀門東，以舊分治行司爲察院，巡按御史居之。正統五年，移道於錢局，移察院於西街，然門尚東折。天順三年，按察使胡新更大門於儀門南，以舊大門前地易民居，闢東而衢。成化元年，按察使馬文昇復鸞民居，闢西而衢。弘治以後，按察使李貢、夏景和、陳珂、劉遜相繼經營，拓其隘陋，更爲闔敞，而門始南向。別有提學道、兵備道、巡海道、

屯鹽道、分巡福寧道。

都轉運鹽使司 在布政司西，卽宋西外宗正司也。按宋轉運司在建州，建炎二年以建寇移福州，後仍舊。元更置福建等處鹽課市舶都轉運使司於福星坊內舊福星館。後或爲都轉運使司，或爲都提舉司，更改不常。皇慶元年移置今所。皇朝洪武元年改爲都轉運鹽使司。分司二：一在水口，一在黃崎鎮。批驗鹽引所二：一在竹崎，一在閩安鎮。鹽倉一，在南臺閩縣時昇里宋天寧寺遺址。

市舶提舉司 在烏石山麓。舊置泉州，成化五年改建鹽使司東。今爲海防督捕館。

貢院 宋蓋每州皆有貢院云。福州建學，昔景祐大比之歲，例卽廟學集試，諸生遠巡，邸宿於外，先聖釋奠，亦移他所。元祐五年，始詔孔子廟不得試進士。乃擇州治之東南公廨及隙地爲試院，穹堂延廡，中闢曠除，後敞公堂，繚以重屋，爲考校舍，外門之內，監門、巡鋪、彌封、贈錄之所畢具，凡爲正屋百十有二區。是時舉士纔三千。其後寢增至五倍，側肩爭門，坐不容膝。紹興十七年，乃假漕司行臺，以殺其溢，然猶病隘也。乾道元年，郡學諸生相率以請於王參政之望，乃相其西北隅官舍易之，增爲屋百二十有七楹。淳熙元年應詔者二萬人，史丞相浩講求累舉之弊，乃復假簽判、察推、知錄、司法四廳以益之，以大廳兩廊坐負城兩縣舉子，而懷安、福清、羅源於行衙，長溪、永福、古田於乾道元年所展試院，連江、長樂、閩清、寧德於新展試廳就試。是歲，策問始命工鋸板分離，防泄也，逐篇目限以一紙，期趣辦也。其額：宋初取進士二人，後至八十餘人。此蓋舉福州一州，以例其餘。若皇朝貢院，則八府會試矣。宋郡州士子皆得人試。皇朝則先以監司選擇之，乃以人試。景泰以後，則專委之提學使者。其人試士，以三千餘人中解額者九十，萬曆四十三年增額爲九十有五。其地在城南，洪武十七年布政使薛大昉所建，隘不足

容上。成化七年，布政使朱英、按察使劉勅改建將軍山東北，爲今所，而嶺負山，歐冶池在其下。正德十一年，御史胡文靜購民居八十區，闢大之，更爲正門南出。萬曆五年燬，六年重建。

福州府 在布政司西，卽宋安撫司、元萬戶府。洪武二年改建。二十一年，火。二十六年，知府廖崇德重建。總捕、清軍、海防、通判、理刑、經歷司、照磨所、司獄司、大儲庫、鈔庫、龍亭庫皆在焉。海防督捕館，市舶提舉司舊地也，萬曆二年廢司爲之。三十一年，巡撫朱運昌奏改杉洋通判兼管福寧北路海防，春秋汛畢，駐此調度杉洋地方。

儒學 舊在布政司西北。唐大歷間，觀察使李椅嫌其湫隘，易城南，大之，始補生徒三十。貞元、元和間，學者益盛。乾寧初，王鴻於州西置義學。梁龍德初，閩王審知置四門學，以招徠四方之秀。吳越時，作新宮，號四學。宋太平興國中，轉運使楊克讓始作孔子廟。景祐中，權州事謝微請立爲府學，詔從之。微適罷去，郡守范都官亢、許駕部宗壽踵成之，設孔子及高弟十人像，又繪六十子及先儒像於壁，有九經閣、三禮堂、饗舍、齋廬舍、兩序，庖次井飲，百用皆給。熙寧三年，火，郡人韓昌國、劉康夫等二百人以狀言府，請自創葺，無費縣官一錢。郡守程師孟許之。旣而屬縣士各請如昌國等，不一月，集錢三百萬，殿堂、齋室畢修，合百有二十間。元祐八年，郡守王祖道復斥東西序之北，增二十。崇寧元年舍法行，始自朝廷選擇教授，增養士之額，益廣爲三百五十區，有御書、稽古閣二，養源、議道、篤說堂三，齋二十有八。其後舍法罷，尋省爲十二齋，養士二百人。有先賢堂。紹聖初，守溫益以祀陳襄、鄭穆、劉彝、周希孟、陳烈五先生。政和中，黃尚書裳復以閩清校勘陳祥道解經以悟學者；宣和中，余太宰深復以侯官劉

康夫教授諸生爲多；其後又以福清鄭俠節義著聞，並圖像於學。先是，唐觀察常袞配享學宮；政和中，柯陽爲漕，自試院遷其父龍圖述生祠於學，遂並稱爲十先生。又其後，王端明祖道亦以有功於學，祀焉。紹興九年，張丞相浚言常公首倡儒風，不可與後來者並列，乃位常公於中，益以歐陽詹，與諸公列左右。乾道間，有言陸公祐亦鄉先生宜祀者，於是爲十三人。紹興十年，張丞相浚增養士爲二百四十人。乾道改元，王參政之望定三百人爲額。紹熙四年，教授常濬建經史閣於御書閣後，朱熹爲記：「福州府學，在東南爲最盛，弟子員常數百人。比年以來，教養無法，師生相視漠如路人，以故風日衰，士氣不作。長老憂之，而不能有以救也。紹興四年，今教授臨印常君濬始至，既日進諸生而告之以古昔聖賢教學之意，又爲之飭厨饌、葺齋舖以寧其居，然後謹其出入之防，嚴其試課之法，朝夕其間，訓誘不倦。於是學者競勸，始知常君之爲吾師。而常君之視諸生亦閔閔焉，惟恐其不能自勉以進於學也；故常慮其無書可讀而業將病於不廣，則又爲之益置書史，合舊爲若干卷，虔故御書閣後，更爲重屋以藏之。而以書來請記其事，且致其諸生之意，曰：『願有以教之也。』予惟古之學者無他，明德新民，求止至善而已。夫其所明之德、所止之善，豈有待於外哉？識其在我而敬以存之，其亦可矣。其所以必曰『讀書』云者，則上以天地、陰陽、萬物之理，修身、事親、齊家及國以至於平治天下之道，凡與聖賢之言行、古今之得失、禮樂之名數，下而至於食貨之源流、兵刑之法制，是亦莫非吾之度內有不可得而精粗者。若非考諸載籍之文，沈潛參伍以求其故，則亦無以明夫明德體用之全而止其至善精微之極也。然自聖學不傳，世之爲士者，不知學之有本，而惟書之讀，則其所以求於書，不越乎記誦訓詁文詞之間，以釣聲名干利祿而已。是以天下之書愈多，而理愈昧；學者之事愈勤，而心愈放；詞章愈麗，議論愈高，而其德業事功之實愈無以逮乎古人。然

非書之罪也，讀者不知學之有本而无以爲之地也。今觀常君之爲教，既開以古人教學之意，而復爲之儲書以博其問辯之趣，建閣以致其奉守之嚴，則亦庶幾乎本末之有序矣。予雖有言，何以加哉？無已而有一焉，則亦曰：『姑使二三子者，知夫爲學之本有無待於外求者，而因以致其操，存持守之力，使吾方寸之間清明純一，真有以爲讀書之地；而後宏其規，密其度，循其本末先後之序，以大玩乎閣中之藏，則夫天下之理其必有以盡其纖悉而一以貫之。異時所以措諸事業者，亦將有本而無窮矣。』景定四年，火。明年，帥守王鎔重建，立養源堂、奎文閣，堂之北立戟門、櫺星門，別立學門於其東，鑿池而橋。咸淳二年，帥守吳革重創經史閣於養源堂之東北，閣有止善堂，其北創道立堂，祠濂溪以下諸賢，其鄉賢及賢牧附焉。元大德六年，教授劉直創尊道堂於經史閣東。延祐四年，憲使趙宏偉拓禮殿，高廣有加。至十年，教授陳俊更尊道堂爲明倫堂。皇朝洪武四年，火。七年，守楊士英重建大成殿、明倫堂。堂東西爲四齋，北爲尊經閣，爲饌堂，爲米廩，其東偏作較官宅五，制以大備。成化十三年，守唐珣大修廟學、禮殿，撤舊明倫堂，北却三丈許重建，爲間凡七；建常衮祠、名宦祠、鄉賢祠於廟門左右，齋舍凡二十有六；鑿泮池，爲橋其上；學門舊西折，改正中南出。嘉靖十年建啟聖祠於文廟北，敬一亭於明倫堂東南，勒御製《敬一箴》并註，范浚《心箴》，程頤視、聽、言、動四箴，凡六碑。其先師廟祀，國家典故可得而言也。其初，高皇帝循前代之舊，孔子封大成至聖文宣王，南向；四配，東西向，稍前；十哲稍後，皆於廟中封公爵。從祀諸賢，列東西廡，凡百有五人，皆封侯伯爵。顏子，兗國復聖公；曾子，郈國宗聖公；子思子，沂國述聖公；孟子，鄒國亞聖公，是爲四配。費公閔損、薛公冉雍、黎公端木賜、衛公仲由、魏公卜商、鄆公冉耕、齊公宰予、徐公冉求、吳公言偃、陳公顓孫師，是謂十哲。兩廡：東則金鄉侯澹臺滅明、任城侯原憲、汝陽侯

南宮适、萊蕪侯曾點、須昌侯商瞿、平輿侯漆雕開、睢陽侯司馬耕、平陰侯有若、東阿侯巫馬施、陽穀侯顏辛、上蔡侯曹卬、枝江侯公孫龍、馮翊侯秦商、富澤侯顏高、上邽侯壤駟赤、成紀侯石作蜀、鉅平侯公夏首、膠東侯后處、濟陽侯奚容蒧、富陽侯顏祖、滏陽侯句井、疆鄆城侯秦祖、武城侯縣成、卽墨侯公祖句茲、汧源侯燕伋、宛句侯顏之僕、建城侯樂欬、堂邑侯顏何、林慮侯狄黑、鄆城侯孔忠、徐成侯公西藏、臨濮侯施之常、華亭侯秦非、文登侯申振、濟陰侯顏噲、泗水侯孔鯉、蘭陵伯荀況、睢陽侯穀梁赤、萊蕪侯高堂生、樂壽伯毛萇、彭城伯劉向、中牟伯鄭衆、侯氏伯杜子春、良鄉伯盧植、司空王肅、司徒杜預、昌黎伯韓愈、豫國公程顥、新安伯邵雍、溫國公馬光、建寧伯胡安國、華陽伯張栻、魏國公許衡、凡五十三人；西則單父侯宓不齊、高密侯公冶長、北海侯公皙哀、曲阜侯顏無繇、共城侯高柴、壽張侯公伯寮、益都侯樊須、鉅野侯公西赤、千乘侯梁鱣、臨沂侯冉孺、沐陽侯伯虔、諸城侯冉季、高宛侯漆雕徒父、濮陽侯漆雕哆、鄆平侯商澤、當陽侯任不齊、牟平侯公良孺、新息侯秦冉、梁父侯公肩定、聊城侯鄒單、祈鄉侯罕父黑、緇川侯申黨、厭次侯榮旂、南華侯左人郢、胸山侯鄭國、樂平侯原亢、胙城侯廉潔、博平侯叔仲會、高堂侯邾戣、臨胸侯公西輿如、內黃侯蓮伯玉、長山侯林放、南頓侯陳亢、陽平侯琴張、博昌侯步叔乘、中都伯左邱明、臨淄伯公羊高、乘氏伯伏勝、□□伯揚雄、(三)考城伯戴聖、曲阜伯孔安國、岐陽伯賈逵、扶風伯馬融、高密伯鄭玄、任城伯何休、偃師伯王弼、新野伯范甯、道國公周敦頤、洛國公程頤、鄆伯張載、徽國公朱熹、開封伯呂祖謙、凡五十二人。其始祀京師國學及曲阜孔子廟而已，十年，乃令天下通祀之學宮。學在府州縣者，府州縣正官祭；學在布政司者，布政司官祭，分獻以儒官及老成士爲之。二十九年，從行人司副楊砥之言，罷揚雄，進董仲舒。成祖永樂八年，進祀元吳澄，追封爲臨川郡公。英宗正統二年，進祀宋儒胡安國、蔡

沈、真德秀。成化元年，加封仲舒爲廣川伯，安國爲建寧伯，沈爲崇安伯，德秀爲浦城伯。其年，有請以楊時從祀者，下禮部命翰林議。大學士李賢、侍講學士劉定之等議：「有宋周、程、朱三大儒闡道之後，斯文有傳，興起者衆。自非識足以明至理於毫釐，行足以希往聖之踵武，功足以爲遺經之羽翼，弗得與於聖門俎豆之典。如時，早入程子之戶庭，後啟朱子之統緒，信爲學者所仰，但其論《西銘》也，程子謂未釋然，其解《中庸》也，朱子多辯其非真，至應蔡京之召，無大建明。學術出處，尚有可議。若夫釋經之言，雖間見於《語》、《孟》，然亦未若胡安國之傳《春秋》、蔡沈之傳《尚書》其功爲多。況同游程門有優於時者，曰呂大臨，曰游酢，啟教朱子有親於時者，曰羅從彥、李侗。諸儒既皆不與，楊時似難獨入。請令有司祀時其鄉。」制曰：「可。」乃立祠延平，以羅從彥、李侗配。孝宗弘治八年，祭酒謝鐸言：「楊時、伊、洛正傳，遠承孟氏，雖晚年一出，不究所施，而力闢新經，足衛吾道。」下廷議可，乃進時從祀，追封將樂伯。世宗卽位，更定天地宗廟祀典，以追古禮之舊。嘉靖九年，輔臣張璁以正孔子祀典爲請者。上大悅，著《孔子祀典》，錄以示群臣。璁所請正祀典凡五事：一曰「孔子不宜封王」。二曰「不宜像設」。三曰「不宜十二籩豆、樂八佾」。四曰「不宜庭祀顏路、曾點、孔鯉」。五曰「兩廡諸賢宜更正複謬」。而以「蔡元定、蔡沈父也，其著書有《律呂新書》、《皇極指要》、《洪範解》、《大衍詳說》諸篇，朱熹疏經修史，皆與參訂往復，《啟蒙》一書雅所屬草；歐陽修著《本論》，有衛道功，其學實繼韓愈，推孟子以達孔氏。元定、修宜從祀」。行人司正薛侃亦言：「宋儒陸九淵，學繼伊洛，惟早歲與朱熹異論，朱氏弟子遂擯爲禪，夫士何常人門歸求聖賢之道耳。臣謂九淵宜從祀。」皆下禮部，集議：「古者帝王繼天立極，君師一道。世至春秋，君教凌夷，孔子推明王道，以身淑人，乃專名師，《傳》曰：『能自得師者王。』師尊矣。請令天下學宮皆易孔子像

以主，稱『至聖先師』，廟曰『先師之廟』，四配皆稱子，十哲以下皆稱先賢某子，左邱明以下稱先儒某子。春秋祭祀，國學十簋十豆，府州縣八簋八豆，樂舞用六佾，一如國初制。別爲叔梁紇立祠，稱『啟聖公』。孔氏以顏無繇、曾點、孔鯉、孟孫氏配，而程珦、朱松、蔡元定從祀焉。啟聖公牲、帛、簋、豆視四配，四配視十哲，三氏視兩廡。改申黨、申枨爲一，公伯寮、秦冉、顏何、荀況、戴聖、劉向、賈逵、馬融、何休、王肅、杜預、吳澄皆罷祀。林放、蘧瑗、鄭衆、盧植、鄭玄、服虔、范甯各祀其鄉。增祀后蒼、王通、歐陽修、胡瑗、陸九淵五儒者。」詔曰：「可。」其改申黨、申枨爲一也，謂：「《家語》：『申枨，字子周』；《史記》載鄭國申黨，同字，則『枨』卽『黨』也。」《論語釋文》：「申枨，鄭康成曰：『蓋孔子弟子申枨。』《史記》云『申黨』。今以『黨』爲『黨』，以『枨』爲『枨』，其訛無疑。」後漢王政有云：「有羔羊之潔，無申黨之欲。」是以『枨』爲『黨』。《索隱》謂：「文翁圖有申枨。」今圖有申黨，是以『黨』爲『枨』也，其實一人也。」其去公伯寮也，謂：「以愬子路、以沮孔子也。」其去秦冉、顏何也，謂：「《家語》載孔子弟子七十六人。司馬遷《史記》多公伯寮、秦冉、顏何三人。《家語》出孔氏，當得其實也。」其罷荀況也，以「況惡性而偽禮也，以子思、孟子亂天下，以子張、子游爲賤儒也」。其罷戴聖也，謂：「其守九江，治多不法，懼何武見劾，轉爲博士，毀武於朝，及子賓客爲盜繫獄，武平決，得不死，造謝不慙。汚無耻也。」其罷劉向、賈逵也，謂：「向以獻賦進身，喜誦神仙、方伎，言黃金可成，鑄作不驗，下吏當死；所著《洪範五行傳》最爲舛駁。逵獻頌爲郎，附會圖讖，以致貴顯。二人者，左道之人也。」其罷馬融也，謂：「融初應鄧騭召，爲秘書，歷官南郡，以貪濁免，髡徙朔方，自刺不殊；其教授，前列生徒，後列女樂；爲梁冀草奏殺忠臣李固，作《西第頌》美之也。」其罷何休也，謂：「《休》春秋解詁」一書，黜周王魯，又註風角等書，班之《孝經》、《論語》也。」其罷王肅也，謂：「肅世爲

魏臣，適女司馬昭，昭篡勢成，肅受封蘭陵侯，官至中領軍，乃坐觀成敗。及母丘儉、文欽起兵討賊，肅又爲司馬師畫策以濟其惡也。」其罷杜預也，謂：「預所著僅有《左氏經傳集解》，其守襄陽時，多遺洛中貴要，伐吳之際，因斫喪之譏，盡殺江陵人也。」其罷吳澄，謂：「澄生宋淳祐，舉於咸淳，而爲元國子司業、翰林學士也。」其祀林放、蘧瑗、鄭衆、盧植、鄭玄、服虔、范甯於其鄉也，謂：「放雖嘗問《禮》，《家語》、《史記》、《邢昺註疏》俱不載弟子之列也。司馬遷曰：『孔子於衛，嚴事蘧伯玉。』非及門之士也。鄭衆、盧植、鄭玄、服虔、范甯五人者，雖若無過，然其行已著書，皆未合於聖學之精微也。」其增祀后蒼、王通、歐陽修、胡瑗、陸九淵也，謂：「蒼在漢初說《禮》數萬言，號《后氏曲臺禮》，戴聖皆授其業；而隋末之儒莫如通，唐世之儒莫如愈，宋世師道之立莫如瑗，而歐陽修、陸九淵則如張聰、薛侃所言者也。」是時，世宗追尊睿宗獻皇帝，讀修濮議，善其說，聰之所言，遵聖意也。其他所增、所罷、所歸祀其鄉祠者，則皆先朝名臣宋濂、程敏政、何孟春等所嘗言者。穆宗隆慶五年，進本朝薛文清瑄從祀。今上萬曆十二年，進布衣胡居仁、翰林檢討陳獻章、新建伯王文成守仁從祀。二十年，從湖廣巡撫、都御史郭惟賢議，進祀周敦頤之父輔成於啟聖祠。四十一年，從福建提學副使熊尚文請進祀宋儒羅從彥、李侗云。《敬一箴》者，世宗肅皇帝御製。其詞曰：「人有此心，萬理咸具，體而行之，惟德是據。維敬維一，所當先務，匪一弗純，匪敬弗聚。元后奉天，長此萬夫，發政施仁，斯保鴻圖。敬怠純雜，應驗頓殊，微諸天人，如鼓答桴。朕荷天眷，爲民之主，德或不類，以爲兢懼。維敬維一，執之弗罔，畏天勤民，不遑寧處。曰敬惟何，怠荒必除，郊則恭誠，廟嚴孝趨。肅於明庭，慎於閑居，省躬察處，儆戒無虞。曰一維何，純乎天理，弗參以三，弗貳以二。行顧其言，終如其始，靜虛無欲，日新不已。聖賢法言，備見傳經，我其究之，擇善必精。左右輔弼，責於忠貞，

我其任之，鑒別必明。斯之謂一，斯之謂敬，君德既修，萬邦則正。天親民懷，永延厥慶，光前裕後，綿衍蕃盛。咨爾諸侯，卿士大夫，下念民庶，一遵斯謨。主敬協一，罔敢或渝，以保祿位，以完其軀。古有盤銘，目接心警，湯敬日躋，一德受命。朕爲斯箴，拳拳希聖，庶幾湯孫，底於嘉靖。」學中有玉枕《蘭亭記》、梁蕭子南章草《出師頌》、元吳志淳隸書《千字文》。

常豐倉 預備倉：宋有常平倉、義倉。常平之權總於監司，而斂散於郡；義倉隸提舉常平司，掌之於通判、司法，縣以命丞。皇朝初，命天下郡縣設預備倉於府治，於村落，或勸分，或和糴，豐歛凶散，有司掌出納，憲臣提綱領，各設大戶守視。雖非常平、義倉之舊，實其遺意也。其後勸分、和糴之法罷，止以贍罰穀充之。

稅課司 卽宋稅務舊地。

織染局 寶源局，萬曆五年增建。

三山遞運所 三山驛，宋在城驛有五，俱廢。元置東西二驛。今驛卽東驛也。西驛，成化七年改爲福寧道。柔遠驛，國初建，爲外國使臣館寓之所。其北爲進貢廠，外夷方物貯之。

陰陽學 醫學 僧綱司 道紀司

府前總舖

社稷壇 在郡北天王山下。舊在城南七里並城以西，唐觀察使楊發遷於南潤寺東，旣成，命攝巡官濮陽、寧爲記，以防改易。寧記略：「閩故壇址，南邪西隙，蛙蟹汙輳，負蒲華之豪，家含野牧，觸踐無禁。元侯開西公旣蒞閩，遷社於州坤，牙將翁行全牘其績，歸成於公。公曰：『壇邇浮屠祠，爭出睂睫。吾患

將來有醉浮屠，或易於遷徙，苟非鑄琢，則本末靡彰。」遂以記徵寧，不得辭，拜命獻記。」偽閩竟以其地爲佛祠，遷於烏石山之陰。元初，遷法海寺北。皇朝洪武六年，知府楊士英移建今所。歲以春秋二仲上戊日，郡太守蒞祭。風雲雷雨山川壇，在郡南釣龍臺故址。洪武三年建惠澤山，六年移今所。國初，令府州縣得祀境內山川。其後又令風雲雷雨并城隍合祭；壇一，設位四，中祀風雲雷雨之神，左祀府境內山川之神，右祀府城隍之神，悉向南，日本琉球浮泥山川之神祀西隅，東向。歲春秋二仲上巳日，布政使率諸司蒞祭，如社稷禮。城隍廟，在越王山東。晉太康中建。皇朝洪武二年，封監察司民威靈公。十七年，更定第，稱本府城隍之神，合祭於山川壇，厲祭則迎神主之。凡有司至，將視事，必齊宿廟中，誓於神。廟東偏壁間，舊有石刻歷代有功名宦諸先。碑曰：「唐光祿大夫樊公之神，宋少師忠惠蔡公之神，知武岡軍楊公之神，參知政事張公之神，烈士范公之神，元太尉忠獻董公之神，行省都事藍公之神，侍御史韓公之神，英義侯關公之神，楚國公李公之神。」閩侯二縣附郭無別廟。郡厲壇，在郡西北寶福山，立石刻祭文，洪武間所頒也。洪武三年，建於馬鞍山後，八年移今所。歲以清明、中元、十月朔日三祭，先期牒告城隍，祭日迎神主之。

忠懿王廟，祀王審知，在郡治東慶城寺之側，本其故宅。有梁侍郎於兢、宋刺史錢昱二碑。兢碑曰：「粵自範金合土之制，雲師火紀之名，禹別九州，堯咨四岳，莫不檢求良輔，弘濟兆人，彰克勤克儉之能，垂可久可大之業，嗣太叔寬猛之政，循仲尼富庶之言。既茂勳勞，宜標篆刻。公名審知，姓王氏，瑯琊人也。其胙土命氏，疏源演派，代濟其美，史不絕書。後以太祖就祿光州，因家於是郡焉。曾祖父，贈光祿卿。王父蘊玉，贈秘書少監。父恁，贈光州刺史，繼贈太尉。公卽太尉季子也。初，公兄潮志尚謙恭，誓

藹鄉曲，善於和衆，士多歸之。福建節度使陳巖旣嚮其名，又以所屬泉州求牧，乃遣禮而請之。及到任，頗著嘉聲。後巖在軍病甚，不能視事，軍士等懼無統御，頗有依從。泉牧遂以郡委於仲弟審邦，而與公偕赴，至則積惡者屏去，爲善者獲安。因詔授節度使，累加檢校右僕射。於是剋其訛弊，整其章條，三軍無譁，萬姓有奉。乾寧三年，僕射遭疾，且付公以戎旅，仍具表奏，尋加刑部尚書、威武軍留後，俄授金紫光祿大夫、右僕射、本軍節度使。公器局端雅，識理融明，稟崧嶠之真精，得圯橋之妙略。及膺帝命，寵陟齋壇，細柳連營，旌旗動色；蒲蘆蒞政，草樹逢春。一年而足食足兵，再歲而知禮知義，方隅之內，仰止攸同。曩以運屬艱虞，人罹昏墊，農夫釋耒，工女下機。公旣統藩垣，勵精爲理，強者抑而弱者撫，老者安而少者懷，使之以時，齊之以禮，故得污萊盡闢，鷄犬相聞，時和年豐，家給人足。版圖旣倍，并賦孔殷，處以絲庚，取之合微。夫述職之道，底貢爲先，九丘爰序於厥苞，五霸是徵於縮酒。雖旬服之近，江漢之中，或遇阻艱，亦絕輸賦。惟公益堅尊獎，慎守規程，松栢後凋，風雨如晦，地徵旁午，天庫充盈，共仰勤劬，咸知匡戴。嘗以學校之設，是爲教化之原，乃令誘掖童蒙，興行敬讓，幼已佩於師訓，長皆貢於國庠，俊造相望，廉秀特盛。閩川以南，地雖設險，人尚爭雄，或因飢饉存臻，或以刻剝爲苦，萑苻易聚，巢穴難探。公感之以恩，綏之以德，且曰：『吏實爲虐，爾復何辜？』示以寬仁，俾之柔服，遂使數十年之氛祲遽致廓清，一千里之封疆旋觀昭泰。張綱以單車入壘，虞詡用絳纓擒姦，以古況今，彼猶懷愧。爰自天寶艱難之後，經費實繁，聚斂之臣，名額滋廣，卽山鳩利，任土庀財，峻設隄防，頗聞矚矚，泊纏烽燧，仍患崎嶇，三司之職務空存，四海之輪蹄鮮至。公按其程課，令以權衡，盡葉舊規，尤彰宏業。而又奉大雄之教，崇上善之因，象法重興，導師如在，虹梁雕拱，重新仞利之宮；鈿軸牙籤，更演毗尼之藏。而又盛興寶塔，多捨淨

財，日麗飛甍，霞攢彩檻。頑豔迴向，遠邇歸依，用俾群緣，皆同妙果。佛齊諸國，雖同臨照，靡襲冠裳，舟車罕通。琛寶罔□□□亦踰滄海，（四）來集鴻臚。此乃公示以中孚，致其內附。雖云異類，亦慕華風。宛土龍媒，寧獨稱於往史？條支雀卵，諒可繼於前聞。自燎熾西秦，煙飛東觀，魯壁之遺編莫救，周陵之墜簡寧存？亟命訪尋，精於繕寫，遠貢劉歆之閣，不假陳農之求，次第籤題，森羅卷軸。夫四隣共守，蓋當偃草之期，七德方修，必假禦衝之備。是以恢張制度，固護基扃。程功而莫匪子來，作事而適當農隙。立崇墉之百雉，表巨屏於一方。巖邑湯池，曾何足數？折筋縈帶，固不可憑，未若暫勞，致茲永逸。兵戈沔起，帑庾多虛，凡列土疆，悉重徵稅，商旅以之而壅滯，工賈以之而殫貧。公則盡去繁苛，縱其交易，關譏鄴市，匪絕往來，衡麓舟蛟，皆除守禦，故得填郊溢郭，擊轂摩肩，竟敦廉讓之風，驟觀樂康之俗。閩越之境，江海通津，帆檣蕩漾以隨波，篙楫崩騰而激水，途徑巨浸，山號黃崎，怪石驚濤，覆舟害物。公乃具馨香黍稷，薦祀神祇。有感必通，其應如響。祭罷，一夕震雷暴雨，若有冥助，遠旦則移其艱險，別注平流，雖畫鷁爭馳，而長鯨弭浪。遠近聞而異之，優詔獎飾，仍以公之德化所及，賜名其水爲甘棠港，神曰顯靈侯。與夫召神人以鞭石，驅力士以鑿山，不同年而語矣。於戲！辯真金於大冶，認勁草於疾風，不有良臣，誰康澤國？尋就加平章事，檢校右僕射如故，腰懸相印，手握兵符，益壯軍聲，彌新殊渥。又改光祿大夫，檢校司空，轉特進，檢校司徒。然而物議輿詞，功厚賞薄，以爲爵祿未稱曠庸，於是異姓分封，仍加井邑，轉檢校太保、瑯琊郡王，食邑四千戶，食實封一百戶。公之仲兄審邦，自守泉郡，一紀於茲，黠馬皆調，疲人盡泰。公性惟雍睦，氣稟中和，韻契墳雋，政侔魯衛，可謂高明輝映，超絕一時者也。公以天下兵馬元帥、太尉、中書令、梁王，勳格穹昊，德服華夷，奉大國之歡盟，爲列藩之表率。今節度都押衙程贊及軍

州將吏、百姓耆老等，久懷化育，願紀功庸，列狀上聞，請議刊勒元帥、梁王以公如河誓著，匪石情堅，累貢表章，顯陳保證，朝廷冀弘誘勸，特示褒持。將建龜趺，合徵鴻藻。競謬居清列，曾乏雄文，頃歲嘗詠皇華，往宣宸旨，已於視聽，親飫徽猷，今之執簡濡毫，得以研精覃思，備陳懿績，實無愧詞。乃作斯銘，曰：『日月麗天，舟楫濟川，內外克乂，股肱惟賢。淮水長清，緱嶺方寧，慶隨祚遠，材爲時生。伯氏雄特，泉人仰德，求瘼斯勤，頌條有則。冠軍被疾，付以師律，政教翕張，士庶寧謐。懿被閩越，師實英傑，地列周封，心馳魏闕。聖澤汪洋，元戎啟行，有典有則，爲龍爲光。高懸秦鏡，理道自靜，比屋懷仁，連營稟令。航海梯山，貢奉循環，務其輸委，毋憚險艱。周徵之術，公田什一，約以有程，守而勿失。輕徭薄賦，謳歌載路，高掩龔黃，遐追召杜。鄉校皆游，童蒙來求，雅道靡靡，儒風優優。惟虺吹毒，久依山谷，罔恣陸梁，竟忻柔服。法寶梵宇，勝因所主，崇構斯精，福慶攸聚。佛齊諸國，綏之以德，架浪自東，驟山拱北。墜簡遺編，繕寫精研，麟臺矗爾，武觀森然。畚鍤其勤，雉堞連雲，永制爾敵，用壯我軍。關譏不稅，水陸無滯，遐邇懷來，商旅相繼。黃崎之勞，神改驚濤，役靈祇力，保千萬艘。劉驥荀龍，填旆雍雍，維邦維翰，以侯以公。元帥梁王，武步龍驤，挺彼七德，削平四方。公能事大，推心斯在，風雨無渝，歲寒不改。殊勛茂績，盡瘁宣力，國之丹青，邦之柱石。位冠台鼎，任隆兵柄，重以徽章，寵分異姓。優詔銘功，萬古英風，貞珉是勒，垂之無窮。』豈碑曰：『若夫非常之人，必有非常之事者，衆所聞矣。其或功及於國、道濟於民，生居土茅，沒饗廟食者，求諸前史，罕有其倫。是以黃石立祠，皆因遺跡，沔陽致祭，實表舊功。故聖人之制也，法施於民則祀之，以勞定國則祀之。苟無所稱，實曰誣祭。惟忠懿王非誣祭歟！公名審知，字詳卿，姓王氏，本瑯琊人，秦將翦三十四代孫。高祖暉，唐貞元中爲光州定城宰，有善政以及

民，因遷家於是郡，遂世爲固始人也。曾祖友，贈光祿卿。王父蘊玉，贈秘書少監。父恁，累贈至大尉，光州刺史。十圍巨木，始從厚地以盤根；九曲洪河，本自仙源而圻派。若匪降神之氣，豈生命世之才？公卽太尉季子也，形質魁秀，機辯明敏，負英雄之氣者，必相交友；學韜鈴之略者，咸詢智謀。懸知五典之書，暗合萬人之敵，遠近服其義勇，隣里推其孝弟。嘗有善相者，詣公之門，視其昆弟三人，曰：『富壽皆一體也，而季當位極人臣。』自是公竊負之。尋遇陟岵興悲，在原軫念，恭事孟仲，嚴若父焉。乾符末，鯨網全踈，鳧毛屢落，摩牙吮血，中原正苦於傷殘；脫末裂裳，四海盡疲於徵戰。公蓄慷慨之氣，負縱橫之才，每或撫髀暗驚，彎弧自誓曰：『大丈夫不能安民濟物，豈勞虛生乎！』於是□俟時待價之□，□拯溺救焚之志，^(六)豪俠相許，寢食不忘，雖大鵬未飛，已具乘天之勢；而神馬一躍，終同追電之踪。屬王緒者，憑巢寇之戈矛，盜霍丘之土宇，遽言得志，遂啟無厭，但思於弱吐強吞，豈顧其幸災樂禍？因乃大掠部屬，旁□□□^(七)復收士民，以廣隊伍。於是公之昆季咸與焉。及秦宗權竊弄五兵，遍侵四境，緒內乏嬰城之計，外無善隣之助，遂率衆以作竄，欲避地而偷安。玉石俱焚，孰能分別？豺狼當路，無匪縱橫。幸豫章，懦怯之中；偶番禺，□害之後，^(八)凡經藩翰，靡或支吾。自潮陽抵漳浦，百姓畏其塗炭，五馬避其鋒刃。豈知兵忌不戢，人慎無恒？狙蒲騷者，終至敗亡；好草竊者，焉能長久！動蓄自疑之志，轉乖同義之心，適當軍衆不賓，遂爲部下所害。公素敦誠信，累涉艱危，旣負出群之才，仍諳武事之術；且兵不可以無主，將不可以失人，衆遂推公而立之。公居下惟謙，事長必順，雖輿情之有屬，在公論以不忘，乃曰：『予蚤事二兄，常若嚴訓，豈有弟爲大將，兄居其下者乎？』遂奉長兄潮以帥其衆，仍獲清源爲所理之地。公繇是惡道途之多梗，憤貢賦之不通，實欲致理一方，剋平群盜，外惟征繕，中則經營，運籌之勝負預知，

攬轡之澄清可待。大順冬，□□□□廉察遽亡，（九）兵馬使范暉奪符印以自尊，奉題緘而不遜，恣行誅戮，罔事綏懷。人既類於倒懸，時合當於逆取。公比緣觀釁，因得徵詞，遂舉勤王之師，以伸弔民之義，躬事戈甲，身臨矢石，一年而圍_{□□□□}，（一〇）年而堅壁遂陷。（一一）范暉扁舟欲遁，疎網難逃，遂爲海人梟首以獻。公既殲元惡，乃布優恩，凡曰脅從，悉命宥過。用仁信以御下，行慈惠以恤民，曾未浹旬，已聞致理。百姓愛之如父母，三軍畏之如神明。又能成_{□□□□}，（一二）讓德無媿，遂迎長兄潮還理是郡，復請仲兄却迭居舊邦。武肅王表率諸侯，蕩平大憝，吳越盡歸於賜履，江淮咸奉於專徵，以其能務忠勤、遠求薦擢，遂奏授本道廉察，及泉州符印借命焉。尋朝廷以寰海挺災，久勞我武，東南靖亂，獲庇吾民，俾提旄鉞之權，_{□□}袴襦之惠，（一三）遂升本州爲威武軍，授潮節度觀察處置等使，仍以公爲節度副使，獎勵績也。泊元昆殂謝，衆庶歸依，公乃躬受遺言，式俟朝命。明年春，帝恩遠降，人欲是從，初授公檢校刑部尚書、成武軍節度兵馬副大使，將委什連之任，攸居貳職之勞。一之日訓習驍雄，二之日蘇息疲瘵，用心數月，善政聞天，於是進端揆之資，正元戎之位，齋壇高築，軍幟大開，分州司屏翰之權，握漢_□鼓鼙之任。（一四）未幾，顯居使相，特錫戶封，方隆推轂之寄，尤藉乘鈞之力。當多難未弭，聊同指臂之相須，及具瞻有歸，實賴股肱之別用，式資補袞，俾重褰帷。天復元年，載正乾綱，重光帝座，言念七閩之地，_□符八柱之功，（一五）特頒渥恩，用越倫等，賜武庫戟十二枝，列於私門，非恒例也。自是日鍾白祿，歲奉九遷。公致君愈勤，述職無怠，萬里輸貢，川陸不繫其賒；一心尊戴，風雨不改其志。昭皇累嘉忠節，別錫異數，欲酬懋德，豈限彝章？天祐元年夏四月，封瑯琊郡王，食實封一百戶。尋屬龍蛇起陸，戎馬生郊，人心不厭於有唐，天命已歸於新室。公知微不爽，居閭罔欺。梁祖之卽位也，纔傾作解之恩，繼舉疇敷之典，三公互拜，萬戶連

封。呂尚，帝師之尊，官榮既極；子儀，中命之貴，考限惟同。尋復進封閩王，加福州大都督長史。迨莊宗之建王業也，神京克復，寓縣咸寧，欲敦柔遠之心，先下念功之詔，遂增井賦，仍改功臣，式覃北闕之恩，用倚南門之寄。公方推拱極，既効安邊，惟治民素，屬於憂勤而得疾，遽從於綿篤，百齡無効，五福先全，以同光三年十二月十二日薨於正寢。饗年六十有四。朝廷素欽盡節，俄覽遺文，既增憇老之悲，豈慳錫終之典？冊贈尚書令，諡曰忠懿，禮也。公生當離亂之運，出值艱難之秋，割據一方，蓄養百姓，得深溝高壘之故，有披堅執銳之衆，贍水陸之產，通南北之商。鑄銅於蜀山，積粟於絡口者，不足言其富也；連臨淄之袂，投澠河之箸者，不足言其庶也。至若外涵大度，內用小心，慎刑既及於精詳，舉事悉從於簡略；犯則不赦，合比秋霜之嚴，恩本無私，惠如冬日之煖；民惟道化，吏以法繩。此可以稱善爲政矣！言必皆中，行罔自欺；非正詞不入於聰，非公事不宜於口；居常無聲色之樂，平生以禮義自守；念十家之產者，躬行節儉，懷五子之歌者，心誠荒唐；每常燦石之威，未嘗操扇，纔屬鷄鳴之後，早見嚴裝；以德報恩，遠踰萬里，至誠感物，動契百神。此可以稱善立身矣！興崇儒道，好尚文藝，建學校以調誨，設廚饌以供給，於時兵革之後，庠序皆亡，獨振古風，鬱更舊俗，豈須齊魯之變？自成洙泗之鄉。此得以稱善教化矣！懷尊賢之志，弘愛客之道，四方名士，萬里咸來，至有蓬瀛謫仙、鸞鶴舊侶，或因官而忘返者，或假途而借去者，盡赴築金之禮，皆歸簪珥之行，具餘草澤菟羅、魚車待遇者，固不可勝紀。此得以稱善招納矣！尊天事地，奉道饗神，無非克誠，足以監德然。而素欽釋典，大廓法門，衆善皆臻，何德不報？無漏上智，苾蒭散布於諸方，有作良因，伽藍徧滿於樂國。煉卽山之堅固，鑄六丈化身；鎔麗水之光輝，寫五千秘藏。事非爲己，願乃庇民。此得以稱善求福矣！功惟理亂，志在盡忠，安不忘危，常爲持險之誠；小當事大，

罔違與國之道。以至覆孟數郡，高枕三邊，雖昆彭致霸之儔，未能繼踵；在他變自尊之患，固不同風。此得以稱善守位矣！且天惟祐德，民本懷仁，公饗富貴者三十年，傳冊封者四五世，遺愛銘於人口，忠節書於國史，臣子之盛，不亦大乎！迨茲陵谷變遷，箕裘廢墜，寂寞闕以時之薦，淒涼同乏祀之悲。士農工商，慕舊政以如在；潢汙蘋藻，望遺廟以不存。丙午歲，我師恤隣，闔境嚮化，遇今夫元帥吳越國王，位鍾壓紐，運偶負圖，當保大定功之初，行興滅繼絕之義，既克寧於民庶，恩咸悅於鬼神。每念閩川所歸，本繇王氏而盛，雖子孫異代，已同薰燼之香，而春秋二時，宜陳籩豆之禮，遂命以公舊第爲忠懿王廟，仍參常祀之數。霸主爰修於廢祭，藩侯遂立於叢祠。行馬戟枝，尚存故物；豚肩尊酒，蚤薦惟馨。塑山庭月角之容，立偕老於飛之像。庭廡未周於工績，槐檀旋改於光陰，舊徑難尋，已絕羅舍之蘭菊；重門長閉，但多仲蔚之蓬蒿。既乖與祭之儀，殊缺致誠之所。大宋開寶七年秋九月，大元帥吳越國王，以時和歲豐，家給人足，俾答福謙之祐，遂申威秩之典，凡曰祠廟毀廢，競出錢帛修完。乃命衙直將躬授人工，旁搜材植，補遺基而皆備，易舊物以咸新。曾出踰時，已云告畢，奢儉得以中度，規制得以合禮。朱軒粉壁，隨晚簫以生光；修竹喬松，向寒霜而吐色。挺曹筆則陰兵欲動，闢郢工則神馬欠嘶。步從悉周，精靈如在。矧以故鄉將吏，開幕賓僚，當其草昧干戈，屢經勞苦，泊自拊立基構，盡享崇高，乃塑都押衙、建州刺史孟威等二十六人，以配享焉。斯廟也，前瞰清流，右連淨刹，一路自無於塵襟，四鄰皆屬於幽奇。曉霧纔開，先露別窗之岫；疎鐘雖近，不驚繞樹之禽。公昔也嘗游宴於斯，今也復祠祭於此。始易宅而爲廟，矧將廢而能興，苟非陰德不衰，令名未朽，又豈能身沒之後有如此之盛乎？豈叨居是藩，獲畢斯事，仰嘉猷之未遠，聽遺愛以長新，爰屬短裁，庶存賓錄。燕然叙事，雖有謝於孟堅；峴首感人，亦未多於叔子。乃爲銘曰：

「極天曰嶽，惟嶽有神。蓄是英氣，生爲異人。干霄利劍，瑞世祥麟。爰當季運，實庇蒸民。」其一。唐德將衰，群雄欲出。陰霧垂地，秋氛蔽日。豺豕猖獗，荏苒縱逸。苟非偉才，焉濟王室？其二。權爲巨盜，緒亦朋姦。欲亂中夏，首屠光山。誰謂英傑，同罹險艱？終則竄跡，能無厚顏。」其三。爰率部民，同徂萬里。緒爲衆惡，公得衆美。因戮兇人，遂奉君子。立功著名，自此而始。」其四。漳浦旣寧，清源復平。遂以政事，授於難兄。孝實至性，謙惟直誠。靜乃揖讓，亂則經營。」其五。憤彼閩川，拊茲裨將。苛虐漸篤，政刑俱喪。銳旅大驅，凱歌連唱。克定一方，式諧衆望。」其六。始參貳職，已播殊勛。屏翰之美，朝廷備聞。迨居重鎮，繼事明君。盡忠竭節，松茂蘭薰。」其七。偃仰大藩，陰牀五郡。雖曰功庸，亦繇時運。」一柄齊舉，七德兼訓。令子令孫，當年振奮。」其八。真王重望，上相清規。陵谷雖變，馨香不衰。俯緣甲第，遂立嚴祠。年穰屢易，籩豆或虧。」其九。霸主推恩，良時有待。舊廟克新，遺蹤不改。免爾金碧，儼然神彩。靈貺芳名，千秋如在。」其一。古靈祠，祀宋樞密直學士陳襄。忠定公祠，祀宋丞相李綱。道南祠，祀宋儒楊龜山。皇朝增祀羅豫章、李延平、朱考亭，後又增祀程明道、程伊川。道原祠，祀宋儒林之奇、黃榦。林文昭祠，祀宋儒林之奇，卽之奇與呂東萊講學處也。皇朝增祀東萊，附文昭仲子子冲，及子冲之子耕。黃勉齋祠，祀宋儒黃榦。諸賢祠，祀宋儒劉彝、劉康夫、劉藻、劉嘉譽、劉世南、劉砥、劉礪、劉子玠。皇朝懷憫祠，祀左布政使查約、參議楊瑀、都指揮使王翺、經歷周煥，嘉靖初被害於反獄囚者。殷公祠，祀巡撫都御史殷從儉。龐、商二公祠，祀巡撫龐尚鵬、巡按商爲正。尊道祠，祀巡按御史聶豹、學憲劉玉、吳仕、劉丙、熊汲、胡鐸、潘潢、游明、金賁亨、姚鏌、邵銳、江以達、朱衡、蔡國珍、趙參魯，凡十五人。宗、徐二公祠，祀督學副使宗臣、按察使徐中行。唐公祠，祀守唐珣。留愛祠，祀守

葉溥、歐陽鐸、汪文盛、胡有恒。忠烈祠，祀兵科都給事中姚銑。崇報祠，祀郡人御史林廷玉、副使

高文達，兩諭衛軍之變者。懷德祠，祀懷安縣學教諭馮光浙。

三山書院，宋寶祐二年提刑王泌建，今廢。共學書院，舊懷安縣學也。萬曆中，巡撫許孚遠改爲書

院。登雲書院，守唐珣建。道山書院，隆慶中，爲邑人參政王應鍾建。古靈書院，宋陳襄讀書處。

總兵府，在將軍山西。正統間爲軍器局。景泰後，爲清軍御史臺。嘉靖四十三年，都督戚繼光始建

牙於此。今爲總兵府。標下坐營司，游擊府，在南營。國初，爲巡海都司公署。嘉靖末，以爲游擊

府。後罷游擊，因改爲軍門坐營司。萬曆二十五年，加坐營爲游擊，仍居之。

福建都指揮使司，在越王山東麓，元總管府故址也。皇朝洪武初，改爲衛，尋更爲使司。駙馬王恭更

闢而新之。其後屢有修建。至成化十九年，官署、吏舍始備。左衛指揮使司，鎮撫司，左千戶所，右

千戶所，中千戶所，前千戶所，後千戶所，中左千戶所，右衛指揮使司，鎮撫司，左千戶所，右千戶

所，中千戶所，前千戶所，後千戶所，中左千戶所，中衛指揮使司，鎮撫司，左千戶所，右千戶所

中千戶所，前千戶所，後千戶所

三衛教場，在九仙山南。將領以時檢閱軍士，都御史間臨之，巡按御史歲一閱視而賞罰焉。

旗纛廟，洪武元年建，中設軍牙六纛神位，每歲驚蟄、霜降祭，用太牢。今惟霜降，用少牢。祭日，都

指揮使戎服率屬行禮。凡出師，迎旗祭之，師旋，歸旗於廟。左、右、中三衛無別建。

閩縣

縣治署 在府治東南秀實坊內，淨業寺故址也。縣前有申明、旌善二亭，俱洪武中建。申明亭，日令老人一人坐之，民犯小罪可以道理勸諭者，老人與之詳解律令、《大誥》等本意，使之自改。旌善亭則榜書民間善惡，以示勸懲。

儒學 在九仙山西麓，宋慶曆中創。皇朝因之。洪武初，作大成殿、明倫堂。正統十二年，巡按陳永復、丁澄廣崇之。天順間，御史顧儼市民地拓學前路。成化間，御史尹仁、提學僉事鍾瑄、知府鄭時益市民居，闢法海寺地更建。知府唐珣繪殿堂，重創舞亭，修建悉備。

名宦祠 鄉賢祠

五虎門官母嶼巡檢司 閩安鎮巡檢司

閩安鎮稅課局

江南河泊所

預備倉三 常平倉一

大田驛 養濟院

橫山舖，上接侯官城西舖，下接侯官白鷺舖。舊路自北而南者，繇橫山、江南、日湖、龍卧、方北凡五舖，至峽江渡江，繇圓屯、枕峰、方南、梁山凡四舖，至大田驛。萬曆四十年，巡按陸夢祖改設官路，避峽江險，從倉前橋折人侯官白鷺舖，繇陽崎渡江，達閩縣蒙山諸舖，至大田驛始會舊路。於是江南下八舖俱廢。蒙山舖 蕭家道舖，萬曆四十一年，以陽崎路不便往來，復從南臺起二十里至吳山，建一公館於鷺母嶼，置一浮橋；又繇鷺母嶼渡江，抵蕭家道登岸，又建一公館。其陽崎舖舍仍存兼行。義溪舖 尤

摸舖 叢塚二

仙崎公館，萬曆四十年創，渡陽崎江則抵此。 大義公館

塘頭民城，嘉靖間，里人董世道捐貲造。萬曆四十年，拓而大之。 塘灣民城 翁崎民城 埤寨一

煙墩十一

社學九，皇朝設社學以教民間子弟。正統四年，御史言：「民間家無過犯，子弟令遣人社學，講讀《大誥》、《孝順事實》、四書、經史之類，以備選補生員名缺。」景泰二年，御史許仕達檄諸郡邑立社學。是時，人知尊師重學，遠或二十餘年，近亦十餘年，乃一易師。於今人輕師，師多於子弟，展轉以爲市，所業亦非國初之舊矣。

侯官縣

縣治署 在府治南。唐貞元間，從岳江徙入城。元至正間，改建郡城西。皇朝洪武三年，復定今所。

儒學 在縣治東。宋慶曆中建。元至大二年，尹鄰衍構禮殿，闢西廡，立從祀像殿，鑿池，開射圃，創尊道堂。皇朝因之。宣德十年，教諭羅倫請於布政使周頤，拓基址，備規制。正統十一年，御史丁澄創集英堂於尊經閣。

竹崎巡檢司 五縣寨巡檢司，舊屬懷安，以其地接閩縣、侯官、古田、閩清界，故名。

洪塘稅課局 陽崎稅課局

預備倉五 常平倉一

懷安遞運所 舊懷安縣治。洪武十二年，縣移入城，遂爲所。

芋原驛 白沙驛 養濟院二，一屬懷安，今併入。

城四舖 梅亭舖 土漚舖 游崎舖 葛崎舖 鐵嶺舖 陳湖舖 葉洋舖 豐田舖 馬坑舖 大瀨

舖 松嶺舖 湯池舖 小箬舖 橫路舖 嵩灘舖 白鷺舖 來宜舖 北嶺舖 宦溪舖 板橋舖 任溪

舖 叢塚二

西湖公館 陽崎公館

社學八

懷安故縣 舊在石岵山下，自宋咸平始。政和二年，吳與爲令，以犴嶽在縣東，異郡邑之式，移之西，

增創宴息地，爲十八所：曰日休，曰難老，曰秋興廳，曰海棠亭，曰邃芳，曰鍾樂，曰正己閣，曰歸雲，曰碧
盧軒，曰洞隱，曰竹軒樓，曰清暉齋，曰可齋，曰清虛，曰通道，曰南浦。作新亭仙蹟山巔。皇朝萬曆七年裁罷，
半屬於侯官。

古田縣 古侯官地。溪峒民劉疆、林溢、林希輩世居之而世田之。至唐開元二十七年，有謝能者十

餘戶，因古田畝墾闢而居，故曰「古田」。宋縣令李堪《縣記》曰：「田畯鋤蕪敷苗，爲厥畝疆，因著之名。」皇
朝邑人羅榮《城記》曰：「縣延袤計里四百有奇，民無末作，勤生於田，因地卑高而溝塍之，雖崇巒疊嶺，泉

可引溉，盈尺不遺。此邑所縣名也。又田中嘗產青玉，因名青田鄉，亦名玉田縣。唐開元時，都督李亞丘請始置縣。滙雙溪，倚翠屏，當環峰，複嶂間，平陸二十五里。」而宋李堪《縣記》曰：「玄宗朝起而爲縣。唐天子都雍州，比今京師益遠，所來多烏沙之苦，所往非冰清之懿，將人不凋瘵，吏不從橫，俗不蠹穢，訟不溷猥，刑不頗踰，難矣！朱梁氏、王審知復暴突其國，弗典常據經，惟嗜慾於浮屠氏暨淫覘妖言，澡奢竭泰，鏹掠生靈，以極綺藻瑰觀之姿，致詭風漲駕。黔首破業而疋痛無告，喘息殆絕者十七八焉。未幾，爲錢俶所吞，皆夷我民而鬼我俗者也。興國初，纔歸皇朝。五年庚辰，徙縣於西南之三舍，曰水口。就津陸之要利，以官政能否、民理枉直，提督而易至，從轉運使楊克讓請也。博陵崔策嗣克讓職，受寵纖狡，倒曲飾說，遷還今治。夫然，得無縣乎？蓋當途憧憧，且有護貪污賄賂，畏公議明而鬼声漏，誘編民堵訴，譸張力變，何多巧也。既遷如舊，則深入巖壑，皇華朱輪無復過抵，蒙密隱穴刺舉漏焉。重滋贓賕之責，大熾筆威之毒，良可嘆也。」味堪斯言，蓋謂遷縣津陸，則耳目飭修，徙治嶂嶺，則心志縱恣，吏治所縣矣。堪復言：「縣中跨隴繁郭，纍纍乎桑門窟宅，繁乎垂天之星。爰申教告，一切除之。榛坵莽阜，聽其請授，或以之廬，或以之粒，闢沃衍五千五百四十三畝，網西方金人子孫三百二十八人，復公丁；虜邪巫四百有餘人，歸之良農；雍佛官四十九畝，灰淫祠二百一十五所，化其壤，成嘉穀二百一十三畝。灰者我取礎，雍者我取材，網者我取土，虜者我取力，用以架峻宇，葺廣廈，而爲之縣學焉。學有堂二。堂列金石絲竹，位先聖先師，席四科十哲，繪七十二子、二十一賢，及孔伋以下大儒至唐韓愈凡九十六人。於是有臺有閣，躡屩贏糧游藝就館者實繁。厥徒每釋奠日，講歐陽、大小夏侯《尚書》，辯論齊、魯、韓詩與毛公異同，兼講《左氏傳》、《國語》、杜元凱《釋例》。黃卷雍雍，樞衣肅肅，變相之風庶幾焉。其餘材以立縣社、社稷二壇，

下址有廳，祭祀既畢，讌鄉邦高年，方領秀民，歌豐年，舞良耜，傲鄉飲酒於斯。有房四，容祭器於斯。有屋六，列陪位於斯。有廡三，致獻官於斯。若是乎其井井也。」縣故無城，皇朝正統間，鄧茂七突至，民倉卒走。天順間，訛陳寇諒五至，人民數數驚。民望城爲命，吏不以聞。弘治中，故老林堪詣闕上言，時羅榮方爲尚書郎，協力其中，遂得請。成城者，先後永福令姚楨、本縣令蕭謙。其門，東曰澄清，西曰永豐，南曰太和，北曰節鎮。水關五：曰威武，曰金井，曰朝陽，曰玉灘，曰觀瀾。榮爲記。

縣治署

儒學 在縣西隅。宋令李堪建學廟於邑東。紹興元年，燬寇。三年，令周彥耀復創於邑西郊。七年，諸生林好古、陳鬲、卓冠，與其邑人袁金錢百餘萬，請遷於堪所建舊址。二十四年，令湯選移今所。皇朝因之。弘治七年，改建明倫堂於文廟北。正德七年，堂圯，卽基爲講堂，改建明倫堂於廟東。隆慶二年，堂火，令楊存禮重建。萬曆十九年，教諭葉宗舜鑿泮池。

谷口巡檢司 杉洋巡檢司

際留倉 福清倉 儒學倉 預備倉四 常平義倉

陰陽學 醫學 僧會司 道會司

黃田驛 水口驛

水口遞運所

上司行署三 都轉鹽運分司 石山公館 嵩溪公館 上洋公館 豫陽公館 秀峰公館 竹園公館。

養濟院 義塚

縣前總舖 曹陽舖 茶亭舖 崎嶺舖 陽壽舖 常瀨舖 朱坑舖 秀嶺舖 豫陽舖 谷口舖 竹

園舖 雲頂舖 縣坊巡警舖

社稷壇 風雲雷雨山川壇 邑厲壇

城隍廟

靈應廟，祀宋令李堪。

李延平祠，皇朝嘉靖初，同知李世忠建，督學潘潢以朱文公門人林用中、林允中、林夔孫、程若中、余偶、林好古、林大春、蔣康國配。崇德祠，祀嘉靖中分守參政魏榮。報功祠，祀皇朝知縣王所、徐建、王治元、巡檢熊彥迪。

閩清縣 在梅溪南。宋時以稅場爲之。大中祥符初，史溫爲令，大有建造。縣故無城，惟東、南、北面創三敵樓，置柵而已。其南柵門曰迎恩，其西柵門曰大西，其北柵門曰敵樓。

縣治署 五代梁乾化中建。宋熙寧中漂於水，令陸絳新之。後屢燬。皇朝相繼修葺。萬曆三十七年復被水，令俞咨龍移就高壇，環砌以石。

儒學 在縣治東南。宋景德四年，令史溫建禮殿，塑先聖、十哲像，圖六十子大儒像於壁，立閣五，講堂一，談經樓三，祭器咸備。皇朝因之。永樂十五年，令朱毅移建明倫堂於殿北。萬曆三十六年，圯於水，令俞咨龍重建。

際留倉 預備倉 養濟院

陰陽學 醫學 僧會司 道會司

縣前總舖 梅溪舖 眠石舖 甕口舖

上司公署

社稷壇 風雲雷雨山川壇 邑厲壇 義塚

城隍廟

董公祠 祀元縣尹董禎。

長樂名縣 在郡治之先。蓋天寶中以州爲長樂郡。曾師建曰：「郡人風物，熙和冲融，故名長樂。」

縣舊在六平山南。唐武德初，自敦素里移建今所。皇朝因之。故無城。弘治間，令潘府創城，廣僅里餘。嘉靖十一年，令詹萊奉撫按檄拓而大之，以防倭，廣五里。門五：南曰陽春，北曰拱極，東曰鎮海，西曰清江，西南曰平政。水關五。三十七年，增置敵臺十有三。四十年，鑿濠。

縣治署

儒學 在縣治東。唐乾符四年始創。宋元祐間，令袁正規議成之，邑人林通却縣所聘修圖經錢二十萬爲助，縣富民亦相與出力，學以一新。皇朝因之。學西偏，洪武初有古柳一株，高二丈許，忽榕子寄生其巔，歲月既久，榕膚包柳。諸生皆喜，以爲登第之兆。居三年，陳全廷試爲榜眼。又三年，馬鐸廷試爲狀元。其領鄉薦中甲榜者難一二計。訓導林慈名其軒曰瑞榕，而爲之記。

社學四

石梁蕉山巡檢司，有城，嘉靖三十八年建。

小社巡檢司，有城，嘉靖四十一年建。

松下巡檢司，

有城，嘉靖三十九年建。

際留倉 東預備倉 長樂倉

河泊所

陰陽學 醫學

僧會司 道會司

縣前總舖 遇橋舖 沙逕舖 巴頭舖 沙嶺舖 梅江舖

惠民藥局 養濟院 義塚

煙墩二十有二 寨五

上司行署

社稷壇 風雲雷雨山川壇 邑厲壇 鄉厲壇

城隍廟

朱文公祠

德成書院，在方安里，唐林慎思讀書處也，宋時建。 龍峰書院，在方里，宋儒劉砥、劉礪讀書處。朱

文公避學禁寓此，二劉從之受業。弘治間，令潘府建，二劉及黃榦、李珩祀。

梅花守禦千戶所 在二十四都，去縣治四十里。國初江夏侯周德興督造。墉下民城。

連江縣 在龍際山南、鰲江之北，唐武德間建。故無城。皇朝嘉靖十八年，通判徐訪、令袁鑑始築，廣四里許。關門四：東曰鎮定，南曰廣化，西曰承恩，北曰懷寧。萬曆四年，令張賢增高之。

縣治署

儒學 在縣治東南。宋嘉定元年，令朱定始建於縣署左。紹興七年，令林覺移建今所。有繙經閣、駕說堂。列齋四：曰富文，曰能信，曰移孝，曰懷忠。廟東向。淳熙八年。邑人鄭鑑以爲非宜，令蘇懋南之，增齋爲六。嘉定十五年，令趙汝訓築尼山於學宮後，鑿泮池於學宮南。皇朝洪武初重建。嘉靖二年，參政蔡潮諭諸生醵金粥地，以敞文廟之前。四十五年，教諭馬子驥鑿鳳池於泮池之外。萬曆六年，邑人吳文華置學田百畝。

北茭巡檢司，有城。國初，江夏侯周德興督造。 蛤沙河泊所，有城，亦江夏侯督造。

稅課局

定海倉

陰陽學 醫學

僧會司 道會司 惠民藥局 養濟院 義塚三所

縣總舖 羅崙舖 潘渡舖 陳山舖 陀嶺舖 俞家舖 赤崎舖 丹陽舖 東潭舖 東湖舖 賢義上舖 財橋舖 松塢舖 官嶺舖 蠣澳舖 埕角舖

上司行署三

社稷壇 風雲雷雨山川壇 邑厲壇

城隍廟 劉、鞠二公廟，祀唐令劉達、宋令鞠仲謀。

社學一

定海守禦千戶所，在二十七都，去縣治八十里，國初江夏侯督造。寨三。

羅源縣 在東戴坑。宋時縣治在水陸寺西雙溪間，地卑潦，官物陷溺，卽令富民償之。慶曆八年，民陳智津等擊登門鼓奏聞，乃移今治。治故無城。皇朝弘治中，令徐珪列柵爲十門。正德十四年，令黃相垣東西二門。嘉靖三十七年，巡撫王忬檄推官徐必進拓之，以防倭，延袤三里許。闢門四：東曰賓日，西曰承金，南曰阜薰，北曰朔易。敵樓四，水關三。萬曆七年，分巡僉事李樂砌以石。

縣治署 宋慶曆中創於令陳偁，建炎燬於寇。元至治初復新。皇朝相繼修葺。

儒學 故在縣治西南，宋慶曆中令陳偁建，延鄭先輩穆爲師以勸民。元祐六年，令袁符移縣東，爲今所。皇朝洪武初重建。成化十六年，同知韋濟改學門，出西北巷口。弘治元年，令麥瑾市民地益之。以後先後有改建。

際留倉

河泊所

陰陽學 醫學

僧道司 道會司

上司公署三

社稷壇 風雲雷雨山川壇

城隍廟 邑厲壇

縣總舖 鰲峰舖 應德舖 護國舖 福源舖 新豐舖

養濟院 義塚三

社學十一

永福縣 在磨笄山南。創於宋初。故無城。皇朝嘉靖三年，令何謙始築。後令文惠、陳克侯相繼修之。爲門樓四，串樓百二十，敵臺十。萬曆十七年，山寇作，士民以東北城垣環於山灣，請移入山頂。闢四門：東曰永泰，西曰永平，南曰阜殖，北曰瞻京。

縣治署 宋建炎中，令陳炎建。宋末燬於兵。元至元間重建。皇朝初又燬。弘治間，令譚顯奏修。正德五年，令鄭信築垣墉，蓋廨宇，改道路於東南，移民居於西北。隆慶五年又燬，令陳克侯復建。儒學 在縣治東。宋崇寧初，始置廟學。其後屢燬屢建。皇朝因之。

際留倉

潔門巡檢司

陰陽學 醫學

僧會司 道會司 養濟院 義塚

上司行署

社稷壇 風雲雷雨山川壇 邑厲壇

城隍廟

縣總舖 汰口舖 葛嶺舖 峽山舖 創嶺舖

福清縣 在鷺峰山麓。唐嗣聖間建。宋爲縣，元爲州。皇朝洪武四年仍爲縣。故無城。正德八年，

始爲四門：東曰文興，北曰玉屏，南曰龍江，西曰雙旌。嘉靖三十三年，更築垣以防倭，建門樓四，水關二。三十七年，陷於倭。萬曆二十一年，令丁永祚以「城北傳高山，西跨岡巒，東迫凌阜，賊登阜而攻，若對壘然；從東望西，周垣畢睹，我之虛實，較若列眉；而最害在北，倭曩從此入」，乃徙其北之下者於山，徙其西之高者於山之半。二十年，令堵□復撤故城三百餘丈，「一六」易卑而高之，易狹而廣之，移舊城四百餘丈，新增城二百丈，益以月城。

縣治署 國朝成化三年，令余泰建。

儒學 在縣治東。宋元豐初，邑人提舉游冠鄉捨地爲之。元祐六年，令方叔完廣而新焉。元人升爲州學。皇朝復爲縣學。嘉靖三十七年，燬於倭。邑人都御史陳仕賢捐金重建。

壁頭山巡檢司 牛頭門巡檢司 澤朗山巡檢司 海口場鹽課司 牛田場鹽課司

福清倉 萬安倉 豫備倉四 際留倉

南門稅課局 海口稅課局 逕上稅課局

河泊所

宏路驛 蒜嶺驛 養濟院 義塚

陰陽學 醫學 僧會司 道會司

縣總舖 宏路舖 高車舖 太平舖 磨石舖 常思舖 金印舖 坡瓊舖 漁溪舖 蘇溪舖 蒜嶺

舖 浯溪舖 店頭舖 牛田舖 三山舖 桃林舖 後坑舖 城西舖 薛田舖 南門舖

上司公署三 常思公館 宏路公館 漁溪公館 蒜嶺公館

社稷壇 風雲雷雨山川壇 邑厲壇

城隍廟

龍江祠，在海口龍山之南，中祀孔子，旁爲三賢堂，祀宋儒林光朝、林亦之、陳藻。鄭介公祠，祀宋

監安上門鄭俠。忠烈祠，祀宋招撫使劉全祖與妻林氏，及林氏之兄林同。報功祠，祀皇朝中丞阮鶚、

參將戚繼光。

開讀書院，以唐水部郎中陳燦讀書於此建。龍江書院 石塘書院，宋時建，以林遇講學於此。

社學十

海口鎮民城，在治東二十里。皇朝嘉靖三十四年，倭始寇閩，犯鎮，民死者半；御史吉澄請發帑金七千七百餘兩賑恤之，鎮民願以所賑築城。其後島夷屢犯福清，鎮以有城可守。化南民城，嘉靖間造。

沙塘民城，隆慶間造。

海壇游寨 把截寨六 埤寨七 煙墩二十七

鎮東衛指揮使司衛城，在方民、新安二里間，去縣治十里。國初江夏侯周德興督造。鎮撫司左、右、中、前、後五所。軍器局 萬安守禦千戶所城，在平南里，去縣治百二十餘里，江夏侯督造。

鎮東旗纛廟 萬安旗纛廟

葉公祠 祀大學士葉向高。

〔校記〕

〔一〕「福州」下，原脫「府 閩縣 侯官縣 懷安故縣 古田縣 閩清縣 長樂縣 連江縣 羅源縣 永福縣 福清縣」三十

一字，據本書體例補。

〔二〕「門」字，各本原脫，據文義補。

〔三〕「伯揚雄」上，各本原闕二字。

〔四〕「琛囊罔」下，各本原闕三字。

〔五〕「於是」及「之」下，各本原各闕一字。

〔六〕「拯溺」上，各本原闕一字。

〔七〕「旁」下，各本原闕三字。

〔八〕「害之後」上，各本原闕一字。

〔九〕「廉察遽亡」上，各本原闕四字。

〔一〇〕「一年而圖」下，各本原闕四字。

〔一一〕「年而堅壁遂陷」上，各本原闕一字。

〔一二〕「又能成」下，各本原闕三字。

〔一三〕「袴襦之惠」上，各本原闕二字。

〔一四〕「握漢」下，各本原闕一字。

〔一五〕「符八柱之功」上，各本原闕一字。

〔一六〕「令堵」下，各本原闕一字。

閩書卷之三十三

建置志

泉州府 晉江縣 南安縣 惠安縣 德化縣 安溪縣 同安縣 永春縣(二)

泉州城 古名刺桐城。刺桐，俗名火紅刺是也。其葉如繡毬花而長，折之有乳，葉生幹心，刺布幹上，細花金色，圓而齊出，久而壽之，高可丈許，大可七八扶，心如桐，木亦可以琴，乃名桐矣。《禮記》曰：「五指曰扶。」今村落間常以樊牆屋園圃，取可禦盜也。泉人以其盛衰，卜年豐歉，花盛乃歉矣，蓋旱花也。故名火紅。而唐人詠詩盛稱其燄麗，殆欲逼人燒山。夫此樹，上至興化，下至漳而已，蓋北人以耳食詠也。或謂泉人既以刺桐樊園圃，又植播田花蔓藤其上，使樊倍固，春月花開特盛，唐人以燄麗名刺桐，蓋播田花蔓幹上，其麗倍盛有加，唐人詠之是也。要當時風氣未開，樸野可見。而今人以一種高樹紅花爲刺桐，此何可禦盜者？

城有子城，有衙城，有羅城，有翼城。子城築自唐天祐中，王審知命建者。周圍三里百六十步，高一丈。門凡四：東曰行春，南曰崇陽，西曰肅清，北曰泉山。衙城在子城內，相傳留從効所築，蓋其開府建牙之地，翼然以壯。北樓在其上，唐歐陽詹所爲記者也。詹之記曰：「《釋名》曰『樓，瞞也』，謂其高明覲

遠，矍矍然也。建於第宅，則以閱園林有媚；樹於雉堞，則警寇盜不虞。故墨子曰：『城三十步一坐候樓，百步一立候樓。』茲樓者，蓋此郡北墉之立候樓也。卜築之始，微而具之，表不倍常，廣惟再尋，製造日遠，土木力殆，左騫右侈，上露下圯，有年數矣。邦牧安定席公，貞元七年下車，至九年，月之三祀，重民力而未形言。是年暮秋，歲豐農隙，有司率常典，告有事於土功。公曰：『斯郡之南極也，元后帝鄉，實在於北。詩不云乎：心乎愛矣，遐不謂矣，欲因戀主，向方瞻矚。惟北有樓，半傾半摧，日夜闕登陴擊柝之所，風雨憂折榱復隍之患。政因時令，爾其營之，俾有布席跪立之地，問更人防卒之蒞事。予將時躋，展北面拱辰之心焉。』受命者感公之意，如公之意，野人群庶感公之誠，如公之誠。川朝子來，築崩易蠹，址有餘而不剗，基墮自延，材有長而不剪，棟宇自崇，既望庀徒，未晦成功。倚層霄於軒檻，納千里乎窗牖，如鱗之鱗署，若岸之軍壁，得之之狀，若連山之有重巒，長江之蹙洪濤，氣勢繚是以雄焉。公每子牟情來，莊舄思生，俯仰於斯，徘徊於斯。夫完城壯邑，有邦之本也？戀闕愛君，爲臣之節也。善矣乎，公廣茲樓也，遠得有邦之本，大有爲臣之節。執邦之本曰公，謹臣之節曰忠。惟公與忠，公斯昭矣！小子家在委巷，多聞輿頌，藝忝儒術，每侍公居，上志下衷，兩獲而達，敬書其事，爲之記。』記作於貞元九年秋九月。然則，城雖審知、從効所築，唐時有之矣。羅城亦留從効所築。周圍二十三里二百八十三步，高丈八尺。門凡六：東門口仁風，南曰鎮南，西曰義成，北曰朝天，西南曰臨漳，曰通津。宋志：『州西北界南劍州，東北界興化軍，爲入京道。』彼時洛陽橋未建，入京道取北門，故名北曰朝天。余嘗從雙陽山道走入仙游縣驛道，舖里碣尚在道旁也。臨漳、通津二門密邇，而臨漳最後立，今猶謂之新門。留從効之爲一城也，堅壁數千雉，樓櫓相望。逮陳洪進納土於宋，宋命撤之，如福州矣，蓋閩之州惟泉、福爲壯也。別有通淮門。

通淮門者，水門也。唐太和中，刺史趙榮治河於郡郭東南隅，濬洩江水，以肥沃南洋田，民食其利，因其氏名曰天水淮。今土號下韋，其地也。按名「淮」曰「韋」，雖云方言，亦合古義。《春秋說題辭》曰：「淮者，均其勢也。」《釋名》曰：「淮，韋也，圍繞揚州北界，東至於海也。」淮少北則郡城在焉。內有廢河，絕外濠，與淮相距，歲久成陸。治平三年夏，大雨壞屋廬數千。越二年，守丁疎穴城爲門，以通天水淮。疏東南汙潢，納之外河，自河而注之江，江潮通河，便於舟楫，百賈貿遷，皆至於市。此其門名「通淮」矣。郡城諸水，故趨異方，環學宮而東之，未有吸潮汐引之人者。紹興十六年，守葉廷珪關通淮門，引入舟楫，直抵學宮前，語人曰：「十年後當有大魁。」至期，梁文靖克家應之。此通淮之爲門者也。翼城者，東自涪浦，西抵甘棠橋，爲石城四百三十有八丈，高一丈，闊八尺，則紹定三年游守九功所築也。城在宋時，先後郡守皆有修治。而嘉定四年，守鄒應龍以賈胡簿錄之資請於朝，大修之，其功爲最鉅。至元至正十二年，監郡僎玉立又拓而高大之。其周三十里，其高二丈一尺，內外皆石。爲門七，廢通淮門，而於德濟、仁風之間建門，曰南薰。玉立所拓，蓋卽游九功所作翼城盡人之爲城，此時通淮門在城中矣，以是廢其門，而別建門曰南薰也。始，西郭之外，唐時有西禪寺。王延彬有妹尼於此寺，延彬爲拓城而包其寺。行春門之外，東原之麓有壽寧寺，蔡尊師如金葬焉，留從効徙之松灣。灣故有崇福寺，至陳洪進復拓城，自東至北包寺入之，再遷蔡尊師墓於北山之下。以故城佩不正方，時名葫蘆城。及僎玉立成城，則呼鯉魚城矣。仁風、通淮之間，又有小東門也。今已閉其門。直東湖當湖嘴，城名鯉魚，故開門向此，蚤日初升，湖光激艷，有如魚口飲湖水也。皇朝洪武初，指揮李山增障厚基樓於諸門之上。自天順至成化間，指揮武成、守張崑、徐源、指揮王濬、李珏等相繼修葺。弘治十三年，臨漳東半里許，水齧城下路數丈，且及城，守張源築二壩

障之。嘉靖季，德濟門災，守熊汝達重建，改南薰曰迎春，以郡歲迎春此門也。萬曆三十二年，地大震，城多圯，副使劉尚德、守姜志禮修治之。城內有濠，廣六丈，深二丈，東西相抵，悉砌以石，三面通流，潌洄如帶。獨東北一隅曰泉山，迤邐而來，枕山之勢，仰不人流。蓋宋時皆爲城外之濠，自楔玉立拓城而後，濠悉入城中，而砌石則皆玉立所爲也。子城之內，又有支溝五，舊名八卦溝，相沿以爲鑿溝如八卦之象。弘治中，御史張敏有開溝之役，於惠民局東掘得大甃甌，上鑄「巽」字，地在西南，始知舊以八卦之餅置於先天卦地，非鑿溝如八卦象也。又城中舊有十寺，今存二寺，曰開元，曰承天。而開元久且著，始於唐垂拱云。州人有黃守恭，長者也，居州西之城外，晝夢有僧欲化其宅爲寺。守恭曰：「待桑樹生蓮花，乃可爾。」忽見千手千眼菩薩騰空而上。不數日，桑樹盡生蓮花。守恭卽捨爲寺。今開元寺是也。寺中有石塔雙起，東曰鎮國，西曰仁壽。鎮國塔權輿於唐咸通釋文僞。偶高潔，未嘗手泉布。其造此塔時，以木爲之。募施者，州四門日投錢其器，以歸傭直。必匠身取之，過取則迷方迴遑莫知所如。仁壽塔權輿於神僧。王審知爲閩王時，一夕夢神僧至其府，問之曰：「泉人也。」曰：「何以來？」曰：「聞王造塔大都督府，乞移以鎮泉。」審知怒，斬之，首墜地而身湧高數尺，因悔其誤殺聖賢人。覺，駭之，使求之泉，果有狂僧者不見久之。審知以爲神，遂以其材木浮江轉海至泉成之，名「無量壽塔」。至宋時並改爲石矣。鎮國塔高百九十三尺，仁壽高減尺五寸，皆雕鏤祇園鹿苑故事，極其精妙。層堵各有八龕，中奉佛尊。皆琢青石爲之，蓋海內所無也。向在州西城外，自從効拓城，在城中矣。

府治署 故在衙城內。庭有宋太宗御製戒石之銘，高宗手勅，權邦彥等題跋。其碑尚存。銘曰：「爾俸爾祿，民膏民脂。下民易虐，上天難欺。」高宗手勅：「近得黃庭堅所書太宗皇帝御製戒石銘，恭味

旨意，是使民於今不厭宋德也。因思朕異時所歷郡縣，其戒石多置欄檻，植以花草，爲守爲令者，鮮有知戒石之所謂也。可令摹勒庭堅所書，頒降天下，非惟刻諸庭石，且令置坐右，爲晨夕之念，豈曰小補之哉？」勅後有「缶」字，高宗御押也。權邦彥等題其後曰：「臣等竊惟太祖皇帝武定天下，而大宗皇帝文以撫之。是時□□□□民赤子新去湯火，(二)哀矜□□□□□□，(三)乃發大訓，垂諸庭石，如雲漢在天，爲光昭回，其施在下，則爲露爲雨，民涵濡斯澤，豈其有極？而吏更歲久，或不知誦斯文矣。皇帝撥亂愛民，規撫祖宗，乃六月癸巳詔以黃庭堅所書刻之石，將以墨本賜天下，使目見知戒。嗚呼！此盛德大業之本，豈特讀《貞觀政要》而太息哉？臣等材駑不足佐□□萬分，(四)而知贊且勵，蓋不獨郡邑之吏洗然於茲賜也。謹昧死書於左方。紹興二年十月癸酉。端明殿學士、左朝議大夫、簽事樞密院事、權參知政事臣權邦彥、左通議大夫、參知政事、福建江南西路荆湖南北路宣撫使臣孟庾、左通奉大夫、守尚書右僕射、同中書門下平章事兼知樞密院事臣、特進尚書左僕射、同中書門下平章事兼知樞密院事、都督江淮荆浙諸軍事臣呂頤浩謹題。」王文忠十朋有《修戒石》詩：「君以民脂膏，祿爾大夫士。脂膏飽其腹，曾不念赤子。貪暴以自謀，誅求不知恥。指呼有鷹犬，嗜慾肆蛇豕。但言民至愚，孰謂天在邇？昭然甚可畏，殃必反乎爾。聖訓十有六，簡嚴具天理。大字刻山骨，朝夕臨坐起。一念苟或違，方寸寧不媿？清源庭中石，整頓自今始。何敢譬同僚，兢兢惟勅已。」又有高宗御書《籍田碑》云：「朕惟兵興以來，田畝多荒，故不憚卑躬，與民休息。今疆場罷警，流徙復業，朕親耕籍田，以先黎庶，三推復進，勞賜耆老，嘉與世俗，躋於富厚。昔漢文帝頻年下詔，首推農事之本，至於上下給足，減免田租，光於史冊。朕心庶幾焉。咨爾中外，當體至懷。故茲詔諭，想宜悉知。」其下有小楷書牒云：「泉州：紹興十六年九月十九日，准行在尚書禮

部符，准屯田關。四月八日，准紹興十六年四月六日勅。中書門下省臣蔡劄子奏：『欲望聖慈勅命郡邑，以近降御筆籍田手詔，模刻立石於聽事所，如戒石之銘，俾朝夕省觀，罔敢墜失，庶有以廣聖志，承天庥，蒙屢豐年興嗣歲之應，天下幸甚。取進止。』四月六日，三省同奉聖旨：『依奏。牒州施行。』本州今恭奉聖旨，模刻立石於廳事所者。紹興十七年三月□日立。（五）左從政郎、司法參軍、權察推臣曾汪，右從事郎、節度推官臣余麟，右承議郎、簽書節度判官廳公事、賜緋魚袋臣方周弼，右承議郎、添差通判軍州、主管學事兼管內勸農事、賜緋魚袋臣王鑄，右承議郎、通判軍州、主管學事兼管內勸農事、賜緋魚袋臣陳康伯。此碑在戒石碑之右。石俱精瑩，燁燁有神氣。郡治則有忠獻堂，以韓魏公生此得名云。後人易以清署，至王文忠一仍其舊，詩云：『相出相州生此州，巍巍勳業宋伊周。後人莫要輕更改，更有堂名勝此不？』復即郡圃祠祀之。中有安靜堂，蔡忠惠所作，嘗於此書《荔枝譜》。文忠解官時，又有《復安靜月堂舊額》詩：『端明之孫字子強，銀鈎鐵畫傳遺芳。昔年作郡古平海，大筆親書安靜堂。自從宣和至乾道，字與輪奐爭光芒。一朝忽遭俗眼白，毀滅名姓深埋藏。我來搜訪久乃獲，老兵據爲寢處牀。滌除五載塵土面，字向堂上增激昂。祖爲第一孫是似，書有家法稱莆陽。體具萬安頗雄壯，榜與忠獻同翱翔。因知文字乃至寶，一時之厄庸何傷。』《石鼓文》有鬼神護，《淮西碑》並日月光。豈容泯滅暴秦火，誰肯膾炙段文昌？書生作郡太迂闊，理財聽訟具非長。吾君若問何以治，堂復韓蔡祠秦姜。今纔五日京兆爾，眷此陳跡猶未忘。但願茲堂日安靜，名與國壽俱無疆。』皇朝以爲衛治。府治徙於宋之晉江學舍。萬曆間，守程朝京亦名堂『忠獻』，如宋舊，而祀忠獻於府中。竟爲後守所遷易。

清軍館 督糧館 理刑館

府學 唐在衙城之右，爲魯司寇廟，張九齡書額。徐鉉《稽神錄》云：「廟庭有皂莢。州人舉進士，觀其莢之多寡以爲應。梁貞明中，忽生一莢有半，人莫測其祥。是歲，陳遜進士及第，半莢之枝遂生全莢。」宋太平興國初，守高維嶽遷廟於鎮南門內。七年，孫駕部逢吉卽廟建學。其後趙運判賀、陳侯欽祚、陳駕部偶、王侯祖道俱有興修。祥符三年，高兵部惠連移建於育材坊，去舊學西北四十餘步。衣冠遂減疇昔，鼓篋來游，每懷憤惋。崇寧初，舍法行，升養士之額，厥地褊逼，不足容冠履。大觀三年，龍圖柯述解組還鄉，狗粉榆之輿情，審芹茅之故址，乃扣州牧，自西而東遷還於舊。紹興七年，劉寶學子羽撤爲新宮，左廟右學，培庫增高凡二尺餘。左右爲堂二，以集講論。齋十有二，以分肄習。庭中爲二亭，刻崇寧辟雍詔書并序於石。先是，學基復舊，而行門隙地已鬻民居，乃循南城委巷出，土氣伊鬱。子羽復贖歸之。西挹戾位紫帽峰之秀，門內鑿河浚池，以通巽流，跨池伐石爲橋，納潮汐其下。外門摹湖學石曼卿書「建州學」四字揭之。張直講讀爲記，所謂「維茲望郡，首建學宮」。卜云其吉，雉城東偏。公卿紛還，譽藹中原。高侯遲憾，乃西徂遷。中雖克復，未正門闌。氣不士振，殆幾百年。遽矣劉公，來擁朱幡，鈞禮章布，載笑載言，惻然動色：「予職承宣，學校不修，又誰咎焉？」屢入意匠，乃趣工班，百堵俱興，如飛如翰。門直於西，前揖紫煙。石梁雄跨，虹卧清漣」者是也。紹興中葉郎中庭珪，淳熙中姚參政憲司，馬侍郎伋，林郎中枅，紹熙中顏尚書師魯，慶元中朱少卿侓，嘉泰中倪文節思，章右史良能，嘉定中鄒郡守應龍，宋少卿鈞，端平中黃殿講樸，嘉熙中劉倉部煒叔，淳祐中陳司業大猷，韓戶部識，先後興修。而隆興初，清泉見於禮殿之庭，甘香特異。黃教授啟宗視役夫難蕪得之，乃率諸生拜祝，環甃其旁，名夫子泉。傅秘閣自得爲

記。王文忠有詩：「君不見《水經》品第天下水，康王谷中泉第一，但知取水不取人，品第未容無得失。又不見武昌山中清冷淵，名因人重逢蘇仙，至今人呼作菩薩，淪入異教非吾泉。刺桐城中泮宮裡，大成殿下新泉水，不須更以品第論，混混源流自夫子。諸生游泳芹藻間，日飲一瓢心慕顏，聰明不數遠公社，清白大勝卧龍山。聖毓尼丘家闕里，泉脉胡爲今在是？周流天下皆美泉，浚井得之泉更美。我來酌泉仍叩頭，遐想洙泗三千游。世間何處有此水？此州無媿名泉州。」咸淳初年，攝晉江令鍾國秀重蓋禮殿，高而拓之。亡何，殿火，守趙希侔重建。希侔，朱文公外孫也。希洪端明天錫爲記言：「至人人火不熱，是雖寓言，可以喻道。夫子之道之在人心，火固不能熱也。特患人心不火而熱，內媿束縕也，外誘抱薪也。吾爲此懼，愿與承學交儆焉。」學中有瑞蓮堂，在講堂右，梁文靖肄業之所。紹興十九年秋，堂下池產雙頭蓮。守辛次膺以詩記瑞。是年，文靖首送。明年，廷策爲第一。乾道林教授岳立斯堂，張教授叔椿爲記。又有忠孝祠，以祀義孝林攢、忠勇蘇緘；又有朱文公祠，以祀文公，皆真文忠所建。文忠《忠孝祠記》：「昔之君子，以忠孝名者衆矣，奚獨祀二公？二公，泉人也。泉人忠孝獨二公乎？曰：『泉士工文而言能文者，必曰歐陽生詹，取其著也。二公忠孝，亦其著者也。』孰不事親？林公於親，孝之著也。孰不事君？蘇公於君，忠之著也。林公之喪親也，水漿不入口五日，躬陶瓦而墳之。蘇公之守邕而捍寇也，其子曰：『家可徙乎？』曰：『不可！』父老曰：『城可棄乎？』曰：『不可！』奮力以戰，力不繼死之，其家殲焉。恩之當報，不以存亡貳心；義之當徇，不以死生易節。二公所以有功於名教也。敢問學二公將奚先？曰：『事親人所同，事君必得位乃可也。平居能爲林公，則進而質委於朝廷，盡節於官守，其不媿蘇公也必矣！』此泉士所當朝夕勉焉者也。」真公所以祀林，蓋其時興化軍尚屬泉州矣。皇朝郡守先後修

學，而正統十一年僉事陳祚爲役最鉅。天順二年，守張崑以學門西向非宜，復建廟門南向，出入縣之。後提學游明別建學門於廟門左。成化間，守陳勉修葺增建，功未竟，以憂去。判蕭貴路成之。蔡文莊清爲記：「吾聖人之道之大，至於發育萬物，峻極於天，澤潤萬萬世而不窮。凡士大夫稍得自光明於民庶之上者，自頂至踵，何者非衣被吾聖人之賜？矧學校又爲政首務，蓋國家所以扶植宇宙者，一皆取辦於此。若夫發揮吾道，而風勵諸士以正學用世之意，則前哲之遺亦既詳矣，此在後學者自正其意以求之爾。」弘治中同知於茂、正德中知府葛恒，並有修治。莆林貞肅俊爲恒作記：「士園而學，別凡民也。業居之，師式之，學古也。而師猶之今士。間有無是道而有是服，如莊周所云者。於是有廟焉。使瞻拜對越其下，巍然中居。師之至也，肅然在旁；弟子之至也，又肅然而在列，則及門指授與私淑，而夫子徒者引，而廟亦專且至矣。抑何修以爲一席之地哉？養之正，修之純，本天德，行王道，則師古學而治亦古矣。抑猶之器也，修之我者，道也。器新而我猶故，奚廟學爲？是未可引以爲師病也。」嘉靖中，守高越鸞廟學前地闢之，以直通衢，濱街值河，因其故跡浚之，以納江潮，而廟居益偉。嘉靖二十二年，知府俞咨伯重建明倫堂。參政王慎中爲記：「堯舜在上，設五品之教，振民飽暖之餘而免於禽獸之患。三代循是以建學，爲之立官師，作宮室，辯時物，勅條法，甚修而綦隆。而孟軻氏獨知其指，曰：『所以明人倫也。』民之不可使知，雖堯舜猶病之，而其聰明強敏有材智者，傑然出於衆人。其材之成，足以踐三才之道。其過也，至於殄行而驚世；智之至，足以察萬物之理。其蔽也，則必爲邪說以誣民。先王取而命之曰『士』，而教之於學。其所爲教，有可得言者矣。編收端卑鞞紳綦偪之飾，而楊襲委垂之宜；琮璜琬琰齊夏和鸞之節，而步趨周折之度；豆蓬、簠簋、鐘鼓、管絃爲之器，而酬酢搏拊以爲容；《典》、《謨》、《雅》、《頌》、射御、書數

爲之文，而詠歌講誦以爲業。耳目足以極視備聽，口與手足足以放言恣動。然所以禁防而開發之者，其爲事詳而爲物博如此。至其所以爲是詳且博者，其跡可守，而其妙不可爲，其形可名，而其精不可言。其通於天，謂之『命』；出乎命，謂之『性』。凝神於不見不聞之表，默化於無聲無臭之中，形器俱泯而思爲無所，日改月新而不自知其所以然。其於所謂『父子、君臣、長幼、夫婦、朋友』者，顧若疎闊而不治，簡略而無當，若烏在其爲明倫者，是不可不知也。習其教而不知其所以教，由是會其高者，以爲發揮於性命，而不悟其爲人倫之本，先王之道使其高也而出於人倫，是乃所以爲異端，而非所以爲性命也；守其卑者，以爲該貫乎事物，而不察其爲人倫之用，先王之道使其卑也而外於人倫，是乃所以爲曲藝而非所以爲事物也。《大學》之道，極於齊家、治國、平天下。而家、國、天下，固非蠻貊之邦、鳥獸之群也，必有人焉。居其間，非謂之君臣，則謂之父子；非謂之夫婦，則謂之長幼、朋友也。人有心知志意之精主乎內，有耳目手足之動行乎外，非之於君臣，則之於父子；非之於夫婦，則之於長幼、朋友者也。先王之教，使之凝神默化，致其心知志意以善其內；又爲之設其文采，備其容器，制其度數，使有以禁防開發，謹其耳目手足以善其外。其通於性命者，行乎事物；其由於事物者，合乎性命；其學於事物、性命者，貫乎人倫。故其於家，則父子親、長幼序、夫婦別；其於國與天下，則君臣義、朋友信。故無一命之爵，無尺土之階，而人物之性以盡，齊家、治國、平天下之事畢得，誠行邪說無繇而作。民生其時，無復震驚誣惑之憂，其於君臣、父子、長幼、夫婦、朋友，雖有所不知，而坦然由之。是民之所以親也。親而不能明，民之所以爲下也。明之而使民親焉，士之所以爲上也。」萬曆四十二年，大學士李廷機予告歸，告於郡守蔡善繼，大修廟學焉。

啟聖祠 名宦祠 鄉賢祠

社學 宋爲小學，守韓彥直所建。宋時，又有南外宗正司，以居宗室，有宗學，以教宗室子弟。

豐衍庫

廣平倉 永寧衛倉

晉安驛 宋貢院舊址。《古圖經》：宋元豐三年，守陳公偁一新監司行衙，亭樓爲七閩冠，地植芙蕖，亭曰面南。後廢。今貢院其地云。皇朝天啟中，守沈翹楚鬻之，遷驛於城外，而古跡遂廢。

稅課司 織染局 染局

陰陽學 醫學，宋爲惠民。嘉泰二年，守倪思所建。於譙門內之西，撥藥本錢三千貫，月差官詢問有病者，隨證給藥。端平二年守李韶、嘉熙七年守劉煒叔、淳祐十年守韓識，皆有增撥添充。而煒叔仍下諸縣皆創子局。皇朝取具員而已。

僧綱司 道紀司

察院

布政分司

巡海道

分巡興泉道

社稷壇 風雲雷雨山川壇，宋在城西。元豐中，守陳偁大其封域，繞植嘉木名菓數百株於壇壝之外。今仍之。

城隍廟 郡厲壇

王刺史祠，以祀王潮，卽崇陽樓爲祀所。蔡忠惠祠，以祀宋守襄，在洛陽橋。王文忠祠，以祀宋

守十朋。真西山祠，以祀宋守德秀。宋二丞相祠，以祀韓魏公琦、王沂公曾。魏公以父國華守泉生

此，而沂公則泉產也。皇朝：蔡文莊祠，以祀祭酒清，陳紫峰祠，以祀提學琛，蘇紫溪祠，以祀提學濬；

李文節祠，以祀大學士廷機；顧新山祠，以祀侍郎珀；郭恭定祠，以祀戶部侍郎惟賢。六祠並在學宮。

衛民祠，祀皇朝死事太守熊尚。初配以晉江主簿史孟常、陰陽訓述正楊仕洪之從太守死者。而萬曆

中，配以義士陳言，以言嘉靖中有說倭功。崇賢祠，祀邑人浙江按察僉事、贈太僕寺少卿莊用賓，以有

禦倭功。忠勇祠，祀泉州衛指揮僉事、贈指揮使童乾震，以死倭。歐陽指揮祠，祀指揮僉事歐陽琛，

以死倭。蕪湖丞、贈應天府通判陳一道祠，以死倭。

石井書院，以泉不混潮名。宋舊設也，在石井鎮，名鰲頭精舍。朱文公父韋齋，紹興初嘗爲鎮官，公餘，進秀民，迪之學。後文公簿同安，時時至鎮，與父客耆士論說經義，鎮人益勸。嘉定四年，鎮官游絳因士民請，白郡守鄭應龍，於鎮西爲書院，以祀韋齋、文公，如州縣學制，命添倅文公子在董其事。泉山書院，以祀朱文公。羅一峰書院，以祀市舶提舉倫。惠安張岳記：「故翰林修撰一峰羅先生，初入仕，卽上疏數千言，論大學士李公不當起復。落職，提舉泉南市舶司。未幾，召回守資南都，浩然棄歸。天下聞風高之。比歸，杜門講學，不以世事屑意。而尤嚴於辭受取舍之節，俊偉明白，必欲得本心而後已。故久之而天下益信服焉。嘉靖己丑春，按察副使萬安郭公持平巡歷至泉，以先生嘗謫居於是，而戶祝未舉，惟時郡守顧侯可久以人覲去，乃謀別駕李侯文、節推徐侯炤，得城北叢祠一區，請於巡按御史聶公豹，斥去之，因舊材，稍易蠹壞，悉以堅良，率郡人士，奉先生神主而舍奠焉。旣又治其齋居、講堂，下及庖廩之屬，

擇士之有志者居之，延鄉進士三宣顯職其教。是夏，顧侯及晉江尹錢君樞至自京師，則教士續食之法講求益備，而書院之傳可久不廢矣。夫以先生風烈之盛，去之千百載，聞者猶將低徊向慕不能自已，而況神靈精爽眷臨茲宇，登降出人如將見之，有不反身警惕、求無媿先生之心者乎？孟子曰：『無爲其所不爲，無欲其所不欲，如此而已矣。』而推其所爲所欲之類，至與穿窬同科。夫士者之不爲穿窬必矣。孟子復云，爾者幾微，審察之間有一未至，其陷溺必至是爾。是故人苟得其本心也，雖踣爾蹴爾之不受乞人、行道之人之心，與不受千駟萬鐘，無以異也。如其苟焉，以遷就於功利而已，則桓、文所以扶義而霸，良、平所以挾術而謀，亦何以異於穿窬者哉！此其得失，必有能辯之者。先生寧終身困約，而不肯少貶以徇流俗，其不以是與！并述之，以告吾黨。」萬曆丁巳年，守蔡善繼重新以王宣配祀。

泉州衛指揮使司，卽宋府治。經歷廳，鎮撫司，左、右、中、前、後五千戶所，皆宋時簽書、判官等廳舊址。旗纛廟。

永寧衛指揮使司 鎮撫司，左、右、中、前、後五千戶所，而晉江縣福全千戶所，惠安縣崇武千戶所，同安縣中左、高浦、金門三千所，俱隸焉。

浯嶼水寨 故在同安，今移於晉江石湖。

晉江縣

縣治署 建自唐開元時。宋太平興國七年，守錢熙始建公署，在今府治西五十餘步。

儒學 宋劉子羽以附於州學，前有槐亭。慶元四年，庭下池產雙蓮，時樞密使曾從龍爲縣學教諭，明

年擢進士第一，解教授。邦俊易亭名曰魁瑞。淳祐四年，林令爽請於郡，得東倉隙地，始創新學。而丘令元龍稍成之。皇朝改爲郡治，乃於泉山書院建今學。莆田林中作記。學之舊址，唐爲紫極宮，五季遷宮於他所，則爲天寧寺。至宋咸寧中，郡守趙宗正以朱文公常簿同安而過化於泉，遂改寺爲泉山書院，則以奉佛老之所，而化爲奉先賢之所。皇朝衛指揮改泉舊治爲衛，郡守改縣舊學爲治，遂改書院爲今學，則以奉先賢之所，陞奉先聖之所。學東北有射圃，宋梁文靖故宅也。天順二年，張崑於明倫堂嚮民居廣之，卽其地建尊經閣。弘治十八年，守陳勉大其門。其西南偏地，則蔡文莊捨地以廣之。

福全倉 養濟院，以處孤貧殘疾無依者。存恤院，以居癩疾。宋有居養院，以處晉、南二縣之貧病者。有安濟坊，以待行旅之疾者。有安樂舍，以居病民及行旅之病者。

稅課局

河泊所

圍頭巡檢司 烏潯巡檢司 祥芝巡檢司 深滬巡檢司 浞尾場鹽課司 泗洲場鹽課司

總舖 古樓舖 洛陽舖 下輦舖 雙路舖 石龜舖 駟行舖，宋帝南行時，於此棄輦乘馬，故名

舖。有石名御踏石。潘鏡舖 寶月舖 新亭舖 白塔舖 秀山舖 山前舖 蘇村舖 西湖舖 白山

舖 安平舖 福全舖

義塚 漏澤園

社學

安平鎮 鎮最繁夥，其俗多貿夷爲生。古名彎海。宋開寶中，安金藏之孫連濟徙居於此，土人因易

彎爲安。按唐史：安金藏，長安人。初爲太常樂工。則天稱制，睿宗號爲皇嗣。少府監裴匪躬、內侍范雲仙並以私謁皇嗣腰斬。自此，公卿以下並不得見，惟金藏以工人得在左右。或有誣告皇嗣潛謀者，則天令來俊臣窮鞠其狀，左右不勝楚，欲自誣，惟金藏大呼：「請剖心明之！」即引佩刀自割其胸，五臟並出，絕而仆。則天聞之大驚，輿致禁中，命高醫內腸，縫桑堵紘之，閱夕而蘇。則天臨視，嘉歎，即令停推，睿宗由是免難。景雲中，累遷右武衛中郎將。玄宗即位，追思忠節，下制褒美，擢右驍衛將軍，令史官編次其事。開元間，特封代國公。饒其名於泰、華二山碑以爲榮。卒，配享睿宗廟庭。大曆中，贈兵部尚書，謚曰忠。今鎮中其裔派尚在，第已淪於屠沽兒。是鎮也，宋爲安海市，東曰舊市，西曰新市。客舟自海到者，州遣吏權稅於此，號石井津。建炎四年，州請於朝，創石井鎮，以迪功郎任。紹興二十六年，海寇奄至，鎮官方某始自鎮西偏循東北築土城，疊石爲門備之。皇朝嘉靖三十七年，泉中倭，令盧仲佃與鄉紳柯實卿斲石拓之。實卿爲池州守，蠶厲驚舉，摧擊禁暴。及居鄉，爲鎮人成功，其堅果任怨如其治官，竟爲兇徒所戕。今而後頌其功也。萬曆三十四年，設駐鎮館，移府通判蒞焉。然判時一至而已。

福全千戶所

南安縣 在府城西十五里，古武榮州也。故無城。皇朝嘉靖三十七年，縣被倭掠，令涂光裕以請，繼者夏汝礪始建城。

縣治署 宋大中祥符間創。其後，令丘之立、張端、方阜周相繼修治。縣門舊匾，宣和書學博士徐兢篆。有堂名「雪堂」。李訖權縣，題雪堂詩曰：「將梅作雪已非真，用雪名堂轉未親。幸有西山橫爽氣，品

題留與箇中人。」西山，縣中山也。後令李文伯用其語，更名曰致爽。有樓三櫺。西挹姜秦之峰，匾曰黃華境界，蓋取王文忠《九日山思古堂》詩「黃華境界無人識，堂在煙霞縹緲中」之語。元至正中，縣治火，尹常瓚、李宗閔稍修葺之。而民苦寇兵，竄移靡定。縣僚吏圖便於承上，寄治郡城隍神祠。分省右丞馬麻乃命再作之。皇朝洪武中令王罕、永樂中余庆、天順初鄒璉相繼修治。而夏汝礪始重新。

儒學 宋靖康間建於邑治西。紹興中，令劉孔修遷黃龍溪左，距治二里許，負義山，揖紫帽。今之鵬溪是也。後復徙縣東。元至正中，仍遷於此。皇朝因之。宣德二年，教諭包源明重建。而正統中僉事陳祚、令俞宗玉，弘治二年令黃濟益新之。隆慶二年，攝縣丁一中建亭，曰見龍；萬曆中，史孔吉建閣，曰文明，皆在學門之左。

石井巡檢司

康店驛

陰陽學 醫學 僧會司

際留倉 預備倉四 儒學倉

總舖 武榮舖 錦亭舖 潤程舖 鄭山舖 汰口舖 黃坂舖 後田舖 大師舖 珠淵舖 大宇舖

溪口舖一作渡 大盈舖，古名大榮，武榮之義也，俗因循名盈。康店舖，宋李文肅邸《康店舖》詩：「短

衣自獵南山虎，正好漁樵不亂群。妄以宿嫌誅醉尉，令人翻恨李將軍。」讀其詩，前輩混跡漁樵之意可想

也。東嶺舖 塔口舖 大姑舖 澳頭舖

上司公署

社稷壇 風雲雷雨山川壇

城隍廟 邑厲壇

社學

惠安縣 在螺山之陽，三國吳將張惻葬處也。宋初徙葬惻於青山，卽山下建縣治，是爲太平興國六年。縣故無城。皇朝嘉靖季，都御史王忬議築以防倭，令俞文進典之，鄉紳李愷佐役甚力。爲門四：南曰通惠，北曰朝天，東曰啟明，西曰永安。設上下水關，通蓮華山水，以入龍津陂，上關曰玉蓮，下關曰龍津，皆在永安門。

縣治署 其縣堂左庫是張惻葬處。皇朝洪武中令時汝楫、宣德中高顯、正統中閉禎、成化中張桓相繼修治，而桓所修尤壯。

儒學 宋始立，在邑西。天聖中，令李旼堂作先聖十哲像，繪從祀諸賢東西廡。熙寧中，遷於皇華驛。後六十年，令彭元達復遷舊地。淳熙九年，令蔡易遷登科山之陽。元元貞初，尹趙仲臣始建於縣左，卽今學。燬於寇，修未竣，元亡。皇朝洪武四年，令羅泰成之。其後各有修治。而正統十一年簽事陳祚、成化十九年令張桓、嘉靖三年令萬夔、萬曆四十三年令陳淙大有改作。

峰尾巡檢司 獺窟巡檢司 黃崎巡檢司 小岬巡檢司 惠安場鹽課司 河泊所

崇武倉 預備倉 際留倉 儒學倉

錦田驛 驛堂後花臺有三石，蒼翠可玩，絕勝太湖。相傳國朝永樂間，中貴人鄭和得之外國，以重大

勞費，故置於此。今亡其一。

陰陽學 醫學 僧會司 道會司 養濟院 存恤院

錦田舖 盤龍舖 上田舖 居仁舖 驛坂舖 塗嶺舖 白水舖 前埔舖 黃田舖 青山舖 崇武舖

上司行署三

社稷壇 風雲雷雨山川壇

城隍廟，在學前，在縣治東。宋邑令李旼之母賢而知書，且精相宅，謂縣曰：「白虎山高不利，增築是廟以壯青龍之勢。」皇朝因之。 邑厲壇 鄉社壇

朱文公祠 王中丞祠，祀巡撫王忬，以築城功。 林令祠，祀知縣林咸，以死倭。 張襄惠祠，祀少

保張岳。 張尚寶祠，祀少卿張迎，在學宮。

輞川鎮 阻山負海，魚鹽米粟之利通焉。舊無城。嘉靖四十二年，令陳玉成、蕭繼美先後成之，委生員江贊卿董役。贊卿捐家貲佐費。東、西、南各一門，北小門二，東小門一。

社學九所

崇武千戶所 有城，有所倉。

德化縣 在龍潭山西南、丁溪北。唐歸德場治所也。舊無城。今皇朝嘉靖三十六年，令鄧景武始議築，周圍八百三十七丈。三十九年，倭大掠永春，令張大綱約之爲六百六十八丈，以便守禦，然僅東西二

門。萬曆元年，令秦霑開北門。十八年，令丁永祚開南門。朝丁溪之水，乃四門矣。

縣治署 故以舊善業寺址建署。宋熙寧間，令陳居方重建，負山陬峻，不足容寢。紹興十三年，令吳崇年鑿山廣之。後及皇朝，相繼有修治。

儒學 在縣治東，後遷於東南隅沙坂。宋建炎中復建縣治東。皇朝成化十六年，署縣知事狄鍾易臨溪屋廣之，右廟左學。弘治十七年，令胡潛重建，左廟右學。嘉靖十八年，教諭秦璫、訓導張泮率諸生仍建右廟左學。萬曆元年，令秦霑復移建於城西北大洋山之陽，市民田，廣學宮。蓋三徙云。

高鎮巡檢司 近革。

預備倉 儒學倉

陰陽學 醫學 僧會司 道會司 養濟院

縣前舖 高洋舖

上司行署

社稷壇 風雲雷雨山川壇 邑厲壇

城隍廟 忠應廟二：一在縣治左。五代時邑人建，以祀歸德場長顏仁郁，宋乾道三年賜今廟額。一在歸化里。里人因仁郁所居立廟祀之，累著靈異，嘉泰、嘉熙、淳祐間累加封號。有翊衛二神，一姓莊名賦，侍郎夏之祖也，仁郁爲長時，賦左右之；一姓鄭名昭祖，有惠利其鄉。賦封協裕侯，昭祖封翊順侯。

丁溪書院，嘉靖中，令緒東山建。紫陽書院，嘉靖中，令許仁建。

社學十所

安溪縣 朱文公簿同安時，嘗按事縣中，愛其山水絕類建劍。治在藍溪之陰，鳳山之陽，於唐爲場，名「小溪」。詹敦仁辭留從効之辟，求監其場事，既至，美其可縣，遂請縣之，名曰清溪。敦仁爲縣記：「萬戶置郡，千戶置邑，古也，泉郡古矣。小溪場西距漳、汀，東瀕溟海，一鎮守也。地廣二百餘里，三峰玉峙，一水環迴，黃龍內顧，朱鳳後翔。土之所宜，桑麻穀粟；地之所產，蠶塵禽魚。民樂耕蠶。治有銀鐵，稅有竹木之徵，險有溪山之固，不足縣與？敦仁奉命以來，既嘉山川雄壯，尤喜人物夥繁，請於郡太守縣之。未幾，報可。令下，增割南安近地，新揭「清溪」美名，梓列以圖，卜契我龜，折爲四鄉一十六里，通計一邑幾三千餘戶。當三農收斂餘暇，適二營番戍休閒。便近之戶，役止三日；築作之工，計不逾年。崇門豎樓以嚴其勢，繩廊周宇以處其吏。屋不華而加壯，寢僅足以爲居。閭閻鱗次，雍雍以和；官廨翼如，濟濟而辯。由陸至者，必出其塗；自水運者，會流於下。坐肆列邸，貿易有無，荷畚執筐，各安職業。土沃人稠，風淳俗樸，真東南形勝、疆場要區也。經營顯德大火之首冬，落成明年小春之下澣。苟完苟美，不至侈矣，曰庶曰富，又何加焉？其奈地華人夷，業儒者寡。是豈教有未及？殆亦俗待而化。夫秦奢魏褊，習若未易轉移；夷清惠和，聞者尚能興起。敦仁不能遠引古說，請舉鄉邦：爾閩之初，人未知學。自常公觀察以來，有歐陽四門者出。豈曰彼能而我否？孰謂昔有而今無？蓋未然者，猶有待而然；未至者，當思勉而至。盛事鼎來，以答山川之靈；雄名日起，以續龍虎之號。曰教之令，固不敢不勉；而從令之教，爾邑人當交相勉也。」宋宣和三年，盜起睦州清溪洞，惡其名，改曰安溪，取溪水安流之義。嘉靖中，令陳宓闢東南二街，顏令振仲闢西街而三焉，顧土塹壘石爲隘門而已。皇朝嘉靖季，始築以備倭。相址

者，德化令張大綱。成城者，先後令陳綵、蔡常毓。爲門四，爲水門二，東曰朝宗，西曰阜成，南曰迎薰，北曰拱極。萬曆二十九年，令廖同春闢子城於南門，額曰迎秀。三十一年，令高金體開古吉字街，塞舊門，闢新門。稍東之，額曰任興。

縣治署 宋紹興二十三年，韋令能惠重建。紹熙五年，孫令昭先修之。令陳宓書《丞廳壁記》：「親民莫如令。由漢以來，置丞貳之。令有疑，必咨丞；丞有言，必忠令。事或便民，議而行之；少有不便，止之或恐後。可否相濟，惟是之歸。丞苟得人，令亦寡過。安溪地踰百里，僻遠而貧。令於民事固當究心，丞於邑事亟宜告令也。然居是職也，往往參以關市之徵，曰：『吾能寬民薄稅，足矣。』至於邑事，則曰：『非我也。』如是而曰不負丞可乎？」其書《簿廳記》曰：「勾稽之事，於民最切。民之休戚在貳，歲之出入在簿，書吏並緣爲奸，特原於此。苟愛民之心不至，憚勞好佚，其害不可勝言矣！」宓又作惠民藥局於治門之內，記曰：「安溪視諸邑最僻，深山窮谷，距縣有閱五六日至者。又氣候多燠，春夏之交，雨淖則河魚腹疾，旱則瘴瘧作焉。俗言信巫尚鬼，市無藥；有，則民低價以買州之滯腐不佳者，貧人利其廉，間服不瘳，則淫巫之說益信。詩曰：『藍水秋來八九月，芒花山瘴一齊發，時人信巫紙多燒，病不求醫令自活。』嗚呼！獸且有醫，忍吾赤子誕於巫，愚於賈哉！嘉定庚午冬，爲和劑局中門之內，招明醫一人，躬診視劑修之事；吏一人佐焉，掌凡出入之籍；工一人，供凡役。創惠民局於大門外，一吏掌之，月一易，所以佚其勞革其奸，主簿兼督，所以重其事也。惟望後之君子，以是爲民命所關，敬而無忽，以廣本朝仁民之意焉。」皇朝先後修治。

儒學 在縣治東南。宋咸平四年，攝令尉宋文炳、主簿弭忠信始建於縣治西南。宣和六年，遷縣治

東。紹興十二年，令楊幹始定今所。元燬。皇朝洪武六年，掌教事郡士蔣宗禧倡義重建。十四年，令侯士舉踵成之，前廟後學。正統中僉事陳祚，成化中提學游明先後有修治。嘉靖二十四年，令汪瑀以學左瀕溪善崩，白守程秀明，移之右。

預備倉 際留倉 儒學倉

陰陽學 醫學 僧會司 道會司 養濟院

縣前舖 公母林舖 羅渡舖

上司公署

社稷壇 風雲雷雨山川壇

城隍廟 邑厲壇

詹公祠，以祀詹敦仁。

忠勇祠，祀宋邑人鄭振。振字叔亨。建炎中，寇楊勛作亂，率鄉兵禦之，紹

興十三年，曾少龍、周老虎、何白旗、陳大刀復數萬蠡起，帥司檄振擊之，俱有功。十六年，有詹鐵叉者尤銳，振率衆與敵，手殺數十人，席勝不止，遂死焉。鄉人哀祀之。

紫陽書院，爲朱文公建，以宋縣尹陳宓，簿陳淳二門人配，以文公嘗按事是縣也。今廢。鳳山書院，在山之通賢峰，以朱文公嘗登之。

社學三十六所。

湖頭市。百貨所集，亦號小泉州。

同安縣^(六) 城在大輪山下。古名銀同，以其形隋若銀錠然。亦名銀城。城南溪有二石，狀若魚，色若銅，又名銅魚城。城始宋紹興中，令王軾、劉寬成之。城門：東曰朝天，西曰厚德，南曰銅魚，北曰拱辰，西北曰慶豐。其後並有增繕。元至正十四年，山寇陷城，達魯花赤馬哈謀沙內外砌之。皇朝正統十四年，沙尤寇，復陷。景泰元年，泉州衛指揮使楊海及主簿蔡麟重修。成化十八年，令張伋重修，改門名：東曰迎陽，西曰鎮兌，南曰來薰，北曰綠野。嘉靖三十七年，令徐宗夷高之，以防倭，西南各爲重門。雨水圯，賊大至，攝令興化同知李時芳用柵捍，而選卒禦之，署教諭吳金亦率諸生與鄉士夫分門守，賊不得入。萬曆中，柴堯年、洪世俊、王世德皆有修浚。世俊改東門曰鴻漸，西門曰豐澤，南門曰朱紫，北門曰拱秀，西北門曰朝元。

縣治署 在三秀山南。堂初匾祐賢，朱文公改爲清心，後匾牧愛，今仍之。川堂後有六吾堂，書張子西銘於屏間。主簿廳在其右。後爲高士軒，文公簿時所名。今爲簿廨。文公記曰：「同安主簿廨，老屋支柱，殆不可居。獨西北一軒，亢爽可喜，意前人爲之，以待夫治簿書之暇而燕休焉。然視其所以名，則有不屑居之之意。予以爲君子當無人而不自得，因更爲『高士軒』。而客或難予曰：『漢世高士不簿者，實御史屬。漢官：御史府典制度文章，大夫位上卿，亞丞相。主其簿書者，名秩不卑矣。彼猶以爲浼已而不顧，故足高也。今子僕僕塵埃之中，左右朱墨，蒙犯箠楚，以主縣簿於此，而以高士名居，不亦戾乎？』予曰：『固也，豈不亦曰士安得獨自高？其不遭則可亡不爲也乎？』予於其言，蓋竊有感然，然亦未嘗不病其未盡也。蓋謂士之不遭可無不爲，若古之乘田委吏、抱關擊柝者，焉可也？謂士不能獨自高，則若彼者乃未睹夫高也。夫士誠非有意於自高，然其所以超然獨立萬物之表者，亦豈有待於外耶？知

此，則知主縣簿者雖甚卑，果不足以害其高。而此軒雖陋，高士亦或有時而來也。顧予不足以當之，其待於後君子。」皇朝天順間，丞劉珣器重修，請修撰羅倫爲記：「宋文公朱先生之初試吏同安也，名燕處之軒曰高士，自爲之記。世與運推，廢與興承。今劉珣器又因其廢而興之，累數年之力而後成。適倫以言斥提舉泉州，因得拜公祠下。訪珣器所興之高士軒，在縣治西北隅，列屋數楹，以間計者二十有二，刻記於壁，窗戶疎爽，奇木佳卉，有光舊觀，門廡庖廡畢具。屬倫記之。倫曰：最高者，天也，人受天命以生，高一也。士獨以高命者，以獨自高其高，高不以人而以天也。士之列也聖也，聖同天，則聖也士之高者也，士獨自士而幾乎聖，則其高以天也。高以天而命之曰高，宜也。顏子之仰，子思之極，曾子之尚，志皆希聖之高以自高，其高非以人，以天也。之人也之高也，雖不遭也，有可爲乎？彼漢之高士，乃謂『士不可得獨自高，必遭，則亡不可爲己。』此高以人，非天也，公所以譏其未睹乎高也。公之自高也，居敬窮理以立其本，反躬以踐其實，必使人欲濯淨，天理全完，浩浩乎駸駸乎聖同天。其高非人也，雖不遭，亡不可爲也。孟子所尚，子思所極，顏子所仰者也。後之士也，由公以溯孟，由孟以溯思，由思以溯顏，尚之又尚，至於無可尚，極而又極，至於無可極，仰而又仰，至於無可仰，若乃而高可幾也，若乃雖不遭而亡不可爲也。命之曰高，亦宜也。後之士也，公之望之也，固如是。若乃口耳乎是，貌像乎是，以媒利祿，囂聲譽，一獲幸焉，則雄誇氣餒摩雲霄而軋山嶽，授以一命，而盼蒸黎無異乎一狼牧群羊也。猶且施施然號於人曰：『吾士也，高莫吾若也！』何異乎處園溷而目爲鈞天者哉！書此以復珣器，以詔士之有志於高者，亦自卑而升之一助云。」

儒學 五代令陳洪濟建於縣治東南隅登龍坊。宋時遷徙不一。熙寧初，令林瀆新大廟學，廣聚圖

書。宣和間復移登龍坊舊址，堂名「尊道」，米南宮所書。朱文公爲簿時，則兼治學事，卽講堂後建教思堂，選秀民爲弟子員，設講座臨之；發林瀆所聚書，揭以示士，復請於帥府、撫府所有書，建閣藏之；造釋奠器服考儀，繪圖觀式諸生。其講座銘云：「紹興二十三年，新安朱熹仲晦吏於同安而領學事。越明年五月，新作講座以臨諸生。顧其所以作之之意，不可不銘。銘曰：師道絕塞，以圯其居。今其言言，亦莫我敢都。前聖後師，文不在茲。如或見之，有儼其思。立之堂壇，惟以有嚴，厥臨孔昭，式訛爾瞻。」其所作《林瀆聚書記》曰：「同安縣故有官書一匱，無籍記文書，官吏傳以相承，不復稽省。至某始發視，則皆故敝殘脫，無復次第，獨視其終篇，皆有識焉者曰『宣德郎守秘書丞知縣林』，姓而忘名矣。按縣壁記及故廟學記，林君名瀆，字道源，以治平四年爲是縣。明年，熙寧初元，始新廟學，聚圖書。是歲戊申，距今紹興二十五年乙未，纔八十有八年，不幸遭官師之懈弛，更水火盜賊之餘，其散滅僅存止是耳。而使之與埃塵蟲鼠共敝於故箱敗篋之間，以至泯泯無餘而後已，其亦不仁也哉！因爲料簡其可讀者，凡得六種一百九十一卷。又下書募民間故所藏去者，復二種三十六卷。更爲裝褫爲裡五十有三，著籍記而善藏之如故，加嚴焉。且具刻其卷目次第，闕其所亡者，揭之，使此縣之人於林君之德尚有考也。而某所聚書亦因附見其後。」其所自作《聚書記》曰：「紹興二十五年春正月，熹以檄書白事大都督府廷中，已事而言於連帥方公曰：『熹爲吏同安，得兼治其學事。學有師生誦說，經籍弗具，學者四來，無所業於其間。願得撫府所有書以歸，使學者得肄習焉。』公幸哀其愚，不以爲不可，卽日減省少府用度金錢，屬工官摹以予縣，凡九百八十五卷。熹與諸生既受賜，則相與群議所以歛藏守視、出內、曝暴之禁戒，以復於公，報皆施行如章。熹竊惟公之舉是賜也，蓋將以幸教此縣之人，而非私於熹之請。熹乃得以菲薄奉承，懼不能稱且

無以垂視久遠，故敢具刻公所出教，而并叙其指意如此，揭之以示縣之父兄子弟與學官子弟之有秩於典領者，使承公志，永永不怠。此熹之職守也。」文公又爲「志道」、「據德」、「依仁」、「游藝」四齋銘。其後四者復併爲二，卽今「誠意」、「正心」齋也。又建邑人蘇丞相頌祠於堂後，請進士徐應中、王賓克學賓，以爲生徒矜式。其爲《祠堂記》云：「熹少從先生長者游，聞其道。故相蘇公之爲人，以爲博洽古今，通知典故，隱然君子長者也。熙寧中掌外制，時王丞相用事，嘗欲有所引拔，公以其人不可用，且非故事，封上之。用此罷歸，不自悔，守益堅。當世高其節，與李才元、宋次道並稱三舍人云。後得毗陵鄒公所撰公行狀，又知公始終大節蓋章如是。以是心每慕其爲人。熹來爲吏同安。同安，公邑里也，以公所爲問縣人，雖其家族子不能言。而泉人往往反喜道曾宣靖、蔡新州、呂太尉事以爲盛。予不能識何說也。然嘗伏思之：士患不學爾。而世之學者，或有所怵於外，則炫而失其守。如公學至矣，又能守之，終其身一不變，此士君子之所難，而學者所宜師也。因爲之立祠於學，歲時與學官弟子拜祠焉。而記其意如此。」嘉定間，令毛當時卽學官建二祠，東祀蘇丞相頌、忠勇緘，西祀文公。元至正十年，尹孔公俊又擇邑學東偏建大同書院，前先聖殿，後文公祠。閩海憲使許從宣爲請額於朝，以列學宮。其後盡燬於寇。皇朝洪武七年，令呂復重建。正統九年，僉事陳公祚重修之。天順五年，丞劉珣器復一新焉。語見《珣器傳》。以後屢有修治。

官澳巡檢司 峰上巡檢司 烈嶼巡檢司 白礁巡檢司 浯洲場鹽課司

金門倉 高浦倉 嘉禾倉 預備倉

大輪驛 深青驛

陰陽學 醫學 僧道司 惠民藥局 存恤院

東門鋪 洪塘鋪 沈井鋪 店頭鋪 小盈鋪 烏泥鋪 新塘鋪 苧溪鋪 安民鋪 魚孚鋪 古有章魚鋪。嘉定中，宋守鈞造魚孚庵，蓋取「中孚豚魚」之義。 深青鋪 仙店鋪 草市鋪 北門鋪 五通

鋪 永豐鋪 中左東門鋪 官澳頭鋪 平林鋪 金門北門鋪

上司行署四 參將府

社稷壇 風雲雷雨山川壇

城隍廟 邑屬壇 鄉屬壇

朱文公祠 蘇公祠

朱文公書院 在大輪絕頂。元時，尹孔公俊故祀文公，學宮名大同書院。至皇朝成化中，張遜復建，移於城隍廟左，其所像設文公之庵，名畏壘，取文公作簿時所自名也。已復廢。嘉靖中，邑人林希元請當道，建大輪絕頂爲今所。文公《畏壘庵記》：「紹興二十有六年之秋，予吏同安適三年矣，吏部所使代予者不至，而廨署日墜，敝不可居。方以因葺之宜爲請於縣，會予奉檄走旁郡，因得并載其老幼身送之東歸。涉春而反，則門廡列舍已摧壓而不可入矣。於是假縣人陳氏之館居焉。自縣西北折，行數百步入委巷中，垣屋痺下，無鉅麗之觀，然其中粗完潔，有堂可以接賓客，有室可以備棲息，誦書史，而佳花異卉蔓藥盆荷之屬，又皆列峙於庭下，亦足以娛玩耳目而自適其意焉。予獨處其間，稍捐外事，命友生之嗜學者，與之共居其下，躬拚除井竈之役，願留者亦無幾人。若常時諸車馬之客，與胥吏之有事於官府者，則無所爲而來矣。客或謂予所以處此者，庶乎庚桑子之居畏壘者，因命予居曰畏壘之庵。自是閉門終日，翛然

如在深山窮谷間，不自知身之繫官於此。既歲滿，而不能去也如是。又累月，代予者卒不至，法當自免歸。而陳氏謁予記其事，曰：「使後之人知夫子之嘗居於是也。」予惟庚桑子蓋莊周、列禦寇所謂「有道者」，予之學既不足以知之，而《太史公記》又謂凡周所稱「畏壘虛、亢桑子之屬，皆空言無事實。」然則亡是公非有先生之倫也。此皆不可考，獨周之書辭指怪奇，有可觀者。予是以竊取其號而不辭，遂書以畀陳氏。陳氏世爲醫，請予記者名良傑，爲人謹篤周慎，能通其家學云。」林希元記：「昔朱文公簿同，既去，同人祠之學宮之東，賜額書院所從來矣。洪武己酉歲，令呂侯復以其舊址建學，別祠文公於學宮西。成化壬辰，張侯遜又擇地東門，重建書院，前爲講堂，刻公像於退軒，名庵畏壘，蓋用公去時假寓民居之號，以致思慕之意。制雖異舊，其爲學者藏脩之所一也。無何，鞠爲府館，人有遺恨。予思昔文公守漳時，建書院於開元禪刹之後，屬句題門有『五百年逃墨歸儒』之語，蓋公之用意深矣。同，公始仕之地，『梵天』又其時常游詠之處。予用公故事，欲作書院禪刹之後，以補東門之闕，未有任者。以告學憲邵公銳，會公至，相與登刹訪舊，歷方丈、戰龍松，至瞻亭石，命席中坐，顧劉侯裳曰：『子其成之。』侯命工治石亭公坐處，臨『瞻亭』二字其上，且作書院矣，會改官去。嘉靖癸卯歲，郡推葉侯遇春來視篆。予以告，侯復欣然商工鳩材，度如前制，移畏壘庵刻像，莊嚴奉之。工且究，侯復去。自後靡有卒斯業者。壬子夏，學憲朱公衡得南勳部洪君朝選之書，乃率予往觀，慨然責成於彭侯士卓，閱兩月而功成。予往觀之，登堂四望，凡同山川，咸來獻美，蓋經營之始，不圖其勝之至於斯！於，以近繼考亭，遠望洙泗，藏修游息而不懈，是在學者。」

浯嶼水寨，今移於郡之日湖。 浯同游、澎湖游，上二游俱在嘉禾嶼，而澎湖爲漳、泉門戶，半隸於漳焉。

高浦千戶所 中左千戶所 金門千戶所

永春縣 唐桃林場治也。唐盛昭州均《桃林場記》稱其「俗阜家泰，官清吏閑，舟車競來，笙歌不散」。嗣後，韓內翰偓、秦隱君系往往題詠。自是遂爲壯縣，文人儒師相踵而出。治主鵬山，縣大羽峰下臨長溪，直子午，水流巽，陰陽家以爲最勝。縣故無城。皇朝嘉靖初，汀漳寇至，令柴鑣始建永輝、永豐、永薰三門。三十九年，倭突至，縣失守，始議築城，委德化令張大綱督之，砌以石，周圍高丈許。四十年，賊呂尚四攻陷。始增築之。四十一年，令林萬春成四門：東曰迎暉，西曰來德，南曰文明，北曰拱極。城外東、西、北浚濠。濠周圍如城數。西南隅濱溪，水漸齧，令謝裘改濠殺之。甃石壩捍其衝，又建東、南城隅各敵樓一。

縣治署 舊仍場之故。宋開寶二年，令林滂始鼎革。紹聖四年，江公望爲令，作多暇亭。亭有記，見其傳。復有多暇亭詩：「青山沉暮靄，白石溯寒流。市有州從事，門無郡督郵。文書花下吏，衙鼓柳邊樓。不是鋤姦手，無心強項侯。」淳熙六年，令林叢改創，以艱去，令陳宏頴踵完之。陳知柔爲記：「古君子爲政，不在廣地，在得民。得其民，偏都小邑可以有爲；不得其民，綿數十里無益也。」後燬於火。令陳珙、林光庭、梁垌相繼修治。皇朝先後令俱有修治。儒學，在縣治東。舊建於東渡橋之西。宋大觀四年，令留鎔遷於知政橋北。紹興七年，令方漸復建於縣西官田市。二十七年，令黃瑀新學門，闢衢路，作亭曰

豁然，刻辭以勵學者。淳熙九年，令陳宏頌修學，增生員。皇朝因之。正統中，僉事陳祚大有修治。弘治間，令周魯重建。蔡文莊清爲記，末云：「教諭吳君某等以書屬清爲記，且述周侯之言曰：『此吾職分內一事爾。』」然所以得就是者，實督學憲副韋公斌、少參熊公洛、郡守李公哲主之上；不然，天下職所當爲、心所欲爲，而掣肘不得爲者何限。噫！當爲欲爲而不得爲，諉之人可矣。若夫學者之事，則有欲爲而必得爲，且上之人常懸賞以勸其爲者，而顧不爲焉，亦何以學聖人爲哉？」十五年，同知於茂遷今地。嘉靖五年，令柴鑣改建於縣北白馬山之陽。三十一年，令羅汝涇復遷於官田市舊址。三十九年，燬於倭。四十四年，令謝裘復建於縣治東。

預備倉 際留倉 儒學倉

陰陽學 醫學 僧會司 養濟院

縣前鋪 長安鋪 劇頭鋪

上司行署

社稷壇 風雲雷雨山川壇

城隍廟 邑厲壇

文公書院 在留灣，皇朝嘉靖三年，令柴鑣建。晉江陳琛爲記：「孔子集群聖之大成，而朱子則集諸儒之大成，以發明孔子者也。學者口誦其書，心惟其義，真實爲己，刻苦加功，繭絲牛毛，折極其精，天高海闊，合盡其大，斯可以知朱子矣。知朱子則知孔子，知孔子則知天，知天則知所以事天，而學者能事畢矣。而近日士大夫以豪傑自許者，由訓詁以識字，由文章以著名，由科舉以進身，顧乃張大其言，曰：『不

談科舉，不習訓詁，不作文章，而後可言道。」然則文公亦廢此三者乎？訓詁所以明義，文章所以達意，科舉則學成而見諸用也，初何妨於道學哉？滯字義而不得其會通，溺浮文而不根於道理，逐逐焉爵祿繫心而不思曰「吾將以行所學也」，如此則於道爲有妨，而於文爲無用，而豈聖賢著書立言教人本意哉？讀聖賢書而得其所以教我之意，孜孜求道而至於聞道，則是《傳》、《經》爲糟粕可也，章分句解以啟迪後人亦可也；白賁反求樸若野人可也，無意於文不得已而文出焉亦可也；隨時科舉行乎富貴可也，不樂科舉泊然安貧賤亦可也。夫讀書至聞道，焉往不可哉？患書多而讀之不得其要，乃謂文公著書太繁，多言障道，而引許魯齋欲焚書及陳白沙以輪扁爲真儒之說，顯肆譏排，間摘其一二未定之見，痛詆師友之間，自謂朱子之忠臣，而不知其爲不孝子也！義理無窮，人各有見。千流萬派，同歸於海。手舞足蹈於焚膏繼晷之餘，嗒爾忘言於千言萬語之內，於是始知文公有罔極之恩，而書可以無焚。而魯齋所欲焚者，非文公之書，乃文公之書之蠹也。永春在萬山中，山水秀麗，風氣完密，濟濟多士，皆談書而無外慕，必有聞道而知恩者。其亦念柴侯今日作興之勤，倡率策勵，以求其所謂集大成者，而反之於身也。」

社學十三所

〔校記〕

〔一〕「泉州府 晉江縣 南安縣 惠安縣 德化縣 安溪縣 同安縣 永春縣」十四字，各本原脫，據本書體例補。

〔二〕「是時」下，各本原闕六字。

〔三〕「哀矜」下，各本原闕六字。

〔四〕「不足佐」下，各本原闕一字。

〔五〕「三月」下，各本原闕一字。

〔六〕「縣」字，各本原脫，據本書體例補。

閩書卷之三十四

建置志

建寧府 建安縣 甌寧縣 建陽縣 崇安縣 浦城縣 政和縣 松溪縣 壽寧縣(一)

建寧府 自有閩，則建安之名最古，其後乃有福州，合而名福建也。其城，三國吳郡守王蕃始建於溪南覆船山下。五代宋元嘉初，太守華瑾之遷於黃華山麓。梁末爲長樂侯蕭基所焚，太守謝謁柵木溪西爲治所。陳刺史駱文廣復徙覆船山北，而黃華之麓則建安縣治在焉。唐大曆中，以州城多故，寄治建安。建中初，刺史陸長源築城，建第舍，而自是縣爲州治矣。州門九：南口建溪，東南曰資化，西南曰建安，東曰寧遠，西曰水西，水西之東曰西津，西津之南曰臨江，東南隅曰通安，北口朝天。天祐中，刺史孟威增築南羅城。宋改西門口平政。建炎初，盜葉懷叛，移治寓建陽。紹興初，盜范汝爲叛，移治寓崇安。十四年圯於水，守張銖修築，(二)重建寧遠門。二十年，守黃輅重建朝天門。淳熙元年，守傅自得重建通安門。端平二年，守姚瑤重建建溪、資化、建安、水西、臨江，改水西曰萬石，凡六門。元罷守禦，城日圯。至正十二年紅巾入寇，守趙節因舊址修築，改寧遠門曰高門，萬石門曰西門，通安門曰捲秋門，建溪門曰南門，資化門曰長橋門，建安門曰市門，又改爲管門。其臨江、平政、朝天三門名各仍舊。二十年，陳友諒入寇，參

政阮德柔擊敗之，遂修築舊城。皇朝洪武二年，指揮沐英又拓其西南，爲通濟、威武、臨江三門，改高門仍爲寧遠，捲秋門爲政和，長橋門爲通遷，南門爲廣德。其平政、朝天、臨江三門名各仍舊。十九年，指揮時禹復請增廣之，西自威武門，抵朝天門之北，包黃華山於城中，增闢二門，曰拱北，曰朝陽，周二千七十九丈三尺有奇，高一丈九尺。爲樓二十四。正北依山，西南濱溪。永樂間，以拱北、朝陽二門僻寂，奏閉之。

府治署

儒學 在黃華山支隴。宋寶元十一年，始詔建州五學，賜田五頃贍士。熙寧間，設教授一員。時學在郡治南趙氏坊，文廟在建溪門內東。元豐中，賜田至十頃。崇寧、大觀間行舍法，生徒衆盛，增至三百餘間。建炎燬於兵，郡守劉子翼重建學舍，併立文廟於學。紹興十四年圯於水，禮殿獨存。十五年，守張洙、漕使徐琛、馬純合請於朝，得錢二十萬，庀工重建。郡人范寅秩繼領漕事，踵成之。前爲禮殿及兩廡，後爲明倫堂，列齋十二。堂北構御書閣，倉庫、廚湢、廨舍咸備。胡寅作記，記末以八失規學者而勉之：「一不尚志親師，一失也。膠陋護舊，憚於擇善，二失也。指記誦詞章爲事業，三失也。用於應舉干祿而已，四失也。不得之，或嘆儒冠誤身，棄而他徙，五失也。既得之，視故習猶免蹄蟬蛻，六失也。効官克職，以柱後惠文支梧一切，謂政才學術本自異科，七失也。進乎此者，知有上達之理矣，乃不探索《語》、《孟》之微，《易》之幾，《詩》之深，《書》之要，《春秋》之奧，則取遁詞小道兀焉宅心，八失也。」隆興中，守陳正同卽東廡北建祠，祀游御史酢。淳熙十一年，守趙彥操重修廟學，設九位以列諸經訓，闢射圃於西序隙地。守黃通、葉時相繼修治。時復增闢小學，真文忠公爲記，以修學之事比之修身，以進學者。端平二年燬於

兵，惟禮殿存，明倫堂燬焉。守姚瑤重建。劉克莊爲記，以爲「唐虞三代教人之法，具存於經，高敷箕陳，維倫爲首。人有聖愚，理未嘗偏，倫有常變，人鮮能盡。參、哲、夷、齊常也，舜、申生變也；申不墮恭，舜不廢友。匹夫匹婦愚也，猶或能之。周、孔聖也，周公愧仁智，孔子謂『未能一焉』。所以修至上聖，不忘自微。」轉運使任文薦、沈杞又以邦人之請，祀胡文定安國。張南軒爲記。其後，嘉熙中漕使王伯大重建御書閣，閣下祀游、胡諸賢。郡首黃壯猷又撤殿宇重新之。淳祐初，漕使方大琮更議右廟左學，前殿後閣，如京邑制，爲圖以授博士趙陞夫。於是安撫徐清叟、漕使項寅、孫庾使、李昂英、趙綸、蔡籥、守王埜、王拯皆捐金相役，陞夫掃地更新，如圖爲之。既成，合於頰水之規，次乎辟雍之制。守王遂爲記：「斯學也大矣，非夫溪山之勝也，所謂富有之謂大。業新矣，非夫宮牆之盛也，所謂日新之謂盛。德於其大也，歛實約己不爲高虛，乃至小也；於其新也，明善復初不求奇異，乃至舊也。」皇朝洪武六年，教授周斌因元之舊再加繕治，遵制爲齋四：東曰志道，曰據德，西曰依仁，曰游藝。十九年，建安知縣余子恭立朱文公祠於尊經閣後，以蔡文節、真文忠、劉文簡、黃文肅四先生配。建文中，學燬於火。永樂初，知府芮麟、教授張信奏請卜遷今所，而帥閩廨舍，軍士室廬居其半，指揮師祐、徐信乃共撤地來歸。麟庀材鳩工，繼者知府劉敬竟其役。楊文敏榮爲記。其後屢有修治。

雜造局

稅課司

遞運所

廣實倉

陰陽學 醫學 僧綱司 道紀司

建寧道沿革見福建省方域。

上司行署三所

社稷壇 風雲雷雨山川壇 郡厲壇

城隍廟，唐封昭烈侯，以刺史張文琮、陸長源有功德於民，列祠左右以配。宋寧崇初，飛蝗入境，官吏致禱，大風逐蝗南去。奏賜廟額曰顯應，仍封城隍爲惠寧侯，張刺史爲昭應侯，陸刺史爲嘉德侯。隆興中，陞州爲府，加封城隍曰福應，張刺史曰靈貺，陸刺史曰顯應。皇朝廟制見福州府。唐建州刺史李公祠，祀李頻。唐京畿令謝公祠，祀謝夷甫。夷甫，越州人，唐時爲京畿令。鳳翔孟湜押兵縱掠其境，夷甫捕斬之。李輔國譖於朝，流建州。帝後稍悟，未及召，卒，葬於此。及代宗立，見夢自訴，有旨爲立廟，賜額靈通。皇朝洪武初，題其主曰「唐京畿令謝公之神」。建安書院，在府治北。宋嘉熙二年，守王埜建，以祀朱文公、真文忠。宋胡文定公祠 宋游御史祠

福建行都指揮使司，在黃華山麓王延政太和殿舊址。建寧，八閩上游，聖祖重建行都司於此，蓋以防倭，若謂福泉屏外，建寧屏內，巍然並建，若遠左陝右矣。後沿革不同。今置爲守備。見扞圉志。建寧左衛指揮使司 鎮撫司 左、右、中、前、後五千戶所 軍器局 預備倉 建寧右衛指揮使司 鎮撫司 左、右、中、前、後五千戶所前所今調浦城守禦。 軍器局 預備倉二 旗纛廟

建安縣

縣治署

儒學一 本宋劉珙故宅，爲屏山書院，國初以建學。

籌嶺巡檢司

大平水驛

預備倉五所 養濟院二所

劉坑鋪 報恩鋪 謝坑鋪 赤岸鋪 八仙鋪 莒口鋪 房村口鋪 瓦口鋪 橫谷鋪 棗林鋪 井

岐鋪 箬溪鋪 東游鋪 馬鞍鋪 牛頭鋪 龍蓬鋪 蕉坑鋪

里社壇 鄉厲壇

劉屏山先生祠，前祀屏山，後祀胡籍溪、劉白水二先生。 劉氏五忠祠，祀劉忠簡頤、忠顯幹、忠定子

羽、忠肅珙、忠烈純。 朱文公祠，在紫霞洲之上，中祀文公，左右以黃勉齋幹、劉雲莊燭、蔡九峰沉、真西

山德秀配。

社學三

甌寧縣

縣治署

儒學 舊在城外，隔溪艱涉。正統十一年，知府王溥言於朝：生徒從流而就學，不便，城中有府學舊址，乞廢，置爲今所。

營頭巡檢司

稅課司 河泊所

城西驛 葉坊驛

預備倉五所 養濟院二所

總舖 城西舖 郭道舖 北坪舖 北津舖 交溪舖 長汀舖 後沙舖 豐樂舖 中橫舖 縣前舖

雷石舖 橫山舖 黃屯舖 冲村舖 花橋舖 溪頭舖 蓬嶺舖 井後舖 新嶺舖 北坑舖 簪村舖

營頭舖 寶曆舖 西甌舖 許洲舖 羅灘舖 瀛州舖 塔嶺舖

里社壇 鄉屬壇

朱韋齋先生祠，在城南紫芝上坊，雙溪前臨，有浮橋通城中。韋齋尉政和、尤溪時，携文公往來皆居焉。文公幼年於沙上畫卦，卽此地也。後有僧改建石橋，假精舍爲督工所，名曰橋局，已而僧廣其居，名橋局寺，後又更名方廣寺。皇朝成化二年，韋齋十一世孫燦、燦、燦白官復其西隅，隔地建精舍，祀韋齋。正德十年，十一世孫燦、炯、十二世孫壘復白官全復之，重建精舍爲堂，以祀韋齋，文公配焉。

社學七

建陽縣 閩粵王卽大潭山築城以拒漢，名大潭城也。山凹爲開福禪寺，閩王審知城寨於此，蓋西北倚山而東南瞰溪。元陳友定卽故址作四門：東曰景陽，西曰景肅，南曰景舒，北曰駐節。皇朝永樂丙申，洪水囓毀，僅存西、北二門。弘治戊申，令張津甃以磚石，增高五寸，周一千一百二十八丈，更置永安、永寧二門，以便汲。嘉靖乙巳，令余燦於西、北二門增高二尺。辛亥，令馮繼科重修崩塌，匾景陽門曰東陽。

勝覽，景肅門曰西陸奇觀，景舒門曰潭陽保障，駐節門曰閩海上游。久之，流賊入境，令鄒可忠鑿西北二河備之。萬曆丁酉，令魏時應增城以警倭。

縣治署 舊在三桂里，晉太元中遷於建中里，唐嗣聖中移今所。縣前譙樓匾「建陽縣」三字，朱文公筆也。宋時有敬簡堂、絃歌堂、冰壺堂、雙溪閣、放生池、勤政堂、讀書堂、仕優軒，俱在縣治內。今併爲縣宇。宋劉克莊《縣廳題名記》：「建陽名難治，而實不然。巍巍考亭，爲宋闕里，兩坊墳籍大備，比屋絃誦，前修言行接乎見聞，士易治也。俗勇於鬪，及氣平忿定，易直之心油然而生，怙終遂非者少，民易治也。運鹽有法，可以裕上寬下，無江、浙、閩、粵預借鑿空之困，聽訟日纔數十紙，賦與訟易治也。矧其山水明秀，一橋如畫，茶筍連山，酒妙天下，人家池樹多奇花珍樹，同縣之李花極目，其土風物產之美，又宦游者之所樂也。然比歲長官類以傷錦而去。趙侯與迥至而嘆曰：『有易治之實，蒙難治之名，厚誣吾縣也。』乃究病源，徐施砭劑，期年而治，二年而大治。一日顧壁紀石且盡，命續之，書抵予曰：『吾子，舊令尹也，盡識諸？』嗟夫！余去縣久矣，間假道者再，父老皆空巷送迎，諭之不去。今余齒髮殘禿，諸父老見且不識，而聞余子弟過其境者猶惓惓相勞苦，以余拙政而人不相忘如此。趙侯方新學宮，講《師說》，私淑其上，抑豪右，扶鰥寡，勤撫其民，持之以久，終以不倦，他日愛戴而思慕之者，又何如也？侯，字景臯，其學出於師友云。」

儒學 宋時在水東之游，其地湫隘，迥隔大溪，遇霖潦，浮橋斷絕。建炎間，燬於范汝爲之盜。慶元間，朱文公與蔡文節公元定白於令儲，用謀遷同縣里之護國寺。其地前而雲谷，背負環峰，後繞油溪，有端緒矣。尋偽學禁興，遂罷。文公答潘子善書曰：「新學復，爲僧坊，聖賢塑像摧毀殆盡，吾道屯邐如此。」

乎！嘉定乙亥，劉文簡公燾與文公季子侍郎在，游侍郎九功、徐侍郎清叟相與倡議，彭尚書方協力爲之規摹，得廢寺爲學。皇朝成化癸巳，徙縣西之棲隱寺。正德癸酉，復移文公所遷處。嘉靖壬戌，仍改建於水東。萬曆丁亥，教諭鄧以誥復遷文公故址。學宮之中，宋時有三賢祠，令蕭之敏建，以祀陳洙、陳師錫、游酢。之敏卒，令姚耆寅合之敏其中，曰四賢，請朱文公爲記。有晦庵祠，令劉克莊建，祠文公，以黃勉齋配食。既推本於父吏部公章齋，以劉草堂於文公有開端正始之功；秘閣范公，韋齋之友，文公嘗從考質；艮齋魏公，則草堂門人，而文公友也，以並祀於學，而請真文忠公爲記。令趙與迥於四賢祠益以劉文簡，爲五。於晦庵祠東序益以游文清九，言曰：「少與文公共學者，而不與時共好也。」於西序益以蔡勉之、魏揆之、蔡元定，曰：「勉之，其所學也。揆之，其游也。元定晚盡力於斯道，而興學之議所由起也。」而請王遂爲記。皇朝鄧以誥既遷舊址，予兄喬遷繼以誥後爲作生祠學中，而記之曰：「學三易置，首定於朱、蔡二先生，後雖代有因革，顧二先生在天之靈，未嘗不注意桑梓之後進。公善成二先生之志於數百年之後，二先生喜可知也。」

預備倉 常平倉 學倉

陰陽學 醫學 建陽稅課局 後山稅課局

建溪水驛 東峰馬驛 養濟院

縣前總舖 白槎舖 吳墩舖 長湍舖 黃口舖 轉水舖 河船舖 耐口舖 橫金舖 桃芝舖 後

山舖 杭橋舖 崇化舖 東峰舖 虞渚舖 波頭舖 葉坊舖 江源舖 白塔舖 油源舖 黃陂舖 大

闡舖 南溪舖

上司行署四 宸前公館 油源公館 杭橋公館 麻沙公館
社稷壇 風雲雷雨壇 山川壇 邑厲壇 鄉厲壇 里社壇
城隍廟

胡文定公祠 劉聘君祠 樟隱祠 翁思齋祠 謝疊山祠

同文書院，在崇化里，今書坊也。朱文公建，以貯圖書，中祀孔聖。橫渠書院，在永忠里，祀張獻公

栻。獻公九世孫德來令紹武，道麻沙，愛其溪山之勝，卜居焉，創橫渠書院，妥獻公主，仍以弟御史大臨配。寫山書院，在禾平里。宋紹興間，游文肅公酢論著其間。乾道丙戌，令肅之敏祠祀焉。考亭書

院，在三桂里，文公故書院也。文公歿，令克莊闢祠以祀。淳祐中，理宗勅名考亭書院，御書賜之。祀以

黃文肅公配，從以蔡文節元定、劉文簡燾、真文忠德秀。元時，熊禾爲書院記，起語曰：「有周東遷而夫子出，有宋南渡而文公生。」後復有求記於吳草廬者，草廬方援筆，聞禾一語，嘆曰：「江南有人，予奚容

喙？」皇朝天順甲申，知府劉鉞立祠，祀獻靖章齋焉。嘉靖乙酉，參政蔡潮表曰南閩闕里。蘆峰書院，

在崇泰里，宋乾道間蔡文正沈構精舍其下。寶祐中，理宗御書「蘆峰書院」四字賜之。元朝，其孫希仁再

構堂，揭匾前建尊道堂以奉先賢，別建一堂於前，左曰傳心，祀朱子；右曰思敬，祀西山、九峰，而以文正

與子淵、模、杭配。環峰書院，宋儒黃文肅公爲師友講道之所。舊在縣治西清巷，今妙高峰下。文肅

歿，門人俎豆其間。淳祐甲辰，理宗御書「環峰書院」賜之。元皇太子直金手書「麟鳳龜龍」四字表其堂。

皇朝正德間，知縣邵繼以半山庵址改爲堂，中爲正堂四楹，肖先生像，以門人潘瓜山柄、楊信齋復、何北山

基、饒雙峰魯配。雲莊書院，在崇泰里，宋劉文節燾故居。嘉定庚午改建，賜今額。中爲堂，匾曰近

思。後爲祠堂，祀文簡與其弟文安炳。西立燕居殿，祀先聖，四配；東作草堂祠，祀劉聘君及朱晦庵、金紫公三賢像。皇朝正統間，益以子靜齋欽、孫冰壺、曾孫省軒榮配。瑞樟書院，在永忠里麻沙鎮。先是，唐劉開國公勣受官建中，避五季亂卜居焉，以漢劉尚其鼻祖，祠祀之，植樟祠下。宋嘉定中，樟木蔽芾，大數十圍矣。有人曰：「此木榮枯，關劉盛衰。」裔孫潯州守曰中者創瑞樟書院，與其兄子聲肄業焉。宋學士洪邁爲記。其正堂匾曰道源，祀劉向，配以屏山文靖公子聲，右祀史文忠公崇之、存庵砥、在軒礪、篁鰲子實。其東廳匾曰義齋，中祀開國公，配以忠簡公頴、忠顯公幹、忠定公子羽、忠肅公珙、忠烈公純與其梅石公震孫綜。皇朝御史汪奎改義齋曰五忠。樟之瑞也：紹興丁酉，劉夢先讀書室中，夜聞樹間有聲，啟戶視之，拾樟實三枚，皆徑三寸餘。是年魁鄉薦，後又再魁鄉薦。紹定庚寅，幹微枯，其年監軍純歿於王事。及封忠烈，其枯復榮。咸淳庚午，幹生黃花三朵；是年劉氏領鄉舉者二，領漕舉者一。蓋劉氏但有登科除擢，樟必先兆云。鰲峰書院，在崇泰里，唐熊尚書秘建，爲子孫肄業之所。及宋，勿軒先生禾改其門對雲谷，以寓仰止。皇朝成化庚寅，副使何喬新重建祠，以祀勿軒。霄峰書院，在崇泰里莒口。宋宋公咸建爲精舍。今改。以上存。雲谷書院，在崇泰里。宋乾道庚寅，朱文公構草堂於中，榜曰晦庵。潭溪書院，在崇泰里莒口，黃勉齋所構草堂。溪山書院，在於後山街。淳熙癸巳，葉文修公賀孫師事文公，淳熙乙酉建精舍，著述其中，文公爲書匾曰溪山精舍，而文修自匾其文曰講道藏修。久之，學徒益衆，復立齋兩傍，左曰明道，以講書；右曰集賢，以聚徒。嘉熙丁酉，理宗勅改爲書院。歲久傾廢。皇朝洪武丁卯，令郭伯泰即故址構堂，中奉文修，以文修子平巖采配；左堂曰原道，以祀濂、關、三洛、考亭四先生，而以水心先生配；右堂曰啟蒙，延教其子弟以及鄉人。化龍書院，在縣西西山麓，文公門人

劉韜仲曾孫應李所建。應李，咸淳進士，避元遜隱，開學塾於是。邑人熊禾爲記。以上廢。

縣坊社學 莒口社學 書坊社學

崇安縣 唐時爲武夷鄉，附建陽縣。貞觀初，有潤州人名遷者，以功封千牛衛上將軍，賜姓彭，自潤州來，徙家卽曠野，剪蒿萊，鑿陂灌田二千餘頃，招移人居之，未幾成聚，名鄉曰新豐。遷子漢，高宗永徽中詣闕，請以武夷鄉爲溫嶺鎮，置官領之。其治所曰營嶺，一名溫嶺矣。未治時，有三姓者居之，亦名三姓市也。踰年，改鎮爲崇安場。漢仕台州軍事判官。漢子璿仕建州兵馬都監，會昌中請以場爲縣。宋淳化五年建縣城，草城耳。皇朝正德初，草城盡壞，復修之，顧第沿舊。嘉靖辛酉歲，叛卒變生，民被虔劉。隆慶初，令余乾貞始城之，廣袤千丈，東門曰朝宗，南門曰景陽，西門曰慶豐，北門曰拱極。

縣治署 縣圃有宋趙清獻手植梅，邑令王純就梅傍建思獻堂，詹元輔復建浮香閣。

儒學

河泊所 分水巡檢司

長平水驛 大安馬驛 興田水驛

預備倉 有中、東、南、西、北五區，今有廢有存。

醫學 陰陽學 僧綱司 道紀司 養濟院

縣前鋪，舊名蕭山，今名永安。 分水鋪 望仙鋪 大安鋪 小漿鋪 舉富鋪 楊莊鋪 乾溪鋪

允漿鋪在縣西。 新洋鋪 梅溪鋪 石鼓鋪 中奢鋪 界牌鋪 興田鋪 黃亭鋪在縣西。 寺口鋪

小寺鋪 陽谷鋪 吳屯鋪 黎口鋪在縣北。

上司行署三 公館二

義民倉，附預備倉，亦五區。而宋時朱文公請郡立社學十有七所。今雖已廢，先賢之舉也，因列記其名：其一在里仁坊光化院，一在會仙里冲祐宮，一在豐陽里黃亭，一在長平里黎源，一在黃村里石堂院，一在上梅里回回院，一在上梅里霞陽院，一在大渾里報恩院，一在石舊里烏山院，一在從籍里東山，一在從籍里張坂，一在從籍里大王嶺，一在從籍里登山，一在五夫里連墩，一在五夫里湖塘，一在五夫里古亭，一在五夫里大坂。

社稷壇 風雲雷雨山川壇 邑厲壇 里社壇 鄉厲壇

城隍廟

胡文定公祠堂，中祀元定，配籍溪、致堂、五峰、茅堂四先生。三丈祠，祀唐殿監彭璫、宋侍郎張承

傑、縣令翁最。清獻趙公祠，皇朝隆慶中令余乾貞建。游文肅公祠堂，在節和里之溪澗，登山之右。

江少微先生祠堂，在豐陽里之蘆峰。劉屏山先生祠堂，在屏山之麓，中祀屏山，中肅公珙、朱文公熹配

左右。紫陽祠堂，在武夷山大隱屏下，中祀文公，左右配黃文肅榦、蔡文節季通、劉文簡燾、真文忠德

秀。九峰祠堂，在兜鑒峰下，祀文肅公沈。崇賢祠，在治西二里許，皇朝嘉靖中，僉憲張儉建，以統祀

崇之諸賢，曰廬山游公、武夷、籍溪、致堂、五峰、茆堂、胡公草堂、屏山劉公、晦庵朱公、西山節齋、九峰蔡

公、雲莊劉公、勿軒熊公、進齋徐公，凡十五人，^{（四）}皆以道學著者；忠顯、忠定、忠肅劉公，武安、武順吳

公，中丞翁公，凡六人，皆以忠義著者；少微江公，以隱德著者。王陽明祠堂，在武夷一曲溪右。

分水關，皇朝邑人丘雲霄縣志曰：「唐時爲閩王寨。舊傳閩王嘗自建城騎白牛一日至此，人皆異之。是人閩第一關也。境接楚越，故曰大關，巡司在焉。關以外二舍爲車盤驛，關以內二舍爲大安驛，雖非峻阨，長嶺逶迤，亦一險也。北瞰烏石，地狹人稀，左潛斜徑，自白鶴仙麓可繞關左而出，所當備矣。大安、楊莊、舉富，地展可駐，水草便於應援，昔人分屯兵營焉。」觀音關，丘雲霄縣志曰：「左連分水，右達溫林，遠瞰倒鐘嶺，凡三十里爲山，前地可屯衆。縣上路坂、黃栢坂，則西與分水路會。關以內曰地源，三十里至赤水湖，縣鬆嶺之後，發龍坑溪，出大壩，始與溫林路會。地視諸關爲獨僻。此在守關口扼問道矣。」溫林關，丘雲霄縣志曰：「與寮竹，觀音稱三關，皆外控上饒分道通關而喉束衢、信二州，於此設置巡司焉。其地野曠民聚，坡嶺易登。關以外約二舍爲山前，左連上路坂而達分水，右通榆溪而至船坑。關以內約二舍爲溫林。」寮竹關，雲霄縣志曰：「當北境九十里至縣，出關十五里爲榆溪，信州屬地也。入關十五里爲童家坑，自童家坑而車盆坑，而毛連坑，而坑口，而上乾原，而下乾原，數村相望，民可以什五。自坑口東踰茅嶺，出周畚詹地，西五里爲上長境，十里爲下長境，民可以資應援。」焦嶺關，丘雲霄縣志曰：「西寮竹，東岑陽，三關以北統會於榆溪，而焦嶺險矣。關南五里西至水碓壠，由橫徑至後官坑，皆深林窄徑，步莫朋肩。出險而至吳家畚，始通寮竹，由東二十里爲水歷上村、下村，又五里爲大渾、小渾，村煙雖廣，去閩爲遙。」岑陽關，丘雲霄志曰：「在治東北隅，東接浦城，而銅鉞山障之，稍北由牛尾兜出信州封禁，山廣谷深，林地或有警，斯其盜窟。關外內交險，林木滅影，石磴掌容。若由榆溪南人，一失顧步，便墮懸崖。但關口勁風毒霧，嵐煙冥晦，難以宿兵，乃退屯岑陽村口。我一怠守，險失據矣。關北三十里至交州巡司，諸關總道也。其地名八方廠。越坵底過茅店，縣棧道而達岑陽。岑陽稍西縣汪墩

後山、黃龍巖、九曲溪溯流而北，亦通榆溪。此其間道，可設防也。」桐木關，丘雲霄志曰：「在治西一百二十里。東通建陽之嘉禾，西通鉛山之黃栢坂，南通邵武之光澤境，北通本邑之周村里，四達無險。其西自桐樹原至三港，可通大竹嵐、小竹嵐，入縣間道也。」

翁坑寨 楊原寨 將軍寨 點村寨 劉家寨 棠嶺寨 檀香嶺寨

浦城縣 以漢東越王餘善築城臨浦名。元至正二十三年，守將岳承祖因舊址復築，東距越王臺，西包皇華山，南瀕大溪，北壑深濠，廣袤七里，闢爲四門。二十六年，王師下福建，先克浦城，張指揮鎮守是邑，以其城太廣，減東向一半改築之。皇明洪武二年，罷軍守禦，城復廢。十二年，令張宗顏平其故址，以廓民居。正統十四年，處賊犯境，丞何俊築土城爲保障。成化庚寅，副都御史滕昭以土城不固，奏請成城。令楊惇、張炳相繼爲之，周圍千八百丈，崇一丈九尺，闊倍焉。作五門，東曰金鳳，南曰南浦，西曰迎遠，又西曰德星，北曰拱北。仍附小門五處，以通水汲。

縣治署

儒學 宋慶曆中，陳襄爲簿，佐其令立學縣東隅。建炎初，賊火之。紹興三年，吳美作文宣王殿，請楊龜山爲記，言：「學廢久矣。誠淫邪遁之辭盈，天下士溺所習，冥行而已。子考《周官》：『司徒以智、仁、聖、義、中和六德教萬民。夫仁與聖，孔子不敢居，而先王以是教萬民，蓋天地萬物一性耳，無聖賢智愚之異。故顏子謂：『舜何人？』孟子謂：『人可堯舜。』司徒之教，棲鵠之義也。」

盆塵巡檢司 高泉巡檢司 溪源巡檢司，在登俊里。皇朝宣德八年，御史楊禧以其地連接江浙，盜

賊出沒，奏請增設。

稅課司 河泊所

陰陽學 醫學 僧會司 道會司

際留倉 預備倉九所 養濟院二所

縣前總舖 十里舖 余回舖 臨江舖 石嶺舖 大湖舖 蔡家舖 張家舖 象口舖 南岸舖 秋

竹舖 太平舖 漳頭舖 蓬尾舖 界牌舖 新嶺舖 張街舖 楊溪尾舖 沙墩舖 蕭家舖 太平舖

長樂舖 樂平舖 九牧舖 楓嶺舖

上司行署二

社稷壇 風雲雷雨山川壇 邑厲壇

城隍廟

朱文公祠，中祀文公，以蔡沈、黃榦、真德秀、劉燾四賢配。 真文忠公祠 江文憲公淹祠 劉刺史

守謙祠 詹體仁公祠

政和縣 舊名關隸鎮。朱獻靖公曰：「《周禮·秋官·司寇》有司隸、掌帥、四翟之隸，使之皆服其邦之服，執其邦之兵，守王宮與野舍之屬禁。一曰蠻隸，二曰閩隸，三曰夷隸，四曰絡隸，皆百二十人。閩隸掌役畜鳥而阜蕃教擾之。關隸，意當爲閩隸，相似而訛也，蓋其里之人，周時嘗爲閩隸，亦猶古緡雲氏，今亦以名處州之屬縣耳。王潮不知書，遂以關隸名鎮也。縣民又以縣在州東，私號曰「東和」矣。」縣治舊卽

鎮爲之，在政和西里天王寺北。宋咸平三年，徙感化里東岸口，卽今治。故無城。皇朝弘治中，處之流賊，令柴議始成之。後燬於倭。萬曆初，令張應圖移置半山之麓，爲今城。城三門：東曰寅賓，南曰南薰，西曰順令。

縣治署

儒學 在縣治東。宋慶元四年，令括蒼徐公修之。學成，劉公燾爲記。記言：「士之爲學，豈特處庠序？鷄鳴夙興，嚮晦宴息，皆學之時。微而屋漏暗室，顯而鄉黨朝廷，皆學之地。動容周旋，洒掃應對，皆學之事。知無時之非學，則晝而有爲夜而計過者，其敢懈？知無地之非學，則矜細行、勤小物，其敢遺？若夫足履餐舍之域，口吟課試之文，而曰『吾之學如是止』，則非愚敢知也。」按此記，《真文忠集》亦刻，而以慶元四年爲紹定五年。徐公則名應辰。皇明正德六年，令張萱建養賢堂於明倫堂後。嘉靖九年，分巡僉事張僉以按察分司作明倫堂，其舊殿廡移東北而拓新之。先是，僉作鎮建寧，既歷政和，謁孔子，與諸生商權經義，自朝至旻，情論通洽。諸生因進請曰：「政學久且敝，文廟逼井，褻漫不稱。明公圖之。」僉以謀邑令潘邦相，邦相曰：「舊傳明府所駐分司，形家最勝，顧不敢請。」僉曰：「范文正公捨宅爲學宮，況公署哉！」遂以遷。

赤巖巡檢司 地隸壽寧，官隸政和。

預備倉 社倉四所

陰陽學 醫學 僧會司 養濟院

縣前舖 東峰舖 地坑舖 魏屯舖 九蓬舖 黃嶺舖 暖溪舖 新坑口舖 釜鑒舖 桐嶺舖 倪

屯舖 西津舖 後田舖 稠坑舖 下園舖 鎮前舖 深渡舖

上司行署二

社稷壇 風雲雷雨山川壇 邑厲壇 里社壇 鄉厲壇
城隍廟

星溪書院，在縣治南正拜山下，宋朱韋齋爲縣尉時建。今改韋齋祠。雲根書院，在縣西，朱韋齋建，以教邑之子弟。

嶺腰隘 金華隘 天柱巖隘 稠坑隘

松溪縣 在深山中，故無城。弘治元年，令徐以貞奉部符經度。三年，通判龔球、主簿王俊奉檄董築，值歲饑輟工，基址粗立而已。嘉靖丙戌，坑寇猖獗，巡按劉廷篴檄令閔魯，委崇安丞袁大統理其役，周圍九百五十五丈，高一丈五尺，厚一丈。作四門：曰寅賓，曰永寧，曰平政，曰迎恩。

縣治署 宋志：王荆公父益爲邑尉，生荆公於此。又云李綱母夫人曾館於是。綱實生焉。邑人以爲勝事。

儒學

際留倉 儒學倉 預備倉二所

東關巡檢司 二十四都巡檢司 稅課司

陰陽學 醫學 僧會司 道紀司

總舖 杉溪舖 南坑舖 第四舖 官橋舖 水口舖 巖下舖 石橋舖 長演舖 花橋舖 劉源坑
舖 劉屯舖 寨嶺舖 官路下舖 鐵嶺舖(五) 養濟院

上司行署四

社稷壇 風雲雷雨山川壇 邑厲壇 里社壇 鄉厲壇

城隍廟

湛雲書院

壽寧縣

縣治署 皇朝弘治中，教諭賈暹《復縣治正門記》：「壽寧縣治，南臨大溪，橋以上以通衢，倚以鎮武，面以翠屏，重峰四圍，儼若城廓。縣廳堂面直視，廉陞端峻，軒敞無有壅蔽。成化中，何丞顯以正門直接衢道，不利居官，閉而塞之，別穿小門東邊。正門之內塑諸佛像以爲厭勝。無知之民禱祀祈賽，晝夜雜沓，有官君子亦從而朔望拜謁，與載祀典者同科。於是香燈旛蓋，日增月盛，縣列戶牖，宛一神區矣。弘治庚戌冬，慈溪鄭先生鉉來令茲邑，始下車，出繫囚，節妄費，釐宿弊，剖訟牒，未旬月面頌聲四盈。仲冬之朔，適值長至，當行慶賀禮，先期將習儀於浮屠之官，先生召屬諭曰：『龍亭中有牌位，上書皇帝萬歲，宜出正門。』昇神佛像屏處龍亭，繇正門出。民駭愕譁走，謂且得禍，畏先生不敢口。惟士君子懽然往賀。先生曰：『吾初至即欲啟之，以民狙故習，必費鑄諭，因行大禮而出龍亭，孰敢違者？』衆服先生智且勇。不二日，先生夫人即世。感先生者曰：『甚哉！先生啟門之禍也。』先生曰：『吾妻來時，病不能即

塗，得歿此，幸矣！門乎奚與？」未幾，縣有殺人獄，又以惑先生曰：「甚哉！啟門之禍也。」先生曰：「人殺耶？門殺之邪？」言者無以應。嗟乎！縣，朝廷之縣也，縣官者，奉朝廷之命，居此而發號施令而治斯民者也。是則縣之門，朝廷政令之所從出，況節旦慶賀、詔赦迎接、龍亭鹵簿，皆當出人於此，乃閉塞以媚鬼神，於臣子之心何如也？通典教於此，勢不能以有爲。屢嘗告諸爲政者，不惟不見聽，而反以爲不祥。非先生理明義精卓見定力，其能行此耶？」

儒學

際留倉 預備倉三所

漁溪巡檢司

醫學 陰陽學 僧會司 養濟院

縣前舖 葉洋舖 芹洋舖 尤溪舖 平溪舖 南溪舖 大洋舖 赤竹嶺舖 三澄舖 龜潭舖 武

曲舖

上司行署二 公館五

社稷壇 風雲雷雨山川壇 邑厲壇 里社壇 鄉厲壇

城隍廟

〔校記〕

〔一〕「建寧府 建安縣 甌寧縣 建陽縣 崇安縣 浦城縣 政和縣 松溪縣 壽寧縣」二十七字，各本原脫，據本書體例

補。

〔二〕「張銖」，下文作「張洙」。

〔三〕「關」字，各本原脫，據文義補。

〔四〕「凡十五人」，上文實列「十四人」。

〔五〕「舖」字，各本原脫，據《八閩通志·公署》補。

閩書卷之三十五

建置志

延平府 南平縣 將樂縣 大田縣 沙縣 尤溪縣 順昌縣 永安縣(二)

延平府 古曰南平，曰劍津，曰劍浦，曰鐔州，曰龍洋。前面九峰，後據龍山，二水交流環其外，城東北懸崖峭壁無著足，城南樵川灘石險惡，西隅城堞天塹，仰攻爲難，號曰銅延平。城築自宋，周圍七里，作「九」一百八十步。爲門十有一：曰鐔津門，曰開平門，曰延安門，曰崇化門，曰延平門，曰延清門，曰披雲門，曰建安門，曰將順門，曰通福門，曰延泰門。皇朝爲門九，改建安門曰建寧，通福門曰福州，將順門曰西水門，延安門曰西雀，延泰門曰大北門。又作城東之門曰爐坑，臨溪之門曰小水門，近山之門曰小北門。建寧門外之橋曰明翠，浮橋也。溪中列舟三十八，架木其上，鐵纜旁維，行車馬若枕席，是名壯橋，水漲則解之，以舟渡。福州門外之橋曰東橋，西門之外曰西橋，其橋皆如明翠橋之制。

府治署 國初守唐鐸所建，不直府署，凡學舍、倉庫、獄署，皆其一新。

清軍館 督糧館 理刑館，皇明徐文貞階以翰林謫居於此，名堂曰民德，爲箴曰：「相古之治，必本諸身，克明峻德，以親其民。德明德威，民自無訟，比屋可封，刑措不用。嗟今之治，獨求諸刑，金科玉條，

貫踰六經。上刑日嚴，下俗滋敝，前奸未誅，後宄已經。惟是二者，豈民異心？任德則古，任刑則今。我維刑官，德亦靡類，任刑棄德，迂也實愧。是用夙夜，思勵其愚，曰明明德，觀古以趨。徙義遠利，罔敢懈。參前倚衡，明命有赫，維欲之動，頃刻萬端，德昏則難。咨我僚友，多士群吏，尚交警予，以就斯志。」

府學 在府治左，西山之巔。宋天聖二年，守曹修古始建。建炎四年燬於兵，遂以其地爲閱武場。

紹興二年，守劉子翼徙建郡城南，以就夷曠，未成而去。守周綰終其事，又卽學西傍立諫議陳瑩中祠，請楊龜山爲記。龜山記：「自孟子沒，聖學失傳，六經微言，晦蝕異論。宋興，勸類夷荒，養息百有餘年，名儒繼出。嘉祐治平間，文物之盛，未有前比。熙寧更新法度，以經術造士，世儒妄鑿私智，分文析字而支辭蔓說亂經矣。假六藝之文，濟申商之術，一有戾己，則流放竄殛隨其後，雖世臣元老，概比四凶。天下靡然，無敢忤其意。正論斯息，士氣不振。積至崇、宣，述其事而流毒滋甚。當是時，橫流稽天，瑩中以身扞之，幾滅項而不悔，光大之氣，充塞宇宙，先知之明，爲時著龜。非命世之才，能自拔流俗者，未之有也。真之學校，使後生晚進日覩其遺像，宜有嚮風興起者，異時羽儀天朝，使奸諛屏息，將有人矣。」紹興中，守路探、鄭椿狗邦人請，相繼復舊。皇朝守唐鐸改講堂曰明倫，左右建二齋，曰尊賢、尚友。後遷於西郭。萬曆庚子，復遷於府治西麓。辛亥，復遷柴雲岡。

豐衍倉

劍浦驛

稅課司

陰陽學 醫學 僧綱司 道紀司

察院

布政分司

分守建南道

社稷壇 風雲雷雨山川壇 郡厲壇

城隍廟 靈祐廟，祀唐李先鋒係，西平忠武王晟曾孫也。乾符六年，黃巢亂，時王鐸爲徵南行營招討都統，以係世將，奏爲行營副都統兼湖南觀察使，將精兵五萬屯漳州以拒巢。南唐因閩中驛騷，將屠之，先遣查文徽攻建州，繼遣王崇文討李仁達於福州。仁達乞師吳越，取道延平抵福州，以拒唐師。州民聞之，多震駭匿山谷。忽聞係領兵駐郡之高祠，吳越師遂從雪峰徑趨福州，郡賴以安。係歿，民戴而祠之，號李先鋒廟。宋時屢賜廟額，封號。國初改題其主曰唐招討使湖南觀察使李公之神，列祀典。

道南祠，皇朝成化初建，以祀楊龜山。按察副使何喬新爲記：「皇帝紹膺景命之初，蕭山耆俊相率請以宋龍圖閣直學士龜山楊先生從祀孔子廟。詔儒臣議可否。吏部尚書兼華蓋殿太學士南陽李公暨翰林詞臣，具先生師友淵源與其言之概，請命有司於先生故郡立祠，春秋祭，以表聖朝崇儒重道之意，以慰後學景模仰範之心。制曰可，且賜祠額曰道南，以豫章羅先生、延平李先生配饗。禮部下延平府，建祠奉祀如式。按察副使豐城游君大昇，時以僉事董學政，相地郡治東北龍山之上，督所司營之。知郡事淮南鄭宗臣任祠役，未訖以憂去。西蜀馮孜、孟勤次之，以次就功。經始成化二年十有二年，（二）以五年秋八月落成。未幾，孟勤徙知邵武。今知郡晉陵盛頤，時望以是祠之建有關風教，不可無記，請於游君，屬予書之。嗟夫！孔孟既沒，吾道不傳久矣。士之爲學，卑者溺訓誥，不知性命道德之微；高者淫佛老，而惑

其玄虛空寂之說，豈復知有所謂道學哉？七閩僻在南服，自薛令之以進士舉士，知科目之榮矣；自歐陽詹以文學顯士，知文章之重矣。至於道學之說，則概乎未聞。及河南二程夫子得孔孟不傳之學於遺經，其學行於中州，未及南國。先生以絕倫之資生於此邦，聞程夫子之道，北之河雒而學焉，旁採力索，務極其趣。及辭歸，程子送之曰：『吾道南矣。』故一傳而得豫章，再傳而得延平，三傳而得紫陽朱夫子，而西山蔡氏、勉齋黃氏、九峰蔡氏、北溪陳氏相繼而興。閩之道學，遂同風鄒魯。其波及四方者，皆本於閩。

嗚呼！先生之功大哉！而祠事弗舉者三百餘年，非缺典歟？國家以道爲治，敷政立教，一本於儒肆。我聖皇舉茲曠禮，非獨崇祀先哲而已，所以風勵學者嚮道也。士拜祠下者，其尚祇若德意，景仰前修，頌其書而會其心，去其疵而挈其粹，以振斯道於無窮哉。」後龜山得從祀，而是祠以奉旨所立，獨不廢。羅文

質公祠，祀豫章先生從彥。

李文靖公祠

朱文公祠，以其嘗產諸郡。

大忠祠，皇朝正德間建，以祀宋

文信公，以太監趙時賞、少卿陳龍復、寺簿劉洙、總轄呂武、撫院林奇、提刑何能配饗。春坊中允郭希顏謫判是府，置祠田，自爲記：「宋丞相信國公文先生以死報國，至今語先生事未嘗不嗟悼隕涕，忠義之感人，何若此深也。先生勤王所過，輒有祠祀。南劍，其開府地也。宋自南渡，數傳迄德祐間，虜分道南牧，腥膻之氣觸草木馬牛，無不立僵。當此時也，驕勇之鋒不可犯，弱宋之勢不可回，先生熟計之矣。先生以國家養士三百年，一旦徵兵，無一騎赴者，願以死報，伏劍指虜，一鼓百戰，義士爲之嚮應，天日爲之慘黯。不幸而執其去，陷平江，王真州，又何時也！然長揖壯歌，從容就義，困龍猶角，斯實難矣！漢諸葛武侯曰：『鞠躬盡瘁，死而後已。』成敗利鈍，難以逆覩，此何心也！武侯死於王業之垂成，先生死於天命之既去，所就不侔，寧有異耶！以先生心力，能殺虜則殺之，不能則殺其身無悔。先生死，虜亦旋滅，是精忠

正氣固已褫旃裘之魄，而得報之也。古孰無死？當先生時，其幸生者非叛則降耳，又孰能如先生一死而君臣明、天地位、名與萬古長存哉？嘗讀史，先生性故豪華，及八衛之日，痛自減抑。夫此一文山也。平時聲妓自娛，已而奮不顧生，毅然烈士夫。君子以爲非先生之豪，則忠不能成；非先生之忠，則豪無足取。今日之有祠，禮也。祠在郡北約二里，與理學四賢祠鼎峙爭雄。四賢咸有田以祀，獨先生闕焉。余謫居之三年，顧謂南平令張子燾曰：『理學、忠義，一道也，盍圖之？』於是請自捐公餼之餘，於范侯來賢以助祀事。范侯曰：『表忠崇節，民俗興焉，甚善舉也。』余遂屬其事於張子，置祀田凡三十五石有奇，授守者而記之。後有過先生祠者，忠君報國之心其有感也夫。」永慕祠，祀守孫衍、令陸嵩，以禱雨病卒。歲七月三日，郡守率屬致祭，其卒期也。

社學

延平衛指揮使司 鎮撫司 左、右、中、前、後五千戶所，而將樂千戶所、永安千戶所俱隸焉。

旗纛廟

南平縣

縣治署

儒學

預備倉五

嶺峽巡檢司 大曆巡檢司 養濟院二

茶洋驛 大橫驛 王臺驛以越王臺名。

總舖 城東舖 倪坑舖 安濟舖 吉溪舖 金砂舖 龍源舖 清風舖 武步舖 嶺峽舖 丘墩舖
金溝舖 高桐舖 大橫舖 城西舖 秋竹舖 西芹舖 發竹舖 砂溪舖 吳坑舖 王臺舖 樟槎舖
篋簍舖 三連舖 白塔舖 唐隔舖

大行公館 金溝公館 王臺公館 發行公館 武林公館 茶洋公館
社學五

將樂縣 在將溪之陽，土沃民樂，名將樂也。縣故無城。元至正四年，漳寇李志甫犯縣，縣人吳文讓募義兵勦滅之。文讓子克忠爲土城，廣袤九里，設四門：曰東，曰西，曰南，曰北。外有橋頭一，水門一。十二年，臨川寇鄧忠犯邵武，路總管吳按攤不花柵之。陳友定據延邵，復修築，周圍五里，四十餘步。皇朝洪武元年，汀寇金子隆攻陷城邑，武臣朱平章克復，設立守禦千戶所，移西、南二門進五百步，東、北仍舊。城壁砌磚石，負山臨溪，不壞塹也。

縣治署

儒學

廣豐倉一 預備倉四

萬安稅課司 萬安寨巡檢司

三華驛 白蓮驛

陰陽學 醫學 僧會司 道會司 養濟院

總舖 莒莢舖 孔山舖 懿安舖 高灘舖 黃坑舖 桃源舖 蛟湖舖 郭公舖 裏灣舖 隔嶺

舖 將安舖 大里舖 蓋竹舖 舊場舖

上司行署三 張公館 黃坑公館 白蓮公館

社稷壇 風雲雷雨山川壇 邑厲壇

城隍廟

隋汀洲刺史穆公祠，祀穆肅。肅，見汀洲文蒞。宋賜廟額曰顯惠。皇朝改爲祠，秩祀典。忠臣祠，

祀閩將劉瓊。皇朝嘉靖三十四年，令唐自化以景泰初千戶徐昇有守禦功，請當道配祀。瓊，見縣志五馬

山下。遺愛祠，祀五代鏞州刺史郭顯忠。陳公廟祠，祀宋令陳據。龜山祠，祀楊文靖。元浙西

郡公祠，祀李鉉。鉉，字伯鼎，衛縣人。至正間，兄鈞累功至懷遠大將軍，郢復上萬戶府副萬戶，討寨寇於

清流而沒。鉉襲職，守延平，擒寧化寨寇魏梅受，解福州海寇圍，進擊福安寨寇，戰於政和泗洲橋，弗克死

之。事聞，追贈鎮國上將軍，江東道都元帥護軍、隴西郡公。

社學六十八

守禦千戶所 旗纛廟

大田縣 縣皆田也，其中一區獨大，可置萬家，懸崖複壁四面，綰轂其口，異時土著居人耕藝所弗及，

荆榛灌莽，東西罔辯也。皇朝十四年立縣。次年築城，周圍六百八十餘丈，爲門四：東曰寅賓，西曰饒

日，南曰太平，北曰拱辰。

縣治署

儒學

際留倉 預備倉

英果寨巡檢司 桃源店巡檢司

陰陽學 醫學 養濟院

總舖 上漈舖 龍門舖 秋菊舖 萬積舖 銘溪舖 華口舖 官庄舖 赤巖舖

上司行署三 萬積陽公館 華口公館 桃源公館

社稷壇 風雲雷雨山川壇 邑厲壇

城隍廟

遺愛祠 祀御史白賁、左布政屠僑、郡守沈大楠、同知張瑄、通判李策之開設本縣者。

社學二

沙縣 以縣有沙源名。皇朝弘治四年始城，延袤千八十四丈，門四：東曰迎恩，西曰永安，南曰延福，北曰昌樂。又爲小水門四，以便汲；北門一，以通行。迎恩門自南抵永安門，俱臨太史溪；永安門自北抵迎恩門，俱臨鳳岡山，自然壕塹也。縣延福門出，有浮橋曰翔鳳，宋紹聖間建，皇朝正統間燬。至正德三年，六十餘年矣，同知計宗道重建焉，長百丈，闊三丈二尺，高餘十尋，墩十二，橋屋之棟百，南北爲

門、爲坊、爲殿、爲亭，殿以祀神供佛。其久燬時，石墩石罅悉生野棘。正德二年，棘發五色異花。明年而宗道成橋。始，橋累石墩已竣，有匠叟過之，語匠曰：「加之。崇一尺可紓水患，盍崇之？」近曰：「爾能言，爾能搖兀一石耶？」匠叟蹴巨石飛墮溪中，須臾不見。衆皆駭異，入溪曳之，數夫莫舉也，相顧曰：「此神人，盍如言？」遂崇墩。明年，大水冒至，其舊墩賴加石免。嘉靖丙辰燬。萬曆戊寅，令俞序復建。大田田一僞爲記。記首言：「余髫時以書生往來沙道，猶及兒昔時所謂翔鳳橋者，踞城南門，橫跨水上。南端望之，視城門如甕，人行如蟻，至橋半，俯視巨瀆，波光蕩漾，欲飛動，數步數回，而水聲在足底也。」縣治署 故在沙源，唐中和中，令曹朋、鎮將鄧光布以阻溪改建鳳岡山南。宋元因之。皇朝屢燬，皆有重建。

儒學 舊在和仁坊，宋慶曆徙縣治東。皇朝因之。地臨太史溪，久患水。萬曆十四年，令沈應文遷於學宮後福聖寺之址。

新豐倉一 預備倉二

稅課司 北鄉寨巡檢司

陰陽學 醫學 僧會司 道會司 養濟院

總舖 琅口舖 高沙舖 館前舖 青州舖 赤巖舖 官庄舖 華口舖 大巷舖 羅巖舖 洋口舖

尾歷舖 荊村舖

上司行署三 湖山公館 歷山公館 官庄公館 華陽公館

社稷壇 風雲雷雨山川壇 邑厲壇

城隍廟

曹長官祠，祀唐令曹朋。陳公祠，祀宋統制陳敏。曹太師祠，宋時建，祀邑人曹輔。鄧公祠，祀宋安撫鄧杲。張公祠，祀宋右丞相張若谷。陳忠肅公祠，宋建炎中建，後以右正言陳淵配。楊龜山記：「建炎初，右司諫陳公瑩中論蔡氏弟兄，忤旨竄嶺表。公之南遷不以其罪，舉天下憤惜之，無敢言者。名隸黨籍餘二十年，轉徙道途無寧歲，卒以窮死。初，京爲翰林學士承旨，以辭命爲職，潛奸隱匿未形於事，雖位通顯，人莫知其非也。公於是時力言京不可用，用之必爲腹心患，宗社安危未可知。聞之者往往甚其言，以爲京惡不至是。已而陰結僥倖，竊國柄，矯誣先烈，怙寵妄作，爲宗社禍，悉如公言。於是人始服公爲蒼龜。昔王文公安石以學行負時望，神宗皇帝引參大政，士大夫相慶於朝，謂三代之治可以立致。呂公獻可獨謂不然，抗章論之，雖文正溫公猶以爲大違。未幾，多變更祖宗故事，以興利開邊爲先務，諸公雖悉力交攻，莫能奪。其流毒至今未殄也。故溫公每謂人曰：『獻可先見，余所不及。』余謂公之於京，言之於未用之前。獻可於文公，論之既用之後，則公之先見，又先獻可。二公之言，異車同轍也。靖康中，朝廷欲盡復祖宗之舊，而一時故老無在者。天子念公之忠，追贈諫議大夫，官其四子。所以寵嘉甚厚，非私陳氏，將以風勵臣節也。公邑人相與卽縣庠爲祠堂，以奉公。堂成，屬余爲記。余曰：『公之德業，足澤世垂後，雖不用干時，流風餘韻猶足立懦夫之志，蓋天下士非一鄉可得而擅也。然鄉之士大夫誦公言，遵公道，仗節秉義，繼公風烈時有人焉，則公功於鄉爲多矣。古有功於人則祀，公之祠宜載祀典，以遺來世。』」縣令祠五：一祀宋令王璠，一祀宋令謝璠，一祀宋令葉光，一祀宋令王潯，一祀宋令葛諤。

社學五

歷安堡 萬曆中，令沈應文造。

尤溪縣 縣有沈溪，溪上沈姓者居之。後避王審知諱，改名尤，而沈姓亦更尤。城周圍千五百五十

丈，阻溪負山，不壞塹也。門凡四，曰西、東、南、北，創自皇朝弘治四年。又有福州門通往來，小水門四以便汲。大，難守也。嘉靖二年，分守參政蔡潮謀小之。六年，分巡僉憲鄭佐，守陳能小焉，曰新城，廣二百九十丈，小門二，水關二。

縣治署 西爲典史廨，有《縣尉題名記》，真文忠爲趙龐夫作。

儒學 宋在縣治西，慶曆間改治南東隅。紹興十一年徙璠山。乾道九年，令石磐重修。文公爲記：「蓋烹聞君臣、父子、兄弟、夫婦、朋友之倫，所爲民彝也。惟其氣質之稟，不能一於純秀之會，是以欲動情勝，或陷溺而不自知。先聖王爲是立學校以教其民。而其爲教，則始於灑掃、應對、進退之間，禮樂、射御、書數之際，使之恭敬，朝夕修其孝弟忠信而無違，然後從而教之格物致知，以盡其道，使知所以自身及家，自家及國而達之天下者，蓋無二理。其匡直輔翼漸漬，必使天下之人皆有以不失其性，不亂其倫而後已。此二帝三王之盛，所以化行俗美、黎民淳厚，非後世所能及也。自漢以來千有餘歲，學校之政與時盛衰。其所爲教者，類皆不知出此。至於所以勸勉懲督之者，又多不得其方，甚至或使之重失其性，益亂其倫而不悟，不亦可悲也哉！我宋文治應期，學校之官遍郡縣，其制度詳密，規模宏遠，蓋超軼漢唐而巍巍乎唐虞三代之隆矣。而有司無仲山甫將明之材，不能祇承德意若稽治古，使學校之所爲教，卓然有以遠

過於近代。儒先君子或遺恨焉。石君乃獨能學古之學，推之以行於今，使其學者惟知修身窮理以成其性，厚其倫之爲事，而視世俗之學所以干時取寵者有所不屑，則石君數教作人，可書之夫者也。」又爲明倫堂、崇德、廣業、居仁、由義四齋銘。其明倫堂銘曰：「天叙有典，匪學弗明。我作此堂，大猷是經。匪忠曷勸？匪孝曷陳？咨爾舉子，永觀厥成。」崇德銘：「尊我德性，希聖學兮；玩心神明，蛻污濁兮。」廣業銘：「樂節禮樂，道中庸兮；克勤小物，奏膚公兮。」居仁銘：「勝己之私，復天理兮；宅此廣居，純不已兮。」由義銘：「羞惡爾汝，勉擴克兮；遵彼大路，行無窮兮。」皇朝正德、嘉靖中益拓大。萬曆二十六年，令張陽春徙於宋璠山之舊址，學在璠山，署廨在舊學。

預備倉四 濟田倉一

稅課司 高才坂巡檢司 河泊所

陰陽學 惠民藥局 醫學 僧會司 道會司 養濟院

總舖 馬坪舖 丹溪舖 大蓋舖 鳩源舖 羅源舖 涪頭舖 芋溪舖

上司行署三 丹陽公館

社稷壇 風雲雷雨山川壇 邑厲壇 鄉厲壇

城隍廟

韋齋祠，文公祠，俱南溪書院。

趙公祠，祀宋武節郎趙師橧。宋知縣施漬記：「淳祐甲辰，漬被命知尤溪縣，去趙公死事之秋十五年矣。縣西門有廟一區，僅庇風雨。父老謂予：『公諱師橧，家淮右，客游於閩。紹定庚寅，寇越汀邵，鄉貴

潘郎、丞景伯持憲節守高郵，知公勇於義，力薦於臺閫，繡使王公夢龍乃擇勁健卒數百人，號報國軍，俾統之。來成，紀律嚴整，軍士無譁，邑人恃無恐。及移軍拏洋，糾集士兵萬餘人，結以恩義，軍聲大振。於時將、沙二縣爲寇蹂躪，獨不敢闖此境者，以公屯兵在焉。會寇犯永春、德化，取道縣南鄙，歸志甚銳。公提兵屯處村渡，將據險而扼其歸。居無何，遽檄戍向縣。賊遂涉江剽掠鄉井。公聞憤怒，夜馳七十里請朝，遇賊林嶺下，轉戰田中，馬陷於淖，猶手刃數十級。士兵失期，衆寡不敵，乃大呼曰：「天乎！吾之報國止於此矣！」遂歿焉。嘉熙初元，都承旨王公埜上其事，贈武節郎，官一子，賜忠愍廟額。今幾年矣，無有顯揚。『潰聞而悲之，遂與劍浦贊府楊貴恩同請於郡守右史黃公自然，爲大書匾額，一新廟宇，給田，書籍附登南溪書院，委司計主之，庶忠愍香火與書院相久長焉。』

盧公祠，祀閩將軍盧瑋。宋知縣石磐記：「予承乏尤溪，適時和年豐，居多暇日，因講求闕遺而修舉之。有盧府君祠，詰其所以於耆老，皆惻不能對，府君裔號，亦莫詳也。一日，有發故篋得其行狀一通來者，紙敝字漫，僅而可識，而後知府君蓋張巡許遠之流，血食茲土，豈徒然哉？府君諱珙，世閩人，王氏建國，避地尤溪。保大四年，王氏兄弟相攻，國大亂。南唐查文徽拔其建、汀、漳、泉四州，而置建州於延平津，以陳誨爲御史，又取其尤溪隸劍州。尤溪故有成卒禦山寇，至是以府君爲守將。王氏亡，李仁達據閩，陳覺諭以歸南唐，不從，將討之。仁達緝知尤溪成卒已調發無備，使陳匡弼襲尤溪。府君拒之於東郊水亭，戰甚力，邑人得奔竄不死。府君兵敗，乃曰：『吾受人邑，爲之守邑，不守何用生？』大呼前，爲匡弼將劉掉刀所殺。翌日，建州援至，無及矣。邑人相與葬府君於杉嶺。府君五子，四子從戰俱歿。季子幼，棄草中，隣媼收育，訪其母歸。南唐下詔褒美，授季總管，復其家，而卽水亭建祠焉。水亭地卑，神降言於巫：『當祀我縣西北爽塏地。』邑人異而遷之。今

祀是也。嗚呼！死非難，處死難。較府君之功，於巡、遠雖殊，然殺身成仁之心，見危授命之節，非可大小論也。惟其所立，適徧方下邑，是以風聲氣烈不克振耀。雖府君初心之所不計，顧邑被府君之賜至厚。未久遽忘，行狀之幅紙不存，予亦無自知也，乃刻石以記。而命有司自今來歲以春秋有事祠下，且爲之歌以侑神，曰：「潔齋造兮君之居，紛坐跪兮薦肴蔬。坎吹簫兮擊鼓，望風馬兮雲車。君之來兮何許？旣宴娛兮仁且武。垂慶惠兮弗無牟，俾我民兮長無災苦。」忠顯祠，宋端平中建，祀宋烈士余望。望，邑人也，紹興中寇葉亮犯境，望率鄉兵禦之，歿於陣。民立祠祀之。紹定間，顯靈禦寇。賜廟額曰忠顯。皇朝洪武六年，命有司題其主曰宋烈士余公之神，列在祀典。周希聖祠，祀先賢周誥。皇朝功惠祠，祀知府陳能。張公祠，祀知縣張陽春。戴公祠，祀知縣戴朝恩，以有守城功。

社學五

順昌縣 縣置自南唐，以其初順服，名曰順昌。皇朝正德元年始爲城門五：曰東安，曰西寧，曰南平，曰北定，曰通津；又小水門四，以便汲。周圍延袤八百八十三丈。

縣治署

儒學

際昌倉一 預備倉四

仁壽稅課司 仁壽巡檢司

雙峰驛 富屯驛

陰陽學 醫學 僧會司 道會司 養濟院

總舖 城南舖 郭開舖 石溪舖 桂嶺舖 陳坂舖 杜源舖 婁杉舖 高沙舖 吉舟舖 石湖舖

順溪舖 白石舖 富屯舖 太平舖 仁和舖 富實舖

上司行署五

社稷壇 風雲雷雨山川壇 邑厲壇

城隍廟

二賢祠 祀廖高峰、槎溪二先生。

社學二

永安縣 皇朝景泰四年始置縣，周圍五里三十二步，門四：東曰德化，西曰清流，南曰通津，北曰延平。

縣治署

儒學

預備倉四 浮流倉一

稅課司 安砂巡檢司 湖口巡檢司

陰陽學 醫學 僧會司 道會司 養濟院

總舖 黃坊舖 貢川舖 張關舖 新嶺舖

上司行署三 貢川公館 忠山公館

社稷壇 風雲雷雨山川壇

城隍廟

先賢祠，祀楊、羅、李、朱四先生。

栢欄祠，祀宋鄧肅公，是爲鄧公讀書故處。

社學四

〔校記〕

〔一〕「延平府 南平縣 將樂縣 大田縣 沙縣 尤溪縣 順昌縣 永安縣」二十三字，各本原脫，據本書體例補。

〔二〕「十有二年」，當作「十有二月」。

閩書卷之三十六

建置志

汀州府 長汀縣 寧化縣 上杭縣 武平縣 清流縣 連城縣 歸化縣 永定縣(二)

汀州府 汀，水名也。《爾雅》曰：「水際平地爲汀。」《說文》曰：「水際平沙爲汀。」汀水自北發源，至州治而東，遂南流入海。是天下之水皆東，惟汀獨南。南，丁位也，以「水」合「丁」爲文。又未郡之前，有長汀村，其間水際多平地若沙，以「汀」名郡，取諸此矣。長汀村，唐時州治在焉，在上杭縣七十五里，今名「舊州」；後又遷東坊口，去今州治五里，亦名「舊州」。大曆四年，刺史陳劍移築卧龍山陽，西北輦山，東瀕河，南據山麓，則今治也。宋治平三年，郡守劉均被旨增廣，周五千二百五十四步，濬三河，西引南拔溪水，東以繞之，作六門：正東曰濟川，正西曰秋成，南曰頒條，北曰鄴江，東南曰通遠，東北曰興賢。皇朝洪武四年，衛指揮、同知王洼塞頒條門，改濟川爲麗春，秋成爲通津，鄴江爲廣儲，通遠爲鎮南，興賢爲朝天，周裹磚石。嘉靖五年，守邵有道益鑿廣之，東引龍坡水，西引拔陂水，舛互灌注以會南河，於是汀城益固。

府治署

儒學

稅課司

預備倉 學倉

陰陽學 醫學 僧綱司 道紀司

察院

布政司 漳南道

城隍廟

社稷壇 風雲雷雨山川壇 郡厲壇

文丞相祠 張知郡祠，祀宋郡守張昌。 鄭知郡祠，祀宋郡守鄭強。

陳劉參錄祠，祀宋通判陳吉

老、子陳希造、錄事參軍劉師尹。 忠愛祠，祀皇朝本府推官王仁。

社學

汀州衛指揮使司 鎮撫司 左、右、中、前、後五千戶所

旗纛廟

長汀縣

縣治署

儒學

預備倉 學倉

古城寨巡檢司 去縣西四十里，王延政城此以備江南兵，故名古城。宋時，峒寇起，守會僚佐議守城，司戶趙希銷言「宜扼古城」，此處也。

臨汀驛 館前驛 三洲驛 養濟院

總舖 百步舖 南田舖 新橋舖 鴛鴦舖 大息舖 胡坑舖 歸仁舖 七良舖 畫眉舖 黃館舖
南段舖 何田舖 三洲舖 大田舖 水口舖 車田舖 長橋舖 畚心舖 張屋舖 牛嶺舖 九嶺舖
古貴舖

里社壇 鄉厲壇

社學

寧化縣 在古黃連鎮西竹篠窩，後唐同光二年所遷，正北負山，三面臨溪。縣舊名黃連，亦曰寧陽。城周迴二百八十步，設四門：東曰連岡，西曰通贛，南曰道愛，北曰朝宗。宋端平間，令趙時銷修築展拓，改連岡爲迎春，通贛爲通聖，道愛爲端平，朝宗爲朝天，上東門曰寶陽。寶祐二年，圯於水。開慶元年，令林公玉以磚砌北門，架木其上，使民得避水焉。皇朝正統，兩中沙、尤、贛寇，垣墉摧頽。正德五年，令周楹請築土城。九年，邑民雷文琳等狀言「甃磚已久」，令何鑑以聞，下兩臺，使郡丞唐淳與鑑共成之。袤八百一十二丈有奇。

縣治署

儒學

預備倉四 際留倉

安遠寨巡檢司

陰陽學 醫學 僧會司 道會司

石牛驛 養濟院

縣前舖 魚龍舖 黃源舖 丘源舖 安樂舖 楊梅舖 黃地舖 黃栢舖 夏坊舖 石牛舖 碑嶺

舖 羅溪舖 滑石舖 張地舖 下沙舖 沙坪舖 楊家舖 寨前舖 大覺舖 栢坑舖

上司行署

社稷壇 風雪雷雨山川壇 邑厲壇 里社壇 鄉厲壇

城隍廟

社學

上杭縣 故唐龍巖地，晉之新羅也。大曆四年，刺史陳劍析龍巖、胡雷、下保，置上杭場，今永定縣豐田里也。南唐李景保大十三年，徙場執梓保，今太平里也。宋淳化五年，升場爲縣，至道二年，徙鰲沙，今白沙里也。咸平二年，徙語口市，今在城里也。天聖五年，徙鍾寮場，今平安里也。乾道三年，令鄭福奏遷來蘇里之郭坊，則今治是。其城，端平元年令趙時越創築，周迴百六十步，可容二百戶，激水爲濠，然覆以茅竹，尋燬。淳祐六年，令趙希誦縮之，復圯於水。寶祐二年，令潘景丑址石甃瓦覆之。元至正間頽

圮，攝縣事鄭從吉拓舊址復築，周迴五百一十五丈，高二丈，爲門七，各樓其上。復圮。皇朝洪武十八年，來蘇鍾子仁作亂，令鄧致中修築，甫畢而賊至，民賴有憑依。歲久復圮。正統十四年，破於沙尤寇。景泰三年，令黃希禮奏請復築，以六年肇工。成化二年，巡按朱賢命令胡鉞斥大之，繼而按巡涂棐委成本府同知程熙、通判吳桓、邑民郭明德、唐紀等佐工，至成化八年，工就，蓋前後二十餘年。周千四百二十四丈六尺，基廣二丈。南臨大溪，砌以石，高三丈有奇。東、西、北并砌磚，高減於南三分之一。濠廣二丈，深半爲之。門七：東曰昭陽，西曰通駟，南曰通濟，北曰迎恩，上南曰興文，中南曰陽明，下南曰太平。

縣治署

儒學

預備倉 際留倉

陰陽學 醫學 僧會司 道會司

平西驛 藍屋驛 養濟院

縣前館 大礮館 巖頭鋪 捲籠鋪 山湖鋪 九華鋪 藍屋鋪 官莊鋪 迴龍鋪 坊村鋪 定塔

鋪 張慶鋪 九大鋪 茶田鋪 雙溪鋪 燈籠鋪 湯邊鋪 石銘鋪

漳南道 皇朝洪武中，設福寧、建寧二道歲輪按察司，官二員，分巡閩中八郡。時汀屬建寧，漳屬福

寧。二道盡處與廣東、江西相接，山林深阻，輜軒罕至，民用跳越武斷，甚者作不靖。成化六年，增漳南一道以蒞汀、漳，然猶未專設。久之，土之獷惡私糾結作商賈，人江西、廣東行劫，歸卽潛處山谷，無誰何者。又久之，聚至千餘，攻城劫庫，殺人斂財。兩省臣以聞，特命選按察司僉事居住上杭，專事弭賊，不時

巡歷，兼理詞訟，江、廣鄰近郡邑，衛所悉聽鈐轄。

社稷壇 風雲雷雨山川壇 邑厲壇 里社壇 鄉厲壇

城隍壇

褒忠祠 祀皇朝巡按御史伍驥、都指揮僉事丁泉。成化中賜額。

社學

上杭守禦千戶所

武平縣 汀巖邑也。其名縣，以地夷而人武。縣治前有南安溪，亦曰平川。舊爲武平場，在武漢源，卽今千戶所；宋淳化移場爲縣，今治也。城周二里八十步，分三門：東曰永平，南曰南安，西曰人和，使相張魏公浚下令創築。端平間，令趙汝譚重修治。後圯。皇朝成化間，令李俊築土城。弘治十四年，同知黃冕、知縣陸忠、典史韓寅磚之，闢四門：東曰迎春，南曰南平，西曰秋成，北曰北高；又水門二。

縣治署

儒學 舊在縣治東興賢坊。宋乾道間，令唐廷堅初建養士院。其後屢有改作。元大德癸卯，令李寔新之。教諭薛瀛士請學府教授某爲記，其文可觀也。記曰：「汀距皇都八千里，屬邑武平又遠城三百里，是爲八閩絕底，與東廣西江壤地犬牙，岡重嶺複。林深谷竊，江煙疊露從而被之，帶劍剽奪之盜又出沒之，偷生其間者，朝不慮夕，奚暇禮義？自昔衣冠絃誦，百無一二。宋元以來，叛亂者倚爲兔穴，兵燹薦至，煙村荆圯，於是益寥寥。大德癸卯，古汴李寔伯英來宰，愴然曰：『十邑之室，必有忠信。轉風移俗，

在我而已。』乃以和平之心，行勞來之政，一年而卧者枕，二年耕者廩，三年而墟社之會者讓而後飲。伯英曰：『可知方矣。』乃捐俸鳩工，葺先聖先賢廟貌及從祀像位，自奧至階至門，煥聳具瞻。又創爲明倫堂，廣敞高爽，繚以垣牆，使教諭薛瀛士日與生徒講討仁經義傳於其間。山戴所家，鹿豕所隣，爭遺子弟以來受業，上堂喁，下堂俞，長此不輟，鄉魯可化也。瀛士來請曰：『郡博盍記之？』武平，巖邑也，殘毀未幾，文興若此，夫子有知，當爲莞笑。僕來臨汀，所見六邑之宰，惟連城質夫、武平李伯英不污儒術，著續鄉庠。每欲記質夫之事而未能，併見於此，以勸來者。』皇朝令豐城袁旻更新之，跋記文後，曰：『按縣志，淳化五年易鎮爲縣，學校未聞也。元大德癸卯，邑令李伯英始立學校，時教諭薛瀛士請郡博士文記之，而文獻方有考。我朝聲教漸被，武平僻西閩絕域，山廣人稀，民俗尚武，迨今遺風猶存。而伯英不復作矣，學校中廢，禮殿、廡門、講堂、齋舍歷百餘年傾圮不稱。天順己卯冬，旻令是邑，撤舊新之，慨抑李伯英之舊績不污儒術，探嗜郡博士之記，文簡而直質，而明誠足倡斯文，啟後學，於是令工勒諸碑石，以垂不朽，庶斯文不終泯楮筆間。』成化甲午，令徐端改遷縣治西。

際留倉

象洞寨巡檢司 永平寨巡檢司

醫學 僧會司 道會司 養濟院

縣前舖 三角舖 中田舖 賴屋舖 黃栢舖 黃寮舖 袁畚舖 皂角舖 悅羊舖 武安舖 陳

坑舖 大灣舖

上司行署

社稷壇 風雲雷雨山川壇 邑厲壇 里社壇 鄉厲壇

城隍廟

社學

武平千戶所 在縣治西順平里武溪之原。

旗纛廟

清流縣 縣清流如環也。在晉清流驛。宋元符元年，提刑王祖道行部，憩驛亭，愛其山川之美，奏

「長汀、寧化壤地曠遠，請撤置縣，以驛名」。其時僅有子城，周一百丈，立四門。紹興間，寇攘，無險可恃，邑人鄭思誠鳩流散，興版築。歲久湮沒，故址僅存。元末紅巾之亂，村落互相攻奪，寧化曹柳順乘隙來寇，邑人陳有定起義破之，遂因山南之險，壘石爲城，增修四門通道守之。皇朝沿河官城故址皆爲民居，惟南門城樓猶存。天順中令吳中、正德中令林湜，署縣通判戴旦先後修治焉。

縣治署

儒學

稅課司，正統二年革。

際留倉 預備倉四

鐵石巡檢司

陰陽學 醫學 僧會司 道會司

玉華驛 養濟院

縣前舖 雷公舖 小嵩舖 吳地舖 嵩溪舖 玉華舖 太平舖 子孫舖 吳家舖 暖水舖

社稷壇 風雲雷雨山川壇 邑厲壇 里社壇 鄉厲壇

城隍廟

社學

連城縣 本蓮城也，以有蓮花潭名。其城宋紹興間令丘欽若草創。乾道中，楊仲立名三門，東曰朝

京，西曰騰驤，南曰龍川。歲久復隳。端平間，寇亂，令米巨宏復築。淳祐間，令應東修併作甕城，以羅天
鱗作寇，城池復毀。令王城吉重築之，以亂起草寇，去草從連，名連城矣。其後遭紅寇表景攻陷，民竄城
毀。國初止存甕城四。正德四年，流賊竊發，令蔣璣築土城捍之。邑人知府童璽爲郎時，疏請作堅城
焉。九年，僉事胡璉募富民用磚瓦分城之，璽亦捐貲爲倡。十四年，僉事周期雍命承黃鍾岳壘石爲址，甃
磚爲垣，城遂堅。其後先後有修治。

縣治署

儒學

稅課司

預備倉 際留倉 賑濟倉 新設預備倉

北團寨巡檢司

陰陽學 醫學 僧會司 道會司 養濟院

縣前舖 北安舖 分水舖 新橋舖 南柴舖

上司行署

社稷壇 風雲雷雨山川壇 邑厲壇 鄉厲壇

城隍廟

社學

歸化縣 皇朝正德九年始爲城門，東曰東樂，西曰西清，南曰南安，北曰北泰，令楊緒所造也。嘉靖

三十九年，山寇越城，被圍數旬，令章宗實築月城、月池以禦之。

縣治署

儒學

預備倉 際留倉

夏陽巡檢司

陰陽學 僧會司 道會司

明溪驛 養濟院

縣前舖 新興舖 永安舖 興善舖 龍湖舖 鐵嶺舖

上司行署

社稷壇 風雲雷雨山川壇 邑厲壇

城隍廟

社學

永定縣 謂疇昔草寇竊發，今永定也。皇朝弘治七年，築城門四：東曰太平，西曰迎恩，南曰興化，北曰得勝。

縣治署

儒學

際留倉

興化巡檢司 太平巡檢司 三層嶺巡檢司

陰陽學 醫學 僧會司

平西驛

市西鋪 德化鋪 信感鋪 新村鋪 大溪鋪 月流鋪 白沙鋪 箭灘鋪 胡雷鋪 龍窟鋪

上司行署

社稷壇 風雲雷雨山川壇 邑厲壇 里社壇 鄉厲壇

城隍廟

社學

興化府 莆田縣 仙游縣 興化故縣〔三〕

興化府 城池古在游洋，今平海衛也。宋太平興國八年始移治莆田。治軍段鵬經始之，內築子城，外築土垣，茅覆而已。宣和三年，更以磚甃，周七里有奇，引北澗水爲濠，與西南塹合，今小西湖及兼濟河是也。門樓五：東曰望海，西曰肅清，南曰望仙，北曰望京，東北口寧真。紹定間，盜起，居民驚潰，郡人陳宓倡議壯之。久之，泉人曾用虎知軍事，始大成城。郡人劉克莊記：「是城也，崇表加舊，表裡砌石，覆之以磚，五門樓堞，丹雘煥然。憑高望之，鉅麗突兀，疑化人之爲，宛畫史之摹。」元時兵亂，城陷者再。皇朝洪武三年，衛指揮李春復加繕治。二十年，指揮程昇以隘不足實軍士，奏闢之，乃越舊濠，跨烏石山東下，歷前埭、後埭，與舊城合，延袤一十一里，周二千八百三十丈，廢寧真爲門四：改南樓曰迎仙，北樓曰拱辰，東建水關門以通舟，西水關欄以石盾，僅容水人而已。城外壕，左起東北隅，折而南，引壽溪水注之；右起西北隅，折而東，引木蘭溪水注之；西北負山，則鑿爲旱壕。成化七年，巡撫、都御史張瑄命守潘琴重修。嘉靖三十七年，倭寇薄城下，既去，分守參政萬衣增腰牆，砌垛子，稍闊之。四十一年冬，倭寇大集，城陷。知府易道談新至，急城其東、北、南三面，力不給，郡人御史林潤奏乞帑金二萬佐之。四十三年，提督軍門譚綸、總兵戚繼光城其西面，而更壯其三面。隆慶中，分守陰武卿重新東、北二門樓，改東門曰鎮海，西曰永清，南曰迎和，北仍拱辰。乃城西北隅舊包山腰之半，賊可據高而闕，莆城二陷，皆從此人。萬曆九年，守羅通霄垣人之。

府治署 宋時在今興化府署，僕射陳靖故宅也。靖遜其地以爲軍治，自移居橄欖巷，今陳宅是也。

皇朝以其地立衛所，徙莆田縣署於善俗坊，而以縣治建府署。

儒學 在郡治東。宋太平興國間始置興化軍，踰三十年學宮未建。莆人方儀爲書生，捐所居室建本軍廟學，率里人陳詡等出貲構殿，塑繪先聖先賢像。首崇之事未就，貲已竭。會真宗咸平元年有詔立軍學，時儀貢藝京師，伏闕乞公錢完廟。朝廷嘉之，詔給帑錢三十萬，命官主其事，三年始成。是年儀登第，復與弟能、侄慎言奏請賜地於廟後，增建三禮堂與步廊崇閣。六年而學成，制度大備，凡冠冕、袞佩、几宸、車輅、旂旛、弓兵、戈戟、笙磬、琴瑟、鐘鼓、拊鼓、鼎釜、匕洗、劍甄、彝壺之狀，與夫明堂、廟社、壇坎，悉考制度而模於其堂。仙游尉段全作廟碑，系之詞曰：「儀也，無位而謀，其始志弗克，終以告天子，鄉人翼翼，惟學是職，變蠻爲魯，寔儀之力。」紹興十九年，教授徐士龍請於使者鮑延祖，得官錢千三百萬改作軍學，東廟西學，廟前有崇閣，以秘御書畫，（三）後有廣堂，以繪《三禮》名物，中庭礪石瀦水，準諸侯泮宮之度。廟東偏設縣學，附以廩藏庖廐，爲屋凡四百八十間，復推其餘爲教官治舍，非特制度宏偉冠一時，而規畫有經。郡人考功員外郎黃公度爲記。嘉熙二年，知軍張友重修。郡人正字王邁爲記。國初，詔天下立學校。知府蓋天麟奉制重修。其後屢有修建。嘉靖季，燬於倭。郡人御史林潤奏乞帑銀下，知府易道談重建，悉復其舊。

上里監場稅課司

大有倉 平海倉 預備倉

陰陽學 醫學 僧綱司 道紀司

府前舖

上司行署四

社稷壇 風雲雷雨山川壇 郡屬壇

城隍廟

名宦祠 鄉賢祠 合志祠，在學廟門外東，祀宋著作方儀、元值學林槐應、戴有功。儀以倡建學，槐應以葺學宮、復學田。有功無考。 林公祠，在學廟門外，祀都御史林潤，以其請帑修學并賑恤遺民，郡人感而祀之。

游擊府 萬曆十九年建。

興化衛指揮使司 左、右、中、前、後五千戶所，兵馬司四所。 軍器局

旗纛廟

莆田縣 縣名莆田，以舊茭蒲之地，去蒲從莆，防水患也。陳光大二年，置縣於延陵里，即今右廂。

其地據高不與他室等夷。宋慶曆五年四月，秘書丞張緯宰縣，剷平之，得方石五尺，文無刻痕，墨跡可見，其辭曰：「石敢當，鎮百鬼，壓災殃，官吏福，百姓康，風教盛，禮樂張。唐大曆五年四月十日縣令鄭押字記。」石瘞於曆，而出於曆，年月無異，人嘆爲奇。宋時，縣治有無名木，木二十七根，上附一幹，樛曲如虬龍，福帥王達名之曰嘉木。後人以「嘉木」名縣圖。國初即地爲府署，知縣任益徙左廂，爲今所。

儒學 唐時隸泉州。宋教授徐士龍改作軍學，以縣學附於大成殿東偏。元至順二年徙建爲今學，故縣治也。宋薛簡肅奎宰邑時，鑿池名夢草。後奎人爲參政，邑人名其池曰薛公。今爲泮池矣。池有花並

蒂，則狀元出。皇朝林環、柯潛皆應其瑞。

莆禧倉 社倉

迎仙寨巡檢司 冲沁寨巡檢司 嵌頭寨巡檢司 吉了寨巡檢司 青山寨巡檢司 大洋寨巡檢司

莆陽驛 養濟院

魏塘舖 涵頭舖 余埔舖 江口舖 雙牌舖 瀨溪舖 猴溪舖 俞潭舖 塘頭舖 朴摸舖 大杭

舖 東林舖 鄭欖舖

崎頭城堡

涵江書院，在莆田縣東北二十里。唐貞元、太和間，先聖四十一世孫孔仲良令莆，因家焉。歲久，子孫齒編民矣。宋紹興乙亥，朱文公過莆，視其家所藏唐告身七通，及家謨世譜，與元豐校本龔封家譜皆合，其時則爲四十九世孫宜，乃告守臣傳自得，令兵鐸更其版籍，爲立戶。淳祐中，知軍楊棟同、涵江鎮官鄭雄飛作書院并夫子廟，仍給田供祀事及官廩費。景定八年，知軍徐直諒請額，理宗御書「涵江書院」四大字賜之，字甚端雅。元至大中，以五十三世孫敬山充涵江書院山長，而叢孫克萬世襲其職。皇朝罷山長，書院如故。萬曆中，令代擇子孫之賢者一人，隸名黌校，主守租祭。水南書院，在郡城東南二十里黃石紅泉宮舊址。宋林光朝講學於此。故祠也，祀觀察裴次元、御史蔡禧。皇朝正德中燬，督學姚鏌改爲書院，中建聖廟，後爲講堂，儀門之外仍祀裴、蔡二公，右祀公朝焉。奚公柯，祀皇朝嘉靖間攝守延平府同知奚世亮死於陷城之難者，配縣丞葉時蘭、縣學訓導盧堯佐，皆以與難。忠勇祠四：一在南門內，祀興化衛千戶白仁。一在驛前街，祀興化衛千戶魯師亮。二在平海衛，祀本衛千戶丘珍、葉巨卿。以勦

倭陣亡者。

忠孝祠：忠祠，祀唐林刺史蘊、宋方通判喜、阮少尹駿、林主客冲之、宋知縣旅、陳招撫粹，

皇朝陳給事中繼之、陳徽州太守彥回。孝祠，祀唐林福唐尉攢、宋郭參軍義重、元郭承務郎道卿、郭教授

廷煒、皇朝陳御史茂烈、劉訓導閔方、舉人重杰。四賢祠，祀宋陳俊卿、蔡襄、林光朝、龔茂良。二忠

祠，祀宋陳文龍、陳瓚叔侄。二烈祠，祀皇朝給事中陳繼之、徽州守陳彥回。林俊記：「常久之則，貞爲

正也。死則誰免？斯達者所視無畏，而況自信之深者耶！二公自信之深者也。」世忠祠，祀宋寶謨學士

方信儒、福清丞适、太廟齋郎、編修軫、廣州通判喜、大中大夫庭實、忠惠、尚書大琮、皇朝尚書謚簡肅良

永、而以東廣大學士謚文襄獻夫皆方裔，併祀焉。忠勳祠，祀宋尚書陳仁璧及子僕射靖。忠惠祠，祀

端明殿學士蔡襄。皇朝尚書謚惠安彭韶祠。尚書謚貞肅林俊祠。旌表孝廉御史陳茂烈祠。大理寺丞

贈少卿黃鞏祠。理學名臣黃仲昭祠。尚書謚端簡林雲同祠。尚書謚襄靖郭應聘祠。常州府通判吳紳祠

仙游縣

舊在大飛山南五里，後又遷於南三十步許。宋紹興十五年，令陳致一始築城禦山寇，寇退

隨止。乾道中，令趙公綱建四門：東曰九仙，以九仙山名；西曰甘澤，以禱雨九座山名；南曰流慶，以水

流羅漢墩名；北曰橫翔，以大飛山名。皇朝正德元年，寇擾界中，邑人尚書鄭紀議於御史韓廉，築土城，

尋圯。八年，知縣范珪砌以磚，亡何亦壞。嘉靖二年，知縣蕭弘魯更用石砌，環以敵臺二十有八。居七

年，城始成，周迴一千九十五丈，高丈二尺六寸，改東門曰寶曦，西曰愛晚，南曰迎薰，北曰拱極。

縣治署

儒學 舊在縣西，宋咸平五年，令段全遷建於縣南。前爲壁，塑像先聖逮四科賢人，後爲堂，左右爲

廊，以繪畫林放至秦冉、伯憲孤等圖。適莆田容梁象者，晉人也，傳七十子於先廟，衣冠容質、動止俯仰渾全雅莊，於舊制尤爲特備，至是悉得其用。全自爲記。四方郡國孔廟規制及之者希矣。乾道中，令趙公綱重修，作講堂曰尊道。米芾書額。

際留倉 預備倉 南倉 義倉

白嶺巡檢司

陰陽學 醫學 僧會司 道會司

楓亭驛 養濟院

縣前總鋪 石馬鋪 長嶺鋪 沙溪鋪 楓亭鋪

上司行署

社稷壇 風雲雷雨山川壇 邑厲壇 鄉厲壇

城隍廟

宋張都統祠，祀都統張淵。紹興十五年，江廣兵民爲亂，始白潮、梅踐汀、漳，侵軼溫陵、仙溪之境。淵時以密州觀察使奉詔統禁旅三千討定之。令陳致一爲立祠。 皇朝壯烈祠，祀邑人魏昇、昇子瑞周，而林德泰、翁汝達、郭懷志、雷法英附焉。昇字大臨，名家子也。家故饒，父廣淵以千金聽其結客，學擊劍、馳槊、蹶張、投礮之技，矜鬪樂戰，所自負也。弘治辛亥，漳寇數百人謀越仙游寇涵江，昇受兵往扼之，寇憚不敢迫其後。庚午，寇復薄城，昇登城免胄示之，賊遙識昇皆去。昇獨與所善十數人躡之，斬首甚多。正德丁丑，流寇屯安溪，昇諜知，報邑爲備，帥所署卒待之桃源。寇紆道薄城，昇挾瑞周并所部林德

泰等十餘人，持劍盾步返護城。寇覘其少，蹙之地西半里山下。昇橫槊犯陣，手自擊殺數十人，而瑞周與德泰等並死之。昇被十餘創，猶轉鬬益疾，賊愕視披靡遁。昇復追北數十里，歸，以創重伏床，呼殺不絕，逾十日死。守馮馴爲立壯烈祠。其後，嘉靖二年，寇擾江口諸村，典史蘇寧鎔部鄉夫張舜、林尚寶皆力戰死，亦配祀。恤勞祠，祀邑人劉君芳。君芳素武勇，嘉靖癸亥冬，倭賊推呂公車薄城，矢石橫發，一賊酋已登堞大呼，君芳奮刀斫墜數賊，賊稍却。隨爲流矢所中，死。都御史塗澤民建祠祀之。

興化故縣 在興泰里萬山中。宋太平興國間，林居裔爲不軌，僭號西平王，知莆邑事黃禹錫起兵，從轉運使楊克讓討之。四年，詔以游洋、百丈二鎮置太平軍，尋改爲興化縣，開軍治於此。八年，因楊克讓請，移軍治於莆田之□□元年，（四）邑令移治廣業里，以就坦夷。國初，令謝昇仍舊址。正統十三年，邑民以生齒瘡痍，虎兇縱橫，奏請革之，詔可。於是以長樂、武化二鄉之六里屬莆，西北鄉之三里屬仙。

平海衛城 在府東九十里莆田縣武盛里界，地名南嘯，皇朝洪武二十年江夏侯周德興所築。

衛署

儒學 正統七年建。

左、右、中、前、後五千戶所。 莆禧千戶所，在府東八十里。 軍器局

衛前舖 莆禧所前舖

城隍廟 旗纛廟 莆禧城隍廟 莆禧旗纛廟

邵武府 邵武縣 光澤縣 泰寧縣 建寧縣（五）

邵武府 閩越王無諸游畋之區也，三里溪北，北平山之上。下舊有烏坂城，蕭子開《建安記》云：「越

王築六城以拒漢，烏坂其一也。」宋太平興國四年，置邵武軍治，築土城於紫雲溪南，西跨熙春山，周一十里，有奇，闕門七。東、西城之上，有望江樓二，相望十餘尋，簷牙三重，俗名三滴水樓。建炎後，兩遭兵燬。紹定中，守趙以夫、倅王埜因舊高之。元初，盡隳江南地壁。至正十二年，盜據其區，總管吳按灘不花復之。十九年，總管魏劉家奴壘壁爲城，縮東而里許，爲門四：東曰行春，西曰鎮安，南曰武寧，北曰樵溪。二十四年，總管常璫更築之。皇朝仍舊，加修濬焉。以後修濬不一。成化十二年，守馮孜上言：「本府城池，東北臨大溪，西南穿小溪，東則三水合流而去，惟西面密邇熙春小山。宋時，城郭東、南、北三面俱臨溪，西側跨熙春，遇水泛漲，人可趨山避之。元人建城，不跨熙春，城濠南北與大溪相接，水泛漲，溪人於濠，濠灌於城。皇朝永樂丙申，水泛城頽，官私漂蕩，軍民男女淪沒以萬計。抑熙春山去城不過百五十步，脫有賊寇生發憑據，則城內虛實皆瞭。宋時包在城中，良亦有以。今若不如宋舊，不惟水至莫避，亦非因險之固。」事下工部，如議。以後役重歲歉，不果。

府治署 在城西隅。始建自宋初知軍張度。紹興中，守汪安止重建，有胡文定記。紹定中，守王遂、趙以夫相繼建，有劉克莊記。以後修建不一。皇朝洪武初，守周時中一新之。成化中，守馮孜作同仁堂，記曰：「邵武郡治後堂，舊匾『同心』。成化庚寅，予以治延弗續，黜更邵武，始登斯堂，榱桷腐朽剝落，不可憇，乃稍因舊葺之，更名曰同仁。或問何居？予曰：『同心於至誠愛民，可也；同心於欺世盜名，可乎？同心於直道事人，可也；同心於周容爲度，可乎？同心於堯、舜、禹、湯、文、武之王道，可也；同心於齊桓、晉文、秦穆、宋襄之霸術，可乎？故心乎至誠愛民則仁矣，心乎欺世盜名則不仁矣。心乎直道事人

則仁矣，心乎周容爲度則不仁矣。心乎王道則仁矣，心乎霸術則不仁矣。仁，人心也，同仁則同心。君子亦仁而已。同仁之義，蓋取諸此。」

儒學 本府治南，樵溪五曲之上。明倫堂西，舊有石刻周子《太極圖》。東齋有東坡《雪堂圖》，圖甚工，東陽周懋跋。西齋有《連昌宮詞》，書亦古雅，郡人黃永存跋。皇朝嘉靖十一年，學使潘潢刻宋、陸講義、洞規學則四章，列於堂東西，而各爲之跋。而先是，成化中，學使游明閱射射圃，語諸生曰：「鄉射之制，撫州有吳與弼先生能明其義數，蓋往質諸授？」庠生甯堅、崔中以幣往而受學焉。

常豐倉 稅課司

陰陽學 醫學 僧綱司 道紀司

府前舖

武平道

上司行署二

社稷壇 風雲雷雨山川壇 郡厲壇

城隍廟

朱文公祠 李忠定祠 宋淳熙中教授徐元德創於軍學講堂之東，朱文公爲記：「建炎丞相隴西李公，邵武人也。少有大志，自爲小官，卽切切然以天下事爲己憂。宣和初，一日大水猝至，幾冒都城，人莫能究其所自來，而無有敢以爲言者。公時適爲左史，以爲此夷狄兵戎之象也，不可不戒，亟上疏言之，遂以謫去。數歲乃得召還，則虜騎已人塞，長驅向闕矣。公復慨然圖上內禪之策，誠意感通，言未及發而大計

已決。虜圍既逼，群小方謀挾至尊犯不測爲幸免計，公獨叩殿陛力陳大義，得復城守以退虜兵。然自是以來，割地講和之議起，公又再謫，而大事去矣。光堯太上皇帝受命中原，疇咨人望，首召公爲宰相。公亦痛念國家非常之變，日夜圖回，所以修政事，攘夷狄者，本末甚備。蓋方誅僭逆以正人心，而遣張所撫河北，傅亮收河東，宗澤守京城，遂得益據形便，大明紀律，以示必守中原，必還兩京之勢。而小人有害公者，遂三謫以去，不復還矣。淳熙丙午，距公去相適六十年，永嘉徐君元德命教此邦，謂公之忠義籌略，海內有志之士莫不傳誦，顧其鄉人子弟，乃無有能道其萬一而興起焉者，於是闢堂之東，肖公像而立祠焉，四月吉日，合郡吏率諸生進拜跪奠安侑如法。已事，以書來屬熹記之。熹惟天下之義，莫大如君臣，而所以纏綿固結而不可解者，是皆生於人心之本，然非有待於外也。然而世衰俗薄，學廢不講，則雖其中心之所固有，亦且淪胥陷溺，而爲全軀保妻子之計以後其君者，往往接跡。有能奮然拔起其間，如李公之爲人，知有君父，不知有身，知天下之有安危，而不知其身之有禍福，雖以讒間竄斥，屢瀕九死，而其愛君憂國之志終有不可得而奪者，是亦可謂一世之偉人矣。徐君之祠之也，非其志之所好、學之所講有在於是，則亦孰能及之哉？故熹喜聞其事，而樂推其說，以告郡之學者。皇朝正統四年，守徐述復建於府學大成殿東。成化二年，教授張濟乞賜祭，制可。歐陽太守祠，祀隋泉守歐陽祐。祐，見泉州太守。黃簡肅祠，在四曲溪西，祀宋郡人黃中。謝修撰祠，祀宋郡獻謝師稷。劉文簡祠，在府治東隅，祀建陽劉燾，以其葬於郡之桂林山。呂侍郎祠，祀宋建陽呂祉，以其葬於郡之積善山。胡將軍祠，在城東隅，祀宋殿前司裨將胡斌。斌，潮州人，紹定間從童德興討汀寇，德興盡銳而進，留弱卒不滿五百人，屬斌守郡。俄寇大至，斌奮身迎戰，賊解去，尋復益兵四集，斌率殘兵死戰，大呼曰：「我死救百姓！」手揮雙刀，殺賊

甚衆，血凝兩肘，雙刀折，復擊以鐵鞭，至蓮塘前遇害，執鞭僵立，數日始仆。郡人賴其拒戰獲奔逸者萬計。賊退，民爲殮葬，卽地祠之。淳祐中，知軍王埜狀事於朝，賜廟額曰忠勇。忠勇廟，祀宋吳楚材。

楚材名炎，以字行，建昌南城人。德祐元年，建昌降元。明年春，楚材還鄉領村，糾集民兵。時江西制置使萬石走邵武縣，遂繇邵武守黎靖德請於萬石，乞濟師。萬石不許，而授楚材迪功郎、權制置司計議官以安之，且戒勿興兵。楚材不聽，二月己亥，自領村率衆攻城，鉦鼓震動，甫至近郊之龜湖，元兵三道蹙之，奪其長梯鐵鉤，因返攻領村。拒以木棚，元兵不得入。事聞益王元帥府，承制還楚材宣議郎、帶行太社令、知建昌軍，俾聚軍圖再舉。萬石匿其命。楚材既失利且乏援，元兵誘降，其衆多解去。楚材走光澤，爲人所執，及其子應登以獻。卽遣錄事婁南良訊之，曰：「汝何錯舉？」楚材抗聲曰：「不錯，不錯！如府錄所爲，乃大錯耳！府錄受宋官爵，今爲敵用，還思身上綠袍自何而得？吾一鄙儒，特激忠義，爲國出力，事雖不成，正不錯也。」南良愧塞。及吳浚爲江西制置招討使，斬楚材父子，傳首諸邑。益王立於福州，聞而哀之，贈官朝奉郎，立廟郡境上，賜額「忠勇」。

邵武衛指揮使司 鎮撫司 左、右、中、前、後五千戶所，舊志：「我朝武臣世世承襲，而衛所則其聽事之署也。是則前之有位於斯者，公祖也；後之有位於斯者，子孫也。以子孫而履父祖之位，食朝廷之祿，能不動忠孝之思乎？旣動忠孝之思，則所以紹父祖之烈而報朝廷之恩者，不能已矣。《小宛》之詩曰：『夙興夜寐，無忝爾所生。』敢誦以勵有位之孝。《蒸民》之詩曰：『夙夜匪懈，以事一人。』敢誦以勵有位之忠。」言殊懇至也。

旗幟廟

邵武縣

縣治署

儒學 在縣治南二百步，九龍觀故址也。舊學在府治西北，卽宋邵武軍學，地接熙春之脉，秀水出焉。學庭有瑞榴一株。宋熙寧二年，樹梢結雙實，差大，旁枝亦結雙實，共一十有四。是歲，及第登第果十四人。因作瑞榴軒於明倫堂東。皇朝學仍宋舊。洪武八年，令水甦民加葺治焉。學西有地被侵，成化四年，訓導葉楨、梁文請於學憲劉子肅，守盛願復之，請記於修撰羅倫。倫爲記：「惟天生民有欲，惟先王時又時，惟我民罔不生生各有寧宇，矧惟有學。其有越我疆王跡熄伯圖起，乃遺棄我先王典，不時式。越在南服，有縣邵武，學圯以廢，盜於戎豪。訓導葉君、梁君曰：『時可已。』謂諸生曰：『爾惟考志，詢諸黃髮，用告有位。』乃謀邑宰，乃復郡侯，乃咨憲臣，布令豪乃歸侵，東八筵修，縮廣二；西五筵修，盈廣二，乃構堂五楹，公食於所，居徙於舍，舍三倍之。創始丁亥，落成戊子。二君咨余記乃成績。余曰：『子來！惟祖宗受天明命，以綏萬邦，惟茲庠序，惟堯舜禹湯文武成康遺典具在，惟爾職典於學，惟爾有俊在茲。學人官，昔予攸聞，惟稷惟契惟伊惟周，惟學乃成；矧今天下富者、貴者、彊有力者罔有定志，惟奪乃饜，士無恒家，農無恒產，萬民罔攸生在下。惟我皇帝恭默思治，惟爾有俊登於良弼，在帝左右，惟先正舊典，時式而時措之，天下可均，民惟永寧。不然，一畝之官不能庇，而有如治天下何？惟乃圖之。』今學在九龍觀故址，則嘉靖二十年所遷也。按觀起唐時，舊名白鳩，中有池。貞觀間，池中九龍見，以名觀。宋嘉祐辛丑，靈蛇見於觀九龍堂，鱗甲備五色，夜半雷電交作，化飛以去。又郡城俱衍壤，惟觀及邵武縣有二活

石，觀石隱隱地中，衛石出地三尺，上有宋篆十二字。俗名觀石爲龍頭，衛石爲龍尾。諸生愛此二瑞，故請於上官，以學官易之。觀中鐘樓今尚在啟聖祠。東樓肇建自漢，郭璞鉗記，號卓金鎗，禁鐘懸焉。元至大元年，本路管軍千戶高佑、提點王明遠重構之，雕甍畫棟，突兀霄漢，若非人力。文廟之祭，舊從於府，訓導周流芳、何欽請於守夏英、令姜桂，以次丁日行釋菜禮，毋使空存廟位。守、令如其言。

預備倉

水口巡檢司

河泊所 楊枋稅課司 拿口稅課司

樵川水馬驛 林墩馬驛 拿口水馬驛 養濟院

銅青鋪 新屯鋪 官墩鋪 拿口鋪 黃溪鋪 王坊鋪 王堂鋪 泗溪鋪 官源鋪 丁字鋪 梅裡

鋪 頌春鋪 藥村鋪 漢口鋪 龍鬬鋪 破石鋪 大乾鋪 城南鋪 香林鋪 山口鋪 山心鋪 邢家

鋪 河源鋪

劉縣令祠 祀宋令劉純。純，見建陽縉紳。

光澤縣 舊有戰城，建廢無考。今在杭川南，後唐財演鎮地也。宋太平興國四年，陞鎮爲縣，卽地爲治城，周垣依民居。皇朝洪武十九年，令林孔孫建門三：東曰朝宗，西曰宣德。

縣治署 中有瑞竹亭。宋元祐初，上官均以直諫謫幸茲邑，有竹生庭，一株四幹十八節。元至元二十四年，朱萬初由館閣出宰，其竹復生，因構亭曰瑞竹，繪圖刻石。

儒學 在縣治東南，南向。皇朝成化五年，改東向，臨鳳沼、鷄山，後據貴峰、天馬，左右龍山、筆峰，以爲勝處。弘治元年，令劉俊謂宜南向，復之，而學門西向。正德十二年，令鍾華作新之，仍改學門南向，自爲記。記末：「學成，華進諸生而告之曰：『前此，宋季李西山得道南之緒，大倡宗旨，濱老守約，公晦諸君子父子祖孫並游考亭。繩繩道學，我朝掇科登仕亦趾美。邇年階計，弗克嗣紹，況望如前輩之卓犖者邪？委之命運，華恐未然。然今之學，掇文取青紫而已，前輩異是。華願賢輩篤志力行焉。』先哲云：爲學須是痛切懇惻，如居燒屋之下，如坐漏船之中，如項羽救趙，沉缸破釜，持三日糧，示無返志，然後有得於己。賢輩之志，之力於斯否？平誦法聖賢，修之身，行之家，淑人兼善窮達不變平塞，斯亦賢輩內事。天生我，學校教我，朝廷望我，豈徒然哉？修學匪艱，懋學惟艱，維勉旃無斁。」又作遺愛祠於樞星門左，自爲記：「祠名遺愛，表賢令也。胡爲於學？一則以夫子門牆之下，未易直脚；一則以師儒輿論攸萃，難苟容身，非真有功德表表於民者，何足居此？光澤故賢令祠學宮者，在宋有尹公師魯、上官公彥衡，在元有況公肩吾。古所謂『循良與祠』，故附大成門之左，隘且陋，華卜地樞星門左而大之。既成，庠生吳文璣進告於華曰：『我朝邑令可追三公，其惟劉君佐乎！』遂請當道並祀。嗚呼！詢師儒之輿論而僉同，則立夫子之門牆而無愧矣。後來登謁斯祠者，盍思諸公所以得祀於是者？如之何率其政？是亦諸公之政率其化，是亦諸公之民是在我矣。」

際留倉 預備倉

大寺寨巡檢司 稅課司

河泊所

陰陽學 醫學 僧會司 道會司

杭川驛 杉關驛 養濟院

縣前總舖 直阜舖 通津舖 石岐舖 高田舖 黃溪舖 長山舖 官山舖 止馬舖 杉關舖

上司行署

社稷壇 風雲雷雨山川壇 邑厲壇

城隍廟

小學

泰寧縣 在鑪峰左、杉溪之陽，古爲歸化縣。宋元祐元年，詔改今名。葉祖洽《改縣記》：「泰寧，當五代隸南唐，處深山窮谷間，有山林魚稻之樂，人自足用，無所外求，故獨處一方，若隱居者，當天下並爭於干戈，無所與也。其民既安閑，則力本自贍。及天下定於一，戶口日益富饒，至今爲閩大邑，民戶二萬，所出賦萬緡。郡城四縣，惟泰寧爲最僻，不與四方之商賈交，故習俗淳厚。山川之氣特爲奇秀，故爲士者質美而明。方國初時，海內得離戰爭之苦，俗尚淳朴，雖有質美無以發明。及太平既久，朝廷尚文，以《書》、《詩》、《禮》、《樂》潤飾治具，天下之士皆染濯淬勵，以文章自奮，若草蟲鳴而阜螽躍，神龍興而慶雲翔。跨河南北，薄岱東西，水經江淮，陸窮閩蜀，家家自以爲屈，宋，人人自以爲鄒、枚，身起筆墨致位卿相者時時有之。泰寧以遠方僻邑，與之並驅於英俊之域，相與後前曾不少屈，一何壯也！彼其地接中都，文物至盛，熏於耳目而得於心，其多文士不足怪也。以僻邑而與之爭雄，苟非質美特立，能若是乎？今其縣

北屋連牆，絃誦相聞，有不談《詩》、《書》者，輿臺笑之。況其父兄故以名薦於天子而爵列王庭者，相繼不絕，可爲盛矣。而其縣尚仍五代之餘，名曰歸化，誠有負於茲土。元豐八年，予適在職方，掌天下圖籍，惜其名之不正。會朝廷遣右郎中張汝賢使閩中，因之以告張君，上其事朝廷，易其名曰泰寧。泰寧者，闕里之府號也。泰之爲言，賢者以類進而志通乎上之時也，夫然後寧。豈朝廷善其有特立之志，遂賜嘉名以寵獎乎？邑之士子亦宜勉思而上副也。」縣無城，周垣民居爲治。縣中有樂野宮，閩王游獵之所也，今爲人居。水南有高平谷，亦無諸畋獵之罔。

縣治署

儒學 宋慶元間，令趙時館建於縣西鱸峰之陽。皇朝嘉靖二年，守潘旦以科第久乏，屬令戴呬卜遷於薦蕪塢。莆林俊記：「泰寧之學，宋趙令所建，迄元逮今，風氣消縮，人文未副。有司者常之常，故廢。邵守潘侯既修邵三學，邵丞武以泰寧廢告。侯往觀，曰：『獨廢，然哉！鱸峰非學所也。』偕戴尹卑循而西，得薦蕪一址，岡夷水環，秀峰連疊，則皆曰：『是爲吾道者留，夷之鬼焉得當？當之，夫子也。夷之類焉得居？居之，夫子徒也。』以請於大巡督學，皆曰：『可。』既成，以書幣來請記。予老歸良憊，新宮有作，抑欲爲來賢告也。不易者道，必易者數。君子曰：『道在我也。』求之師友，已第二義，又況昏惰意氣，自安寡陋，以冀靈山川偶值之數，計之左也。探性命之原，罔《詩》、《書》之群，深造自得，以主張國是維繫民極，步諸子而不畔於夫子，斯來賢事，亦遷學者至意也。若其不然，彼縉者流且將曰：『是果外形骸，以理自勝，如吾大顛，謹潔不私，學博才敏，如吾慧禮，何崇彼而抑此爲來賢？』商所以對，抑師者責焉是。」其地迫近叢塚厲窟，師生弗康。十五年，諸生言狀於御史白賁，以屬守王鈞，令許士經，相度其宜，乃遷天王

爲今學。

際留倉 預備倉四

稅課司

河泊所

陰陽學 醫學 僧會司 道會司 養濟院

縣前總鋪 山夾鋪 宜坑鋪 朱口鋪 石鼻鋪 交溪鋪 龍湖鋪 游源鋪 白土鋪 長灘鋪 梅

口鋪 挽舟鋪

上司行署

社稷壇 風雲雷雨山川壇 邑厲壇

城隍廟

建寧縣 在鳳山之東、灘江之北。唐爲綏城縣，去今縣在西南三里。乾符二年分爲黃連鎮。南唐中

興三年，陞爲縣，遷治今所。宋咸淳二年，令宋秉孫始城之，闢門四；東曰朝天，南曰迎薰，西曰慶豐，北曰拱辰。作小門二：東南曰小南，東北曰小北。皇朝弘治四年，令馬昇拓建之，名東曰朝陽，餘三門仍舊，東之北曰順濟，南之東曰通津。正德十二年，令周必復加繕崇之，仍名朝陽曰朝天。

縣治署 宋前後令吳播、趙紡夫、林珙具有建置。景定中，尉胡雲龍有《尉廳記》：「名氏云乎哉，皇甫湜曰：『本以志善俊惡也。』予始至，長官林大博語予曰：『尉廳舊多賢尉，抑地勝與時？』謂其知賢而

未知其所以賢者。一三三年間，出入田陌，卽柴翁稼叟訪古今，遠不能以告，粗以三數十年耳目所濡染者談說。若趙公繹夫嚴明愛民，陳公王度剛介嫉吏，熊公源、張公榮國、洪公天驥皆課士以文章，人心已甚德之。乃若紹定己丑，鄭寇作難，汀邵爲墟，身社稷人民寄者且望風去，余公炳獨奮不顧身，直欲蓬蒿而斬艾之，雖不足支，而尚足繫六卿遺黎之望，以待王師。」頃假令杉陽見壁，亦記：「余名杉之。遺老談當時寇事，尤感慨泰寧再造，余之力也。於戲！其凜凜節義，殆顏平原之亞歟！洪公振龍以『安靜』名堂，有記，以『直方』題軒，亦有記。蒐其文，知其心也。嘗力請寬一分敷監事，觸時諱弗顧；邑欲賄貸，一體寔辟，事雖喻，意弗從；田里所到，雞犬無聲，雖供饋彝禮，一錢之直弗受。於戲！其爲摻行卓卓，抑元魯山儔與！數公者，民到於今稱之。而今而後，雖百世之下猶將聞之，可不必記。不必記而余必記，匪媚己也，亦匪媚人，庶幾乎目有所觸，心有所做也。」皇朝洪武二年，令程思道繕完元時之舊燬。正統中，燬且圯。天順二年，簿丁暹重建。

儒學 宋初天聖中，令葛祐建縣治西。嘉祐中，令李山甫徙建縣治南，爲今所，前臨大溪，西引長川，小澗委蛇曲折，最爲山林佳處。晉江陳讓嘉靖志曰：「愚次邵陽學校，未嘗不廢書而嘆曰：『甚哉！士之惑也！不求諸身，而惓惓堪輿氣數之說，屢議改遷。』嘗謁夫子之宮，樵川三繞其南，蓋低回觀之不能去云。縣學據九龍之勝，光澤學對文峰，泰寧學近改天王寺，建寧稱山水佳處矣。士惑未已也。此與商賈易肆之見何異？夫不有明德新民止至善乎？明德旣明，祿在其中矣。」

際留倉 預備倉 義倉

西安巡檢司 稅課司

河泊所

陰陽學 醫學 僧會司 道會司 養濟院

縣前總舖 分水舖 源口舖 表莊舖 楓演舖 官橋舖 都境舖 綏來舖

上司行署四

社稷壇 風雲雷雨山川壇 邑厲壇

城隍廟

彰勇祠 祀死事巡檢許綺，附義士陳順、甯宗佩。

社學二十一所

〔校記〕

〔一〕「汀州府 長汀縣 寧化縣 上杭縣 武平縣 清流縣 連城縣 歸化縣 永定縣」二十七字，各本原脫，據本書體例補。

〔二〕「興化府 莆田縣 仙游縣 興化故縣」十三字，各本原脫，據本書體例補。

〔三〕「以秘御書書」，疑作「以秘御書畫」或「以秘御書」。

〔四〕「移軍治於莆田之」至「元年」間，各本均闕二字。

〔五〕「邵武府 邵武縣 光澤縣 泰寧縣 建寧縣」十五字，各本原脫，據本書體例補。

閩書卷之三十七

建置志

漳州府 龍溪縣 漳浦縣 龍巖縣 南靖縣 長泰縣 漳平縣 平和縣 詔安縣 海澄縣 寧

洋縣

鎮海衛指揮使司衛、陸鰲千戶所、玄鐘千戶所、銅山守禦千戶所附（二）

漳州府 水以「漳」名，取其清濁雜而有文章也。唐陳元光父政守戍泉、潮，開屯梁山盤陀嶺之陰，嶺水匯浦，政謂其似北地清漳。及元光請於朝置漳浦縣，在今縣之雲霄鎮，而其後徙治龍溪，爲漳州矣。元光《請建州縣表》：「泉潮守戍、左玉鈐衛翊府左郎將臣言：元光伏承永淳二年八月一日制，臣進階正議大夫、嶺南行軍總管者，受命戰兢，抵官彌懼。臣以冲幼出自書生，迨及童年，濫膺首選，未及下戈，無能區處；幸賴先臣緒業，叨蒙今日國恩，寄深都閫，任事專徑。爰從視職以來，不敢少有寧處。況茲鎮地極七閩，境連百粵，左衽居堆髻之半，可耕乃火田之餘。原始要終，流移本出於二州；窮凶極暴，積弊遂踰於十稔。元惡既誅，餘兇復起，法隨出而奸隨生，功愈勞而效愈寡，撫綏未易，子育誠難。竊惟兵革徒威於外，禮讓乃格其心。揆茲陋俗，良繇職方久廢，學校不興，所事者蒐狩爲生，所習者暴橫爲尚。誅之不可勝誅，徙之難以遽徙。倘欲生全，幾致刑措，其本在創州縣，其要在興庠序。蓋倫理講則風俗自爾漸

孚，治法彰則民心自知感激。切以臣鎮地田安衍，誠爲治教之邦；江臨漳水，實乃建治之本。如蒙定名號而復入職方，建治所而注頒官吏，循往古之良規，誠救時之急務，胡越一家，愈無罅隙；畿荒一德，更有何殊？臣謬居外鎮，忝在封疆，所奏事宜，伏候勅旨。」味光斯表，漳俗勁悍所繇來也。其城，宋時築土城，周四里，爲門六：東曰名第，曰清漳，西曰登仙，曰朝真，南曰雲霄，北曰慶豐。咸平二年，濠之。祥符六年，守王冕加浚西濠，鑿水門西南隅，接潮汐，通舟楫，更列棘爲外城，周十五里。紹興間，守張成大撤面大其三面，獨南一面阻溪。而冕所浚濠在城內矣。嘉定四年，守趙汝謫砌東門以石，高十級，長五百餘丈。紹定三年，倖林有宗復砌西、南、北三面，長二千五百餘丈，爲級二十，其高丈七尺，并後濠焉。關門七：東曰朝天，西曰安豐，南曰通津，北曰貢珠，西北曰小關門，西南曰龍溪門，東南曰朝宗門；上建候亭二，下爲闌三。後守江模成之。元陳有定據漳，改東、西、北三面，縮之，使可以堅守，蓋東西南北但四門。更作東、西水關二。國初仍舊。其後先後有修治。萬曆三十七年，守韓擢改命南門曰三台，東門曰文昌，北門曰太初，西門曰太平。

府治署 閩中軍府之額皆用真書，獨漳州額用古篆體，故老相傳謂其字從泣從早，書法當忌，故篆以別之。皇朝潘琳始來爲守，議撤舊爲新。時僧寺饒財，鳩工克成。任役之僧曰玉海、曰月庭、曰聞極、曰明極、曰藏山。嘉靖二年，守張鵬更新。晉安鄭善夫爲記，略云：「漳人營室最艱，材自延、建至，輸轉率登於其直。茲惟始事，龍溪茶磴有靈石裂決，漲木千章來會，城下是困，崖嶠十許禠者，耆者驚怪：『自生本州，齒亂而豁未見，此天將神之以相公之營耶？』之役也，貲出於游粟，力傭於游民，神相以材，州之四民無厲者，足以知君子之政矣。」予徒漳人黃龔爲予言：「府中舊有山，太守出治堂皆登山而過，後人夷之，

風氣減昔。」

儒學 在府治東南。宋爲州學，慶曆四年建於州治巽隅，水自丁入。政和二年移州左。紹興九年，州人士以科目寥曠，請守李彌遜復慶曆故址。學成，明年壬戌，登科者五人，顏定肅公與焉。淳熙中，守趙公稠作新而廣之。儀門之上有槐三莖，生於門上之聖，莖各七葉，蒼翠經月。嗣後，擢第釋褐至十餘人。久之，郡博士延平田澹建高東溪祠於學中，請朱文公爲記。文公記：「孟子曰：『聖人，百世之師也，伯夷、柳下惠是也。』夫孟子之於二子，雖或以爲聖之清、聖之和，然又嘗病其隘與不恭，且以其道不同於孔子而不願學也。及其一旦慨然以百世歸之，而孔子反不與焉。何哉？孔子道大德中而無跡，故學之者沒身鑽仰而不足。二子志潔行高而跡著，故慕之者一旦感慨而有餘也。然則二子之功誠不爲小，而孟子之意其亦可知也已。臨漳東溪先生高公者，名登，字彥先，靖康間游太學，與陳公少陽伏闕拜疏，以誅六賊，留種、李爲請，用事者欲兵之，不爲動也。紹興初，召至政事堂，又與宰相秦檜論不合，去爲靜江府古縣令，有異政。帥守希檜意，捃其過，以屬吏，會帥亦以讒死獄，乃釋。被檄試進士潮州，使諸生論『直言不聞之可畏』，策闕浙水沚之所繇，遂投檄以歸。檜聞大怒，奪官，徙容州。公學博行高，議論慷慨，口請指畫，無非忠臣孝子之言，舍生取義之意，聞者凜然魄動神悚。其在古縣，學者已爭歸之，至是，其徒益盛。屬疾，自作埋銘，召所與游及諸生訣別，正坐拱手，奮髯張目而逝。嗚呼！是一世之人豪矣。雖其所學所行，未盡合於孔子，然志行之卓然，亦足爲賢者之清，使百世之下聞其風者，有廉頑立懦之操，則其有功於世教，豈與夫隱忍回護以濟其私，而自托於孔子之中行者同日論哉？公歿二十餘年，延平田君澹爲郡博士，始求其遺文刻之，又肖公像而奉祠之，以風勵學者。間因郡人王君遇來求爲記，屬予病，未及爲

而田君去。今太守林侯元伸至，則又與王君更以書來督。予惟高公孤高之節既如彼，而諸賢崇立之志又如此，予文之陋，不宜久以疾病爲解，強起書之。林侯試爲刻置祠壁，漳之學子，與凡四方之士往來而有事於此者，讀之果能有所感慨而興起乎哉。」紹熙中，文公來作守，創「賓賢齋」以禮耆儒，「受成齋」以訓武士。嘉定中，守趙汝諧復闢大之，前揖名第山，南通溪流，復作四先生祠。汝諧爲記：「漳舊祀郡先賢於學，其後始立周、程三先生。新安朱文公爲守，距今歲月遠矣，郡獨未祠。予至，謁學，首問諸生，大謂缺典，乃闢尊道堂之偏爲兩室，先賢居其左，三先生與公居其右。既成，將行舍菜，郡人有學於公者李廣咨、陳淳闔門不出。予物色得之，親訪其家，延請人學，使奉公祀。一子習禮朱氏舍菜之口，執事其旁，蒼髮布袍，容體肅衍，人始知公之弟子也。」皇朝相繼有修治。

廣濟倉 常平倉 儒學倉

司獄司

陰陽學 醫學 僧綱司 道紀司

丹霞驛

府前舖

察院

分守漳南道

參將府

社稷壇 風雲雷雨山川壇 郡厲壇

城隍廟

朱文公祠，本龍江書院，在郡北登高山，今芝山也。開元寺在其下。山頂有臨漳臺，文公守漳時，愛其爽闊，將闢以講學，未遂而去，屬句臺上云：「十二峰送青排闥，自天寶以飛來；五百年逃墨歸儒，跨開元之頂上。」後數年，守危積始爲之，以成文公之志。又二十餘年，守臣方來即書院建道原祠，以祀文公，配以陳淳。元郡儒黃元淵出私錢作新之，復以黃幹配，蓋元淵，幹七世孫也。幹實有後於漳矣。祠道故沿寺下曲廊進，自宋時已然。皇朝嘉靖十二年，守孫裕始別闢東出。始，裕備官大理寺，夢文公屬以遺事。既出守邵武，問邵人曰：「朱文公豈有遺跡在郡乎？」邵人曰：「亦過化之鄉也。」至郡閱之無驗。明年，改守漳，見祠穿寺廊進，心病之。而學使潘潢亦以爲非禮。其明年，闢東出，僧廬佛刹咸隔道外，而作堂祠左，曰協夢。陳北溪祠，在郡城西，祀宋儒陳淳，皇朝成化按察僉事林克賢命建。十七年，守姜諒塑像其中，提學副使周孟中記：「先生貌木訥而語期吃。初見文公，語以上達，蓋啟以高明也。再見文公，語以下學，蓋究以精微也。先生聞言即悟，鑽仰彌篤，以誠敬爲人門，以格致爲切要，徹上徹下，始終不遺。文公之門之有先生，其猶孔門之有曾氏乎？」弘治五年，郡人戶部侍郎吳原請賜額。黃勉齋祠，在登高山之麓，祀三山黃榦。其初起於勉齋七世孫元淵，奉祀於龍江書院。皇朝正德五年，提學副使楊子器爲立專祀。王東湖祠，在郡城東門外，祀郡人王遇，朱門高弟也。文信公祠，祀宋丞相文天祥，以嘗駐軍此郡。表忠祠，在郡城東門外，祀元達魯花赤迭理彌實。皇朝成化五年，副使何喬新命守王文祠而表之，而爲之記。記祀迭理彌實死事之詳，而末言：「元有天下百六十餘年，人主中國又幾百年。方其盛時，章縫之士立其朝食其祿者不知有幾。及危且亂也，或走或降，或賣國爲利，所謂許國之臣誠死

封疆以蹈忠義，惟公與余忠宣無愧焉。忠宣之死，我太祖高皇帝命立廟安慶，聖謨宏遠矣。而公死，有司不以聞，故褒贈不及。皇帝嗣位，首詔天下凡忠臣義士之墳，有司悉爲修治。茲祠之設，所以祇遵聖謨，欽若明詔也。嗟乎！人固有一死，彼走而降而賣國爲利後公而死，遠者十餘年，近者三四年，公死百餘年，凜然猶有生氣，其精爽耿耿，固將仍羽人於丹丘，從重華於縣圖者也。」陳公祠，祀皇朝教授陳思賢，侑以諸生吳性原、陳應宗、林珏、鄒君默、曾廷瑞、呂賢。嘉靖四年，學使邵銳建，自爲記：「若我文皇既靖內難，臣民惇勸惟勤，乃正大位，爰詔多方。時則漳郡教授陳思賢率其徒吳性原氏、陳應宗氏、林珏氏、鄒君默氏、曾廷瑞氏、呂賢氏，即明倫堂，爲舊君位哭臨如禮。思賢繫人京，暨六生咸以身殉。今志僅存事略，若六生者，則并其名氏亡之矣。日備乏使事，來視漳學，爰咨士庶，始發厥隱。嗚呼！微哉！文皇必不得已舉茲有衆，爲社稷也。社稷爲重，君爲輕，義則然矣。陳公顧以區區餘戀之死靡他，豈或一道耶？捐其躬，施及其徒，用陰翼道化長我王國，斯亦難能已。乃命有司相撤淫祠，祠公於正，侑以六生，用示鄉往，用箴我學師，俾牖我良士，咸底於道，用光前開，用啟後觀，用副我國家興學至意，永永無斁，則銳亦有厚幸焉。」陳布衣祠，在登高山，祀皇明陳真晟。

觀瀾書院，在十一都文山之麓，本宋邑儒蔡汝作建於平林，以教學者。後以雜民居，遷於南陂，復徙此。薌江書院，在二十四都幹林社。國初，守錢古訓創，以祀文公，配以陳淳、黃榦、邑儒劉宗道。建溪書院，在二十二都翁建社。國初，鄉人蘇廷貴建，延劉宗道教子弟於此。龍瀛義塾，守錢古訓爲鄉先生教授郭邦文立於龍駭瀛，以教學者。

威惠廟，祀唐陳元光。宋累封靈著順應昭烈廣濟王。皇朝改封昭烈侯，列之祀典。雙節廟，在城

東門外，祀元萬戶府知事闕文興及其妻王氏。至順三年，有司立揭傒斯記：「皇帝元年，江浙行省言：『漳州萬戶府知事闕文興死其君，配王氏死其夫，邦人既爲之立廟，請加褒顯，以慰邦人，爲天下後世勸。』」乃下吏部定封，太常議諡，封文興爲英毅侯，王氏爲貞烈夫人，廟曰雙節。今右司郎中范陽張侯士弘爲吏部侍郎時所力行也。新安鄭王復持張侯命請暴其事於麗牲之石。闕文興，不知何許人，王氏，金陵民家，至元十三年從萬戶賈將軍戍漳。十七年八月望，劇賊陳弔眼夜率衆之亂，殺招討傅全及其一家，官軍死者十八九。闕文興戰死。其配王氏有美色，爲賊所執，逼欲污之，給曰：「我不幸至此，豈敢愛身？願收葬吾夫，然後惟命。」賊義而許之。得其夫亂屍中，置積薪火之，遂自躍火中併燒死。十八年，府始上其事連帥及部，使者以達行省。又九年，行省始聞於朝，下禮部議。部請訪王氏族里，旌其門閭，收卹其宗親，乃以其事付史館。事下江浙，求之六年，無所得，乃用漳守言，表其故營曰烈女之坊，然無及文興者。又二十有一年，士民言之不已，以有今請。於戲！一人之死，卓卓如此，猶歷五十有四年始獲五鼎之封、雙節之錫，且必待張侯贊之；人之伏巖藪、沉下寮，砥石礪操欲聞於天下，亦難矣。況數十年之間，有司之請，朝廷之議，皆爲王氏而止王氏，信莫及矣，闕文興詎可少哉？天下綰符仗節，擁萬夫之衆、鎮千里之地者不知其幾，一旦四方有急，天子之命未及於境，閉閣稱疾有矣，委衆而逃有矣。當是時，變起倉卒，使闕文興第守簿書期會之常，負妻子踰垣避，人孰得議之？而蒙凶威，蹈白刃，奮不顧死無悔者，何耶？禍亂逼於前而忠義激於內也。至於王氏，決死生於俄頃，不辱其身，烈丈夫弗逮矣。君子曰：『人皆死於危。』二人獨死於安，以皆有苟免之道而不爲也。傅全闔門死難，有司之請，朝廷之議皆不及者，武臣死事，國有常典云。其詞曰：世道升降，視綱與常，綱常弗紊，國於吉昌。屹屹闕侯，夙佐戎幕，匪矛伊戟，

而簿書攸托。婉婉王姬，來嬪於闕，夙興夜寐，惟警戒是監。元有南土，爰鎮於漳，閩山巖巖，以海爲疆。謂國旣平，謂威德旣加，弗備而內生蘖芽，盜夜斫營，侯亦戰死，王姬不辱，入火如水。五十四年，民請弗卻，廟有新號，而封有新爵。載念厥初，風教未立，三綱如此，命胡不集？惟侯克齊，而家而婦，克配爾德。生雖不融，歿有遺則，民心孔懷，廟食孔宜。式著刻辭，爲臣妾之規。」

漳州衛指揮使司 鎮撫司 左、右、中、前、後五千戶所 軍器局

旗纛廟

龍溪縣 龍溪，舊以江上有九龍遊戲，故名。予徒黃巖者言：「城外陳州灣詩：『浦水屈如龍文』，非謂九龍也。」兩存之。

縣治署

儒學

預備倉 儒學倉 社倉二十所

香州稅課局 今革。

柳營江巡檢司

江東馬驛 是江之上有江東橋，最壯，亦名虎渡。宋嘉定中守莊夏所治。址石而梁木。嘉熙初，守李韶全石之。其長三千尺，址高百尺，灑水一十五道，梁跨於址者五十有八，長八十尺，廣博皆六尺有奇。守黃朴爲記：「閩中支海之橋，填淵跨壑，雄偉宏壯，孰若清源之萬安？以此較彼，殆似過之。」

赤嶺鋪 鶴鳴鋪 馬岐鋪 江東鋪 石井鋪 管橋鋪 龍江鋪 橡林鋪 木綿鋪，宋爲木綿庵，鄭虎臣殺賈似道處也。宋所名爲「庵」者，當時置傳，路遠驛疎，寄宿無所，有司酌道里中，隨鋪立庵，會僧主之，予以贍田，以待過客。於是漳南十有三庵，木綿其一云。德祐初，貶賈似道高州團練副使，安置循州。福王與芮素怨似道，募有能殺之者送之貶所。會稽尉、福安人鄭虎臣，父爲似道所配，欣然請行，福王遣爲監押。似道寓建寧之開元寺，則已屏去其侍妾數十人，奪其寶玉，撤轎蓋，暴行秋日中，令舁轎夫唱杭州歌謠之，每名斥似道，窘辱備至。一日，至古寺，壁有吳潛南行題字，虎臣曰：「吳丞相何以至此？」似道慚不能對。舟次南劍黯溪灘，虎臣曰：「水清甚，曷不死此？」至木綿庵，諷令自殺。遲回間，虎臣奮曰：「吾爲天下殺此老賊，卽死何憾！」遂拉殺之。又有云似道爲相，有術者言平章不利姓鄭人，因此每朝士鄭姓者多困阨之；虎臣登科，亦被似道竄貶矣。至是得爲監押而竟死其手。元人湯益詩：「檀板敲殘月上花，過牆荆棘刺簷牙，指麾已失鐵如意，賜予寧存玉辟邪？破屋春歸無主燕，廢池雨產在官蛙。木綿庵外尤愁絕，月黑夜深聞鬼車。」有和之者云：「榮華富貴等浮花，膂力難勝國爪牙。漢世但知光擁立，唐朝誰識杞奸邪？綺羅化作春風蝶，絃管翻成夜雨蛙。縱有青漳人去也，碧天難挽紫雲車。」皇朝李東陽樂府曰：「多寶閣中歡不足，木綿庵前親鬼哭。裂膚拉脇安足論，天下蒼生已無肉。君王不誅監押誅，父讎國憤一時摠。監押死，死不滅，元城使者空嘔血。」馬平鋪 甘棠鋪 溪口鋪 樂仁鋪

江東公館 甘棠公館

漳浦縣 自宋令薛世清立三門，西曰應龍，北曰永豐，南一門未名也。令高稷建東門，曰東溪，改永

豐曰拱辰，獨南尚缺。淳祐初，令趙汝清建四門樓，未成也。元達魯花赤買撒都剌始城之，豎樓，浚濠，西北倚山爲深塹。皇明正德五年，令胥文相重建北門樓，改題曰朝天。七年，令劉桐增卑而高。嘉靖中，令周仲繼有修建，令劉欽命復增垣築鋪，爲月城千百有九十八丈。令龍雨復創敵樓一十六座，南北郭外中達各爲高樓，名南曰鎮南，北曰仰北。

縣治署

儒學

預備倉 儒學倉 社倉

古雷巡檢司 井尾巡檢司 後葛巡檢司 盤陀巡檢司 青山巡檢司

臨漳馬驛 雲霄驛

陰陽學 醫學 僧會司 道會司 養濟院

縣前鋪 羅山鋪 盤石鋪 長林鋪 三古鋪 梅林鋪 無象鋪，宋時爲無象庵。昔是地猛象出沒害人，永福黃定爲潮守，過庵，以「無象」匾之，點畫不著人字。餘見方域盤陀嶺下。盤陀鋪 黃堵鋪 徑石鋪 雲霄鋪 鐵塘鋪 雲頭鋪 昇仙鋪 東山鋪 峰山鋪 青山鋪 西湖鋪 梅月鋪 石鼓鋪 鴻江鋪 長嶺鋪

上司行署三 盤陀公館 赤湖公館

社稷壇 風雲雷雨山川壇 邑厲壇 鄉厲壇

城隍廟

鴻江書院 在縣東十七都，國初鄉人陳彝則建以授徒。

朱文公祠，皇朝同安林希元記銘：「維昔紫陽，昔牧爾漳，教在我民，冠婚祭喪，家儀人師，奚啻六經子史，衣被而爲章。」高東溪祠，祀宋邑人高登。忠勇祠，在八都盤陀嶺埔。皇朝嘉靖四十三年，參將戚繼光追倭至無象舖，與戰，大捷。時官兵傷死者八十餘人，繼光與巡海道周賢立祠祀。隆慶五年，復將從徵曾一本、陣亡指揮朱璣及王世賓、戴守、陳文標、劉大有等并祀於此。

龍巖縣 古新羅也。在唐爲汀州治。《輿地紀勝》：「造治之初，凡斫大樹千餘。其樹皆山都所居，有三種，居其下者曰『猪都』，居其中者『人都』，居其高者『鳥都』。卽如人形而卑小，男子婦人自爲配偶。猪都，皆身如猪。鳥都，人首，能人言，聞其聲不見其形。人都或時見形。當伐木時，有術者周元太能禹步爲厲術，以左合赤索，圍木而斫之，樹仆，剖其中，三都皆不能化，執而煮之。」固奇聞也。新羅縣，今爲此縣矣。城初編竹爲限，後易以土牆。宋紹定三年，令趙性夫作西砦避寇，令官砦是也。淳祐己酉，令趙崇揆營以石。元至元間，令黃士龍卽砦麓築土城，縣治乃在城東，寇至輒燬。至正丁酉，令趙昱築上下二城。辛丑，達魯花赤鎖柱間聯而一之，鑿濠爲護。甲辰，令高璉以西逼山，拓大之。皇朝洪武八年，令劉文或重加修濬，爲門六：東曰寅賓，西曰西成，南曰南門，曰南津，北曰北門，曰北關，城南關水門，各建樓其上。正統間，鄧茂七亂，官民居皆燬。成化中，先後都御史滕昭、張瑄委令韋濟、伍星奎先後成之，爲門五，各以其方，西北曰永寧。其後南城爲水所齧，令湯相隄捍之，名東門曰賓陽，西曰迎薰，南曰留暉，北曰拱極。寇至，相復增垣廣濠焉。

縣治署

儒學 朱文公《改創學記》：「龍巖縣學，皇祐初置，其後遷徙不常，遂以廢壞，蓋三十餘年。而丞李君永始復營建，逼代去，不克就。溫陵曾君秘來嗣其職，乃因其緒而成之，凡爲屋四百楹，殿堂門廡，師生之舍，無一不具。淳熙九年二月丁未，既率其諸生以奠菜於先聖先師，而以書來求記，且曰：『碩有教焉。』予聞龍巖爲縣斗僻，介於兩越之間，俗固窮陋。其爲士者，雖或負聰明樸茂之姿，而莫有開之以聖賢之學，自其爲縣以來，今數百年，未聞有以道義功烈顯於時者。豈材不足哉？殆爲吏者未有以興起之也。二君相繼貳令於此，乃能以興學化民爲己任，志既美矣。而曾君又嘗從吾友石、許諸君游，是所必能誦所聞以先後之者。此邑之士，其庶幾乎？乃爲書其本末，而因其告諸生曰：『夫所謂聖賢之學者，非真有難知難能之事也。孝弟忠信禮義廉耻以修其身，而求師取友誦《詩》讀《書》以窮事物之理而已。是二端者，豈二三子之所不知不能哉？特怵逼於俯仰衣食之資而不暇顧，誘奪於場屋雕篆之習而不及爲耳。夫狗區區目前近小之利而忘其所貴，於己固已悖矣，況其狗又未必果可求也。一二子循己事而觀之，則曷若慨然反是心以求之，而一用其力於吾之所謂乎？使吾孝弟忠信禮義廉耻之行日篤，而身無不修也；求師取友誦《詩》讀《書》之趣日深，而理無不窮也，則自身而家，自家而國，以達於天下，將無所處而不當，固不必求於道義功烈之顯於時，而根深末茂實大聲宏將有自然不可掩者矣。』曾君蓋亦嘗爲二三子言之乎？其益以吾言相聒勉焉。而《書》所謂『教學半者』，又曾君所宜深念也。』

際留倉 預備倉 儒學倉

鴈石巡檢司

陰陽學 醫學 僧會司 道會司

適中驛

縣前總舖 登途舖 崎瀨舖 馬坑舖 三井舖 石羅舖 鼓樓舖 南墩舖 板寮舖 鐵石洋舖
皐林舖 東山舖 小吉舖 霍村舖 隘嶺舖 上巷舖 半庵舖 龍潭舖 上寨舖 傅坑舖 新嶺舖
牛欄隔舖 滿山舖 溪西舖 九曲嶺舖

上司行署三 上坪公館 火池公館 馬坑公館 鎮平公館 鴈石公館

社稷壇 風雲雷雨山川壇 邑厲壇 鄉厲壇

城隍廟

龍巖書院 祀朱文公。

朱文公祠，在南門外。

表忠祠，在縣西西湖，祀宋左翼軍統領崔亮。亮，熙州人，從高宗渡江，領兵
戍漳州，以討賊戰沒。紹興中賜額。文丞相祠，以丞相駐師於此縣。有《文文山駐師故壘碑》。正學
祠，在縣治西，祀布衣陳真晟。

社學十六所 王氏義學，在留暉門外。皇朝邑人王源建。

龍巖中守禦千戶所，在縣內。軍器局

旗纛廟

南靖縣(二) 舊城，本元至正十六年尹韓景晦初築以土，西南瀕雙溪，東北濬城壕。皇朝因之。嘉靖

八年，令傅銓石之。其四門：東曰迎恩，西曰豐泰，南曰豐濟，北曰望闕。嘉靖季有饒寇之變，令林挺春徙之大帽之麓，民不適其居。萬曆二十三年，令陳宗愈移還元故址，爲今城門，東曰惠德，南曰保極，西曰和義，北曰提福。

縣治署

儒學

學倉

永豐巡檢司

陰陽學 醫學 僧會司 道會司

平南驛

縣前鋪 寶林鋪 中坪鋪 新店鋪 湧口鋪 金山鋪 湯坑鋪 斗米鋪 和溪鋪 吳方鋪 員沙

鋪

上司行署三

社稷壇 風雲雷雨山川壇 邑厲壇 鄉厲壇

城隍廟

社學十九所

長泰縣 城舊惟土牆。宋端平中，令鄭師申增築，爲四門：東曰武勝，西曰順成，南曰登科，北曰良

岡。元至正間，簿陳文積廣之。皇朝砌以石，建樓櫓，鑿濠。正德中，令朱絃拓大之。嘉靖中，令蕭廷宣高焉，改名四門：東曰賓陽，西曰旺金，南曰迎薰，北曰閱武，西南門外爲通濟，接武二石橋。以後具有修治。

縣治署

儒學 宋令趙與坦《修學記》：「學在內而不外，古也；外而不內，非古也。人是學者盍思？夫若至闕里，若觀孔牆，屬耳而聞金聲玉振，潛心而得性與天道。退而思之，爲顏爲曾者何人？爲伋爲軻者何人？必家焉而親其親，官焉而民其民，國焉而君其君，塞則淑身，亨則淑世，如吾漳高東溪、顏定肅聲，名節慨耿耿天地間。是則建學之意，亦予邑宰所願望也。」

際留倉 儒學倉

溪口巡檢司

僧會司 道會司

縣前舖 武安舖 渡頭舖

上司行署二 南津公館 流岡公館

社稷壇 風雲雷雨山川壇 邑厲壇 鄉厲壇

城隍廟

泰亨書院 皇朝教諭章參建，中祀朱文公，以高東溪、陳北溪配。

社學三十三所

漳平縣 在九龍溪北，初無城。弘治辛亥，賊溫文進亂，柵而守之。正德九年，令徐鳳岐城之，門四：東曰迎恩，南曰朝陽，西曰偃武，北曰拱辰。以後具有修治。

縣治署

儒學

際留倉 預備倉 學倉

歸化巡檢司

陰陽學 僧會司 道會司

縣前鋪 黃畚鋪 頓村鋪 硤頭鋪 田尾鋪 南洋鋪 安井鋪 慈香坂鋪

上司行署三 永福公館

社稷壇 風雲雷雨山川壇 邑屬壇 鄉屬壇

城隍廟

勸忠祠 祀皇朝知縣魏文瑞，以擊賊遇其害。

平和縣 城正德十四年假令徐鳳岐建。莆人馬明衡縣碑曰：「縣曰平和，取寇平而人和也。」

縣治署

儒學

預備倉

漳汀巡檢司

陰陽學 醫學

縣前舖 崎嶺舖 卜坪舖 茅埔舖 小溪舖 洪瀨舖 平和舖 蘆溪舖

上司行署三 太平公館 舊縣公館 平和公館 黃井公館

社稷壇 風雲雷雨山川壇 邑厲壇 鄉厲壇

城隍廟

朱文公祠 皇朝陽明祠，祀王守仁，以縣是守仁開設。

社學四

詔安縣 地名南詔，莫知何始。相傳有滇使經此，觀其風景，曰：「好似我南詔。」在宋爲南詔場，又爲沿邊巡檢寨。元至正間，右丞羅良命屯營陳君用砌石城之。東臨溪，西、南、北依山鑿乾壕。國初爲把截所，尋罷。正統十四年，鄧寇猖獗，漳寇乘之，攻圍經八閱月，耆老許尚端、涂膺等與衆力禦之。旣潮州兵至，城以不害。弘治十七年，詔南詔守禦千戶所始拓城西偏，廣之。嘉靖九年設縣，遂爲縣城，名縣曰詔安，取「南詔安靖」之義。三十七年，令龔有成高之。四十二年，令梁士楚築外城及西關城焉。

縣治署

儒學

預備倉 學倉 社倉

漳潮分界巡檢司 洪溪巡檢司 金石巡檢司

南詔驛

縣前舖 鳳山舖 古林舖 大陂舖 深山舖 黃岐舖 西張舖 陳平舖 張塘舖 梅嶺舖 玄鐘

舖 銅山舖

上司行署二 大陂公館 梅嶺公館

社稷壇 風雲雷雨山川壇 邑厲壇 鄉厲壇

城隍廟

朱文公祠 功臣祠，在城東，祀唐將軍前鋒將許天正及元光子昀。

社學七 義學，皇朝邑人許伯壽建。

南詔守禦千戶所，在縣治東。 南詔倉 軍器局

旗幟廟

海澄縣 城嘉靖三十六年寇亂草創，築土堡。隆慶元年設縣，仍舊堡葺之。四年，守羅青霄以南北形隋方焉，門四：東曰清波，西曰環橋，南曰揚威，北曰拱極。

縣治署

儒學

際留倉

濠門巡檢司 海門社巡檢司 島尾巡檢司 縣門舖 渡頭舖 石美舖 西陵舖 蓮浦舖 月溪舖
祖山舖 馬平舖 龍灣舖 官樓舖

上司行署二

社稷壇 風雲雷雨山川壇 邑厲壇 鄉厲壇

城隍廟

朱文公祠 太保祠，在九都，祀謝都官陳太保以興水利功。

社學十所

寧洋縣 本龍巖縣集賢里之東西洋，四山環列，其中寬平，曰寧洋者，取東西洋寧靜之義。隆慶元年新設城四門：東曰翔鳳，西曰登雲，南曰瑞麟，北曰佩玉。東門一帶有瀘溝，西、南、北三面以溪爲池。萬曆六年，令鄧於蕃濬北城濠，達於大溪。十四年，令陳德言更城門額，東曰瑞應，西曰文明，南曰清波，北曰翔鳳。

縣治署

儒學

預備倉 學倉

縣前舖 利溪舖 嶺頭舖 馬家山舖 隘口舖 半嶺舖

上司行署二 嶺頭公館 擢甲公館

社稷壇 風雲雷雨山川壇 邑厲壇 鄉厲壇

城隍廟

豫章書院，在水定里蚌口，祀宋儒羅從彥，以其祖居於此。

魏公祠，祀皇朝漳平知縣魏文瑞，擊賊

遇害之所。周公祠，祀皇朝海道周賢宣，以有相土營城功。

社學七所

鎮海衛指揮使司衛 城在漳浦縣太武山南。

鎮撫司 右、左、中、前、後五千戶所 預備倉 軍器局

儒學 嘉靖中，惠安張岳撰《衛學鄉賢祠碑》：「景泰、天順間，布衣陳公、翠渠周公二先生同時產於

鎮海，皆以學行聞天下。二公蓋爲聖賢義理之學者。嘗聞布衣少食貧，業作未藝，一日遇鄉校，聞講《中庸》，戒懼謹獨，心若有會，遂棄業從之。既復讀《大學》格物致知之訓，知其與《中庸》相發明，又知其工夫真切不越『敬』之一字，故其學以默坐澄心、反躬實踐爲本，於章句文義蓋有不數數然者。翠渠，自業舉子時，已不安於俗學之陋，其學自六經、諸子、天文、律曆、字畫及方外之書無所不究，而每以辨析精微洞見本原爲歸宿。蓋二先生之所自得及其從人如此。布衣，未嘗仕也，天順中徒步詣闕下，獻所爲《正學》、《正教》等書，直欲變一世學術人才，以歸諸古。翠渠廣德之政，有循吏風。晚年仕頗偃蹇，卽投綬歸，淡然有以自適也。鎮海故戎壘，自二先生後人始知學，至爲立博士弟子員教養之。而祠設未舉，無以致嚮

慕之意。嘉靖乙酉，一齋豐先生熙繇翰苑謫戍是壘，常舉二先生之學爲學者言之，既又以祠事言於提學副使吳公仕，牘具而吳去。越數歲，兵備僉事謝公汝儀乃舉行之，命指揮使徐侯麒度隙地爲屋三間，並祀二先生。顧戎司事力鮮薄，廊廡儀觀多弗克稱，一齋又斥其月餼，得金若干以佐費。既成，馳書於岳俾記之。岳之先世蓋嘗講於翠渠者，而布衣之言論風旨，竊聞其大略如此。當二先生時，士大夫以講學有聞者多矣，爲說皆務高遠，考其要歸，能無憾乎後生者蓋鮮。獨二先生之學，粹然本於考亭，無議也。昔朱子有言曰：『子思以來，教人之法，惟有尊德性、道問學兩事爲用力之要。』然學者性質趣識不能盡同，大抵多因其所近者而入。誠能兼取二先生之所用力，而反之於身，以審其先後之端，如病者用藥，陰陽寒熱期中病源，而不至於偏勝，則庶乎有合於聖人之行，無媿於二先生。而一齋惓惓倡勵之意，亦可無負矣。」布衣名真晟，字剩夫，泉人。翠渠名英，字梁石，莆人。初設壘時，調二郡之人戍守者，二先生蓋守者子孫云。

東瀛書院 祀朱文公。

旗纛廟

陸鰲千戶所 城在漳浦縣十五都，舊爲青山巡檢司地，改爲所，江夏侯所築。

鎮撫司 陸鰲倉 軍器局

旗纛廟

玄鐘千戶所 城在詔安縣四都，東西二門，阻海環山以爲濠，江夏侯所築。

鎮撫司 玄鐘倉 軍器局

旗纛廟

銅山守禦千戶所 居海島中，漳浦、詔安二縣之交。

鎮撫司 銅山倉 軍器局

旗纛廟

南溟書院 祀朱文公。

玄鐘澳守備 銅山西門澳水寨

福寧州 福安縣 寧德縣 東洋行縣(三)

福寧州 城在龍首山下。晉置溫麻縣治於四十一都。溫麻，屯名也。唐改置長溪縣，在今所。其溪源來自浙江慶元桃嶺下，又來自壽寧縣大蜀山，又來自政和西門嶺，皆流下福安、寧德入海。彼時縣治未置。溪流俱在封域中山岡，紆迴約五六日程，然後趨海，溪所以名長矣。古未城也。皇朝洪武二年，海寇侵境，明年，山寇鄭龍、姚子美爲亂，鎮守、駙馬都尉王恭檄百戶甯祥先後討平之。又明年，始築城，周三里。二十年，復置衛，人衆城小，江夏侯周德興撤東城，拓廣里許。永樂五年，海寇復熾，御史韓瑜、都指揮谷祥復增築四門、月城門。正德中，知州萬廷彩、歐陽嵩先後浚濠加廣。嘉靖三十四年，知州鍾一元以

郭西民移在城外，數被寇，復拓城二里。三十七年，夏潦城崩，參議顧紳拆卸舊城，增高補厚。明年，倭逼城，又值淫潦，城工方新，崩塌無完堞，都司張漢令軍兵取雜木環城立柵，結戰棚爲守具。倭遁去，分巡舒春芳復作城。其後屢有修治，高二丈三尺，厚一丈三尺，周一千五十八丈。

州治署

儒學 在州治東七十餘步許。宋爲長溪縣學，在州治東保明寺左。慶曆三年，令杜樞徙城東南菱湖。元元裕二年，尹馬康侯徙東郊建善寺。五年，復於菱湖。皇朝正德十一年，巡按李如圭以卑濕，徙今所。

廣寧倉 大金倉 常平倉七所 預備倉

青灣巡檢司 大貧簪巡檢司 高羅巡檢司 蘆門巡檢司 拓陽巡檢司 延亭巡檢司

陰陽學 醫學 僧正司 道正司 養濟院

州前總舖 金臺舖 倒流舖 官田舖 胡坪舖 楊家山舖 錢大王舖 龍亭舖 杜家舖 官洋舖
五蒲舖 白琳舖 顧家洋舖 王孫舖 巖前舖 水北舖 半嶺舖 分水舖 黃沙舖 漁洋舖 高羅舖
大金舖 石濤舖 尤家舖 鹽田舖 李園舖 職田舖 長壽舖 拓溪舖 叢塚

上司行署三 海道分司，在一都烽火寨。海防館，在州乘輿邊境。萬曆三十年特設，以福州府官一員專理。

社稷壇 風雲雷雨山川壇 州厲壇

城隍廟

忠勇、節孝二祠，忠勇祠，祀宋令潘中；節孝祠，祀元尹王伯顏，配以其子相、相婦潘。萬曆中，合配爲忠勇節孝祠。贈州同知陳坡祠，以死倭。

參將府

福寧衛指揮使司 左、右、中、前、後五千戶所 大金千戶所，在州五十二都，瀕海。定海千戶所，在連江縣二十都埕角澳。

旗纛廟

烽火門水寨 金城寨，在州北金字山，壓城而峙。皇朝嘉靖間，倭登是山，矢石火藥乘高雨下，城幾不守。萬曆二十九年，兵巡陳良材設臺山巔，可屯兵數百名，樓曰無敵。

福安縣 在巖山下。舊未城，惟土城牆，立四門，廣袤各三里，周十餘里。皇朝正德元年，分巡阮賓命累磚爲之，周八百九十六丈五尺，高一丈，厚一丈，增立小西門。嘉靖三十七年，倭報急，令李尚德請撤而高厚之，工未畢，倭至。明年，陷。其冬，令盧仲儲力修之，增小北門。次年工畢，倭大至，不得犯而去。萬曆九年七月，大水夜至，全城漂沒，死者數千，城盡圯。當道議遷城，令汪美不可，乃修舊城之南而展其東，築西門壩，高一丈八尺，以遏水。萬曆二十七年，令陸以載謂東城鶴山高逼，不利防守，改仍舊。

縣治署

儒學 在縣南金山下。初在縣西龜湖山上，元皇慶元年邑簿胡璉建龜湖寺，移學於縣東。皇朝因之。正德十三年，水，令於震復移於龜湖山。嘉靖十二年，颶毀，巡按御史白賁、分巡僉事王廷議徙今

所。三十八年，毀於倭，令盧仲佃重建而大之。

際留倉

白石巡檢司

陰陽學 醫學 惠民藥局 僧會司 道會司

縣前總舖 化蛟舖 大梅舖 松羅舖 界首舖 小坪舖 城山舖 大留舖 曾坂舖 塔嶺舖 長

汀舖 龜齡舖

上司行署三 鹽運分司 松蘿公館 甘棠公館

社稷壇 風雲雷雨山川壇 邑厲壇 鄉厲壇

城隍廟

朱韋齋祠 在九都龜齡寺，以韋齋嘗携文公寓此。

社學二

寧德縣 城初在白鶴山之陽，築土城，置四門。宋時環以木柵。皇朝正德初，令高應累以磚，開五門。嘉靖四十年，倭攻燬，城陷。四十二年，令林時芳一新之，爲門四：東曰鎮靜，西曰崇順，南曰永寧，北曰遵化，周圍五百九十二丈，高二丈五尺，其廣六尺。

縣治署 宋建炎四年，令趙訖之建。元燬，尋建。皇朝洪武十年，令朱政闢大之。正德三年，火。七年，令熊紳重建。嘉靖四十年，燬於倭，令時芳新之。

儒學 宋嘉祐三年始作講堂，邑人高頤撰記：「余謫然未學，諸公環坐而要之講，將講聖賢遺言歟？抑反身而求之歟？吾身任重責大，無天地生物之功，而有天地生物之量；無帝王經世之跡，而有帝王經世之心；無經國子民之位，而有經世子民之度；無先物著龜之神，而有先物著龜之誠。《詩》，吾言也。《易》，吾動也。《禮》，吾履也。《書》，吾政也。《春秋》，吾行事也。凡天下之冥蒙罔覺，阨塞悻愍，待我而開警之；巽惡畏懦，退怯失守，待我而扶植之；疲癯殘疾，鰥寡孤獨，顛連無告，待我而生全之。枉者求中，畔者求正。躁者求靖，惑者求直。繩行沙度之儔，鱗潛羽飛之彙，與吾並生一世間，醇醪所不及，視聽所不加，得我則存，失我則喪。續往古，詔來今，木鐸息而復鳴，薰絃斷而復和。然任重者難勝，責大者難舉，故兢兢業業，行之力也；汲汲皇皇，志之果也；陟降在帝，誠匪懈也；忘饑遺老，思無疆也。簞瓢糗茹，以求其志；裘馬敝瘁，以一其行。惡旨酒不甘外而甘內，風舞雩不玩物而玩志。畎畝幡然，覺之先也。居不暖席，文在茲也。環轍而老，舍我誰也？望海知廣，登山見高。涓不蓄流，簣不辭勞。毋徠而施，將大其址；毋缺其鋒，將卒於砥。爛爛弗沃，實焚爾和；蔓蔓弗圖，將尋斧柯。謹之戒之。在易修詞，居業之本；禮無不敬，安民之端。《詩》戒屋漏，對越於天。《中庸》、《大學》，慎獨爲先。萬物既備，惟誠在我。斯須不謹，天地易位。茲聖賢事業，其毋負天地生我、父師教我之意。」皇朝洪武二十三年燬，令關可成建。正德四年燬，令熊翀建。嘉靖四十年燬，令時芳建。

東洋行縣 在十五都。嘉靖辛酉，倭變作，東洋民乘亂肆掠。院道以其地僻民頑，議設一縣。令林時芳申建行縣於周墩，分主簿一員駐割其處，一方稅賦，就其徵收。

際留倉 預備倉 義倉

東洋麻嶺巡檢司

陰陽學 醫學 僧會司 道會司 養濟院

縣前總舖 白鶴舖 界首舖 東山舖 東牆舖 金垂舖 銅鏡舖 閩坑舖 官前舖 蕉坑舖 王

政舖

上司行署四 東牆公館 寶豐公館 金峰公館 硃溪公館

社稷壇 風雲雷雨山川壇 邑厲壇 里社壇

城隍廟

阮先生祠，在五都漳灣，宋紹興六年建，祀上舍阮大成。石堂先生祠，在二十都，祀宋儒陳普。

古遺先生祠，在五都南山，祀元儒韓信同。功德祠，在縣治左，祀都督戚繼光，以平倭功。莊敏祠，在

縣治右，祀少保尚書莊敏林聰。忠烈王廟，在東門外碧山下，祀唐太學生黃。諫議大夫廟，在十二都

霍童洞天山下，祀隋諫議大夫黃鞠。

晦庵書院 社學二

何子曰：先王辨方正位，體國經野，后以裁成天下之道，輔相天地之宜以左右民，其在斯歟？其在斯歟？

贊曰：城郭廟社，臺閣藩臬，下及州郡，百凡無缺。文以興士，武爲民衛。

〔校記〕

〔一〕「漳州府 龍溪縣 漳浦縣 龍巖縣 南靖縣 長泰縣 漳平縣 平和縣 詔安縣 海澄縣 寧洋縣 鎮海衛指揮使司衛、陸鰲千戶所、玄鐘千戶所、銅山守禦千戶所附」五十六字，各本原脫，據本書體例補。

〔二〕「南靖縣」，各本原作「南靖縣城」，據本書體例刪「城」字。

〔三〕「福寧州 福安縣 寧德縣 東洋行縣」十三字，各本原脫，據本書體例補。

閩書卷之三十八

風俗志

福州，閩中一都會也。閩縣、侯官，其附郭。西北控甌劍，注衆溪之流，東南負大海，環以崇山，帶以長江。其氣恒燠，厥土黑壤，厥田中下，畝歲獲。田則夫婦并力而合作，女作多於男。女人能轎。洪武初，取女轎三十戶以應內宮之役。頗饒魚鹽、果實、紡織之利，乃有改機之絹、絺衣之絲。居市廛者器物精巧，雖至鍼、篋、線、香至微鮮，足適於用。其俗尚文貴節，君子朴而守禮，裒然嫺文辭；小人愿謹而畏法。雖負販之夫，相逢衢道，舉手若揖讓。古田，舊曰山洞，田蟲蠹鱗次走坡斜以聯山之極，陰管邃壑，午乃霽嵐。田歲一獲，地瘠難以蓄衆，壯者往往傭四方，鄙朴而勤力。四民之中，工商闕二，坐是無所得金銀。輸賦之金，必負米出易於水口。閩清，風土類古田。山田引泉注之，歲收多人。俗務稼穡而篤於信鬼。長樂，濱海，有魚鹽之利。山出果實販四方，有離支、龍眼、青李之品。其離支之美者口勝畫，龍眼之美者曰長樂員，青李之美者曰嘉慶子。其俗儉而用足，辨貴賤，序長幼，有古遺風。連江，亦有山海之利，而不及長樂，鮮有厚貲。其民舒緩而用儉。永福，氣候、風俗大抵與古田、閩清同。其民火鑿水耕，崖鋤壠蒔，終歲不知有車馬馳驟之逸，亦信鬼而悍剽。羅源，抗負巖巒，襟帶陂澤，邑居嵐氣如甌。民山耕海漁，僅自給。其俗少文而易治。福清，背山面海，多烏鹵，頗有海舶之利。其人剛勁尚氣，四方雜處，學不

遂則棄之習文法吏事，不則行賈於四方矣，以其財饒他邑。

泉州，枕山而負海，田再易，園有荔支、龍眼之利，焙而乾之，行天下。沿海之民，魚蝦贏蛤多於羹稻，懸島絕嶼以網罟爲耕耘。附山之民，墾闢磽确，植蔗煮糖，黑白之糖行天下。地狹人稠，行賈寡出疆，仰粟於外，上吳越而下東廣。百工技藝，不能爲天下先，敏而善做，北土緹縑，西夷之毳毼，莫不能成。婦人芒屨負擔，與男子雜作。隋志：豫章之俗，衣冠之人，多有數婦暴面市廛，競分銖給夫。以爲不雅。而不知瘠土小民，非是無所得食。行而南，安平一鎮盡海頭，經商行賈力於徽歙，入海而貿夷，差強費用。而其地儉於田疇。若犬兒童誦讀，聲聞乎達道。士挾一經，俛首鉢心，無所不能爲，貧者教授資俯仰，益壯不懈，是以縉紳先生爲盛於中原。文園所寶有宋家之研、淳化之帖，《淳化閣帖》十卷。宋季南狩，遺石刻於泉州，湮地中久之，時出光怪，樞馬驚怖，發之，帖也。故泉人名其帖曰《馬跡真跡帖》，納郡庠。歲遠剝蝕，其後莊少師氏復摹以傳。今泉中又有兩部翻刻者。洛橋之《端明蔡君謨碑》爲名書。其君子無仕不仕，無造次辨麗之智，盤辟鞠躬而重爲邪。小人帖帖愿謹，自取衣食而已，或爲詰曲詆欺，不剖自露。南安，去晉江可十里，土壤肥沃，宜瓜蔬之屬，荔支之實，視晉江差勝。有溪山之觀。其人質率尚意氣，而皆有鄒魯之風。惠安，地少壤多，宜稻三之，宜麥一之，登麥之後是種番薯，可以支歲。緝繡織苧，有《葛屨》、《蟋蟀》之風焉。北鎮之布行天下。海市曰輞川，鱗介之所出也。家豢鷄鵝羊豕，可以饗他郡。村落慶弔，用布帛、牲畜、五穀爲禮。婦人已嫁，爲其父母服素三年，若爲不忍降也。其君子忠信，其小人儉畏而任慤。德化，萬山中，地高多寒，氣鬱嵐深。民勤稼穡，種麻苧，婦女專辟績。園蔬、池魚、山果取自給，弗鬻於市。魚鹽海物自晉江轉販至，其直三之。有杉木之饒。陶型之器，亞於饒九。務本薄末，有古遺風焉。安溪，山水清激，有建、劍之象。其土

慊慊。山澗之水，不窘於田，耕耨之力省。糞田者，買牛馬骨燒之。其穀足以食郡中。其山產鐵，煮鐵之民聚五方，民衣食焉，亦能耗穀而叢警。行賈通於永安、大田，民負鹽人鬻之，而皆盜鹽也。冬綿夏葛，以爲女工。同安，朱文公之所過化也，其韻猶在。其君子厲節，而其小人任天。男子力穡。是生吉貝之綿，而女善爲布。惰者乃多博塞而戲牧豬。島曰浯洲，風沙所生。其民敦儉。士多讀書，取高第不成者，去而之刀筆。瀕海之民，隣於漳界，有漳之風焉，疆圉多事，其勁可以收。佳禾之嶼，是出竹髹之器。永春，於唐爲最古，峻嶺崇山，屬襄崔嵬。民負巖依谷，無村聚。東北高寒，西北諸山人春尚雪。是生樂山之茶，穀惟稻粳，木綿、荔支弗產也。土沃泉膏，率種一斗而收十之六七，餘可食郡中。有山林、陂池、苑囿之利，杉木之饒。白苧之布，比弱吳紬。其君子文而小人朴。蓬壺、覆鼎以西，其人悍武，居若處女，遇患難，提戈赴鬪，有燕趙之風焉。

建寧，閩上游也。山峻水激，而盤紆迴鬱，無倒瀉瀉瓠之勢，是以朱文公悅而居其間。其人之美也，尚氣而有節，其弊也，狷隘趨急，無委蛇之風。其小民忿怒叫囂，雖可理折，未免輕生而樂鬪。市井侈浮，比於杭州。工用之美，竹簞可以扇，糕餅可以糧。建安，甌寧附郭也。建陽，文公之鄉也。士者侈談文公，如東魯之名孔子也。書坊之書盛天下。其絨毯氈囊，不名毳罽。其竹可以紙。其泉洑洌，可以釀，其釀行東南。茶歲三收，苧歲四收。白雪之梨，豆腐之薺，以文公之詩名諸郡。崇安，建巖邑也。山則武夷，人則儒先。又其人則仙，釋。秀士敦慤，民少經商爲遠游。炙肉以爲脯，煮藤以爲被，走鳥以爲銀。走鳥之銀盤、卮、簪、環之屬行天下。浦城，介閩浙間，真文忠之鄉也。土彬彬爲禮讓。其地寡田。其民勤耕織，桑麻被畝，茶筍連山。民以蓄力富，不煩於催科。政和，建下邑也。其田開雲而倚山。其俗勤，

以儉朴而近古，無豪家大姓陵鏹細民以廢亂政化。松溪，建上游邑也。寒不墜指，暑不蒸人。其民龐儉，商賈有恆業。壽寧之俗也，與松溪類。此八邑之風也。建之始，志曰：「家有詩書，戶藏法律。秀上狎文詞，重清議，百姓畏官府。男女別途，各勤其身。」今其弊也，父母死，停柩不葬，惑於彤家浮屠。薦饗則無節，女婿儼然與婦翁稱賓客。子弟見先生，無齋邀之敬，或對席宴娛。姻締論財，要責無厭，貧則棄之。故其俗至於溺女不愛惜。春薰，儉從悉絕其配合，民白首爲鰥寡。下民一有緩急，卽兒女滿膝之婦，去之不顧。貧婦，夫死未幾輒嫁或贅。《周禮》：「東南曰揚州，其民二男五女」，何可見哉？何可見哉？

延平，附郭爲南平，山川清明而挺秀，恒燠少寒。地多險阻，疊石爲田，引泉注之，厥土赤墳，厥田下下；其夷衍者，厥土黑墳，厥田中下，而俱宜稻。其山宜茶。民憚遠出爲商賈，無他役作而勤耕耨。女雖至貧，紡績不出戶，是以不至饑乏，而亦無千金之家。其君子無脂韋之氣，小人朴嗇，不敢爲非。此其俗也。將樂，巖岫磊砢，溪流清泚。土之所出，女子所績，猶南平也。土有楊龜山之遺風焉。其民多技而好勝，鄉有苧布之利，喜於爲商，或流侈靡而無實。大田，重山外盤，而中平衍，有種苧紡麻之利；多養牛，其革以爲履。其縣志口：「近尤之民質而鄙，近漳之民健而侈，大要負剽悍。」今士尚義節，專《詩》、《書》，而民安本業焉。沙，延平上游也。其民儉朴，力作吝財，以含忍勝人；文風之外，習俗技藝精繪事焉。尤溪，萬山之中，重岡複嶺，崇林茂樹，朱文公所生地也。舊稱土瘠收薄，洞民多負氣剽悍，謂其險也，所以置縣大田，分之於今守，分而耕樵。是有巫師之傳，習於符呪。是生黃蜂之蜜、菰笋之脯。順昌，介東廣之衝，溪山秀麗，煮竹爲紙，紙口界首，曰牌，行天下。其酒行八郡。賦稅之人，不待追呼，期會不失焉。橋梁、道路勞力費財而無靳心，以是爲美俗。永安，巖巖峭壁，閩肥饒地也。其俗視他爲輕剽。近於沙者

文而靡，近於尤者朴而頑。此其始也。比者士知禮義，民習技巧焉。

汀州，士知讀書進取，民安稼穡，少營商賈，富家守不稅，貧夫力山畝，僕隸下人各治生業。廬無行貨之婦，衢少伏地之丐。室無曠怨，子女不忍鬻他鄉，奢汰不競，兇訟少聞。長汀，附郭也。寧化，居汀上游，田疇鱗次，草木綿蔚，男耕女績，人物富庶，而氣性剛愎。上杭，上能勤學問，衣冠文物，頗類大邦。百貨具有，竹筴可以買。武平，山峻地僻，民多武勇。清流，因山高峻，接竹引泉以代汲，卽湍駛急，使水轉軸以代舂，民樂農圃，編竹蔽，闔市無游女焉。宦游之人爲之語曰：「清流爲縣，家懸竹片。任官數載，莫睹閨面。」以爲貞風。民趨健者刺船建、劍、汀、邵間，穿灘出峽，雷轟電轉，稱最能。連城，土瘠民貧，工務勤勞，女安儉朴。民人他郡治版築修砌，累甃堅土，名「執技」。歸化，質直好儉，民力耕種，重遷移，至貧餒不敢爲非。永定，僻壤也。山峻水駛，其人樸而寡文，崇尚廉耻，士甘自守，少奔競。民田作之外輒工賈。其俗災疾弔賀，有相關之意。市井俳優，或嗜酒賭博，而穿窬之盜罕聞。然頗悍勇輕生而喜鬪。

莆，壤地褊小，善國也。壺山、蘭水映帶秀發。故其人好禮而修文，士相矜以名節。其在前代，則九牧颺其風，諸方競其爽。至於國初，遂應天造與四輔之選者一人，赴建文之難者二士。及至成、弘、正、嘉之代，乃有彭韶、林俊之風烈，王大用、林富、方良節、鄭岳之猷念，馬思聰、朱瀚之忠忱，陳茂烈、劉閔之廉孝。出則豎名皇路，居則掃軌衡門。氣韻之所歎吹，布韋蓬藿莫不顧化。老生宿儒出而授經近縣，步趨坐立，造次不失。下至灑削賣漿之儉，未嘗敢岸幘科頭行衢道。貧家鰲豆數行，秩秩有次。吾伊之聲，比屋而聞，通有韻之文，十人以三四。故其學書不成者，挾以游四方，亦足餬其口。或以繪畫，命卜自壽江湖間。而行賈之人，金陵爲盛。其工作蓋與扇行八郡。以其壤地褊小，或至鄙與陋，卒毋敢奸蘭，跳於四民之業。

仙，近邑也。其人心質、風俗大抵與莆相類。倚山田頗足自資，而少出門。

邵武，閩西郡也。晉地理云：「其俗剛烈峻整，其民尚氣鯁直。」晉郡縣志云：「信鬼好祀，疾疢延醫藥。」舊志云：「力農重穀，少大饑歲。儒雅樂善，號小鄒魯。嫁娶尚門地，喪祭用古禮。」又曰：「俗尚簡易，文書省約，無珥筆之風。據可食之土，緣可採之山，老子長孫。無士賈，皆顧戀其桑梓。」其大概也。邵武，於縣爲附郭，與光、泰三邑皆力田樹藝，鮮商賈。他商賈亦鮮至。地狹民衆，財源鮮薄。其俗纖儉，安於食稻而茹蔬。建寧，土地膏腴，專有魚、杉、油漆、苧麻之利，以通商賈。郊於建昌藩郡，染而爲奢俗。其諺曰：「千金之家，三遭婚娶而空；百金之家，十遭宴賓而亡。」後也儉少耗。今與通郡皆靡矣。

龍溪，漳首邑也。閩中諸郡，惟漳爲悍剽。居郡之人乃溫和洞朗，其肺腑足揭示，外發憤骯髒，內殊畏法而懼罪。族大之家，指或數十，類多人海貿易。壯者散而之他郡，擇不食之壤開山種畝，或拏舟滄浪間，皆挈妻長子其處。工作之良則有織纈之繡、繡胸之補、連氏之楮，楮有連氏兄弟爲之，其行爲三，爲四，故綿紙有「連三」「連四」之名。象齒之輿。散於法者，或至海上奸蘭，爲鼓鑄，然亦藉其用。其於士君子也，斌斌有文，翩然意氣，而多自貴於千秋之業。地近於泉，其心好交合，與泉人通，雖至俳優之戲，必使操泉音，一韻不諧，若以爲楚語。漳浦，志曰：「舊有金名焉。諺謂之『金漳浦，銀同安』。」今或不然，未遠古也。其民殷庶。其君子嫻於文詞，不但用以取出身而已。龍巖，有巖洞之奇，以之名邑，山邑也。南靖，在漳郡肘腋間，其俗如漳。長泰，亦漳肘腋縣。通泉、安溪之山並有佳葛。市巷四民，率岸幘群聚。大要《漢書》所謂裸國，合漳郡皆是，而此其一徵。漳平，山邑也。平和，山邑也。詔安，界於潮，爲末邑。其民羯羗多學，崔華君子焉。海澄，有番舶之饒，行者人海，居者附貨。或得寶子棄兒，養如所出，長使通夷，其存亡無所

患苦，犀象、瑇瑁、胡椒、蘇木、沈檀之屬，鑿然而至。工作以犀爲杯，以象爲櫛。其於瑇瑁，或櫛或杯。沈檀之屬，或爲佛身、玩具，夷貲之外，又可得直。有司者禁海，慮奸民爲恆擾，不則漳人殷庶，亦無所於來往。今也人其野而見屋有新瓦，身有具衣，不至皆竄偷生，是亦不可禁。寧洋，山邑也，簡而僻。

福寧州，西北依山，東南際海，魚鹽螺蛤之屬，不買而足，雖荒歲不饑。其俗樸而專，和而靜。其士務於文，厚於質。前代之民，雖流離奔竄之日，未嘗失身從亂。仕者遵尚廉恥，宦歸率空囊。福安，慷慨尚氣，儉侈相半。男女安耕織，兄弟不相離，士民淳，尚作力，無浮靡之態。婚嫁稱家，不相求備，其美俗也。寧德，洞天最方輿，視武夷無所讓，俗亦類福安。

歲時土俗 略撮諸志如左：

元日，宋淳熙《三山志》：「元日飲屠蘇。除日以藥劑入絳囊，置井中，元旦出之，漬酒東向而飲，自幼至長以爲序，可辟瘟疫。蓋用華陀與魏武帝方也。」又閩俗諸節最重元日，冬至次之。是日，饗祀畢，序拜，稱觴祝壽，尊者出見親族，隣里更相慶賀，間亦傳拜，閭閻舉手相祝，往返還謁，盡節假止。白縉紳而下，士人、富民、胥吏、商賈、皂隸，衣服遞有等級，不敢陵躐。士人冠帶，或褐籠衫；富民、胥吏皂衫；農販下戶白布欄衫。婦人非命婦不敢用霞帔，非大姓不敢帶冠用背子。自三十年以前，風俗如此。又其稱呼，文人非實讀書，不稱「秀才」；豪門大户，「爹」呼父，「娘」呼母，奴僕及在己下，呼之曰「郎君」，曰「娘」；農販下戶，「罷」呼父，「娘」呼姊，呼母，其黨類及在己下，呼之曰「叔伯」，曰「嫂」。錙銖甚嚴，雖驟富驟貧，不可移易。其後漸失等威，近歲尤甚。農販細民，至用道服、背子、紫衫者，其婦女至用背子、霞帔，其稱呼亦反是。余按宋時風俗云然，於今則至無等矣。弘治《福建通志》：「福州府，元日祈年。五鼓後，郡

人無貴賤貧富，嚴潔廳宇，陳酒果，焚楮幣，拜上下神祇，以祈靈貺。」王世懋《閩部疏》：「閩俗重歲首。民間不開正戶，慶節後，即相率拜墓，挂紙錢，一如清明。迎春日，多陳百戲，盛亭臺之飾，坐嬰兒高槩上，兒皆慣習，飲噉自若，了無怖懼。千夫百騎，繞堂皇而出，唱呼跳舞，勞以曆書。惡少輩多舞狻猊，求索尤甚，即藩臬長無奈之何。士女傳觀，填街塞巷。自茲春事日盛，尤重元宵。十三日始放燈，數步一立表，一表輒數燈，家聯戶綴，燦若貫珠。如是者至下弦，猶不肯撤。有司禁之，縉紳先生不平見顏色。是月也，一郡之民皆若狂。」宋泉州府舊志：「元日賀禮。鄉寓公相約聚拜，省往復之煩，郡守兩司率僚屬會焉。舊於貢闈後於承天寺，至淳祐間，乃即泮宮。隣里則各於側近庵宇會集齒長，歲推一人，具酒果爲禮。」汀州嘉靖丁亥志：「元日起，每夜設香燈、茶果於竈前供奉。至初六日晚，俗謂竈神朝天還家，盛陳酒果以祭。」漳州萬曆壬子志：「元日，早起禮神祈年，強半帖紙錢戶外。又其日，祭於先祖。間有其日僅設齋供，至二日始具牲醴鷄豕之屬，悉塗紅，謂之紅窩。」淳熙《三山志》：「州人墳塋盡在四郊，歲節之二三日，華門大姓，率携家拜掃，雖貧賤市販，亦盛服靚粧，競出城闌，東、西、北郊之外，冠蓋填塞。故自節內，酒亭食肆，凡諸闌闌之家，垂帷下箔，優游歌笑，至開假乃止。近數歲，乃有節內市如故者。」余按延平萬曆癸未志：「元日，親戚相過稱賀。三日，市不列肆，謂之節假。五日，謂之開假，方出外各執所事。近民貧趨利，元日即坐肆如常，殊可歎也。」按此風諸郡皆然。世連始末，人民多寡，賦產饒乏之一徵云。漳州萬曆壬子志：「自元日，人家無貴賤，詣所親賀歲，屠蘇爲政，道醉相望，至五日乃止，謂之假開。少年莊束類獅狔，踵門呼舞，金鼓喧闐。或懷拉幼童至禪寺，登羅漢閣，隨意指一羅漢環數之，畢幼童幾歲而止，憑佳惡以卜休咎，謂之數羅漢。」汀州嘉靖丁亥志曰：「汀人於立春日會親賓鄉燕，爲春餅，貧家亦買

於市，以應節候。」八日，泉人是以日取菜果七樣作羹，名「七寶羹」。九日，《玉皇本行經》：「玉皇以是日度世。」而泉人傳訛，謂是日爲天誕，男女靚莊麗服，膜拜東郊。弘治《福建通志》：「福、泉，宋盛時，凡鄉里各有社學。歲前十二月，父兄商議，求有學識行藝，可以師表後進者一人，推一二有力者爲糾首，以諸生姓名具於關帖，敬謁以請；既許可，乃於歲節後十日，備禮延致於學，子弟迎謁再拜，執經授業，課試講改，率有規約。其資質之俊秀者，恒以歲通一經爲期。故當是時，周希孟、陳烈諸先生，相繼以德行經術鳴於時，人才蓋彬彬焉。其後士以趨試上庠，率游學四方，而鄉之先生乃各開門以待來者，事師之禮寢衰，教人之法甚略，夷陵以至今日。」余按宋志如此，其在今日，師求弟子，師多於弟子。淳熙《三山志》：「上元，有燈毬，燃燈，弛門禁，自唐先天始。本州准假令三日。舊例，官府及在城乾元、萬歲、大中、慶城、神光、仁王諸大刹，皆掛燈毬、蓮花燈、百花燈、琉璃屏，及列置盆燎；惟左右二院，燈各三或五，並徑丈餘，簇百花其上，燃蠟燭十餘炬，對結綵樓，爭靡鬬焰。又爲紙偶人，作緣竿、履索、飛龍、舞獅之像，縱士民觀賞。朱門華族設看位東西衙廊外，通衢大路，比屋臨觀。仍弛門禁，遠鄉下邑來者通夕不絕。有綵山，州向譙門設立，巍峨突兀，中架棚臺，集俳優娼妓，大合樂其上。渡江後停寢。紹興元年，張丞相浚爲帥，復作。自是不廢。有觀燈，舊例，太守以三日會監司，命僚屬招郡寄居者，置酒臨賞。既夕，太守以燈炬千百，群妓雜戲，迎往一大刹中以覽勝。州人上庶却立跂望，排衆爭觀爲樂。本州司理方孝能詩：「街頭如畫火山紅，酒面生鱗錦障風。佳客醉醒春色裏，新狀歌舞月明中。」（弘治《通志》：「宋之燈夕，其盛如此。皇朝來，民俗祈年雖間有設於境者，而官府則不復設，亦可以觀我祖宗節儉之化矣。」又弘治《通志》載：「宋元豐中，劉侍制瑾爲守，元夕不問富貴，每户科燈十盞。陳烈以詩題鼓門大燈籠云：『富家一

盞燈，太倉一粒粟。貧家一盞燈，父子相對哭。風流太守知不知，惟恨笙歌無妙曲。」謹聞而謝之。註云：「按《晁氏家語》謂蔡君謨於上元令民間點燈七盞，陳烈作大燈書此詩其上，君謨見之罷燈。與此不同。」考之於史，君謨與烈同時最厚，而劉瑾爲郡後三十六年，晁氏之言，蓋或有據。漳州萬曆壬子志：「元夕，初十放燈至十六夜止。神祠用鰲山，置傀儡搬弄，謂之布景。別有閒身行樂善歌曲者數輩，自爲儕伍，縛燈如飛蓋狀，謂之鬧傘。閭左好事者爲龍船燈、鯉魚燈，向人家有吉祥事者作歡慶之歌，主人厚爲賞資，剪紅紗繫其燈前，謂之掛紅。神祠設醮三日。先是，社首以紅紙印『上元天官賜福』等字，帖置各家戶壁，因以斂錢，名香會錢。醮畢迎神。或爲設寶騎及綵棚，棚悉作金銀飾，佐以珍珠，人物靚粧艷冶，謂之迎會。迎畢，置席廟中，社衆集飲，謂之飲供。」《清流志》：「正月上元十三四五日，各家門首懸燈，各里造紙船送瘟鬼。十五夜，設齋祀竈。」泉中上元後數日，爲關聖會，大賽神像，粧扮故事，盛飾珠寶，鐘鼓震鉦，一國若狂。《歸化志》：「初五日，始各具香燈，擡本坊土地迎賽。十五乃止。」古田縣，正月晦日爲後九，取蔬菜爲糜粥食之。

右正月。

《建寧志》：「社日，鄉坊有祭，春日燕福，秋日鴻福。家祀司土，喫粥。」泉州以二月二日爲土地生日，皮正月所食糗餌祀之，云可明目。淳熙《三山志》：「州花園在牙門西，所謂春臺館是也。歲二月啟鑰，縱民游賞，常閱一月，設鞦韆於春臺館之內外，與民同樂也。州民以寒食日踏青，東郊尤盛，多拾野菜煮臠，亦唐人杏粥榆羹之意也。太守以假日拉僚屬登臨。蔡密學襄有《寒食游西湖詩》：『山前雨氣曉才收，水際風光翠欲流。盡處旌旗停曲岸，滿潭鉦鼓競飛舟。浮來煙島凝相就，引去沙禽好自由。歸騎不令歌吹

歌，萬枝燈燭度花樓。」是時西湖競渡可知也。程太師師孟《寒食游九仙烏石山詩》有「賓客相從筵已冷，士民同出食猶寒」，通判馬益和有「公私不禁三朝火，風雨都無一日寒」之句。宋《泉州志》：「仲春，貴家開園圃，放游人賞玩兼旬經月。又東湖北山多亭館，士女如雲，行樂相望。」漳州萬曆壬子志：「二月十二日，相傳文昌降誕之辰。求子息功名者，往往以十許人爲一會，主其祀事，名郎君會。」二月十五爲花朝，泉中林下，諸老有以其日飲酒賦詩者。邵武笄女子以是日爲撲蝶游。

右二月。

《福建通志》：「舊記閩縣東有桑溪，越王無諸三日流杯宴集於此。宋時，太守上巳楔飲之地三：一曰南湖楔亭，二曰東禪肖蘭堂，三曰聖泉曲水亭。郡守王達《上巳游東禪詩》：『紫陌破清晨，雕鞍映畫輪。因修雒陽楔，重憶永和春。』宋徽宗御製《上巳詩》云：『韶光三月暢玄芳，楔飲池邊泛羽觴。畫鷁翩翾戲龍虎，一時佳景勝端陽。』故州政和、宣和中，自黃尚書裳至陸侍郎藻爲守，皆登楔游亭，臨南湖，令民競渡。南祝木，冬夏常青，染飯成紺青色，日進一合，可以延年益壽。吳越多有之。今上巳青飯本此。舊記任敦仙公取祝葉染飯，閩俗效之。」宋《莆田志》：「土人於上巳節採楓樹花，漬米爲青飯。方正字肅詩：『年年此日嘗青飯，路傍山楓却憶家。』」漳志：「是日採鼠麴草，合粉爲糰，薦祀之餘，以相贈遺。」諸郡俱以清明祭墓，南平人則祭新葬之墓，舊墓隨時往祭，不專清明。建、延、興、漳皆於清明日折柳枝懸插門簷，或以簪首。弘治《興化志》：「清明前後，里塾諸生各率錢，大小有差，擇日具酒穀蔬果於名山勝刹，延先生暨諸學父燕飲，謂之浴沂會，餘錢則以奉先生，爲潤筆資，俗謂之光齋。」

右三月。

四月八日，謂之慶佛生日，亦曰洗太子。淳熙《三山志》：「是日，州民所在與僧寺共爲慶讚道場。蔡密學襄爲州日，有《四月八日西湖觀民放生》詩，此風蓋久矣。元豐五年，住東禪僧冲真始合爲慶讚大會。城東報國寺齋僧尼至萬餘人，探闢分施衣巾扇藥之屬。建炎四年，爲會四十有九而罷。紹興三年，復就萬歲寺作第一會。是日，緇黃至萬六千餘人。凡會，僧俗號「勸首」數十人，分路抄題戶，作如意袋散俵，聽所施，了「免者」。至乾道四年，歲大饑，城市會首有取至三千餘緡，王參政之望爲帥聞之，諭令糴穀賑濟，不服，乃盡根治之，拘錢人官，自是遂絕。」《延平志》：「順昌縣每歲以是日於泰亨橋集商賈通貨財。」《仙游志》：「諸寺僧於是日爲黑黍會，民家亦有黑黍，以餽其親。」

右四月。

五日插艾，繫五色線，飲菖蒲酒，果角黍，競渡，出城收採諸藥品。諸郡皆如故事。有則採揀木葉插之，謂可禁蚊，有則採桃葉插之，謂可辟疫，有則採葛藤懸戶外，謂可禁蛇。《福州志》：「郡人是日飲菖蒲酒，名曰飲續。」又《福州志》：「閩王審知以五日卒，是日罷節事。相沿至今，郡人猶用初四日爲節日。」弘治《通志》：「莆人以是日具牲醴薦角黍，先祠畢，長幼序宴飲。莆俗最儉，尋常會客，惟市沽新釀，必貴家富室方有老醞，是日，不問貧富，俱市老醞飲之。」《惠安志》：「牲尚鵝。」《漳州志》：「五色長命縷以繫兒童臂，復以繭作虎子帖額。」泉、莆是日多食鸚鵡螺，以能明目。福安人則食大田螺，俗謂炒鬼眼。

右五月。

《建寧志》：「六月六日，唐刺史李頻誕辰，郡人持酒果梨山廟上壽。」《邵武志》：「是月日皆陰，相饋鷄酒，節宣陰氣。」

右六月。

七夕乞巧，陳瓜豆。莆志：「七夕乞巧，稚年兒女爭擊土瓦於門首。」淳熙《三山志》：「中元爲孟蘭盆會，焚紙衣以饗祭祖考。神光寺有佛涅槃像，傍列十弟子，有捫心按趾、哭泣蹣跚、出涕失聲之類。是日，孟蘭盆會因怪像以招游人，遂成虛市。相傳謂之看死佛。」弘治《通志》：「中元奉先，追遠禮也。而莆中最重是節。自五六月間漬紙而糜之，刻模印爲金、銀錠，槌錫爲薄，以飾銀錠；著梔子汁染錫薄，以飾金錠，家以數十百計。迨是月十三日，各灑掃室堂及庭，設先世像位，日具牲醴庶羞祭奠，至於十六，乃積楮錢、雜金、銀錠，逐位焚獻。女子適人者，或父母既沒，至是亦歸奠如前儀，沒身不廢，迨其子孫猶然。數日之間，盤盒往來，充斥道路，計一家所費，多者錢二三千，少亦不下數百。士大夫往往以爲非禮妄費，欲禁止之。或以莆士大夫家各有時祭，以展孝誠，閭左細氓終歲或不能一薦，於此又禁止之，是終無以自盡矣，故卒莫有禁。而議者以爲有賢師帥爲節其無益，定爲中正，使得繇禮伸孝而不傷於財，未爲不可也。」《清流志》：「七月三十日至八月朔，闔縣祭漁滄廟樊神，牛酒大會。中秋望日，迎燈慶神。二十七日，奉神像出游，商旅貨賄來會，謂之樊公會。九月朔，送神歸廟，縣官致祭。」

右七月。

張岳《惠安志》：「中秋飲酒賞月，牲尚鷄豚，酒食以祀土穀之神。已，乃會飲盡歡而退。」《漳志》：「中秋祀土神，蓋古人春祈秋報之意。土紳作月餅相貽，其夜置酣宴。鄉村人作社事，謂之社戲。兒女於月下設果餅，膜拜致詞，謂之請月姑；置筐於盤，神降則筐自舉，爲剝琢聲，視其數以下災祥。」宋《遜齋閑覽》：「福州、泉州、興化軍瀕海，七八月多大風，俗云癡風，亦云颶風。其來，風雨俱作，蜚瓦拔木，甚者再

宿乃止。食頃有風自南來，其勢力益甚，其名爲報風。」

右八月。

重陽登高，遺糕，飲茱萸酒，如故事。宋淳熙《三山志》：「無諸王以是日登高九仙山，鑿石樽以泛菊，樽可盛三斗，猶存。」《漳志》：「漳南菊開稍遲，是日鬻得一二本，價可數倍。」

右九月。

《建志》：「十月朔，謂之十月朝，是日爲豆米糍，以祀先，然後交相餽遺。」

右十月。

弘治《通志》：「福州人亦重冬節。節前，隣里族戚更相餽遺，上塚祭饗。至節日，則序拜如獻歲儀。」張岳《惠安志》：「十一月冬至，陽氣始萌，食米丸，仍黏丸於門。凡陽象圓，陰象方。五月陰始生，黍先五穀而熟，則爲角黍，以象陰，角方也。冬至陽始生，則爲米丸，以象陽，丸圓也。」《漳志》：「冬至作米圓，家衆團樂而食，謂之添歲，古所謂亞歲也。門扉器物各黏丸其上，謂之飼耗。」《寧德縣志》：「冬至，人家各祀其祖，各祭其社，謂之冬賽。」

右十一月。

淳熙《三山志》：「驅儺，鄉人儺，古有之。今州人以爲打夜狐。曾師建云：『《南史》載：曹景宗爲人好樂，在揚州日，至臘月則使人邪呼逐除，偏往人家乞酒食以爲戲。迄今閩俗乃曰打夜狐，蓋唐敬宗夜捕狐狸爲樂，謂之打夜狐。閩俗豈以作邪呼逐除之戲與夜捕狐之戲同，故云？抑亦作邪呼之語訛而爲打夜狐歟？』火爆，《荆楚歲時記》：『山臊惡鬼犯人則病，惡爆竹之聲。』李彤云：『元日爆竹於庭，辟山臊惡

鬼。今州人除夕以竹著火燒爆於庭中，兒童當街燒爆，相望戲呼達旦，謂之燒火爆。」張丞相浚爲帥日，除夕，莆人鄭樵客郡中，與觀火爆，丞相命賦詩，給竿字爲韻，樵口占云：「駒隙光陰歲已殘，千門竹爆共團圓。燒成焰焰丹砂塊，碎盡琅琅碧玉竿。喚轉韶光新景燠，辟除惡魅舊時寒。主人從此占佳瑞，再人爲霖灑早乾。」宿歲，《荆楚歲時記》：「歲暮，家只肴饌爲宿歲之儲，以迎新年，相聚酣飲。」閩俗亦然。又於除夕留歲飯，謂之隔年飯，爲節假內之備。桃符鍾馗，書桃符置戶間，掛鍾馗門上，攘厥邪魅。今州人歲暮畫工市之。《漳志》：「臘月二十四日，每家拂塵。是夕，言百神有事上帝，每神祠，及人家具蔬菜、米糶，畫幡幢、輿馬、儀從於楮上，焚而送之，謂之送神。」按《東京夢華錄》：「二十四日交年，都人至夜請僧道看經，備酒果送神，燒合家替代錢紙，貼竈馬於竈上。以酒糟塗抹竈門，謂之醉司命。夜於牀底點燈，謂之照虛耗。」此日蓋自宋重之矣。至孟陬四日，具儀如故，謂之迎神。除夕前數日，親友各以牲羞相餉，謂之迎歲。是日各祀先禮神，黃昏門外爆竹，其焰薰天，謂之辭歲。焚香張燈，老幼團席，據爐以待曙，謂之守歲。此俗大約八郡俱同。《政和志》：「歲除燈燭照墓。」福寧州，年滿六袞者，親戚咸備彩幃、羊酒慶壽，主人盛具酒燕飲之。

右十二月。

何子曰：予記閩中風土，其概耳。至其歲時節事，大抵相類，蓋沿古而因俗。是亦民夫人所以崇愛敬、接慙歉、聯屬上下親疎之意，治世之道矣。夫非賦平、刑理、歲豐、時和，能使閭閻及時歡樂無愁怨之聲哉？《蟋蟀》之詩，憂深思遠，有堯之遺也。閩何獨不然？大抵土瘠人貧，善心易生，而易致之理。夫孰

無類俗疵行？所以維而化之，在君子哉，在良有司哉。

贊曰：風俗之殊，厥與政通，好惡從違，我制其衷。在昔良牧，務滋化原，敢口文禁，以爲民先。群動方紘，罔覺其始，既習而安，力莫之止。維禮斯經，維政斯行，自我作則，永協蕩平。

〔校記〕

〔一〕〔中〕下，各本原衍「妝」字，₁₂改。

閩書卷之三十九

版籍志

戶口

唐立租庸調之法，有田則有租，有身則有庸，有家則有調。其賦，揚州以錢，嶺南以米，安南以絲，益州以羅、綢、綾、絹，然則閩中賦錢也。五代中，偽閩爲政，諸州各計口算錢，謂之身丁錢，民年十六至六十免放；後漳、泉等州折變作米五斗。宋興，版籍仍偽閩之舊，因取官斗較量，閩時五斗得七斗三升，自是命民歲輸身丁錢七斗五升，意二升爲加耗也。真宗之世，念南方地狹人貧，終身備作粗丁「身丁」，其間不能輸納者，至父子流移逃避，甚或生子往往不舉；祥符中，下兩浙、福建除身丁錢四十五萬貫。其漳、泉、興化三州，以丁錢折變作米，無人論奏，除錢之惠，遂不行之三郡。景祐初，福建轉運使龐籍請罷之，有司持不可。慶曆五年，知福州蔡襄復以爲言，不報。景祐三年十一月，詔曰：「漳、泉、興化，自偽閩以來，計丁出米最重，或貧不能輸，朕甚憫焉。自今泉州、興化舊納七斗五勝者，主戶與減二斗五勝，客戶減四斗五勝，爲定例。」斗作斛，升作勝，出宋淳祐志。蓋是時龐籍爲相也。元豐八年，分主、客戶，以丁力多寡科差，兼論資產。主戶者，土著之戶也。客戶者，外邑之人寄莊守米者也。自「衙錢法」興，應役者輒至破產，民有父子兄弟自分爲戶，或嫁遺孤孀，求單丁以避重差。有司方且以增戶課最，以故戶額雖多，丁口實無所

益，徒誕謾具文而已。南渡後，詔州縣官殿最以生齒多寡爲差，而冒增之弊終宋世矣。元定人戶爲十等，立科差法，有絲料、包銀、夫役三項，皆視丁力輸辦。其詳不可考。然聞之故老，夷狄之治鹵莽闕疎，大約額不及宋，口數髣髴之。國初定閩中，卽令民以戶口自實。至洪武十四年，始頒黃冊式於天下。戶口凡七：曰民，曰軍，曰鹽，曰匠，曰弓兵，曰舖兵，曰醫，令其各以本等名色占籍，十年則覈其老幼生死而更造之。民父母存若亡而兄弟出分，及贅婿、乞養子歸宗另爨者，聽異籍。惟軍籍禁不聽。有「清勾法」，蓋慮其分異而窺避。凡科敷物料及差役，十年一事。男子年十六以上爲成丁，丁當米一石，事其身。貴者、老者、疲癯殘疾者皆復之不事。而要之，七戶之中，軍、民爲重，軍戶又視民戶幾三之一，其丁口幾半於民籍。夫軍戶何幾民籍半也？蓋國初患兵籍不足，民三丁抽一丁充之，有犯罪者輒編入籍，至父子兄弟不能相免也。乃今多耗矣。正德十四年，沈御史灼欲民易辦，始行「八分法」，每一丁歲徵銀八分，以充歲辦等料，惟差役仍舊十年一事云。今庶民之家，登冊者名爲官丁，不登冊者名爲私丁。官丁納官錢約可三錢，私丁則里胥量其家之人口多寡、財力豐拙而取其資，以備衙門應役之用，亦其勢也。有司編審之時，率視米多寡量註丁口，皆非實數矣。然予觀漢王成偽增戶口，隋裴蘊以戶口脫漏、詐註老小奏令貌閱，一人不實，則官司解職。夫如是也，何必實數，何必不實數哉？

唐戶九萬一千一百八十六，口四十一萬五百九十六。

宋戶一百四十五萬八千六百九十七，口二百八十八萬七千七十五。

元戶七十萬八百一十七，口一百九十三萬五千一十四。

皇朝《大明會典》：洪武二十六年戶八十一萬五千五百二十七，口三百九十一萬六千八百六。弘治

四年戶五十萬六千三十九，口二百一十萬六千六十。萬曆六年戶五十一萬五千三百七，口一百七十三萬八千七百九十三。

賦役

唐以前尚已。偽閩王延鈞弓量田土，第爲三等，膏腴上等以給僧道，其次以給土著，又其次以給流寓。其科取之法，大率倣唐兩稅而加重焉。宋太平興國中，遣左補闕王永太、僕寺丞高象先均福建田稅，二歲蠲偽閩錢五千三百二十一貫、米七萬一千七百餘石，舊日無名之徵悉從改罷。遂以田土高下定出產錢，而第多寡五等爲人戶貧富之差，徵輸兩稅一以產錢爲宗。又有夏秋貳稅。夏稅有折變布稅、小麥、稗草三項，秋米有糙、白二米，有折變黑豆一項。凡折變者，並與除本稅，然非產錢及三等以上者不科。此宋賦法也。分鄉、吏二役，以五等爲差。鄉役之法，以里正督財賦，以戶長承符帖，以耆長察盜賊。後罷里正，募耆長。熙寧六年，行保甲法，五家爲比，五比爲保，有長，十大保爲都，有都保正、副，專糾察鄉里非常，令其相保。餘差悉以稅戶等第出錢僱募。元祐罷之，復行差法。紹聖以後復行僱募。而耆戶長應募者役錢多不時給，久之亦廢。保正、副遂兼其役，屢以繁重構訟，雖爲更法裁省，而不能止。嘉泰以後，鄉民始有出募人人役者，謂之義役，由是訟者稍息。吏役之法，其初以衙前主官物，人吏、貼司、書手掌案牘，手力、散從官給趨使，至雜職虞候之類，皆從稅戶均差。而衙前一役以里正兼之，多至破產。皇祐中，韓絳、蔡襄極陳福建衙前之害，詔免里正兼役，而衙前破產如故。熙寧行僱募法，人頗便之。後雖罷於元祐復於紹聖，然紹興以後竟行僱法。差役之行也，官戶及僧寺、道觀、女戶、單丁俱不差遣。熙寧後，以產錢高下出錢僱役，名曰免錢。舊不差遣者令出半錢。及建炎置諸縣弓手，併官戶所免半錢皆徵矣。

是後鄉役兼責保正、副，應募役者多不給錢，而役錢移人上供。此宋役法也。賦法行之既久，田以荒墾互異而偽匿徠寄，壞蠹日生，至於產錢不實，五等人戶亦無足據。朱文公主簿同安，深知其弊，後守臨漳，上言：「經界最爲民間莫大之利，紹興已推行虔州，圖籍尚存，田稅可考，貧富得實，訴訟不繁，公私兩便。

獨漳、泉、汀三州未行，細民業去稅存，不勝其苦。而州縣坐失常賦，日昃月削，安可底止？臣不敢先一身之勞佚，後一州之利病，切獨任其必可行也。請令臣得推擇官吏，委任責成，打量畝步，算計精確，攢造圖帳，費從官給，隨產均稅，特許過鄉通戶均紐，庶幾百里之內輕重齊同。本州有產田，有官田，有職田，有學田，有常租課田，名色不一，稅租輕重亦各不同。比來吏緣爲姦，實佃者或申逃閑，（二）無田者反遭徠寄。今欲每田一畝，隨九等高下定計產錢幾文，而總合一州諸色稅租錢米之數，以產錢爲母，每一文納米幾何，只就一倉一庫受納。既輸之後，却照元額分隸，爲省計，爲職田，爲學糧，爲常平，各撥人諸邑倉庫。除二稅簿外，每二年鄉造一簿，縣造都簿，通載田畝、產錢實數，送州印押，付縣收管。民有交易，對行批鑿，則版圖一定而民業有經矣。又有廢寺閑田，爲人復占，許本州召人承買，不惟田業有歸，亦免稅賦失陷，又合韓愈氏『人其人，廬其居』之遺意。但此法之行，貧民下戶皆所深喜，然不能自達其情，豪家猾吏實所不樂，皆善爲辭說以惑群聽。賢士大夫之安靜厭紛擾者，又或不深察而望風沮怯。此則不能無虞。今已仲秋，向去農隙只有兩月，乞卽詔監司、州郡施行。」既漳、泉二州被命相度，而泉州操兩可之說，朝廷疑焉。至役法之變起於王安石，其利其弊，世論已定。而後世僱役之法，竟從安石所變。此宋家賦役始卒之大略也。皇朝洪武初，籍天下田地、山林、池塘、海蕩之名數，分官、民二等。官田起科，每畝五升三合五勺，民田每畝三升三合五勺。其係之官者，有職田，有學田，有廢寺，有沒官田，有官租田。職田

者，唐制職官所分之田也。學田者，府縣以贍學校之田也。廢寺田者，寺額廢而田人官者也。沒官田，又有原沒、今沒之別，皆籍沒之官者也。官租田者，籍沒之田而募人耕種者也。其賦亦分夏秋二稅，夏稅徵鈔，秋稅徵米。民產畝科夏稅鈔四文，秋米五升，蓋一則而已。惟官產輕重不同，有甚重者至一石，輕者亦至一斗。宣德五年乃下減分之令，凡官米徵一斗至四斗者，減十分之二；四斗一升至一石以上者，減十分之三，遂爲定則。官米舊時本、折中半，折色米徵銀解京，本色米存留各倉。民米舊以十分爲率，七分徵本色派倉，三分徵折解京。正德十四年，御史沈灼奏：「官米俱折銀解京，民米俱存留各倉。官米分四等徵納：三斗以下，每石折銀三錢六分；三斗以上，每石折銀三錢三分；五斗，則米每石折銀三錢七分；（三七）七斗，則米折銀二錢五分。如官米多於解京原額，則以解剩官折撥倉，與民米兼充軍糧。如官米不足解京原額，則取民米之折價者以足解京之數。其民米并秋租鈔米，半納本色，半納折價，價每石折銀五錢，新增起科米并浮糧米，俱全徵折價，每石二錢五分，相兼分撥各倉。凡官、民米皆有加耗，每官米一斗加耗三合五勺，民米一斗加耗七合。」其耗米准備倉廩虧損，弘治年間紐人正額支銷。其後坐派各倉民米。民米每正耗米一石，又增耗米五升，亦作正額支銷。此賦法也。凡役法，有正役，有雜役。里甲，老人，謂之正役，即宋之鄉役也。均徭、驛傳、民壯，謂之雜役，即宋之吏役也。里甲之役：圖爲十甲，以一户丁力相應者爲長統；甲首十戶，籍在坊者謂之坊長，在鄉者謂之里長，歲輪一甲見役，專掌催錢糧、勾攝公事及出辦上供物料。老人之役：凡在坊在鄉，每里各推年高有德一人，坐申明亭，爲小民平戶婚、田土、鬪毆、賭盜一切小事。此正役也。均徭之役十甲輪差，十年一次，正役歇後五年一着役。其編役之制，米一石准夫一丁辦，民老弱不任役，與有員役及鹽戶當免役者，計一年該役額數，各以應役丁米填。

各衙門差使，應出銀者，謂之銀差；應出力者，謂之力差。銀差之役：有鎮守府長夫，有市舶府殷實，有布政司祇候、按察司祇候、都司經歷司祇候、市舶提舉祇候、本府知府各衙祇候、本縣各員祇候，有知縣等四員各馬夫，有府學齋夫、膳夫，縣學齋夫、膳夫。此銀差也。力差之役：有市舶府皂隸，有布政司獄卒，有清軍館書手，有按察司直堂隸兵、庫子，有運鹽司直堂庫子、隸兵，有市舶提舉門子，有本府直堂隸兵，及經歷照磨所直堂門子，有各庫庫子，架閣庫庫子，有司獄司獄卒，有倉斗級，有各衙門門子，有府學殿夫、門子、庫子、斗子，有衛軍器庫庫子，本縣直堂皂隸、直堂門子、庫子、禁子、倉斗級，有山川社稷邑厲壇門子，有稅課司巡欄各舖舖司兵，有驛館夫，有縣學殿夫、門子、庫子、斗級。此力差也。驛傳之役，諸縣通紐其縣之民米編充各驛馬驢、夫防、廩給之數，各以糧米多寡截排日子，依次應當，歲週復始，至十歲則再編。凡使客有關符。以關符當予者，予之。民壯之役：各縣各有弓兵、機兵以備寇，兵以上皆雜役也。此役法也。賦法，若沈御史善矣，乃以其官米折銀解京也，每石三斗以下則三錢六分，三斗以上則三錢三分，七斗則二錢五分，耗半於民且無他徭，則是縣重而之輕。民米折色者，石銀五錢，驛傳、機兵、均徭在邑，概有六錢，況本色之米又難概以五錢爲則者，則是似輕而實重。於是粥田之家急於其田之粥，而受粥之家持以官則之輕，於是有以官作民而粥之者，亦有戶本重則急作輕則而粥之者。田去產存，肌膚日侵，則有人錢里胥飛詭旁射，或以濱溪濱海崩陷爲詞，或有以新墾收戶，而浮糧賠贖實起於此。往往有戶無浮糧，忽然增掛，忍爲賠納；又有實浮反行加派，而無浮反暗浮減者。其弊至於嘉靖之季而極。里甲之役，其始催徵錢糧、勾攝公事而已，後乃以支應官府諸費，若祭祀、鄉飲、迎春等事，皆其措辦，浸淫至於雜供、私饋無名百出，一紙下徵，刻不容緩，加以里皂抑索其間，里甲動至破產。正德十五年，沈御史灼

議，將通縣費用分正、雜二綱，以丁四糧六法科派。綱之爲言，提綱之謂也。正綱費用可得稽按，雜則私而難考矣。嘉靖十六年，李御史元陽知其多費，再議徵銀儲庫，用度各有定則，但額外費多，支應不給，仍令里長貼辦，稱爲班次。又爲雜泛，名色猥瑣，甚或借辦舖戶，全不償價，或半給者有之。較其一年之費，倍之二綱之數，而里甲困矣。均徭之役，最重莫如庫子。編排庫子，所以策應心紅紙剗酒席下程之費，官司廉儉，尚有爲民樽節；其漫無節省者，狼藉乾闥，不復顧惜，民役數日，費殆不貲。驛傳之役，則民持金人驛僱募夫脚，策應官府迎送過客。仕宦之人，往往挾帶寶從，行李輜重過當，於是相爲隱避，有潛數竣事之期，囑託幹旋，令其改日就道者。機兵之役，則坐名與民戶對支，挾在官之人，下鄉強索，恒至倍蓰。蓋承平之世尚可支撐，被倭之後，破壞蕩折，而法猶如故。此其弊亦至嘉靖之季而極。賦法弊矣，說者謂宜履畝方田。而萬曆初年，江陵相始議行之，相度高下膏腴，定爲上中下三則，折爲實畝，配官米若干，民米若干，鈔米若干。有寺田久廢而人民家者，亦如民田配產。要以無失舊制二米原額而已。而受田之戶，分受魚鱗一紙，弓步畝數，令可自稽，而浮糧悉清。役法弊矣，嘉靖末年，撫、按兩院始令各縣除正、雜之名，止稱綱銀，以一年應用通計實數，只據見年丁糧多寡，每戶徵銀若干，審定規則，先一月徵收在官，以應後月支用。而又行十段之法，以均徭役；加徵、僱役之議，以蘇民困，而民尚病。旣閩中中倭，戚總兵繼光用所練金華兵蕩滅之，遂調金華兵守戍。而汪都御史道昆加派軍餉之議興，丁四糧八，奉旨定賦，而民又增一役矣。按均徭舊規，十甲輪差。十段法將縣實差，丁糧以甲爲次分作十段，每年輪以一段編差。蓋以十甲輪差，遇有本甲丁米多者，則銀少而差輕；或有本甲丁米少者，則銀少而差重，未免有不均之歎。故更以十段，而均其丁米，所以使十年編銀無多寡之異，而任役無輕重之懸。隆慶四年，戶部題准江西布政司，各項差役，逐一較量輕重。係力差者，則計其代當

工食之費，量爲增減。係銀差者，則計其扛解交納之費，加以增耗。通計一歲共用銀若干，照依丁糧編派，開載各戶繇帖，立限徵收。有丁無糧者，編爲下戶，仍納丁銀；有丁有糧者，編爲中戶；及糧多丁少與丁糧俱多者，編爲上戶，俱照丁糧并納，著爲定例。往時編某爲某役、某爲頭戶、某爲貼戶者，悉行革去，名一條鞭法。其法蓋卽朱文公輸納產錢分隸元額之意。然未有行者。萬曆初年，龐都御史尚鵬始推廣行之。尚鵬自嘉靖之季爲都御史，則已奏革天下郡邑庫子矣。自是條鞭法行，則通府州縣十歲中夏稅、秋糧、存留、起運額若干，綱、徭、兵、站加銀額若干，通爲一條，總徵均支。異時民間徵派名色一切省除。其曰綱，卽舊之綱銀也。其曰徭，卽舊之均徭也。其曰兵，卽舊之民壯也。其曰站，卽舊之驛傳也。法行而民甚以爲便。蓋賦役之法，始也煩，繼也簡，始則賦役分爲二，今則合爲一矣。

土田

《大明會典》：洪武二十六年福建布政司計一十四萬六千二百五十九頃六十九畝。弘治十五年計一十三萬五千一百六十六頃一十七畝七分九釐。萬曆六年計一十三萬四千二百二十五頃六分七釐零。

稅糧

洪武二十六年，夏稅麥六百六十五石、錢鈔一萬二千七百五錠、絹二百七十三疋，秋糧米九十七萬七千四百二十石。弘治十五年，夏稅麥七百六石五斗九升二合六勺零、鈔一萬七百七十八錠三貫一百七十二文五分六釐、絲綿折絹二百八十疋一丈九尺五寸五分三釐、農桑絲折絹三百一十九疋一丈二尺七寸八分零、絲綿一百九十四兩五錢九分、土苧六十五觔一十三兩一錢六分，秋糧米八十五萬四千四百四十七石七斗七升四合五勺零，租鈔二貫二百六十四文，魚課米三萬一千九百六十石六斗七升八合。萬曆六年，夏

稅麥七百六石九斗四升七合八勺零、絲綿折絹二百八十疋一丈九尺五寸五分五釐、農桑絲折絹三百一十九疋一丈二尺七寸八分零、絲綿一百九十四兩五錢九分、土苧六十五觔一十三兩一錢六分、鈔一萬七百七十八錠三貫一百七十二文五分六釐、秋糧米八十五萬四千四百七十七石七斗七升四合五勺零、魚課米三萬一千九百九十六石九斗一升六勺零、租鈔二貫二百六十四文。錢糧除存留外，其起運京、邊數目：弘治十五年，秋糧京庫折銀米三十六萬四千石，每石折銀二錢五分。萬曆六年，夏稅京庫絲綿折絹二百八十八疋一丈九尺五寸五分零、農桑絲折絹三百一十九疋一丈二尺七寸八分零，秋糧京庫折銀米三十一萬四千石，每石折銀二錢五分，戶口鹽鈔銀一萬一千二十七兩六錢七分零；南京承運庫，夏稅農桑絹六百疋；南京寶鈔廣惠庫，錢鈔六百六萬八千七百四十三貫六百七十文。今二十六萬七千三百三十六錠五貫五百九文存留本省。南京內府速香五年一次，會計一千一百三十七觔八兩。今停徵。

屯田

屯田之法，自漢有之。皇朝天下初定，以地方鎮守爲重。閩中諸衛衛指揮約三十餘員，衛各有左、右、中、前、後五所，千戶、百戶大約百有餘員，每所軍丁千人，至殷夥矣！足兵之費既難責賦於民，而郡遭兵亂之後，人戶稀寡，地多閒曠，因撥軍十之七守城，十之二往田所屯種。每軍給田二十四畝或二十六畝，隨遠近肥瘠爲差，歲徵糧二十四石，內正糧十二石，收貯屯倉，聽本軍支用，餘糧十二石，給本衛官軍俸糧。蓋守城軍士，上班五百戶掌之，屯種軍士，下班五百戶掌之。田所皆有次舍倉廩，一時屯政修明，而軍無不足之慮矣。永樂二年，令造紅牌一面，櫟之阡陌之間，其牌漆紅金字，鐫文曰：「屯田，撥軍屯種。官不得取，民不得奪，勢豪占據者罪至死。」此時屯有新舊之分。在洪武年間者，謂之舊屯，在永樂間

者，謂之新屯。而屯政益嚴。至二十年，念下屯軍士多苦艱難，辦納不敷，令除自用十二石，餘糧免其一半，只納六石。蓋詔令行之天下。然軍士率從他郡調，創始難備，水土不習，不五十年間，逃亡過半，刀耕火耨，漸屬汙萊矣。宣德十年，詔：「天下都司衛所，正糧子粒十二石以給下屯軍士之用，不必盤量，止徵餘糧六石，於附近軍衛，有司官倉交納。」至正統元年，令每軍正糧免其上倉，止徵餘糧六石，而屯法稍弛。然此時屯種皆正軍也。至其末年，沙、尤寇發，暫調回屯軍備寇。寇亂日滋，荒田愈益。於是始撥餘丁補種故軍田土，每軍各頂三名。田雖給與餘丁，而冊籍所記尚不離其始受田之人，故謂之故軍。乃撥田之初，報占不審，有田一頃重報兩三軍、兩三軍共爭一田者，有牽紐肥磽苟求其數者，有一戶之田分報軍民，時移世變，民隱其田而爭於軍者，雖云每軍各頂三名，僅足一名之數而已。成化初，遣官清理，始除其虛數，稽其實在，分配賡補，務足糧額，遂有正種、貼種、明種、品搭種等名目。所謂正種者，受屯本軍也。其餘貼種、朋種、品搭種等名，則撥餘丁補種者也。此時率三、四、五軍而併一軍，繇是額減於舊，每屯之軍，多不過四十名，少止二十名而已。弘治末年，屯軍災亡益衆，倪給事奉命清查，欲得原額，多侵民田，幾至激變，慮妨復命，乃將成化中稽實配補之田分抽一半，別作新增，兩徵其租，軍士困至。饒御史始令停徵。後屠御史奏請開豁。然各屯土有賠輸者，有僅輸者，終不能如國初屯軍得糧自贍也。嘉靖中，管屯鄭僉事又將屯田聽人請佃，各召民種，每戶屯糧，毋論屬民屬軍，率徵其六石，以不失舊稅而已。萬曆十年以後復行清丈，遺失畝分藉是得復，而豪民頑佃移瘠換腴終不可革。蓋國初屯法至自此壞盡矣。然揆田畝迷失之因，審軍士消乏之故，則欲行清屯，必先清軍；軍政既弛，即欲復國初屯種之舊，亦不可得，亦其勢也。乃尾大之弊有可慮者。向日屯田之屬民也，私兑而已，比歲人民益衆，利其充價之廉，鬻

者日衆，價日益踴，間有訐訟，有司明知其私充官田，多置不問，且令其依則納糧，改給新帖。此一時也，田有管種之主，有承種之佃，佃家初無所費，及轉相兌承，則糞水之費視屯軍相兌之值，又復倍蓰。夫屯軍承田納糧，糧一失則得按籍而徵之，甚則褫屯而去之。各佃以出價承種，動迭負通，且在深山窮谷，詰捕不能盡行，異日不益迷失者幾希矣。《大明會典》：萬曆六年，福建都司并行都司原額屯田五千三百八十一頃三十七畝，見額屯田八千六百九十三頃十二畝三分一釐，糧一十五萬一千八百四石九斗一升四合八勺。弘治八年，奏准福建行都司所屬建寧、延、邵三衛，都司所屬福州左右等衛屯田，每石折徵銀二錢五分，解京濟邊。

寺田

偽閩弓量田土，第爲三等，膏腴上等以給僧，此寺田所繇起也。其後如王延彬、陳洪進及諸家多有捨田入寺者。顧竊喜施之名，多推產米於寺，而以輕產遺子孫，故寺田產米比民業獨重。皇朝嘉靖中有大工之役，費無所出，下州縣，令民找買寺廢僧亡之田。此時亦收重產，不得減輕。及萬曆初，奉例丈量官田、民田、寺田，摻一概之平，無復輕重差別。蓋自隆慶以前凡買民田者，每租一石，受產伍分；至丈量後，則昔日浮糧皆受實產，寺田之重產皆分灑於民田。今諸家原管及新買之田，其受產每一石有六分者，有七分者，輕重懸殊，實繇於此。而舊志所云「積弊遺累，保其必無矣」，顧嘉靖中找買寺田爲奉旨而行者也。又嘉靖之季，閩中中倭，餉兵是亟，撫、按復議寺在僧存者，內將四分給僧焚修，六分抽餉。行之已久，此亦爲保境而行者也。今朝無粥田之令，郊無多壘之虞，而古又無廢僧之世，尚有兢兢祇園之業，幾於括金佛面，此則諸勢家有責焉。寺田額數，各詳諸府縣志，茲不具載。

鹽課

宋時，邑東南瀕海，有鹽亭一百二十九所，皆領於官，歲權其人，令民以產錢高下納錢，而給之鹽。每產錢一文至五十九文，納鹽一觔半；六十七十九文，（四）三觔；八十至九十九文，三觔半；一百至一百九十九文，四觔。自二百以上，每一百納二觔半，每一戶復增一觔半；雖產錢極高，歲納不過五百觔。觔爲錢一十四文八分，謂之鹽產錢。有未盡者，官自鬻之。而亭戶以其私鹽鬻之商販，官亦徵其利，謂之浮鹽錢。後以民不便官鬻，罷權而輸錢如故。其浮鹽則科漁舟及僧童口食者以補之。皇朝設轉運司閩中，場有七：在福州者曰海口場、牛田場，在泉州者曰惠安場、曰潯美場、曰汭州場、曰浯州場，在興化者口上里場。行鹽之地皆在閩中。其初，附海者爲鹽戶，主煎作；依山者爲竈戶，供薪木。後專曝曬，令竈戶以銀代薪爲僱直。鹽、竈戶每米一石，准夫一丁，著令復其身，仍給工本鈔，日辦鹽一觔四兩，積三百六十日爲一引四百五十觔，以人於倉。嚴私販之禁。計民男女成丁者，歲給鹽三觔，徵米八升，謂之鹽糧。後罷米折鈔，每丁口歲納鈔六貫，每貫折錢二文，中半折之爲鈔三貫、錢六文，閏月則算而加之。倉鹽給口食，餘者以給商販。久之，民不復支鹽，納鈔如故。其私鹽擔負不及數，於法無禁。私販多白鹽，易售，人倉類低黑，穀雜鹵壤；賈人又慮就場險阻，輒置引市私鹽充數，繇是倉鹽積久虧耗，丁夫困於賠累。依山戶，縣又不免其雜役，編戶重稱困矣。後遵戶部奏，准各折銀米以足軍需，遂罷辦鹽入倉之例，工本鈔亦復主支云。

鹽場七處。《大明會典》：洪武間，歲辦鹽一十萬四千五百七十二引三百觔零。弘治間，歲辦大引鹽一十萬五千三百四十引二百六十五觔八兩九錢，內本色鹽四萬七千四百五十六引二百七十八觔四兩九

錢，折色鹽五萬七千八百八十三引三百八十七觔四兩。萬曆六年，歲辦大引鹽二十萬四千三百四十引二百六十四觔，歲解太倉銀二萬二千二百兩一錢，泉州軍餉銀二千三百四十四兩二錢。正統十三年，奏准將潯、泔、浯三場鹽課共五萬六千八百八十三引俱准全折，每引折米一斗，派納泉州府附近永寧衛，并福全、金門等所倉，聽給官軍月糧。弘治十六年，題准將惠安場鹽七千三百五十二引，每引徵銀七分，解部。各場竈戶濱海諳煎曬者，陸續輸官，其依山不諳者，官爲收買，付總催給散諳煎者代納鹽觔。正德四年議准該省報中人少，今後依山價銀不必支商，將附海本色逐年變賣解部。十一年，令依山鹽課如遇商人報中，每一小引折銀一錢二分五釐，與附近本色鹽課相兼支給。十二年，題准將上里、海口、牛田三場鹽課六千六百五十引餘，每一引折二小引，每引二百觔，就於本處召商，照例每引納銀三錢解部。又題准附海鹽課不必邊方開中，就於本省召商中賣。十四年令福建鹽場：商人中到，引鹽以十分爲率，五分派與福、興、泉、漳四府一州，五分派與延、建、邵、汀四府，各地方行賣。嘉靖九年，奏准將潯美場鹽課米每石折銀五錢，加耗修倉銀三分，追解泉州，貯庫支放。十年，題准福建官鹽仍以二百五觔爲一引，每引一道照包，正鹽一引并割出餘鹽若干，不必給以小票，每包許帶餘鹽二引，正鹽照原價三錢，餘鹽定價四錢。十三年，題准福建運司引鹽照舊例每引一百觔爲一袋，帶耗五觔，不許以進貢、修城等項名色濫加耗鹽四十五觔。其正鹽一引，止許帶餘鹽二引，不許給與小票，縱令多帶。十九年，題准浯州、泔州二場鹽米每石俱折銀五錢，如九年例。萬曆二年，設運判一員駐劄黃崎分司，將黃崎分司運副移駐水口，運同移駐泉州，專督理泉、漳二府鹽務，給票抽稅，每鹽三千觔定稅一錢五分。潯、浯、泔、惠四場，除竈戶原曝鹽場不課，其新漲海灘民間開曬者，通行計坵徵課。惠安場歲徵課銀仍舊解部。其潯、浯、泔每引復加二

分，與給票抽稅，及漳浦、詔安等縣，潯浯等場新設坵稅，俱作該省常餉，待海上撤兵，起解濟邊。三年，題准將上里、海口、牛田附海本色每引納銀三錢，差官解部。八年，裁革添設運判一員，同知仍駐水口，副使駐劄黃崎，各分司管鹽法。

鹽有煎法，有曬法。宋元以前，二法兼用。今則純用曬法。其煎法：月以二信候潮鹵，潮退鹵沁土中，遇烈日結生白花，刮而聚之，以實於鹵坵，復取鹹水淋之。鹵坵者，穴土爲窟，其下爲溜池，有竅以相通，用蘆管引之。水漬鹵坵，循管注池中，投鷄子、桃仁，以浮爲節，則鹵可用。別爲土斛竈傍，微高於竈，瀉鹵其內，引以蘆管，從高注之於盤。煎之盤，編竹如盤，塗之以蠣灰，大盤日夜煎二百觔，小盤半之。其曬法，亦聚鹵地之尤鹹者，曬曝令極乾，實於漏，滲入溜池，復取池中水澆之，如是者再，則鹵可用矣。曬鹵之盤，石砌，極堅密，爲風約水，故廣狹無過數尺。一夫之力，一日亦可得二百觔。宋時鹽價，觔爲錢十，貴倍之。今日價極高不過錢二文，以曬法無柴薪費故也。

雜課

農桑絹。宋時令長吏勸民廣植農桑，有伐以爲薪者罪之，而調其絹、綢、絲、綿以供軍。南渡後，軍儲不足，絲、綿並半折錢，疋二千。我朝洪武初，令民有不種桑、麻、木綿者，罰之布帛。後又令民得於在官曠地種桑，每畝四十株，料絲五錢，每絲一觔四兩成絹一疋，長三丈餘。乃有司苟且具文，奉行不虔，遂變而徵銀，每疋一兩六錢，水脚二錢八分，俱於通縣丁糧辦納，非舊制矣。今併入一條鞭內。

右農桑絹。

魚課。五代閩時，凡江湖陂塘皆有賦。宋至道間除之，然州縣尚有採捕舟船之稅。我朝始立河泊所

以權沿海漁利。凡舟楫網技，不以色藝自實，沒之。洪武中，遣校尉點視，遂以所點爲額定納課米。其後漁戶逃絕者多，額定課米皆責見存人戶，辦納不敷，乃有折徵之令，每米一石半，納本色五斗，折色五斗，爲銀二錢五分，人尚以爲病。弘治七年，巡按御史吳一貫奏准不分本、折色，通徵銀三錢五分，漁民乃得蘇息。蔡文莊公爲作《吳御史利民一事記》。

《大明會典》：魚課米，福建八郡共銀七千一百兩。

河泊所存革，俱見文蒞志各縣下。

右魚課。

金礦。宋天下州郡金冶十一，汀其一，歲貢金一百六十七兩。皇朝罷。

銀礦。宋產銀之監，天下有三，閩一，建州曰龍焙，場五十一，閩二十有六：福州之寶興，漳州之興善、毗婆、大深、巖洞，汀州之黃焙、龍門、寶安，南劍州之龍逢、寶應、王豐、杜唐、高才、贍國、新豐、巖梅、營、龍泉、順昌，邵武軍之焦阮、龍門、小杉、青女、三溪、黃上、同福、礪礪，冶，天下八十四，閩六：汀、漳、泉、福州、南劍、邵武。皇朝間差官剽取，隨即封閉。永樂十九年，差御史監生人等開辦福建、浙江銀課。宣德七年，奏准福建、浙江等處解納歲辦銀課，每年各處會合，止解二次，各輪委官一員護送。正統三年令罷開辦銀課，封閉各處坑穴。其福建、浙江等處軍民私煎銀礦者，正犯處以極刑，家口遷化外，如有逃避不服追問者，量調附近官軍勦捕之。五年令浙江、福建按察司各委堂上官一員提督銀坑，若有聚衆偷挖者，調軍捕獲，首賊梟首示衆，爲從及誘引通同有實跡者，連當房家小發雲南邊衛充軍。九年，奏准浙江、福建二布政司各添設參議一員，專理巡礦，禁約偷採。又令開福建、浙江有礦銀場，採辦銀課。又令

差御史等官於福建、浙江新舊坑場提督煎辦銀課，歲終差官解京。如各場額數不敷，許於別坑有礦處煎補；或又不敷，具奏處置，不許派民包納。又令浙江、福建提督銀場官吏及諸坑首匠作，有稱課不及額掊歛民財及侵盜官銀者，皆治罪如律。該徒流者，浙江發福建，福建發浙江擺站。雜犯死罪者，浙江發福建，福建發浙江沿海邊衛充軍。景泰元年，令罷採辦浙江、福建等處銀課，取回開辦官，令都、布、按三司巡礦官提調各該府縣護守坑場。天順二年，仍令開雲南、福建、浙江銀礦各差內使一員、辦事官一員，照舊煎辦，令各鎮守太監提督。五年，令雲南、福建、浙江開辦銀課，止於本坑採礦煎辦，若礦脉微細，煎辦不及額數者，具實奏聞區處，不許科補。七年，詔封閉各處坑場，停止煎辦銀課，取回內外官員。成化三年，令浙江、福建二處仍各差內官一員提督採辦銀課。八年，令福建、浙江有犯偷礦者，浙江發福建，福建發浙江沿海邊衛充軍。弘治五年，詔浙江、福建等處歲辦銀課，累民賠納，所司踏勘明白，量爲除豁減免，仍將礦穴填塞，以弭弊端。又令取回浙江、福建添設巡礦官員。嘉靖間，開礦，旋報罷。萬曆二十七年，燕山衛千戶胡志奏開閩礦，特馳中貴人閩，產銀礦地徧行開採。近奉詔停止。

宋天下產銅之場三十五，閩中二十七；汀州三，漳州四，邵武軍八，南劍州十二；冶四十六，閩中五；漳、汀、泉、南劍、邵武。皇朝罷。

宋天下產鐵之務二十，閩中三；汀州之莒溪，古田龍興、羅村，場二十五，閩中十有六；〔五〕建州之晚化，南劍之毫村、東武夷、平林、塗阮、安福、萬足、桃源、交溪、婁杉、湯泉、立沙、黃溪，邵武軍之萬德、寶積，冶七十七，閩中五；汀、泉、建、南劍、邵武。皇朝悉罷官冶，鐵課均數丁田出辦。

《大明會典》：鐵課額一十二萬四千三百三十六觔。見今歲課二十九萬九千一百五十五觔三錢四分

七釐，遇閏加一萬七千八百六十五觔一十二兩。

宋產鉛之場，天下三十六，閩中二十有八：建一，汀三，漳四，邵武軍八，南劍州十二，冶，天下三十，閩中三：汀、南劍、邵武軍，皆置吏主之。然大率山澤之利有限，或暴發輒竭，或採取歲久，得不償費，而歲課不足，有司必責主者取盈。仁宗、英宗每下赦書，輒委所在視之，治不發，或竭主者所負，歲課以爲常，而有司有請，亦輒復之無所吝。故冶之興廢不常，而歲課增損繫焉。皇朝罷。

右礦冶。

商稅課。宋諸縣各有稅務。熙寧十年以前，三萬貫以下者，南劍十一務，建七務，泉九務，汀八務，漳十務；一萬貫以下者，邵武三務；五千貫以下者，南平三務，興化八務。在城者，謂之都稅務。諸縣稅務初建後罷，丞、簿兼掌之。其稅目有遺利錢、陪綱錢、增稅一五分錢、增稅二五分錢、糜費頭錢等名。

皇朝洪武初，府置稅課司，縣置稅課局，令商稅三十稅一。巡欄者收所稅，以季終交局官。永樂七年，以歲物盈縮不常，遣官點視，按爲定額。至正統初，詔革稅課司、局，鈔不及三萬貫者，有司兼領之。後貨物弛不復稅，課額倚辦於巡欄，歲編有力人戶充之，其名目不一。後俱於條鞭內彙徵。萬曆三十年，遣中使榷稅。稅使大擾，居十餘年罷。

右商稅。

榷酒者，禁酒之意也。宋熙寧十年以前，五萬貫以上者，建州十二務；三萬貫以下者，南劍十五務；一萬貫以下者，邵武四務。福、汀、泉、漳、興化無榷，以五郡煙瘴，許造酒服藥也。元初有之。至元二十二年罷，令諸路榷酒麴，如京師例，而福建課額併入鹽運司。二十八年，依舊令有司辦之。我朝因仍未

革。後於八分徵銀內支辦。今俱於條鞭彙徵。

右酒課。

權茶。宋天下諸州權場十三，閩有二，曰劍南，曰建州。茶有二類，曰片，曰散。片茶蒸造，實捲摸中串之。惟劍建則既蒸而研，編竹爲格置焙室中，最爲精潔，其名有龍、鳳、石乳、的乳、白乳、頭金、蠟面、頭骨、次骨、末骨、蠟骨、山挺十二等，以充歲貢，洎本路食茶，他處不能造也。凡課額三十九萬一千餘觔。王子京爲轉運使，言：「建州蠟茶，舊立權法，自熙寧權聽通商，自此茶戶售客人茶甚良，官申所得惟常茶，稅錢極微，南方遺利無過於此。」仍行權法。元祐初，罷子京事任，福建禁權州軍仍其舊。我朝權茶建寧一府，茶觔併入條鞭徵價，惟歲餉茶芽五十二觔於光祿，以備上用。

右茶課。

稅契始於東晉，歷代相承，史文簡略，不能盡考。皇朝亦行之。凡民間田土交易，悉送契到官，官印照而稅，從多寡定。

右牙契。

宋南渡以後又有經總制錢、月椿錢、板帳錢，皆展轉取積於細微之間，以助軍費，如增徵商之羨餘，減出納之貫陌云，皆責辦州縣，不及於民。然朱文公嘗論其事，以爲：「自戶部四折而至於縣，如轉圜於千仞之坂，至其址而勢窮矣。縣何所取之？不過巧爲科目以求之民耳。此又與掩耳盜鐘之見無異。蓋其心非有所蔽而不知，特藉此說以誑誤朝聽耳。」皇朝無。

右雜征斂。

市舶稅課。宋崇寧中置在泉州。諸蕃以互市至者，曰大食，曰日本，曰注輦，曰三佛齊，曰靈牙蘇嘉，曰麻逸，曰三嶼，曰白蒲延，曰真臘，曰日囉亭，曰真里富，曰三泊，曰單馬令，曰閩婆，曰占城，曰賓達儂，曰渤泥，曰羅斛，曰雪峰，曰俱輪，曰須華公，曰嚩離，曰佛囉安，曰達囉希，曰吉蘭丹，曰西棚，曰登流眉，曰波斯蘭，曰高麗。唯大食多寶貨，最遠，鮮有至者。三佛齊在海外諸蕃差大，商舶所聚，故貨物自三佛齊至者，往往竊大食以售，而三佛齊所產乳香、安息香、蘇合香油、真珠、琉璃、梔子花，他國無及者。香之所產，以占城、賓達儂爲上。沉香在三佛齊名藥沉，真臘名香沉，實則皆不及占城。渤泥有梅花金腳腦，又有水札腦。登流眉有薔薇水。麻逸、三嶼、白蒲延無奇產。黃蠟、吉貝、水藤、麻苧、楮皮、檳榔子、青桂子、土香等，廣南若雷欽、南恩及海外四州軍多有之。每番舶至，石湖、小兜二寨巡檢封堵，申差入吏坐押至務亭，提舉屬閱視之，辦粗細貨物，抽分如舊法。其細色以萬觔爲一綱，遵陸起發；粗色綱至十萬觔，航海達於京師。其甚賤不堪解運如南海貨物者，官市之，以其價入市舶公錢庫。乳香，舊法官抽其十分之一分一釐，又給度牒爲買本，悉買入官，仍留其價二分，不盡給，以助綱運，歲以三千觔爲綱起解。又有擔腳錢，番舶每一觔算錢一文七分，南海船每一觔算錢一文一分，無引之船每觔收五分五釐，以入公使庫。凡海南不堪物價及乳香價本二分藏官錢庫，以供聖節、大禮、宗子廩給、諸色綱運錢、官吏請給、搬家、宴番、送迎、修造凡經常之費。擔腳錢藏公使庫，以供吏人月食、諸廳夫脚、客軍口糧、宴飲、供送、書司紙割、上亭造食、犒兵卒差使局兵及進奏承受錢凡冗雜之費。細色貨物曰金，曰銀，曰沉香，曰夾煎香，曰箋香，曰細胃頭，曰亞顯香，曰安息香，曰琥珀龜鼈皮，曰夾煎黃熟香，曰膾膾臍，曰木香，曰蘆薈，曰蘇合油，曰珊瑚，曰琉璃，曰火丹子，曰蕃油，曰龍涎，曰金頭香，曰阿魏，曰血竭，曰丁香，曰鹿茸，曰鵬砂，曰

薑黃，曰沒藥，曰米腦，曰腦板，曰速腦，曰朱砂，曰牛黃，曰硫磺，曰臘油，曰梔子花，曰薦耨腦，曰梅花腦，曰金腳腦，曰木札腦，曰赤倉腦，曰丁香母，曰白荳蔻，曰薔薇水，曰薦耨皮，曰鷄舌香，曰兜羅綿，曰沒石子，曰薦耨瓢，曰石碌，曰鬼谷珠，曰番紅花，曰毛絲布，曰瑪瑙珠，曰草竭，曰玳瑁，曰龜筒，曰象牙，曰犀柴礦，曰真珠，曰木珠，曰藥珠，曰頂珠，曰條珠，曰麻珠，曰束香，曰乳香。粗色貨物：曰暫香，曰檀香，曰胡椒，曰黃蠟，曰黃熟香，曰生香，曰丁香，曰香札，曰桂皮，曰茴香，曰蘇水，曰粗熟香，曰降真香，曰修割香，曰肉荳蔻，曰荳蔻花，曰葶澄茄，曰丁香皮，曰洗銀硃，曰土琥珀，曰赤石珠，曰鷄骨香，曰水牛角，曰海桐皮，曰香螺屬，曰大石芍，曰青桂頭，曰烏庫番，曰扶律膏，曰石決明，曰烏紋木，曰花梨木，曰桂花，曰蒔蘿，曰番布，曰訶子，曰犀蹄，曰大黃，曰魚膠，曰胡芹，曰水藤，曰鹿皮，曰香沉，曰榛子，曰魚皮，曰草蓆，曰番絲，曰牛皮，曰鹿皮，曰杏子，曰松子，曰草撥，曰硝砂，曰益智，曰白錫，曰黑錫，曰楮皮，曰麻枹，曰椰子，曰高良薑，曰石花菜，曰麝香木，曰水盤頭，曰赤白藤，曰大肚子，曰吉貝紗，曰帽頭香，曰吉貝，曰松花，曰螺殼，曰芋，曰麻，曰荳，曰布，曰簞。今按我朝朝貢之國，有爪哇者，其國東女人，西三佛齊，南古大食，北真臘，則宋所云大食者，即今爪哇，唐之訶陵國也。今其屬國過我漳泉者，曰加留吧，蓋即此夷而總之貿易於呂宋者也。宋真文忠公志泉州市舶趙崇度之墓，謂「先是，浮海之商以死易貨至，則使者郡太守而下惟所欲刮取之，命曰和買，實不給一錢。蠟珠、象齒、通犀、翠羽、沈腦、董陸諸珍怪物，大半落官吏手，媚權近，飾妻妾，眠以爲常。而賈胡之唧冤茹苦撫膺啜泣者弗恤。而獨崇度爲不然。」則當時之政可知也。元亦通諸番互市，其法大概如宋。皇朝禁海舶，不通諸番。其諸番人貢者，至泉州惟大琉球，所貢番物則市舶司掌之。成化八年，市舶司移置福州。而比歲人民往往入番商呂宋國矣。其稅則在漳之海

澄，海防同知掌之。民初販呂宋，得利數倍。其後四方賈客叢集，不得厚利，然往者不絕也。萬曆三十三年，礦稅役興，有男子張嶷妄上書，言：「夷中有機易山者，產金可採。」嶷因人呂宋國中。漳、泉二郡賈客侈奉之，以爲天使，出入車騎甚都。呂宋夷人慮我欲圖其國，俟嶷去，盡市賈客家刀鐵，一日，聚衆悉擒殺之，漳、泉賈客徒手受刃，死者以數萬計。事竟不敢上聞。而近日賈客尚至其國，爲所厭棄。而我海上禁益嚴。然呂宋本服屬西洋國，其在呂宋者酋長耳，若我之鎮守然，我貨不通，則西洋國王來詰，責呂宋酋不能招商，致其中國資用匱也。東夷，則日本。其於祖法不得販。而私販其國，則得利不貲。顧或有被首者輒得死罪。又或有風水不便，泊舟登岸，爲亡賴惡少所知，往往越人於貨，至於身家亦復不保。夫民急之則無以爲生，寬之則有勾引之慮，此亦異日之憂也。

以上雜課，內多於條鞭徵解，備本省軍餉之需。

上供

唐《通典》：「按令文，諸郡貢獻，皆取當土所出，准絹爲價，多不得過五十疋，並以官物充市，所貢至薄，其物易供。其有加於此數者，亦折租賦，不別徵科。」長樂郡，今福州也，貢蕉二十疋、海蛤一升。清源郡，今泉州也，貢綿二百兩。建安郡，今建寧也，貢蕉二十疋、練十疋。臨汀郡，今汀州也，貢蠟燭二十條。漳浦郡，今漳州也，貢鮫魚皮二十張、香五觔。此唐上供之數也。福州貢紅花、蕉布。建寧貢火箭、石乳、龍茶，又貢龍、鳳等茶練。泉州貢松子，又貢綿、蕉葛。南劍州貢土茴香，又貢茶。漳州貢甲香、鮫魚皮。汀州貢蠟燭。邵武軍貢紵。興化軍貢綿、葛布。此宋上供之數也。其云「又者」，出元豐中所增。又神宗元年，朝廷出諸州貢物名件，自漳州山姜花萬朵已下，至同州楡梲二十顆，凡四十三州七十種，慮

其耗盡民力，詔罷之。徽宗政和七年置提舉御前入觐所。時東南監司、郡守、二廣市舶率有應奉。又不待旨，但送物至都計會，宦者以獻，福建有荔枝、橄欖、龍眼。高宗建炎元年罷其貢。有諸路進奉銀，福建路一萬四千兩，有南郊進奉銀，福建路二萬三千兩。國初貢物甚少。後以經費所需，始派各色物料，有額辦、歲辦、雜辦。額辦有定額，歲辦不常徵，雜辦則於二辦之外又有泛雜之辦也。成弘以來，一切倚辦於該年里甲，而名數煩碎，或增或減，或徵或否，自有司莫能詳其來歷。吏胥因之爲奸，虛派侵剋，歲益滋甚。正德十五年，沈御史行「八分法」，通融諸縣應辦物料，就於八分銀內支解，本府編僉長解，買辦本色，解部交納。嘉靖二十六年，議附縣帖徵銀，解布政司，支應額、歲、雜三辦。此卽《周官·大府》所「掌九貢貨賄之人，頒其貨於內府，頒其賄於外府，以待邦用」者也。異時物料皆徵價，令民市所產地以輸京師，大賈往往設高價待之，物至監司轉交，人吏又責以不中程度，勒取無厭，故有耗折逋欠者。自沈御史行「八分法」於內取辦，及一條鞭法行，併入彙徵矣。

牲口

禮部歲派福建類解光祿寺：肥豬一千三百二十口，鵝一千二百隻，鷄三百四十隻。

皮張

工部歲派：洪武二十六年，定福建一萬張。弘治間，二萬張。狐狸皮一百五十一張。

翎毛

洪武二十六年，定福建五十萬根。弘治間，七十四萬三千九百四十二根。

軍器

軍器：每副盔甲，腰刀各一件，弓一張，弦二條，箭三十枝，撒袋一副，銃箭五枝；每二副加斬馬一、長牌一。弘治三年令各減半成造。福建都司十一衛全造一千七百六十副，減造八百八十副。福建行都司五衛一所全造八百八十副，減造四百二十副。各有司每歲造解：福建弓一萬六千張，箭一十九萬九千九百六十二枝，弦七萬九千九百六十三條。軍衛有司歲額軍器：福州左衛、福州右衛、鎮東衛，以上三衛每衛一百副；福州中衛、福寧衛、泉州衛、永寧衛、興化衛、平海衛、漳州衛、建寧左衛、右衛、延平衛、邵武衛、汀州衛，以上十二衛每衛八十副；鎮海衛六十副；將樂所、武平所、大金所、定海所、蒲禧所、龍巖所、中左所、高浦所、福泉所、銅山所、玄鐘所、六鰲所、永安所、萬安所、金門所、崇武所、梅花所、上杭所，以上十八所每所二十副。各有司歲額民弓：福建弓一萬六千張，箭二十萬枝，弦七萬九千五百條。隆慶三年俱徵解物料。

紙劄

洪武二十六年，定凡每歲印造茶鹽引繇、契本、鹽糧勘合等項合用紙劄，著令有司抄解其合用之數。如庫缺少，定奪奏聞，行移各司府州，照依上年紙數抄造解納。如遇起解到部，隨即辦驗，堪中如法，差人進赴乙字庫收貯聽用。福建四萬張。按自宋以來，有鈔貫文數，莫知其折銀多寡。予讀本州志載，「夏稅」條，每鈔一錠折銀一分五釐。又載：「晉江縣周歲該鈔三十六萬七千一百六十一貫，有閏月加鈔三萬五百九十六貫七百五十文。」如此算則鈔每貫只得銀九釐。「鐵課」條載，鐵每觔折鈔一百二十文，每貫折銀七釐，皆參差不一。考之《大明會典》載，洪武十八年，令浙江等處，凡收折稅糧，鈔每五貫准米一石，銀每兩准米二石。三十年，更定鈔三貫五百文折米一石，銀每兩折米四石。《會典鈔法》條載，每鈔一貫折

銅錢一千文，銀一兩。其等凡六：曰一貫五百文、四百文、三百文、二百文、一百文。每鈔四貫易赤金一兩。嘉靖四年，令宣課分司收稅，每鈔一貫折銀三釐。見「錢法」條款。《大明律》：每鈔一貫折銀一分二釐五毫，又鈔一百五十貫折錢七十文，折銀一錢。豈納賦納贖固自有別，而國初鈔法行則其值重，今日鈔法不行則其值輕耶？因附載於此。

何子曰：余讀諸郡縣志，蓋具談「古者十一而賦，用民之力歲不過三日，君子用一緩二」云。繇古之道，變今之俗，此何異孟氏所謂「貲道」者。蓋徵課不一，約以條鞭，海內以爲大便，不特閩中。顧予里居久，覩朝廷時有恩詔赦免錢穀，起某年盡某年幾分幾分者，而縣已徵解久矣，里甲踵門，必如數輸官，一有不敷，叫呼罵詈隨其後，而以復有司：「民戶輸納不前。」何庸受也！僻遠之邑，冠紳乏人，老舉人歲貢爲之令長，分頭加額，任其恣睢。而大縣之吏以新進甲科爲之，其材力彊智足以壓服，人輒謂上官，以此定優劣。雖云九分爲率，急之不至十分不止。其資高明者，盡徵於公而未必盡輸於公，何可究詰之也！孟氏曰：「若夫潤澤之，則在君與子。」此本夫人之贈智哉。又必有仁心爲質，意不盡民，夙夜在官，不懈於位，悉其耳目聰明，以行於版籍額數之中，則庶幾徵歛不失，民不至困拊揚而竭囊橐，又烏敢望曰蠲曰貸乎哉？

贊曰：民生在衆，匪衆土荒。聚衆在食，匪食人亡。古獻民數，王敬是章。矧爾庶邦，敢不自疆。農事既邵，九穀茂昌。是斂是程，邦有典常。維民可近，亦維易傷。無作怨府，俾其卒養。在昔令貢，土物惟式。禁厥奇巧，以示民極。庶人在官，歲有常職。罔匱其力，亦賦之食。厚生重本，審厥政役。彼憐罔

念，從欲是亟。《大東》既空，《碩鼠》安適？

〔校記〕

〔一〕「太僕寺丞」，各本原作「大使寺丞」，據沈瑜慶、陳衍《福建通志》總卷十五《田賦志》改。

〔二〕「逃閩」，當作「逃關」。

〔三〕「五斗，則米每石折銀三錢七分」，據文義，當作「五斗，則米每石折銀二錢七分」。

〔四〕「六十」與「七十九」之間，當脫「至」字。

〔五〕「閩中十有六」，下文實列十五場。

閩書卷之四十

扞圉志

閩自無諸以兵從番君滅秦，及助漢伐楚，其時軍士必君長自領之。建安八年，孫策始立南部都尉於建安。吳景帝福建有都尉營。晉福州有典船校尉，又有溫麻船屯州兵。唐高祖嘗以其子壽王爲越、福、二州招討海賊使。開元十九年，始置泉州府兵左衛營、右衛營。二十一年，置經略使。至德二年，復置經略、寧海二軍，刺史爲防禦寧海軍使。盜寇既平，易以觀察。至元和，二軍亦罷。宋掌軍官先後有澄海宣義指揮、威果指揮、全捷指揮、廣節指揮、不教閱保節指揮、有馬雄略指揮、壯城指揮、牢城指揮、剩員指揮、都作院指揮、養老寧節指揮等名。其提舉兵馬，則有駐泊兵馬都監，有兵馬都監，又有兵馬都押及押隊官。而統馭之者，郡太守也。故當時稱郡守曰郡將。元設兵戍諸路，有萬戶翼、萬戶府之名。皇朝洪武元年，置六衛於閩中，從其郡名，曰泉州衛，曰建寧衛，曰江州衛，曰漳州衛，曰邵武衛，曰興化衛。四年，置福州都衛指揮使司、建寧都衛指揮使司，復置延平衛。八年，以福州都衛爲福建都指揮使司，置福州左、右二衛；建寧都衛爲福建行都指揮使司，置建寧左、右二衛。十九年，置建陽衛指揮使司，隸福建行省都司。二十年，命江夏侯周德興入福建抽兵防倭，移置衛所當要害處。德興抽兵五千餘人，築城一十六，增設巡檢司四十五，分隸諸衛。《興化隆慶志》：「江夏侯周德興經營海上，建置衛所；又以瀕海地疎節閘目，非一衛一

所能逼制，更設巡司於瑕隙地，司各有寨城，有官，有射手百，間雜以房帳墩臺，斥壤相望，登高望之，若繁星之麗天河矣。自兵政凌夷，巡警失職，當道者遂贅疣之，乃減削射手數，移以餉水陸，兵存在寨堡僅三之一耳。不知巡司絡繹，分別自衛疆場，合則併力剿捕，懸軍犄角，唇齒相依。又附寨村落去郡城迫邇，有警各携老稚，挾衣糧馳入寨城避鋒鏑，此又堅壁清野意也。昔宋燕達守延州懷寧寨，以五百兵破羌胡三萬騎，彼其官非巡尉，兵非射手邪？「此亦有昧乎其言也。」二十一年，置福建沿海五衛，曰福寧，曰鎮東，曰平海，曰永寧，曰鎮海；千戶所十二，曰大金，曰定海，曰梅花，曰萬安，曰莆禧，曰崇武，曰福全，曰金門，曰高浦，曰陸鰲，曰銅山，曰玄鐘；置福州中衛。二十四年，置武平千戶所，將樂千戶所；以福建都指揮使司領福州左、右、中及福寧、鎮東、興化、平海、泉州、永寧、漳州、鎮海十一衛，以福建行都指揮使司領建寧左、右、延平、汀州、邵武五衛及武平、將樂二千戶所。宣德八年，增設浦城縣盆亭巡檢司。景泰五年，調邵武衛後千戶所，置永安守禦，隸延平。六年，上杭草寇竊發，命選行都指揮之有才幹者守備汀、漳二府。成化七年，以龍巖山賊肆竊，抽調漳州衛中所，鎮海衛後所，置守禦千戶所於龍巖，曰中中千戶所。十三年，調撥建寧右衛前所置浦城。弘治十七年，調漳州衛後所置南詔。嘉靖四十二年，以閩中連歲苦倭，議設總兵鎮守，春秋二季駐福州，夏冬二季駐鎮東；設五寨欽依把總，以烽火、南日、浯嶼三寨爲正兵，小埕、銅山二寨爲奇兵。又爲之分汛地，嚴會哨。復分福建地方爲三路：以福寧爲北路，轄福寧衛所軍，并陸營兵，烽火、小埕二寨；興化爲中路，轄福州、興化、平海、泉州、永寧各衛所軍，并南日寨、興、泉二府陸營客兵；漳州爲南路，轄漳州、鎮海二衛所軍，并浯嶼、銅山二寨及漳州陸兵，各設立參將駐劄。尋改中北二路參將爲守備，以都指揮行事。隆慶□年（一），設浯銅、海壇二游兵把總。萬曆四年，以南澳屬閩廣之交，設副總兵專駐，協守漳、潮，又設玄鐘游兵隸焉。而北路守備，二十

年，仍改爲參將，二十二年，仍改建寧行都司爲守備。二十三年，復題改中路守備爲游擊將軍，以便彈壓。

都司衛所

福建都司

福州中衛 隸所五：左、右、中、前、後，各有千、百戶。凡五。

福州左衛 隸所六：左、右、中、前、後、中左，各有千、百戶。凡六。

福州右衛 隸所六：左、右、中、前、後、中左，各有千、百戶。凡六。

興化衛 隸所五：左、右、中、前、後，各有千、百戶。凡五。

泉州衛 隸所五：左、右、中、前、後，各有千、百戶。凡五。

漳州衛 隸所六，各有千、百戶。左、右、中、前、後，凡五。弘治十七年，有賊百餘詐稱公使人詔安

城，殺傷甚衆。明年，調後所官軍守詔安，曰南詔千戶所。僅四。龍巖中中守禦千戶所，南詔守禦千戶

所。凡六。

福寧衛 閩上游也，隸所七，各有千、百戶。左、右、中、前、後，凡五；墩臺二十一。大金守禦千戶

所，定海守禦千戶所，在連江縣，二所墩臺共十七。凡七。

鎮東衛 隸所七，各有千、百戶。左、右、中、前、後。梅花守禦千戶所，在長樂縣東。萬安守禦千戶

所。凡七。

平海衛 去興化府城東九十里，扼海上衝。北峙草嶼、連盤，東控鷓鴣、烏坵，西挹湄洲，與琉球、日

本相望，莆藩籬喉舌也。隸所六，各有千、百戶。左、右、中、前、後，凡五，墩臺十二。莆禧守禦千戶所，與湄洲山對峙，自莆至中門爲地極處，一線而通，左支自賢良港而出吉了，散而東湖、西亭諸山。右支自金沙鋪而東，出莆禧，散而文甲、山柄諸山。其人習海，勇敢而和，聞賊，奮號先登，城以不陷，寇人其郭，古屋舊閭，無所殘毀。墩臺五。凡六。其汛地曰次衝。

永寧衛 東濱大海，北界祥芝及浯嶼寨，南連深滬、福全，爲泉襟裾。隸所十，各有千、百戶。左、右、中、前、後，凡五。墩臺八。崇武守禦千戶所，在惠安縣極東，北接湄洲，界於興化，南連泉城之日湖，東而距海，南峙祥芝，泉上游也，墩臺二十二。福全守禦千戶所，在晉江縣南，三面跨海，西通陸附，所有大留、圳上一澳，要衝也，墩臺十。金門守禦千戶所，在同安縣浯洲嶼，西連烈嶼、中左，南達擔嶼、鎮海，料羅盡其東，官澳極其北，用七更可至澎湖，同盡處也，墩臺十三。中左守禦千戶所，在同安縣嘉禾嶼，海中峙也，東抵烈嶼、金門，南至大海一百里與擔嶼相會，西與海澄、五澳合界，北至同安內港，與高浦相望，墩臺九。高浦守禦千戶所，在同安縣□□都，爲同西障，墩臺七。凡十。

鎮海衛 隸所七，各有千、百戶。左、右、中、前凡四，墩臺九。陸鰲守禦千戶，墩臺五。銅山守禦千戶所，墩臺三。玄鐘守禦千戶所，閩南盡處也，墩臺七。凡七。

福建行都司舊有建陽衛、革。

建寧左衛 隸所五：左、右、中、前、後，各有千、百戶。凡五。

建寧右衛 隸所六，各有千、百戶。左、右、中、前、後，凡五。浦城守禦千戶所。凡六。

延平衛 隸所六，各有千、百戶。左、右、中、前、後，凡五。永安守禦千戶所，景泰初，沙、尤寇起，調

邵武右所於此守禦。凡六。

邵武衛 隸所四，左、右、中、前，各有千、百戶。凡四。

汀州衛 隸所五，各有千、百戶。左、右、中、前、後，設在洪武初。二十四年，廣寇擾武平，撥中所官軍往守禦，旋別調補缺。成化二年，上杭溪南寇起，撥右所官軍往守禦。今四。上杭守禦千戶所，在縣北隅。凡五。

將樂守禦千戶所。

武平守禦千戶所，東界長汀，西界江西安遠，南界廣東程鄉，北界江西贛縣。

以上二所，直隸行都司。

鎮守、寨、游

督撫軍門 標下游擊，管領四營二游：曰標前營、標左營、標右營、標後營，曰標前游、標左游，皆名色把總領之。遇汛，標前一營防守省城，餘三營二游各掣撥二哨，分布割守沿海地，如長樂之魁洞墩、閩縣之閩安鎮、侯官之雲嶺關、連江之館頭墩、東庠墩、羅源之濂澳、寧德之鑑江，爲次衝。

鎮守總兵 標下坐營官，統領一營二游，曰新前營，曰標前游、標右游，皆名色把總領之。遇汛，各分兵割守沿海地，東營、牛田、松下、小社曰最衝，江頭、白鶴、江田、大社曰次衝。汛畢，標前、標右二游專駐鎮東備倭。

分守北路參將 標下浙營一、土營二，俱住福寧州，皆名色把總領之。遇汛，各掣撥兵一哨，割守沿海地下游堡、閩峽堡、大金所、三沙堡、黃崎堡、沙埕墩、鑑江、漳灣。

烽火寨，欽依把總一員。水寨也，設在國初。北界浙江蒲門，南界連江濂澳。曰礮山，曰大金，曰浮羅，曰箬頭幫，其汛地也，爲最衝。嘉靖中，巡撫譚綸，總兵戚繼光定會哨地：如倭賊由浙而南，則烽火門分兵北割井下門，與浙船會；而南則與小埕會哨於西洋山。其後把總朱璣以汛地延袤三百餘里，難速及，請分兵船爲二枝，一泊官澳，一泊崙山。後又分左、右、前、後爲四哨守之。萬曆二十年，復增中哨，防守三沙。

小埕寨，欽依把總一員。水寨也，在連江縣定海所前，爲省會門戶。白犬山、竿塘山、東湧山、東洛、西洛，其汛地也，爲最衝。其會哨地，北則分割於西洋，與烽火會；南與南日會哨於梅花所之南茭。

臺山游，名色把總一員。地屬福寧，孤島也，當閩之上游。

崙山游，名色把總一員。與臺山相峙外海，福寧門戶也。滋澳西洋、沙埕、官澳，商舶所經，海寇出沒焉，其汛曰次衝。

五虎游，名色把總一員。游在大海中。又一五虎也，爲陸海。

分守中路游擊 標下興化前營，名色把總一員。營在興化南門外，浙兵也。遇汛，輪撥一哨東戍莆禧、文甲門沿海地；又撥三隊目兵北守三江，據險分布，固莆門戶。其餘屯割本營操練，防守城池。興化左營，名色把總一員。營在府城北門外，浙兵也。遇汛，輪撥一哨東戍賢良澳沿海地；又撥三隊目兵守三江，皆與前營官兵俱。賢良，莆禧右臂也。地瘠民少，勇悍而好鬪，習海捕鮮，耕荒坵，植麥豆。平海右營，名色把總一員。營在平海城南門外，浙兵也。遇汛，分布嵌頭、青山、蔡山、南哨沿海要害。泉州舊營，名色把總一員。營在泉州東門外。遇汛，輪撥三哨出守安海、料羅、圍頭、福全汛海地，一哨防守城

池。泉州新營，名色把總一員。營在泉城北門外。遇汛，輪撥三哨出守崇武、大岞、小岞、古雷、永寧、沙隄沿海地，一哨防守城池。

南日寨，欽依把總一員。水寨也。故在興化青山巡司之東環嶼二十里，在海中，中湧淡水，島寇從南北來，必此汲。國初置戍。成化末移吉了，民無保障，相率西徙而山空。烏坵、苦嶼、東甲、西寨，其汛地也，爲最衝。其會哨地，北則分割於松下，移至南茭，與小埕會；南則與浯嶼會哨於平海衛之湄州。

海壇游，名色把總一員。游在福清海壇山。洪武初，徙壇民於內地，盜藪焉。中湧淡水，島夷南北來，必此汲。隆慶初始建游兵鎮守。東庠、觀音澳，其汛地也，爲最衝。

湄洲游，名色把總一員。湄洲，嶼也，在莆禧東海島間，天妃之神所產地。嶼故有居民，皇朝初內徙。山多茂草，可樵採，馬匹騾驢數十成群，自孳自牴。人驟逐之，不可得。勢家主之，徐取以鬻。隆慶初，設游兵於此。湄洲山、大岞、小岞，其汛地也，內有淡水，島寇時來汲，曰最衝。

分守南路參將 標下前部中營，名色把總一員。營在漳郡西門外，浙兵也。萬曆十一年以山寇吳雙引之亂設，守府城。遇汛，輪撥隊兵沿海擺塘哨探。前部左營，名色把總一員。萬曆初設。浙兵也。防守銅山沿海地，兼備油柑嶺、鳳山等孔道。前部右營，名色把總一員。土兵也。在陸鰲所，北抵莆頭，南至古雷沿海地。遇汛，輪撥擺塘哨探，并守雲山鎮地，備山寇。

銅山寨，欽依把總一員。水寨也，在詔安縣銅山所西門澳。舊建井尾澳，景泰間移今所。北自金石以接浯嶼，南自海嶺以達廣東，漳郡濱海重鎮也。其信地，鎮海、陸鰲、古雷、甘山、菜嶼曰最衝，崎尾、井尾、莆頭、劉澳、蘇尖曰次衝。會哨地：北則二哨屯割舊浯嶼，又二哨屯於沙洲，自此而南則爲廣東界。

泉南游擊 天啟初以紅夷設，轄浯嶼、浯銅二游。浯嶼寨，欽依把總一員。水寨也，在同安極南，孤懸大海中，左連金門，右臨岐尾，水道四通，爲漳州、海澄、同安門戶。國初建寨焉。久之，以其孤遠，移入廈門，而寨名仍舊。廈門者，中左千戶所嘉禾嶼地也。嘉靖戊午，倭泊浯嶼，入掠興、泉、漳、潮，據之一年乃去。巡撫譚綸、總兵戚繼光請復寨舊地。尋復以孤遠罷。萬曆三十一年，有夷舟至泉城下，不覺，當事者因移建郡東之日湖，是去郡三十里，不禦門戶守堂奧矣。其信地，則惠安之崇武、晉江之祥芝、永寧、圍頭、同安之料羅曰最衝，惠之獺窟、同之官澳曰次衝。其會哨地，北則分割於湄洲，與南日會；南則與銅山會哨於料羅之擔嶼。

浯銅游，名色把總一員。游在同安縣東嘉禾嶼中左所，與高浦所連界。烏嘴尾、烈嶼，其信地也，曰最衝。汛時，分兵二哨，一屯舊浯嶼，一屯大擔嶼，與浯嶼兵合哨。

鴻江游，名色把總一員。

澎湖游，名色把總一員，南路、泉南俱轄之。游，晉江海外絕島也。語在晉江方域志。洪武間，居民內徙。嘉靖季，賊曾一本、林鳳據爲巢穴。萬曆壬辰，朝鮮告變，倭且南侵。議者謂不宜坐棄澎湖，因設兵往戍之。其島周圍三十六嶼，北起北山，南盡八閩澳。北山、龍門港、丁字門、西嶼頭，倭要路也，曰最衝。娘宮、前蒔、上澳曰次衝。春汛以清明前十日爲期，駐三箇月，冬汛以霜降前十日爲期，駐二箇月，浯、銅二寨分兵爲聲援。汛畢，衝要地各有兵船哨守，命曰小防。

建寧守備一員。土兵也。營在建寧府城。建安、甌寧、建陽、崇安四縣地方，其信地也。

汀漳守備一員。舊設聽南贛參將節制。弘治三年，議駐武平千戶所，往來上杭提督捕賊盜。象洞、

懸繩峰隘、蟠龍岡、鄭家坪隘，其信地也。

協守漳潮南澳副總兵一員。澳在漳、潮二州海島中，四面阻水可三百里，潮則通拓林，漳則通玄鐘，山高而隩，地險而腴，歷代居民率致殷富。成化中，有奸民作梗，始悉徙於內地。嘉靖季，海寇許朝光、吳平等據爲巢穴，勾倭內訌，罷敝二省。數年乃撲滅之。隆慶初，兩廣總制、閩巡撫議題設險善後。朝命建鎮城，設協守漳潮副總兵一員守之。漳、潮近地兵將戍所悉聽指揮。寇至，出舟師追逐，寇在閩，毋得以走廣辭；在廣，毋得以走閩辭。比來生聚教訓，有《詩》、《書》絃誦焉。標下福營把總一員。營在鎮城，與廣營協守城池。汛時，輪撥隊兵沿海擺塘哨探。

南澳游，欽依把總一員。官署二，一在南澳鎮，一在玄鐘所。宮前澳、彭山、雲蓋寺，其信地也，曰最衝。玄鐘、走馬溪曰次衝。

各府巡檢司附

福州府舊有古田縣谷口、杉洋各巡檢司，革。

閩縣五虎門官母嶼巡檢司，巡檢一員。閩安鎮巡檢司，巡檢一員。其地海門也，客旅魚販廣、浙往來所經。

侯官縣竹崎巡檢司，巡檢一員。五縣寨巡檢司，巡檢一員。

長樂縣松下巡檢司，巡檢一員。石梁蕉山巡檢司，巡檢一員。司在十五都，山瀕海，東有磁澳，寇衝也。小祉山巡檢司，巡檢一員。

連江縣北茭巡檢司，巡檢一員。

永福縣際門巡檢司，巡檢一員。

福清縣壁頭山巡檢司，巡檢一員。牛頭門巡檢司，巡檢一員。澤朗山巡檢司，巡檢一員。

泉州府舊有德化縣高鎮、安溪縣源口渡、同安縣塔頭、田浦、亭溪、陳坑各巡檢司，俱革。

晉江縣祥芝巡檢司，巡檢一員。司在二十都，距縣五十里，東抵外洋大海，南至永寧，及郡城，與崇武所相對。深滬巡檢司，巡檢一員，司在十六都，去縣七十里，東濱大海，北永寧衛，南福全所，西鄰潯尾，通南日，接銅山，由深滬抵永寧間爲佛堂澳，可泊舟。海寇出入必經門戶也。烏潯巡檢司，巡檢一員。司在縣十六都，南臨大海，東接深滬，西連福全，有圳上澳在深滬、福全間。圍頭巡檢司，巡檢一員。司在縣十四都，去縣百里而遙，東南闕海，南連汭洲一帶內港。宋時防海軍去城甚近，守真德秀移戍於此。

南安縣石井巡檢司，巡檢一員。司在四十三都石井，以防南汛，去縣八十里，山勢陡拔，寨門外大海也。同安浯洲渡船由此往來，晉江安平商船亦出入於此。

惠安縣峰尾巡檢司，巡檢一員。司北障沙格，南距黃崎，倚於興化吉了。湄洲島峙，盜船多泊於此，兵船番汛焉。左支一潮入於楓亭、黃崎，對峙如門，而輞川居其內，諸商所集地也。小岞巡檢司，巡檢一員。司在縣三十都界，去縣四十里，城立山巔，前盱大岞，後盼黃崎，四面環海，嶼前後皆爲灣澳，賊舟登岸可虞也。黃崎巡檢司，巡檢一員。司在縣正東三十里，高山特起，下瞰無際大海，湄洲、南日在其東北，正北峰尾，正南小岞，互爲犄角，而黃崎尤險要，海多礁嶼，生寇昧水道，不敢徑至。達輞川，一潮水也。獺窟巡檢司，巡檢一員。司在縣南三十里，島峙海中，北障前頭山，南繫覆釜，南北風皆可使舟，舟人泉港必經，岱嶼、祥芝在外，烽火可相應。

同安縣官澳巡檢司，巡檢一員。司在縣東南之浯洲，去峰上二十里。峰上民勇戰鬪，置精兵其處，倭來必不越而攻官澳。然非官澳，則峰上守亦孤，唇齒輔車也。峰上巡檢司，巡檢一員。司居浯洲最東，其澳曰料羅，同海外大嶼、小嶼、古浪、烈嶼諸島相望。而浯洲嘉禾爲壯。衛以峰上、官澳、烈嶼、白礁四巡司，高浦、金門、中左三所，可爲犄角。而料羅則泉門戶，宜急守。烈嶼巡檢司，巡檢一員。司於浯洲，爲外嶼，絕海上，城據險乘高，與金門隔潮並峙。海上有警，則烈嶼先受其鋒。船兵汛守焉。白礁巡檢司，巡檢一員。司地錯入龍溪，負山面海，陸則咫尺孔道，水則瞬息海澄。民貧慄悍，賊故不犯。而沈命之徒時出沒。

建寧府

建安縣籌嶺巡檢司，巡檢一員。司在南才里龍門頭，距縣百里。

甌寧縣營頭巡檢司，巡檢一員。司在水吉營頭街，距縣百一十里。正統四年設。

崇安縣分水關巡檢司，巡檢一員。司，南唐之閩王寨，宋之大安驛也。轄桐木、觀音、寮竹、蕉嶺、溫林、岑陽六小關，境接楚越，地當衝衝。

浦城縣盆亭巡檢司，巡檢一員。司在縣西北安樂里。高泉巡檢司，巡檢一員。司在縣東高泉里。溪源巡檢司，巡檢一員。司在孝弟里太平橋。

政和縣赤巖巡檢司，巡檢一員。司在東里十五都，地隸壽寧，官隸政和。

松溪縣東關巡檢司，巡檢一員。司舊在縣南東關里仰屯。永樂間遷馬鞍嶺。嘉靖八年遷鐵嶺。今遷峽橋。二十四都巡檢司，巡檢一員。司在豪田里，去縣八十里。

壽寧縣漁溪巡檢司，巡檢一員。司在斜灘。

延平府舊有大田縣英果、安仁各巡檢司，俱革。

南平縣嶺峽巡檢司，巡檢一員。司在長北里。大曆巡檢司，巡檢一員。司在壽儼里。

將樂縣萬安寨巡檢司，巡檢一員。司在縣北萬安上都。

大田縣桃源店巡檢司，巡檢一員。司在縣西桃源社。花橋巡檢司，巡檢一員。嘉靖十五年設。

沙縣北鄉寨巡檢司，巡檢一員。司在縣北七十里。

尤溪縣高才坂巡檢司，巡檢一員。司在縣西十九都。

順昌縣仁壽巡檢司，巡檢一員。司在縣西北仁壽都。

永安縣安砂巡檢司，巡檢一員。司在縣西三十二都。湖口巡檢司，巡檢一員。司在縣南三十都。正

統五年設。

汀州府

長汀縣古城寨巡檢司，巡檢一員。寨在府城西南古貴里。

寧化縣安遠寨巡檢司，巡檢一員。寨在縣治北招得里。

武平縣象洞寨巡檢司，巡檢一員。寨在縣南盈塘里，界潮州之程鄉。永平寨巡檢司，巡檢一員。在

背寨，通羊角、水路，去縣八十里。

清流縣鐵石磯頭巡檢司，巡檢一員。司在縣南夢溪里鐵石磯。正統六年設。

連城縣北團巡檢司，巡檢一員。司在縣南表席里朗村。

歸化縣夏陽巡檢司，巡檢一員。司在縣東中和里夏陽墟。

永定縣三層嶺巡檢司，巡檢一員。司在縣南金豐里。皇朝成化十四年，巡撫右僉都御史高明以地接廣東饒平之大、小靖，頑民恃險，出沒爲盜，奏置於此。興化鄉巡檢司，巡檢一員。司在縣東太平里高陂。正統年置。

興化府

莆田縣迎仙寨巡檢司，巡檢一員。寨在府治東北四十里，莆、清之交也。前臨海，後負江口、長橋。水自荻蘆溪東流數十里合江入海。地饒民衆，商賈所湊，奸宄穴焉。冲沁寨巡檢司，巡檢一員。寨在府治東六十里，三面阻海，與岐頭、三江澳港相接。原卽山巖建石爲城，下多村落，海上烽起，則歛民入城，與弓兵共守。其民歲販糖餠稻麥之屬，浮溫、台、泉、潮，貿易爲利。嵌頭巡檢司，巡檢一員。寨距莆東西九十里，介山海間，賈泊寇船，什沓往來。城在石崖之嵌，漁農數百餘戶，聯延其址。青山寨巡檢司，巡檢一員。寨距縣治東九十里而遙。東、西、南三面阻海，夷舟多繇此入。而南日山峙其南，渡海不五十里，莆門戶也。吉了寨巡檢司，巡檢一員。其地宋曰擊蓼，距郡城八十里，前控南網，右引小嶼，左帶湄洲。居民業海，貨貨輻輳，市廛聯絡。城枕海涘，巨浪觸噬，歲費修築。東有吉了水寨。大洋巡檢司，巡檢一員。司距郡城八十里，東抵仙游，西至白沙，南福清，北永福，地當四邑衝。山谷中居民星散，奸宄易叢。萬曆中，廣業里有嘯聚，置司焉。

仙游縣白嶺寨巡檢司，巡檢一員。司，故小嶼寨也，在莆大海中。嘉靖三年，令蕭弘魯以縣白隔嶺迫近山寇，奏請移司於此。

邵武府舊有軍日巡檢司，廢。

邵武縣水口巡檢司，巡檢一員。司在縣東十六都。

光澤縣大寺寨巡檢司，巡檢一員。司在杉關。

建寧縣西安巡檢司，巡檢一員。司在丘坊隘。

漳州府舊有漳浦縣東沈、赤山、龍巖縣東、西洋、南靖縣、小溪、寒溪、九龍嶺、漳平縣桃源、溪南各巡檢司，俱革。

龍溪縣柳營江巡檢司，巡檢一員。司在縣東二十七都柳營江西。洪武三年，設爲柳營江掣制所，隸都轉運鹽使司。十四年，改爲批驗鹽引所。正統九年，御史張淑奏改巡檢司。

漳浦縣青山巡檢司，巡檢一員。司在十五都。井尾巡檢司，巡檢一員。司在二十三都。古雷巡檢司，巡檢一員。司在縣南九都。後葛巡檢司，巡檢一員。司在九都。盤陀嶺巡檢司，巡檢一員。司在縣八都。正統間設。

龍巖縣鴈石巡檢司，巡檢一員。司在節惠里。

南靖縣永豐巡檢司，巡檢一員。司在縣南寒瀨徑。

長泰縣溪口巡檢司，巡檢一員。

漳平縣歸化巡檢司，巡檢一員。司在本縣下流瀾溪口。

平和縣漳汀巡檢司，巡檢一員。司在清寧里蘆溪社。

詔安縣洪淡巡檢司，巡檢一員。司在五都北埔。金石巡檢司，巡檢一員。司在五都山東社。漳潮分界巡檢司，巡檢一員。司在縣西二十五里。

海澄縣濠門巡檢司，巡檢一員。司在縣東一、二、三都。島尾巡檢司，巡檢一員。司在二十三都。海門社巡檢司，巡檢一員。司在縣南四、五都青浦社。舊置海門山。正統六年，知府甘瑛以海門民悍，時爲海患，奏置司控馭之。七年盡徙其民，散處近地，遂移司於青浦。

福寧州舊有松山巡檢司，革。

大箕簷巡檢司，巡檢一員。司在秦嶼堡。青灣巡檢司，巡檢一員。司在牙裏堡。蘆門巡檢司，巡檢一員。司在桐山堡。高羅巡檢司，巡檢一員。司在四十三都間峽堡。延亭巡檢司，巡檢一員。司在五都下滸堡。柘洋巡檢司，巡檢一員。司在三十三都。司城，元末中書參政袁天祿築以團義兵，保州境。皇朝正統六年置。

福安縣白石巡檢司，巡檢一員。司在三十四都黃崎鎮。

寧德縣東洋麻嶺巡檢司，巡檢一員。司在六都雲淡門。

右官守、要害。

宋有天下，懲藩鎮之敝，所在擁兵，念其難合，而慮其復發，令諸州召募軍士，部送闕下。上者以備禁旅，其次以還戍於諸州。大自藩府，小至郡縣，皆有京師兵，曰禁兵，又曰屯駐，又曰屯泊，又曰就糧軍，皆禁兵也。諸州募而部送闕下者，皆壯勇士，所募之餘，則以給役於州城，以備畜牧、繕修之用。福建有三軍焉：曰水軍，曰保節軍，曰崇節軍。水軍置在福、建、漳、泉、邵武，保節置在建、汀、南劍，崇節置在福、漳、泉、興化，皆步軍也。是名曰廂兵。康定初，趙元昊反，西邊用兵，禁兵外戍乏人，令諸州益募土兵爲「就糧軍」。其時，福建之管曰宣毅，福建路州二，泉、南劍、漳、汀、邵武、興化各一，凡二百八十人。西

師罷，省「宣毅」名，寢廢。其後，議者謂「東南雖安，不宜弛備」。嘉祐四年，詔諸州募就糧軍「威果」各營於本州，又益遣禁軍駐泊，長吏兼本路兵馬鈐轄，選武臣爲都監，專主訓練。治平三年定諸路禁軍額數，福建路得四千五百人。熙寧中，改三步軍號，並名「保節」，隸三十三指揮，一萬一千一百五十人。元豐二年詔團結東南路諸軍，分兵置將，東南共十三將，而福建路居第十，其名曰將兵。建炎以後，兵制靡定。其禁軍在福建者，有「威果」、「廣節」之名。廂兵在福建者，有「寧節」、「豐國監」之名。此外又有選自戶籍，或土豪應募在所團結訓練者，曰鄉兵。而福建搶仗手之名最著。靖康初，臣僚言：「天下步兵之精，無如福建路搶仗手，出人輕捷，得其術，可一當十。」於是召募「應詔搶仗手」者。廖恩爲盜，福建路以搶仗手捕殺之，故以得名。而建寧則有壯丁民社。其建自乾道。福州有忠義民兵。開禧中推其法於諸路。忠義民兵其初爲忠義社團，結邑民中，擇豪右長之，量授衣甲；其後盜用以息，故開禧中推行之也。又建炎後置有「砦兵」。福建路邵武軍十砦：同巡巡檢、大寺、水口、永安、明溪、仁壽、西安、永平、軍口、梅口。建寧府七砦：黃崎、籌嶺、盆亭、麻沙、水吉、苦竹、仁壽。南劍州八砦：嶺峽、洛陽、浮流、巖前、同巡、仁壽、萬安、黃土。泉州五砦：都巡、同巡、石井、小兜、三縣。福州四砦：辜嶺、甘蔗、三縣、水口。興化軍二砦：同巡、巡檢。漳州二砦：同巡、虎嶺。此則各據險阨之處，逐捕盜賊。而皇朝巡司之設所由昉也。皇朝置衛所於天下，以開國靖難之人爲之指揮千、百戶。或檢戶丁，或調他省，或配有罪，籍爲軍，曰衛兵。亦宋人禁兵之意也。衛兵有三：曰征操軍，曰屯旗軍，曰屯種軍。征操軍入則守城，以時訓練，謂之「見操軍」；出則守寨，按季踐更，謂之「出海軍」。洪武二十年，遣江夏侯周德興經略海上防倭戍守。德興刺福、興、泉、漳四郡，民三丁抽一以爲軍，於是有沿海軍衛。衛所初定，民未習土，率潛離城戍。二

十五年，互調其軍於諸衛。故今海上衛軍不從諸郡方言，尚操其祖音，而離合相間焉。屯旗軍者，國初，奉紅牌及樣田事例之屯軍也。屯種軍者，屯田軍也。江夏侯又沿海置巡檢司，藉兵守之，謂之弓兵。亦宋初廂兵、宋末砦兵之遺意也。其始籍民爲弓兵也，往役者復其家。弘治中，以田賦定差役，而民間僱值倍之。嘉靖季，閩中中倭，軍門議各司弓兵多逃，始司減其兵數，兵減其僱值，徵其贏充軍餉，巡檢、弓兵之名徒存而已。景泰而下，則復有機兵之設。始，國初置軍衛，立弓兵，本以防禦寇盜也。景泰間，柄兵者建議：「凡臨敵失一軍以上，與失機同罪。」於是設機兵焉。其初招募民壯，官給鞍馬器械，復其本戶丁糧。弘治初，今年二十以上五十以下者充之。州縣八百里者，里二人；五百里者，里三人；三百里者，里四人；一百里以上者，里五人。春、夏、秋每月三操，冬則操三歇三。遇警調遣，官給行糧，而工食則給於里甲丁糧。至正德，法廢，乃取之田賦，役者僱直，官歲給之，用以守關隘、追盜賊。巡捕官督焉。此又宋鄉兵之遺意也。嘉靖季，閩中倭，軍門又於其中選爲標兵，隸麾下，奏增機兵之宜，而減其數，收贏以足餉。復以倭變增兵。而土兵、客兵起焉。土兵，土著之兵也。招聚郡民，聚處教場，統以將領，曰土營。客兵者，浙兵也。倭之猖獗也，浙參將戚繼光以所練義烏兵來援，屢與倭戰有功，卒平定之。軍門譚綸奏留其兵，分成八郡。而軍門、總兵聚兵省會尤多，統以將領，曰浙營。

凡軍衛軍，月給米八斗；如銀，則月四錢。外衛所軍有出海及守煙墩者，月給米一石，銀則月五錢。更有選練備戰餘丁，亦月給米八斗。軍戶有幼弱老疾者則優恤之，或月米七斗、六斗、三斗各有等差；如銀，則視其斗數以定多寡。屯旗軍、屯種軍二門，第歲受日數，輸糧於官，並不霑官餽。弓兵，弘治間每名銀七兩二錢，嘉靖季減爲五兩有奇。機兵，正德間，官給僱直七兩二錢；嘉靖季，減數增直；萬曆五年軍

門龐尚鵬并減增直之數，輸賦者便之。

福建都司

福州中衛：旗軍五千七百一十八名，舊額也，今千五百五名；屯種軍百三十九名，種屯軍千五百九十三名。

福州左衛：旗軍六千七百二十名，舊額也，今二千五百五十三名；屯種軍六十六名，種屯軍千六百九十七名。

福州右衛：旗軍七千四百九十一名，舊額也，今二千三百五十六名；屯種軍七十七名，種屯軍千六百九十八名。

興化衛：操、屯、旗軍六千八百八十九名，舊額也。今旗軍七百十七名，餘丁三百五十九名。

泉州衛：操、海、屯種、旗軍六千四百四十七名，舊額也。今操、海、旗軍餘丁共千二百三十六名。屯種軍三百四十四名。

漳州衛：操、屯、旗軍四千九百餘名，舊額也。今旗軍七百六十八名。龍巖中守禦千戶所：操、屯、旗軍千一百八十餘名，舊額也。今旗軍三百三十一名。南詔守禦千戶所：操、屯、旗軍千一百八十餘名，舊額也。今旗軍二百九十名。

福寧衛：操、屯、旗軍五千六百餘名，舊額也。今旗軍舍餘千五百二十六名。定海守禦千戶所：操、屯、旗軍千五百二十名，舊額也。今出海旗軍舍餘八百九十九名。大金守禦千戶所：操、屯、旗軍千一百二十名，舊額也。今出海旗軍舍餘八百四名。

鎮東衛：旗軍八千六百八十七名，舊額也。今操軍九百五十名，出海軍四百六十名，標兵軍三十七名，屯種軍三百二十一名，屯旗軍千四百三十二名。梅花守禦千戶所：旗軍千四百五十八名，舊額也。今操軍三百二名，出海軍四百二十九名。萬安守禦千戶所：旗軍千四百九十九名，舊額也。今操軍五百六十八名，出海軍四百四十名。

平海衛與鎮海衛對調，旗軍五千五百十六名，舊額也。今旗軍舍餘九百九十二名，出海軍餘百八十八名。莆禧守禦千戶所與銅山所對調，旗軍千二百二十一名，舊額也。今軍餘七百十七名，出海軍三百十名。

永寧衛：操、海、屯種、旗軍六千九百三十五名，舊額也。今操、海、旗軍千三百九十四名，屯種、旗軍七百八十三名。崇武守禦千戶所：操、海、屯種、旗軍千二百二十一名，舊額也。今操、海、旗軍六百二名，屯種、旗軍百九十四名。福全守禦千戶所：操、海、屯種、旗軍五百七十五名，舊額也。今操、海、旗軍百一十六名，屯種、旗軍百一十七名。金門守禦千戶所：操、海、屯種、旗軍千五百三十五名，舊額也。今操、海、旗軍六百十八名，屯種、旗軍七十四名。中左守禦千戶所：操、海、旗軍千二百四名，舊額也。今差操六百八十四名。高浦守禦千戶所：操、海、屯種、旗軍千二百五十八名，舊額也。今差海、旗軍五百八十八名，屯種、旗軍二百一名。

鎮海衛：操、屯、旗軍四千九百餘名，舊額也。今旗軍七百六十三名。陸鰲守禦千戶所：操、屯、旗軍千一百九十餘名，舊額也。今旗軍四百八十名。銅山守禦千戶所：操、屯、旗軍千一百九十餘名，舊額也。今旗軍三百六十七名。玄鐘守禦千戶所：操、屯、旗軍千一百九十餘名，舊額也。今旗軍三百三十

二名。

福建行都司

建寧左衛

建寧右衛

浦城守禦千戶所

延平衛：操、屯、旗軍五千六百名，舊額也。今操、旗軍千九百八十二名，屯、旗軍千七百五十名。

永安守禦千戶所：操、屯、旗軍千一百二十名，舊額也。今操、旗軍五百六十八名，屯、旗軍百一十二名。

邵武衛：操、屯、旗軍四千四百八十名，舊額也。今旗軍千五百七十二名，屯軍五百十三名。

汀州衛：操、屯、旗軍四千四百八十四名，舊額也。今旗軍二千三百有奇。上杭守禦千戶所：操、屯、旗軍千一十餘名。

將樂守禦千戶所：操、屯、旗軍千一百二十名，舊額也。今操、旗軍七百六十六名，屯、旗軍百五十四名。

武平守禦千戶所：操、屯、旗軍千三百餘名。

督撫軍門標下游擊：標前、標右二營，標前、標左二游，各浙兵四百五十名，歲餉大約銀各五千五百六十六兩有奇。標右、標後二營，各土兵四百五十名，歲餉大約銀各五千七兩有奇。

鎮守總兵標下坐營官：標前游營、新前營各浙兵四百五十名，歲餉大約銀各五千五百六十六兩有

奇。標右游營士兵四百五十名，歲餉大約銀五千七兩有奇。

分守北路參將標下：福寧營浙兵四百五十名，歲餉大約銀五千五百六十六兩有奇。福寧左右二營，各士兵四百五十名，歲餉大約銀各五千七兩有奇。

烽火寨：戰艦四十三隻，兵九百五十三名，歲餉大約銀萬一千二百六十八兩有奇。

崙山游，戰艦二十二隻，兵五百十四名，歲餉大約銀五千九百七十六兩有奇。

臺山游，戰艦十八隻，兵六百十九名，歲餉大約銀六千八百六十四兩有奇。

分守中路游擊標下：興化前營、左營、平海右營、泉州新營、舊營，各浙兵四百五十名，歲餉大約銀各五千五百五十六兩有奇。

南日寨，戰艦四十六隻，兵八百七十六名，歲餉大約銀萬七百四十兩有奇。

海壇游，戰艦三十隻，兵六百六十九名，歲餉銀大約七千九百三十兩有奇。

湄洲游，戰艦二十三隻，兵五百二十八名，歲餉大約銀六千八百八十四兩有奇。

分守南路參將標下：漳州前部中營，浙兵五百七十九名，歲餉大約銀六千八百五十兩有奇。前部銅山左營，浙兵四百五十名，歲餉大約銀五千五百五十兩有奇。前部陸鰲右營，士兵四百五十名，歲餉大約銀四千四百十兩有奇。

浯嶼寨，戰艦四十八隻，兵千八十九名，歲餉大約銀萬一千九百兩有奇。

銅山寨，戰艦四十五隻，兵千一百七十七名，歲餉大約銀萬二千兩有奇。

浯銅游，戰艦二十二隻，兵五百三十六名，歲餉大約銀七千百六十兩有奇。

澎湖游，戰艦二十隻，兵八百五十五名，歲餉大約銀七千二百三十兩有奇。

建寧守備所，轄建安、甌寧、建陽、崇安四縣民，兵六百一十一名，歲餉大約銀四千五百五兩有奇。

汀漳守備所，轄武平營兵五百一十七名，歲餉大約銀三千九百三十六兩有奇。

協守漳潮副總兵標下：福營，兵三百名，歲餉大約銀二千九百四十兩有奇。

南澳游，戰艦三十四隻，兵九百十八名，歲餉大約銀萬三百六十六兩有奇。

各府縣機兵，今隸在官籍役；弓兵隸巡檢，亦徒具數，不責逐捕盜賊。其數具載郡縣志，不盡錄。

右軍兵名餉。

何子曰：閩中成、弘以前，山寇多而海寇少；正、嘉以來，山寇少而海寇多。國初，州縣仍宋、元舊，山林深阻，菁棘蒙密，奸宄時竊發，至乎蔓不可圖。今其地芟夷之後，悉置縣司，卽欲嘯聚，靡所藏寄。此山寇多少所由異也。國初太祖嚴通夷禁，寸板不許下海。江夏侯經略海上，城寨方新，士伍驍健，又孰有寇？嘉靖之初，都御史朱統以禁夷仰藥死，副使柯喬亦坐誅。海上市易未易輒禁絕。至乎季年，倭從浙直入犯，閩中大亂以數歲。於今閩人生息益衆，非仰通夷無所給衣食。又閩地陞山多，渠瀆高陡，雨水不久蓄。歲開口而望吳越、東廣之粟船，海島能禁哉？倭故蹂躪吾民乎，來亦有時。今其所行劫海上者，率吾內地之民，假其面目，借其名號，殺越於貨，了無畏恐。此海寇多少所繇異也。方此之時，山寇少矣，當事者眷眷憂海上倭。要以前所言，海外之倭有時，內地之倭無日也。予友寧國沈有容，舊爲浯嶼把總，海濱之民皆知其生業出入，貿遷何業，所藏貨物當往何夷市；劇奸捕治之，其次可用爲耳目力使者，籍爲

兵，彼習知衝犁抵拒之法，見刀刃而不懼，望旗幟、聽金鼓銃砲色不怖，而又爲之利器械、堅船具。有容爲把總數年，泉中絕海寇。嗟乎！事在其人哉。雖然，人何容易！今夫武將一途，仕路啞寶也。文吏恥之而不敢言，且無人知也。不費之文吏，費之督總矣；不費之督總，費之兵部矣；不費之兵部，費之煬竈中央之人矣。而又欲自肥其身家，非虛冒賣放剝刻，何得也？下賤軍士，上嚙國家而嚙武備。予於武臣乎何誅？在當事與，在當事與！

贊曰：虎去爪牙，百獸起敵。桓桓如林，以奠南北。陸則剿滅，海則誅亟。有此隸籍，縣官仰食。武將統領，文吏拂拭。殫猷竭念，師武臣力。不者糜費，明神糾亟。

〔校記〕

〔一〕「隆慶」下，各本原闕一字。

〔二〕「在同安縣」下，各本原闕二字。

